



УЎК: 821.112.2-3 КБК: 84(5Ў)6

X - 71

**Хошимов**, Ўткир

Икки эшик ораси: роман. Ўткир Хошимов. – Тошкент: Янги аср авлоди, 2016. - 752 б.

ISBN 978-9943-27-754-0

Эътиборингизга ҳавола этилаётган мазкур китоб Ўткир Ҳошимов асарлари ичида қамрови, ўқувчи қалбига яқинлиги билан алоҳида аҳамиятга эга.

Унда адиб қарийб қирқ йиллик даврни ўз ичига олган, бир қанча чигал ва мураккаб тақдирлар мисолида ўз халқининг уруш даврида бошдан кечирган ҳаёти, қисмати ҳақида маҳорат билан қалам тебратган.

Замон ва давр қандай шароитда кечишидан қатъи назар инсоний қадр-қиммат тушунчаларини сақлаб қолған, тақдирини эл-юрти, халқи, Ватани тақдири билан боғлаған, фарзандидан айрилганида қам қалбиға қувонч бахш этиши мумкин бўлган бошқа сабабни ўзи учун ярата олган, ҳаётини севги-муҳаббат туйғулари билан безамоқчи бўлгани ҳолда уруш ҳукмига тобе бўлиб қолған инсонлар қисматини ифодаловчи ушбу асар мутолаасидан сўнг бугунги ўтаётган тинч-омон ҳаётингиз, фарзандларингиз бахти учун шукрона айтасиз. Асар айнан шу жиҳати билан қалбларга яқин.

УЎК: 821.112.2-3 КБК: 84(5Ў)6

ISBN 978-9943-27-754-0

«Рост билан ёлгоннинг ўртаси — тўрт энлик», деган гап бор. Қизиқ, нега энди оз эмас, кўп эмас, тўрт энлик? Гап шундаки, кўз билан қулоқнинг ораси — тўрт энлик экан. Эшитганингга эмас, кўрганингга ишон... Мақсад — шу.

Бу китобдаги кўп одамларни ўзим кўрганман. Кўплари билан гаплашганман. Баъзиларининг ўзи билан, баъзиларининг... рухи билан... Баъзилари нимани гапирган бўлса, шуни қоғозга туширдим. Баъзилари нима гапирганини эмас, нима ўйлаганини ёзишга мажбур бўлдим. (Начора, хамма рост гапиравермайди. Аммо ёлгон гапираётган одам хам ичида, бари бир ростини ўйлайди.)

Хуллас, бу савдолар кўп йиллар давомида кўп кишиларнинг бошидан кечган. Улар устидан ҳукм чиқариш – сизларга ҳавола...

Тилимнинг учида турган яна бир андишани айтмасам бўлмайди. Эҳтимол, сиз бу китобда фоже кўпайиброқ кетмадимикин, деган хаёлга борарсиз. Начора, аввало ҳаёт — нуҳул байрамдан иборат эмас. Уруш эса ўйин эмас. Иккинчи жаҳон уруши эллик миллион одамнинг уволига ҳолди. Шундан йигирма олти миллиони бизнинг одамлар эди. Энг азиз, энг асил кишиларимиз. Қолаверса, уруш фаҳат окопдаги жангчиларнинг жонига чанг солиб ҳолмади. Минглаб чаҳирим наридаги одамларни ҳам синовдан ўтказди. Мушкул дамларда имонини, инсонлигини саҳлаб ҳолган ота-оналаримиз, ака-опаларимизнинг ҳаёти бугунги замонда бизга ўрнак бўлса не ажаб!

Муаллиф

## МУҚАДДИМА ЁКИ ЭНГ АВВАЛГИ БОБ

## ҚУРИЛИШ-МОНТАЖ БРИГАДАСИНИНГ БОШЛИГИ МУЗАФФАР ШОМУРОДОВ ХИКОЯСИ

## Совуқ хабар

Пайшанба – маош куни эди. Пешиндан кейин атрофи тахта девор билан омонат ўралган қурилиш қовлисига чанг-тўзон кўтариб «ЗИЛ» машинаси кириб келди. Чеккадаги кўчма вагонча олдида вошиллаб тўхтади. Кабина эшиги очилиб, қўлтигига қора сумка қистирган кассир қиз – Фая сакраб тушди. Вагонча зинасига пилдираб чиқиб, бақирди:

- Йигитлар, келиғиз, зарплата олиғиз!

Бетончи Сафар ака айиқдек лапанглаб вагонча томонга биринчи бўлиб юрди. Кетидан пайвандчимиз Икром ака. Унинг кетидан Эркин деган такелажчи йигит...

Саратон офтоби аёвсиз қиздираётган, оёқ остида қум, бетон қоришмасининг кукунлари сочилиб ётган майдончадан ўтиб, вагонча соясига бордиму туриб қолдим. Ҳозир дилсиёҳлик бўлишини билиб, юрагим ғаш тортди.

Курувчи халқи – нозик. Маошнинг баракаси учдими, дарров «Ўз ихтиёри билан» ариза беради-да, сметаси «еб битирилмаган» бошқа жойга ўтади-кетади. Тошкентда нима кўп – қурилиш кўп. Тўгри, бизнинг йигитлар унақа эмас: ўн уч киши зилзиладан буён бирга ишлаймиз: ўн икки йил бўлди. Хаммамиз ака-ука бўлиб кетганмиз. Олти йил аввал мени ўзлари бригадир қилиб «кўтаришган». Шу

кунгача нарядни ўртача ўн сўмдан кам ёпмасдим. Бу сафар...

...Хаммасига ўша «А – 1» арматурали лаънати панель сабаб бўлди. Йўқ, гап панелда эмас, «Кобра»да! «Кобра» деганимиз бошқармамизнинг бошлиғи -Шавкат Қудратович. Шу одам ўз вақтида уйсозлик комбинатидан «А – 1» эмас, «А – 2» арматурали панелни етказиб берганида олам гулистон эди. Тағин дўк уришига ўлайми?! Уч кун аввал «Москвич»ида кеп қолди... Бригададаги йигитлар уни «Кобра» деганича бор. Хар «кўзи» пиёладек ойнак тақиб юради. Ўзининг юзи лагандек. Разм солиб қарсангиз, оппок чинни лаганнинг икки четига иккита пиёла тўнкариб қўйилганга ўхшайди. Аслида ким қанақа кўзойнак тақиши ўзининг ишику-я! Фақат Шавкат Қудратовичнинг феъли ғалати: ўтирган креслосини шунақанги яхши кўрадики, Сафар аканинг айтишича, орқасини ўша курсига камида «беш юз» маркали цемент билан ёпиштириб олган: қимирласа териси шилиниб чиқади. Унга битта нарса керак: қай йўл билан бўлмасин, планни бажарса, кўчма қизил байроқ олса - бас. Кетидан ишкал чикса, прорабними, бригадирними айбдор қилади-ю, ўзи бир чеккага чиқиб тураверади. Қабулига кирсангиз ўпишиб кўришади, чиқишингиз билан орқангиздан ёмонлайди...

Хуллас, уч кун аввал «Москвич»ида келиб қолди. Йигитлар учинчи қаватда домино ўйнаб ўтиришар, шақур-шуқур товушлар пастдан бемалол эшитилиб турарди.

Шавкат Қудратовичнинг ранги ўчиб кетди.

 Бу қанақа чемпионат? – деди юқорига имо қилиб.

Индамай туравердим. Кўриб қўйсин! Одамлар бекор ўтирибди. Керакли панель йўқ. Прорабга тушунтирдим, участка бошлигига илтимос қилдим,

ўзининг қабулига кирдим. Елкамга қоқиб чиқариб юборди.

– Ким y? – Шавкат Қудратович кўзойнагини ялтиратиб чақчайди. – Фамилияси нима?

Айтдим нима-ю, айтмадим нима? Қурилиш ашёлари бўлмаганидан кейин...

Индамай туришимдан ҳаммасини тушунди.

– Ишбузуқликка ўзлари бош-қош бўптилар шекилли, ўртоқ Шомуродов? – деди лаби бурилиб. – Бригадирлик юки оғирлик қилиб қолдими?

Яна индамадим. Охири унинг токати ток бўлди.

- Тил-забон борми ўзи! деди тутақиб. Квартал тугаяпти. Биринчи июлдан пардозчилар ишга тушиши керак. Тўртинчи қаватни ким монтаж қилади? Томни ким ёпади?
- Пардозчилар ҳали-вери ишга тушмайди, дедим хотиржамлик билан.

Шавкат Қудратовичнинг ранги гезариб кетди.

– Ўҳ-ҳў! Жа осмондасиз-ку йигит!.. Гап бундай: уч кунда тўртинчи қаватни монтаж қилиб, томни ёпасиз.

Нима дей? Нима қилай? Зина майдончасининг панели лойиҳадагидан роппа-роса бир қарич калта бўлса, қандоқ монтаж қиламиз? Майли, арматураларни учма-уч қилиб уласаям бўлади. Лекин «A-1» ингичка арматура.

– Эсингиздами, Шавкат ака, зилзилада биттаям панель уй йиқилмаган, аммо зинаси босиб қолган уйлар бўлган. Нормативдаги панелни беришмаса...

У «вой тентаг-ей», дегандек қул силтади:

– Зилзила ўн икки йил аввал бўлган, йигит. Энди қайтмайди. «Ванночка» билан кавшарлаб юборсангиз, қилт этмайди.

Тушундим. «Ванночка» дегани шуки, пўлат қувур узунасига кесилади, плитанинг арматураси билан девор арматураси ўртасига қўйиб, «қуюқ»

пайванд қилиб юборилади. Кейин икки четда қолган «ёриқ»қа бетон қуйилади. Тамом – вассалом! Аммо яқинда «Қора-қамиш» даҳасидаги битта уйнинг зиналари ўзидан-ўзи босиб тушди. Ер қимирламади, ҳеч ким эшигидан чиқиб зинапояда сакрамади. Бир тонналик бетон плита шунчаки ўз оғирлигини кўтаролмай чокидан узилиб кетди, бир эмас, уч қаватни босиб қолди. Яхшиямки, кечаси бўлган. Агар шу фалокат эрталаб, мактаб боласи ўқишга кетаётганида ёки кечқурун одамлар ишдан қайтаётганида рўй берса...

Дадам менга бир гапни кўп айтган. «Ўзингдан катта одам нотўгри гапирса ҳам қўрслик қилма, мулойимлик билан тушунтир».

Мен ҳам «мулойимлик» билан тушунтирдим.

– Шавкат Қудратович, ўзингиз биласиз. «Ванночка» фойда қилмайди...

Йўқ! Гапимни эшитгиси ҳам келмади.

– Сиз... сиз... – деди лаби титраб. – Майда одамсиз! Давлат манфаатини ўйламайсиз! Мана шу уйга кўчиб киришни ўн йилдан бери кутяпган одамлар бор! Оналар, болалар. Уруш инвалидлари... Топшириқни бажаринг!

Индамасанг «сиёсий томон» дан олади!

- Яхши! - дедим. - Битта илтимос, «А - 1» арматурали панелни монтаж қилиш мумкин, деб ёзиб беринг... Ўз қўлингиз билан...

«Кобра» сесканиб кетди. Ҳатто икки лунжи шишиб кетгандек бўлди.

– Сиз... – деди вишиллаб. – Илғор бошқармамизнинг умум мақсадига атайлаб болта уряпсиз. Кўрамиз, монтажчиларингиз носвойчининг ҳақини олса, нима деб сайраб қоларкансиз... Умуман... сиздақа бригадирдан воз кечиш масаласини ўйлаб кўрамиз... Далилларимиз етарли...

«Москвич» жўнаб кетанидан кейин кўп гапларни айтолмай қолганим ўзимга нашъа қилди. Ўз қўлинг билан ёзиб берганингда ҳам бегона плитани бари бир ишлатмасдим. Осмон қўлингда бўлса ташлаб юбор! Қачонгача қалбакилик қиламиз? Қачонгача ёлғон-яшиқ режа бажариб, байроқ оламиз? Шу уйда ўзинг яшармидинг, ноинсоф? Нега энди ўзингта раво кўрмаган нарсани ўзгаларга раво кўрасан! Ол, ўша дардисар бригадирлигингни!

Фақат... Бир жиҳатдан «Кобра»нинг гапи рост: бригададаги монтажчилар «носвой пули» олса, кўраман томошани! Мана, бугун... Ҳозир...

Ана, бетон қоришмаси сачрайвериб, шимининг почаси қатирмоч бўлиб кетган Сафар ака айиқдек лапанглаб келяпти.

 Нима бу? – деди чангалидаги уч сўмлик, беш сўмлик пулларни кўрсатиб.

Хазилга олдим.

- Пул шекилли, Сафар ака...
- Тўгри, пулга ўхшайди, аммо-лекин пулмас, ма, тўйингта ишлат! У кўкимтир пулларни силтаб, улоқтириб юборди. Уч сўмлик, беш сўмликлар пирпираб, офтобда қизиб ётган қум аралаш тупроқ устига сочилиб кетди. Қирқ уч сўм пулми? деди юзини чир ўгириб. Нима, мен сенга студентманми?

Гапни тағин ҳазилга бурдим.

- Ўн беш кундан олти кунини домино ўйнаб ўтказдик. Ўйнаб ўтирган кунимизгаям ҳақ тўладику, Сафар ака! Хурсанд бўлмаймизми?
- Мен сенга ўйнаб ўтираман дедимми?! Сафар ака қўлини пахса қилди. Ё бувимнинг чорвогида ишладимми? Топиб бергин эди, қиладиган юмушимни!

Ана, Икром ака ҳам келяпти. Бунисиям ҳозир саннайди, деб турсам, йўқ, ерда сочилиб ётган

пулларни хотиржам йигиштириб олди-да, Сафар аканинг чўнтагига тикди.

- «Кобра» матирял бермаса, Музаффарда нима гуноҳ? деди тўнғиллаб. Тудовой-судовой гапинг бўса бор, хўжайиннинг ўзига айт!
- Менинг хўжайиним «Кобра»мас, шу! Сафар ака қовогини уйиб менга имо қилди. Хўрсиниб қўйди. Бир нима эсига тушди шекилли, яна қўлини пахса қилди. Олтита болам ейман, ичаман деб турибди. Тўрттаси мактабга боради. Онангни эмгурни болаларига биттадан папка оберишгаям етмайди-ку, бу қизиталоқ! у жаҳл билан киссасига шапатилади. У ёгини сўрасанг, кичик қайинсинглим бошқа вақт қуриб қолгандек тугиб берди яқинда! Уни бешик тўйисиям мени гарданимда! Қайси бирига етказай!
- Оббо! Жа, оласан-да, сенам. Хотин киши эрга текканидан кейин туғади-да. Сендан сўраб ўтирармиди, Икром ака дўстининг елкасига шапатилади. Қўй энди, тудовой-судовой гапларни. Калтаи-кўтох плитани ямаб қўйсак, Худо кўрсатмасин, эртага бир бечорани босиб қолса, хурсанд бўлармидинг?
- Босмайди! Сафар ака асабийлик билан елкасидан Икром аканинг қўлини силтаб ташлади. – Шу кунгача босиб қолганини эшитганим йўқ. Ўзим бетон қуйиб, ямаб ташлардим...

Улганимнинг кунидан илжайдим.

- Бетон қуйган билан иш битмайди. Сафар ака, ахир шу уйдаям сиз билан менга ўхшаган одамлар...
- Э, бор-е! у шиддат билан бурилди. Ҳар куни ўн мартадан қулоғингни қоқиб қўлингга берадиган хотининг бўлмаса, йўлингга термулиб турган болаларинг бўлмаса, гапни ким қўйибди сенга!
- Ҳой хувори, Икром ака лапанглаб кетаётган ўртогининг кетидан югурди. Беш-олти қадам на-

рида етиб олиб, яна елкасига қўл ташлаган эди. Сафар ака тағин силтаб юборди.

Икром ака қайтиб келди.

– Кўнглингга олма, укам, – деди хижолатдан илжайиб. – Сафарни энди кўраётганинг йўқ-ку. Ҳозир тудовой-судовой дейди-да, бирпасдан кейин эсидан чиқади... У ёгини сўрасанг мендаям бештаси бор. Кўргансан-ку. Ҳаммаси чурвақа.

Индамадим. Лекин кўнглим хуфтон бўлди. Сафар ака тўгри айтади. Олтита боласи бўлса. Хаммаси ёш бўлса. Хотини ишламаса... Нима зарил эди менга у ёқда «Кобра»га, бу ёқда Сафар акага шумшук кўриниб? Биламан, «Кобра» орқамдан «материал» тўплайди энди. Ўзи бир чеккага чиқиб олади-да, ўринбосариними, бош инженерними ишга солади. Тупурдим ўша бригадирлигига! Ҳайдай қолсин. Аммо алдам-қалдам иш қилмайман.

Шуни ўйлаб, кечгача дилим гаш бўлиб юрди.

Темир арматуралардан кавшарлаб ясалган дарвозадан кўчага чиққанимда қуёш ботиб борар, хаво дим эди. Курилиш майдонидаги кран учида саратон офтобининг сўнгги нурлари яллигланади. Уфкни қизғиш туманлик қоплаган. Кун бўйи ёна-ёна толиққан осмон энди яхлит чўгга айланиб тинчигандек. Сафар аканинг гапи халиям хаёлимдан кетмасди. Рост айтади. Орқа этагимда оғирлигим йўқ, хархаша қиладиган хотиним йўқ. Берсанг ейман, бермасанг ўламан, дейдиган болам йўқ... Ҳозир уйга бораман. Омоннинг хотини - келиним, «мулла ака, яхши келдингизми», деб қўлимга сув қуяди. (Агар ишга тушдан кейин борган бўлмаса.) Кейин дадам билан ойимнинг хонасига кираман. Салом бераман. «Мана, дада, ойлик тегувди», деб бугун эл қатори олган қирқ етти сўмни қўлига тутқазаман. Дадам пулни санайди-да, «баракасини берсин», деб ўзимга қайтаради. Пулни

ойимга узатаман. Ойим олмайдиям, санамайдиям. Кўзимга термилиб туриб, чуқур хўрсинади. Ана ўша хўрсиниши ёқмайди. Авваллари маош олган куним албатта «эски гап» қўзғалар эди.

«Уканг бир эмас иккита болали бўлди, ўғлим, кўчага чиқолмайдиган бўлиб қолдим-ку! Кимни кўрсам, Музаффарни қачон уйлантирасиз, дейди. Даданг иккаламизни боглаб берганмас, болам...» Ойим гапини тугатмасдан дадам илиб кетади. «Қўй, Роби, овора бўлма, ўглинг осмондаги ойни олади!»

Дадам билан ойим гапираверади. Мен эса Мунавварни эслайвераман. Ҳайрат билан тикилиб турган кўзларини, катта-катта, қоп-қора кўзларини... Кейин нимага институтдан кетганим, нега қурилишга келганимни ўйлайман. Улар азбаройи зилзила туфайли ўғлимиз ўқишни ташлаб кетди, деб ишонади. Мен бўлса... Зилзила нима бўпти! Ўқишни ташлаш нима бўпти! Ўқишни ташлаш нима бўпти! Мунаввар бўлмаганидан кейин... Ахир одам умрбод унутолмайдиган, умрбод ўзини кечиролмайдиган нарсалар ҳам бўлади-ку жаҳонда?!

«Осмондаги ой» эмиш... Ойни нима қиламан... Кимман ўзи? Нега одамларга азоб беришим керак? Нима ҳаққим бор? Мана, бугун ҳам бригадамиздаги ўн икки кишининг ҳаммасини ҳафа қилдим. Сафар акадан бошқа ҳеч ким гапирмади. Лекин ҳаммасининг оиласи бор, бола-чақаси бор... Ҳатто мендан тўққиз ёш кичик Эркиннинг ҳам. Хўш, нима қилай! Катта виждонсизликлар кичкина нопокликдан бошланишини билсам нима қилай ахир?

...Метро бекати ёнидаги дўкончада лимон сотишаётган экан. Кўриб кўнглимнинг чигили хиёл ёзилгандек бўлди. Яхши, ойимни хурсанд қилишга баҳона топилди. Эрталаб, «бошимнинг орқаси ачишиб огрияпти, яна давлениям кўтарилганга ўх-

шайди», деб нолиган эди. Илгари ойимнинг буйраги оғрир эди. Биқинини чангаллаб икки букчайиб қоларди. Энди қон босими ҳам қушилган. Духтирлар буям буйрак касали билан боғлиқ дермиш...

Навбатга туриб икки кило лимон олдим. Буни қарангки, ялпизли сақич ҳам бор экан. Укамнинг қизи— Нилуфар эшикдан киришим билан, «нима обкелдиз, катта ада», деб оёғимга ёпишади. (Омоннинг ўғли ҳали кичкина, энди эмаклаяпти. Аммо Нилуфар пишиқ қиз: бижир-бижир қилиб одамнинг бошини қотириб ташлайди, жиннивой!)

Кўчамизга етиб келганимда ҳали ёруғ эди. Биласиз, бунақа пайтда бола зоти боғлаб қўйсангиз ҳам уйда ўтирмайди. Ҳаммаси кўчада шаталоқ отади. Қий-чув тўполон... Кўчадан дам-бадам машина ўтиб турганига қарамай иккита тошдан «дарвоза» ясаб олган болалар копток тепяпти. Атлас лозим кийган қўшни келинчак резинка ичакнинг бир учини ҳовлидаги водопроводга улаб, дарвоза олдига сув сепяпти. Димоққа қизиган асфальт ҳиди урилади.

Арқондан сакраб ўйнаётган Нилуфарни узоқдан кўрдим. Боқчадан кела солиб ташқарига отилган шекилли, оёгидаги гольфигиниям ечмабди. Боши устидан арқон айлантириб дикир-дикир сакраяпти. Ўзидан тикроқ ўртоги санаб турибди.

«Нилу!» дейишим билан ярқ этиб қаради-ю, арқоннинг бандидан судраганча мен томонга югурди.

- Сенга миннама обкелдим! дедим бир қўлимда лимон ўралган газетани қучоқлаганча, иккинчи қўлимни чўнтагимга тиқиб.
- Нима, катта ада, нима? деди Нилуфар ҳаллослаб.
  - Аввал битта ўпай, кейин бераман.
- Ҳо! Нилуфар ўзини орқага ташлади. Олдин беринг-да!

- Майли, яримта ўпаман.

Нилуфарнинг терлаб, кир бўлиб кетган юзидан ўпиб, сақични узатдим.

- Мана! Ўртогинггаям бер...
- Урре! Катта адам жевачка обкелдила! Нилуфар қўлимдан сақични юлқиб олди-ю, кутиб турган ўртоги томонга югурди. Беш-олти қадам нарига бориб тўхтади-да, бир нима эсига тушгандек орқасига қайрилиб қаради. Катта ада, бувим ўлдила... деди кўзларини пирпиратиб.
- Нима? Этим сесканиб кетди. Нима дединг? Нилуфар чопганча ўртогининг олдига борди. Икковлашиб югуриб кетишди. Кўз олдим қоронғилашиб, чайқалиб кетдим. Алланима ерга дўпир-дўпир тушаётганини кейин пайқадим. Қарасам, лимонлар асфальт йўлкада ҳар ёққа думалаб кетяпти.

Ойимнинг эрталаб айтган гапи яна қулоғимда жаранглади.

«Бошимнинг орқаси ачишиб оғрияпти, ўғлим. Тағин давлениям ошганга ўхшайди».

Юрагим сирқираб уйга югурдим. Қовли кимсасиз, сув сепилмаган, ивирсиб ётарди. Этак томондаги уйнинг (Омоннинг уйи) деразалари очиб қуйилган, сарғиш дарпарда осилиб турар, аммо ичкарида ҳеч ким йуҳлиги аниҳ эди. Бундан чиҳди... Бундан чиҳди... Бундан чиҳди... Айвонга ҳандай отилиб чиҳҳанимни, ойим билан дадам турадиган уйга ҳандай кирганимни билмайман.

Энг аввал девор тагидаги темир каравотта қарадим. Йўқ, каровот бўш эди. Шундагина дераза ёнида, хонтахта олдидаги кўрпачада ўтирган ойимга кўзим тушди. Эшикка суянганча бўшашиб туриб қолдим. Ойим хонтахтага энгашганча гуруч тозалар, деразадан тушиб турган нурда юзи рангсиз, дардчил кўринар, ингичка, узун бармоқлари билан

шошилмай гуруч териб, ёнидаги сирли тогорачага солар эди. Мени кўрди-ю, ярқ этиб қаради.

– Келдингми, ўғлим? – деди жилмайишга уриниб.

Одамзотнинг қонида ғалати адолатсизликлар бўлади. Бегоналардаги ўзгаришни дарров сезасизу яқин одамингизга эътибор бермайсиз. Худди ота-онангизни биров сизга боғлаб бериб қўйгандек. Гўё улар сиз учун абадий яшаши шартдек. Ойим кексайиб қолганини, сочлари оқариб кетганини, қовоқлари салқиб, юзи йиллаб тўшакка ёпишиб ётган одамдек сарғимтил-заҳил тусга кирганини энди пайқадим.

- Ойи... дедим секин... Тузукмисиз? Нилуфар... жинни... у ёғини айтмадим. Кўнглимни қувонч илитиб ўтди. Мен сизга лимон... Қарасам, газета «воронка»ни ҳалиям қўлтиғимга қистириб турибман. Тагида иккита лимон қолибди.
- Лимонни қўятур, Музаффар! Ойим оғир қўзғалиб ўрнидан турди. Совуқ лаблари билан пешонамдан ўпди. Ўтир, болам.

Хайрон бўлиб, кўзига қарадим. Хозиргина кўнглимни қувонтирган шодлик ўрнини хавотир эгаллади.

#### – Тинчликми, ойи?

Айвон томондан дадамнинг йўталгани эшитилди. Уйга аввал тамаки иси, кейин дадам кириб келди. Саломимга жавобан «валей...» деб қўйди-ю, оқсоқланиб келиб ўзининг жойига — хонтахтга тўрига ўтирди. «Беломор»ини сўриб хонтахта бурчагидаги пиёлага кулини чертди. Негадир хўрсиниб, юзини ўгирди. Нима гап ўзи? Ойимга юзландим. У чиллакдек ингичка, титроқ бармоқлари билан яна гуруч теришга тушди. Гўё ҳар битта гуручни санаётгандек, бир нуқтадан кўз узмас, лаблари титрарди.

- Нима бўлди? - дедим бетоқатланиб.

Ойим «сиз гапиринг», дегандек дадамга қаради. Дадам бўғинларини шиқирлатиб ўрнидан турди. Оқсоқланиб токча олдига борди. Чойнак қопқоғига қистириб қўйилган аллақандай қоғозни олиб, тепамга келди. Индамай узатди. Телеграмма экан. Тепаси кўк хошияли «Шошилинч телеграмма». «Онанг вафот этди. Жума куни чиқарамиз». Шу. Имзо ҳам йўқ, бошқаям.

Энди тушундим. Ҳали Нилуфар, «бувим, ўлдила», деб бежиз айтмаган. Бундан чиқди... Қўқондаги ойим... Онам... Бечора онам! Томогимга илиқ, аччиқ бир нима тиқилиб келди. Қачон кўрувдим охирги марта? Қачон борувдим Қўқонга? Неча йил бўлди? Ўн йилми, ўн беш йил? Билмадим, эсимда йўқ. Фақат қиш эди. Қахратон қиш... Тор кўча. Ўртасига қор уйиб қўйилган каталакдек ҳовли. Чақмоқ телпакли одам. Совуқ вокзал. Йўлдошхон ака. Тогорадаги ош. Қон йиглаб қолган онам.

...Бир маҳал ойимнинг пиқиллаб йиғлаёттанини идрок этиб бошимни кўтардим. Уй ичи қоронғи бўлиб кетган, дадам босиб-босиб папирос чекар, ҳар тортганида папироснинг учи ловиллаб, мўйлови, ўйчан юзи, бир нуқтага қадалган кўзлари ёришиб кетар, ойим рўмолининг учини юзига босганча ҳиқ-ҳиқ йиғлар эди.

- Бу дунёга келиб нима кўрди бечора, деди титрок лабларини тишлаб. Одамзоднинг холи шую, қадри йўк.
- Отланақол, Музаффар... Дадам дағал бармоқлари билан папиросини пиёлага ботириб ўчирди. Секин ўрнидан туриб, чўлоқланиб борганча чироқ ёқди. Самолётга ишониб бўлмайди, деди ўзига ўзи гапираётгандек. Поездга чиқасан. Ҳали-замон Омон келади. Ўзи обчиқиб қўяди.

Индамадим. Кўз ўнгимда яна ўша қор босган ҳовли, чақмоқ телпакли киши, музлаган перронда сирганиб-сирганиб вагон кетидан югурган онам жонланди.

- Шўрликнинг сендан бўлак кими бор! Ойим енгининг учини кўзига босди. Жилла қурса совуқ дийдорини кўриб қол, болам...
- Автобусда кетаман. Бу гап хаёлимга тўсатдан келди. Автостанция яқин. Автобуслар кечаси қатнайди...
- Маъқул! Дадам ойимга имо қилди. Қани, бўлақол, Робия!

Ойим сандиқ очди. Тугун тугди. Дадам қўлимга бир даста пул тутқазди. «Нима қиламан», десам бир оғиз, «керак бўп қолади», деб қўя қолди. Тугундаги нарса тўн билан дўппи эканини билиб, юрагим эзилди.

...Автобус ичи дим. Бензин иси тер ҳидига аралашиб кетган. Деразадан ташқарига тикилганча ўй суриб кетяпман. Осмонда тўлин ой хомуш нур сочади. Автобус билан ёнма-ён учиб боради. Пахтазорлар, йўл четидаги дарахтлар лип-лип ўтади. Ҳаммаси оймоманинг юмшоқ беланчагида ором олиб тебранади.

Эҳтимол кеча онам ҳам шу оймомага термилиб, мени ўйлаб ётгандир. Кўргиси келгандир. «Ўғлим қани», деб сўрагандир. Анавига-ку бир нима дейишга ҳадди сиғмайди. Насибага ялингандир: «Акангни чақиртир, кўриб қолай», дегандир...

Онам шўрлик.... Сўнгги ниятига ҳам етолмаган... Бу қандоқ бедодлик! Бу қандоқ адолатсизлик?!! Ўзинг-чи? Нега йиғламайсан? Кўзингда онанг учун тўкадиган бир қатра ёшинг йўқми?..

Автобус ҳамон чайқалиб боради. Аммо энди иссиқни ҳам, моторнинг гуриллашини ҳам, чек-ка-чеккадан қулоққа чалинаётган хурракни ҳам сезмайман. Хаёл минг ёққа олиб кетади.

Ажаб, инсон хотираси – эшиги ёпиб қўйилган омборга ўхшаркан. Омбор олдидан ҳар куни ўтасиз. Ўтасизу ўз юмушингиз билан овора бўлиб, қайрилиб қарамайсиз. Вақти келиб тасодифий шамол омборнинг эшигини очиб юборади-ю, беихтиёр ичкарига мўралаб қарайсиз. Шунда қизиқ ҳолат рўй беради. Омбор ичида олтиндан азиз нарса ҳам, кўзингиз тушиши билан таъбингизни хира қиладиган қақир-қуқирлар ҳам қалашиб ётган бўлади. Алам қиладиган жойи шундаки, сиз улардан хоҳлаганингизни ажратиб ололмайсиз. Буниси керакли, бунисининг кераги йўқ, деб бирини олиб, иккинчисини улоқтириб ташлаш қўлингиздан келмайди. Ҳаммаси бараварига жонланиб, атрофингизни қуршаб олади.

#### БИРИНЧИ ҚИСМ





#### БИРИНЧИ БОБ

# КИЧКИНТОЙ МУЗАФФАР ХИКОЯСИ

## 1. Мен, дадам, алвасти кўприк

Бугун «Кора аммам»никига борамиз! Дадам кеча ваъда қилган. Шунинг учун эрталаб хархаша қилмай уйгондим. Бир бурда арпа нон, тўртта жийда билан чой ичиб бўлгунимча дадам кавшандозда ўтириб этигини кийди. Чап пойини дарров кийди-ю, ўнг пойида анча қийналди. Доим шунақа бўлади: дадамнинг ўнг оёги қийшиқ. Урушда ўқ тегиб товонини учириб кетган. Пайтавани уч марта қайтадан ўради. Аллакимни сўкди. Кейин қаддини ростлаб жигарранг шимининг чўнтагидан тамаки халтасини олди. Халтачанинг богичини бир тортган эди, огзи ўзидан-ўзи очилиб кетди. Бошқа чўнтагидан буклоглик газета чиқарди. Тирноқлари сарғайиб кетган йўгон бармоқларини халтачага суқиб, бир чимдим тамаки олди-да, қоғозга тўкди. Қоғозни бураб-бураб тили билан бир хўллаган эди, папирос тайёр бўлди-қолди. Папиросни мўйлови тагига тиқиб, гугурт чизди. Дадам хар гал гугурт чизганида мўйлови ёниб кетмасайди деб қўрқаман. Мўйловиям йўгонда, ўзи. Худди «Қора аммам»нинг мушугини думига ўхшайди. Диккайиб туради, сарғайиб кетган. Хайрият, бу гал хам куймади.

 - Қани, гирой, кетдикми? – деди оғзидан тутун чиқариб. Отим гирой эмас, Музаффар. Чойхонадаги кишилар мени гирой-гирой дейвериб, дадамниям ўргатиб қуйишган. Отимни айтиб чақирмайди. Майли, гирой бусам бупман-да.

#### - Кетдик.

Ота-бола кўчага чиқдик. Эшигимиз олдида бир туп ёнгоқ бор.

Шунақанги баландки, учи осмонга тегиб туради. Кузда, ёнгоқ пишганда дадам узун таёқ кўтариб устига чиқади. Қарсиллатиб қоқади. Мен териб оламан. Аммо ҳозир – ёз. нгоқ ҳали пишмаган.

Шундай қилиб, «Қора аммам»никига йўл олдик. Олдинда дадам чўлокланиб боряпти. Оёгида этик. Эгнида икки чўнтаги дўппайиб чиққан жигарранг шим. Эски кўйлак. Бошида дўппи. Ҳар қадам босганида ўнг томонга йиқилиб кетаётганга ўхшайди. Лекин йиқилмайди. Фақат тез юрганида ўнг оёгининг тагидан, айниқса, кўп чанг кўтарилади. Судраб босади-да.

«Қора аммам»ники роса узоқ. Нўғайқўрғон деган жойда. Юравериб-юравериб чарчаб кетасиз. Кўчадан кетаверсангиз энг аввал «Туя» амакининг уйи келади. «Туя» амаки – сартарош. Абдували деган ўғли бор. Бўйи мендан каттароғу ўзи сап-сариқ. Абдували билан энди ўйнамайман. Анунда соққа қувар ўйнаган эдик, олтита ёнғоғимни ютиб қочиб кетди. Ўзининг эшиги олдида ёнғоқ йўқлигига алам қилган-да! Кетидан қувлаб кирмоқчи эдим, Мавлуда опасидан қўрқдим..

Шундай қилиб, Абдувалиларнинг уйидан ўтиб гузарга чиқасиз. Йўқ, аввал «Туя» амакининг сартарошхонаси келади. Фанердан ясалган, томига қора қоғоз ёпилган. Деразаси синиқ. «Туя» амакини Абдувалидан ҳам ёмон кўраман. Сочни устарада олади. Аввал бошингизни роса ишқалайди. Кейин совун суради-да, «бошингни эг», деб тур-

таверади-туртаверади... Бўйнинг огриб кетгани билан иши йўқ. Бўйнинг огриганиям майли, бурнингни тортавериб чарчайсан. Нуқул бошингни эгаверганингдан кейин бурун оқади-да! «Туя» амаки бўлса, сўкади: «Нима бало, гирой, бурнингда булогинг борми, қайнаб чиқяптими?» дейди. Бирпас шунақа ўтирсин, ўзиники қайнаб чиқмасмикин?!

Яна озгина юрсангиз чойхонага чиқасиз. Чойхона ўзимизнинг уй хисоб. Икки туп тол тагида тўртта сўри бор. Толлар шунақанги йўгонки, бизнинг ёнгоқдан ҳам катта... Кечқурун, бекинмачоқ ўйнаганда кавагига кириб олсангиз хеч ким тополмайди. Сўриларга намат ташланган. Тўгри, чойхўрлар наматни қайириб, тагига носвой туфлайвериб, қатирмоч қилиб юборган. Аммо бари бир намат устида ўтириш – яхши. Тагингдан зах ўтмайди. Тол шохига илинган беданалар бир-бирига гал бермай сайраб ётади. Айниқса, биттаси зўр. Бир сайраганда тўхтовсиз етти марта «бит-билиқ», «бит-билиқ» дейди. Ўзим санаганман. Дадамнинг айтишига қараганда Илҳом чойхоначи шу беданани Хастимом бозоридан бир ғунажиннинг пулига сотиб олган экан. Кечалари тўрковоги билан бошига қўйиб ётармиш.

Қишда дадам мени ҳар куни чойхонага олиб чиқади. Тамаки тутуни, самовар буғи билан тўлган пастак чойхонада одам одамни танимайди. Шифтдаги узун сим — илгакка илиб қўйилган фонус ўзини ўзи аранг ёритади. Аммо бу ердаги ҳамма нарсани яхши биламан. Қориндор сариқ самовар бурчакда туради. Занглаб, чириб кетган тунука карнай учидан тутун кўтарилади. Деворда Сталиннинг сурати. Шифтнинг қамишлари осилиб қолган: кузда чакка ўтган.

Совуқ тушиши билан сўрилар ичкарига олиб кирилади. Бир бурчакда шапарак кўрпача билан

иккита кир ёстиқ дўмпайиб туради. Лекин кўрпача ёзилмайди. Одамлар кигизда чордана қуриб ўтиришади. Хаммаси дадамга ўхшаган кишилар (хотинлар йўқ). Бири чопон, бири эски шинель кийган. Бирининг бошида куя ялаган телпак, яна бири қийиқчаси билан қулоғини боғлаб олган. Дастурхон йўқ. Тўгридан-тўгри кигиз устига қўйилган, эскилигидан гули билинмай кетган патнисларда нон (баъзан арпа нон, баъзан зогора нон), туршак, икки-уч чақмоқ қанд бўлади.

Чойхонадагиларнинг хаммаси мени танийди.

– Қани, гирой, қанддан олинг! – дейди «Туя» амаки илжайиб. – Булбулингиз ўсиб қолдими? Қачон тумшуғидан жичча кесиб сайратма қиламиз энди!

Нариги сўрида ўтирган силлиқ юзли, сийрак соқолли Комил бува патнисидан икки чақмоқ қанд олиб, азза-базза ёнимга келади:

- Мана, азамат йигит! Биззи қандданам еб кўринг.

Дадамнинг тиззасида ўтирган жойимда қандга қул чузаман. Дадам уришмайди. Бурчакка, самовар тутаб ётган томонга қараб қичқиради:

- Илҳом, самоварингни тагига тош боғлаганмисан, нима бало?! Бермаснинг оши пишмас деб!
- Ҳозир-да, акам айланай! Илҳом чойхоначи тунука карнайни кўтараман деб қўлини куйдириб олади, карнайни тарақлатиб ерга ташлайди-да, зўр бериб, дудбуронни пуфлайди. Йўтала-йўтала нари кетади. Аллақаердан бир пой эски маҳси топиб, қўнжини самовар дудбуронига кийгизади. Маҳсини ғайрат билан пастга босиб, шамол юборади. Самовар тагидан чўг сачрайди.
- Ўтин ҳўл-да, ака! дейди ўзини оқлаб. Ёмғирда қолган.
- Ёмғирдамас, дўлда! дейди «Туя» амаки бақириб.

Қийқириқ, кулги қулоқни ёргудек бўлади. Чойхоначининг юзи чўтир. Шуни аския қилишади. Биров дўлда қолган таппи дейди, биров чакичланган патир...

Чойхоначи ҳам бўш келмайди.

– Ёзда шунча ялиндим, – дейди шанғиллаб, – жон ака, сиз чўлда кўп юрасиз, бир аравагина саксовул обкеб беринг, десам ноз қилдингиз. Мана энди аҳвол бу: сизга чой етказиб бўладими? Чўмичда суғоргандай...

Боягидан ҳам қаттиқроқ кулги портлайди. Чойхўрлар бири тиззасига шапатилаб, бири қорнини ушлаб хохолашади. Дадам тиззасига урмайди, тиззасида мен борман. Лекин кўз ёшини артиб мазза қилиб кулади. Фақат битта одам – Комил бува хохоламайди. Секин жилмайиб қўяди. Комил бува – табиб. Уни ҳамма иззат қилади. Чойхоначи ҳам унинг патнисига топ-тоза, бутун чойнак келтириб қўяди. Охири, тутун ҳиди анқиб турган чой бизга ҳам келади. Дадам тумшуғига тунука уланган чойнакдан аввал менга чой қуяди. Кейин ўзига...

Чойхўрлар аллақандай Қурия ҳақида гаплашишади. Бу йил қор кўп ёққанини, буғдой мўл бўлишини айтишади. Оқсоқол колхозга янги трактор олиб келганини, эртанги карамни вақтлироқ экайлик деганини айтишади. Одамларнинг гап-сўзидан шуни англайманки, Оқсоқол бува «гадавой» майлисда, «мен энди кексайиб қолдим, бўшатинглар», деган. Аммо колхозчилар, «ўзингиз бош бўласиз», деб туриб олишган. Кўзим ўзидан ўзи юмилиб кетаверади. Дадам чопонига ўраши билан елкасига бош қўяман. Чап елкасига. Шунга ўрганиб қолганман. Дадамнинг чап елкасида муштимни тиқсам бемалол сиғадиган чуқурчаси бор. Қизғишкўкимтир чандиқ. Немис замбарак отганида ўйиб кетган экан. Доим ухлаш олдидан шу чуқурчани

ўйнашни яхши кўраман... Димогимга таниш тамаки иси урилади. Дадамнинг диккайган мўйлови томогимга тегиб қитиқлайди.

– Ухлайқол, – дейди шивирлаб. Чандиқни силаб-силаб, ухлаб қоламан... Эрталаб кўзимни очсам уйда – писиллаб қолган совуқ танча четида ётган бўламан... Кечқурун бўлса дадам мени кўтариб, яна чойхонага олиб чиқади.

Хуллас, чойхона – ўзимизнинг уй. Лекин ҳозир чой ичишга вақтимиз йўқ. «Қора аммам»никига тезроқ бориш керак. Ана, дадам тупроқ йўлда тўхтаб, жаҳл билан ўгирилди.

Бўлсанг-чи! Ҳали-замон кун ёйилиб кетади.
 Далага чиқишим керак.

Юриб-юриб, ёнгоқзор ичига кириб қолдик. Бу ердан аввал ҳам ўтганмиз. Ёнгоқзор шунақанги қалинки, баҳорда бировнинг сигири адашиб қолса, кузда ўзи қайтиб чиқмагунча эгаси тополмасмиш. Мана, ҳозир ҳам нимқоронги, зах чакалакзордан кетяпмиз. Юрагимни ваҳима босади: «Қора аммам» айтган: ёнгоқзорда ажина бўларкан. Одам адашиб қолса, огзини қийшайтириб кетаркан. Комил буванинг уйи шу ёнгоқзорнинг ичида – Бўрижарнинг қоқ устида эмиш. Комил бува ажиналардан қўрқмас экан. Қайтага огзи қийшайиб қолганларни дори бериб тузатаркан. Шунинг учун одамлар табиб бувани яхши кўрса керак-да!

Хаммасиям майли-ку, ҳали Алвасти кўприкдан ўтамиз. Шуниси, айниқса, ёмон. «Қора аммам»нинг айтишига қараганда уруш пайтида Алвасти кўприкда жин-ажиналар кўпайиб кетган экан. Бир марта Роби опамгаям даф қибди. Опам зўрга қочиб қутулган эмиш.

Ана, олисдан Алвасти кўприкнинг овози келяпти. Худди каттакон аждар, «келақол, сени ей-

ман», деб вишиллаётгандай. Дадам бўлса парво килмайди. Беш-олти қадам олдинда оқсоқланиб кетяпти. Жонҳолатда кетидан югурдим.

- Дада, чарчадим.

Хечам чарчаганим йўқ-да! Қўрқяпман. Лекин дадамга «қўрқяпман» дейишдан қўрқаман. Бир марта Алвасти кўприкда ажина бормиш деганимда, дадам сўкиб берган. «Бекор гап, ҳеч қанақа ажина-пажина йўқ, алвасти чўпчакларда бўлади, ўгил боласан, унақа қўрқоқ бўлма», деган. Биламан, дадам ёлғон гапирмайди. Аммо, бари бир, Алвасти кўприкнинг овози келиши билан «чарчаб» қоламан.

Дадам тўхтади. Орқага бурилиб қовоғини солди.

– Сўлоқмондай бола... – деди тўнгиллаб. – Ёшинг бешга чиқди-ю, уялмайсанми?

Шундай бўлсаям бари бир опичиб олди. Сув борган сайин қаттиқ шовуллайди. Кўзимни юмиб олган бўлсам ҳам сезиб турибман. Иштоним устидан оёғимга тикан киряпти. Бундан чиқди, шундай Бўрижар ёқасидаги тор сўқмоқдан кетяпмиз. Бир томони наъматаклар ўсиб ётган чакалакзор, бир томони ўпқондек чуқур жарлик.

– Бўғиб ташладинг-ку, қўйвор! – Дадам жаҳл билан бошини чайқади.

Ўзим ҳам биламан, дадамни бўғиб қўйдим. Лекин нима қилай, қўрқаман-да! Алвасти кўприкка энди келдик. Ана, ҳеч нимани эшитиб бўлмай қолди. Бўрижар дод солиб вошиллаяпти.

Ниҳоят сувнинг шовуллаши орқа томондан эшитила бошлади. Дадамнинг оёғи тагида шағал шақир-шуқур қилаётганини билиб, секин кузимни очдим. Дадам сирғана-сирғана темир йул устига чиқиб боряпти. Қурқа-писа орқага қарадим. Оппоқ купиклар қутуриб тор куприк остига кириб кетаётган Бурижарга кузим тушиб дарров юзимни угирдим.

Дадам, нихоят, темир йўл устига чикди. Димогимга чучмал ис - қора мой ҳиди урилди. Олисда тоглар ортидан қуёш чиқиб келар, дадам хамон чўлокланганча шақир-шуқур шағал босиб, бир жуфт темир йўл орасида мени опичлаб борарди. Шундагина қип-қизил бўйни терлаб кетганини, кўйлаги ҳўл бўлиб, чап елкасидаги чуқурчасига ёпишиб қолғанини кўрдим. Қўлимни секин бўшатдим-у, ўша захоти кўнглимга яна гулгула тушди: поезд келиб қолса-чи? Босиб кетади-ку! Хусан бувам билан Оқсоқол бувага худди шу ерда ажина даф қилганда. «Қора аммам» айтиб берган. Оқсоқол бува ҳам, Ҳусан бувам ҳам полвон бўлишган экан. Иккаласи йўлни тўсиб қўйган алвастини Бўрижарга улоқтириб юборишибди-ю, ўзлари поезд тагида қолишибди. Поезд ичида ўзимизнинг аскарларимиз бор экан-да! Алвастини темир йўлдан олиб ташлашмаса, поезд агдарилиб кетаркан. Ўшанда Оқсоқол бува амаллаб тирик қопти-ю, Хусан бувам ўлибди. Айтмоқчи, ўшанда алвастини жарга ташлашда Роби опам билан табиб буванинг Олимжон деган ўғлиям ёрдам беришган экан. Роби опамдан шуни сўрасам, негадир айтмайди. «Қўйсангчи, ўша гапларни», деб қўя қолади.

Дадам харсиллаб нафас олиб, нариги томонга пастга тушди. Алвасти кўприк хамон шовуллаб турар, лекин энг қўрқинчли жой орқада қолган, бу томонда сув ёйилиб тинчгина оқар эди. Терак бўйи қамишлар ўсиб ётган чакалакзорга киргандан кейин дадам елкаси оша менга ўгирилиб қаради.

– Тушсинлар энди, гирой, иззатингиз битди. Ерга тушишим билан калишим сувга тўлиб чиқди. Қамишзор орасидаги сўқмоқни илиқ, лойқа сув босган эди. Эрта сарғайган қамишлар охиста чайқалиб, шитирлаб турар, учидаги макка супургидек попилтириклари секин-секин чайқаларди.

Бақаларни айтмайсизми? Бир-биридан қолса қулоғини кесадигандек овози борича вақиллайди.

- Қамиш, дедим ҳиҳиллаб. Варрагимга ҳамиш оберасиз.
- Ҳозир варрак учирадиган пайтмас! Дадам қўлимдан тутди. Юр, чивинга ем бўласан.
- ... Ана, Нўғайқўргонгаям етдик. Олисда оқ уй кўриндими, Нўғайқўргонга келганимиз шу! Оқ уй колхознинг идораси. Биз у томонга юрмаймиз. Битта арава зўрга сигадиган тор кўчага кирамиз. Икки томонда пастак уйлар. Баъзиларининг девори тагига сомон уйиб қўйилибди. Кузда томни сомон сувоқ қилишади. Уйлар орасида Оқсоқол буваники ажралиб турибди: болохонаси бор. Болохонадор уйга яқин келганда дадам яна қўлимни силтади:

## - Тезроқ юр!

Оқсоқол буванинг дарвозаси олдидан тезлаб ўтиб, «Қора аммам»нинг эшигига келдик. «Қора аммам»никида дарвоза йўқ. Эшигиям шунақа кичкинаки, дадам энгашиб киради. Ана, эшикдан анча нарида, баҳорда каллакланиб, қайтадан шох отган тол тагида эшак арава турибди. Араванинг бир ғилдираги синган. Шотиси лайлак қилиб қуйилибди. Бувам ўлганидан кейин эшаги ҳам ҳафа бўлиб ўлиб қолган экан. Аммо арава ҳалиям бор. Ҳар келганимда устига чиқиб ўйнайман.

Қозир ҳам арава томонга югурган эдим, дадам жаҳли чиқиб бақириб берди:

- Борма у ёққа!

Пастак эшикни ғийқиллатиб очди-да, ичкарига мўралаб чақирди:

Опа!

## 2. «Қора аммам»нинг мушуги

Довлига киришим билан айвондан тушиб келаётган «Қора аммам»ни кўрдим. Аммам худди коптокка ўхшайди. Кичкина, дум-думалоқ. Тағин ёздаям қора нимча кийиб юради.

- «Қора амма!» Бизлар келдик!
- Вой амманг айлансин! Вой амманг ўргилсин сендан! У пилдираб келиб мени багрига босди. Димогимга қатиқ ҳиди урилди, юзимдан ўпаётганда оппоқ сочининг учига осиб олган сўлкавой чўлпилари бир-бирига урилиб жиринглаб кетди.
  - «Қора амма», тангангизни ўйнасам майлими?
  - Вой танга сендан айлансин!

Дадам елкамга секин туртди.

- Неча марта айтганман: «Қора амма» эмас, амма дегин, тентак!
- Сени ишинг нима! «Қора аммам» дадамга қараб илжайди. Қорани қора дейди-да! Қораман! Тўгрими? Юр, болам!

Аммам қўлимдан тутиб, айвонга судраган эди, орқадан дадамнинг овози келди.

- Мен кетдим, опа. Кеч қоляпман.
- Ҳой, қаёққа? Аммам мени қўйиб, дадам томонга талпинди: Чой-пой ичмайсанми?
- Кечки картошкани чопиқ қиламиз. Оқсоқол кўрсалар хафа бўладилар. Кечқурун, келарман.
- Робия ҳам саҳарлаб чиқиб кетган. Бир пиёла чой ич ахир.

Дадам кўнмади. Шоша-пиша кетиб қолди. Аммам иккаламиз айвондан ўтиб, уйга кирдик. Аммамнинг уйи бизникига ўхшаган эмас. Хамма ёқ топ-тоза. Хатто деразаларда парда ҳам бор. Токчалардаги лаган-баркашлар ярақлайди. Еттинчи лампанинг шишаси ҳамиша ялтираб туради. Роби опам ҳар куни кул билан ювади. Ўзим кўрганман.

Деворда иккита сурат бор. Ёгоч ромга солиб кўйилган. Иккаласиям сарғайиб кетган. Биттаси Хусан бувамники. Бошига кичкинагина салла ўраган, чўққисоқол чол. Негадир доим қовогини солиб туради. Биттаси ёш йигит. Бошида дўппи, эгнида тўн. Хиёл жилмайиб турибди. Худди, «бери кел, сенда гапим бор», деяётганга ўхшайди. Қошининг қалинлигими, қирра бурними – аллақаери дадамга ўхшаб кетади. Фақат мўйлови йўқ. Бу – «Қора аммам»нинг ўгли – Кимсан акам.

«Қора аммам» бир қўлида супра, бир қўлида элак билан кириб келди. Элакда анча-мунча туршак бор эди.

– Ма, болам, туршак еб тур, қозир сенга нон ёпиб бераман. Ўзингга ўхшаган ширингина кулча.

Туршак чайнаб «қора аммам»нинг рўпарасида ўтирибман. Аммам чўккалаб ўтирганча ун элаяпти. Элак тап-тап этади. Тагидан супрага ун ёгилади. Худди қордек. Аммамнинг қоп-қора билаклари бирпасда унга беланди. У бошини бир ёнга ташлаганча элакни тапиллатади. ўиж-гиж нафас олади. Қизиқ, худди ичига митти одамчалар кириб олгану ҳадеб ҳуштак чалаётгандек. Баъзан «ҳуштак» шунақа кучайиб кетадики, ўзимнинг ҳам нафасим бўгилиб қолаётганга ўхшайди. Мана, ҳозир ҳам аммам «гийқ-гийқ» нафас оляпти.

- «Қора амма», ичингизда нима бор?

У ярқ этиб бошини кўтарди. Маъюс кулди.

- Дард бор, болам, акангни дарди бор...

Яна жимлик чўкди. Элак тапиллайди. Тагидан ун ёгилади. Аммамнинг ичидаги «одамчалар» ҳуштак чалади.

Туршагимни еб бўлдим. Энди данак чақиш учун ўрнимдан турмоқчи эдим, аммамнинг овози чиқиб қолди. Менга гапиряпти, десам, ашула айтаётган экан.

Дукур-дукур от келди, От бошида хат келди. Хатини ўқиб кўрсам, Вой-вой билан дод келди...

Қизиқ, элак ҳам аммамнинг ашуласига мос тапиллаётганга ўхшаб кетди. «Дукур-дукур от келди...»

Аммам яна жимиб қолди. Нафасининг ғижиллаши кучайиб кетди. Деворга – Кимсан акамнинг суратига тезгина қараб қўйди-да, хўрсинди, яна мингиллаб ашула айта бошлади.

Жон болам – жоним болам, Оллога топширдим сани, Охимга Олло етмади, тупроққа топширдим сани.

Бу гал элакнинг тапиллаши ҳам сусайиб қолди. Энди у секинроқ, оғирроқ чайқала бошлади. Худди «жон бо-о-лам, жо-ним бо-о-лам» деяётгандай.

Аммам икки қўллаб элакни кўтариб ун ёпишган билаги билан кўзини артди.

- «Қора амма», йиғламанг... дедим ялиниб.
- Йиглаганим йўқ, болам! Аммам бурнини тортиб жилмайди. Нега йиглай? Яқинда Кимсан аканг келади. Тўй қиламиз. Сен-чи, Кимсан аканг билан отга мингашиб тўйга айтасан... Бор, болам, данагингни чақиб егин. Тандир тагида-чи, теша бор. Ҳазир бўл, қўлингни чақиб олма тагин.

Қулимда бир ҳовуч данак билан айвонга чиқдим. Айвон токчалари бум-буш. Иккита сопол лаган билан туртта товоқдан булак нарса йуқ. Деворга қатор мих қоқилган. Биламан, куздами-қишдами келсангиз, шу михларга қатор қилиб беҳи илиб қуйилган булади. Айниқса, қишда ҳамма ёқни беҳи ҳиди тутиб кетади.

«Қора аммам»нинг ховлиси бизникидан катта. Бизнинг ховлимизда икки туп олмадан бошка дарахт йўқ. Аммамникида бехиям бор, гилос хам. Бир ойми-икки ой аввал келганимда роса гилос еганман. Роби опам бостирма томига чикиб узиб берган. Хозир гилос қолмаган. Нок бўлса – пишмаган. Тош нок. Бизнинг ховлимизни девори паст. Устига лўмбоз бостириб, қуриган янтоқлар қадаб қўйилган. Ўгри ошиб тушаман деса, қўлига тикан кириб, қочиб кетади. «Қора аммам»нинг девори баланд. Отга миниб тирмашсангиз ҳам бўйингиз етмайди. Бизнинг деворга таппи ёпилмайди. Аммамникига ёпилади. Ана, кунгай томондаги деворга қатор таппи ёпиб қўйилибди. Юқоридагилари қуриб қолған, пастдагилари ҳали хўл. Устида пашша айланяпти. Бизнинг ховлимизда пиёз йўк. Аммамникида бор. Кўкпиёзлар уруг бойлаб ётибди. Пуштасига кул сепилган. Ундан нарида гултожихўрозлар, райхонлар...

Гувиллаб олов ёнаётган тандир тагидан тешани топиб, япасқи ғишт устида данакларни чақиб едим. Охири учтами, тўртта данак қолган эди. Ўнбошимда бир нарса «миёв» дейди! Қарасам, «Қора аммам»нинг мушуги! Жуда ювош мушук-да, ўзиям! Дадамга ўхшайди! Дадамнинг мўйловини тортсам индамайди. Мушукни думидан тортсам ҳам жим туради. Севиниб кетдим.

## – Ма, Мош, пиш-пиш!

Мош «миёв» деб оёгимга суйкалди. Бўйнидан ушлаб огзига магиз тиқдим.

## - Е, Мош, е!

Шунақа ширин мағизни емади! Оғзидан чиқариб ташлаб «пси» деб аксириб ҳам қуйди. Мушукни қучоқлаганча ҳовли этагига югурдим. Мушук шунақанги чаққон буладики, аэропландан ташла-

сангиз ҳам ўлмайди. Оёғи билан тушади! Абдували айтган. Қани кўрайликчи!

Э, «Қора аммам»нинг бостирмаси баланд эканку! Нарвон сўрамоқчи бўлдиму қўрқдим. Биламан, аммам, «мушукка озор берма», деб койийди.

Мушукни қучоқлаганча ҳовли бурчагига бориб қарасам, ҳожатхона томи билан бостирманики туташиб кетган экан. Аввал ҳожатхонанинг томига чиқамиз, кейин бир осилсак, бостирмага чиқиб турибмиз-да!

Шундай қилдим. Тўнкарилиб ётган сават замбилга чиқиб ҳожатҳона томига тирмашдим. Икки тирсагим деворга тегиб шилиниб кетса ҳам парво қилмадим. Кейин амаллаб бостирмага чиқиб олдим. Мушук шунда ҳам парво қилмади. Кўзини юмиб, ҳуриллаб ётибди. Бостирма томидаги ўтлар ҳовжираб ҳолган экан. Товонимга тегиб ғашимни келтирди. Нима ҳипти? Ҳозир том четига етиб оламиз!

Худди шу пайт «Қора аммам» сават кўтариб тандир томонга ўтиб қолди. Мош ҳам аммамни кўрди шекилли, типирчилаб миёвлади. Аммам овоз қаёқдан келганини билмай аланглади. Лекин ҳар эҳтимолга қарши огоҳлантирди:

– Мушукка озор берма, Музаффар! Пайғамбар орқасини силаган жонивор-а!

Хозир кўрамиз-да! Пайғамбар силаган бўлса орқаси билан тушармикин, оёғи биланми?

– Мош-Мош, бўлди... – деб силаб-сийпаладим-да, том лабига келдим. Аммамнинг тандирни ковлашини пойлаб туриб, мушукнинг тўрттала оёгидан қисиб ушлаганча чалқанчасига ерга ташлаб юбордим. Мушук ўша захоти лип этиб ўнгланди. Оёги билан ерга юмшоққина тушди. Думи ҳурпайиб кетди. Яна бир марта «миёв» деб мен томонга жаҳл билан бир қаради-да, гултожихўрозлар орасига кириб гойиб бўлди. Қойил! Абдували тўгри айтган экан!

Томдан қайтиб тушиб, гултожихўрозлар орасини қарасам, мушук йўқ. Шунча қидирсам ҳам тополмадим. Зерикиб молхонага кирдим. Бурчакда турган сигир нимқоронғида кўзлари ялтираб пишқириб қўйди. Аммамнинг сигири ҳам ўзига ўхшаган қоп-қора. Сигир кавш қайтараркан, ювошгина «мў-ў» деди. Бора-бора қоронғиликка кўзим ўрганди. Ўртадаги устунга исириқ боғлаб қўйилган. Исириқ чанг босиб қорайиб кетган. Девордаги михларга қуриган гултожихўрозлар, шода-шода қизил гармдорилар илинган. Бир чеккада хаскаш, кетмон, паншаха...

Энди бостирмадан чиқиб кетаётсам, қатор-қатор хумларга кўзим тушди. Қар биттаси мендек келади! Аммам айтган. Бир вақтлар – урушдан олдин шу хумларда дон-дун, гўшт-ёг тураркан. Қусан бувам ҳамма нарсани қоплаб, хумлаб оларкан. Қозир улар бўм-бўш. Чертсангиз, «гум-гум» қилади. Аввал битта хумни чертдим. «Гум» деди. Бундан чиқди ичида ҳеч бало йўқ. Кейин иккинчисини, учинчисини чертиб кўрдим. Ҳаммаси гумбиллайди. Охиргисининг ичида бир нима шатир-шутир қилди. Ие?! Чертишга тоқат қилмай муштим билан уриб кўрдим. Алланима хум ичини тимдалагандек бўлди. Бирдан Мош эсимга тушди. Томдан ташлаганимда аразлаб хумга кириб олган бўлса-чи?

– Мош! – Овозим борича бақирдим. – Мош, чиқ. Энди унақа қилмайман.

Ховли томондан «қора аммам»нинг товуши келди.

- Кулчанг пишди, Музаффар!

Хум ичида яна ўша шитирлаш эшитилди. Оёгим учида чўзилиб уввало уринсам ҳам, нима борлигини кўролмадим. Хумнинг огзи пешонам билан баб-баравар!

«Қора аммам» тағин чақирди.

- Келақол, болам, совиб қолади!

Охурда ётган пачоқ челакни кўтариб келдим-да, тўнкариб устига чиқдим. Хумнинг бўйнидан чангаллаб ичига мўраладим. Хеч нарса кўринмайдию бари бир тагида бир нима типирчилаяпти. Нихоят хумнинг силлиқ деворига сапчиётган каттакон ола каламушни илгадим. Хатто бир марта «гийқ» деб чийиллаганини ҳам эшитдим. Бўлди! Ҳаммаси аниқ! Бу каламуш амаллаб хумга ўрмалаб чиққан. Ичидаги донни еган! Еб бўлиб қанақа қилиб чиқиб кетишини билмаяпти. Ҳозир кўрасан! Мошни обкеламан, таъзирингни беради.

Тўнкарилган челак устидан сакраб тушиб, ҳовлига отилдим.

- Мош! Пиш-пиш! дедим ялиниб.
- Вой, Мошинг ўлсин! «Қора аммам» тандирга шўнгиркан, сават бурчагида турган жажжи кулчага имо қилди. Аввал ўзинг еб ол.
- Мош! Пиш-пиш! Қўлим куйганга қарамай кулчани бурдаладим. Димогимга нон иси урилиб огзим сув очиб кетди. Бироқ қозир нон ейишдан кўра қизиқроқ ишим бор. Мушукни топсам бўлди!
  - Ма, Мош! Мана нон!

Мушук нон хидини сезди.

Миёвлаб яқин келди. Тиззамга ўтқизиб бир бурда нон едирдим. «Қора аммам» иккинчи саватни ёпишга киришганини кўриб, мушукни секин кўтарганча бостирмага югурдим. Аввалига индамай келган мош қоронғи бостирмага кирганидан кейин думи ҳурпайиб, типирчилай бошлади.

– Мош, Мош! – деб орқасини силадим-да, каламуш қамалиб қолған хумга яқин келдим. – Мош!.. Мана... Қозир...

Мушукнинг кўзлари совуқ ёниб, жунлари типпа-тик бўлиб кетди.

– Мош... – Шундай деб мушукнинг бошини хум огзига тиққанимни биламан. Ёввойи товушда

«мав!» дедию орқа оёғи билан қўлимни қаттиқ тимдалади. «Вой-вой»лаб қўйиб юбордим. У жонҳолатда сигир устига сапчиди. Сигир пишқириб ўзини четга ташлади. Думини хода қилиб мўраб юборди. Мушук кўзлари ёнганча эшикка отилди. Ўнг қўлимнинг кафтида аввал тўртта оппок, чуқур чизиқча пайдо бўлди, ўша заҳоти чизиқчалардан тирқираб қон оқа бошлади. Оғриқдан кўра қондан қўрқиб бақириб юбордим.

- Амма! «Қора амма!»

Fиж-ғиж нафас олганча, қўрқувдан кўзлари олайиб кетган аммам югуриб кирди.

- Нима қилди? деди нон ҳиди анқиб турган қуллари билан бошимни бағрига босиб. Айт, нима булди?!
  - Юмдалади! Мушук юмдалади! Вой қўлим!
- Хаҳ қилиқларинг ордона қолсин-а! Отангга нима дейман! Аммам құлимдан чангаллаган куйи ҳовлига олиб чиқди. Мушук билан ўйнама девдим-ку! деди ёгоч қошиқда қозон тагидан қоракуя қиртишлаб оларкан.

У ярамга қоракуя босганида баттар ачишиб кетди.

- Каламуш! дедим йиғлаб. Хумда каламуш бор экан. Мош билан уриштирмоқчи эдим.
- Ўлсин! Аммам нафаси ғижиллаб бошидан рўмолини юлқиб олди. Сочлари ёйилиб попук тангалари жиринглаб кетди. Каламуш ўла қолсин! Хумни йиқитсанг-ку ўз йўлига кетарди. Отангга нима дейман. Эрка бола бўлсанг...

Ажаб, аммам қоракуя босиб рўмоли билан боглаганидан кейин огриқ дарров қолди. Аммам чой ичирди, ўзимнинг кулчамдан қолганини едирди. Жой солиб берди.

– Ухла! Отанг нима қилди, деса, йиқилиб тушдим дейқол. Укам бечоранинг топганиям, тутганиям сенсан... Нега ухларканман! Тўгри, энди Мош билан ўйнамайман. Ёмон мушук экан. Аммамникида ўйин камми! Ана, Хусан бувамнинг аравасига чиқаман. Бир гилдираги синган бўлса нима қипти? Аввал устига чиқаман. Кейин секин-секин шотисига осилсам «лайлак» бўлиб турган шоти ерга тушади. Шотини қўйиб юборсам, яна кўтарилиб кетади.

«Қора аммам» овқатга олов ёқишини пойлаб пастак эшикдан лип этиб ташқарига чиқдим. Эшак араванинг бутун ғилдирагига осилиб устига миниб олдим. Шоти бандига кўндаланг ўтириб, пастга боса бошладим.

Офтоб ботиб кетган. Нимқоронғилик чўккан, ҳавода жўхори кабоб ҳиди келарди. Қаёқдан келяпти бу ҳид? Оқсоқол буваникидан шекилли. Менам аммамга кўмма ҳиберинг десам бўларкан. Жўхори кўмма зўр! Думбул сўтанинг орқасига чўп тиқиб, чўғга суқсангиз, «порс-пурс» этган овоз чиқади. Қарабсизки, бирпасда жўхори кабоб тайёр!

Араванинг шотисини энди пастга туширган эдим, нимкоронгилик ичидан овоз келди.

- Музаффар!

Танидим! Роби опам!

- Роби опа! аравани ҳам унутиб чопиб бордим. Роби опам бақувват қўллари билан ердан даст кўтариб қучоқлаб олди. Димогимга лампамой ҳиди урилди.
- Арава ўйнама, болажон! деди юзимдан ўпиб. Юр, уйга! Яхшиси, эртага ўзимнинг отимга миндираман.

Роби опамнинг «отини» биламан. ўилдиракларининг тиши катта-катта, дудбуронидан тутун чиқиб турадиган трактор! Баҳорда келганимда Роби опам «оти»да учирган. Роби опамни яхши кўраман. Ўзиям яхши-да! Аммамга ўхшаган кичкинамас. Бўйи новча, юзи оппоқ, чиройли. Сочи узун, ерга тегади.

Роби опам бизникига ҳам бориб туради. Жомашовда менинг иштонларимни, дадамнинг кўйлак-шимларини ҳафсала билан ювади. Роби опам «Қора аммам»нинг рўмоли билан богланган қўлимга кўзи тушди-ю, хавотирланиб сўради:

- Нима бўлди, болажон?
- Э, ҳеч нима! дедим гиройлик қилиб.

Роби опам лампамой ҳиди анқиб турган қучоғидан бўшатмай мени ҳовлига олиб кирди. Ошхонада куйманаётган «Қора аммам» биз келганимизни дарров билди.

– Робия! – деди қозон кавлашда давом этиб. – Мошхурда пишди. Чироқни обкириб, сигирни соға қол.

Овқатдан кейин айвонда, хонтахта атрофида ўтириб чой ичдик. Аммам ғиж-ғиж нафас олиб, дастурхонда қолған нон увоқларини йиғиштирди. Роби опам тиззасиға қийиқча ташлаб гул сола бошлади. Бостирма томининг орқасидан ой чиқди. Олис-яқинда итлар акиллади. Аллақаёқда мушук миёвлади. Қўлимни тимдалаган Мош... Одамни зериктирадиган жимжит оқшом.

Бирдан дадам эсимга тушиб қолди. Нимага ҳалигача келмади?

- «Қора амма!» Кетаман! дедим йиғламсираб. Дадамминан ухлагим келяпти!
- Ҳозир болам, даданг ҳали-замон кеп қолади! аммам юпатиб, пешонамдан ўпди.
- Вой, болажон. Робия опам тикиб ўтирган каштани ёнига қўйиб бошимни силади. Ке, менинг ёнимда ўтир.
- Керакмас... дедим йигламсираб. Дадам қачон келадила?
- Худойим-ей! Аммам мени бағрига босди. Сени отанг туққан ўзи! Келади! Келмай қаёққа борарди!

Бир томонимдан аммам, бир томонимдан Роби опам ўртага олиб ётишди. «Қора аммам»дан қатиқ

иси, Роби опамдан лампамой ҳиди анқийди. Мен бўлсам дадамнинг тамаки иси анқиб турган мўйловини, елкасидаги чуқур чандиқни ўйнаб ётишни қўмсайман...

# 3. Ёмон чумчуқ

Тамакининг таниш иси димогимга кириши билан уйгониб кетдим. Кўзимни очсам, тепамда дадам чекиб ўтирибди.

- Турсинлар, гирой, деди кулимсираб.
- Қачон келдиз?
- Ўзинг ухлаб қопсан-ку, қани ювин тезроқ.

Ростдан ҳам кечаси ёнимда дадам ётгани аниқ. Ёстиқдан папирос ҳиди келяпти. Ўрнимдан туришим билан дадам боғлоқлиқ қўлимга ҳараб сўради.

- Нима қилди?
- Э, йиқилиб тушдим.

Айвондан тушиб борарканман, дадам кетимдан гапириб қолди.

-Тинчимаган боласан-да, сув тегизма энди. Газак олади.

Гултожихўрозлар очилиб ётган ариқча бўйига чўнқайиб, чап қўллаб ювиндим. Қарасам, нарирокда Мош ҳам ювиняпти. Олди оёгининг учини оғзига тегизиб ҳўллайдида, юзига суртади. Ўзининг юзини юмдаламайди! Кесак билан тушириб қолгим келди-ю, дадамдан ҳўрҳдим.

Аммам ошхонадан икки товоқ қаймоқ олиб чиқди. Роби опам аллақачон далага кетган, вақтли бормаса, Башор хола деган бошлиғи уришади!

Дадам қаймоққа нон тўғраб, шоша-пиша еди.

– Бола қолаверсин! – «қора аммам» ҳарсиллаб нафас олганча дадамга юзланди.
 – Юраверади. ҳали жуҳори кабоб ҳилиб бераман.

- Ҳа! дедим иргишлаб. Жўхори кабоб ейман!
- Йўқ! Дадам менга қараб қовоғини солди. –
   Тўполон қилиб, яна бир балони бошлайсан.

Аммам дадамнинг қўлига тугунча тутқазди. Биламан, тугунчада кеча ёпилган нон, туршак бор. Пастак эшик олдига келганда девор тагида турган каттакон кетмонга кўзим тушди. Дадамнинг кетмони! Банди шамдай силлиқ, юзиям баркашдек келади. Дадам кетмонни елкасига олиб, аммам берган тугунчани дастага илди.

-Тез-тез кептургин, болани обке! – деб қолди аммам кетимиздан.

Кўчага чиққандан кейин яна Алвасти кўприкдан ўтишни ўйлаб юрагим увишди.

- Алвасти кўприкка борамизми? дедим ҳиҳиллаб.
  - Йўқ, саккизинчи бригадага! Маза! Идора олдидан ўтарканмиз!

Идора – кеча ўзим узокдан кўрган оппок уй. Олдида шапка кийган, мўйловли одамнинг ҳайкали. Берироқда ҳовуз. Ҳовуз четида толлар, бир туп ўрик. Сув юзида беш-олтита ўрик ҳалҳиб турибди: сап-сариҳ. Қантак ўрикка ўхшайди. Ҳовуз олди гулзор. Ҳов ана, идора орҳасида катта-катта деразали узун уй. Бу – «ҳулуп». Томида радио ашула айтяпти.

Ниҳоят картошка полизга етиб келдик. Дадам шошганча бор экан. Олисда, пайкал ичида эркак-хотинлар юрибди. Кетмонлар тонг офтобида ярақлайди. Бошига дакана танғиган аёллар, дўппи кийган эркаклар пайкалларга бўлиниб, картошка чопиқ қилишяпти.

Дадам шарқираб оқиб ётган ариқ бўйида, бир туп садақайрағоч тагида тўхтади. Оёқ учида чўзилиб, тугунни қайрағочнинг пастки шохига илди. Белидаги қийиқчани ерга, сояга ёйди.

 Шўхлик қилмай, жим ўтир, хўпми? – деди ҳар доимги гапини қайтариб.

Дадам билан кўп жойга борганман. Ариқ тозалашга, арпа ўришга. Дадам далага кириб кетганда мен пойлаб ўтираман. Ўрганиб қолганман.

Пешингача «яхши бола» бўлиб ўтирсам бас: «Даранг-даранг, даранг-даранг», деб занг чалинади. Дадам даладан чиқиб келиб, мени шийпонга – обши қозонга олиб боради. Ошпаз хола мени танийди. Алоҳида товоқда овқат сузиб беради. Кўпинча ичида суягиям бўлади. Фақат Парча холани ёмон кўраман. Парча хола – девдай хотин. Мўйловиям бор. Нуқул, «суягингни менга бер, мен тозалаб берай!» дейди.

Суягимни бермай десам, қўрқаман, ўзимни еб қўяди!

Яхшиям бугун саккизинчи бригадага келдик. Парча хола кўпинча Нўғайқўргонда ишлайди. «Яхши бола» бўлиб, қийиқча устига ўтириб олдим. Дадам бир хатлаб ариқдан ўтди-да, картошка пайкалга кириб кетди.

Дадамнинг кетмон уришини томоша қилишни яхши кўраман. Дастасидан кўтариши билан каттакон кетмони офтобда ярақлаб кетади. У кетмонини шу қадар зарб билан урадики, ер силкиниб кетгандай бўлади. Тағин ҳар гал кетмон ташлаганда «ҳаҳ-ҳаҳ» деб қўяди. Худди бировга зарда қилгандек! Биламан, ҳозир дадам терлай бошлайди. Аввал бўйни терлайди қип-қизариб, ялтираб кетади. Кейин оқ кўйлагининг гарданига ёпишган жойи ҳўл бўлади. Ундан кейин елкалари... Чап елкасидаги чуқурча ўрадек қорайиб қолади.

Қайрағочнинг ғадир-будир танасига суяниб ўтирарканман, муттасил чирқиллаётган чум-чуқлар қулоғимни батанг қилиб юборди. Бошимни кўтариб қарасам, садақайрағоч атрофида

гуж-гуж чумчуқ. Бири учади, бири қўнади. Вўй, инларининг кўплигини! Биттаси жудаям пастда экан. Дўппидек инда учта боласининг боши кўриняпти. Катта чумчуқ учиб келиши билан уччала боласи сап-сариқ тумшугини катта очиб, баравар чирқиллайди. Аммо дадаси ҳеч адашмайди. Ҳаммасига галма-галдан овқат беради. Ие, дадаси иккита экан-ку! Биттаси учиб кетиши билан, иккинчиси келяпти, болаларига навбат билан овқат улашишяпти. Бундан чиқди, биттаси – дадаси, иккинчиси – аммаси!

Болаларини олиб тушиб уйда боқсам-чи! Қайрагочга қандай тирмашганимни ўзим билмай қолдим. Бир-икки марта сирганиб кетиб, тиззамнинг кўзи ачишди. Бари бир амаллаб қайрағочнинг шохига осилиб олдим. Чирана-чирана шохга чикдим. У ёғи осон кетди. Шохлар қалин, худди нарвондек бир бирига яқин турарди. Энди чумчуқ ини ҳам, сап-сариқ оғзини очиб чирқиллаётган қушлар хам, ҳатто ин ичидаги оқиш тезаклар, тухум пўчоқлариям аниқ кўрина бошлади. Шохларни ушлаб секин-секин ин томон сурилдим. Боядан бери чирқиллаётган қушлар бирдан жимиб қолди. Хурпайиб, ин тагига ётиб олишди. Нима бўпти, яна озгина силжисам, чумчуклар меники! Қуйнимга солиб обтушаман-да, уйга олиб кетаман. Аксига олиб, ин шохнинг қир учида, ингичка жойда экан. Қанча сурилсам, шох шунча қаттиқ лопиллайди. Бунинг устига чанг босган япроклар юз-кўзимга урилади. Хамма ёгим қичишади, оёқларим титрайди...

Қўлим «ярадор»лиги паққос эсимдан чиқиб кетган экан. Тепадаги шохни қисиброқ чангаллаган эдим, ўнг қўлим қаттиқ ачишди. Аммам ўраган рўмол устидан шох-пох кириб кетдими, нима бало? Кўзимдан ёш чиқиб кетай деса ҳам чидадим. Инга яқинлашган сайин оёғимнинг қалтираши куча-

йиб кетди. Энди инга қўл чўзган эдим, бир чумчуқ овози борича чирқиллаб шундоқ тумшуғим олдидан учиб ўтди. Юзимга қаноти тегдиям. Қўрққанимдан тўхтаб қолдим. Шунда ғалати иш бўлди. Сон-саноқсиз чумчуқлар атрофимда чарх уриб айлана бошлади. Оламни бузгудек бўлиб чирқиллаганча бири у ёққа бири бу ёққа учади. Кўзимни ўйиб олишга қасд қилгандек, юзимга қанотини тегизиб, чиғир-чиғир қилади. Бошим айланиб кетди. Соғ қўлим билан шохни чангаллаганча «ярадор» қўлимни силкитиб «кишт-киштлаб» ҳайдадим. Латта ечилиб кетди. Чумчуқлар бўлса тўда-тўда бўлиб, баттар ёпишади. Қўрққанимдан овозим борича бақириб юбордим.

### – Дада-а!

Оёғим сирғаниб кетди. Икки қўллаб шохга ёпишган эдим, ярадор қўлим шунақа ачишиб оғридики, шох қўлимдан чиқиб, бир зум лапанглаб турдим-да, пастга йиқилдим. Елкам қандайдир шохга қаттиқ урилганини, ерга учиб тушганимни элас-элас биламан...

Бир маҳал кўзимни очсам, дадам кўтариб кетяпти. Доим опичлаб юрарди, ҳозир қўлига кўтариб олибди. Авваллари чўлоқланиши ҳечам озор бермасди. Ҳозир ҳар оқсоқланганда жоним чиқиб кетай дейди, қўлим сирқирайди. Дадамдан муттасил анқиб турадиган тамаки ҳиди ҳеч ҳачон кўнглимни айнитмасди. Энди бўлса ҳусгим келиб, ўҳчий бошладим.

– Дада! – дедим инграб.

Дадам юзимга ҳавотирланиб қаради.

– Ҳозир, ҳозир, – деди овози хириллаб. – Бирпас чидагин, йигитсан-ку, ўзинг, гиройсан-ку.

У баттарроқ оқсоқланиб югуриб кетди. Кўз ўнгимни сарғиш туман қоплади. Яна қусгим келди. Кейин нима бўлгани эсимда йўқ.

Дахшатли огриқдан хушимга келдим. Яна ўша сарғиш туман. Бора-бора туман тарқалиб аввал дадамнинг мўйловини, кейин ўзини кўрдим, қарасам, ёнида яна битта одам бор. Танидим: думалоқ дўпписини бостириб кийиб олган Комил бува мулойим кулиб турибди. Сийрак соқолини селкиллатиб, бошимни силади.

- Қўлни синдириб обсиз-ку, азамат йигит!

Қизиқ, табиб бува ҳар доим одамга шунақа мулойим кулиб қарайди, ҳеч кимга қаттиқ гапирмайди.

Қўрқа-писа, дадамга қарадим. Табиб буванинг олдида уришгиси келмади шекилли, қовоғини солиб, юзини ўгирди.

– Зиёни йўқ, – деди табиб бува огзига нос ташлаб. – Уч ҳафтада сан-кўр, ман кўр бўлиб кетадилар. Қани, қўлни кўтариб кўринг-чи, йигит. Унисинимас, чап қўлни.

Чап қўлим таёқдек қотириб боғлаб ташланган эди. Табиб бува тахтакачлаб қўйганини тушундим. Қўлимни кўтарган эдим, оғриди-ку, аммо боягидек кўнглим беҳузур бўлмади.

Шу пайт узун кўйлагининг этаги ерга тегай деб турган хотин уйга кирди. Аввал далада кўрганман. Табиб буванинг хотини – Лазакат хола. Бурни товуқнинг тумшуғига ўхшайди.

– Шафтоли ейсанми? – У қўлидаги каттакон зарғалдоқ шафтолини узатди.

Олишга олдиму шафтолини қандай арчишни билмай қолдим. Ўнг қўлим «ярадор», чап қўлим синган.

Дадам қошини чимириб шафтолининг пўстини арчиб берди. Аммо егим келмади. Негадир кўнглим айниди.

Довлига тушишимиз билан кўча эшикдан йўлйўл кўйлак кийган, соч қўйган йигит кириб келди. – Ие, гирой, қўлга нима қилди? – деди кулиб. Танимасам ҳам «гирой»лигимни кўрсатиб қўйиш учун илжайдим:

- Хеч нима.

Табиб бува мулойим товушда йигитга тайинлади.

-Укангизни уйларига обориб қўйинг, Олимжон...

Бундан чиқди Алвасти кўприкда Ҳусан бувам билан Оқсоқол бувага ёрдам берган Олимжон ака шу эканда! Сўрагим келди-ю, дадам қовогини солиб турганини кўриб индамай қўя қолдим.

Йигит қўлтиғим тагидан авайлаб олиб, мени кўтарди.

- Йўқ, ўзим... деди дадам ҳамон ҳовоғини солиб. – Овора бўлманг, Олимжон...
- Ие, овораси бор эканми, ўзимнинг укам-ку, –Олимжон ака қучоқлаб кўтараркан, кулимсиради.Бу қўл ҳам ярадор бўлганми?

Қўрқа-писа яна дадамга мўраладим. Йўқ, бу гал ҳам индамади. Тамакисини тутатиб қаттиқ-қаттиқ тортди.

– Бир ҳафтадан кейин тағин обкеласиз, – деб қолди кетимиздан чиққан табиб бува, мулойим жилмайиб. – Қисилманг, Шомуроджон. Бола-да, бола!

Салқин, захкаш ёнғоқзор орасидан юриб кетдик. Олдинда дадам, орқароқда мени кўтариб олган Олимжон ака... Олимжон акам чўлоқланмас экан. Мени енгилгина кўтариб кетяпти. Сочи ёйилиб, пешонасига тушган. Олисда Алвасти кўприкнинг шовуллаши эшитилади. Ўша томонга қарамасликка ҳаракат қилдим.

- Кузда келсанг-чи, сенга анча ёнгоқ бераман, деди у ваъдани катта қилиб.
  - Ўзимизниям ёнгогимиз бор! дедим илжайиб.
- Ие зўр экан-ку! Олимжон ака кулди. Бўлмаса ўзингни ёнгогингни олиб келасан. Ёнгоқ ўйнашни биласанми?

- Биламан, дедим илжайиб. Соққа қувар, ган қуяр...
- Бўпти, иккаламиз ўйнаймиз. Аммо ютиб олганни қайтиб бериш йўқ.

Ховлимизга киргандан кейин Олимжон акам мени айвонга ўтқизди. Негадир юзимга авайлаб шапатиладида, кўз қисиб қўйди. Дадам билан хайрлашиб, чиқиб кетди.

Ана энди дадам мени роса уришади! Қўлимга тағин оғриқ кирса ҳам тишимни-тишимга қўйиб ўтиравердим. Дадам уйга кириб сопол лаган олиб чиқди. Оқсоқланиб борди-да, ҳовлидаги холдастор олмани тепиб силкитди. Аллақанча олма дув этиб тўкилди. У олмаларни лаганга солиб, ювиб келди. Этигининг қўнжидан суяк сопли пичоғини чиқариб биттасини арчди. Икки паллага бўлдида, бир палласини пичоқ учига илиб узатди.

### - Ma, e.

Шундагина дадамнинг кўзига юрак бетлаб қарадим. Унинг ранги ўчган, терлаб кетган юзини кафти билан артган бўлса керак, бармоқ изи қорайиб турар, мўйлови титрар эди.

Ўзимга қолса, олмани жон деб ердиму яна кўнглим беҳузур бўла бошлади. Қўлимнинг сирқираши кучайди.

- Огрияпти, - дедим йигламсираб.

Дадам кўзимга тикилиб туриб, уф тортди. Шимининг чўнтагини узоқ титкилаб, газета-қоғоз, тамаки халта олди-да, қўллари титраб папирос ясади. Гугурт излаб тополмади шекилли, токчалардаги баркаш-чойнакларни тарақ-туруқ қилиб анча тимирскиланиб юрди. Кейин «ҳозир» деб кўчага чиқиб кетди. Зум ўтмай бир қўлида хурмача, бир қўлида узун шиша билан қайтиб келди. Токчадан ёгоч қошиқ олиб, хурмачага ботирди. Бир қошиқ қатиқни тумшуғимга тиқиштирди.

Ич, – деди бўғиқ овозда. – Ёғлиқ қатиқ экан.
 Сартарош амакинг берди.

Баттар кўнглим айниб, юзимни ўгирдим.

- Керакмас...

Тўсатдан дадамнинг кўзида ўт чақнади.

– Дарахтда пишириб қўйганмиди, бадбахт! – деди ҳайқириб.

Қўрққанимдан ғужанак бўлиб олдим. Бирпасда кўнглим айниши хам, огрик хам эсимдан чикиб кетди. Дадам шахт билан ўрнидан турди-да, чўлокланиб токча ёнига борди. Каттакон пиёлани юлқиб олиб, хонтахта устига тарақлатиб қўйди. Узун шишанинг тагига кафти билан уч-тўрт урган эди, сўргичланган пўкак отилиб хамма ёкни қуланса, чучмал хид тутиб кетди. У важохат билан пиёлани тўлдириб қуйди-да, нафас олмай охиригача ичди. Кейин тағин тулдириб қуйди, яна ичди. Бирпасда кўзлари қизариб, мўйлови осилиб қолди. Негадир харсиллаб нафас олганча тағин пиёлани тўлдирди. Яна ичди. Пиёлани ховлига улоктириб юборди. Пиёла ховли ўртасига, олма тагига бориб тушди. Аммо синмади, сакраб кетди. Дадамнинг кўзларида қўрқинчли олов чақнади.

– Ўлдираман! – деди бақириб. Оғзидан кўпик сачраб хонтахта устида ётган суяк сопли пичогини боши устида баланд кўтарди: – Ўлдираман! Сўяман!

Дахшат ичида чинкириб юбордим.

- Дада! Дада-а-а!
- Сўймасам отимни бошқа қўяман! У бор кучи билан пичоқни бир урган эди, сопол лаган чил-чил бўлиб кетди. Лагандаги олмалар ҳар томонга сочилиб беш-олтитаси наматга, иккитаси айвон лабидан думалаб ерга тушди. Пичоқ хонтахтага санчилиб қолди.
- Дада! дедим титраб. Дадажон! ўрнимдан сакраб туриб кетдим.

– Сўяман! Ернинг тагида бўлсаям топиб, сўяман! – Дадам икки қўли билан бошини муштлай бошлади. – Қанжиқ! Ўлдираман! Ўлдираман!

У «ўлдираман» деган сайин икки қўллаб бошини муштлар, овози хириллаб қолган, оғзидан кўпик сачрар эди. Бирпасда пешонаси моматалоқ бўлиб кетди. Кейин ўзидан ўзи қўл-оёқлари силкина бошлади. Ранги гезариб, овози чиқмай қолди. Шилқиллаб ёнбошга ағдарилди. Даҳшат ичида ўзимни дадамнинг устига ташладим.

- Дада, унақа қилманг, дадажон.

Оғриқни ҳам унутиб, елкасидан силкитдим.

– Дада, туринг! – дедим ёлвориб.

У қимир этмай ётар, кўзлари бақрайиб қолган, аммо мени кўрмас эди. Йиглаб юбордим.

- Дадажон, туринг. Иккинчи қилмайман, дарахтга чиқмайман. Дадажон...
  - «Қора аммам» қачон келганини билмай қолибман.
- Вой ўлай! Вой шўрим қурсин, деганча қўлидаги тугунни айвонга улоқтирди. Тугун ечилиб, қўрга кўмилган жўхорилар ҳар томонга думалаб кетди.
- «Қора амма», дадамни уйғотинг, дедим титраб. Иккинчи қилмайман.
- Ҳой, Шомурод, сенга нима бўлди? Аммам дадамнинг юзини силади. Туртиниб ошхонага югурди. Бир коса сув обкелиб, дадамнинг юзига сепди. Айланиб-ўргилиб пешанасини, қўлларини силай бошлади...

#### ИККИНЧИ БОБ

## «ҚОРА АММА» ХИКОЯСИ

## 1. Бечора чора истар

Пешиндан кейин нуқул ўнг қовоғим учаверди. Қуриб кетсин! Шу кўзим учса хафа бўламан. Ўзимни чалғитиш учун таппи қилдим, ҳовлини чалиб чиққан бўлдим. Дилим ўлгур ҳеч ёришмайди. Дардимни айтай десам, Робия ҳам ишда. Қизим бечорагаям қийин. Эрта кетади, кеч келади. Қиз бола боши билан трактор ҳайдайди. Башоратхон ўзи яхши жувон-ку, жаҳли тезроқ. Аччиғи чиқса, эриниям нари обориб-бери опкелади. Нима қилсаям бригад-да! Қолаверса, Оқсоқолдек одам ярим кечагача даладан чиқмаганидан кейин ўзини у ёққа-бу ёққа ташлашга уялади-да киши...

Хаёлим бўлинармикин, деб томорқадаги жўхоризордан сигирга ўт юлаётганимда эрталаб Музаффар «жўхори кабоб ейман» дегани эсимга тушди. Укам ҳам жуда кажбаҳс-да! Болани ташлаб кетақол, десам кўнмаганини кўрмайсизми? Ёш бола кунбўйи далама-дала юради. Огзига бир қошиқ оби-ёвгон тутадиган онаси бўлмаса! Пешинда обши қозондан шўрва ичади — шу!

Шомуроднинг феъли чолимга ўхшайди. Чолим ҳам ўз киндигини ўзи кесган хилидан эди. Калхоз бўлармиш деган гап чиққанида Орифхўжа бойнинг одамлари «калхозга кирсанг ичагингни бошингга салла қилиб кетамиз», деб қўрқитган. Чолимнинг жуссаси кичкина бўлсаям, юраги отнинг калласидек эди. «Мен бечорахол бир одамман. Бир бошга бир ўлим, қўлингдан келганини қил», деб тураверган.

Бола нарса, севина қолсин деб жухорининг сутлирогидан танлаб, қурга кумдим. Робиянинг кели-

шини кутишгаям сабрим чидамай йўлга тушдим. Алвасти кўприкдан ўтаётганимда юрагим яна ҳовлиқди. Ўлсин! Хосиятсиз жой! Уруш пайтида Робияга ҳам шу кўприкда ажина даф қилган...

Ўнғоқзордан ўтиб кетаётсам, олдимдан Олимжон чиқиб қолди. Комил табибнинг ўғли. Барака топгур хўпам яхши бола. Уруш пайтида Робиянинг тракторига сув ташиб юрарди. Ҳозир Тошкентдаги катта ўқишда ўқийди. Оқсоқол билан чолим пойиз тагида қолганида қандоқ чирқиллаган эди, бола бечора... Умри узоқ экан, Оқсоқол тирик қолди. Аммо чолим...

– Шомурод акамникига кетяпсизми? – деди салом бериб. – Тезроқ бора қолинг.

Юрагим бир қалқиб тушди.

- Тинчликми?
- Тинчлик. Хавотир олманг... дедию кетаверди.

Хавотир олмаганим қурсин. Эшикдан кириб келсам, бу ҳангома. Қовоғим бекорга учмаган экан-да...

Музаффар бечора қаттиқ қўрққан экан. Дадасидан бир қарич жилмайдиган бола этагимга осилиб ялинди:

– Аммажон, кетманг, сизминан ётаман!

Қизиқ, соат неча бўлдийкин? Ой пештоққа келиб қопти.

Чигиртка чириллайди... Хамма ёқ сув қуйгандек жимжит. Болани бағримга босиб ўтирибман. Ичкарида Шомурод хўрсинади. Ўқтин-ўқтин, «бари бир ўлдираман!» деб алаҳлайди. Музаффар, қўли оғриётган бўлса керак, инграйди. Уйқусида чўчиб пинжимга киради. Ана, яна сесканиб тушди. Кўзини очиб, атрофга олазарак қаради.

- Қўрқиб кетяпман...
- Қўрқма, болам, мен борман-ку. Ухла...

Жувонгина ўлгур ноинсоф! Боланинг уволи тутгур имонсиз! Эрингни бировдан кам жойи йўқ эдиг

ку! Чўлоқ бўлса девор ошиб ўгрилик қилиб бўлмагандир! Тўрт йил қон кечиб келди-ку! Эри урушда ўлган қанчадан-қанча гулдай жувонлар юрибди сабр қилиб. Ақалли болангни ўйласанг бўлмасмиди, имонфуруш!

Ой ҳаволаб кетди. Айвон қоп-қоронғи бўлиб қолди. Уйқу қани? Хаёл минг кўчага олиб киради. Кимсаним... Олтитасини ерга қўйиб, биттагина тутган боламниям Худо кўп кўрди.

Дукур-дукур от келди, От бошида хат келди. Хатини ўқиб кўрсам, Вой-вой билан дод келди...

Қаёқдасан, болам? Қайси юртларда юрибсан?! Жонинг соғми ўзи? Майли, оёқ-қўлсиз бўлсанг ҳам, биров замбилда кўтариб келсаям жон дердим! Кафтимда олиб юрардим! Отанг йўлингга термула-турмула ўтди. Энди ақалли мени ўз қўлинг билан тупроққа қўйсанг-чи! Йўқ, йиғлаётганим йўқ, болам! Йиғламайман. Мабодо йиғласам ҳам... Йўқ, ўғлим. Мен йиғласам, сен безовта бўласан. Робия куяди. Қизимнинг икки кўзи ҳалиям эшикда. Кутяпти. Сени кутяпти. Бошқа қиз бўлса, этагини қоқардию бор-е, деб биттасига тегарди-кетарди. Не-не жойлардан совчи чиқмади. Туққанданми-туғишганданми, деб шуни айтади-да! Бир қиз бўлса шунчалик бўлар.

Шунақа дейману...

Вой, ўлмасам! Яна ўша шум хаёлга боряпманми? Кимсаним, жон болам, кечир, гуноҳкор онангни! Биламан, Худо кўрсатмасин, шаҳид кетган бўлсанг, арвоҳинг чирҳиллайди. Тирик бўлсанг, эртага келиб ёҳамдан оласан. «Нима ҳилиб ҳўйдинг, шумкампир, сенам онамисан, имонсиз», дейсан!

Нима десанг ҳаққинг бор. Қайси она ўз юрагини ўзи суғуриб тупроққа ташлайди? Қайси она ўз боласига ўзи хиёнат қилади?

Қандоқ қилай, жоним болам? Ўзинг ўйла, ахир. Робиям, сенинг Робиянг, қовжираган гулдек кўзимнинг олдида сўлиб боряпти. Ёши ўттизга қараб кетяпти, ўглим! Совчилар «қари қиз» деб қадамини узиб қўйганигаям анча бўлди.

Онангнинг гуноҳидан ўт, Кимсан! Бу ният хаёлимга келганига анча бўлганди. Аммо бировга айтиш у ёқда турсин, ўйлашгаям қўрқиб юрувдим. Бугун тоғангникидаги мана бу «томошани» кўриб... Ақалли шу норасида гўдак ҳурмати, онангдан ўпкалама, болажоним!

Хўроз қичқирди. Салқин тушди. Тонг бўзариб, ёнгоқнинг учидаги шохлар силкина бошлади. Мен бўлсам Музаффарни қучоқлаганча мук тушиб, ҳалиям Кимсаним билан гаплашяпман. Билмадим савоб иш қиляпманми, гуноҳми? Билмадим...

\* \* \*

Эрталаб Шомуродни ишга жўнатиб Музаффарни ўзим билан уйга олиб келгандим. Бола-да! Қўлининг огригини унутиб чопқиллаб кетди. Кечаси безовта бўлиб чиққани учун вақтликкина ётиб қолди. Робия ишдан келадиган пайт яқинлашган сайин кўнглим алгов-далгов бўла бошлади. Майли, Шомурод-ку, қайсарми, баломи, бир амаллаб кўндираман. Лекин Робияга қай юз билан айтаман бу гапни! Нима дейман? Тилгинам танглайимга ёпишса бўлмайдими?

...Робия кеч келди. Айвон бурчагида ухлаб ётган Музаффарни кўриб суюнди.

- Ие, яна нима қилди? деди боланинг тахтакачланган қулига кузи тушиб.
  - Йиқилиб, қўли синибди.

– Вой, бечора! – У Музаффарнинг пешонасидан ўпаётганда юрагим қалқиб кетди.

Кейин озроқ кир чайди. Ярим кеча бўлиб кетганига қарамай бошини ювди. Еттинчи лампани хонтахтага қўйиб кўк қийиқчага гул боса бошлади. Пилик чирсиллайди, ҳовлида қурбақалар қуриллайди. Робия қизил ипак қатини чаққон-чаққон тортиб кашта тикяпти. Узун киприклари оппоқ юзига тўкилиб турибди.

– Робия! – дедим секин. – Бола шўрлик қўлини ёмон синдирибди. Чумчуқ оламан деб садага чиққан экан.

У ачиниб Музаффар томонга қаради.

- Табиб кўрдими?
- Ҳа, Комил табиб тахтакачлаб қўйибди.
- Жони огригандир.
- Бўлмаса-чи!

Яна жимлик чўкди. Робия афсусланиб бош чайқадида, ишини қилаверди.

– Робия... – дедим яна. – Шу болагаям жабр бўлиб кетди. Она бўлмаганидан кейин шу экан-да!

У қийиқчани тиззасига ёйганча бошини кўтарди.

– Аввалам айтувдим-ку, ойижон. Адамга тушунтиринг, Музаффар бизникида тураверсин.

«Адамга тушунтиринг!» Юрагим увишиб, бошим хам бўлиб қолди. Мен ноинсоф, мен юзи қаро қайси юз билан?.. Кимсаним, жон болам, кечир гуноҳкор онангни!

Робия, – дедим йиглагудек илжайиб, – совчи келди!

У менга қарамай кулимсиради.

- Муборак бўлсин!

Доим шунақа майнавозчилик қилади. Йиглаб-сиқтаса, «уйингизга сиғмай қолдимми», деб шовқин солсаям гўрга эди. Кулади.

Унақа дема, қизим! – Овозим титраб кетди.
Кимсан аканг тирик бўлса шу кунгача дараги чиқарди.

У ишини хонтахта устига қўйиб кўзимга таънали қаради. Чиройли кўзларида «шу гапни сиз айтяпсизми?» деган маъно бор эди.

- Мен-чи, ойижон? деди хотиржам оҳангда. Тушунмадим.
- Нима сен? Сенга нима бўпти, қизим? Ҳали ўн гулингдан...

Робия «вой, содда ойим-а», дегандек кулимсиради.

- Мен борман-ку, деди секин. Мен тирикман-ку! Бундан чиқди Кимсан акам ҳам тириклар.
  У гап тамом, дегандек яна ҳатим тортишга тушди.
  Дамим ичимга тушиб кетди.
- Совчи ким деб сўрамайсанам, қизим, дедим ичимдан тошиб келаётган йигини аранг босиб.

Робия энсаси қотиб кулди.

- Кавушини аямаса келаверсин... Сизга нима?
- Ўша совчи менман!

Бу гап қандоқ оғзимдан чиқиб кетганини билмайман, Робиянинг қўлидаги қийиқча сирғалиб ерга тушди. Ранги ўчиб, юзимга ҳайратланиб қаради.

- -A?!
- Шомуродга...
- Нима?! У чаён чаққандек сакраб ўрнидан турди. Этагининг шамоли тегиб лампа ўчиб қолди.

Жон ҳолатда оёғига ёпишиб, чангаллаб олдим.

Йўқ, мен йигламайман, деб аҳд қилган эдим. Кимсанимнинг мозорини топмагунимча, гўрини ўз кўзим билан кўриб, тупрогини ўз қўлим билан қучоқламагунча бир томчи ҳам ёш тўкмайман деб қўйгандим. Ҳозир боламнинг азасига йигиб юрган ўша ёшлар бирдан кўзимдан тирқираб чиқди.

- Болам! Жон болам, дедим илтижо қилиб. Кимсанни сен кутсанг, мен кутмаяпманми! Ўз боламнинг кўзига ўзим чўп солгандан кўра ўлганим яхшимасми! Нима қилай, жон қизим, иложим қанча!
- Ахир... ахир... У мадори қуригандай ёнимга чўккалаб қолди. Нами кетмаган сочлари юзимга ёйилиб тушди.

Бошимни кўтариб қарасам, кўзлари ҳайратдан катта-катта очилганча ҳамон чўккалаб ўтирибди. Юзи ой нурида янаям оқариб кетган, энтикиб нафас оляпти.

- Ойи... деди пичирлаб. Ахир у киши... адам-ку...
- Нима қилай, жон қизим... Нами қуримаган сочларидан, оппоқ, текис юзларидан ўпа бошладим.
- Кимсан ака... Унинг бўгзидан ожиз нидо отилиб чиқди. Кимсан ака... Ойижон! Нима деяпсиз? Нима қилмоқчисиз?

### иккинчи қисм





#### УЧИНЧИ БОБ

### РОБИЯ ХИКОЯСИ

## 1. Дадамни йўқотиб қўйдим

Агар ойим «ҳозир сен ўласан» деса бунчалик ваҳимага тушмасдим. Бу қандоқ бедодлик? Шомурод тоғани кичкиналигимдан «ада» деб ўрганиб қолганман-ку. Уям мени «қизим» дейди-ку. Уйга бориб, кирини ювганимда, Музаффарни чўмилтирганимда, овқат пишириб берганимда... Ҳеч қачон менга унақа кўз билан қараган эмасди-ку.

Йўқ, бобом бўлса бунақа гап чиқмасди. «Овозингни ўчир, пакана!» деб бир мушт кўтарса, ойим пилдирпис бўп қоларди.

Нима деётганини ўзи биладими ойим? Ахир... Кимсан акам менинг қайлиғим бўлса, ойимнинг ўғли-ку! Кимсан акам ҳаммадан кўра ойимга яқинку. Нима жин урди?

Биламан. Шомурод тоғамга осонмас. Музаффаргаям қийин. Лекин менга бегона одам эмас, келиб-келиб ўзимнинг ойим шу гапни айтса, қандоқ чидайман?! «Ойи» деб шу хотиннинг этагидан ушлагандим-ку ахир!

\* \* \*

...Ўз онамни элас-элас хотирлайман. Пастак шифтли уйда, дераза тагида нукул осмонга қараб ётар эди. Ранги сарғайиб, икки чакаги ич-ичидан

кириб кетган. Кўзлари қоп-қора, чиройли. Узун-узун киприклари қилт этмайди. Деразадан аллақандай мадрасанинг кунгурадор пештоқи кўриниб туради. Пештоқ чеккасида шерлар тасвирланган. Кийикни қувиб кетаётган даҳшатли шерлар... Онам бир нуқтадан кўз узмай ётади. Баъзан кўзи очиқлигича ухлаб қолганга ўхшайди. Аммо ухламайди. Отамнинг эшикдан кириб келишини кута-кута чарчайман. Дадам — ўқитувчи. Мен тенги қизлар дадамнинг мактабига қатнайди. Мен бормайман, онамга кўз-қулоқ бўлиб ўтираман. Дадам ишдан келиб, ойимга қарайди. Кейин патниснинг орқасига ҳарф ёзиб, мени ўқитади.

– Ўқи қизим, ўқи! – дейди тажанг бўлиб. – Ёшинг тўққизга чиқди. Сен тенги болалар яқинда учинчи синфга кўчади, ўқи!

Нима қилай? Кунбўйи онамга қарасам, қорним оч бўлса, нима қилай?

- Нон... дейман, ялиниб. Дадажон, нон! Онам ётган жойида инграйди.
- Қийнаманг бачамни. Пайти келиб ўқиб олар. Шу гапни айтгунча ҳам чарчаб қолади. Энтикиб-энтикиб нафас олади. Мен-ку қилтомоқман. Ақалли, Робияжонга бир бурда нон топиб беринг...

Дадам ноиложликдан баттар тажанглашиб ҳовончада талқон туяди. Бир қошиғини онамга, бир қошиғини менга тутади. Онамдан талқон ўтмайди. Кўзи билан менга имо қилади.

- Бачамга беринг...

...Бир куни эрталаб уйимизга анча одам йигилди. Олача тўн кийган кишилар, оппок кўйлак кийиб, бошига ок рўмол ўраган хотинлар... Хамма чуввос солди. Дадам бошимни кўксига босганча хўрсиниб-хўрсиниб йиглади.

Кейин онамнинг тушаги бушаб қолди. Ёш бола эмасман-ку, онам улганига аллақачон ақлим етган

эди. Бир куни дадам қўлида катта жомадон кўтариб, мени вокзалга олиб чиқди. ўиштин бинога кириб келаверишда, зинада думалаб ётган хотинни кўриб, қўрқиб кетдим.

 – Дада! Анави семиз хотин нимага зинада ухлаб ётибди?

Дадам бошимни силади.

- Семиз эмас, шишиб кетган. Қарама, Робияжон, Юр. Поездга миниб Тошкентга борамиз.

Поезднинг тарақа-туруқ овози, одамларнинг шовқин-суронидан бошим айланиб, ухлаб қолибман... Эрталаб пастга тушдик. Трамвайга ўтирдик. Трамвайнинг жиринг-жиринг қилиб юриши қизиқ туюлса ҳам, қорним очган, нон егим келарди.

- Дада нон... дедим ялиниб.
- Шошма, бачам, шошма.

Дадам текис қилиб дазмолланган оппоқ итёқа кўйлак кийиб, чучваранусха бўйинбог боглаб юрадиган одам эди. Пўрим кўйлак кияди-ю, нони йўқ...

Бир жойга келиб трамвайдан тушдик. Дадам қимирламай ўтир, деб мени жомадон устига ўтқизди-да, ўзи ғиштин зиналардан кўтарилиб, ойнабанд эшик ичига кириб кетди. Анчадан кейин оппок, узун яктак кийган, кўкрак чўнтагида соат занжири ялтираб турган чол билан бошлашиб чиқди. Чолнинг соқол-мўйлови, кўзи устига қайрилиб тушган қоши, ҳатто қулоқларининг ичидан чиқиб турган туклар ҳам кўкимтир оппок эди. У гавдасини ғоз тутиб келаркан, йўл-йўлакай кўкрак чўнтагидан узун занжирли соатини чиқариб, шиқ этиб қопқоғини очди.

– Ўҳ-ҳў, вақт кетиб қопти-ку, маълим¹! – деди бош чайқаб.

Дадам яқин келиши билан ялиндим:

– Нон. Дада, но-о-он!

<sup>&</sup>lt;sup>1</sup> Маълим – муаллим.

Бояги чол ярқ этиб менга қаради. Баркашдек кафтини дадамнинг ияги олдида пахса қилиб бақирди.

– Ўв, маълим! Кўчада қизим қолди, оч ўтирибди, десанг ўласанми?

Чол дадамни уради, деб қўрқиб кетдим. Йўқ, дадам чолдан чўчимади, маъюс жилмайди.

- Кўриб турибсиз, Оқсоқол. Замон шунақа: олтин-кумуш кул бўлган, арпа-буғдой пул бўлган.
- Пул бўладими, кулми, падарига лаънат, локин нораста болани оч қолдирма! Чолнинг овози гумбурлаб чиқар, унга сайин кўнглим озиб, бошим айланар эди. Шошма, мен ҳозир! Чол шундай деди-да, қайтарма қўнжли этик кийган оёқларини катта-катта ташлаб аллақаёққа кетди. Дадам ёнимга, жомадон зихига чўкиб бошини қуйи солди. Жингалак сочини чангаллаб, менга қарамай узоқ ўтирди.

Бир махал орқа томондан гумбурлаган овоз келди:

- Ма, қизим, еб ол, буванг айлансин!

Қарасам, бояги чол седана сепилган оппоқ кулчани ушатяпти. Жонҳолатда құлимни чуздим. Чол кулчани иккига булиб, ярмини менга, ярмини дадамга берди.

– Бунданам оғир йилларни кўрганмиз, маълим! – деди яна шанғиллаб. – Бу кунларам ўтади-кетади. Бу йил ўттиз учинчи йилми? Эсингда бўлсин, маълим, насиб этса, ўттиз тўртинчи йилда, узоғи билан ўттиз бешинчи йилга бориб ҳаммаси оппон-соппон бўп кетади.

Нонимни бирпасда еб бўлдим. Қарасам, дадам ҳали ярмисиниям емабди. Ҳар луқма томоғига тиқилиб қолаётгандек зўрға ютинади.

- Нон! - дедим қўлимни чўзиб. - Дадажон...

Дадам қўлидаги ноннинг қолганини узатди. Чол қараб турганини кўриб, нон бурдасини қўрқа-писа қўлимга олдим.

– Майли! – Чолнинг соқоли титраб кетди. – Насиб этса, ҳаммаси яхши бўлади. Қани, маълим, кетдикми? Турақол, ҳизим! – У тагимдаги жомадонни юлҳиб кўтарди. Нарироҳда от-арава турган экан. Нафсим ҳониб энди сув ичгим келарди. Лекин дадамнинг жиддий кўзларига ҳараб, сув сўрашдан ҳўрҳдим.

Дадам аравага ўтириб, мени багрига оларкан, чолга қаради.

- Йўл олисми, Оксокол?
- Олис... Нўғайқўргонга борамиз!
- Соат неча бўлди? деди дадам қуёш ботиб бораётган уфққа қараб.
- Coaт? Чол дадамга бир қараб қўйди-да, арава ичида ётган қамчини олди. Соатни бошингга урасанми!

Қарасам, чолнинг кукрак чунтагида бояги ялтираб турган соат занжири куринмаяпти.

Дадам унинг кўзига тикилиб, секин хўрсинди.

- Рахмат... Тирик бўлсам, шу яхшилигингизни...
- Чу! Чол қовурғаси саналиб қолған от устида қамчи айлантирди. Чу, оғайни! Кейин дадамга қараб кулимсиради. Сани туппа-тузук маълим десам, ғирт жинни экансан-ку! Чу!

Арава тош босилган йўлдан тарақлаб юриб кетди. Кап-катта қиз дадамга суянганча яна ухлаб қопман.

Гумбурлаган овоздан уйгониб кетдим.

- Хусанбой! Хо, Хусанбой!

Кўзимни очсам, ҳамон аравада, дадамга ёнбошлаб ўтирибман. Қандайдир қишлоққа келиб қолибмиз. Толзор тор кўча, томсувоқ қилинган уйлар... Бояги чол пастак эшикни тақиллатиб, бировни чақиряпти.

Зум ўтмай эшик очилди. Коптокдек юмалоқ, паст бўйли қоп-қора хотин чиқди. Тавозе билан икки қўлини кўксига қўйиб салом берди.

- Юмушингиз бормиди. Оқсоқол?
- Чақир Думани! Бизни олиб келган чол қора хотинни жеркиб берди. Эркакларнинг ишига аралашишга бало борми?

Қора хотин ҳовли ичкарисига пилдираб кириб кетди.

 – Ўв, маълим! – Чол дадамга қўлини пахса қилди. – Тушмайсанми? Нима, сенга асобий таклиф керакми?!

Дадам жилмайиб, мени қучоғидан бўшатди. Ерга сакраб тушди.

- Кел, бачам! деди пастдан қўлини чўзиб.
- Ўзим... арава ёндорига осилиб ерга тушдим.
   Дадам аравага қайтиб чиқиб, жомадонни олиб тушди.

Бир чеккада ётсираб турар, уйимизга қайтиб кетгим келарди. Пастак эшик тағин очилди. Бояги қора хотинга ўхшаган паст бўйли, аммо бақувват, ихчам соқолли киши чиқиб келди. Қўли гўнга беланган экан, бизни олиб келган чолга билагини тутди.

- Баҳай, Оқсоқол, тинчликми?
- Тинчлик! Гап бундоқ, Дума! Оқсоқол дадамга имо қилди. Самарқанддан мехмон обкелдим.
- Баҳай! Меҳмон отангдан улуғ! пакана киши пилдираб бориб дадамга тирсагини тутди. Хуш кепсиз, меҳмон!

Дадам ийманиброқ сўрашаётган эди. Оқсоқолнинг азамат овози яна гулдиради:

- Ўртоқ Самадов – маълим. ЎзГУни битирган.
 Болаларимизни ўқитишга келган, уқдингми?

Чамаси, пакана киши ҳеч нимага тушунмаса ҳам, илжайди.

- Маъқул, Оқсоқол!
- Мулозаматингни йигиштир, Дума! Оқсоқол овозини баралла қўйиб, қўлини пахса қилди. Ўртоқ Самадовнинг маълимлигини уқдингми?

- Уқдим! Меҳмон келса бош устига, дедим-ку!
- Э, меҳмон эмас, овсар! Оқсоқол жаҳл билан қўл силтади. Носингдан ол!

Пакана киши йўл четидаги отқулоқни юлиб олиб қўлини артди. Почаси қайрилган шимининг чўнтагини кавлаб, носқовоқ чиқарди. «Ма, чек заҳарингга», дегандек Оқсоқолга зарда билан узатди.

Оқсоқол кафтини тўлдириб нос отди.

– Меҳмон эмас, мезбон! – деди, носқовоқни эгасига қайтариб. – Кўриб турибсан: замон оғир. Қаҳатчилик битиб, юрт қаддини кўтариб олгунча саникида туради. Кейин маълимга шунақанги уй собберайликки, кўрган одамнинг оғзи очилиб қолсин. Тушундингми?

Пакана киши «маъқул» дегандек бош иргади. Бироқ бизни олиб келган чол унчалик қаноатланмади шекилли, тағин шанғиллади:

– Ўзимизникига оборардиму хабаринг бор – келинларимнинг чилласи чиққани йўқ. Қани, гапнинг пўскалласини айт: нима дейсан?!

Пакана киши сен чекканда мен қоламанми, дегандек носқовоқнинг тагига жаҳл билан уч-турт урди-да, Оқсоқолдан ҳам купроқ носни кафтига тукиб оғзига отди.

- Турган битганинг ваҳима-я, Оқсоқол! деди чийиллаб. Шуни олдинроқ айтсанг ўласанми? Битта уйни бўшатиб қўярдим.
- Бўшатасан-а, бўшатасан! Кўчада бир тийин тушиб ётган бўлса, кетинг билан қисиб оласан-ку!

Пакана кишининг жаҳли ёмон экан. Аввал дадамга, кейин чолга ранги ўчиб қаради-да, чопиб бориб, Оқсоқолга хезланди.

– Ўв! – деди бўйнини хўроздек чўзиб. – Раисман, деб жа ўзингдан кетма! Ҳусан Думани энди кўряпсанми, аҳмоқ!

– Бўлди, дўстим, бўлди! – Оқсоқол рўпарасига туриб олиб ёқасига ёпишмоқчи бўлаётган пакана кишининг елкасига шапатилади. – Ҳазилниям билмайсанми, нима бало, Дума! Маълим Нўгайқўргонда мактаб очмоқчи. Катта мактаб. Ишонганимдан сеникига опкелдим-да, ўртоқ!

Пакана киши яна бирпас хезланиб турди-да, нари кетди. Пастак эшикни оёги билан тепиб, ҳовли ичкарисига қараб ғазабнок чинқирди:

- Чаққон бўл. Ҳой! Катта уйни бўшат!
- Маълим! Оқсоқол носини тупуриб кафтининг орқаси билан соқол-мўйловини артди. Дума мени қадрдоним. Мени айтди дерсиз: нариси билан бир йилда қулинг ўргилсин уй қуриб берамиз. Ўшангача шу хонадон сизники. Қани, пажалиста!

Оқсоқол «пажалиста» дейишга деди-ю, кўз қири билан пакана кишига хавотирланиб қараб қўйди.

Дадам жомадонни кўтараётган эди, пакана киши келиб қўлига ёпишди.

- Сиз кўтарсангиз уят бўлади, маълим...

Довлига киришимиз билан бўйи мендан тикроқ, кир кўйлак кийган, қоп-қора каллахум бола чопиб келиб, бошимдаги дўппимни олиб қочди.

- Иби, бер! дедим чинқириб.
- Ойи. Дўппи! Зар дўппи! деди каллахум бола ҳовли этагига югуриб.

Айвондан бояги қора хотин чопиб тушди.

- Кимсан! Номусга ўлдирдинг-ку! Зар дўппи кийсанг қиз бола бўпқоласан!
- Дада, дўппим... дўппим! дедим йигламсираб. Берсин. Ўзимнинг дўппим...

Дадам негадир хотиржам кулди. Қора хотин чопиб келиб, мени бағрига босди.

– Беради, жон қизим. Бермасин-чи, нақ қулоғини кесиб оламан. Вой, бу қизнинг ширинлигини! Отинг нима?

У менинг жавобимни ҳам кутмай, шаталоқ отиб томорқа эшиги томонга қочиб кетаётган болага муштини дўлайтирди.

– Кимсан! Уялмайсанми, тойлоқдек бўлиб қиз болани йиглатишга! Гўшингни бир бурдадан қилмасам, юрган эканман!

Дадам мени юпатди.

- Беради, еб қўймайди дўппингни.

Пакана киши бир дўқ қилган эди, каллахум бола дарров қайтиб келди. Дўппимни қўлимга тутқазди. Аввалига қора хотин «Кимсан» деганида каллахум боланинг кимлигини билмагани учун шунақа деяпти, деган хаёлга борган эдим. Йўқ, оти Кимсан экан. Қоронғи тушганида атала ичдик. Ҳеч қачон бунақа ширин овқат ичмагандим. Аталани ичишдан кўра ёгоч қошиқни ялаш маза бўларкан. Буниям каллахум бола ўргатди.

– Менга қара, эй! – деди. – Аввал қошиқнинг орқасини ялайсан. Кейин ичини, билдингми?

Эрталаб уйгонсам, қора хотиннинг қучогида ётибман.

- Дада! деб ғингшиган эдим, қора хотин юзимдан ўпиб юпатди.
- Отанг ҳозир келади, қизим. Идорага кетди. Гап бундоқ, Робияхон. Энди сен менинг қизим бўлдинг. Мен ойингман. Ҳусан буванг буванг. Ёшинг тўққиздами? Акангни ёши ўн бирда. Бундан чиқди, Кимсан аканг. Акангни «сиз» деб гапиргин, хўпми, қизим!

Қора хотин чойга зоғора тўғраб ичирди. Нима қилишимни билмай ҳовлига тушсам, пушталарда ҳип-ҳизил ҳалампирлар пишиб ётибди. Каллахум – Кимсан ҳалампирларни узиб олиб бемалол еб юрибди.

- Жинни! - дедим кулиб. - Қалампир еяпти.

– Ўзинг қалампир! – Кимсан қизил қалампирлардан яна иккитасини узиб оғзига солди. – Қулупнай-ку бу! Еб кўр!..

Кимсан узатган «қалампир»дан биттасини қурқа-писа тишлаб курдим. Шунақа ширинки!

- Яна! дедим ялиниб.
- Ўзинг узиб ейвер! Кимсан илжайди. Қулупнайни билмайди-ку!

Айвон томондан қора хотин овоз берди:

- Кимсан, синглингга қулупнай териб бер, ўғлим...
- Нима, ўзининг қўли йўқми? Кимсан менга илжайиб қаради-ю, пуштадан чиқиб нари кетди.

\* \* \*

Биз кўчиб келган ховли катта эди. Қатор қилиб солинган икки уй, бир айвон. Этак томонда бостирма, молхона. Ховли сатҳи кенг бўлгани билан кафтдек бўш жой йўқ. Ярмисига пиёз сепилган, ярми қулупнайзор. Ундан нарида гултожихўрозлар очилиб ётибди. Нок, гилос, беҳи дарахтлари тартиб билан экилган.

Бу хонадоннинг ғалати удумлари бор экан: тонг отгандан кун ботгунча қимирлаган жон борки, бекор турмайди. Бобом саҳарлаб эшак миниб далага чиқиб кетади. Ойим молга қарайди, нон ёпади, кир ювади, чўнқайиб ўтириб, ҳовлидаги пиёзларни ўтоқ қилади, қулупнай пушталарини чопади, терт қоради. Икки ҳафта ичида кўп нарсаларни билиб олдим. Бу хонадонда ҳеч нима бекор кетмас экан. Ойим (қора хотинни шунақа дейишга ўргандим) пиёз арчса «соқолини» ташлаб юбормайди. Ерга суқади: шунақа қилса яна пиёз ўсиб чиқаркан. Кимсан акам (ойим тайинлагани учун «ака» деб сизлайман) ўрик еса данагини ташламайди. Чақиб мағзини олиб қўяди. Тандирдан чиққан кул пиёз пуштасига сепи-

лади. ўунажиннинг тезаги таппи қилиб, деворга ёпилади. Хатто хожатхонадаги кесаклар ҳам бекорга кетмайди. Томорҳадаги токларнинг таги кавланиб, илдизига солинаркан.

Кимсан акам мен ўйлагандек ёмон бола эмас экан. Баъзан рахмим келади унга.

Эрталаб бобом далага ишга чиқиб кетаркан, супада ухлаб ётган Кимсан акамнинг тепасига келиб, устидан кўрпани улоқтириб ташлайди.

– Тур ўрнингдан! – дейди дагдага билан. – Мўйлови чиқиб қолган бола ялпайиб ётишингни қара? Бўл тез, гўнгни ташиб қўй.

Кимсан аканинг мўйлови бормикин деб қараб қўяман. Йўқ, кўринмайди. Бечора дик этиб ўрнидан туради-да, кўзини ишқалаб молхонага кириб кетади. Бирпасдан кейин замбилғалтакка гўнг ортиб, чираниб-чираниб ғилдиратганча томорқага олиб чиқади. Кечгача тиним билмайди. Ҳамма иш қўлидан келади. Томорқада ер чопади, молга қарайди, ўтин ёради.

Кечқурун энди овқатга ўтирамиз, деб турганимизда узокдан эшак ҳанграгани эшитилади.

Турақол, Кимсанжон! – дейди ойим. – Даданг келяпти.

Кимсан акам дарров обдастада илиқ сув тайёрлайди. Кўчадан кириб келган бобомга сув қуйиб туради. Бобом рахмат дейиш ўрнига жеркади:

- Эшакни сугормайсанми!

Эрталаб ҳаммаси ҳайтадан бошланади.... Бора-бора мен ҳам уй юмушларига киришиб кетдим. Ҳовли супураман, идиш-товоҳ юваман, ойим кепак аралаш ундан ҳамир ҳилса сув иситаман.

Кузда – почтахона ёнида аллақандай эски бинога жойлаштан мактабга қатнай бошладик. Мен – биринчи синфга, Кимсан акам тўртинчи синфга.

Болалар ичида энг каттаси – менман. Бир марта ўқитувчи опа дадамдан илтимос қилганини эшитиб қолдим. «Ўртоқ Самадов, Робияхоннинг саводи аллақачон чиққан экан, бемалол учинчида ўқийверса бўлади», деган эди, дадам силтаб ташлади. «Ҳамма қатори қонуний ўқисин!» Шундай қилиб, кап-катта қиз укам тенги болалар билан дадам аллақачон ўргатган «Алифбе»ни, ҳисобни қайтадан ўрганишга тушдим.

...Узундан-узун қиш кечалари дадам билан бобом нариги уйга кириб қироатхонлик қиладиган одат чиқаришди. Лампа битта. Ойим, мен Кимсан акам бериги – қоронғи уйда сандал четида ўтирамиз.

Ойим норози бўлиб чирқиллайди:

 - Лампамой анқонинг уруғи бўлмаса экан! Эртага нима қиламиз.

Аммо «зиқна» бобом лампамойни аямайди.

– Ўқинг, маълим, – дейди шанғиллаб. – Отабекни ўқинг.

Дадамнинг осойишта овозда китоб ўкишига кулок солиб ётамиз. Бериги уйга бемалол эшитилиб туради. Отабек... Кумушбиби... Хасанали...

Бир куни дадам китоб ўқишдан тўхтаб, бобомга гапириб қолди:

 Сўраганнинг айби йўқ, Хусан ака, нега сизни Дума дейишади?

Бобомнинг кулгани эшитилди.

– Э, маълим, ўзимам анигини билмайман. Оқпошшо замони эди. Бир куни бутун Нўгайқўргон даҳаси чойхонага йигилиб майлис қилди. Нодирхўжа деган элликбоши бўларди. Инсофли одам эди, раҳматли. Қулоқ бўпкетди. Ўша ваъз айтди. «Орангларда ишбилармон бир одамни думага сайламасаларинг бўлмайди. Оқпошшо ҳазрати олийларининг фармони шу», деди. Одамлар чувиллашиб

мени кўрсатишди. Сайласа сайлай қолсин, десам кетида бир арава ғалваси бор экан. Ўқтин-ўқтин шаҳарга тушиб, Думасига бориш керак бўларкан. Бу ёқда иш қолиб кетяпти... Дума дегани каттакон бир маҳкама экан. Деворига кўкраги очиқ хотинларнинг сурати осилиб қўйилган ҳайҳотдай хона. Лак-лак одам... Чувир-чувир қилиб алланималарни гаплашишди. Қўл кўтаринглар, деди. Қарасам, ҳамма қўл кўтаряпти. Менам кўтаравердим... Кейин бормай қўйдим. Орада инқилоб бўлди, Дума-пумасиям сувга уриб кетди.

Дадам кулди.

- Сиз Хусан ака, ҳақиқий деҳқонсиз. Ер илмини яхши биласиз. Аммо кечирасиз-ку, саводингиз... дадам андиша қилди шекилли, тутилиб қолган эди, бобомнинг ўзи айтиб қўя қолди.
- Йўқ-да, маълим, бизда савод нима қилсин! Эсимизни танибмизки, ер кавлаб ётибмиз.

Тағин дадамнинг овози келди:

- Шуни айтаман-да! Ўшанда сизни сайлашга сайлашибди-ю, бу ёгини ўйлашмабди-да. Дума деган давлат масалаларини ҳал ҳилиши керак. Сиз...
- Оқпошшоям анойимас! Бобом хи-хилаб кулди. Менга ўхшаб, қўл кўтар деса оёгиниям қўшиб кўтарадиган соддаларни танлаган-да!.. Қўйинг бу гапларни! Яхшиси, Кумушбибини ўқинг. Жа қизиқ жойида тўхтаб қолдик.

\* \* \*

Мен тўртинчи, Кимсан акам еттинчи синфга кўчганида бир вақтлар Оқсоқол бува бизни аравада Нўғайқўргонга олиб келаётганида ваъда қилган тўкинчилик замон келди. Тўгри, бир йилда эмас, уч йилда... Энди байрамларда тонг-саҳардан ногоралар така-тум қиладиган, дошқозон-

ларда ош дамланадиган бўлди. Кеч кузда бобом қуй суйиб калла солади, қолган гуштни тузлаб хумга тиқади...

Бир куни Оқсоқол дадамга гапириб қолди:

– Мана, маълим, ўлмаган қул, сен же-мен же кунларгаям етдик. Энди сизга ўн икки вассали уй қуриб берамиз. Одамларни ҳашарга айтиб қўйдим. Белида белбоғи бори келаверади.

Дадам хижолат чекиброқ бобомга қаради.

- Агар Ҳусан акани қисиб қўймаган бўлсак, ҳашарчиларни мактаб қуришга солсакмикин... Бизга-ку уй топилар, мактаб керак.
- Нега қисиларканман! Бобом Оқсоқолга юзланиб чийиллади. Маълим тўгри айтяптилар. Энг аввал мактаб керак. Раисман деб кериласану шунга ақлинг етмайди.

Шу гап гап бўлди. Эрта ёздан дадам «катта мактаб» қурилишига шўнғиб кетди. Колхозчилар у ёқда турсин, юқори синф ўқувчилари ҳам ҳашарга солинди. Бўйи чўзилиб, овози дўриллаб қолган Кимсан ака эрталабдан разъездга – мактаб қурилаётган жойга югуради.

Кечқурун қоронғи тушганида ойим қўлимга бир товоқ овқат, тўртта нон тутқазади.

– Борақол, қизим, ҳаммасининг ичи узилиб кет-гандир...

Тугунни кўтариб разъезд томонга чопқиллайман.

Тумонат одам! Ҳарёқда машъала гуриллайди. Даладан тўппа-тўгри ҳашарга келган колхозчилар бири лой отиб, бири лўмбоз босиб, мактаб деворини кўтаради.

Кимсан акам ялангоёқ лой тепади. Ориф оқсоқол ишбоши бўлиб, у ёқдан бу ёққа югуради. Дадам пўрим шимининг почасини қайириб ҳандақ ичида пилдираб юради. Бобом деворга миниб олиб чийиллайди:

## – Кучинг борми, ҳов! Отсанг-чи мундоқ!

Лой отишда Оқсоқолнинг икки норғул ўғли – Шокир ака билан Зокир аканинг олдига тушадигани йўқ... Ойимнинг айтишича, Шокир ака билан Зокир ака трактор ҳайдаркан. Тракторнинг омочи шунаҳа зўрмишки, бир йўла йигирмата ҳўшҳўкизнинг ўрнига ер ағдарармиш. Икковлари ҳашарниям боплайди. Пахса-куракка лойни тўлдириб бир отганда бобомнинг ҳўлига бориб тушади. Ҳеч ким чарчадим демайди. Аския, ҳийҳириҳ... Кузга бориб янги мактаб битди ҳисоб.

...Қумсувоққа тушишган куни ҳам ҳашарчилар олдига борган эдим. Бир коса қовурдоқ уч кишига нима бўларди! Дадам, бувам, Кимсан акам бир қошиқдан еса— еди, бўлмаса йўқ. Шундаям нолишмади. Пешинда Оқсоқол бува қўй сўйиб қайнатма қилиб берган экан. Ҳаммалари яна ишга шўнғиб кетишди. Оқсоқол буванинг Зуҳра келини билан уйга қайтдик...

...Тинч, тўкин замоннинг аллақандай осойишта завқи бўлади. Ўшанда бу завқни тушунмаган эканман. Бошимизга кулфат ёгилганидан кейин қадрига етдим. Ўша кеча чарчаб барвақт ухлаб қопман. Бир маҳал ёнимда ётган ойим, «вой ўлмасам, тинчликми», деб сапчиб турганидан уйгониб кетдим. Ўша заҳоти кўча эшикнинг қаттиқ тақиллагани, кетидан:

– Дума, оч! – деган овоз келди.

Ойим «кимде-е» деб айвонга югурди.

Негадир юрагимга вахима ўрмалади. Нимқоронғи бурчакда бемалол хуррак отиб ётган Кимсан акамни илғаб, кўнглим жойига тушди.

Бундан чиқди, дадам билан бобом ҳам келишган. Эшик яна тиқиллади.

- Дума!

...Оқсоқол буванинг овозини таниб, тинчландим. Иш билан келган.

Ойимдан олдин бобом бориб эшикни очди шекилли, ўша томонда эркакларнинг ғўнғир-гунгир гаплашгани қулогимга чалинди. Бутунлай хотиржам бўлдим. Энди жойимга ётган эдим, дераза олдидан биров гурсиллаб ўтди.

Дадам ётган уй томонда бобомнинг чақиргани эшитилди:

- Маълим, тураркансиз.

Нариги уйда дадам йўталди.

- Тинчликми, Хусан ака?
- Сизни сўрашяпти... Бобомнинг товушида хавотир борлигини қандайдир ички туйғу билан сездиму тағин ўрнимдан туриб кетдим.
  - Ким? деди дадам.
  - Билмадим, раис билан яна икки киши.

Дадамнинг ҳовлига тушганини билдим. Шапшуп юриб эшик олдига борди-ю, ўша заҳоти қайтиб келди.

– Робия, – деди остонада тўхтаб.

Қоронғида овози титраб кетганини сездим.

- Дада! Юрагим ёмон бир нарсани ҳис этиб, чопиб олдига бордим. Дада!
- Мен эртага келаман, қизим. Дадам шундай деди-да, илдам юриб нариги уйга кирди. Бир зумда кийиниб чиқди. Этигини тополмай каловланиб турган эди, бобом ойимга ўшқириб берди:
  - Чироқни ёқсанг-чи, пакана!..

Ойим шоша-пиша чироқ ёқиб, пилигини кўтарди. Дадам айвон бурчагида турган этигини, ниҳоят топди. Пайтава ўраётганида қўллари қалтираб кетганини кўрдим. Баттар қўрқиб кетдим.

– Дада, – дедим титраб. – Қаёққа кетяпсиз?
 Дадам ранги қув ўчганча муздек лаби билан пешонамдан ўпди.

- Қўрқма, қизим, эртага келаман, деди-ю, бобомга юзланди. Тушунмовчилик бўлганга ўхшайди, Ҳусан ака. Кейин негадир ойимга илтижоли термилди. Мабодо бир ой, ярим ой келмай қолсам, Робияни сизга топширдим. Оналик қиласиз.
- Вой ўлмасам, маълим! Ойим титраб мени қучоқлаб олди. Нимага унақа дейсиз?

Дадам ховлига тушган жойида қайтиб айвонга чиқди. Икки юзимдан қаттиқ ўпди-да, сакраб паст-га тушди. Қаддини ғоз тутиб эшик томонга йўналди.

Дарвоза томонда гуриллаган машина овози эшитилгандан кейингина хушим ўзимга келди.

Ойимнинг қучоғидан чиқдиму чинқирганча ховлига отилдим.

- Дада! Дадажон!

Кўча эшик олдида турган бобомни туртиб ўтиб, тупроқ йўлдан югуриб кетдим. Хамма ёқни чанг-тўзон қоплаган, ҳаводан бензин ҳиди келар, олисда аллақандай машинанинг қизил чироғи узоқлашиб борарди.

– Дада! – Яланг оёқ чопиб борарканман, энтикиб қичқирдим. – Дадажон!

Машина чироғи кўринмай кетди. Мен бўлсам ҳамон югуриб борардим. Нафасим ҳисилиб ҳолган, томоғим ачишар, аммо тўхтамасдим. Охири тошгами, кесакками ҳоҳилиб юзтубан йиҳилиб тушдим. Оғзимга турпоҳ кириб йиғлаб юбордим. Бир маҳал кимдир елкамни силади.

– Тур, Робия, тургин. Уйга борайлик.

Кимсан акамнинг дўриллаган овози қулоғимга ёқимсиз эшитилди.

Ерни муштлаганча қичқирдим:

- Бормайман!
- Шунақа қилмаги-ин. Ўзинг яхшисан-ку, Роби, кетайлик.

– Бормайман! – Алам устида додлаб юбордим. – Бормайман! Дада! Дадажон!

Кимсан акам ёнимга чўнқайиб бошимни силади.

– Даданг келадилар. Нега йиглайсан, келадилар. Мана мени айтди дерсан, юр, уйга кетамиз.

Дадамнинг қўллари қалтираганича пайтава ўраётгани, ойимга илтижоли термилгани, «Робияни эҳтиёт қилинг», дегани кўз олдимга келди, ёш болалардек чинқириб юбордим.

- Йўқол! Дадам! Дадамга бораман!
- ...Ойим «ҳали-замон даданг келади», деб ҳарчанд юпаттани билан анчагача ҳиқиллаб ётдим. Нариги уйда ҳамон чироқ ёниқ турар, бобом билан Оқсоқол бува алланимани маслаҳатлашишар эди. Тонг бўзарганда ухлаб қолибман. Ҳовли томондан келаётган қаттиқ-қаттиқ овоздан уйғониб кетдим...
- Тушунтирдингми ахир? Маълим яхши одам, Самарқандда ўқиган, болаларимизга илм беряпти, каттакон мактаб қурди, дедингми?

Бобомнинг овозини эшитиб, кечаси бўлган воқеа, дадамнинг «Робияни эҳтиёт қилинг», дегани яна эсимга тушди. Кўзимни ишқалаб айвонга чиқдим.

Вақт пешинга яқинлашиб қолган, беҳи тагида бобом билан Оқсоқол бува гаплашиб туришар, нарироқда Кимсан акам кетмон сопидан тутган куйи талмовсираб туриб қолган, ошхона эшигининг остонасига ўтириб олган ойим иккала чолдан куз узмас эди.

- Айтдим! Оқсоқол бува бировга ўчакишгандек жаҳл билан қўлини пахса қилди. Имонимни ўртага қўйиб, кафолат бераманки, битта-яримта мараз, маълимга туҳмат қилган, дедим!
  - Хўш, нима дейишди?

Оқсоқол бува бобомга аразлагандек хумрайиб қараб қуйди.

- Текширамиз, сиз аралашманг, деди.
- Гуноҳи нима экан, демайсанми, овсар! Бобом ҳаммасига Оқсоқол бува айбдордек, шанғиллади. Менга Калинин Оқсоқол ўз қўли билан ордин берган, керак бўлса энг катта Оқсоқолнинг олдигача бораман, демадингми?!
- Дедим! Оқсоқол буванинг муйлаби титраб кетгандек булди. Айби шумишки, дарсни программа буйича утмасмиш. Хисоб илмини Хоразмий яратган, деб миллатчилик қилганмиш. Болаларга Бобур пошшонинг шеърларини уқитганмиш. У қовоғини солиб хурсинди. Райондан берухсат мактаб қурганмиш...
- Ие? деди бобом ҳайратдан овози ингичкалашиб. – Мактаб қурса ёмонми? Мактабни ҳашар билан солдик-ку!
- Замонни кўриб турибсан... Оқсоқол бува овозини пасайтирди. Менимча, бу ишда Хўжақуловнинг ҳам қўли бор.
  - Ким у Хўжақулип?

Оқсоқол уф тортди. Анчагача жим қолди.

Хамон айвон устунига суяниб турардим. Бобом ҳам, Кимсан акам билан ойим ҳам Оқсоқол буванинг оғзига термилишар, ҳеч ким менга эътибор бермас эди.

– Маълим сенга гапирмаганмиди? – деди Оқсоқол бува бобомнинг кўзига қаттиқ тикилиб.

Бобом ингичка елкаларини учирди.

- Нимани?
- Менга бир айтгандек бўлувди, деди Оқсоқол ўйчан оҳангда. Маълим Самарқандда ишлаб юрганида Хўжақулов деган терговчи билан қаттиқ тўқнашади. Темир йўлда катта ўгрилик очилади. Терговчи ишни ёпти-ёпти қилиб юбормоқчи бўлганида, станцияда ишлайдиган қўшниси маълимга чиқиб арз

қилади. Маълим аввал газетага, кейин обкомга хат ёзади. Гуноҳкор жазосини олади. Терговчи ариза бериб ишдан бўшайди. Фаргонагами, Қўқонгами кетади. Айланиб-айланиб Тошкентга келиб қолади. Ана ўша Хўжақулов ҳозир прокурор. – Оқсоқол бува узоқ тимирскиланиб нос отди. Бобом икковлари ерга тикилиб, ўй суриб қолишди. Назаримда, нима қилишига иккови ҳам ҳайрон эди.

– Туҳмат балосидан арасин! – деди ошхона остонасида ўтирган ойим ўкиниб. Кейин тўсатдан менга кўзи тушиб, илдам ўрнидан турди. – Вой, уйғондингми, қизим?

Оқсоқол бува ярқ этиб мен томонга юзланди.

– Сан, қизим, хапа бўлма! – деди салмоқлаб. – Маълимни айби йўқ. Ҳақ жойида қарор топмагунча қўймайман. Мени ким деб юрибди Хўжақуловлар!

Ойим айвонга чиқиб, елкамга қоқди. Кетмон сопидан тутиб турган Кимсан акам гох Оқсоқолга, гох менга қараб илжайди. Оқсоқол буванинг гапи «эртага дадангни обкеб бераман» дегандек туюлиб, ўзимнинг хам кўнглим ёришди. Аммо индинига ёмон иш бўлди. Ранги захил, қулоғининг орқасида данакдек сўгали бор бегона одам келиб, дадамнинг китоб-дафтарларини роса титкилади. Анча-мунча нарсаларни олиб кетди. Бобом ўртага тушмоқчи бўлган эди, «йўқол, унсур, уйингда тақиқланган адабиёт сақлагансан!» деб, кўзини ола-кула қилди... Бир ҳафтадан кейин мактабга борсам, ўқитувчи хотин ёмон гап айтди. Бир вақтлар дадамга «Робиянинг саводи аллақачон чиққан экан, бир йўла учинчи синфга бораверса бўлади», деган ўқитувчи хотин энди бутунлай бошқача гап қилди. «Отанг халқ душмани экан. Сен совет мактабида ўқишни хохламаганинг учун атайлаб ўқишга кечикиб киргансан!» Йиглагим келди-ю, йиғламадим. Ҳатто ойимга ҳам дардимни сездирмадим. Тўсатдан тушган ғам ёш болани бир кунда катта одамга айлантириб қўяркан.

### 2. Янги раис

Дадамни яна туш кўрдим. Вокзалмишми-ей, бозорми-ей. Хуллас, одам кўп эмиш. Дадам узокда, оломон орасида туриб, нуқул қўли билан «бери кел», деб имлармиш. Оппоқ кўйлак кийиб, бўйинбог тақиб олганмиш. Олдига борай десам, йўлимни ранги захил, қулогининг орқасида сўгали бор одам тўсиб турганмиш. Негадир улар учта бўлиб қолибди. Хаммаси бир-бирига ўхшармиш. Дадамни оломон ичида йўқотиб қўйибман. Нафасим тиқилиб, нуқул қичқирармишман:

«Дада! Дадажон!»

Ўзимнинг товушимдан ўзим уйгониб кетдим. Уй ичи гира-шира қоронғи, ёнимда Кимсан акам ўтирарди.

 – Нима қилди, Робия? – деди дўриллаб. – Сув ичасанми?

Тушим ҳамон кўз олдимдан кетмас, дадамни йўқотиб қўйганим алам қиларди.

— Э! – дедим жеркиб. – Сувни нима қиламан?! Кимсан акам бирпас қараб турди-да, индамай чиқиб кетди. Анчагача хомуш ўтирдим. Бора-бора хушим ўзимга келди. Кунбўйи ойимга қарашиб юриб, кечқурун овқат емай ётиб қолганим эсимга тушди.

Бугун Нўғайқўрғонда нохуш гап тарқалди. «Қулуп»да майлис бўлармиш, Ориф оқсоқолни олиб ташлаб, ўрнига бошқа раис сайлашармиш... Ойим билан бобом ҳам ўшаёққа кетганича ҳалиям қайтишмаган шекилли, айвонда чироқ ёқилмаган, ҳовли жимжит эди.

Эшик ғийқиллаб очилиб, Кимсан акам мўралади.

- Роби, бизаям идорага бормаймизми?

...Дилгир куз оқшоми қишлоқни сукунат пардаси билан ўраб олган, кунботар томонда ярим-ёрти ой увада булутлар орасида тентирар, бутун Нўғай-кўргон ҳувиллаб қолгандек эди. Пастак деворлар устидан тутун кўтарилмайди, деразаларда чироқ кўринмайди, аллақаерда эчки бўгилиб маърайди...

Чиндан ҳам бутун қишлоқ идорага кўчиб келган экан. Катта-катта деразалардан нур тушиб турган узун бино – «қулуп»га яқин бориб бўлмайди. Зинасигача одам тиқилиб кетган.

Кимсан акам қўлимдан судраб бино орқасига олиб ўтди. Нур тушиб турган деразалар очиқ, ичкаридан говур-гувур эшитилди. Кимсан акам тармашиб деразага чиқди.

- Қўлингни бер! деди қаттиқ шивирлаб. Энгашиб билагимдан ушлаганича бир тортган эди, қўлим узилиб кетай деди.
  - Қўйворинг, дедим типирчилаб.
- Жим! У бақувват қўллари билан мени баланд дераза токчасига тортиб чиқарди. (Аллақандай уч ой ичида шунақа кучли бўлиб кетганига ўзим ҳайрон қолдим.) Лекин ҳозир буни ўйлайдиган ҳолатда эмасдим. Токчага кўндаланг ўтириб, ичкарига қарасам тумонат одам. Олдинги қатордагилар тўппа-тўгри ернинг ўзига чордана қуриб ўтиришибди.

Чекка-чеккадаги лампалар, фонуслар хира нур сочади. Хамма ёқни лампамой ҳиди, тамаки иси тутиб кетган. Биров деразага чиққанимизни кўрса уришиб беради, деб ўйлаган эдим. Йўқ, ҳеч ким қайрилиб ҳам қарамади. Ҳамма ўзи билан ўзи овора эди.

Кимсан акам «у ёққа қара» дегандек биқинимга туртиб имо қилди. Саҳна тўрида Сталиннинг мўй-

ловли каттакон сурати, қизил мато ёпилган узун стол орқасида олти киши ўтирибди. Энг аввал Оқсоқол бувага кўзим тушди. Эҳтимол, гавдаси ҳаммадан катта бўлгани учун биринчи бўлиб уни кўргандирман. Ёнида – бобом. Қора камзул кийиб олган. Бошида жияги титилиб кетган дўппи. Гавдаси янаям кичрайиб қолгандек, столга мук тушган. Ёнбошида новча бўйли озғин киши. Танийман. Оқсоқол бува билан бизникига кўп келган. Эргаш сельсовет дейишади. Ундан нарида ўтирган кишини танимадим. Йўл-йўл костюм кийган. Бўйнида бўйинбог. Сочини силлиқ тараган. Ингичка мўйловиям бор. У нуқул безовталанади. Чойнак-пиёла қўйилган минбарда ваъз қилаётган айвони катта шапкали кишига бўйнини чўзиб қараб-қараб қўяди.

Шапка кийган киши жон куйдириб гапиряпти.

– Ўртоқ колхозчилар! Тушунинг ахир! Ориф оқсоқолни ҳаммамиз ҳурмат қиламиз. Уч йил қурғоқчилик бўлгандаям колхозни чўктириб қўймади. Планни ошириб бажарди. Мана, энди колхоз бадавлат хўжаликка айланди.

Пастдан аллақандай эркак кишининг баланд овози янгради.

- Бўпти-да! Тағин нима дейсиз!
- Шапкали киши ўнг қўлини баланд кўтарди.
- Илтимос, тинчлик сақлансин! Биламиз, «Қизил деҳқон» илғор колхоз. Мана бунақа клублар ҳамма ҳўжаликдаям бор деёлмаймиз. Каттакон мактаб қурдинглар. Ҳаммасига Оқсоқол бош бўлдилар. Ориф ака— тажрибали деҳқон. Лекин ҳўжаликни янги изга соладиган замон келди. Бунинг учун илмли, агрономияни яхши биладиган раис керак. Ўртоқ Хўжаев...
- Керакмас! Пастда ўтирганлар йўгон-ингичка овозда чувиллашди. Бизга Оқсоқолнинг ўзиям бўлавуради.

Шапкали киши «уф» тортиб бош чайқади. Эргаш сельсоветнинг ёнбошида ўтирган ингичка мўйловли одам сапчиб ўрнидан турди. Бир нима демоқчи бўлди-ю, шашти пасайиб қайтиб ўтирди.

Пастдагилар баттар шовқин солишди:

- Оқсоқолнинг айби нима?
- Хажайипингиз шунчалик зўр бўлса, бошқа колхозга раислик қилақолсин!

Шапкали киши «ўзингиз тинчитинг» дегандек Оқсоқолга қаради. Оқсоқол шошилмай ўрнидан турди. Қаддини ғоз тутиб, минбар олдига борди. Шапкали киши унинг елкасига дўстона шапатилаб қўйди.

– Ҳалойиқ! – деди Оқсоқол гулдираган товушда. Секин-секин тинчлик чўкди. – Калта ўйлама, халойиқ! Мана, оғир йиллардан ўтиб олдик. Тўкинчилик замон келди. Локин бундан кейин деҳқоннинг ишини кетмон эмас, мошина қилади. Украина томонларда буғдойни мошина ўряпти. Яқин орада олимлар ҳаводан ўғит олади.

Пастдан кимдир асабий лукма ташлади:

- Олса жа яхши-да, ўша ўғитни сиз билан биргалашиб далага соламиз, Оқсоқол!
- Ўв, Рахимтой! Оқсоқол рапидадек қўлини пахса қилди. Бердисини айтгунча уриб ўлдирма-да, одамни! Ҳали шунақа кунлар келадики, сувни ҳовузга солиб қулфлаб қўйишади. Ана ундан кейин расамади билан тарқатишади. Қани, сувни қулфлаш қайси бирингни қўлингдан келади?

Одамлар жимиб қолишди. Чекка-чекадаги шишаси қорайиб кетган фонусларнинг чирсиллаши аниқ эшитила бошлади. Кимдир носини туфлади. Қоронғи бурчакда ўтирган аллақандай хотин йиғлаёттан боласини жеркиб овутди:

- Э, қиз бўлмай ажалнинг олдида кет!

– Болани қарғама, Қумри! – деди Оқсоқол беозор танбех бериб. Кейин яна ўша гулдираган оҳангда давом этди. – Қани, қайси биринг эплайсан ҳаводан ўғит олишни? Ана индамайсан! У ёғини сўрасанг, менам эплолмайман. Хўш, шундоқ экан, нимага шовқин соласан? Бунақа ишлар, – у йўл-йўл костюмли кишига юзланди. – Ўртоқ Хажайипни қўлидан келади! Нега деганда, илми-ҳикматни билади. Райком ўртоқ Хажайипни раисликка лозим кўрибдими, бир нарсани билиб қилган. Гапни кўпайтиришнинг ҳожати йўқ. Ўртоқ Хажайипга мана мен биринчи бўлиб овоз бераман. Қайси биринг Оқсоқолни ҳурмат қилсанг, қўл кўтаравер!

Оқсоқолнинг ўзи биринчи бўлиб қўлини баланд кўтарди. Ўша захоти шапкали киши маъкуллаб овоз берди. Пастдагилар бирин-сирин қўлини осмонга чўза бошлади. Орқа томондан хотин кишининг ҳиқиллаб йиғлагани эшитилди. «Оқсоқолнинг ўзи яхшийди, овсин, одамнинг дардини тушунарди». Қараб турсам, бобом пашша қўригандек истар-истамас, қўлини силкиб қўйди.

– Демак бир овоздан! – Шапкали киши ўрнидан туриб Ориф оқсоқолнинг қўлини қисди. – Рахмат, Оқсоқол! Сиз – бари бир колхознинг отаси бўлиб қоласиз. Партия сизга ишонади. Қани, ўртоқ Хўжаев, сўз – сизга.

Йўл-йўл костюмли киши илдам туриб, минбарга борди.

– Ўртоқ колхозчилар! – деди баланд, жарангдор овозда. – Хурматингиз учун раҳмат, ўртоқлар! Тўгри мени ҳам агрономлик дипломим йўқ. Лекин законний битта гапни айтиб қўяй: раз менга хўжаликни ишониб топширдиларингми, қаттиқ ишлаймиз. Ҳурматли райкомимиз олдида ваъда бериб айтаманки, келаси хўжалик йилида сабзавот ҳосилдорлигини икки ҳисса оширамиз!

Пастдан кимдир кинояли бақирди:

- Балки уч хисса оширармиз, раис!
- Ким? янги раиснинг қоши чимирилиб кетди.
- Ким айтди шу гапни? Ўрнидан турсин-чи!

Совуқ сукунат чўкди. Гапирган одам бировнинг орқасига яширинди шекилли, ҳеч ким ўрнидан турмади.

– Доҳиймиз Сталин айтганидек, орамизда ёт унсурлар кўп! – Янги раис ҳар сўзини чертиб таъкидлади. – Билиб қўйинглар! Раз мен раис эканман, бунақа саботажчилар билан законний жойда гаплашиб қўйишни ўз вазифам деб биламан.

Пастда аввал шивир-шивир кейин говур-гувур бошланди:

- Ким ўзи бу?
- Мунча баланд кетади?
- Тўқайда чивинга бир талансин, қаёққа қочаркин!

Хамма ёқ ари инидек ғувиллаб кетди. Янги раис эсанкираб қолди.

– Жим! – деди минбарни муштлаб. – Тише! Подага ўхшаган...

Пастдагилар тинчиш ўрнига баттар авжига чикди.

- Биз пода бўлдикми энди?
- Э, ўргилдик сендақа подачидан!

Янги раис, ингичка мўйлови учиб, гох шапкали кишига, гох Оқсоқолга қарарди. Шапкали киши жаҳл билан қул силтади, чамаси янги раисни койиди. Лекин бу билан шовқин босилмади. Шунда Ориф оқсоқол яна ўрнидан турди.

– Хажайип! – деди Оқсоқол титраб. – Закончимисиз, нима бало! Нуқул «закун-закун» дейсиз! «Қизил деҳқон»дагилар закунни сизчалик билмасаям, деҳқончиликка ақли етади. Шўх ер қанақа бўлишини мендан яхши билсангиз керак. Ҳаммаси

тош. Кетмон урсангиз; бетингизга тош сачрайди. Еримиз – шунақа. Ярмиси – тўқай. Ниятингиз яхши-ку, ҳолва деган билан оғиз чучимайди-да, ўртоқ Хажайип!

Пастдагилар анча тинчиб қолған, лекин чекка-чеккадан ҳамон норози хитоблар эшитиларди:

- Кеча келди югуриб, бугун олар суғуриб...
- Туппа тузук мол эканмизу билмай юрганимизни қара!
- Ҳалойиқ! Оқсоқол кафтини боши устида баланд кўтарди. Бас! Ўртоқ Хажайип билмасдан гапирди-қўйди-да! Ёшлик қилди. Шунгаям ота гўри қозихонами! Ҳали кўрасизлар: раис билан апоқ-чапоқ бўпкетасан ҳамманг... Ундан кўра бўладиган гапни гаплашайлик. Колхозимизда гастиниса-пастиниса йўқ. Ўртоқ Хажайипни ўзимиз раис қилиб сайладик. Тўгрими? Энди бу ёгиниям ҳал қилиб қўяйлик. Раис одам шаҳардан қатнаб юрса ярашмас. Ўзимизнинг хўжаликнинг бошлигига уй топиб бермасак, отимизга ор, итимизга номус! Қани, ўртоқ Хажайипга ким битта уйини бўшатиб беради? Доимгамас, вақтинча.

Хеч кимдан садо чиқмади. Оқсоқол бобомга юзланди.

– Дума!.. Гапирсанг-чи мундоқ!

Бобом ўтирган жойида бўйнини чўзиб чийиллади:

- Йўқ уйни туғиб бераманми сенга?
- Янги раис бобомга ижирғаниб қаради. «Уйинг билан қўшмозор бўл», дегандек лабини кинояли қимтиди. Оқсоқол ўйланиб қолди.
- Бу гапингам тўгри, деди салмоқлаб. Кейин пастдагиларга қараб, ҳайқирди. Ҳалойиқ! Битта илтимос, мана, даладаям иш қолмади ҳисоб. Шолғом билан турпни йиғиб олсак бўлди. Шу... совуқ тушмасдан ўртоқ Хажайипга битта уй со-

берсак. Аммо-локин шунақа уй бўлсаки, «Қизил деҳқон» колхозининг раиси қатта туради, деганда, мана деб кўрсатадиган бўлса. Энди... гапнинг пўсткалласи шу: белимда белбоғим бор деганинг эрталаб ҳашарга келавер!

## 3. Рашид абзининг мўрчаси

Оқсоқол менинг дадам туфайли раисликдан тушганига ақлим етмаган экан. Эртасига бобом икковлари ҳашардан қайтиб, кечаси алла-палла-гача ҳангомалашиб ўтиришди. Гап айланиб кечаги мажлисга тақалди.

- Санам қизиқсан-да, Оқсоқол, деди бобом бўғилиб. – Ўз қўлинг билан амалингни бериб ўтирибсан.
- Амал нима?! Оқсоқол бепарво қўл силтади. Менга қолса, раислик у ёқда турсин, минг марта катта амалиям мисоли оёгингдаги этикдай гап. Сени амалга халқ кўтарадими, давлат ўтқазиб қўядими, бари бир «Мана шу этикни кийгин-да, керак бўлса сув кечиб, керак бўлса лой кечиб, юртнинг хизматини қилгин», дейди. Қиласанам!.. Оқсоқол бир зум ўйлаб туриб, носини тупурди. Тўгри, бир хиллар бор: зигирдай амал тегдими, бўлди, Худо амал билан қўшиб ақл берди, деб ўйлайди. Бунақалар ёнида ўзидан ақллироқ одам ишлашини хоҳламайди. Назарида ақлли одам этигини ечиб олаётгандай бўлаверади. Бечорани гоҳ тирсаги билан туртади, гоҳ думбаси билан...
- Бўпти-да! Бобом баттар тутоқди. Шу Закунчинг ақлли одамни бийлатармикин? Башараси айтиб турибди-ку, кимлигини. Халқ дод деб ёқлаб турса-ю, бу кишим ноз қилсалар! Ўргилдим олифтагарчилигингдан. Ё халқ бир қадримни билиб қўйсин, дедиларми?

Оқсоқол кўкимтир қошларини уйиб ерга қараганча узоқ жим ўтирди. Кейин қандайдир паст, ўзига ярашмаган ўйчан овозда гапирди.

- Раис ўзгаргани билан халқ жойида турибди-ку, Дума!.. Қолаверса одамлар минг дод десин, бари бир мени олиб ташлашарди. Халқ душманини Самарқанддан атайлаб обкелгансан деб...
- Маълимда гунох йўк! Бобом Оқсоқолга чақчайиб чийиллади. – Гунох йўк! – деди аразлаган боладек юзини ўгириб. – Тағин ўша Закунчига уйимни бўшатиб берармишман! Маълим эртага қайтиб келса, қайси юз билан кўзига қарайман!
- Биламан! Оқсоқол хўрсинди. Ҳаммасини биламан! Аммо замонни кўриб турисан-ку... У бир зум ўйланиб турди-да, бобомнинг елкасига қоқди. Балки янги раис ростдан ҳам ишнинг кўзини билар. Ёш, илми бор. Сен билан биз нима? Олма-ўрик бўлармидик энди!

Бобом энаси қотиб, құл силтади.

- Илми бормиш.. Ўзи айтди-ку, қўлимда қоғозим йўқ деб...
- Қўйсанг-чи, гап қоғоздами? деди Оқсоқол хўмрайиб.
- Қарайлик-чи, нима каромат кўрсатаркин ўша Закунчинг! Бобом ўрнидан туриб кетди. Бор, қизим, чойни янгилаб ке...

Янги раис кўп ўтмай чиндан ҳам «каромат» кўрсата бошлади. Ўша мажлисда «қаттиқ ишлаймиз» деганча бор экан. Тонг отмасдан эшик тақиллайди. Жўн тақиласаям майли-я, ҳамма ёқ қарсиллаб кетади. Эшикни очишингиз билан пешонасига кўзмунчоқ аралаш кумуш маржон тақилган жийрон от, эгарда қийшиқ ўтирган, чақмоқ телпак кийган Закунчига кўзингиз тушади.

- Кун чиқай деб қолди, ётаверасанларми, наҳс босиб?! - дейди қамчисини таҳдидли ўйнатиб.

Шу гапни айтмасаям, колхозчилар тонг отмасдан далага чиқиш кераклигини билади. Оқсоқол раислиги пайтида бунақа дағдағалар йўқ эди. Зарил бўлиб қолганида Оқсоқол: «Халойиқ, шу иш шундоқ бўпқолди, белимда белбоғим бор деганинг, келавер», деса, одамлар ўтгаям-сувгаям уриб кетаверарди. Закунчининг дагдагаси халқнинг ихлосини қайтарди. Калтак еган ҳўкиз ётогон бўлади, дегандек, баъзилар қайсарлик қила бошлади. «Қор ёғиб турибди-ю, далада пишириб қўйибдими», деб оёк тирайдиганлар хам топилди. Аслини олганда бу гап тўгри. Ерга аллақачон яхоб бериб бўлишган. Қахратон совуқда шудгор қилиб бўлмаса, ариқ очиб бўлмаса. Лекин Закунчи бу томониниям ўйлаб қўйган экан. Қиш чилласида бир-биридан вахимали гаплар тарқалди.

«Шаҳарда Закунчининг суянган тоғи бор экан. Хўжақулип деган тоғаси «нозик жой»да ишлармиш. Қасдлашган одамни халқ душмани деб қамоққа тиқармиш», «Дўмбрободдаги олтинчи бригадда Аҳмад полвон деган кетмончи хотини туғиб икки кун далага чиқмаган экан, Закунчи ўн йилга кестириб юборибди». «Буғалтир Соли сўпоқ Закунчининг хабаркаши бўпти. Кимнинг уйида нима гап бўлаётганини ёзиб юрармиш...» Йил ўтмай, раисдан ҳамма қўрқиб қолди. Хотинлар йиғлаётган боласини «жим бўл, Закунчи келяпти, ҳозир отига тепдириб ўлдиради!» деб овутадиган бўлишди.

Фақат Оқсоқол билан бобом бу гапларга парво қилишмас, бири кетмон кўтариб, бири эшак аравасини миниб саҳарлаб чиқиб кетишар эди. Лекин бир жиҳатдан раис айтганини қилди. Колхоз икки йил кетма-кет режани ошириб адо қилди. «Қизил деҳқон»нинг донғи Доғистонга етди... Балки За-

кунчининг қаттиққўллиги иш бергандир. Балки чиндан ҳам «илму-ҳикмат»ни яхши билар...

...Кимсан акам еттинчини битирганидан кейин шаҳарга бориб ўқимоқчи эди, бобом йўл қўймади: кетмонга солди. Бир куни Кимсан акам бобом билан ойимга айтолмаган дардини менга гапирди:

- Шаҳарда ўнни битириб, учувчи бўламан. Истрибителда душманни қираман.
  - Қанақа душман?
  - Фин уруши бўляпти-ку, жинни!

Юрагим увишиб кетди.

- Ўлдириб қўйса-чи?
- Ким ўлдиради?
- Душман-да!

Кимсан акамнинг жахли чиқиб кетди.

- Қанақасига ўлдиради. Бизнинг истрибителдан ўқ ўтмайди. Чкаловни эшитганмисан?!
- ...Унинг ахди қатъий эди. Бир марта шахарга ҳам бориб келди. Кечқурун овқатдан кейин бобом Кимсан акамни сўроққа тутиб қолди:
  - Учувчи бўламан, денг, бойвачча?

Кимсан акам иягидаги ҳуснбузарни тирноғи билан ситиб, ўшшайиб ўтираверди.

Бу унинг: «Ҳа, қўлингиздан келганини қилинг», дегани эди.

– Менга қаранг, бойвачча! – Бобом тажанглик билан бўйнини чўзди. – Кетмонингиз енгиллик қилиб қолганга ўхшайди. Молхонага киринг, ярим пудли кетмон турибди! Ана ўшани мининг-да, далага чиқиб айриплон қилиб учинг, хўпми?

Кимсан акам бобомга бир нима деёлмади-ю, мени бурчакка имлаб орзусини айтди.

Бари бир! Учувчи бўлмасам, офицер бўламан.
 Армияга кетаман.

Йўқ, унинг бу орзуси ҳам рўёбга чиқмади. Армияга ҳамманиям олаверишмас экан. Ҳаёт эса давом этарди...

Хар байрамда дошқозонларда ош дамланган, стахановчиларни патефон, самовар, кийимлик атласлар билан сийлашган... Бир марта Кимсан акамни ҳам этик билан мукофотлашди.

Фақат менинг дилимдаги армон ечилмай қолаверди. Оқсоқол «эрта-индин» келади, деган дадам бедарак кетди. Тўғри, Оқсоқол билан бобом кўп елиб-югуришди. «Маълим душман эмас», деб тушунтиришга уринишди. Натижа чиқмади. Бора-бора дадам тушимгаям кирмай қўйди.

Баҳор оқшомларидан бирида синиқ пиёланинг орқасига ўсма эзиб, қошимга қўйиб ўтирсам, даладан қайтган ойим кўриб қолди.

– Майли, қизим, – деди кулимсираб. – Ёшинг ўн еттига кетяпти. Эрта-индин совчи келади. Ўзингга қараб юр...

Уялиб кетдим.

- Боринг-е! - деганча ошхонага қараб қочдим. Ойим совчини гапириши билан негадир Кимсан акам лоп этиб кўз олдимга келди. Кимсан акам тоғдек йигит бўлган. Бобомга иккита келади. Ҳайронман, кейинги пайтда мен билан кам гаплашади. Ҳовлидами, молхонадами, дуч келиб қолсак, менга ғалати қараётганга ўхшайверади. Қўрқаман. Лекин ўша заҳоти ўзимни ўзим қарғайман: «Ўл жинни! Аканг-ку!»

...Биринчи Май байрами яқинлашиб қолган эди. Пешиндан кейин ойим қўлимга бир кийимлик атлас тутқазиб тайинлади:

– Бор, қизим! Холпош холангга обор. «Ойим айтдилар, менга кўкрак бурма кўйлак тикиб бераркансиз», дегин.

Ойимнинг одати шу: байрам яқин келиши билан типирчилаб қолади. «Шундоқ айём кунларида болаларим оҳорликсиз қолмасин», деб менга кўйлакми, лозимми тиктиради. «Кимсанга шим-пим

оберинг», деб бобомга ялинади. Бобом, «чиқимнинг бети қурсин», дейдиганлардан. Менга-ку, тишини суғургандек қилиб бўлсаям минг жойини кавлаб пул чиқаради. Кимсан акамга келганда пешонаси тиришиб кетади: «Янги шим киймасалар кимнинг кўнгли қопти, бойваччанинг! — дейди тўнгиллаб. — Ҳали тўй ташвиши турибди». Бари бир, ойим қўймайди. «Катта йигит бўпқолди, — дейди. — Ишлаб топганини кўлингизга обкеб беряпти-ку, жўралари билан ўйнасин», дейди. Хуллас, бобомни кўндиради.

...Оқсоқолнинг каттакон, кунгирадор дарвозасидан кирсам, Зуҳра келин атиргуллар ғунчалай бошлаган гулзор четидаги ариқ бўйида кир ювиб ўтирган экан. Кўпикли қўли билан елкамга қоқиб кўришди.

- Қаний! Битта кўрий! деди қўлтиғимдаги атласга имо қилиб. Атлас қатини очган эдим, Зухра келиннинг сурма тортилган кўзлари ёниб кетди.
- Саккиз тепки экан! Зокир акамга айтаман, менгаям оберадилар.

Шундай деди-ю, тўсатдан маъюс тортгандек бўлди.

Озиб-тўзиб кетганини, кўйлагининг елкалари осилиб қолганини сездим.

Зухра келин – Зокир аканинг хотини. Холпош хола иккала келинини бирдек кўради. Тўйга борса бир ёнига Фотима келинини, бир ёнига Зухра келинини олиб чўгдай ясантириб оборади.

Бирга оборишга оборади-ю, кўпроқ Зуҳра келинини мақтайди.

– Айниқса, шу қизимни яхши кўраман. Потмамниям ёмон демайман-ку, сал лачапўшроқ. Кир юваман, деб сув қайнатса, тагига олдириб юборади!

Фотима келин хафа бўлмайди. Қайтага қаҳ-қаҳ уриб кулади.

- Унақа деманг, ойижон, кечаги қилган шилпилдоғимни мақтаб-мақтаб едингиз-ку!
- Вой, ордона! Шилпилдоқ қилишни санга ким қуйибди. Ёйган хамирингни курпа қилиб ётса булади-ку. Зурани йуриғи бошқа. Лағмон кесса, кокил қилиб ташлайди. Қовли супурса, ерда аксинг куринади. Узимга ухшайди-да! Қайнона-келиннинг тупроғини бир жойдан олган!

Холпош хола тўй-ҳашамларда Зуҳра келинни оғзидан бол томиб мақтаса ҳам бизникига чиққанида ойимга ҳасрат қилади:

- Куйиб кетдим, овсинжон! Потмам бир эмас, иккита болали бўлди. Зўрам юкли бўлмаяпти.
- Фарзанд билан давлатнинг кечи йўқ, дейди ойим юпатиб. Одамлар ўн йил-йигирма йилда болали бўлади. Зўрахонга нима қипти. Бор-йўги етти йил ўтдими?
- Кўрсатмаган дўхтирим, боқтирмаган табибим қолмади. Қайси куни Комил табибга яна обордим. Келинингиз соппа-соғ дейди.
  - Ана, айтмадимми? Шунгаям сиқиласизми?Холпош хола дардли бош чайқайди.
- Шундоқ дейсизу Зокирим ўқтин-ўқтин ичадиган одат чиқарди. Отасининг феълини биласиз-ку, билиб қолса тикка сўяди! Зўрам ҳам чакказарброқ бўбқолди. Опасини кўриб сиқилади-да шўрлик.

Дозир Зуҳра келинни кўриб, ўша гаплар эсимга тушди. Чиндан ҳам ранги бир ҳолатда, сурма тортилган кўзлари киртайиб қолган.

Киринг, – деди у юпқа лаблари бурилиброқ. – Ойим уйдалар!

Устунлари сирланган баланд айвон томон энди юрган эдим, ичкаридан гўдак йигиси эшитилди. Эшик очилиб паҳлавондек сўлқилдоқ боласининг огзига кўкрак тиқиштираётган Фотима келин айвонга чиқди.

– Вой, Робияхон! – деди зиналардан лўмбиллаб тушаркан. – Атласми? Бизларам бир кўрайлик!

Авваллари Фотима-Зуҳраларни доимо адаштириб юрардим. Ҳозир ҳам иккаласи бир-бирига ўҳшайди. Попукдек қош-кўзи, кулча юзи... фақат Фотима келин семириб кетган. Зуҳра келин бўлса тасмадек.

Фотима келин атласнинг бир бурчини чимчилаб кўрди.

– Вой, мунча чиройли! – У ёнбош томондаги уйга қараб, ўктам овозда қичқирди. – Ойи, манавини кўринг! Шокир акамга айтинг, байрамга менгаям оберсинлар!

Ичкаридан ҳарсиллаб-гурсиллаб Холпош хола чиқиб келди. Нима қилсаям, Ориф оқсоқолнинг хотинида! Ёши олтмишга бориб қолган бўлсаям, келинлардек ясаниб олибди. Эгнида қора атлас кўйлак. Бўйнида – дур. Қулоғида олтин балдоқ, чиройли, қайрилма қошига билинар-билинмас ўсма қўйган.

Ориф оқсоқол билан дадам қанақа ўртоқ бўлса, Холпош хола билан ойим ҳам шунақа дугона. Оқсоқолнинг гавдаси бобомга иккита келса, Холпош хола ойимга учта келади. Оппоқ юзли, қоматдор хотин. Ойим дуч келган одам билан апоқ-чапоқ бўлиб кетаверади. Холпош хола ўз қадрини билади. Бутун Нўгайқўргонда «осмондаги қушни бежайдиган чевар» номи бор. Аммо ҳаммагаям кўйлак тикавермайди. Жинига ёқмаган одамни, «кўзим ўтмай қолди, чеварликни ташлаганман, айланай», деб эшикдан қайтаради.

У мен билан айланиб-ўргилиб кўришаркан, бола эмизиб турган Фотима келинни беозор жеркди:

– Ордона! Сигирдай хотинга атлас кўйлакни ким қўйибди! Атлас етказиб бўладими сенга? – У ҳовлига юзланди. – Атласни Зуҳра кийса ярашади. Зўрахон! Бу ёққа қара, қизим!

Зухра келин кўпикли қўлини сочиққа арта-арта зинадан айвонга чикди.

- Лаббай, ойижон!
- Ўтир, мундоқ, сенам ўтир. Холпош хола кейинги гапни менга айтдими, Фотима келингами, тушунмадим. Ҳар эҳтимолга қарши хонтахта атрофига учаламиз чўкдик: ҳамон бола эмизаётган Фотима келин, қўлидаги сочиқни асабий ғижимлаётган Зуҳра келин, мен...

Хонтахтага қуроқ дастурхон ёзилган, ўртада писта, бодом, қанд-қурс тўла патнис турарди. (Оқсоқолникида патнис ҳамиша тайёр!) Айвон токчасида эски «гардим» лаганлар. Даста-даста қалампирнусха косалар. Нариги бурчакда Холпош холанинг дунёга донғи кетган «Зингер» машинаси турибди. Берироқда – суянчиғи баланд курси. Курси орқасидаги токчада ёгоч бандли телефон. Бобомнинг айтишича, бир вақтлар бу телефонни Ориф оқсоқолга «обком» деган катта идорадан совға қилишган экан. Телефоннинг сими йўқ, аммо Ориф оқсоқол жудаям авайлайди уни...

Холпош хола бачкана маҳси кийган оёгини битта-битта босиб, ичкарига кириб кетди. Кўрпаларнинг гурс-гурс қилиб ерга тушгани эшитилди. Фотима келин боласини қучоқлаб ўрнидан турган эди, Зуҳра келин имлади.

# - Кирма! Балога қоласан!

Анчадан кейин Холпош хола худди меникига ўхшаган саккиз тепки атласни семиз билагига ташлаб, чиқиб келди.

- Зўрахон, қизим! деди атласнинг қатини очиб. Робия иккалангта бир хилда кўкрак бурма кўйлак тикиб бераман. Байрамда бир ўйнанглар!
- Раҳмат, ойижон! Зуҳра келин пирпираб турган юпқа лабини тишлаб ерга қаради.

- Менга-чи?! Фотима келин астойдил хафа бўлганидан лўппи юзи қизариб кетди. Бисотингизда менга битта кўйлак топилмадими?
- Сенам бормидинг? Холпош хола ясама дашном билан қошини чимирди. Қуруқ қолсанг ўласан-а. Майли, сенгаям топамиз. Бор, гапинг рост бўлса, ошхонадан қийматахтани обчиққин-да, исмалоқни майдала, сомса ёпамиз. Ҳа, айтмоқчи қизинг қани, Попук қани?

Фотима келин кўйлакдан қуруқ қолмаслигига кўзи етиб, мамнун илжайди:

- Хозир шўттайди. Юргандир.
- Ман сўроқламасам, ўзингни эсинггаям келмайди-а! Холпош хола бошини таъна билан чайқади. – Сендақа онани мушук есин!

Фотима келин ўғилчасини багрига босганча дарвозага югурди.

 Ойпопуг-у! Қаёқдасан, ҳа сендақа дайди қизни мушук есин!

Холпош хола Зуҳра келин иккаламизни айвон бурчагига турғазиб қўйиб, гази билан галма-галдан бўй-бастимизни ўлчай бошлади.

- Қоматинг Зўрамдай бўпқопти, Роби! деди кулиб. Иккаланга бир қолипда тиксам бўлавераркан.
- Тап-тайёр келин-да! Бир қўлида ўғилчасини кўтарганча, бир қўлида сақич чайнаётган беш яшар қизчасини етаклаган Фотима келин айвонга яқин келиб қаҳ-қаҳ уриб кулди. Насиб этса яқинда Робияхоннинг ҳолвасини еймиз, ойи! Очилбой оҳ деса, ўпкасидан ой кўриниб юрибди.

«Нима? Очил?» – Сесканиб Фотима келинга қараған эдим, Холпош хола жеркиб берди:

- Э, ўл, айнамай! Нима қиласан қиз болани уялтириб?
- Нега уяларкан! Шокир акам айтдилар. Очилбой Робияхонга совчи қўймоқчимиш.

Аламимдан йиғлаб юборай дедим. «Ким у, Очилбой?» Бирдан эсимга тушди. Комил табибнинг ўғли. Мактабдаям кўзойнак тақиб юрарди. Қилтириқ! Кимсан акамдан олдинроқ ўқиган. Ойим бир-икки марта бобомга табибнинг ўғли хўп йигит бўпти. Тошкентдаги катта ўқишда ўқирмиш, маълим бўларкан, дегани қулоғимга чалинган эди. Шуни эслаб, қўрқиб кетдим. Негадир Кимсан акам кўз олдимга келди. Кўкрагимни газ билан ўлчаб турган Холпош холадан юлқиниб чиқиб, айвон зиналаридан сакраб тушдим.

– Қачон эсинг киради, жувон ўлгур! – Холпош хола газининг икки четидан чангаллаганча қўлини муштлаб Фотима келинга дағдаға қилди. – Ҳамма нарсани гап деб гапираверадими?!

Ховлининг ярмисига борганимда, Фотима келин ўғилчасини қучоқлаганча орқамдан етиб келди.

- Робияхон! Кўнглингизга келмасин. Эшитганимни айтдим-да!
- Э, қочинг! Қулоғимгача қизариб кетганини сезиб, дарвоза томонга югурдим.
- Шошманг, Робияхон! Фотима келин орқамдан лукиллаб чопди. Кечқурун Рашид абзининг мурчасига борамиз. Зура иккаламиз. Сизам юринг! Маза қилиб чумилиб келамиз...
- ...Ховлимизга киришим билан қандайдир янгилик бўлганини сездим. Бобом тандир олдида Оқсоқол бува билан чақчақлашиб турар, иккаласининг ҳам чеҳраси очиқ эди.
- Қизим!- Бобом носини тупуриб илжайди. Сигир муборак бўлсин демайсанми? Бор, онангта боқиш!

Молхона олдидаги гулини тўккан гилосга боглаб кўйилган каттакон ола сигирга кўзим тушди. Аввалги гунажинимиз бир эмас, уч йил қисир қолганидан кейин бобом сотиб юборган, ўшандан бери уйимизда уч-тўртта қўйдан бўлак мол йўқ

эди. Янги сигирни кўриб қувонганимдан чапак чалиб юборай дедим. Сигирнинг сутга тўлиб кетган елини ерга тегай деб тирсиллаб турарди. Ойим нуқул сигирнинг бўйнига чизимча боғлашга уринар, боғлоғлиқ бўлишига қарамай, нимага бўйнига қўшимча арқон солинаётганини тушунмаган сигир ҳадеб бошини силкитар, ойим «хўш, жонивор, хўш», деб қайта-қайта тармашар, аммо бўйи етмай қийналарди.

- Зотли сигирга ўхшайди, кўзикмасин, у минг машаққат билан сигирнинг бўйнига чизимчани илди. Чизимчага яримта калиш осилган эди.
- Зотли бўлгандаям қанақа де? Галанска! Оқсоқол тантана билан тушунтирди. Бир кунда уччирпит сут беради. Дума ўзи калта бўлсаям боши тошни ёради. Мол танлашни билади.

Бобом бозорга Оқсоқол билан борганини, икки ўртоқ бозорнинг энг олди молини харид қилишганини тушундим.

Ойим пилдираб ошхонага кириб кетди. Қиррасига данакдек маска ёғ ёпиштирилган челак олиб чиқди.

– Тувакдай челагинг нима бўлади, ҳой! – Оқсоқол қўлини пахса қилди. – Обчиқмайсанми каттарогидан! Ё пақиринг ҳам ўзларингга ўхшаган паканами?!

Ойим мулойим жилмайган кўйи сигирнинг тагига чўнқайди.

- Аввал битта челакка соғайлик-чи, а, жонивор! деди сигирними, Оқсоқолними эркалаб. Шукур, пақирдан сероби йўқ. Вой жонивор-ей! Тирсиллаб кетибсан-ку! У энди елинга қўл чўзган эди, сигир думини силкитиб, орқа оёғини депситди.
- Қашлаб турсанг-чи! Бобом менга гапираётганини тушундим. Илдам бориб, сигирнинг йўгон томирлари бўртиб турган бўйнидан силай бошладим.

– Хўш, жонивор, хўш...

Сигир катта-катта кўзларини олайтириб, бир қаради-да, пишқириб қўйди. Анча тинчланди. Ойим энди елинга қўл тегизган эди, яна сесканиб кетди.

- Ўв, саводсиз! Оқсоқол астойдил жаҳл билан ўшқирди. Айтдим-ку, бу сигир галанска деб. Ўрисдан олдик. Гапирсанг-чи, мундоқ, Дума! Тилинг борми?
- Тўгри, бобом уч-тўрт қадам келиб, тушунтирди. Оқсоқол тўгри айтяпти. Бу галанска сигир. Ўрисча гапирмасанг сут бермайди.

Ойим челакни бутига қистирганча зириллаб турган елинга яна қул чузди.

– Бисмиллоҳир раҳмонир раҳим! – деди бор овозда. – Ўп пошамат, жонивор. Ўп пошамат. Ўзим айланай говмишимдан, иди чўрт.

Қизиқ, сигир тинчиб қолди. Челакка пов-пов сут туша бошлади.

– Ана, биларкансан-ку! Юр кетдик, Дума! Карамни экиб бўлишгандир.

Оқсоқол билан бобом узун-қисқа бўлиб кўча эшикдан чиқиб кетишди.

Ойим ҳамон ғайрат билан елин чўзар, галанска сигир узун, оқиш киприкларини мулойим юмиб турарди.

– Робия қизим, ёп пошамат! Жон қизим, ёп пошамат! Ошхонада челак турибди. Тезроқ чайиб ке, болам, иди чўрт!

Иккинчи челак тўлгунча ойимнинг қўли елин чўзиб огзи «ёп пошаматлаб» чарчаб кетди.

Бир маҳал қаҳ-қаҳ кулгидан сигир ҳам, мен ҳам сесканиб тушдик. Сигир узун, қийшиқ шоҳини силкитиб ёнбошига – кулгу янграган томонга қаради. Ойим сут туҳа чеҳакни обқочаман деб,

орқасига ўтириб қолди. Қарасам, беш-олти қадам нарида Шомурод тоғам тиззасига уриб, хохолаб куляпти. Бошдан-оёқ оппоқ кийинган. Олдига уқа тутилган шойи кўйлак, каламинка шим, оқ туфли. У эгилиб-эгилиб кулар, сочи чаккасига ёйилиб тушган, кўзидан ёш чиқиб кетган эди.

- Опа! деди энтикиб. Нима деяпсиз, опа?
- Нима? Ойим, сигири чала соғилганидан ғаши келиб, тоғамга чақчайди. Кўрмаяпсанми, сигир соғаяпман! Поччанг сигир опкелди. Галанска экан, оғзимиз оқариб қолди.

Шомурод тоғам кулгидан энтикиб менга қаради.

- Ойинг нима дедилар, хозир?

Индамай елкани қисдим.

- Айтаётган гапингиз ёмон гап-ку! Шомурод тоғам кула-кула кўзини артди. Унақа деманг, опа!
- Э, қилиғинг қурмасин! Ойим сут тўла челакни авайлаб кўтариб ўрнидан турди. Сигир жониворниям қўрқитвординг!
- Йўқ майли-ку!.. Шомурод тоғам тағин кулди. – Унақа деманг-да, опа! Сигир бечорани сўкиб нима қиласиз?
- Қачон сўкдим? Ойим ҳайрон бўлиб, гоҳ Шомурод тоғамга, гоҳ галанска сигирга ҳаради. Билмасам, деди бўшашиб. Тошкентга тушганимда кўрганман, иккитаси бир-бирини шунаҳа деб чаҳираётган эди...

Шомурод тоғам ҳар келганида узоқ ўтирарди. Бу сафар ойим билан уйга кириб кетиб, чорак соатча бир нималарни гаплашди-да, йўлга отланиб қолди. Ойим ҳам «ўтир» деб қистамади.

Шу куни ойим оқликка қўни-қўшнининг оғзи тегсин деб етти эшикка сут улашди. Кечки овқатга ҳам ширгуруч қилдик. Она-бола энди овқатга ўтирган эдик (Кимсан акам эрталабдан бери

кўринмас, бобом, Оқсоқол бува билан далага кетганча қайтмаганди), эшик тақиллаб Фотима келин, Зуҳра келин кириб қолишди. Иккаласи бошига дакана рўмол танғиган, Фотима келин тугун кўтариб олган, Зуҳра келиннинг қўлида товоқ, исмалоқ сомса опчиқибди.

Ойим сутли овқатдан кейин кўксомса ема, деб чирқиллаганига қарамай иккитасини маза қилиб еб олдим. Ширин бўпти.

– Борасизми? – деди Фотима келин қистаб. – Опоқи, Робияхон билан Рашид абзининг мўрчасига бориб келайлик...

Ойим иккиланиб қолди.

- Рашид абзи ўлсин. Қачон қараса маст. Мўрчани ким иситади?
- Ўзимиз! Зуҳра келиннинг қоп-қора кўзлари иштиёқ билан ёниб кетди. Бир чўмилайлик!

Рашид абзининг уйи – Нўгайқ ўргоннинг энг чеккасида. Парча опа деган думбул-тентак хотин билан қўшни туришади. Парча опа-ку, уйида деярли яшамайди. Эрта бахордан кеч кузгача даладами, одамларнинг уйидами ётиб қолаверади. Аммо Рашид абзини қачон қараса, уйидан топасиз. Бошқа иложиям йўқ-да! Қишин-ёзин абзиникидан одам аримайди. Тахта деворнинг ғирасидан мўраласангиз, икки терак пастликда оқаётган Бўрижарни кўриб вахмингиз келади. Аммо Рашид абзи парво қилмайди. Дўппидеккина кулбасида бемалол яшайверади. Абзи - чўлоқ. Йигирма йил олдин бўлган урушда бир оёгидан айрилган. Ёгоч оёк тақиб юради. Моххов<sup>2</sup> деган босқинчи бечоранинг чап оёгини қиличда ўз қўли билан чопиб ташлаган экан. Бобомнинг айтишича, абзи ўшандаям тишини-тишига қўйиб тураверибди. «Сен менинг оёғимни чопдинг, күн келади, мен сенинг бошинг-

<sup>&</sup>lt;sup>2</sup> Махно демоқчи.

ни чопаман», дебди. Абзи Қозон деган шаҳарда даволаниб ётганида чиройли бир қиз уни яхши кўриб қопти. Оти Розия экан. Очарчилик йиллари нон излаб Тошкентга келишибди. Рашид абзи хотинини жонидан яхши кўраркан. Аммо Розия қорни нонга тўйганидан кейин ёмон иш қипти. Бир кечада поездга ўтирибди-ю, бегона йигит билан қочиб кетибди. Рашид абзи ўшандан бери сўққабош. Қозонда турадиган опасидан бўлак қариндош-уруғи йўқ. Почтачилик қилади. Иши кўпмас. Нўғайқўргонда ким кимга хат ёзарди-ю, ким кимдан хат оларди.

Абзи ўзи яхши киши-ку, кўп ичади. Кузда одамлардан узум олиб, мусаллас солади. Аммо элдан ажрамайди. Қишлоқда тўй бўладими – маъраками, Абзи ҳаммадан олдин етиб келади, самовар қўяди.

Бутун Нўғайқўргонда Рашид абзининг мўрчасидан ўтадиган ҳаммом йўқ. Каттадан-кичик ҳамма шу мўрчада чўмилади.

- ...Олдинда кетаётган Фотима келин хурсанд бўлиб шанғиллади:
- Ишимиз ўнгидан келадиган бўлди, Зўра, абзининг мўрчаси бўшга ўхшайди.

Ростдан ҳам Бўрижарнинг тик соҳилида қўқҳайиб турган мўрчанинг мўрисидан тутун чиҳмас эди. Демак, мўрча бўш.

Рашид абзи сўққабош бўлгани билан уйини гулдек қилиб қўяди. Умуман, бутун Нўғайқўрғонда тўртта оқ уй бор. Биттаси – колхоз идораси, биттаси – «қулуп», яна биттаси – Ориф оқсоқолнинг далдаси билан колхозчилар ҳашар қилиб қуриб берган, Умар закунчининг ҳашамдор уйи, тўртинчиси – Рашид абзининг кулбаси. Тўгри, Абзининг уйи Умар закунчиникига ўхшаган салобатли эмас, Закунчининг томига қизил тунука ёпилган. Абзиникига қора қогоз. Умар закунчи ҳам сўққабош, Абзи ҳам. Лекин закун-

чининг сирланган дарвозасига «полуторка» машина бемалол сиғгани билан уникига Соли сўпокдан бошқа одам йўламайди. «Апчарка» деган қопоғон ити бор. Абзининг эшиги туйнукдек ингичка бўлсаям, хамма келаверади, ити йўқ. Маша деган эчкиси Абзининг ўзидан ҳам ювош.

Рашид абзи худди ўша ювош эчкисининг арқонидан тортиб, тажанг бўлиб турган экан. Бир шохи синган, соқоли сарғайиб кетган эчки олдинги икки оёғини тахта деворга тираганча нуқул дераза олдидаги олча шохини узиб емоқчи бўлади. Орқа оёқлаб тик тургани учунми бодрингдек елинлари диккайиб кетган. Абзи ёғоч оёғини ерга қадаб арқонни силтаб тортади.

- Паразит! Чучқа! дейди хуноби ошиб. Бошида қизил бахмал дўппи, эгнида нимча. Арқонни чираниб тортаверганидан ингичка бўйнининг томирлари бўртиб чиққан. Эчки ювош бўлгани билан ўзига етгунча қайсар экан. Эгасига бўй берай демайди.
- Менга беринг, амаки! Фотима келин арқонни бир силтаган эди, эчки шўрлик ёнбоши билан агдарилиб тушди. Ўрнидан туриб, Фотима келинга кўз қири билан адоватлироқ қараш қилди, норози охангда маъраб қўйди.
- Паразит! Абзи эчкининг биқинига ёгоч оёги билан ўхшатиб тепди. Эчки дикирлаб ҳовлига кириб кетди. Муршағами! Киригиз! деди абзи илжайиб.

Фотима келин мўрчага ўт қалаётганида Абзи кичкина фонус олиб келди.

– Кириғиз! – деди яна.

Жонингни роҳати-да бу мўрча! Чўян бандли печкани ёқишингиз билан қозонда сув исийди. Печка ёнбошида тош териб қўйилган махсус жой ҳам бор. Ёғлоқда сув олиб сепсангиз, вош этиб буғ кўтарилади...

...Мўрча дарров қизиди. Бурчакда фонус сарғайиб турган каталакдек ҳаммомда уч киши сиқилишиб қоларкан. Дамим қайтиб кетди. Фотима-Зуҳра келинлар парво қилмайди. Бир-бирининг устидан сув сепиб қийқиришарди.

Мўрча бурчагидаги лиқилдоқ курсида шамшод тароқ билан сочимни тараб ўтирсам, Зухра келин бошимга эгилди.

- «Вуй, деди ерга тегиб турган ҳўл сочимни кафтига олиб, ярмисини беринг, Робияхон.
- Ола қолинг! Ўзиям жонимга тегиб кетди, ювиш қийин.
- Ҳо, олақолингмиш! Зуҳра келин қаҳ-қаҳ уриб кулди. Йигитлар сочингизга ишқибоз-да, оповси айлансин. Орқангизни ишқалаб қуйийми! У макка сочиққа совун суркаб, курагимни ишқалашга тушди. Қули кичкина булсаям шунақанги чайир эканки, чинқириб юбордим.
  - Огрияпти.
- Вой, шунга шунчаликми? Зухра келин мўрчани жаранглатиб кулди, эрга тегсангиз...
  - Э, боринг! дедим уялиб.

Фотима келин иссиқда нафасим қайтиб қолганини кўриб, бурчакдаги ёгоч бочкадан совуқ сув олиб қуйди. Ҳовли томондан аввал гармон товуши, кетидан Рашид абзининг хирилдоқ овозда ашула айтгани эшитилди.

Айда молай бозарга Пирашкилар ошарга. Пирашкилар кикирта Қизлар қашин секирта...

– Вой ўлсин! – Фотима келин қиқирлаб кулди. – Абзи яна ичиб олди шекилли, заҳарига.

Зум ўтмай Рашид абзи яна гармонини чўзиб қолди.

# Патийим, Патийим... Бир қушақлаб ятийим...

– Сени чақирияпти, Поти! – Зуҳра келин хандон отиб кулди. – Чиқ!

Фотима келин бўлиқ кўксини маккасочиқ билан ишқаларкан, илжайди.

– Э, Потийи билан қўшмозор бўлсин... Кўкрагим ийиб кетди. Тоҳир йиглаётганга ўхшайди. Эмадиган вақти бўлди...

Учаламиз шафтолидек қизариб ҳовлига чиққанимизда қоронғи қуюқлашиб қолган, ҳали ой чиқмаган, аммо осмонда фақат баҳор оқшомлари бўладиган нимтатир, майин ёруглик бор эди. Рашид абзи курсида ёгоч оёгини сог оёги устига диккайтириб кўндаланг қўйганча, кўзларини ярим юмиб гармон чалар, ашула айтарди.

Ажаб, у хушчақчақ қўшиқ айтарди-ю, овози мунгли эди. Оқсоқолнинг келинлари «раҳмат» деганда ҳам кўзини очмади. Гармон нола қилаверди.. «Мини тошлаб қоя китти...» Рашид абзи яхши одам-ку, Розия нега унақа қилди! Нимага биров билан қочиб кетади? Хаёл суриб бораётган эканман, каллакланган тол тагидан ажралиб чиққан қоп-қора шарпани кўриб ўтакам ёрилаёзди.

- Ким у, опа? дедим Фотима келиннинг пинжига тиқилиб. Оқсоқолнинг келинлари ҳам тўхтаб қолишди. Бояги шарпа секин-секин яқин келди. Салом берди.
- Кечирасизлар, келинойи, деди овози титраб.- Робияхонда бир оғиз...

Юрагим гурсиллаб урар, уй томонга югурай десам, оёгимда мадор йўқ эди. Чамаси Фотима ке-

лин ҳам эсанкираб қолған, нуқул, «ким у, Зўра, ҳой кимсиз?» дерди.

Зуҳра келин шаддод экан. Лип этиб, олдимни тўсдида, шарпага рўпара бўлди.

- Ха, сизмисиз, Очилбой! деди кескин охангда.
- Мен... Келинойи.. Шарпанинг овози яна титраб чиқди. Кечирасизлар...
- Нима гап, Очилбой! Зуҳра келин унинг довдираб қолганидан дадилланиб дағдаға қилди. Етти номус бир ўлим! Бу нимаси ярим кечада, қиз боланинг йўлини тўсиб! Кўрганлар нима дейди?
- Узр, келинойи... Очилбой талмовсираб қолди. Қўрқа-писа янаям яқин келди. Кўзойнаги йилтираб кетганини, ияги титраётганини кўрдим, хафа бўлмайсизлар.. У аввал Фотима-Зухра келинларга, кейин менга юзланиб қўлини кўксига қўйди. Робияхон, шуни ўқиб кўрсангиз бўлди... Мен ёмон ниятдамас... Шундай деб шимини чўнтагига қўл суқди-да, аллақандай қоғоз чиқарди. Хатни энди узатган эди, гурс-гурс қадам товуши эшитилди. Аллаким ҳаллослаб келганча Очилбойнинг қўлидаги хатга чанг солди. Бу шу қадар кутилмаганда бўлдики, анграйиб қолдим. Ўша заҳоти Кимсан акамнинг овози қоронғи осмонни зириллатди.
- Хўв, шапкўр! Пишириб қўйибдими сенга?! У хатни бурда-бурда қилиб Очилбойнинг юзига улоқтирди. Бир парча қоғоз Очилбойнинг кўзойнагига илиниб қолди.
- Кимсанжон, укам... Очилбой қўллари титраганча кўзойнагини ечди. Синглингизга...
  - Жон керак бўлса жўнаб қол!

Кимсан акам шундай важоҳат билан устига бостириб бордики, Очилбой беихтиёр орқага тисарилди.

– Укам... – деди қалтираб.

- Эшитдингми? Кимсан акам ғазаб билан пишқирди. Жон керак бўлса ту ёғингни шиқиллат!
  - Укам...
- Мен сенинг укангмасман! Кимсан акам тишларини ғижирлатиб таъкидлади. – Тушундингми?
- Кимсанжон... Очилбой шоша-пиша кўзойнагини қайтадан тақди. Қоронғида аянчли илжайди. – Синглингизга...
  - Синглиммас! Кимсан акам ҳайқириб юборди.
  - Синглингизга ёмонлигим...
- Яна гапиради-я! Кетасанми-йўқми? Кимсан акам ҳовончадек муштини баланд кўтариб Очилбойга ташланган эди, Зуҳра келин билагига осилди.
  - Қўйинг. Уят бўлади!
- Узр. Очилбой тисарила-тисарила зулмат қўйнига сингиб кетди.
- Ваҳмангиз қурсин, Кимсанжон! Фотима келин энди тилга кирди. Туф-туф... Яхшиям қорнимда болам йўқ, нақ Шокир акамдан балога қолардингиз.

Кимсан акам, «бор-е, сенга нима керак», дегандек жаҳл билан қуॅл силтаган эди, опа-сингил келинлар шоша-пиша йуॅлга равона буॅлишди.

- Қаёқда тентираб юрибсан ярим кечада?! Кимсан акам юзимга чақчайиб қаради. Қоронғида кўзлари ёниб турарди. Вой-бў! Ювошгина Кимсан акамнинг жаҳли шунақа ёмонлигини билмаган эканман! Қизиқ, унинг дағдағаси ҳам ғашимга тегар, ҳам ёқар эди.
- Ўзим! дедим бўш келмай. Рашид абзининг мўрчасига боргандик. Ойимга айтганман.
- Э, ўша Рашид абзингни!.. Кимсан акам ёш болани етаклагандек қўлимдан силтаб тортганча беш-олти қадам юрди-да, тўсатдан тўхтаб қолди.
- Робия! деди кўзимга тикилиб, қўлимдан шунақа қаттиқ қисдики, додлаб юборай дедим. Робия! Агар ўша шапкўр яна йўлингни тўсса...

- Қўйворинг! дедим қўлимни силтаб. Қочинг!
- Тилиб ташлайман! Унинг овози титраб кетди. Эшитиб қўй. Иккалангниям! Бирдан қўллари бўшашиб бошини қуйи солди. Робия! Тушунсанг-чи ахир, жинни! Менга кераксан! Билдингми, жудаям кераксан!

Юрагим гурсиллаб урганча уйга югуриб кетдим. Севинишниям, хафа бўлишимниям билмасдим. Орқа томонда Кимсан акамнинг ҳайқириғи янгради:

#### - Робия!

Ховлига учиб кирдим. Яхшиям бобом йўқ, ойим молхонада сигирга қараётган экан. Анчагача ҳовлининг қоронғи бурчагига бориб ҳурпайиб турдим. Назаримда юрагимнинг уришини бутун дунё эшитаётгандек эди. Ойим қўлида фонус билан молхонадан чиқди.

– Келдингми, қизим... Қаёқдасан? – деди аланглаб. – Сутли овқат устидан кўк сомса емагин девдим-ку.

Бирпасдан кейин Кимсан акам кириб келди. Айвон олдида рўпара бўлдик. Қип-қизариб терлаб кетибди.

– Овқат ейсизми? – дедим кўзига қарамай. – Ширгуруч қилувдик. Янги сигирнинг сутидан.

Кимсан акам галанска сигирни кўрган шекилли, энг катта янгиликка унча эътибор бермади. Ярқ этиб кўзимга қаради-да, илжайди:

- Обке, тош бўлсаям ейман!
- Суюнчи беринглар, болаларим! деди ойим фонусни токчага қўя туриб. Тоғангни тўйи юришиб қолди. Насиб этса, майрам куни никох! Азза-база хонтахта рўпарасига ўтириб қўл очди. Илоё қўшгани билан қўша қарисин, ўзидан кўпайсин. Сенларгаям яхши жойлардан ато қилсин! Аввал синглингни тўйини қиламиз-да, ўғлим?

Зимдан разм солсам, Кимсан акам менга қараб ўтирибди.

– Таомилда қиз бола олдин узатилади, болам, – деди ойим билағонлик билан. – Синглингни тўйига сен бош бўласан, сенинг тўйингта Робия бош бўлади.

Кўнглим ғаш тортди. Лаганни кўтариб ошхона томонга юраётганимда ойим мақтанди:

- Тоғанг бало экан, Кимсан. Келин бўлмиш Раънохон икки жахоннинг бири! Уч марта совчи бўлиб бордиму бари бир пишмайдиган савдо деб ўйлагандим. Шундоқ қиз Шомуродга тегишига ақлим етмовди. Йўқ, текстилда бирга ишлаб, юлдузи юлдузига тўгри келган экан. Қуда томон охири кўнди. Тўйга бормасаларинг бўлмайди, болаларим!
- Иккаласи бир-бирига кўнгил қўйган бўлса бўптида, деди Кимсан акам катта одамлардек салмоқлаб. Зимдан менга қараб қўйди. Ҳамма гап шунда, ойи!

...Ажаб, шу кеча дадам яна тушимга кирди. Кимсан акам иккаласи қулупнай териб юриш-ганмиш... Дадам қулупнай териб нуқул Кимсан акамга узатармиш. Юзини аниқ кўрмасмишману яккаш кулармиш...

### 4. Тошкентдаги томоша

Шомурод тоғамнинг тўйига уч кун қолганда Кимсан акам ғалати гап топиб келди:

- Тоғамнинг туйига бормайсан!
   Хайрон қолдим.
- Вой нега? Хафа бўлмайдиларми?
- Жуда боргинг келса чалларга борасан. Кимсан акам қувлик билан кўзини қисди. Нима қилсанг қил, тўй куни бир баҳона топ. Бошим огрияпти, дейсанми, касалман, дейсанми, хуллас, у ёгини ўзинг келиштирасан.

- Сиз-чи? дедим ўсмоқчилаб. Кимсан акам бир нима ўйлаб топганини кўнглим сезиб турарди.
- Мени қўявер! Бир кун олдин бориб, қозон қурар борми, базм борми ҳаммасини боплайман. Лекин сен никоҳга бормайсан! Менам бормайман!

Ичимда Кимсан акамнинг гапига кўниб турсам ҳам, ҳайсарлик ҳилдим.

- Нега бормас эканман, бораман!
- У буйруқ қилиб «ошириб юборганини» сезди.
- Робия... деди ялиниб. Хўп дегин, кейин хурсанд бўласан.

«Хўп» демадиму бари бир айтганини қилдим. Эртага никох деган куни даладан барвақт қайтдим. (Қамма қатори кетмончилик қилаётганимга уч йил бўлди. Аввал ойимга кўмаклашиб юрдим. Кейин ўзимга ҳам меҳнат куни ёзадиган бўлишди.) «Бошим оғриётганини» баҳона қилиб, азза-базза ётиб олдим.

Тўй ташвиши чиққанидан буён Кўтармага – Шомурод тоғамникига кунига уч мартадан қатнаётган ойим аҳволимни кўриб қўрқиб кетди.

– Вой, менгина ўлай, бу ташвиш ҳам бор эканми, – деб бошимда парвона бўлиб қолди. «Қизғалдоқ офтоб урган», деб қатиқ ичирди, «кўзиккансан», деб исириқ солди. Эрталабгача бари бир «тузалмадим».

Тонг отганда бобом билан ойим маслаҳат қилишди.

- Робия касал, ёлғиз ташлаб кетиб бўлмайди, деди бобом.
   Тўй нима, ғат-ғут этади, бир кунда ўтиб кетади. Қизингни соғлигини ўйла.
- Шўрим қурсин! Биттаю битта укамни тўйига бормасам, қандоқ бўлади?
- Биров сенга борма деяптими! Бобом жаҳл билан тўнгиллади. Ўтаканг ёрилмасин. Борамиз. Сенам, менам! Синглисидан Кимсан хабар олиб ту-

ради. Базмга борди – бўлди-да! Хотин-халаж ичида нима бор ҳўкиздай йигитга!

Бобом билан ойим ясаниб чиқиб кетган заҳоти Кимсан акам илжайиб кириб келди.

- Айтмадимми, зўр бўлади, деб. Тур, отлан!
- Қаёққа?
- Шаҳарга борамиз. Бугун байрам. Театрга тушамиз.
  - Ойим келиб қолсалар-чи? дедим хавотирланиб.
- Чалларни ўтказмагунча келмайдилар. Атлас кўйлагингни кий.

Шу бугун ўзимнинг ҳам роса «посон» бўлгим келарди. Холпош хола тикиб берган атлас кўйлагимни кийдим. Сочимни иккита қилиб ўриб, чамандагул дўппини бошимга илдим. Фақат ўсма қўйишга улгурмадим. Айвонда Кимсан акамнинг нуқул маъноли йўталаётганини эшитиб чиқсам, аллақачон отланиб бўпти. Соқоли қиртишлаб олинган, эгнида оқ жужун кўйлак, оёгида хиром этик. Кўзлари мулойим кулиб турибди. Кўнглим бир қалқиб кетди. Кимсан акам шунчалик келишган йигитлигини энди пайқаганимга ўзим ҳайрон қолдим.

- Робия... деди у ялиниб... Илтимос, сочингни чамбарак қилиб олгин.
- Вой, нимага? Қайси куни Рашид абзининг ҳаммомида Зуҳра келин, «йигитлар сочи узун қизни яҳши кўради», дегани эсимга тушди. Ерга тегай деб турган икки ўрим сочимга қарадим. Ёмонми?
  - Яхши-ку... Менга, чамбарак қилганинг ёқади... Начора, айтганини қилдим.
- ...Тупроқ кўчалардан узоқ юрдик. Кимсан акамнинг хиром этиги, менинг ғарчли «лодочкам» чанга беланди. Бироқ иккаламиз ҳам бунақа «майда-чуйда»ларга парво қиладиган аҳволда эмасдик. Осмонда баҳор қуёши эркаланиб жилмаяди. Кўча-

нинг икки бетидаги баргак чиқарган толлар ҳозиргина сочини ювиб, офтобда қуриётган қиздек таманно қилади. Қушлар ошиён қуриш ташвишида чуғурлайди. Йўл четида қип-қизил қизғалдоқлар гиламдек товланади. Кўклам шабадасида мастона бош чайқайди. Қизғалдоқлар орасида онда-сонда кўзга чалиниб қолаётган чучмомалар оламга мунис мўралаб қарайди. Ажаб, шу кўчалардан аввал ҳам ўтганмидим? Илгари ҳам кўклам бўлганмиди? Нимага шу гулларни аввал кўрмаган эканман? Бу дунё шунақа чиройлими? Офтоб шунақа майинми? Қизғалдоқлар шунақа кўпми?

Кимсан акам уч-тўрт қадам олдинда боряпти. Биламан, уям иккаламиз ёнма-ён юришимизни хоҳлаяптику, уялади. Одамлар ёмон-да! Дарров гап қилади. «Кап-катта ака-сингил қўл ушлашиб юрибди», дейди. «Ака-сингил?» Бир ҳафта аввал Кимсан акам Очил акага нима деди? Ўзиям капалаги учиб кетди Очил шўрликнинг! Кимсан акам ажаб қилди! Иккинчи йўлимни тўсмайдиган бўлди.

Ниҳоят трамвай айланадиган жойга келдик. Одам бирдан купайиб кетди. Хурозқанд шимган болалар, газ-сув дукони олдида навбат кутиб турган шляпали кишилар, писта чаққан олифта хотинлар.

Fиштин девор орқасида осмон баравар мўридан тутун чиқиб ётибди.

- Текстил шу! деди Кимсан акам тушунтириб.
- Эрталаб соат бешда гудок чаладиганми?
- Ҳа-а, топдинг! Кимсан акам мўрига имо қилди. – Шомурод тоғам шу ерда ишлайди! Мастер! Ҳайрон бўлдим.
  - Вой-бў! Кўтармадан шу ёққа қатнайдиларми?
- Нима қипти! Дашни поездга ўтириб келаверади! Ие, ана трамвай! Чопдик! – Кимсан акам қўлимдан ушлаб, судраб кетди.

Трамвай тиқилинч эди. Ясан-тусан қилган йигитлар хохолаб кулади, қизларга гап отади. Кимсан акам қовоғини солиб, билагимдан ушлаб олди. Кафти қайноқ эди.

Жанггох дегани ажабтовур бог экан. Мусиқа тинимсиз гумбурлайди. Темир панжара тепасига «Яшасин Биринчи Май!» деган шиор, Сталиннинг сурати илинган.

Патта олиб, ичкарига кирдик. Йўлкаларга қизғиш қум сепилган. Карнай-сурнай, ногора садолари қулоқни қоматга келтиради. Дорбозлар осмон-фалакда лангар чўпини саланглатиб ўйин кўрсатади. Полвонлар кураш тушади. Найзангул ўйнаётган лўттибозлар томошабинларни чорлайди. «Кеп қолинг! Томошанинг зўрига кеп қолинг!» Бир томонда дошқозон тўла ош. Бир томонда кабоб. Кимсан акам иккаламиз кабоб еб, «зилдирский» сув ичдик.

Театрга кирганимизда оқшом тушиб қолған эди. Эҳ-ҳе! Шунча духобани қаёқдан олишди экан. Оёқ остига чўғдек гилам ташлашган. Курсиларга қизил бахмал сирилган. Каттакон саҳнани ҳам қип-қизил бахмал тўсиб турибди. Бўйи эллик қулоч, эни қирқ қулоч келар.

Томошанинг охирида Офелия жинни бўлиб қолганини кўриб, қўрқиб кетдим. Икки қўллаб, Кимсан акамнинг билагидан чангаллаб олдим.

- Нега? дедим титраб. Бечоранинг айби йўқ-ку! Кимсан акам секин елкамдан қучди.
- Гамлетниям айби йўқ...

Театрдан йиглаб чиқдим. Трамвайда текстилгача келдик. У ёгига пиёда кетдик. Кимсан акам тупроқ кўчада тап-тап қадам ташлаб олдинрокда боряпти. Эрталаб-ку, биров кўриб қолмасин деб қўрққан эди. Ҳозир қоронги-ку! Нега ёнма-ён юрмайди! Қўрқоқ! Димогимга олма гулининг ҳиди

урилади. Чигирткалар қўнғироқ чалади. Тўқай томонда бедана питпилдиқ отади. Кунботар уфқда тиллақошдек нозик ой ялтираб турибди. Янги ой... Ойим қизиқ: ҳар гал янги ой чиққанида ният қилади: «Илоё янаги шу кун, шу ойларга омон-эсон етайлик!» Келаси ой чиққунча нималар бўларкин? Биз ҳам омон-эсон етиб олайлик. Бобом, ойим, мен... Кимсан акам. Биргалашиб етайлик. Анави куни ойим нега унақа деди? «Аввал синглингни тўйини қиламиз, кейин сеникини...» Нимага энди? Ахир Кимсан акам ўша куни айтди-ку! «Сен менга кераксан, жинни», деди-ку!..

Баргак чиқарган тол панасига етганда Кимсан акам таққа тўхтаб қолди. Хаёл суриб келаётган эканман, тоғдек елкасига урилиб кетдим.

У шахт билан ўгирилди.

- Робия, деди қўлимдан тутиб. Кафтининг қайноқ тафтидан билагим ёниб кетгандек бўлди. Қўлимни тортиб олмадим, тортиб олгим келмасди. Лекин дарров гапни бошқа ёққа бурдим.
  - Нега унақа? Офелиянинг айби йўқ эди-ку.
- Офелиянгни қу́я тур! Кимсан акам ку́зимга диққат билан тикилди. Унинг ёш бола эмас, катта, оғир-босиқ одам бу́либ қолганини яна бир марта ҳис этдим. Анув куни ойим нима дегани эсингдами?

Ўзимни гўлликка солдим.

- Нима дедилар?
- Раъно опа билан Шомурод тоғамнинг юлдузи юлдузига тўғри келган экан. Қуда томон рўйхушлик бермасаям бугун тўй бўляпти. Тўгрими?

Бундан чиқди, Кимса акам ҳам менинг хаёлимдагини ўйлаб келаётган экан! Қизиқ, ёнингдаги одам кўнглингдан ўтганини аниқ билса ғалати бўларкан. Кимсан акамнинг бақувват қўли билагимни қисиб туриши ёқар эди. – Робия! – у билагимни баттар қисди. – Ростини айт. Очил ака нега хат берди сенга? Ё ўзинг ҳам...

Ҳа, гап бу ёқда экан-да! Мен нима дардда-ю, бу кишим. Алам қилиб кетди.

- Қўйворинг! дедим юлқиниб. Мен қаттан биламан!
- Робия! Кимсан акам юзи юзимга теккудек яқин келди. Ҳам шиддат, ҳам ўтинч оҳангида сўради. Тўгрисини гапир...

Тентак! Аҳмоқ! Кучим борича қўлимни силкитиб депсиндим.

– Қўйворинг! Тушини сувга айтсин ўша шапкўр! Керакмас! Ўзиям бошида қолсин, хатиям!

Кимсан акамнинг қўллари бўшашди.

- Рост-а, шу гапинг рост-а, Робия!

«Рост бўлмаса сен билан келармидим, ойимни алдаб «касал» бўлармидим!»

Ичимда шу хитоб янгради-ю, сиртимга чиқаришга юзим чидамади. Чопиб кетдим. Орқамдан Кимсан акамнинг югуриб келаётганини, ҳаллослаб нафас олишини сезиб турардим. Худди бир вақтлар дадамни олиб кетган машина кетидан югурганимда орқамдан чопгандек... Билмадим, эҳтимол ўшанда, заранг ерни муштлаб йиғлаганимда, «унақа қилмагин, Роби...» деб ялинганда суяниб қолгандирман унга... Тўғри, у пайтларда ёш бола эдик. Шундоқ бўлсаям...

Охири у менга етиб олди. Елкамга кафтини авайлаб босди.

– Робия! – деди ўтиниб. – Тушунгин ахир... Сен менга жудаям кераксан...

У ёгига секин кетдик. Янги ой нозик қошини чимириб маъноли жилмайиб турар, чигирткалар мастона нағма чалар, фақат олдинда Алвасти кўприк тахдидли гувиллаб, кўнгилга ғашлик солар эди.

Уйга келсак ҳеч ким йўқ. Ойим-ку, чалларни ўтказмай келмайди. Бобом ҳам тўйдан қайтмабди.

– Овқат қилайми? – дедим Кимсан акамнинг кўзига қарашга уялиб.

Кимсан акам жилмайди.

- Дам олсанг-чи, жиннивой.

У айвон ўртасида иккиланиб туриб қолди. Яна нимадир дейишини хоҳлардим. Айни пайтда гапиришидан қўрқар, андиша қилардим.

– Майли, бўлмаса... – У этигини ечиб уйга кириб кетди. Этигини четга олиб қўятуриб, пайтаваси терлаб кетганини билдим. Қарасам, айвон бурчагида қизил белбоғиям турибди.

Ошхонага кириб сув иситдим. Аввал қийиқчани, кейин пайтаваларни ювдим. Хаммасидан ёқимли бир ис – Кимсан акамнинг хиди келарди.

Кирларни дорга ила туриб хаёлимга ғалати ўй келди. Нимага бунақа бўлганини ўзим билмайман. Нами қуримаган қийиқчани юлқиб олдиму югуриб уйга кирдим. Нариги хонадан Кимсан акамнинг хўрсингани эшитилди. Ҳозир кириб келадигандек эшигимни занжирлаб олдим. Еттинчи лампани токчага қўйиб, қутини титкилай-титкилай зангори ипак топдим. Тиззамга муздек уннаётган қийиқча бурчагига лотинча «К», «R» деган ҳарфларни тика бошладим. Мендан каштачи чиқмас экан. Ҳарфлар қинғир-қийшиқ бўлиб кетди. Шу арзимаган ишни битиргунча тонг бўзарди. Нам қийиқчани тиззамга қўйганча ухлаб қопман.

Эрталаб эшикнинг тақиллашидан уйғониб кетдим.

– Робия! – деди Кимсан акам эшик орқасида туриб. – Мен кетдим.

Тентак! Деразадан келса-ку, очиқ турибди!

– Шошманг! – Қўлимда қийиқча билан учиб бориб эшикни очдим. – Чой ичмайсизми?

- Э, кеч қолдим. Далада ичарман.
- Тўхтанг бўлмаса! Айвон бурчагида турган қутидан иккита нон олиб қийиқчага ўрай бошладим. Шошилгим келмас, Кимсан акам қийиқча четидаги ёзувни кўришини хоҳлардим. Ниҳоят у қизил қийиқча бурчагидаги зангори ҳарфларга кўзи тушиб яқин келди.
  - Нима бу? деди бошимга эгилиб.
- Қийиқчангиз! ҳеч нимадан бехабар одамдек тугунни узатдим. Манг. Кир бўпкетган экан ювдим. Айтмоқчи, пайтавангиз дорда турибди. Қуригандир.
  - Робия!.. Кимсан акамнинг овози титраб кетди.
- Э, қўлини елкамдан олиб ташладим. Қочинг. Сигир соғишим керак. Сутини тортиб қўйса, ойим уришадилар.

#### 5. Уруш

Бизнинг томорқадаги чиллаки ҳамманикидан олдин чумак уради. Бошқаларники энди шўра чиқарганида бизники ранг олади. Бошқаларникига энди ранг кирганида бизники ғарқ пишади. Буйил ҳам шунақа бўлди. Ойим Кимсан акам иккаламизга буюрди:

– Узумнинг пишган-пишганидан теринглар. Тоғангга олиб бораман. Келинимнинг оғзи тегсин.

Ойим «келиним-келиним» деганча бор. Чаллар куни Шомурод тоғамникига борганда Раъно келинойимни кўриб оғзим очилиб қолди. Оппоқ ғижим рўмол ўраб, уч марта салом қилди-ю, шундоқ рўмолини очса... Тавба! Бунақа чиройли қизни умрим бино бўлиб кўрмаганман! Қаламда тортилгандек қошлари, ёниб турган қоп-қора хумор кўзлар, сутдай оппоқ юз, ингичка иягидаги митти холи, ан-

гишвонадек оғзи – ҳаммаси атайлаб чизиб қуйилган суратга ўхшайди. Ростини айтсам, қиз бола була туриб ўзимнинг ҳавасим келди. Раъно янгамни бир куришда яхши куриб қолдим. Шунинг учун ойим «келинимнинг оғзи тегсин» деганида Кимсан акам иккаламиз шоша-пиша томорқага югурдик. Энди узум узмоқчи булиб турган эдик, бобом билан Оқсоқол бува келиб қолишди. Оқсоқол узумларни куриб бошини сарак-сарак қилди.

- Нима бало, Дума! Узумингни тагига кечаси билан олов ёкиб чикасанми?
- Туф де, кўзинг тегади! Бобом пакана гавдасини гоз тутиб, кўксига муштлади. Ким деб ўйлаяпсан бизни! Йўлини билиш керак, йўлини.
  - Билсанг айт мундок, пажалиста!
- Яна «пажалиста» дейди-я! Бобом Оқсоқолнинг юзига сапчигудек чақчайди. Минг марта айтганман шу гапингни ташла деб.
- Ие, кечирасан, Дума, оғзимдан чиқиб кетди, деди Оқсоқол илжайиб.
  - Э, оғзинг ўлсин!

Оқсоқол «пажалиста» деса бўлди, бобомнинг жини қўзийди.

Буни ўз тарихи бор: ойим айтиб берган.

Оқсоқол колхозга энди раис бўлган пайтлари бобом кечаси маккага сув тараб юриб, ухлаб қопти. Сув тошиб кетибди. Макканинг илдизидай мўрт нарса бўлмайди. Бирпасда аллақанча макка таппа-таппа йиқилиб тушибди. Шу ишнинг устига Оқсоқол кепқопти-ю, бобомни сиқувга опти. «Нима бало, хотинингни қўйнига кириб кетдингми, ундоқ-бундоқ», дебди. Бобомнинг ҳам жаҳли ёмон эмасми, «оле сувчилигингни, шу ишни қилмасам очимдан ўламанми», дебди. «Сувчилик қилмасанг – пажалиста!» дебди Оқсоқол ўдағайлаб.

Бобом ўша кундан ишга чиқмай қўйибди. Орадан уч кун ўтибди, тўрт кун ўтибди. Бир ҳафтадан кейин Оқсоқол ялиниб кепти. «Хой, Дума, эсингни едингми, далада шунча иш турибди, чиллали хотиндай ялпайиб ётишга уялмайсанми», деса, бобом чийиллаб берибди: «Бор, ишингни қил, сен раис бўлган колхозда ишламайман!» Оқсоқол қараса иш чатоқ. Энг зўр деҳқон уйига кириб ётиб олган. Охири райкомни бошлаб кепти. Райком ҳам ялинибди. «Сиз энг тажрибали деҳқонсиз, Дума, – дебди. – Бунақа аразлаб ётиш сизга ярашмайди. Эртадан ишга чиқинг».

«Чиқмайман! – дебди бобом аламдан тутақиб, – хизматини қилиб-қилиб энди отим «пажалиста» бўлдими?»

Райком негадир илжайиб қўйибди-да, Оқсоқолга сиёсат қила кетибди. «Ўзингиз пажалиста, Оқсоқол, ота-бувангиз пажалиста! Ака-укаларингиз пажалиста! Қўйинг, Дума, хафа бўлманг, сиз пажалистамассиз!» Бобом дарров ховридан тушибди. «Унақа деманг, ўртоқ райком, – дебди муросага келиб. – Ота-бувасига тил тегизманг. Отаси, рахматли яхши одам эди. Акасиям «пажалиста» бўлганмас.

«Майли, ўзим пажалистаман, – дебди Оқсоқол. – Бўлдими, қутулдимми энди, овсар?» «Сенам пажалистамассан, ўша гапингни қайтиб олсанг бўлди». Бобом шундай дебди-да, кетмонни кўтариб далага чиқиб кетибди. Ўшандан бери Оқсоқол «пажалиста» деган гапни кам ишлатади. Айниқса, бобомга.

Хозир ҳам Оқсоқол бобомнинг жини тутиб кетганини билиб, дарров олдини олди.

- Билмасдан айтдим-да, ўртоқ, деди илжайиб.
   Аммо узуминг зўр бўпти. Баракасини берсин!
  Менгаям ўргат йўлини!
- Талаш деган нарсани биласанми? Бобом Оқсоқолга ғолибона қаради. – Ҳар қандоқ мева

бўлмасин, ўрикми, узумми, нишона берганда нораста болаларга талаш қилдириш керак. Ўшалар тўйганидан қолгани баракали бўлади. Менам бу узумнинг биринчи ҳосилини болаларга талаш қилдирганман. Ўн саккиз йил бўлди, Кимсаним энди туғилган эди.

- Сен-а? Оқсоқол белкуракдай кафти билан тиззасига уриб, маза қилиб кулди. Томорқангни устидан чуғурчуқ учиб ўтишга қўрқади-ку, зиқна. Бошқа сиринг бор, айтавер!
- Айтайми! Бобом Оқсоқолға қўлини чўзди. Носдан ол!
- Ўл-а! Нокас! Оқсоқол инқиллаб-синқиллаб шимининг чўнтагига қўл суқди. Нос тўла атир шишани бобомга узатди. Ма! Битта гапниям текинга айтмагин!
- Керакмас! Ўзимники бор! Бобом узун камзулининг чўнтагидан қизғиш носқовогини чиқарди. Мендан тиланмагин деб атайлаб сўрадим. У кўзини қисиброқ илжайганча нос отди. Хеч қанақа сир-пир йўқ. Бирпас ўйлаб турди-да, тўсатдан сўраб қолди: Хонадонингда неча киши бор? Жавоб кутмай қалтабақай бармоқларини букиб санаб кетди. Сени ўзинг бир. Чевар хотининг икки. Икки ўгил, икки келин, тўртта, ҳаммаси олтита бўлдими? Яна икки неваранг борми? Бўптида! Ҳар биттаси ҳўкиздай келадиган Шокиринг бор, Зокиринг бор, Потма-Зўра келининг бор. Қиш чилласида ўшаларни ишга сол. Ҳожатхонанинг кесагини ташитасан... Токнинг тагини одам бўйи кавлайсан.
- Э, шунинг учун қачон қараса, кесак титкилаб юраркансан-да. Оқсоқол бир ғужум узумни оғзига солиб кулимсиради. Бўлди, тушундим!
- Сенга нима! Единг-ку, қалай маззаси ширин эканми? Бобом хихилаб кулди. Кесакни қув-

вати жа зўр бўлади, Оқсоқол. Сенга ўргатавуриб ўзимга қолмади.

- Қўйсанг-чи! Оқсоқол қўл силтади. Бунақа ишларни ўзимам биламан. Локин ҳайронман, бу йил менинг узумимга кул тушди.
- Ховлининг деворини баланд, томорқаникини паст ол деган ҳикмат бор. Эшитганмисан? Эшитмагансан! Бобом билағонлик билан томоғини тақиллатган эди, ичига нос кетди шекилли, кўзи ола-кула бўлиб ўқчиди. Э, ўла, деди тупуриб. Ишкомингдан шамол ўтиб турсин, каллаварам. Бўлмаса кул тушаверади.

Икки ўртоқ ҳангамалашиб пастак эшикдан ҳовлига кириб кетишди.

Юринг, – дедим Кимсан акамни қистаб. –
 Тезроқ узайлик. Ойим кеч қолмасинлар.

Ишком оралаб кетдик. Қуёш қиздиради, ток япроқлари унсиз тебранади. Офтоб нурини эмиб, қизарган узум бошлари солланиб турибди. Аллақаерда ғуррак ғуриллайди.

Кимсан акам қорайган узум бошлари ғуж бўлиб турган ток олдига келиб тўхтади. Осилиб, бағазга чиқди. Залваридан ишкомнинг нариги бошигача лопиллаб кетли.

- Буюрсинлар! деди бир оёқда бағазга осилиб. Қайси бирини узай? Мана шуними? У тузук-қуруқ қизармаган узум бошига қўл чўзди.
- Э, хом-ку, униси! Тепасидагисини узинг! дедим саватни бикинимга тираганча якин келиб.
- Буними? Кимсан акам ундан ҳам хомроқ бошини кўрсатди. Шунисиними?
  - Йўқ, ана, тагида турибди-ку?
- Ҳа, мана буними? У яна «жиннилик» қилишга тушди. Ҳозир узамиз-да!

Кула-кула дашном бердим.

- Йўқ, ана-ку, пешонангизга тегиб турибди!

- Э, мана буними? У бутунлай кўм-кўк узум бошига қўл чўзди. Мана шуни-я!
- Ие, жиннимисиз! Унимас, қорайиб тургани бор-ку! Нима бало, хом узумни пишганидан ажратолмайсизми?

Кимсан акам нихоят ғарқ пишган чиллакини «топди». Бир донасини узиб, оғзига солди.

- Оҳ-оҳ-оҳ, шунақанги ширинки, есанг лабинг лабингта ёпишиб қолади, Робия!
- Бўлинг! Турган жойимда оёқ депсиб қистадим. – Ойим шошяптилар.

Кимсан акам тезроқ ишлаш ўрнига баттар тегажаклик қила бошлади:

- Вой-бў! Бунақа ширин узумни умримда емаганман. Асал-а, асал! Ишонмасанг ялаб кўр... Лабинг ёпишиб қолса, ўзим ажратиб оламан.
- Э-э! Ойим уришиб берадилар, инсон! Қоронғида Алвасти кўприкдан қандоқ ўтадилар? Ўзингиз обориб қўясизми?
- Сенам борсанг, обориб қўяман! Кимсан акам илжайиб чиллакини узатди. Қани, оч саватингни!

Сават яримлаб қолғанида томорқанинг пастак эшиги ғийқиллади. Бобомнинг йўталгани эшитилди. Кимсан акам иккаламиз дарров сипо бўлиб қолдик.

Секин қарасам, бобомга эргашиб ойим ҳам пилдираб келяпти. Бобом ишимизни бир зум томоша ҳилиб турдида, Кимсан акамга буюрди:

- Туш...
- Нега, бобожон? дедим қўлимдаги саватга имо қилиб. Ҳали тўлгани йўқ-ку!

Кимсан акам дорбозлардек бир оёқлаб бағазга осилган кўйи биз томонга юзланди. Ойим тескари қараб, кафти билан юзини тўсганча ҳиқиллаб йиғлаб юборди.

- Уруш бошланибди! – деди бобом синиқ оҳангда.- Юртимизга немис бостириб кирибди.

Хиқиллаб йиғлаётган ойим тўсатдан овозини баралла қўйиб юборди.

- Вой шўре-ем! Бу бало қаёқда турган экан. Шўргинам қурсин!
  - Саннама-э! Бобом ўшқириб берди. Ўчир!

Хайрон бўлиб ойимга қарадим. Нега йиғлайди? Уруш бошланса нима бўпти? Ўзи анчадан буён «уруш-уруш» деган гаплар юрарди-ку!

Кимсан акам ерга сакраб тушди. Қуриган кесакка қоқилиб, мункиб кетди. Ранги қув ўчиб, энтикиб нафас олаётганини сездим. У аввал менга, кейин ойим билан бобомга қаради. Юзига қон тепиб, бўгриқди. Кўйлагининг қайрилган енгини тушириб индамай кетаётган эди, ойим кўзлари олайиб йўлини тўсди.

- Қаёққа?
- Ойи! Кимсан акам нажот кутгандек бобомга қаради. – Бормасам булмайди.
- Нима?! Ойим қоп-қора, қалин лаблари титраб, Кимсан акамни қучоқлаб олди. Бормайсан! Тилаб-тилаб олган боламни ажалнинг оғзига юбормайман! Кейинги сўзлар унинг кўксидан нидо бўлиб чиқди.

Шундагина рўй берган воқеанинг дахшатини бирдан хис этдиму этим сесканиб кетди.

- Йўқ! Йў-ўқ! Ойим чўккалаб қолди. Кимсан акамнинг оёгини қўшқўллаб чангаллади. Кетмайсан!
- Дада! Кимсан акам ойимнинг қўлларидан оёғини тортиб олишга уринаркан, бобомга қаради.
- Ўчирсанг-чи, аҳмоқ хотин! Бобом олмадек муштини дўлайтириб дашном берди. Биров болангни обориб тўпининг оғзига тиқяптими!

Ойим бари бир Кимсан акамни қуйиб юбормади.

– Йўқ! – деди ёш тўла кўзларида илтижо билан.– Борма, жон болам!

Бир чеккада карахт бўлиб турардим. Нимадир биқинимга қаттиқ ботаётганини энди сездим. Қарасам, ярим сават узум. Нима кераги бор? Кимсан акам кетса... Узум егандан кўра заҳар еганимиз яхшимасми? Беҳуш бир алпозда саватни ерга қўйдим.

Зор қақшаб йиғлашидан эриди шекилли, бобом Кимсан акамнинг оёғидан қучоқлаб мук тушиб ўтирган ойимнинг бошига эгилди.

– Онаси, – деди секин. – Юртга келган тўй... Хамма урушга борса-ю, Кимсан тошбақадек бошини ичига тортиб ўтирса ярашадими? Ўз қулоғим билан эшитдим-ку, уруш нари борса, бир-икки ойда битаркан. У ёгини сўрасанг, ҳеч ким ўглингни олдига солиб обкетаман деётгани йўқ.

Кимсан акам ойимнинг қўлидан сирғалиб чиқди-да, эшик томон ғизиллади... Шу кетганича эртасига пешиндан кейин қайтди. Бобом далада, мен супа олдида ўтириб, кир юваётган эдим. Икки кўзи эшикка термилиб ўтирган ойим чопиб бориб, Кимсан акамни қучоқлади.

- Нима бўлди? - деди чирқиллаб. - Тезроқ гапирсанг-чи?

Кимсан акам негадир кўзини ойимдан олиб кочди.

- Керак бўлса ўзимиз чақирамиз дейишди.
- Вой Худога шукур-а! Ойим палакати ариган одамдек юзи ёришиб кетди. Майли, болам, шошма. Айтибди-ку, керак бўлса ўзлари чақиради. Ажабмас, унгача уруш битиб қолса...

Бир пиёла чойдан кейин ойим йўлга отланиб қолди. Кечаги саватга бошқатдан узум уздирди.

– Тоғангдан хабар олай энди, – деди куйманиб. – Ким билсин, ҳали уям урушга отланиб қолдимикин, гүлдек хотинини қон қақшатиб...

Довлида Кимсан акам икковимиз қолдик. Нуқул рўпарасида сўппайиб туришдан уялиб, кир ёйиш баҳонасида супа томонга кетаётган эдим, Кимсан акам қўли билан имо қилди:

– Ўтир, Робия... Гап бор.

Сўз оҳангиданоқ ҳаммасини тушундим. Юрагим шув этиб кетди. У мендан олдин айвон пешига бориб ўтирди. Кўзларида чуқур, ўйчан маъно бор эди. Офтобда қорайган юзига тер тепчиб чиққан, лаблари қимтилган. Бир кунда янаям улғайиб қолгандек...

- Нима бўлди? - дедим юрагим зириллаб.

У индамади. Негадир жилмайиб қўйди. Орага юракни сирқиратувчи сукунат чўкди. Аллақаерда қовоғари ғўнғиллади. Молхонада галанска сигир хомуш пишқириб қўйди. Кунбўйи оламни қиздиравериб ўзи ҳам ҳансираб қолган қуёшнинг лоҳас нурлари этакдаги терак шохлари учида ловуллаб ўчди.

Кимсан акам илкис бош кўтариб, кўзимга қаттиқ тикилди.

- Кутасан-а! Шундай деди-ю, ҳамиша ювош, ўйчан боқадиган кўзларида олов ярқ этди. Сен кутсанг, мен тезроқ келаман. Жанг қилишим осон бўлади. Робия...
- Кетадиган бўлдингизми? дедим овозим титраб.
  - Йўқ, аввал сен айт. Кутасанми? Ростингни айт. Ўкраб йиглаб юбордим.
- Нега кутмас эканман? Сиздан бошқа кимим бор!– дедим кафтим билан юзимни тўсиб. Кимсан ака. Ахир мен... сиз...

Ўпкамни босиб ололмас, бир ёқларга қочиб кетгим келарди. Шу топда Кимсан акам мени эркалашини, юзларимни силашини хоҳлардим.

Бир маҳал у секин қўлимни силади. Кафтимни тушириб юзимни юзимга теккизгудек яқин келди. Ундан офтоб ҳиди, ер еси, кейин... одамнинг юрагини ўйнатиб юборадиган аллақандай ёқимли бўй таралар, кўзлари маъюс кулиб турарди.

– Нима қилай, – дедим жиққа ёш тўла кўзларимни кўзига қадаб. – Онт ичайми! Нон урсин! Кутмасам, нон кўр қилсин, Кимсан ака!

У титраб кетди. Бошимни оҳиста силади. «Нега ўпмайсан, тентак! Ўпсанг-чи, бағрингга боссанг-чи!» Билмадим, қўрқдими, уялдими, қадоқ босган йўғон бошмалдоғи билан юзимга оқиб тушган ёшни артди.

– Онт ичма, Робия! – деди овози қалтираб. – Биламан-ку, сени! Бир оғиз гапинг кифоя.

У яна жимиб қолди. Мен бўлсам, Кимсан акамнинг бақувват, қадоқ босган қайноқ кафтига юзимни умрбод босиб ўтиришни, унинг тўхтовсиз гапиришини, аллақандай сирли нарсаларни айтишини хоҳлардим. Кўзимни юмиб олдим.

– Робия! – деди у бир маҳал. – Менга қийиқча тикиб қӱясан-а?

Бошимни кўтариб қарасам, кулиб турибди.

- Ҳов анавиндагига ўхшаб, четига отимизни ёзиб қўясан-а! Иккаламизнинг отимизни...

Яна йиглаб юбордим.

– Йиглоқ! – деди у ёш болани овутгандек, бурнимни беозор чимчилаб. Шимининг чўнтагига қўл суқиб ярим варақ қогозни хонтахтага, чала ейилган узум гужумлари ёнига ташлади. – Бир ҳафтадан кейин жўнайдиган бўлдим. Военкоматдагилар ҳозирча Ўзбекистондан урушга олиш бошлангани йўқ, дейишди. Ойимга айтмай қўя қол. Ўзим тушунтираман.

Кимсан акам ҳам қизиқ. Нимага шунча шошилинч? Керак пайтида ўзлари чақиришарди-ку! Кимсан акам кўнглимдан ўтаётганини сезди.

– Робия! – деди менга эмас, пахсадевор тагида патирлашиб чўқишаётган мусичаларга қараб. – Шунақа қилиш керак, Робия! Уруш кетяпти.

Ойим қоронғи тушганда келди. Тоғам ҳам военкоматта югурмоқчи экан, Раъно янгам қўймабди. Ойим тоғамни узиб-узиб олибди. «Подадан олдин чанг кўтарма, ғунчадай хотинингни ташлаб уруш қилишни ким қўйибди сенга, – дебди. – Мана жиянинг ҳам ҳовлиқиб бориб, бўшашиб қайтди, керак пайтида ўзлари топиб олармиш», дебди.

Ойим гапиряпти-ю, менинг кўзларим Кимсан акамда...

Йиглаганимни сездирмаслик учун молхонага кириб кетдим.

\* \* \*

Якшанба куни ховлимиз одамга тўлди.

Унча-мунча колхозчи чарлаб чақирса бормайдиган, дўпписи ерга тушиб кетса, бировга пул бериб олдирадиган Умар закунчи ҳам пешонасига мунчоқ тақилган жийрон отини гижинглатиб келди. Бобом қўй сўйди... Рашид абзи одатдаги юмушини қилиб, самовар қайнатишга тушди. Маҳалла қозонида ош дамланди...

Ойим дод солиб, оламни бузиб юборса керак, деб қўрққан эдим. Қизиқ, йиғламади ҳам, ақл-ҳушини йўқотмадиям. Иккаламиз Кимсан акамга атаб патир ёпдик, бўғирсоқ пиширдик. Бошига янги дўппи, эгнига жужун кўйлак, шим кийиб олган Кимсан акам икки юзи қип-қизариб дам-бадам ёнимизга келади. (Ҳали улфатлари билан уйга кириб бобомдан бекитиқча Рашид абзининг мусалласидан ичаётганини кўрувдим.) Нуқул ҳазил қилади. «Ойи, тўй юборяпсизми, нонингиз бунча

кўп? Ие, Робиянинг пазанда бўпкетганини қаранг, ойи! Шундоқ қизни қўлдан чиқариб бўладими?»

Ойим унинг қочириғини тушунмайди.

– Сенинг синглинг бўлади-ю, пазанда бўлмайди-ми? – дейди кулиб.

Ажаб, одам йиглаб юборишдан қўрқиб кулса галати бўларкан. Хизмат қилиб юрибману нуқул Кимсан акамга термилиб қарайман. Ана, жўралари билан айвонда чордана қуриб ўтириб ош еяпти.

- Робия! Шундоқ ёнбошимда дўриллаган овоздан чўчиб тушдим. Қарасам, ҳар елкасига иккитадан йигит ўтирса бемалол кўтарадиган, кесилган жигардек қалин лабида мўйлов ўсган Парча опа девор тагида гўладек оёқларини чўзиб бир лаган ошни тиззасига қўйиб уряпти.
- Роби! Бир қошиқ сувминан ютадиган оканг бор-де! деди ошни гуваладек думалоқлаб оғзига тиқаркан. Совчи қўйса тегардим!

«Вой кўнглингга қўтир жомашов. Кимсан акам ўзимгаям керак!..»

Энсам қотиб бурилиб кетаётсам, шолча ташланган супада буғалтир Соли сўпоқ билан ўтирган Умар закунчи ўрнидан туриб, қўлини баланд кўтарди.

– Ҳурматли колхозчилар! – деди жарангдор овозда. – Бир минут диққат...

Ховлида говур-говур қилаётганлар секин-аста тинчиб қолишди.

- Ўртоқлар! «Қовун сўйса бўладиган» даражада силлиқ дазмолланган шим кийган Закунчи ўртага чиқди.
- Ўртоқ колхозчилар! Ватанимиз бошига оғир синов тушди. Қахрамон совет жангчилари немис-фашист босқинчиларига қарши шиддатли жанг олиб бормоқда! У кўрсаткич бармоғи би-

лан ингичка, чиройли мўйловини силаб қўйди. Ҳаяжонланиб давом этди. – Фронтга добровольний отланганлар орасида бизнинг колхоз аъзоси, стахановчи кетмончимиз Кимсан Хусанов ҳам борлигидан фахрланамиз! Бу ёққа кел, укам!

Кимсан акам қўлини сочиққа артиб, айвондан тушди. Хижолатдан юзлари ловуллаб супа олдига келди.

– Раҳмат, укам! – Закунчи унинг елкасига қоқди. – Душманга омонлик берма! – Охирги гапини, айниқса, жарангдор овозда айтди. – Фашист босқинчиларига ўлим! Яшасин ўртоқ Сталин!

Гардиши кенг шляпа, оқ кител кийган Соли сўпоқ дўмбоқ қўллари билан қарсак чалди. Чек-ка-чеккадан маъқулловчи хитоблар эшитилди.

Умар закунчи жойига ўтиргандан кейин Кимсан акам нима қилишини билмай эсанкираб турди-да, одамлар орасидан ўтиб, айвонга йўналди. Шу пайт гулзор томондан Оқсоқолнинг йўгон овози эшитилди.

– Шошма, болам! – У катта-катта қадамлар билан яқин келиб Кимсан акамнинг елкасига кафтини қўйди. – Бир нарсани айтиб қўяй. Уруш деган палакат – ўйин эмас. Буни ҳеч ким билмаса ҳам Дума билан мен биламиз. Душманни аяма, аммо ўзингниям эҳтиёт қил. – Оқсоқол Кимсан акамнинг пешонасидан ўпди. – Баракалла, болам! Ҳақиқий ота ўғил экансан. Белида белбоғи бор йигит экансан! Қани халойиқ! – У одамларга юзланиб ҳайқирди. – Юртимизга қасд қилганлар паст бўлсин, ер билан яксон бўлсин! Кимсанбой ой бориб – омон келсин!

Қовлини тўлдирган одамлар баравар оёққа қалқди.

Кимсан акам бир йўла шунча мақтовни умрида энди эшитаёттани учунми, ўзини қаёққа қўйишини

билмас, шолғомдек қизариб, гоҳ ерга қарар, гоҳ дарахтларнинг учини томоша қилар, нуқул шимининг чунтагига қулини суқиб атрофга аланглар, чамаси бунақа «азоб»дан тезроқ қутулишни уйлар эди.

– Ҳусанбой! – Оқсоқол кафтини оғзига карнай қилиб бақирди. – Қаёқдасан, Дума?!

Одамлар тўдасидан бобом чиқиб келди.

- Обке! - деди Оқсоқол.

Аллақаёқдан ойим пайдо бўлди.

– Чоп, қизим! – деди шивирлаб. – Патирни обчиқ!

Оёғимни қўлга олиб бостирмага югурдим. Ҳали тандирдан узаётганимизда ойим синггиб пишган, юзига седана сепилган каттакон патирни қўлимга тутқазиб, буюрган эди: «Тайинли жойга бекитиб қўй, сўраганимда обкеласан!»

Бостирмага учиб кирдиму эски сандиқ устидаги дастурхонга ўралган патирни олдим. Патир хали иссиқ эди... Дастурхон қатини очишим билан димоғимга офтоб, буғдой, ер хиди урилди. Худди Кимсан акамнинг юзидан анқиб турадиган исга ўхшаш бўй... Одамлар орасидан ўтиб келиб, нонни бобомга бердим. Бобом худди чақалоқ болани авайлаб кўтаргандек икки қўллаб кўксига босганча супа олдига олиб борди-да, Оқсоқолга узатди.

Оқсоқол патирни боши устида баланд кўтарди.

– Халойиқ! –деди овози титраб. – Дунёда нондан табаррук нарса йўқ! Нондан юз ўгирган имондан юз ўгиради. Ке, ўғлим, тишла! – У патирнинг икки четидан тутиб турди. Кимсан акам хиёл эгилиб бир чеккасини тишлади. – Баракалла, – деди Оқсоқол. – Туз-насибанг узилмасин! Илохи омин!

У бир чеккаси тишланган патирни бобомга узатди, бобом ойимга, ойим менга... Мен шоша-пи-

ша уйга кирдим-да, патирни тахмондаги кўрпатўшаклар орасига яширдим.

\* \* \*

Тонг қоронғисида йўлга тушдик. Бобом Умар закунчининг улов жўнатишини кутмасдан ўзининг эшак аравасини тахт қилди. Аравада Кимсан акамнинг копи, копнинг богичидан ушлаб ойим ўтирибди. Араванинг бир томонида Оқсоқол, иккинчи томонида бобом тупрок кечиб кетяпти. Кимсан акам иккаламиз орқароқда боряпмиз. Бобом халачўп билан эшакнинг биқинига нуқиб «хих-хих»лайди. Эшак дик-дик қадам босади. Сахар салқинида совуган тупроқ ҳиди ёқади шекилли, «хирқ-хирқ» қилиб қўяди. ўилдираклар овозсиз шириллайди. Чанг кўтарилади. Шом еган ой ғариб мўлтирайди. Гох Кимсан акамга, гох ойимга қарайман. Fира-ширада Кимсан акамнинг юзини аниқ кўрмайман. Лекин атрофни томоша қилиб бораётганини пайқайман. Назаримда у негадир жилмаяётганга ўхшайди. Ойим икки букилиб олган. Худди қоп-қора тошдан ясалған ҳайкалдек...

Алвасти кўприкдан ўтаётганимизда қоронғи ўпқонда илондек вишиллаёттан сувга қараб, вахмим келди. Назаримда бутун дунёнинг фалокати шу ерга тўланиб «базм» қураётгандек, атиги бир ҳафта олдин ўйнаб-кулиб юрган одамлар бугун маъюс тортиб қолганидан шодланиб мазах қилаётгандек бўлиб кетди.

Оқсоқолнинг юраги сиқилди шекилли, Алвасти кўприк шовқинини босиб шанғиллади.

– Кеча Хирмонтепа томонга ўтгандим. Буғдой жонивор бошоғини тўкаман деб турибди. Закунчига айтсам ҳали вақт бор, раҳбарларнинг ишига аралашманг, деб сўкиб берди.

– Э, рахбар бўлган отасини гўрига! – Бобом хуноб бўлиб ҳайқирди. – Бу йил ёз эрта келди, ўроққа тушмасак бўлмайди.

Боядан бери индамай кетаётган Кимсан акам бирдан жонланиб кетди.

– Тушаверинглар, дада! У-бу деб закунчилик қилса айтинглар, ҳеч ким уйига ортиб кетаётгани йўқ-ку, денглар. Ҳарна вақтлироқ йиғиштириб олганларинг.

Шу баҳона гап гапга уланди. Ҳосилни тезроқ йиғиб олиш, кечки маккани вақтида экиш... Хуллас, гангир-гунгур суҳбат бошланди.

Эшак қадамига қараб, манзилга етиб боргунимизча күн ёйилди.

Анча йил илгари дадам билан Тошкентга келганимизда кўрган вокзалим гира-шира ёдимда эди. Ўша гиштин бино. Ўша зиналар. Аммо унда одам бунақа қалин эмасди. Қозир ҳамма ёқ бозорга ўхшаб кетибди. Қоп орқалаганлар, жомадон кўтарганлар, ёқасига белги тақилган ҳарбийлар... Одамдан от-улов кўп. Қоп-қора «эмка» машиналари, «полуторка»лар, от арава, эшак арава. Ҳатто огзидан кўпиги осилиб, пастки жагини у ёқ бу ёққа қийшайтирганча кавш қайтараётган туягача бор.

Кимсан акам «мен ҳозир» деди-ю, ҳизғиш ғиштин бино эшиги олдида турган одамларни туртиб-суртиб ичкари шўнғиди. Бир соатчадан кейин ҳайтиб чиҳди.

Қоп орқалаган бобом, унинг кетидан тугунни маҳкам ушлаганча мен, билагимга ёпишган ойим. Энг охирида қаддини ғоз тутган Оқсоқол «пўшт-пўштлаб» перрон томон юрдик. Кимсан акам бу ерда ҳам «ҳозир келаман» деганча узоқ йўқ бўлиб кетди.

Хаво эрталабдан қизиб кетган. Вокзал биноси олдида поезд тўхтаб турибди. Аскарларни таший-

диган «қизил шалон» шу эканини тушундим. Тахта вагонлар дарвозадек кенг эшигини очиб турибди. Дераза йўқ. Ўрнида патнисдек туйнук. Музика янграйди, ора-чора «гум-гум», «вош-вош» деган товуш эшитилади. Аллақаёқдан гармон овози қулоққа чалинади. Узокроқда чилдирма бака-банг қилади. Кимдир йиғлайди, кимдир кулади. Каттакон осма соатнинг миллари ўндан йигирма дақиқа ўтганини кўрсатиб турибди.

Шундоқ соат тагида сочи калта қирқилган, лабини қизилга бўяган рус аёл папирос чекаётган мўйловли кишини қайта-қайта ўпади.

 Саша, Сашенька, – дейди. Дам-бадам сумкачасини очиб рўмолча чиқаради, кўз ёшини артади.

Эркак негадир кулади.

Жди, – дейди қизил бўёқ юққан юзини артиб.До победў!

Бир маҳал Кимсан акам ҳаллослаб келиб қолди. Худди шу пайт «По-ваго-нам!» деган асабий қичқириқ янгради. Йиғи-сиғи, куй, кулги – ҳаммаси аралашиб кетди.

Кимсан акам аввал ойимни қучоқлади. Қизиқ, ойим шундаям йиғламади. Фақат энтикиб нафас олаётганини сездим.

– Болам, жон болам, ўзингни эҳтиёт қил... Хўпми, жон болам. Тушундинг-а! Оллога топширдим...

Кимсан акам унинг қучоғидан чиқишга уринар, аммо ойим қўйиб юборгиси келмас эди.

- Хавотир олманг, ойи! деди у шоша-пиша. Нариси билан уч ойда келаман. Мана кўрарсиз. Гирмонни бошини янчиб келамиз!
- Иссиқроқ кийиниб юр, болам! Ойим Кимсан акамнинг у юзидан-бу юзидан ўпаркан тайинлади. Қопда аччиқтош бор, томоғинг оғриса ғарғара қилгин, хўпми?

Қарасам, Кимсан акам ойимга юзини тутиб беряпти-ю икки кўзи менда. Кулмоқчи бўлади, аммо лаблари аянчли титрайди. Амаллаб ойимнинг қучоғидан чиқиши билан дадам икки елкасига осилиб пешонасидан ўпди.

- Ой бориб, омон кел, ўғлим! деди бўғиқ овозда.
   Яна ўша асабий ҳайҳириҳ янгради.
- По ваго-о-о-нам!

Кимсан акам бобом билан хайрлашаётганида ҳам икки кўзини мендан узмади, шу топда Оқсоқолниям ёмон кўриб кетдим. Кимсан акамни қучоқлаб олди. Ҳадеганда бўшата қолмайди.

Асабий ҳайқириқ бу сафар таҳдидли жаранглади.

- По ваго-о-о-нам!

Кимсан акам ниҳоят ёнимга келди. Терлаб кетган, энтикиб нафас оляпти. Кўзи кулиб турибди-ю, лаблари титрайди.

Беш-олти қадам нарида турган бобом билан ойим томонга ўгринча қараб олди-да, қўлини чўзди. Кафтимни маҳкам қисиб шивирлади:

- Кутасан-а?
- Кимсан ака... Кимсан ака! Кўзимдан тирқираб ёш чиқиб кетди.

Вагонлар шиддатли тарақлади. Бир маҳал ўзимга келсам, Кимсан акам елкасида қоп, бир қўлида тугун билан поезд ёнида чопиб кетяпти. Вагонлардан бирининг очиқ эшигидан беш-олти қўл баравар чўзилиб Кимсан акамни қоп-мопи билан ичкарига тортиб олди.

Хамма ёқ қий-чув бўлиб кетди.

- Худога топширдим, болам!
- Тезроқ келинг, дадаси.
- Хайр, адажон!
- Бегим, хат ёзинг, бегим!
- Тугсам отини нима қўяй?

– Худо паноҳида асрасин, ўғлим! Бошинг тошдан бўлсин!

Бу – бобомнинг хитоби эканини кейин пайқадим. Ниҳоят охирги вагон ҳам тарақ-туруқ қилиб ўтиб кетди. Сўнгги вагон, шапка кийган, найзали милтиқ кўтарган ҳарбий киши... Олислаб бораётган паровоз нола чеккандек чўзиб гудок чалди. Йиги-сиги бир авжига чиқди-ю, кейин сукунат чўкди.

Мусиқа тинди. Чилдирманинг бака-банги ўчди. Гармон ҳам нола чекмай қўйди. Қизиган темир иси, машина мойининг ҳиди гупиллаб кетди. Қарасам соат тагида турган бояги рус хотин темир симёгочга беҳол суянганча ҳиқиллаб йиглаяпти.

- Саша! Сашенька!
- Cvb! Cvb опке!

Бобомнинг хавотирли хитобидан сесканиб тушдим. Ойим шундоқ ерга ўтириб қолган, ранги қув ўчиб, рўмоли елкасига сиргалиб тушган, кўзи юмуқ эди. Икки чаккасидаги сочи оқариб кетганини энди сездим. Нахотки, бир кечада?..

Бобом ойимнинг билагидан тутганча нуқул бир гапни қайтариб, ялинар эди.

- Кўзингни оч, онаси, кўзингни оч...

Оқсоқол белбоғини шоша-пиша ечиб, ойимни елпишга тушди. Менга қараб ўшқирди.

- Сув обкелсанг-чи, Робия!

Дуч келган томонга югурдим. ўадир-будур ғишт қопланган майдондан ўтиб борарканман, қоқилиб ўмбалоқ ошиб кетдим. Чап тирсагим сирқираб, кўнглим беҳузур бўлди. Аммо сакраб туриб яна югурдим. Рўпарамдан чиқиб қолган қора шапкали одамдан сўрадим.

- Сув? Сув борми?

Шапкали киши қўли билан поезд кетган томонга имо қилди. Эллик қадамча нарида тумшуғи эгик қувурдан шариллаб сув оқиб ётарди. Қовучимга сув тўлдириб, орқага қараб чопдим. Етиб келгунимча кафтларим орасидан оқиб, нариси билан икки қултум қолди. Бобом ҳамон типирчилар, ойим ранги бўздай оқарганча кўзи юмуқ, бошини бир томонга ташлаб ўтирар, бобом елкасидан тутиб турмаса, гурсиллаб йиқилиши аниқ эди.

Ховучимдаги сувни ойимнинг юзига сепдим. Ойим бир сесканди, аммо кўзини очмади.

- Ўғли-м! деди ожиз инграб. Кўзларидан икки томчи заҳардек аччиқ ёш сизиб чиқди-да, кўкариб кетган юзидан оқиб, лабининг четида туриб қолди. Кечадан буён бутун бардошини тўплаб, Кимсан акамнинг олдида йиғламагани ҳаққи ичида уммон бўлиб ётган алам энди шу икки томчига айланиб тошиб чиққанини ҳис этдиму юрагим санчиб кетди.
  - Ойижон! дедим бошига эгилиб.

Кимдир елкамга туртди.

Ўгирилиб қарасам, ҳозиргина симёгочга суяниб «Сашенька» деб йиглаёттан хотин. Лабининг бу ёги суркалиб кеттан, огзи қийшайиб қолганга ўхшарди.

- Аксакал... - У бобомни хам нари сурди.

Илдам ҳаракат билан сумкасини очди-да, ҳандайдир узунчоҳ шишача чиҳарди. Пўкагини очиши билан димоҳни ёриб юборгудек ҳид анҳиб кетди. Кўз ёшидан жиҳҳа ҳўл бўлиб кетган рўмолчасига бояги доридан томизди. Рўмолча учини ойимнинг бурнига тутган эди, ойим юзини буриштириб, тескари ҳаради. Кўкимтир юзига билинар-билинмас ҳон югурди.

- Мама плоха, дедим билганимча ўрисча гапириб. Мама умер будит.
- Ничего! Хотин маъюс жилмайди. Я врач, помогу. Принеси пить.

Хотиннинг кейинги гапини тушунмадим.

Сув, сув бар, кизимка? – деди хотин аччиқланиб.

Оқсоқол ўрисчани яхши билиши энди эсига тушгандек таржима қилди.

– Дўхтир маржа сув опке деяпти, нега тушунмайсан? – У қозондек дўпписини бошидан ечиб тутқазди. – Ма! Югур.

Дўппига сув тўлдириб қайтиб келсам, ойим кўзини очган, қийналиб, нафас олар, бобом билан Оқсоқол тепасида туришар, ўрис хотин эса гўё ойим тушунадигандек тасалли берар эди:

- Не горюй, апа! Твой мальчик придет героем... Ойим дўппидаги сувдан озгина ичиб тағин ингради.
  - Жон болам, ёлгизим...
- Мен борман-ку, ойижон, дедим йигидан лабим титраб. Нима, мен сизнинг болангиз эмасманми?

Ўрис дўхтир ўзбекчани тушунаркан.

– Ну вот, апа! – деди бошини маъюс иргаб. – У тебя и кизимка есть. А у меня теперь – никого.

Гапини яхши тушунмасам ҳам ойимни юпата-ётганини англадим.

Аёл секин-секин нари кетаётган эди, Оқсоқол қуллуқ қилди.

- Испасиба, маржа! Гўст пайдўм.

Аёл мунгли кулимсираб қўйди.

- Рахмат, - деди ўзбекчалаб, - рахмат, аксакал.

Димогимга машина мойининг чучмал иси, қулогимга вагонларнинг шарақ-шуруқ урилиши, гилдирак садолари, паровознинг видолашгандек нолон гудок чалиши маҳкам ўрнашиб қолди.

Кейин ҳам ёз кечалари ойим билан айвонда ётганимда Алвасти кўприк томондан ғилдираклар тарақлагани, паровознинг нола қилгандек чўзиб гудок чалишини эшитиб қолсам, вокзалдаги ўша манзара кўз олдимга келар, юрагим орзиқиб-орзиқиб кетар эди.

\* \* \*

...Майли, ўшанда-ку, ойимнинг ўз дарди ўзига етиб ортарди. Устига-устак Кимсан акам иккаламиз бир-биримизга кўнгил қўйганимизни билмас эди. Кейин... кейин билди-ку. Билиб ўзиям суюнди-ку, ахир!

Нимага энди бунақа деяпти?! Нимага мени «қизим» деб чақирадиган Шомурод тоғамга раво кўряпти? Тўғри, уруш битганига беш йилдан ошди. Аммо беш йил нима бўпти? Керак бўлса ўн йил, йигирма йил кутаман! Умрим борича кутаман! Мабодо Кимсан акам йўқ бўлганида ҳам («ўлган» дейишга тилим бормайди) мен борман-ку. Бундан чиқди, Кимсан акам ҳам бор-да! Наҳотки ойим умидини узган бўлса! Наҳотки ўз ўғлига атаган қизни ўзгага раво кўрса?!

Ойим иккаламиз бир-биримизнинг бағримизга кириб ўтирар эканмиз, шуларни ўйлаб эзилардим. Аллақаерда ҳаққуш нола қилади, шамол беҳи баргларини шитирлатади. Ойим ҳаво етишмаётгандек хириллаб нафас олади... Айвон бурчагида Музаффар ётибди. Ора-чора инграйди. Синган қўли оғриётган бўлса керак...

– Жилла қурса шу болага раҳминг келса-чи, қизим. – Ойим бўғинлари шиқирлаб ўрнидан турди. Музаффарнинг тепасига бориб, кафтини пешонасига босди. – Менгаям осон тутма, жон болам! Сенга ёмонликни раво кўрсам, имонимдан жудо бўлай!

Бу гапни шунақа осойишта ишонч билан айтдики, ичимда бир нима узилиб кетгандек бўлди. Авваллари ҳам шунга ўхшаган аҳволга тушганман. Ҳов, ўшанда Кимсан акамни кузатганимиздан кейин икки ойча ўтиб Очил акадан совчилар келганда. Йиглаб-йиглаб Кимсан акамга хат ёзганимда... Кимсан акамдан хат келмай қўйганида... Умар закунчи бутун уй ичимизни қора ер билан битта қилганида... Бобом ўлганида... Уруш битиб, уйга яна совчилар қатнаб қолганида... Ҳар гал ичимдаги ўша ип таранг тортилиб, чидаб бўлмас азоб берар, ўзимни қўйишга жой тополмай қолардим. Лекин ўша ипнинг борлиги яхши экан. Азоб берса ҳам, жонимни суғуриб олса ҳам...

Хозир... ип узилиб кетди. Узилди-ю, ажаб... огриқ ҳам сезмадим, алам ҳам... Вужудим бўмбўш бўлиб қолди. Бўм-бўш. Жимжит...

Одам қимматбаҳо нарсасини йўқотса ачинади. Туҳматга қолса бошини тоғ-тошга уради. Қадри ерга урилса, исён кўтаради. Яқин кишиларидан айрилса дод солади... Лекин умидингдан айрилсанг ғалати бўларкан. Ҳеч нимага, ҳеч кимга, ҳатто ўз қадрингга ҳам ачинмайсан. Дод солмайсан. Исён кўтармайсан... Гўё сен ўлгансан. Ўзинг ўлиб, қуруқ суратинг қолган...

### учинчи қисм





#### ТЎРТИНЧИ БОБ

# КИЧКИНТОЙ МУЗАФФАР ХИКОЯСИ

## Тўй

Қўлим сингани баҳона, уч ҳафтача аммамникида қолиб кетдим. Аввалига дадам ҳар куни келиб турарди. Кейин тўсатдан биттаям келмай қўйди. Дадамни қўмсаб йиглаган эдим, аммам юпатди:

– Шошма, болам! Дадангни иши кўпайиб кетди. Битсин, борасан. Роби опанг ҳам боради.

Дадамнинг иши билан нима ишим бор! Менга дадам керак! Нега келмайди? Майли, уришсаям, сўксаям. Бари бир дадам билан ётгим келяпти!

«Қора аммам» ҳар кеча қўлимга шўрпахта боғлайди. Шўрпахта яхши-ю, ҳидини ёмон кўраман. Тағин ўзимникини боғласа, майлийди, аммам пахтани ўзи «ҳўллайди». Дадам ўшандаям келмади. Соғиниб кетдим! Ўзим қочиб кетай, десам, Алвасти кўприкдан қўрқаман... Роби опам ҳам ўзгариб қолди. Авваллари ҳар куни қурутми, пистами олиб келарди, мени ўйнатарди. Энди ўйнатмай қўйди. Ҳеч ким билан гаплашмайди. Аммам йўғида бурчак-бурчакка бориб йиғлайди.

Ниҳоят, «Қора аммам» уйимга олиб борди. Дадам ҳам мени соғиниб қолған экан. Кўриб суюниб кетди. Оқсоқланиб келганча ердан даст кўтариб юзимдан ўпди. Қизиқ, дадамдан тамаки

эмас, оҳак ҳиди келарди. Қарасам, уйимиз бошқача бўлиб кетибди; деворлар оҳланган, уйнинг синган деразасига янги кўз солинган. Ҳовли топ-тоза... Дадамнинг ўзиям ўзгариб қопти. Мўйлови текисланган, кўзлари ёниб турибди. Ёшариб кетганга ўхшайди.

Шу кеча дадамнинг елкасидаги чандигини силаб, мўйловидан анқиб турган тамаки исини ҳидлаб, маза қилиб ухладим.

Аммам бизникига серқатнов бўлиб қолди. Бир кун тугун кўтариб келади, бир кун сават... Хатто бир марта икки букилиб, ўзидан катта қопни орқалаб келиб қолди. Дадамга эргашиб арпа ўрокқа борганимда чумолиларни томоша қилишни яхши кўрардим. Бир гал яримта бошоқни судраб кета-ётган чумолини кўрганман. Аммамниям аллақаери ўша чумолига ўхшаб кетарди. Ўзи муштдай келадию орқасида тандирдек қоп. Эшигимиз кичкина эмасми, қоп сиғмай қолди. Бостирма соясида жўхори уқалаб ўтирган дадам югуриб бормаса аммам бечора эшикка тиқилиб тураверган бўларди. Икковлашиб қопни тортқилаб ичкари олиб киришди. Пахта экан.

– Шунча жойдан кўтариб келдингизми, опа, нима зарил! – деди дадам ачиниб.

Аммам янаям қорайиб, тердан ялтираб кетган пешонасини рўмолининг учига артиб, тушунтирди.

– Янги кўрпа қавимаса бўларканми? Дўст бор, душман бор. – У ҳар сафаргидан қаттиқроқ ҳарсиллар, ичидаги «одамчалар» овози борича ҳуштак чалар эди.

Эртасидан офтобрўя айвонга ўтириб олиб, кўрпа қавишга тушди. Мен бўлсам ҳали битмаган кўрпа устида думалаб ўйнадим. Маза! Аммам уришмади-ю, сал дашном берди.

- Тур, барака топкур, пахтаси йигилиб қолади... Бир ойча туриб, Роби опамга ўрганиб қолган эканман.
  - Амма, Роби опам қачон келадила?
- Келади, гиргиттон, келади, деди аммам елкамга қоқиб. - Яқинда бутунлай келади.
  - Менга қурут обкеладилами?
- Қурут нима бўпти, ишкалат обкелади. Яхши кўрасанми, опангни?
  - Жудаям.

Аммам жуволдиз тутган қўлини муаллақ кўтарганча узоқ жимиб қолди. Кейин негадир тескари қараб, рўмолининг учини кўзига босди...

Ўнғоқ пишган кезлари уйимизда тўй бўлди. Абдувалининг дадаси — «Туя» сартарош бостирма панасида қўй сўйиб, оёғидан олма шохига осиб қўйди. Ховлининг ўртасидан чуқур қазиди. Беш-олтита эркак «ҳа-бўл, ҳа-бўл» қилганча эшикдан қиялатиб дошқозон олиб киришди. Бояги чуқурга ўрнатишди. Биз ҳам ясаниб олганмиз. Дадам атайлаб Тошкентга тушиб, менга янги костюм-шим, оёғимга ботинка олиб келган. Бошимда яп-янги бахмал дўппи. Чойхонада мени кўриб «қадрдон бўлиб қолган» эркаклар эшикдан кириши билан кўз қисишади.

- Муборак бўсин, гирой!
- Ия, посон бўпкетибсиз-ку! Дўппингизни бизга сотинг, гирой!
  - Ҳо! Дадангиз оберсин!

Қоронғи тушар-тушмас тумонат одам тўпланди. Башанг кийинган эркаклар, ясан-тусан қилган хотинлар. Кўтармада шунча кўп бола борлигини билмаган эканман. Балки доим дадамга эргашиб юриб болаларга қўшилмаганим учун шу кунгача Абдувалидан бошқасини кўрмагандирман.

Томорқадаги жухоризор ичида бекинмачоқ уйнаб юрсак, куча томонда шовқин-сурон эшитилди.

– Юр, – деди Абдували қўлимдан тутиб. – Куёв келяпти!

Хеч балога тушунмадим.

- Қанақа куёв?
- Вой, билмайсанми, даданг хотин оляпти-ку! Куёвда!

Пастак эшикдан ҳовлига чопиб кирдик. Қарасам ҳовли ўртасида ловиллаб гулхан ёняпти. Каттакон тўнкадан чарсиллаб олов сачраяпти. Дошқозон бошида куйманаётган сариқ хотин – Абдувалининг ойиси гулхан атрофида иргишлаётган болаларга қўлидаги чўмични ўқталиб бақиряпти.

– Ёниб кетасан, тинмагур така! Ёниб кетасан! Дадамни танимай қолибман. Вуй! Шу – ўзимнинг дадамми? Эгнида ҳаворанг костюм, бошида яп-янги чуст дўппи. Мўйлови текис тарашланган. Ие, дадамнинг шунча ордени бор эканми? Битта... Иккита... Учта...

Дадамнинг ёнида келаётган Илҳом чойхоначи қултиғига қистириб олган тун қатини очди.

- Кийиб олинг, куёвбола!

Дадам илжайиб, құлини орқасига қилиб турди. Беқасам тунни кийгизишди-да, етаклаб гулхан ёнига олиб келишди. Дадам қаддини гоз тутиб боряпти. Чулоқланишиям сезилмайди. Кузи тушиб қолармикин, деган умидда яқин борган эдим, қандайдир нотаниш хотин елкамга туртди.

- Қоч, ўралашма!

Дадамни аланга атрофидан уч марта айлантиришди. Кимдир эски курси келтириб гулхан яқинига қуйди. Яна бир одам дупписига укпар қадалган кичкина болани дадамнинг тиззасига утқизди. Уша захоти қулоқни ёргудек булиб чилдирма ба-

ка-банглаб кетди. Кўйлагининг олдини ёқавайрон қилиб ечган доиракаш бир томонга кифт ташлаб ғайрат билан чилдирмани савалай бошлади.

Меҳмонлар (деярли ҳаммаси эркаклар) ҳовлига тўрт бурчак қилиб ёйилган шолча, бўйралар устига қатор-қатор бўлиб чордана қуриб ўтиришди. Шундоқ ернинг ўзига ёйилган дастурхонларга нон, нишолда, туршак, жийда, попукқандлар қўйилди. Илҳом чойхоначи дадамнинг пинжига кириб, айвонга олиб чиқди. Мен танимайдиган яна уч-тўрт киши дадамнинг ёнига ўтириб олишди. Ўша заҳоти айвонга патнислар ташиб келишди. Патнисда қовурма чучвара, қатлама бор эди.

Меҳмонларга шўрва тортилгандан кейин Илҳом чойхоначи ўртага, гулхан ёнига чиҳди. Юзлари ҳизариб, чўтири ҳам билинмай кетибди.

– Катта ашула! – деди ўзидан ўзи бақириб. Попукқанд солинган ликопчани юлқиб олди. Попукқанд дастурхонга сочилиб кетди.

У ликопчани оғзига рўпара келтириб чинқириқ овозда ашула бошлаб юборди.

- Боғ аро-о-о қўйсам қадам...

Юзи баттар қизариб бўйин томирлари ўқловдай бўртиб чиқди.

Гулхан шуъласидан узокда, қоронғида ўтирган аллаким, завқи тошиб кетди шекилли, овози борича «дўст» тортди.

– Ҳа-дўў-ўст, барака топ! Ойдек юзингдан аканг! Сендан бошқа ўлмасин!

Мазза қилиб ашула эшитаётсам, биров елкамга туртди: қарасам, Абдувалининг ойиси. Қўлида чўмич.

– Юр! – деди имлаб. Бостирмага олиб кирди. Шифтига шишаси синик фонус осилган бостирмада сон-саноксиз тугун-терсаклар орасида «Қора

аммам» ўтирган экан. Негадир ўпкаси тўлиб юзимдан ўпди. Анчагача бағрига босиб турди.

- Шўрва ичдингми, болам?
- Қўйворинг, дедим типирчилаб, ашула эшитаман.
  - Қўйинг, опа, бола ўйнасин.

Нимқоронғи бурчакда чўккалаб ўтирганча тугунларга нон, туршак солаётган, қарғашойи кўйлак кийган хотинни энди кўрдим.

– Тўй деган болаларники бўлади. – У биз томонга ярқ этиб қаради-да, ишини давом эттираркан, қўшиб қўйди. – Ўйнайвер, ўғлим.

Қизиқ, қарғашойи кўйлакли хотиннинг овози ҳам, ўзиям дағал эди. Лекин негадир олдига боргим келди. Нимага унақа бўлганини билмайман.

- Ўзидан тиниб-тинчиб кетса кошкийди, Башоратхон! – деди «Қора аммам» бурчакка қараб. – Билмадим, савоб иш қилдимми, гуноҳми. Шу нораста деб... – У бирдан дами ичига тушиб, ғижиллаб нафас ола бошлади.
- Ма, болам, ўртоқларинг билан е. Келсанг яна бераман! Аммам тугунларни апил-тапил титкилаб, чўнтакларимни қовурма чучвара, попукқанд, яна алланималарга тўлдириб ташлади.

Ховлига отилиб чикдим.

Ўйин-кулги ҳамон давом этарди. Чилдирма тараклайди. Илҳом чойхоначи ликопчани ютиб юборгудек оғзини катта очиб ашула айтади. Авжига чиққанда нуқул ликопчани ликиллатади. Исиб кетганидан юзини елпияпти, бечора! Дадам айвонда беқасам кўрпачада ўтирибди. Олдида безатилган патнис. Икки ёнида ўртоқлари.

Сопол товоққа тўлатиб сут қуйишади-да, «олинг-олинг» деб бир-бирига узатишади. Ҳайронман, дадам сутни ёмон кўрарди-ку;

– Сутмас, бўза! – Абдували билағонлик билан тушунтирди. – Одамни маст қилади!

Бир маҳал Илҳом чойхоначи кучанавериб чарчади шекилли, ликопчани ерга ташлаб, кўйлагининг енгига пешонасини артди.

– Энди навбат ўзимизнинг Кўтармада ном чиқарган артис – «Туяга»! – деди тантана билан. – Қани битта духовой оркестр чалиб бер, хумпар!

Абдувалининг дадаси илжайганча лапанглаб гулхан олдига борди. Йўл-йўл кўйлагининг ёқа тугмаларини ечди. Ўнг қўлининг кафтига туфлади-да, чап қўлигига тиқиб, чап қўлини бир силтаган эди «ворт» этган товуш чиқди. «Туя» амаки ниҳоятда жиддий қиёфада теракдай гавдасини гоз тутиб ҳовлидаги одамларга мурожаат қилди:

– Ҳурматли меҳмонлар! Укамиз Шомуроджоннинг базмида сизларга зўр муждика чалиб бераман! Эшитганлар бой бўлсин! – У чап қўлини таёқдай осилтириб тағин силтади. Яна «ворт» этган овоз чиқди. «Туя» амаки дўрдоқ лабларидан тупук сачратиб оғзи билан жўр бўлди. «Умпо-умпо! Умпо-умпо!» Ҳар гал «умпо-умпо» деганда қўлтиғи «ворт-ворт» қилади. «Муждика» шунақа тантанали жаранглайдики, худди идора тепасидаги радиокарнайдек. «Умпо-умпо, ворт-ворт! Умпо-умпо, ворт-ворт!»

Биров қорнини ушлаб, биров бошини чангаллаб хохолайди. Қарасам, дадам ҳам тиззасига уриб куляпти.

Ниҳоят, «Туя» амаки «муждика» чалишдан чарчади. Халққа таъзим қилиб, сўлагини арта-арта нари кетди.

Худди шу пайт кимдир: «Оқсоқол келдилар», деб қолди. Тўйхонага бирдан жимлик чўкди. Қарасам, айвонда – жўралари орасида ўтирган дадам ҳам

сипо бўлиб қопти. Илҳом чойхоначи бўза қуйилаётган косани олиб, ими-жимида уйга кириб кетди. Дадам дик этиб ўрнидан турди.

Кўча эшикдан кириб келган табиб бувани дарров танидим. Ясаниб олибди: бошидаги қозоннусха дўпписи яп-янги. У четга чиқиб, икки қўлини кўксига қўйди.

- Қадамларига ҳасанот, Оқсоқол...

Оқ яктак кийган Оқсоқол бува қаддини гоз тутиб, айвон томон юрди. «Қора аммам» айтган Оқсоқол шу! Аввал ҳам кўрганман: далага, обши қозонга борганимда. Аммо олдига яқин боришга уялганман. Дадам у ёқда турсин, табиб бува ҳам Оқсоқолни шунчалик иззат қилишадики, узоқдан кўриши билан таъзим қилиб туришади. Ҳовлининг тўрт тарафида чордана қуриб ўтирганлар гур этиб ўрнидан турди. Дадам айвондан илдам тушди. Оқсоқол буванинг кафтини қўшқўллаб қисди.

- Қани, марҳамат, деди айвонга имо қилиб.
   Оқсоқол дадамнинг елкасига қоқди.
- Қушганинг билан қуша қари, болам, дедию тик турган одамларга ўгирилди. Болаларим... деди салмоқлаб. Қовли ўртасидаги тўнка ёниб бўлиб яхлит чўга айланиб қолган, Оқсоқол буванинг узун, қуюқ соқоли, қотма юзи, кўзларида қизгиш нур шуълаланар эди. Мана шу хонадондан қут-барака аримасин. Умид билан бир ёстиққа бош қўйган икки ёш ували-жували бўлсин... У бир зум чўгга айланган тўнкага жим тикилиб қолди. Халойиқ, деди яна. Шу хонадонда яна бир одам бор: бола, нораста! Шомурод шу болани опичлаб катта қиляпти. Илоё шу йигитчаниям умри узоқ бўлсин. Бахти безавол бўлсин!

Одамлар баравар фотиҳа тортишди. Кимдир қултиғимдан олиб даст кутарди. Бир зумда узим-

ни Олимжон акамнинг елкасида кўрдим. У посон кийинган, бошида ихчам айвонли шапка бор эди.

- Қалайсан? - деди шивирлаб.

Илжайдим.

- Яхши!

Оқсоқол буванинг гапи ҳали тугамаган экан.

– Биласизлар... – деди у чўғдан кўз узмай. – Шомуроднинг опасини танийсизлар. Шу муштипар хотиннинг умри боқий бўлсин. Кимсанжон эсон-омон келсин, яхши тўйлар қилиб, Думанинг руҳини шод этайлик.

Одамлар «Оми-и-н» деб гувиллади.

- Амманг яхшилар-а? деди Олимжон ака ҳамон елкасида кўтариб тураркан жилмайиб.
  - «Қора аммам»ми?

Олимжон акам кулиб юборди.

- Эртага-чи, келин келганда сочқи сочишади. Сенам тергин, хўпми?..
- ...Бу сафар Абдувалининг ойиси шўрва эмас, мохора пиширди. Эркаклардан кўра хотинлар кўпроқ йиғилди.

Абдували сочқи сочиладиган пайтни яхши биларкан. Кўчадан сурнай товуши келиши билан бақирди.

- Чоп!

Эшикка ёпирилган хотинлар орасидан «калла» қилиб ўтиб, ташқари чиқдим. Анча нарида, қоронғи кўчада арава келяпти. Абдувалига эргашиб, югуриб бордим. Қўқон арава устида беш-олти хотин ўтирибди. Нимқоронғида қўқон аравада ўтирган Олимжон акамни пайқаб ўша томонга чопмоқчи эдим, Абдували қўлимдан тортди.

- Унисигамас, аптакашкага осиламиз!

Нарироқда яна битта арава келаётган экан. Қўшалоқ отли «аптакашка». Бунисида хотинлар кўп. Болалар, қий-чув қилиб «апташка» орқасига осилдик. Отлар пишқирди, ғилдираклар тарақлаб, чанг-тўзон кўтарилди. Чилдирма кечагидан ҳам баландроқ бака-банглаб кетди. Сурнай чўзиб нағма қилди. Аравани тўлдириб ўтирган хотинлар ёрёр айтишди:

Тогда тойчоқ кишнайди, от бўлдим деб ёр-ёр. Уйда келин йиглайди, ёт бўлдим деб, ёр-ёр. Йиглама қиз, йиглама, тўй сеники, ёр-ёр. Остонаси тиллодан уй сеники, ёр-ёр.

Довлимизга яқин қолганда беш-олти хотин олдинда бораётган қўқон аравага пешвоз чиқди. Иккинчи арава ҳам тўхтади. Хотинлар бир нимани гаплашишди. Парча холанинг дўриллаган овози қулоғимга чалинди.

– Ҳо-о! Қудапошша! Гулдай қизимизнинг баҳоси шу бўлдими? Чўзинг-да мундоқ бели синмаганидан!

Чилдирма баттар авжига чиқди. Сурнай энтикиб-энтикиб нола қилди. Келинни аравадан туширишган заҳоти ҳамма ёқ дўпир-дўпир бўлиб кетди. Бир тўда хотин палакнинг тўрт бурчидан ушлаганча келиннинг боши устида тутиб ҳовлимиз томон юрди. Бири ингичка, бири йўгон овозда тағин ёрёр айтишди:

Дукур-дукур от келди-ю, от келди, Чиқиб қаранг ким келди-ё, ким келди? Салласи катта ёр келди-ё, ёр келди, Шоп мўйловли эр келди-ю, эр келди...

Хотинлар қийқириб кулди. Ўртароқда кетаётган Парча хола яна дўриллади. – Кошкийди-я, мангаям салласи котта эрдан ато қилса!

Келинлар тўдаси ёр-ёр айтганча эшикка яқинлашди. Қовлидаги фонусларнинг нури ғира-шира ёритиб турган эшик олдида «қора аммам»ни кўриб қолдим. Қўлида боғичи ечилган қийиқча. Бошидан рўмоли сирғалиб елкасига тушган. Негадир титрайди. Оппоқ сочлари учидаги сўлкавой чўлпиларининг жиринглаши чилдирма шовқини, сурнай овозида эшитилмаса ҳам бир-бирига урилиб кетаётганини сездим.

Бошига палак ёпинган келин яқин келиши билан аммам тўда устига сочқи сочди. Попукқандлар ерга тушиб сакраб кетди. Танга-чақалар жиринглади. Ўзимни ерга отдим. Маҳси кийган семизориқ оёқлар орасидан эмаклаб ўтиб, попукқандлар, тангаларга ёпишдим. Битта оқ танга ялтироқ амиркон маҳси-кавуш кийган хотиннинг оёги орасига кириб кетганини аниқ кўрдим. Аксига олиб ялтироқ кавуш тангани босди-ю, тўхтади-қолди. Алам устида оёгига туширмоқчи бўлиб турган эдим, юзимга алланима тегиб ғашимни келтирди. Бошимни кўтариб қарасам — соч. Икки ўрим узун соч юзимга тегиб турибди. Мунча узун! Худди Роби опамникига ўхшайди.

Сурнай шух-шух куй чалди. Исириқ ҳиди келди. Оёқлар орасида адашиб, димиқиб кетдим. Эмаклаб бир чеккага чиқиб олдим. Шимимнинг чангини қоқаётганимда ёнимга Абдували чопиб келди.

- Юрсанг-чи, тортишмачоқ кўрамиз!

Хотинлар келинни ўртага олганча бошига палак тутиб, уйга кириб кетишаётган экан. Иккаламиз тўдага қўшилиб айвонга чиқдик. Тиқилишиб уйга кирдик.

Уй ичи ёп-ёруг. Шифтга илинган ўттизинчи фонуснинг пилиги баландлатиб қўйилган, токчалар-

даги чойнак, пиёлалар, мис баркашлар ялтирайди. Тахмонда янги кўрпа-тўшаклар, бурчакда эскирок палак осиғлик...

Келинни ўраб келган хотинлар бир бурчакка ўтиб, пойлаб туришди. Ўша захоти уй ичи хотин-халажга тўлиб кетди.

– Қани, қудапошшалар! – Абдувалининг ойиси кураш тушадиган полвондек гердайиб ўртага чиқди. – Куёв томон билан беллашаман деганлар борми? – У каттакон чорси қийиқчанинг бир учидан тутиб силкитди. Беш-олти хотин Абдувалининг ойисидан кейин сафга тизилди. Худди поездга ўхшаб, бир-бирининг белидан қучоқлаб олишди.

Келин томондан кўкрак бурма кўйлак кийган гавдали хотин ўртага чикди. Абдувалининг ойиси тутиб турган қийиқчанинг нариги четидан ушлади.

- Биз-да, ўша беллашадиган!
- Манга беринг, ўзим эплийман! Парча холанинг дўриллаган овозидан токчадаги баркашлар зириллаб кетгандек бўлди. У лапанглаб келиб, кўкрак бурма кўйлакли хотиннинг қўлидаги қийиқчага талпинди. Сиз нари туравуринг!
- Вой, Парча ўлгур! Сенга бас келиб бўладими, ҳўкиздай кучинг бор! Абдувалининг ойиси қийиқчанинг бериги бурчагидан тортиб қўлтиги тагига тиқмоқчи эди, Парча хола, чит кўйлагининг енгини шимариб гурзидай билагини намойиш қилганча, қийиқчага чанг солди. Хотинлар қийчув қилиб сафга тизилишди.

Куёв тарафда Абдувалининг ойиси, яна бешта хотин. Келин тарафда Парча хола, Оқсоқол буванинг менга камзул тикиб берадиган келини Потима хола...

– Овора бўмайла! – Парча хола орқасида турган хотинларга елкаси оша қараб, хў-хў-лаб кулди, – ўзим боплийман ҳаммасини!

Рост айтган экан. Қийиқчанинг бурчагидан ушлаб сал тортган эди, Абдувалининг ойиси, унинг орқасида турган бешта хотин худди паровоз бир силтанганда тарақ-туруқ қилиб кетган поезддек баравар мункиб тушди. Чираниб ўзларини орқага ташлашди.

Айниқса, Абдувалининг ойисига жабр бўлди. Икки қўллаб қийиқчага ёпишганча, орқадаги хотинларга далда берди.

- Ҳа, эгачилар! Бўш келманглар!
- «Эгачилар» минг урингани билан қани нафи тегса? Парча хола қийиқчани бир қўллаб ушлаб турибди. Тортаётганиям йўқ. Қоп-қора, қалин лабини осилтириб нуқул илжаяди.
- Парча ўлгур! Абдувалининг ойиси астойдил ялинди. Ён берсанг-чи, куёв томон деган номимиз бор.

Парча хола дўриллаб кулди.

- Куёвни ўқи ўзганми? Биззи келинни нимаси кам куёвиздан?
- Юрсанг-чи! Абдували ойисининг терлаб кетганига раҳми келди шекилли, қаттиқ шивирлади. Биз ҳам куёв томон-ку!

Чопқиллаб бориб ҳа-ҳалашаётган «куёв томонга» ҳўшилдик. Парча хола ҳилт этмайди.

Охири Парча холанинг орқасида турган кўкрак бурма кўйлакли хотин бир нима деб қулоғига пичирлаган эди, Парча хола инсофга келди.

– Шунақами, ҳа, майли, – деди-да, қийиқчани сал бўшатди. Бизлар роса чираниб орқага тортаётган эканмиз, остин-устин тогора бўлиб наматга думалаб тушдик.

Ўша заҳоти хотинлар икки томонга тарқалиб, йўл очишди. Уй бурчагидаги эски палак лопиллади-да, дадам чиқиб келди. Юзлари қизарган, бо-

шидаги дўпписи қийшайиброқ қолган, оқ шойи куйлакда, оёгида хиром этик. У илжайган кўйи, оқсоқланмасликка ҳаракат қилиб, келин томон юрди. Яқин келиб, келиннинг бошидан паранжисини олди.

Вой, ўзимнинг Роби опам-ку! Боя «сочқи» тераётганимда юзимга теккан соч ростданам Роби опамники экан-да!

#### - Роби опа!

Нотаниш бир хотин қулоғимни оғритиб чимчилади.

#### - Жим!

Роби опам ярқ этиб менга қаради. Ўзгариб кетибди. Қошига ўсма тортилган. Кўзлари маъюс...

Хушимни тўплаб олгунимча дадам Роби опамни белидан қучоқлаб даст кўтарди. Роби опамнинг бошидаги гижим рўмол сиргалиб, елкасига тушди. Икки ўрим сочи тўлгониб кетди. Дадамнинг оқсоқланиши энди билинди. Хотинлардан бири тала-тўпда оёгини босди шекилли, дадам бир чай-қалдию, аммо йиқилмади. Роби опамни кўтарганча палак орқасига ўтиб гойиб бўлди.

Хотинлар уйнинг тўрт томонига тизилишиб ўтирди. Мохора келди. Абдували иккаламиз ҳовлига тушдик.

Хотинларнинг тўйида югур-югур, айниқса, кўп бўларкан. Ҳамма ўзи билан ўзи овора. Биров мохора ташийди. Биров «тўққиз-тўққиз»га қайси мевадан солиш кераклигини суриштиради. Тала-тўпда Абдувалини йўқотиб қўйдим. Балки қовурма чучварадан умид қилиб таванхонага киргандир? Мўралаб қарасам, у ердаям йўқ. Аксига олиб, «Қора аммам» ҳам кўринмайди.

Каловланиб қозон бошига бордим. Айвонга чиқдим. Уйқум келарди. Кечаям яхши ухламаган-

ман. Қайтиб, яна уйга кирдим. Хотинлар тўрт томонда тизилишиб ўтирар, ҳар ким ўзига теккан «тўққиз-тўққиз»ни тугиш билан овора эди. Бири севиниб илжаяди, бири «вой савил» деб лабини буради...

Кўкрак бурма кўйлакли хотин тугун боглашдан тўхтаб, атрофга чимирилиб қаради. Бирдан афти буришиб кетди. Бир қўли билан бурнини чимчилаб, иккинчи қўли билан ёнида ўтирган Парча холанинг гумбаздай елкасига мушт туширди.

– Э, отинг ўчсин, Парча! Ичингда ит ўлганми, нима бало?

Парча хола елкаларини силкитиб «хў-хў»лаб кулди.

- Мохора егандан кейин шунақа бўлади-де, опа!
- Э, мохора емай нафсингта куйдирги чиқсин! Бор, ҳовлига чиқ!

Уй ўртасида гарангсиб туриб қолдим. Шу пайт гўшанга ичидан дадамнинг йўталгани эшитилди. Ўша томонга чопдим.

- Дада!

Кўкрак бурма кўйлакли хотин Парча холани ҳам унутиб, мени қучоқлаб олди.

- Қаёққа, Музаффар? Уят бўлади, ўғлим!

Нега энди унинг ўғли бўларканман, мен дадамнинг ўғлиман! Қучоғидан чиқиш учун юлқиниб турганимда аллақаердан «Қора аммам» пайдо бўлди.

- Юр, жон болам, деди қулоғимга шивирлаб, чимилдиққа кириб бўлмайди, гиргиттон! Ўзинг яхши боласан-ку! Юр, қовоқ сомса бераман!
- Дадамминам ётаман! дедим қайсарлигим тутиб. Дадамни олдига бораман!
- ... Яна уч кун «Қора аммам»нинг ичидаги «одамчалар» чалаётган «ҳуштак»ни эшитиб ётишга мажбур бўлдим. Келинсалом, чаллар, бало-баттар... Уйимиздан одам аримайди. Дадам билан Роби

опам кундузи мени эркалашади-ю, кечаси олдига киргизишмайди.

Охири ҳамма ёқ тинчиб қолди. «Қора аммам» айвонда ўтириб тугунини йиғиштирди. Маҳсисини кийди. Роби опамнинг пешонасидан ўпди.

– Раҳмат, қизим! Юзимни ёруғ қилдинг, – деди овози титраб. – Қуша қаригин, узингдан купайгин, болам...

Кейин менинг пешонамдан ўпди.

– Мана, болам, Роби опанг кўчиб келди. Энди ҳечам кетмайди. Роби опангни яхши кўрасан-ку!

Аммамни эшиккача кузатиб борган Роби опам кузлари қизариб қайтиб келди...

Кечқурун Роби опам шавла қилди. Гармдорини эзиб-эзиб шавла еётган дадамга эркалик қилдим.

- Сиз билан ётаман!

Дадам Роби опамга бир қараб олди-да, елкамга қоқди.

- Хўп, ўғлим, мен сени ачом-ачом қилиб ётаман.
- Роби опам билан ётмайсиз, дедим ҳиҳиллаб.
   Роби опам кулди.
- Дадангни нима қиламан, Музаффар, албатта сен билан ётадилар-да!

Негадир дадамнинг қоши чимирилди. Қўлини эски сочиққа артди-да, чўнтагини кавлаб, газета, тамаки халта чиқарди.

- Емайсизми? деди Роби опам. Толиқиб кетгандирсиз.
  - Бўлдим! дадам тўнғиллаб папирос тутатди.

Бари бир айтганимни қилдим. Роби опам уйнинг ўртасига катта ўрин солди. Ҳатто тўшак устига чойшаб ҳам ёзди. Дадамни қучоқлаб олдиму таниш тамаки исини туйиб, елкасидаги чандиғини ўйнаганча ухлаб қолдим.

Эрталаб тамаки иси эмас, аллақандай атир хиди димогимга урилиб, уйгониб кетдим. Дадам-

нинг елкасини тимирскиласам, қўлимга соч илашди. Қарасам, ёнимда Роби опам ётибди. Мен унинг сочини чангаллапман.

– Дада! – алам билан ўрнимдан туриб чўккалаб олдим. Кечаси дадамни қучоқлаб ётганим эсимда бор. Энди бўлса дадам у чеккада, мен бу чеккада, ўртада Роби опам ётибди. Тағин менга тескари қараб олган...

Роби опам дарров ўрнидан турди. Шоша-пиша кийиниб, ташқарига чиқиб кетди. Дадам мени қучоғига олмоқчи эди, аразладим.

– Роби опам сизминан ётмасин! – дедим инжиқлик қилиб. – Мен билан ётасиз. Мен билан!

Дадам негадир хўрсинди.

– Ўғлим, Роби опангни Роби опа демагин, уят бўлади, – деди босиқлик билан. – Ҳамманинг ойиси бўлиши керак. Роби опанг – сенинг ойинг, билдингми? Яхши бола бўлиб юрмасанг, аразлаб кетиб қолади. Кейин нима қиламиз, ўғлим? Ойисиз туриш қийин. Яна мушук юмдалайди, дарахтдан йиқилиб қўлинг синади... Майлими?

Дадам чой ичиб чиқиб кетганидан кейин Роби опам дастурхонни йиғиштираркан, ғалати гап айтиб қолди.

 Энди сениям тўй қиламиз, чирманда чалинади, боламаст бўлади...

Дарров Абдувалининг «даданг хотин оляпти» дегани эсимга тушди. Бундан чиқди, яна дадамминам ётолмас эканман-да!

 Нима, менам хотин оламанми? – дедим ўшшайиб.

Роби опам шу қадар қаҳ-қаҳ уриб кулдики, сурма тортилган чиройли кўзларидан ёш чиқиб кетди.

– Жиннивой! – деди кулгидан энтикиб. – Сеники бошқача туй булади.

У бир нима эсига тушгандек тахмон томонга юрди.

– Шошма, Музаффар! Қани, бисотимизни кўрайликчи, сенинг тўйингга аталган нималар бор экан?

У, «хозир бир нарса кўрсатаман» дегандек кўзини қисиб қўйди-да, туя сандиқ устига тахланган кўрпачаларни тушира бошлади. Ҳар бир кўрпачани кигиз устига ташлаш учун эгилганда сочи елкасидан ошиб тушади, учи ерга тегиб кетади. Хинадан сарғайган бармоғини лабига босиб сирли жилмаяди: «Хозир кўрамиз».

Ниҳоят ўринни ағдариб бўлгач, чўккаллаб ўтириб, сандиқни очди. Қуриб сарғайиб кетган беш-олтита ёнғоқ баргини бир чеккага олиб қўйди. Кейин ҳар хил латта-путталар, бир жуфт калиш чиқди. Охири яп-янги амиркон этикчани сандиқдан олиб узатди.

- Мана! деди кўз-кўз қилиб. Қани, кийиб кўр-чи? Кигиз устига ўтириб, этикчани кийсам, лоп-лойиқ келди. Шунақа чиройлики! Қўнжида қизил ипак билан тикилган гулиям бор!
  - Юриб кўр-чи, оёгингни қисмаяптими?

Юмшоқ намат устида юриб кўрган эдим, этикчам бўғиқ ғирчиллади.

- Вой, Роби опа, ғарчиям бор экан! дедим севиниб.
- Шошма, ҳали унданам яхши нарсалар бор.
   Роби опам сандиқни титкилаб, беқасам тўнча чиқарди.
  - Буниям кий-чи.

Тўн ҳам лойиқ келди.

– Мана энди тўй боланинг ўзи бўлдинг! – Роби опам ўтирган жойида мени қучоқлади.

Мазахўрак бўлиб қолдим.

- Қаранг, яна қаранг! - дедим ялиниб.

- Ҳозир-да! Роби опам жилмайиб, тағин сандиққа қўл тиқди. Бурчагига гул солинган қизил қийиқча илашиб чиқди. Роби опам қийиқчани тиззасига ёйиб узоқ қараб қолди. Қийиқчани секин-секин силади. Аввал ранги ўчди. Кейин лаблари пирпирай бошлади. Қийиқчани юзига босди-ю, елкалари титраб-титраб, бирдан ўзини намат тўшалган ерга отди.
- Ночорман! деди ўкраб. Шўрим қурсин!
   Қаддини ростлаб, қийиқчани бағрига босганча яна мук тушди.
- Кечиринг мени! деди қийиқчани юзига босиб. Рози булинг!

Сурма аралаш кўз ёшидан қийиқча бир зумда қоп-қора бўлиб кетди. У қийиқчани лабига босганча бўгиқ овозда аянчли чинқирди.

– Бошимни қаёққа олиб кетай! – Икки қўлини қийиқча аралаш баланд кўтариб сочини чангаллади, – уруш қилмай, уйинг куйгурлар! Боланг ўлгурлар! – У илон чаққан одамдек бутун гавдаси билан бетоқат тўлғонар, сочи тўзғиб, кўзлари олайиб кетган эди.

Қўрқиб кетдим. Дадамнинг: «Яхши бола бўлмасанг, Роби опанг кетиб қолади», дегани эсимга тушди.

– Йиғламанг! – дедим қучоқлаб. – Роби опа, йиғламанг, ойи... Майли, дадамминам ётмайман, сизминан ётаман...

У ўтирган жойида мени бағрига босди. Кўз ёшидан жиққа ҳўл бўлиб кетган юзини юзимга босиб, ингради.

- Болажон! Шўргинам қурсин, болажо-о-он!

#### БЕШИНЧИ БОБ

### РОБИЯ ХИКОЯСИ

# 1. Уйда келин йиглайди, ўт бўлдим деб, ўр-ўр...

Одатда, ҳар қандай қиз ҳам ота-онасининг бағридан чиқиб кетаётганида йиғлайди. Лекин минг йиғлагани билан юрагининг туб-тубини ёритиб, илитиб турадиган нур бўлади. Янги ҳаёт, ҳали ўзи кўрмаган, аммо орзу қилган, бўйга етиши билан ғира-шира тасаввур қилиб юрган янги, сеҳрли олам келининг кўз ёшини ширин қилиб юборади... Меники унақа йиғи эмас...

Биз чиққан арава Нўғайқўргондан Кўтармага етгунча қоронғи тушди. Ойим ирим қилиб аравани Алвасти кўприкдан юргизмади. Идора томондан айланиб келдик. Арава ичига қалин қилиб тўшалган кўрпачада паранжи ёпиниб ўтирибман. Бир томонда ойим, бир томонимда Фотима келин. Хотинлар тўхтовсиз ёр- ёр айтади:

Тоғда тойчоқ кишнайди, от бўлдим, деб ёр-ёр, Уйда келин йиглайди, ёт бўлдим деб, ёр-ёр...

Арава пештахасига ўтириб олган Олимжон бақириб-чақириб отни ниқтайди. Дам ўтмай, «дррр» деб тўхтатади. Арқон тортиб йўлни кесиб чиққан йигит-яланглар шовқин солади.

- Кўрманани ташлаб кетмайсизми, хола?!
   Ойим ҳарсиллаб нафас олганча қоронғида тугунчани титкилайди.
- Кўрмана сендан айлансин, болам! деб бирига чорси, бирига одми дўппи улашади. Арава ғий-

қиллаб яна йўлга тушади. Орқада келаётган «аптакашка» даги хотинлар авжига чиқади:

Осмонда юлдуз кўрдим: Олтин қозиқ, ёр-ёр. Тушаётган келиннинг кўнгли нозик, ёр-ёр.

Икки букилиб ўтирган кўйи унсиз йиглайман. Ойим елкамдан қучоқлаб нафаси гижиллаганча қулогимга шивирлайди.

– Ақалли шу бугун чиройингни очиб ўтиргин, жон болам. Куйдирмагин мени...

Арава бурчагида супадек жойни эгаллаб ўтирган Парча опа дўриллайди.

– Қуйвуринг, хола! Суйинганидан йиглавотти. Қали гушангага кирганида курасиз, ҳиринглаб безор қилади. – У уз гапи узига нашъа қилиб, ҳе-ҳе-лаб кулади. – Мангаям эр топсайиз-чи, хола!

Қулоғимда нуқул бир хил оханг жаранглайди.

«Уйда келин йиглайди, ёт бўлдим деб, ёр-ёр...»

Чиндан ҳам ёт бўлдим! Кимсан акамга, орзу-умидларимга, ўзимга! Қизиқ, ўзимга ўзим ётман энди... Аравада чайқалиб-чайқалиб овоз чиқармай йиғлаб боряпману хаёлимга ғалати ўйлар келади. Шу хонадонга— Кимсан акамларнинг уйига келган кунларимиз, ошхонага кирсам, бир товоқ шакар турибди. Қаҳатчилик йиллари эмасмиди, кўриб ўзимни тутиб туролмадим. Кафтимга сиққанча олиб, оғзимга солдиму аламимдан йиғлаб юбордим. Шакар деб ўйлаганим — туз экан. Унда-ку, бола эдим: туз билан шакарни ажратолмасдим. Энди-чи! Ҳовучимни тўлатиб туз ейишим керак-да, шакар шимган одамдек илжайиб туришим керак. Нега? Нима учун?! Инсон боласига бундан ортиқ жазо борми?

...Хотинлар тортишмачоқ қилаётганда, Музаффарга кўзим тушиб қолди. Уям мени кўриб, «Роби

опа!» деб бақириб юборди. Карахт бўлиб турган одам бир сесканиб тушдим. Шу бола энди менинг ўғлим. Алла айтмасдан, бешик тебратмасдан туриб беш яшар болага она бўлиб қолдим. Ажаб, Музаффарнинг овозида ҳам ҳайрат, ҳам қувонч бор эди. Нимага шунаҳа бўлганини билмайман. Лекин кўнглимда аввал ўзим сезмаган меҳрми, илиҳликми уйғонди.

... Хозир ҳам шу болани севинтирмоқчи эдим. Ойим Музаффарга қилган сарполарни кўрсатиб, боланинг қувонишини томоша қилсам, ўзимнинг хам кўнглим ёришармикин, дегандим... Қаёқдан билай! Қўлимга қийиқча илашиб чиқишини туш кўрибманми? Ахир бу- Кимсан акамга атаб тиккан гулларим-ку! Ахир бу қийиқчалар Шомурод акага эмас, Кимсан акамга насиб қилиши керак эди-ку! Ўша куни қиёмат-қойим бўлиб кетган вокзалда хайрлаша туриб, «кутасан-а, менга қийиқча тикиб қўясан-а», деган эди-ку! Кимсан акамга берган ваъдамни нахот унутсам! Ана ўша қийиқчалар! Ярим сандиқ! Хаммасининг четига «К», «R», деган ҳарф босилган, Атиргулнинг расми солинган. Фақат бу гулларнинг эгаси йўқ энди. Эгаси бошқа...

## 2. Суймаганга суйкалма!

Бўйи етган қизнинг орзуси осмондаги юлдузга ўхшайди. Узоқдан ярақлаб кўринади-ю, на етасан, на тутасан. Юлдуз эса олисда сирли-сирли милтираб тураверади. Талпинасан, ҳеч кимга билдирмай хаёл сурасан. Юлдузинг ёнингга тушишини орзиқиб кутасан. Ким билсин, «юлдузи юлдузига тўгри кепти», деган гап балки шундан чиққандир. Менинг юлдузим – Кимсан акам эди. У олдимга

келди. Кафтимга қўнди. Рашид абзининг мўрчасидан Фотима-Зухра келин билан қайтаётганимизда, Кимсан акам Очил акани урмоқчи бўлганида, Шомурод тоғамнинг (энди менинг эрим бўлиб қолган Шомурод аканинг) никох тўйи куни иккаламиз Тошкентга томошага борганимизда... юлдузим ёнимда эди. Қўлимдан юлиб олишди. Тўсатдан, ҳеч кимдан сўрамасдан...

... Уруш бошланганига анча бўлиб қолганига қарамай турмуш унча ўзгармаган эди. Фақат туз билан совун камайиб қолди. Нонни карточка билан оладиган қилиб қўйишди. Почтахонага чиқсам, нон дўкони олдида турнақатор навбат кутиб турган одамларни кўриб юрагим эзилади...

Урушгача мўрчасидан бўлак ҳеч вақоси билан танилмаган Рашид абзи тўсатдан энг машҳур одамга айланиб қолди. Ёгоч оёгини дикиллатиб келаётган абзини одамлар орзиқиб кутадиган, узоқдан кўриниши билан олдига чопиб борадиган бўлишди. Кун ора ё ойим, ё мен абзининг келишига сабр қилмай, почтахонага югурамиз.

Далада иш кўпайиб кетди. Буғдойни ўриб бўлдигу кетидан карам узишга тушдик. Бобом билан Оқсоқол тонг қоронғисида эшак аравага ўтириб жўнаб қолишади. Фотима-Зуҳра келинларга қўшилиб, мен ҳам далага чопаман. Фотима келин тушликкача амаллаб чидайди, бироқ кун оғиши билан бетоқат бўла бошлайди.

- Кўкрагим ёрилиб кетай деяпти, Зўра! Болам йиглаяпти, Тохирим оч колди.
- Э, жиннимисан! Зуҳра келин опасини юпатади. Жа ваҳманинг уясисан-да! Ойим борлар-ку!

Фотима келин йиғламоқдан бери бўлиб ҳасрат қилади.

– Шунақаям ота бўладими, Робияхон! Икки ўглини ўз қўли билан урушга жўнатиб келса-я!

Фотима келин нолиганича бор. Кимсан акамни кузатганимиздан кейин икки ҳафта ўтмай Холпош хола ойимнинг олдига йиглаб чиқиб қолди.

– Ўргилай, овсинжон! Чолим ўлгур ёмон иш қилди. Шокирим билан Зокирим урушга кетамиз, деган экан, ҳовлиқма деб йўлга солиш ўрнига ўзи етаклаб военкоматга оборибди. Ҳеч кимга айтмай жўнатиб келди. Болаларим билан рози-ризолик ҳам тилашолмай қолдим, овсинжон!

Ойим уни юпатишга уринди.

- Нафасингизни иссиқ қилинг, айланай. Юртга келган тўй. Мана, Кимсаним ҳам кетди-ку! Ўтирибман Яратганга топшириб...
- Сизники иззат-икром билан кетди. Бир кун бўлсаям дийдорига тўйиб қолдингиз. Менинг чолим ақалли хайрлашганиям қўймади! «Ўв қувдими, мунча ҳовлиқдингиз», десам, «мен белида белбоғи бор ўғил ўстирганман!» деб керилади.
- ... Чамаси, Фотима келин ҳам эрининг тўсатдан урушга жўнаганига чидолмайди. Зуҳра келин опасини юпатади.
- Ношукурчилик қилма, Поти. Хат келди-ку! Иккалови соғ-саломат экан. Танк ҳайдашни ўрганяпмиз, деб ёзибди-ку!
- Сенга нима? Фотима келин синглисига адоват билан ўкраяди. Икки орада менга жабр бўлди...

Сезаман. Фотима келин, «сени орқа этагингда оғирлигинг йўқ, бола туғиб азобини тортмагансан, меники иккита...» демоқчи бўлади. Зуҳра келин ҳам опасининг таънасини тушунади. Юпқа лаблари титраб нари кетади. Бари бир Зуҳра келин рост айтяпти. Булар ношукурчилик қилмаса бўлади. Шокир ака билан Зокир ака бир жойга тушибди. Жони соғ экан. Кимсан акамдан бўлса на хат бор, на хабар.

Ўша куни ҳам одатдагидек ярим кечада уйга ҳайтдим. Молхонада сигир мўърар, хира чироҳ липиллаб турган ошхонада ивирсиб юрган ойимнинг ҳораси кўзга чалинарди.

Довлига кирганимни қандайдир ички сезги билан ҳис қилди. Еттинчи лампани кўтариб зипиллаб айвонга чиқди. Қўлида тутиб келаётган чироқ ёғдусида юзи мамнун ёришиб кетганини, нуқул кулимсираётганини кўрдиму чопиб олдига бордим.

- Келдими? дедим юрагим ўйнаб.
- Суюнчи берсанг айтаман! Ойим лампани хонтахтага қўйди-да, «суюнчи»ни ҳам унутиб, токча олдига борди. Учбурчак хатни қўлимга тутқазди. Абзи обкелди. Умридан барака топсин! Ўқи, қизим, овозингни чиқариб ўқи!

Хатни юлқиб олдим. Қўлларим титрар, қаламда ёзилган сўзлар чироқ шуъласида сакраб-сакраб кетаётганга ўхшар эди.

«Ушбу мактубим тезда етиб маълум бўлсинким, гўзал Тошкентнинг Нўгайқўргон қишлогида ўйнаб-кулиб юрган дадамга, ойимга, Робияга («Робияга» деган сўзнинг тагига чизиб қўйилганини кўриб юрагим гупиллаб кетди), Кимсанингиздан согинчли салом. Мен сог-саломатман. Чимкент яқинида машқ қиляпмиз. Қачон фронтга кетишимиз маълум эмас. Яна хат ёзаман...»

- Бўлдими? деди ойим кўзимга қараб.
- Шу...
- Тўгри... Ойим бош силкиб тасдиқлади. Абзи ўқиганидаям шунақа эди. Адреси бор эканми?

Хатнинг орқасига қарасам, «Полевая почта» деб номерини ёзибди.

– Хат ёз, дарров ёз! – Ойим типирчилаб қолди. – Шошма, олдин қорнингни тўйғазиб ол... Шукур, болагинамнинг жони сог экан.

...Чироқни уйга олиб кириб, энди хат ёзишга ўтирган эдим, молхонада тағин сигир мўъради. Ўша томондан ойимнинг куюнчалик билан жаврагани эшитилди.

– Сутини тортиб қўйди. Куюкканга ўхшайди жонивор! Бобонг тушмагур ҳам думини тутқазмайди. Далада ётиб қолишга бало борми?.. Бу ёқда ўзимнинг мазам йўқ. Икки оёғимнинг қақшаб оғриганига чидолмайман. Комил табибдан бўрсиқ ёги олиб сурсаммикин...

Қизиқ, шу пайтгача ойимнинг оёғи ҳеч оғримагандику... Комил табибнинг номини эшитишим билан кўзойнагини ялтиратиб қоронғида қўлимга хат тутқазган Очилбой хаёлимга келди. Бутун Нўғайкўргон ҳувиллаб қолди-ю, бу олифта юрибди кўзойнагини тақиб. Ҳеч бўлмаса далага чиқса ўладими? Жимитдек укаси Олимжон эртадан кечгача тиним билмайди. Катталар билан баравар ишлайди...

Зум ўтмай эшикдан ойим мўралади.

– Ёзяпсанми?! Ўзгин, урушга кирмаганингиз яхши бўпти дегин. Хаммамиз дуойи-жонингизни қилиб юрибмиз, сиз машқ қилиб бўлгунча уруш ҳам битиб қолармиш дегин. Ҳали тоғамни чақиришгани йўқ. Зоҳид қора ўғлини уйлантирди, келин шаҳарлик экан, Чақичмон маҳалласидан экан, деб ёзгин, хўпми? Битта қўчқорни боқиб ётибмиз, сиз келишингизга оёгингизнинг тагига сўймоқчимиз, дейиш эсингдан чиқмасин.

Ойим бидир-бидир қилиб, ҳамма гапни бир йўла айтди-да, яна ҳовлига тушиб кетди.

«Ушбу хатим…» деб энди ёза бошлаган эдим кўча томондан эшак ҳангради. Бобомнинг «ишш» деган овози келди. Ойим молхонада туриб бақирди.

– Суюнчи беринг, дадаси, хат келди! Умригинасидан барака топкур абзи ўз қўли билан обкеб берди.

– Ие, қани, Роби, ўқи! – деди бобом қоронғи айвонга туртиниб чиқаркан.

Хатим яна чала қолди.

Бир қўлимда чироқ, бир қўлимда учбурчак хатни кўтариб, айвонга чиқишга мажбур бўлдим. Кимсан акамнинг хатини ўқиб бўлгунимча бобом дастурхондаги овқатга қўл урмади. Ҳаммасини эшитганидан кейин рўпарамда ўтирган ойимга юзланди.

- Айтмовдимми! Аввал ўқитади. Пашистни ер тишлатиш йўлини ўргатади. Кимсан қаёққа ташласа, олчиси билан тушадиган бола! Кўрасан. Бир ой-икки ой ўтсин, «Кимсан Ҳусанов гирой бўлди», деган хабар келади. Бугун Закунчи айтди: доброволлар тез гирой бўларкан.
- Гирой бўлмасаям гўрга! Тезроқ келса бўлгани,- деди ойим орзумандлик билан.

Бобом: «Э, сен нимани тушунардинг», дегандек қул силтади. Шошилмай шурва ичаркан, менга қаради.

– Чироқ керакмас! Обкириб хатингни ёзавур. Қайтиб уйга кирдим. Бобомнинг: «Яратган неъматингга шукр», деб кекиргани эшитилди.

– Эртадан Кўтармага борамиз. Сабзи кавлаймиз.

Кейин ойим икковлари негадир овозини пасайтириб, пичир-пичир қила бошлади. Аввалига хат ёзиш билан андармон бўлиб, парво қилмадиму, бобомнинг: «Ҳовлиқма, пакана, бу умр савдоси», дегани қулоғимга чалиниб, сергак тортдим.

- Нима қипти, гулдай йигит. Бу ойимнинг овози эди. Улар ҳам тўй кўриб қолсак, дейди-да! Унча-мунча одаммас, маълим бўлади-я!
- Бари бир хотинсан-да! Бобом жаҳли чиқиб кетди шекилли, овозини баралла қуйиб, чийиллади. Хотин кишининг сочи узун, ақли қисқа була-

ди. Сени бўйинг ҳам, сочинг ҳам, ақлинг ҳам калта! Хўш, маълим бўлса нима қипти! Шохи борми? Қизингни олдидан ўтдингми?

Ойим овозини пасайтириб бир нима деди. Тўсатдан кўнглимга ғулғула тушди. Хатни чала ташлаб, чироқ кўтарганча айвонга чиқдим.

– Вой, ёзиб бўлдингми? – деди ойим хижолатомуз жилмайиб. – Барака топ, қизим битта чой дамлаб кел.

Чироқни хонтахтага қўйиб, ошхонага кетдим. Совиб қолган самоварга тараша ташлаб қайнатгунимча анча вақт ўтди. Чойнак кўтариб келсам, чол-кампир ҳалиям бир ниманинг маслаҳатини ҳилишяпти.

– Баракалла, қизим! – деди бобом узатган пиёламни олиб. – Илоё бахтинг очилсин!

Икковлари бир-бирига зимдан қараб олишди. Ташқарида эшак ҳангради, молхонада сигир мўъради...

Ойим бемаврид илжайди.

– Бобожониси анави... табибнинг ўғли бор-ку, ҳаҳ оти нимайди-я? Очилбой! Онаси бечора денг, эшигимизнинг турмини бузяпти. Олти марта тугун кўтариб келса-я! Қизим ҳали ёш, тўйга тайёргарлигимиз йўқ, десам қўймайди. Замон ҳалҳиб турибди, тўй кўриб ҳолганимиз ғанимат, дейди.

Ойимнинг оғзига қараб анграйиб қолдим.

– Нимага тайёргарлигимиз бўлмас экан. Биттаю битта қизимиздан, молимиз эмас, жонимизниям аямаймиз. Тақдир қўшган бўлса. – Бобом кўз қири билан менга қаради. – Албатта, Кимсан акаси бўлганда-ку, тўйга ўзи бош бўларди-я!

Кимсан акамнинг номини эшитишим билан сесканиб тушдим. Сакраб ўрнимдан турдим. Чойнак хонтахтага ағанаб, оёғимга тўкилди. Тиззам жазиллаб ачишди. Ўқдек учиб, қоронғи уйга кирдиму ўзимни ерга отдим. Ўша заҳоти бошимда ойим пайдо бўлди.

 Вой ўлмасам! Вой шўрим, – деди титраб. – Ёмон куйдингми? Қани, кўрсат!

Наматни муштлаганча чинқириб юбордим.

- Керакмас! Керакмас! Кетинг.

Ойим юзларимни силаб, бошимни тиззасига олди.

- Ёмон куйдими? Қаёқда турган экан бу палакат!
- Керакмас, дедим яна. Бошимга ураманми? Ойим эсанкираб қолди.
- Унақа дема, қизим, деди ёлвориб. Нима қилай, болам! Қиз маъни борки бир кунмас бир кун бошига шу савдо тушади-да! Онанг бўлганимдан кейин бахтингни ўйлайман-да, жон болам.

Охирги гапи ҳукмномадек эшитилдию юлқиниб қучоғидан чиқдим.

- Боққанингизни таъна қиляпсизми? дедим чақчайиб. Бўпти, кетаман! Кетаман, уйингиздан! Ойим ҳайрон бўлгандек кўзимга узоқ термилиб қолди. Қоронғида чуқур хўрсинди.
- Болам, деди бош чайқаб. Бу дунёга келиб топган бахтим Кимсан билан сен-ку! Менам тў-йингни кўрсам дейман...

Тағин гапиради-я! Кафтларим билан юзимни тўсиб олдим.

– Қочинг! – дедим чинқириб. – Кўргани кўзим йўқ, ўшани!

Эшикдан бобомнинг асабий товуши келди.

Падарингта минг лаънат сендақа паканани!
 Нима қиласан болани қийнаб!

Ойим мени қайтадан қучоқлади.

– Вой, ман оёқ-қўлидан боғлаётганим йўқ-ку, бобоси!

- Э, ўл! Бобом яна ўшқирди. Отанг Орифхўжабойнинг ўглига унашаман деганида ўламан саттор тегмайман деб йиглаганинг эсингдан чиқдими? Томорқанинг туйнугидан эмаклаб чиқиб бўйнимга осилиб ялинган ким эди?
- Вой ўлай, мен нима қилдим? деди ойим йигламсираб. Йўқ десанг сатқаи сар!
- Комилни жавобини бериб юбор! Бобом «гап шу» дегандек кескин бурилиб, эшикдан нари кетди.

...Анчадан кейин ҳамма ёқ тинчиб қолди. Фақат молхонада сигир мўърайди. Хонтахтада турган чироқ атрофида парвона унсиз чарх уради. Дераза олдига келдим. Осмонда кемтик ой муаллақ осилиб турар, хира нур сочар эди. Билмайман, негадир шу топда Кимсан акам ҳам яримта ойга термилиб, мени ўйлаёттандек бўлиб кетди. Худди ой синиқ тошойнаю бир томонда у, бир томонда мен кўзгуга қараб бир-биримизга термилиб турибмиз.

Кимсан акам нимага унақа қилди? Нимага ойимга айтмади? Робияга кўнглим бор деса шунча гап-суз йўқ эди... Қайтага ойимниям хафа қилиб қўйдим...

Ўзаман, ҳаммасини ёзаман! Очил ака совчи юборганиниям, бобом ойимни сўкиб берганиниям...

# 3. «Яхши кўриш - айб эмас!»

Куз эрта тушди. Картошка кавлаш ёмгирга қолиб кетди. Эҳтимол куз ҳам, ёгингарчилик ҳам вақтида бошлангандиру колхозда эркак зоти қолмагани учун ўзимиз ишни чўзиб юборгандирмиз.

Уч кундан бери тинимсиз ёмгир ёгади. Дала ботқоққа айланиб кетган. Пайкалга кирсангиз, этикка лой чиппа ёпишиб, оёгингиз билан қушиб суғуриб оламан, дейди. Бобом ишнинг кузини би-

лади. Худди сариёг кесгандек, кетмонни авайлаб ташлайди. Биттаям картошкага шикаст етказмайди. Картошкани кавлаш бир хисса азоб бўлса, териш ўн чандон азоб. Палакни тортсангиз картошка билан қўшилиб бир ботмон лой чиқади. Хайрият, хосил мўл. Аммо лойдан картошкани ажратиб олгунча қўлингиз акашак бўлиб қолади. Пахталик ёқасидан ёмгир ичингизга сизиб тушиб, гашингизни келтиради. Терлаб кетасиз. Пахталикни ечсангиз – совук, кийсангиз – иссик...

Кечга яқин пайкал бошида Умар закунчининг жийрони кўринди. Одамлар дарров ерга эгилди. Бурнидан буғ чиқиб турган от шўлт-шўлт лой босиб, яқин келди. Жийрон, этагига гард юқтирмасликка уринган таннозлардек нуқул думини гажак қилади. Аксига олиб ҳар қадам босганида думига лой сачрайди. Закунчи эрталабдан бери чоптириб юрган шекилли, жийроннинг човлари оппоқ кўпириб кетган. Аввалгидек гижингламайди. Закунчининг ўзи ҳам бурнидан тортса йиқилгудек алпозда, кўзлари киртайган. Бошидаги чақмоқ телпак ҳўл бўлиб, мушукнинг терисига ўхшаб қолган...

– Ҳорманглар-ов! – деди у отнинг жиловини тортиб. От оғзи купириб, пишқирди. Лойга ботган оёқларини ҳорғин депсиди.

Хотин-халаж чекка-чеккадан «саломат» деб ишини давом эттираверди.

– Бўш келманглар, азаматлар! Кўриб турасизлар, бизнинг картошка душман устига снаряд бўлиб ёгилади. – Умар закунчи от жиловини силтаб, бобом томонга юрди. Жийроннинг ҳам, ўзининг ҳам шашти аввалгидай баланд эмас. Шу бечорагаям ҳийин. Хотини бўлмаса, бола-чаҳаси бўлмаса... Тўгри, авваллари мен ҳам Закунчини ёмон кўрардим. Одам ўзи ҳўрҳҳан кишисини ҳеч ҳачон яхши

кўролмайди. Қўрқдингми – ишонмайсан. Ишонмадингми, ёмон кўрасан.

Уруш бошланганидан бери Умар закунчи ўзгариб қолган. Тўгри, ҳалиям тонг бўзармасдан эшикни қамчи дастаси билан тақиллатиб келади. Аммо энди «...наҳс босиб ётибсан» демайди. «Ўртоқлар, уруш кетяпти ахир», деб тушунтиради. Қизиқ, битта гапни икки хил қилиб айтса, таъсири икки хил бўларкан. Ҳозир одамлар Закунчига анча кўникиб қолишди. Бўлмаса раис зуғум ўтказиб юрган кезлари не-не гийбатлар тарқамаган эди. «Закунчи терговчи экан, пора олиб қамалай деб турганида қишлоққа қочиб кепти», «Хотини қиз чиқмагани учун аламидан Қўқондаги ҳовли-жойини ташлаб келган экан».

Йўқ! Ориф оқсоқолнинг гапи тўгри чиқди. Закунчи ишнинг кўзини биларкан. Кейинги уч-тўрт ой ичида жуда ўзгариб кетди: одамларга анча мехрибон бўлиб қолди.

Хозир ҳам ҳеч кимга дағдаға қилмади. Бобомнинг олдига бориб жийрондан сакраб тушди. Хиром этиги лойга ботиб кетди.

- Ҳорманг, Ҳусан ака! деди қамчи тасмасини билагига илиб, бобом билан қушқуллаб куришаркан. Куз-қулоқ булиб туринг. Данакдек картошкани липпасига қистирган одамни трибуналга бераман.
- Хотиржам бўлинг! Бобом лой ёпишавериб сирпанчиқ бўлиб қолган кетмон дастасини қайтадан чангаллади. Одамларимиз унақа диёнатсиз эмас.
- Сиз шунақа дейсиз-да! Умар закунчи шимининг чўнтагидан ялтироқ қути чиқарди. Қулоғини чимириб ҳадеб лой тепаётган отнинг жиловидан бир қўллаб тутганча, амаллаб гугурт чизди. Ди-

ёнат нима қилади ҳозирги одамларда! Олтинчи бригадада бир хотин ярим қоп шолғом ўмариб кетаётганида ушлаб олдим. Нега ўгирладинг, десам сигирим оч, дейди. Фронтда йигитларимиз жон олиб, жон бериб ётибдию бу қанжиқ сигирини ўйлаб жони халак! – У жаҳл билан жийронга минди. – Эҳтиёт бўлинг.

Лойдан оғирлашиб кетган пақирдаги картошкани сават замбилга ағдардим. Замбил ёнида Олимжон дийдираб турибди. Эрталабдан буён лой чангаллаб музлаб кетди, бечора. Нуқул икки қўлини чопонининг қўлтигига тиқиб, лойини артган бўлади. «Куҳ-куҳлаб» кафтини иситади. Бошидаги чамандагул дўпписидан юзига кир бўёқ сизиб тушяпти.

Нари борса, энди ўн ёшга чиққан бу боланинг чайирлигига ҳайрон қоламан. Катталар билан баравар ишлайди. Картошка теради. Зилдек замбилни чираниб кўтариб аравага ташийди. Иккита аравамиз бор. Биттаси колхознинг ризвон араваси, биттаси бобомнинг эшак араваси. Бири юк ортиб омборга кетса, иккинчиси келиб туради.

- Совуқ едингми, Олимжон? дедим ачиниб. Майли, ҳеч нима қилмайди.
- Совуқмас, опа! Олимжон лой юқи кафти билан ёмгирдан ҳўл бўлган юзини артиб яқин келди. Олдик!– деди қиз боланикига ўхшаган ингичка овозда. Лекин ўша заҳоти қувонч билан қичқириб юборди: Ака!

Замбилнинг орқа бандини шошилиб кўтарган эканман, беш-олтита картошка ерга тўкилди. Жаҳл билан қаддимни ростлаб қарасам, Олимжоннинг ёнида Очил ака турибди. Бошида айвони кенг шапка, эгнида плаш. Оёгида брезент туфли. Лой кечиб келгани учун туфлисининг рангини ажратиб бўлмайди. Лекин қачондир оқ бўлгани кўриниб турибди. Тринка шими тиззасигача лойга ботиб кетган.

- Хорманглар! У бу гапни хушчақчақлик билан айтгиси келдию овози қандайдир ясама, ишончсиз чиқди. Ёмғирдан намланган кўзойнагини ечиб, плашининг ёқасига артди. Қулоғига илган эди, кўзойнаги ҳўл бўлиб баттар хиралашди шекилли, шоша-пиша яна ечдида, плашининг астарига арта бошлади. Митти кўзларини пирпиратиб илжайди.
  - Чарчамаяпсизми?
- Раҳмат, сиз сўрагандан бери! дедим энсам қотиб. Лойга тўкилган картошкаларни қўшқўллаб замбилга ташладим. Кўтар, Олимжон!

Очил ховликканча кўзойнагини такди.

– Йўқ, – деди бош чайқаб. – Менам қарашгани келдим, Робияхон, хўп денг, кўтаришай!

Олимжон қутулганига шукр қилгандек илжайиб турар, кўзларида, «кўриб қўйинг, опа, бизнинг акамиз шунақа», деганга ўхшаш ифода бор эди. Совчи юбориб менга шунча азоб берганининг алами халиям кўнглимда турган экан. Жахлим чиқиб кетди.

Мен Кимсан акамнинг хатини кутиб, кечалари тиканакка ағанаб чиқай-да, бу киши совчи юборсин?! Эркакман деганларнинг ҳаммаси урушда юрсин-да, бу киши туй қилгилари келсин!

– Нима? – дедим кафтимни қулоғимга тутиб. –
 Кечирасиз, бир нима дедингизми?

У баттар хижолат чекиб илжайди. Ёмгирда кўзойнаги хира йилтираб кетди.

- Қарашғани келдим, деди юпқа лаби титраб.
- Йўг-е! Биз бечораларга ёрдам бермоқчи бўпсизда. Шошманг, хозир...

Шундай деганча эски пақирни кўтариб, пуштага қараб чопдим. Қўлларим музлаб қолганига парво қилмадим. Челак тўлиши билан олиб келиб замбилга тўкдим. Ўша захоти яна пуштага югурдим. Олимжон ҳайрон. Нуқул чопонининг енгига бурнини артади. Акаси бўлса томошахонага кириб қолган одамдек анқайиб турибди. Замбил тўлиб кетди. Охирги пақирдаги картошка хирмондек уюлиб кетган замбилга сиғмай тошиб тушди. Тўкилган картошкаларни битта-битталаб замбилга жойладим-да, орқа томондаги тутқични ушлаб буюрдим.

## - Қани, олдик!

Забилни кўтаришим билан кўз олдим жимирлашиб кетди. Белим қирс этди.

Бутун кучимни тўплаб, овозим борича ҳайқирдим.

#### - Кетдик!

Аравагача бир юз ўттиз қадам! Аниқ биламан. Нариги пуштадан бир юз ўн қадам эди. У пушта билан бунисининг ораси йигирма қадам бўлса, бундан чиқди, бир юз ўттиз қадам! Бу – Олимжоннинг қадами билан. Қозир тезроқ юрсак юз қадамда етамиз! Э, Худо, шарманда қилма! Ўзинг қувват бер! Кимсан акамнинг этиги катта, тўпиқларимни уриб, яра қилиб юборган. Майли, чидайман! Фақат йиқилиб тушмасам бўлдим! Қўлларим узилиб кетай деяпти. Нима қилдим, замбилга олти пуд юк ортдим шекилли? Зарилмиди. Майли! Ажаб қилдим. Мен чидайман, ўлсам ҳам чидайман. Уям чидасин! Жонидан суйган одами қон кечиб юрган қизга совчи юбориш қанақа бўлишини билиб қўйсин.

Ўзимга қойилман! Очил ака гандираклаган сайин кучимга куч қушиляпти. Куриб турибман. Айвони кенг шапкасининг орқасидан сув сизиб гарданидан оқиб тушяпти. Ана, чиллакдек қуллари

қалтирай бошлади. Плашининг елкалари жиққа ҳўл бўлиб кетди. Оёқлари чалишиб кетяпти!

Бир маҳал у тўхтаб қолди. Ўзим оёқда зўрға турибману зарда билан замбилни итардим.

- Қани?! Ҳа!

У елкаси оша орқага ўгирилиб қаради, хижолатли жилмайди.

- Туфлим... - деди секин. - Тушиб қолди.

Қарасам, ростдан ҳам чап оёғида туфли йўқ, пайпоги лойга ботиб боряпти.

– Этигингиз йўқмиди? – дедим юк залворидан чираниб. – Майли, янаги сафар этик кийиб келасиз.

Олимжон лойга ботиб қолган бир пой туфлини кўтариб, замбил ёнига келган эди, Очил ака жеркиб берди:

- Бор, ишингни қил!

Ниҳоят, ёмғирда мудраб турган ҳўкизлар, ярмигача картошка билан тўлган аравага етдик.

Замбилни ерга қўйишимиз билан енгил тортиб, қаддимни ростладим. Шунда ҳам бўш келишни хоҳламасдим.

- Ағдармайсизми, замбилни?... Ергамас, аравага!
- Ҳозир! У замбил тўла картошка устига таппа ўтириб қолди! Ҳансираб нафас олди. Рангида ранг қолмаган, огзини балиқдек каппа-каппа очар, гунох иш қилиб қўйиб, дакки эшитишдан чўчиган боладек аянчли илжаяр эди. Олимжон келтириб берган бир пой туфлини у қўлидан бу қўлига олганча мен томон бурилди.
- Робияхон, деди ҳансираб, совчиларни ҳайтарибсиз?..
- Нима? ҳеч балога тушунмагандек қараб турдимда, хохолаб кулдим. Э, совчими? Кимсан акам нима деганди сизга? Эсингиздами? Баҳорда.. хат берганингизда.

- Робияхон... У кўзойнаги ортидан кўзимга илтижоли мўлтираб қараган эди, бақириб бердим:
  - Э, туринг-э! Картишкани одамлар ейди!

У сапчиб ўрнидан турди. Шу билан тоза бўлиб қоладигандек, замбилдаги картошкаларни силаб қўйди.

- Кечирасиз, Робияхон, деди. Кўзойнагини чўнтагига солди. Ёмгир тагида шумшайиб турганича, шапкасини ечди. Бошидан буг кўтариларди. Киприкларини пирпиратганича, митти кўзларини юзимга тикди.
- Робия, деди секин, мени кечиринг. Менам маълимга ўхшаб адабиётчи бўлмоқчи эдим. Мен... маълимни яхши кўрардим... Бизниям ўкитганлар...

«Қанақа маълим? Кимни айтяпти? Ҳа-а! Дадам!» Юрагим бир қалқиб тушди. Дадам! Қаёқда экан ҳозир?! Балки жангга киргандир? Қанийди, шунақа бўлса!..

Қанийди дадам ҳам Кимсан акамдек «добровол» бўлсаю одамлар олдида бошимни баланд кўтариб юрсам! Ўша прокурор Хўжақуловга, анави сўгалли, сўхтаси совукларга, мактабда менга таъна қилган ўқитувчи хотинга айтсам: «Сенлар туфайли бегуноҳ дадам қамалди. Сенлар туфайли мактабдан кетиб қолган эдим, ана, кўриб қўй, отам душман эмас экан-ку, қаҳрамон бўпти-ку», десам...

Очил ака, кўзи яхши кўрмаса ҳам, мунгайиб қолганимни сезди.

– Робия, – деди илтижо билан... – Мен... мен... – деди юпқа лаби титраб. – Сизни севаман... Анчадан бери...

Мен нима дарддаю бу нима дейди! Индамай юзимни ўгирдим.

– Йўқ, мен рост айтяпман, Робияхон! – У кетиб қолишимдан қўрққандек, шоша-пиша давом этди. – Яхши кўриш айб эмас-ку, тўгрими?

Тўнчасига ўралиб, дийдираб турган Олимжон ҳеч нимага тушунмай гоҳ акасига, гоҳ менга ҳараб, илжайиб ҳўйди. Бурнини тортди.

– Мендан рози бўлинг! – деди Очил ака тўсатдан. Овозида вазмин хотиржамлик бор эди. – Эртага жўнаяпман, – шундай деди-да, кўзойнагини тақиб, юзимга бир қараб қўйди. Оҳиста бурилиб, укасининг елкасига қўл ташлаганча, бир оёгида туфли, бир оёгида пайпоқ билан сирганиб-сирганиб, оқшом қоронгилигига сингиб кетди.

Анграйиб қолдим. Ҳамон симиллаб ёмғир ёғар, белим сирқиллаб, икки кафтим ачишар, аллақачон кун ботганига қарамай таҳдидли қизариб турган осмондан қор иси келар эди.

## 4. «Ё маниям олиб кетинг, ё ўлдиринг»

Кўнглим бўм-бўш бўлиб қолди. Хеч кимни кўргим келмас, биров савалаб ташлагандек, аъзойи баданим сирқираб огрирди. Уйга келсам, аксига ховли зимистон. Ойим Холпош холаникига чиққанга ўхшайди.

Токчадаги лампани ёқиб, кўрпачага чўкканча бир зум ўтириб қолдим. Пилиги сўхта чироқ чирс-чирс қилади, ташқарида ёмғир шитирлайди. Баданим увишиб кетяпти. Бутун олам, ҳатто ичим ҳам зах босиб кетгандек. Ҳеч нимани ўйлагим келмас, лойга қорилган сон-саноқсиз картошкалар, қилтиллаб замбил кўтариб бораётган Очил ака, бурнини тортиб турган Олимжон кўз ўнгимдан бирма-бир ўтарди. Кейин Кимсан акам пайдо бўлди: кулиб турибди. Хат ёзганимга икки ойдан ошди. Қизиқ, қаердайкин ҳозир? Балки худди шунақа зах босган ерда, лойга беланиб ётиб, милтиқ отаётгандир? Балки у томонларда аллақачон қор

туш-гандир. Лойдан қор яхши. Совуқ бўлсаям бари бир, балчиққа ботмайди...

Эртага картошкани қазиб бўлсак, индиндан кечки карамга тушамиз. Армияда карам шўрва беради, дейишади. Балки худди ўша мен узган карамдан Кимсан акамга шўрва пиширишар.

Овқатни ўйлашим билан қорним очгани ёдимга тушди. Қали пешинда картошка қайнатиб еган эдик... Энди тушликка бир вақтлардагидек қўй сўйиб шўрва солишлар, ош дамлашлар йўқ. Майли, устимиз юпун бўлсаям, чалақурсоқ юрсак ҳам гўрга! Ишқилиб, уруш тезроқ битсин. Кимсан акам тезроқ келсин!

Хали Парча опа ховликиб, гапириб колди: «Дўмбирободлик Рахим сассикнинг ўғлидан «қорахат» кепти. Сассик бечора шумхабар олиб борган Абзини роса дуоибад кипти. Кейин биттаю битта боласига аза очибди...»

«Қорахат...» Кейинги пайтда шу совуқ сўз кўпайиб қолди. Қизиқ, Кимсан акамдан нега хабар йўқ? Хат келган бўлса Рашид абзи мастликда тушириб қолдирдимикин? Йўқ, бобом айтди-ку, уруш бошлангандан бери ичмай қўйганмиш. Ўлибдими, хат бўлса ўзи олиб келарди.

Белимга бир бало бўлдими? Нима зарил эди, Очил акага аччиқ қилиб, шунча юк кўтариб... Нима деди?

«Рози бўлинг эртага жўнайман», дедими? Ўзим ҳам ўлгудай заҳарман-да! Бечорани бекордан-бекорга шунча калака қилдим. Тўгри айтди, яхши кўриш айб эмас-ку! Яна нима деди? Дадамни гапирди, чин юракдан гапирди... Дадам ҳам урушга кирган бўлса... Кимсан акам билан кўришиб қолишса... Бир-бирини танишармикин? Ҳайронман, ойимдан нимага дарак йўқ? Даладан қайт-

мадимикин? Йўг-е, тўқайдаги бригадага кетишганди-ку. Ораси яқин. Аллақачон келган. Холпош холаникига чиққан. Овсинларнинг шунақа одати бор: иккаласи бир-бирига далда бериб гаплашиб ўтиришади. Туриш керак. Хозир кўзим илинса – тамом! Қотиб ухлаб қоламан... Мунча совуқ? Қор ёғади, шекилли... Танча очсакми?.. Шошма, сигир соғилдимикин?

Йўқ, турмасам бўлмайди! Ҳализамон бобом келади. Овқат иситмасам жаҳли чиқади.

Сирқираб кетаётган белимни аранг кўтариб, ўрнимдан турдим. Айвон токчаларидаги хурмачаларни қарасам, иккаласи ҳам сутга тўла. Бундан чиқди, ойим сигирни соғибди. Қизиқ, нега мўърамайди? Арқонга ўралашиб бўғилиб-нетиб қолмаганмикин?

Чироқ шишасини рўмолим билан пана қилиб ҳовлига тушдим. Ёмгир ҳамон эзмаланиб ёгар, қор иси кучайган эди. Молхона бурчагида ётган сигир чироқни кўриб пишиллаб ўрнидан турди. Кўзлари ялтираб шу томонга қаради. Белига лой чаплаб қўйилибди...

Чироқни авайлаб тутганча ошхонага кирдим. Тувоқни очсам, қозон бўм-бўш. Ие, ҳар куни бобом иккаламизнинг насибамиз қозонда турарди-ку! Ўчоққа олов ёқилмаганини энди кўрдим. Кўнглимга ғулғула тушди. Бир гап бўлган! Ойим жиллақурса, бир қошиқ обиёвғон пиширарди. Овқат қилмаган, чироқ ёқмаган, ўзиям йўқ! Ё Кимсан акамдан...

Хаёлимга келган даҳшатли фикрдан этим увушиб кетди. Чироқни ўчоқ бошига қўйдиму ҳовлига отилдим. Тезроқ Оқсоқол буваникига чиқиш керак. Юрагим қинидан чиққудек бўлиб, кўча эшик томонга югурдим. Сочларим жиққа сув бўлиб кетган, нимчам елкамга ёпишиб қолган, оёғимдаги

кавуш лойга ботиб, шалоплаб ғашимни келтирар, лекин хаёлимда фақат битта фикр бор эди. «Ишқилиб тинчлик бўлсин!»

Лой кўчадан сирғаниб бораётсам бошига қора гуппи – чопон ёпиниб келаётган одам кўринди. Эркакми-хотинми билиб бўлмайди. Бўйи бир қарич, қоп-қора шарпа. Худди тўнтариб қўйилган хумчага ўхшайди. Ўн қадамча қолганда шарпа тўхтади.

- Йобияпа! - деди ингичка овозда.

Товушидан таниб, кўнглимга илиқлик ёйилди. Фотима келиннинг қизи.

- Сенмисан, Попук? дедим яқин бориб. Ойим сизларникига чиқмадиларми?
- Чиқдила, деди қизалоқ, чопон ёқасидан мўралаб. Бувимла эттилаки, овсинлайи укалайиникига кетибдила. Укалайи уюшга кетайкан. Бувамла Кўтаймага бойайканла.

Қизалоқ айтган янгиликни идрок этгунимча хийла вақт ўтди. Бундан чиқди Шомурод тоғам урушга жўнаяпти. Ойим Кўтармага кетган.

Эсимни йигиб олгунимча қизалоқ узоқлаб кетди.

– Тўхта, Ойпопук! – дедим қичқириб. – Уйингга обориб қўяман. Қоронғида қўрқиб юрмагин.

Қизалоқ тўхтади. Тескари тўнкариб қўйилган хумчадек гавдасини ўгириб бурилди.

 – Қўйиқмийман, ҳайий, Йобияпа! – деди ингичка овозда.

Ёмгир остида бир зум туриб қолдим. Юрагим анча таскин топди. Нимага шунақа бўлганини кейин англадим. Демак, тинчлик экан. Кимсан акамдан ёмон хабар келмабди. Лекин ўша захоти Раъно келинойим кўз ўнгимда пайдо бўлди. Ўзимни ёмон кўриб кетдим. Раъно янгам! Олти ярим ойлик келин... Ҳоли нима кечади энди? Ёлгиз ўзи нима қилади?

Довлига кириб, талмовсираб турсам, кўчадан эшак ҳанграгани эшитилди. Бобомнинг эшаги илгари бошқача эди. Кўча бошига етиши билан, «эшитиб қўйинглар, биз келяпмиз» дегандек, овозини баралла қўйиб ҳангилларди. Ҳозир унақа эмас. Нола чеккандек қисқагина ҳанграйдию овози ўчади.

Чопони ҳуҳ буҳиб кетган бобомнинг ҳуҳига сув ҳуярканман, у менга ҳарамасдан суриштирди:

- Ойинг қани?

Дозир Ойпопукдан эшитган гапимни айтган эдим, бобом хўрсинди.

– Битта ўзинг қўрқмайсанми? Оқсоқол бувангникига чиқиб ётақол.

Бу - «мен кетдим», дегани эди.

Шундоқ мушкул пайтда Раъно янгамнинг ёнида бўлгим келарди. Қон йиғлаб ўтиргандир шўрлик!

– Менам борай, – дедим бобомга ялиниб. – Эрталаб ўшанақаси далага чиқа қоламан.

Икковлашиб йўлга тушдик.

Бобом бўйи калта бўлганига зарда қилгандек катта-катта қадам ташлаб лой кечиб кетяпти. Жуссаси кичкина бўлса ҳам бақувват, чайир. Худди ерга чуқур қоқилган қозиққа ўхшайди. Одатда, узун қозиқни у ёқ бу ёққа ликиллатиб бир тортсангиз суғурилиб чиқади. Лекин калта қозиқ ерга бир ёпишдими, силжимайди.

Бобом ҳам шунақа. Қоронғида пишиллаб тез юриб боряпти, сирпанмайдиям. Алвасти кўприкдан ўтиб олсак бўлди. У ёғи узоқмас. Фақат кўприкдан ўтишга тоқатим йўқ. Яқин келишимиз билан тубсиз чуқурликда, зулмат қўйнида қулоқни қоматта келтириб вошиллаб ётган жарга қарамаслик учун қадамимни тезлатдим. Бобомнинг товонини босиб олишимга оз қолди.

Бобом ёмгирдан тайганоқ бўлиб кетган шагаллардан сирганиб темир йўл устига чиқаркан, норозилик билан тўнгиллади.

 Оббо! Шу етмай турувди! Қор ёғяпти. Мунча эрта ёғмаса бу! Ерда қанча нарса ётибди ҳали.

Алвасти кўприк ваҳимаси билан сезмаган эканман.

Юзимга совуқ учқунлар урилаётганини энди пайқадим. Темир йўл излари хира йилтираб ётар, олисда разъезд чироқлари қизғиш липиллаб турарди. Чироққа қараган эдим, қор учқунлари қуюқлашиб бораётганини кўрдим. Пастда эса Бўрижар хамон шариллайди...

Сирли шивирлаб турган ёнгоқзор орасидан чиқиб, Кўтармага етгунимизча ер билинар-билинмас оқарди. Кўча четидаги дарахтлар табиатнинг аёвсиз қахри олдида таслим бўлгандек хомуш бош эгди. Сомонсувоқ қилинган томларни қировдек юпқа қор босди. Ҳамма ёқ жимжит бўлиб қолди.

Кўтармадаги ҳовлилар бизнинг қишлоқдагига ўхшаган зич эмас. Бири бу ерда, бошқаси у ерда. Шомурод тоғамники энг чеккада. Икки пахса пастак девор билан ўралган ҳовли. Ташқари томонда дераза йўқлиги учун уй ҳам ҳовли девори билан туташиб кетган. Фақат баландроқ – уч пахса. Сомон сувоқ қилинган томнинг у ер-бу ерида ёгоч тарновлар диккайиб турибди.

Ота-бола пастак эшикка яқинлашган эдик, ёнгоққа боглаб қўйилган от пишқириб, сувлигини шақирлатди. Умар закунчининг оти. Демак, тогамни кузатишга уям кепти. Шомурод тогам текистилда ишласа ҳам бари бир шу колхознинг кишиси-да! Яхши, раис одамгарчилик қипти! Бобом билан олдинма-кетин ҳовлига кирдик. Ошхонанинг очиқ эшигидан ланғиллаб ёнаётган олов

кўринади. Ўчоқ бошида куйманаётган ойимнинг қорасини узоқдан танидим. Ёгоч чўмичда ҳадеб қозон кавлаяпти.

Бобом эркакларнинг гўнгир-гўнгир овози келаётган уйга йўналди. Мен ошхонага киришим билан қурум босган устунга суяниб, юпқа лаблари титраганча йиглаётган Раъно келинойимга кўзим тушди. Оппоқ кўйлак устидан кийган бахмал нимчаси кўксига чиппа ёпишиб, қоматини кўз-кўз қилаётгандек. Жун рўмол тагидан чиқиб турган паришон сочларида қор учқунлари йилтирайди.

- Унақа қилманг, келинпошша! Ойим чўмични айлантирар экан, юпатди. Ирими ёмон бўлади, Раънохон! Юртга келган тўй...
- Керакмас бунақа тўй, керакмас! Раъно келинойим кўзи тўла ёш билан ойимга юзланди. Мен нима қиламан?! Бир ўзим нима қиламан бу ҳовлида!

Ойим чўмични қозон қулоғига илиб, Раъно келинойимни қучоқлади:

– Ношукрлик қилманг, жон болам. Эл бор, юрт бор. Мана бизлар бормиз.

Ойим бирдан менга кўзи тушиб, қувониб кетди.

– Ие, ана синглингиз! – деди шу билан Раъно келинойимнинг дарди енгиллашиб қоладигандек дадилланиб. – Мана, Робия бор! Келиб туради. Ҳар куни келасан-а, қизим!

Келинойим менга ўгирилди. Ўчоқдан олов шуъласи тушиб турар, янгамнинг йигидан қизарган юзи янаям чиройли бўлиб кетганга ўхшарди.

- Йиғламанг, дедим қучоқлаб. Димоғимга ғалати, ширин атир иси урилди.
  - Пешонам қурсин! деди у лаблари титраб.
- Қўйинг, келинойи! Кўрасиз, ҳадемай уруш битади. Ой бориб омон келадилар.

Ойим ошхона эшигидан айвонга мўралади.

– Бўлди, болам, бўлди, – деди овозини пасайтириб. – Эрингиз кўрса кўнгли бузилади. Ана ўзи!

Айвон томондан Шомурод тоғамнинг йўталгани эшитилди. Аввал ойим, кетидан мен ўша томонга юрдик. Тоғам токчасида фонус ёниб турган айвон ўртасида тўхтаб, шу томонга қаради. У елкасига куёвлигидан кийган беқасам тўнини ташлаб олган, негадир жилмайиб турар эди. Яқин боришим билан айвон пештоқига келди-да, эгилиб пешонамдан ўпди.

– Вой-бў! Катта қиз бўпқопсан-ку, – деди кулиб.– Асли тўйингни ўтказиб кетсам бўларкан-да!

Бўза ичган шекилли, димогимга ачимсикрок хид урилди. Уялиб тескари қарадим.

- Тўйингни менсиз ўтказиб қўймагин тағин! у кулиб туриб бармоги билан пўписа қилди. Келиб ўзим узатаман, хўпми?
- Сенсиз тўй қилармидик, ука! Ойим пилдираб айвонга чиқди-да, токчада турган аллақандай тугунчани тоғамга узатди. Ма, қопингга солиб қўй. Тайинли жойга қўй, эсингдан чиқмасин.
- Нима бу? Тоғам ҳамон кулимсираб ойимга ҳаради.
- Қурут! деди ойим тантана билан. Галанска сигирнинг қатиғидан. Ярмини ўзинг е, ярмини Кимсанга бер, хўпми? Кимсаним қурутни яхши кўрарди. Соғиниб қолгандир.
- Хўп, опа, Кимсаннинг улушини албатта обориб бераман! Тоғам ойимни юпатди. Хавотир олманг. Ўз қўлига топшираман.

У ойимга ҳам, менга ҳам эмас, ошхона томонга ҳараб турганини пайҳадим. Кўча эшикда тугун кўтарган хотинлар кўринди. Ойим, ҳоронғида кимлигини танимаса ҳам йўл-йўлакай гапириб, ўша ёҳҳа югурди:

– Вой, айланайлар! Келинглар, овора бўпсизларда... Нима қилишимни билмай ошхонага қайтиб

Нима қилишимни билмай ошхонага қайтиб кирдим. Раъно келинойимга далда бергим, бир нималар деб овутгим келарди. Йўқ, келинойим ошхонада кўринмасди. Каттакон қозон қайнаб кўпириб кетибди. Шўрванинг кўпигини сидириб, энди ховлига чиқмоқчи бўлиб турган эдим, ташқарида, ошхона деворининг нариги томонида Раъно келинойимнинг овози эшитилди.

- Ўзингиз хоҳлагансиз. Биламан. Урушга боргингиз келиб қолган.
- Қўй энди, йиғламагин, жоним. Нима қилай, ҳажиқизга ўхшаб, одамларга шумшук кўриниб юрайми! Эркакларнинг ҳаммаси урушда, тушундингми, урушда...

Раъно келинойимнинг ҳиҳиллаб йиғлагани ҳулоғимга чалинди.

- Нима, бу ерда керакмасмисиз? Хеч кимга керак бўлмасангиз менга кераксиз, билдингизми?
- Биламан, Раъно, биламан! Билганим учун шунақа қиляпман-да. Уруш қанча тез битса, шунча яхши. Сенгаям яхши, менгаям.

Сукунат чўкди. Уларни чўчитиб юборишдан кўрқар, чўмични чангаллаганча ўчоқ бошида чўнқайиб қилт этмай ўтирардим.

- Менга қара, Раъно, деди Шомурод тоғам овозини пасайтириб. Ростини айт, мабодо кўнглинг аччиқ нарса тусаётгани йўқми?
  - Э, боринг!
- Йўқ, ростини айт. Агар шунақа бўлса, тоғам овозини тағин ҳам пасайтирди. Ўғил бўлса отини Музаффар қўйгин, хўпми, Музаффар нима дегани, биласанми? ўолиб дегани. ғалаба дегани, тушундингми?

Яна жимиб қолишди. Қозон қаттиқроқ биқирлай бошлади. Тоғам билан келинойимнинг овози эшитилаётган девор туйнугидан қор учқунлари ошхонага учиб кириб, ўчоқ тафтида ерга тушмай эриб кетди.

- Э, қочинг! Доим шунақа ёқмай турганида шилқимлик қиласиз. Энди Раъно келинойимнинг овозида алам эмас, эркалик бор эди.
  - Ростдан хам кўнглинг...
- Йўқ! Раъно келинойим овозини баланд қўйиб юборди.
   Йўқ, дедим-ку!

Нимадир шапир-шупур қилди, тоғам энтикди.

- Раъно!
- Ёпишманг... Шилқим!

Зум ўтмай Раъно келинойимнинг ўксиб-ўксиб йиглагани эшитилди.

– Чидолмайман, эшитяпсизми, чидолмайман, сизсиз! – У дод солиб юбормаслик учун ўз кафти билан огзини тўсди шекилли, дами қайтиб ингради.

Шомурод тоғам тағин уф тортди.

- Раъно, деди секин, жоним!
- Обкетинг! Раъно келинойимнинг бўгзидан бўгиқ нидо отилиб чиқди. Обкетинг! Аскарларнинг кир-чирини юваман. Овқат пишираман! Ярасини боглайман! Обкетинг. Жон Шомурод ака! Обкетинг!
- Раъно! Асабийлашганидан тоғамнинг овози баланд, кескин чиқди. Қуйсанг-чи энди.
- Обкети-нг! Раъно келинойим ялиниб илтижо қилди.
- Раъно, жиннимисан? Турсанг-чи! Ана, ҳамма ёгинг шаллабо бўлди.
- Бўла қолсин! Раъно келинойимнинг овози тахдидли янгради. Обкетинг! Обкетинг. Ё обкетасиз, ё ўлдириб кетасиз!

Айвонда биров томоқ қирди. Умар закунчининг янгроқ овози жаранглади.

- Қаёққа кетди бизнинг солдат?
- Тур, Раъно, тургин, жоним! Мени чақиришяпти.

Туйнук орқасида Раъно келинойим паст, аммо ғазаб тула оҳангда пичирлади.

– Башаранг қурсин! Қаёқдан келди бу сўхтаси совуқ! Шу куниям холи қўйишмайди.

Тоғам ошхона эшиги олдидан ўтиб айвонга чикди. Яна жимлик чўкди. Ўчокдаги олов пасайиб қолди. Ўтин ташлай десам, ўрнимдан туришга қўрқаман. Бир махал эркаклар ўтирган уй томондан қийқириқ кулги келди. Чамаси Шомурод тоғам қайтиб кириши билан Умар закунчи аския қилди шекилли, тоғамнинг фабрикада ишлайдиган хамкасблари баравар қахқаха отишди. Раъно келинойим бир даста косани бикинига тираб, ошхонага кирди. Чехраси маъюс, рўмол тагидан чиқиб турган сочига, нимчасининг елкасига қор қўнган, оппоқ кўйлагининг этагига қор аралаш лой ёпишиб қолған эди. Паришон тарзда косаларини ўчоқ бошига қўйиб тўнка устига ўтирди. Бир нуқтага тикилиб қолди. Шу ўтиришда фариштага, оппоқ фариштага ўхшар эди...

Ойим тоғамникида ётиб қолди. Тонготарга яқин бобом иккаламиз йўлга тушдик. Сомон сувоқ қилинган томлар устини бир қарич қор босган, ёришиб келаётган осмонда учқунлар ғужғон ўйнар эди. Негадир биринчи қор ёғишини узоқ касал бўлиб ётган одамнинг жон таслим қилишига ўхшатаман. Бемор тўшагига ёпишиб инқиллаб ёта-ёта охири омонатини топширади-ю, бу дунёнинг азобларидан қутулганига шукр қилгандек тинчиб чехраси ёришади.

Бир ҳафтадан бери ёмгир азобидан эзилиб кетган ер, ниҳоят оппоқ кафанга ўралиб, тинчиди. Ҳамма ёқ жимжит. Фақт Бўрижар яқинида ёнгоқзор устида қарғалар шодон қағиллайди. Қиличини қайраб келаётган қишга пешвоз чиқиб, қаҳратон совуқ бошланишидан дарак беради, тантана қилади.

...Қузғунларнинг омади чопиб қолди.

### ОЛТИНЧИ БОБ

# «ҚОРА АММА» ХИКОЯСИ

# Юлдузи юлдузига тўгри кепти...

Раънохон келиним Шомуродга ялакат данакдек ёпишиб қолган экан. Вокзалга борганда бўйнига чирмашиб олди. Қани қўйиб юборса. Яккаш «мениям обкетинг», деб чирқиллайди. Ўзим-ку, Кимсаним билан худди шу ерда хайрлашганим эсимга тушиб юрагим соб бўляпти. Иложим қанча? Келинимни юпатдим.

– Сафарга кетаётган эрингизни йиглаб кузатманг, ёмон бўлади, – дедим. Кошки кўнса!

Эрта куздан бери истиқо бўлиб, оёқ-қўли шишиб ётган қудам ҳам куёвимни кўриб қолай деб вокзалга чиқибди. Касал хотин трамвайга ўтириб, шундан шунга кепти. Икки ўртада уям юракни сиқади.

– Шомуроджон, ўғлим, яхши-ёмон гапирган бўлсам рози бўлинг, ўзим сезиб турибман, сиз келгунингизча йўқман... – дейди.

Яхшиям Умар закунчи бор экан. Саҳар-мардонлаб арава чақиртирган ҳам ўзи, бош бўлиб вокзалга олиб чиққан ҳам шу бўлди. Қудам ҳадеб нолийверган эди, жаҳли чиқиб кетди.

– Совет жангчисининг қайнонаси бунақа бўлмайди, – деб уришиб берди.

Раънохон бўлса ҳеч ким билан иши йўқ. Эридан ажралгиси келмайди. Этни тирноқдан ажратмай тўнғиз қўпгур, гирмон бўлмаса, шу азоблар йўқ эди!

Поезд жўнай деб турганида оломон орасида Комил табиб билан хотинига кўзим тушиб қолди. Лазакат бечора йиглайвериб шишиб кетибди. Очилбойни жўнатишяпти экан. Ўз ташвишим билан бўлиб бехабар қолибман. Совчиликдан қайтарганимга аразлаган бўлса керак, деган эдим. Йўқ, Лазакат мени қучоқлаб йиглади.

- Болагинам яқиндаги нарсани яхши кўрмасди!
   Холи нима кечади энди!
- Унақа деманг, онаси, Комил табиб хотинини юпатди. Очилбой пок бола. Пок одам хор бўлмайди, адолат деган нарса бор. Худо бор.

Лазакат шўрлик баттар чирқиллади:

- Уруш адолатни биладими?
- Бари бир. Ҳақ деган нарса бор, онаси...

Поезд кетганидан кейин разм солсам, Раънохон адойи тамом бупти.

 Уч-тўрт кун онангизни багрида тура қолинг, – дедим.

Тўгри-да, ҳарна кўнгли ёзилгани! Қолаверса, касал онасига мадад бўлади. Раис ҳам Раънохоннинг аҳволини сезди шекилли, ҳайтовур, йўқ демади. Она-болани аравага ўтқизиб қудамникига – Янги маҳаллага олиб кетди.

Комил табиб, Лазакат – учовлашиб, қор кечиб йўлга тушдик.

Лазакат ўқтин-ўқтин, «боламнинг кўзи яхши кўрмасди-ку, энди нима бўлади», деб нолир, Комил табиб эса вазминлик билан индамай борар, қор ёгиб турган осмонга қараб-қараб қўяр эди.

Нўғайқўргонга етиб келгунимизча кун оғди.

Эрталаб «ҳа-бўл, ҳа-бўл» билан маҳсимни пайтавасиз кийган эканман, зах ўтиб оёғим акашак бўлиб қолди.

Уйга келсам ҳеч ким йўқ. Чолим билан Робия далага чиқиб кетган шекилли, сигир мў-мўлайвериб молхонани бошига кўтаряпти. Ҳовлиқиб томорқага чиқдим. Узумзор этагидаги жўхориларнинг сўтасини териб олган бўлсак ҳам, поясини йигишга қўлимиз тегмаган эди. Қорга ботиб икки қучоқ жўхорипоя юлиб чиқдим. Сигирга, қўйга бердим.

Бир кўнглим нон ёпгим келди-ю, ўша захоти ниятимдан қайтдим. Нари борса, бир қопча унимиз, уч хум жўхори қолган. Чолим қаттиқ тайинлаган: «Унни эҳтиёт қилмасанг бўлмайди, ҳали бундан ҳам оғир кунлар келади», деган.

Тўғри, қора кунга асраб қўйган буғдойимиз ҳам, жўхори ҳам кўп эди. Эргаш сельсовет билан Умар закунчи «урушга ёрдам керак», деб келганида чолим икки қоп буғдой, бир қоп жўхори, бир қоп туршак, ёнғоқ аралаш қуруқ мевани эшак аравага ортиб идорага обчиқиб берди. Уруш бўлаётган жойларга совуқ эрта тушаркан шекилли, бисотимиздаги ҳамма иссиқ кийимларни топширдик. Кимсанимнинг этиги, телпаги, чолимнинг оҳорли пахталик чопони – ҳаммасини...

«Урушга ёрдам» деган гапни эшитса, ўзини орқага ташлайдиган одам йўқ. Аммо заёмдан қочадиган, налогчи келса бекинадиганлар ҳам бор. Шунда сельсовет билан Закунчи қилолмаган ишни Ориф оқсоқол эплади. Ҳамманинг уйига бирма-бир кириб чиқди.

– Ҳой, белингда белбоғинг борми ўзи, йигитларимиз у ёқда қорга ботиб юрибди. Сен бу ерда кетингни танчага тиқиб ётибсан, энди бир жуфт этикниям аяйдиган бўлдингми, нодон, – деб бир

бақирган эди, ўшанақа қилғилиқ қилганлар ҳам топган-тутганини олиб чиқди.

Оқсоқол бўлса оёғига кийиб юрган этигини ҳам ечиб берди.

– Мен ялангоёқ юрсам ҳам ўлмайман! Тошканни ҳиши совуҳмас!

Шунақа дейишга деди-ю, ёмғирда уч кун калиш кийиб картошка қазиган эди, эски дарди қўзиб белининг боди тутиб қолди. Чолим ҳар куни кечаси чиқиб ўртоғидан хабар олади...

Шундай қилиб, нон ёпгим келди-ю, чолимнинг гапи эсимга тушиб шаштимдан қайтдим. Яхшиси, гўжа пишираман! Ярим ўғир жўхори туйсам бир қозон овқат бўлади!

Ошхонага кириб, жўхори янчаётган эдим, кўча эшик тақиллагандек бўлди. Чопиб чиқдим. Йўқ, ҳеч ким кўринмайди... Қорда тангадек изни кўриб юрагим бир қалқиб тушди. Ёғоч оёқнинг изи! Рашид абзининг оёги-ку! Ҳовлиқиб кўча бошига югурдим. Ҳеч ким йўқ...

Бундан чиқди абзи эшигимизга келган. Бундан чиқди Кимсандан хабар бор! Қачон келдийкин! Қозирми? Олдинроқми? Агар Рашид абзи энди келган бўлса, нимага уйдан чиқишимга сабр қилмай кетиб қолди? Тўсатдан хаёлимга ёмон ўй келди. Авваллари Рашид абзини кўрса, югуриб борадиган одамлар энди ундан қўрқиб қолган. Абзи тақиллатган икки эшикнинг биттасида байрам бўлса, биттасида аза очилади. Одамлар уни орқаваротдан «шумқадам» дейди.

Йўқ! Бораман! Ҳозир почтага бораман!

Қор кечиб югуриб кетдим.

Рашид абзининг почтаси – разизда – сельсоветнинг ёнбошида. Халлослаб борсам, почтахона қулф. Ўзимизнинг дарвоза тагидагига ўхшаган тангадек из почтахона зинасига ҳам тушиб қолиб-

ди. Бундан чиқди, абзи ҳали ҳайтмаган. Хат улашиб юрибди. Кутаман! Келгунча кутиб ўтираман!

Зинанинг қорини кавушим билан сидириб ташлаб омонат чўнқайганча атрофга разм солдим. Қор тинган, аммо ҳавода ҳалиям заҳардек аччиқ учқунлар учиб юрарди.

Кўчанинг нариги бетидаги нон дўкони олдида аллақанча одам турнақатор тизилишиб дўкон дарчасига талпиняпти. Рўмол ўраган хотинлар, шапка кийган разиз рабочийлари, оёгидаги йиртиқ этиги қорга ботган ёш-ёш болалар. Ҳаммаси рангпар, бадқовоқ...

Қийин! Шу бечораларга жудаям қийин. Бизлар-ку ўлмаган қул, тирикчилигимизни ўтказиб турибмиз. Бир кафт бўлса ҳам унимиз бор, жўхори бор. Жилла қурса лавлаги қайнатиб есак ҳам очдан ўлмаймиз. Булар-чи! Заборний карточкасидан бўлак нимаси бор? Дон-дуни бўлмаса, сигири бўлмаса! Ҳа, айтмоқчи, сигирни қочириб олганимиз яхши бўлди. Майли сут налуг, жун налуг, ёғ налуг – ҳаммасини тўласак ҳам гўрга! Ишқилиб, шу жониворнинг думига осилиб қишдан омон-эсон чиқиб олсак бўлди.

Хаёл суриб ўтирган эканман, нон дўкони олдида навбат кутиб турганлар орасида тўсатдан қиёмат қўпгандек бўлди.

Аллаким овози борича айюханнос солди.

- Ушла! Ушла ўгрини!

Ўша захоти хотин кишининг дунёни бузгудек чинқириқ товуши оламни тутди.

- Войдод! Ноним! Нонимни обкочди!

Қўрқиб кетдим. Қарасам, тўққиз-ўн ёшлардаги бола оломон орасидан отилиб чиқиб, шу томонга югуриб келяпти. Қўлида ярим буханка нон. Бошидаги йиртиқ телпаги қийшайиб кетган. Сарпойчан ботинка кийган оёғи совуқдан қип-қизил гўшга ай-

ланган. Жони борича чопяптию икки қўллаб нонни оғзига тиқади. Пахталик кийган рангпар хотин боланинг кетидан етиб келиб, елкасига чанг солди.

– Ноним! Етимларимнинг насибасини ўғирлади! – деди чинқириб.

Боланинг елкасидан тортиб, қулоқ-чаккасига тарсаки туширган эди, бола букчайиб қолди. Хотин жонҳолатда нонга чанг солди. Бола нонни қўйиб юбормади. Чала-чулпа чайнаб очкўзлик билан юта бошлади. Беш-олти киши ёрдамга етиб келди. Гавдалироқ эркак бир мушт туширган эди, боланинг телпаги бошидан учиб қорга тушди. Болапақирни бирпасда оломон қилиб юборишди. Шунча одам савалаб ётибдию бола парво қилмайди. Қорга мук тушганича нон кавшайди. Қарасам, ўлдириб қўй-ишадиган. Дод солиб оломонга отилдим.

– Ҳой, инсофинглар борми, ўлдириб қўясанлар-ку, бечорани!

Рангпар хотин бола у ёқда қолиб, менинг ёқамга ёпишди.

– Бойвачча бўлсанг уйнингга обориб боқ, жодугар кампир! – деди чирқиллаб. – Иккита етимчамга нимани едираман? Эримдан қорахат келган!

Хотинни силтаб ташлаб, оломон ичига кирдим. Бола курагига тушаётган тепки зарбидан мункиб-мункиб кетяпти, аммо нонни икки қўллаб чангаллаган кўйи ютоқиб оғзига тиқади. Нон бурнидан оққан қондан қизариб кетган. Шўрликни пана қилмоқчи эдим, елкамга тушган мушт зарбидан сирғаниб йиқилдим оғзимга қор кириб кетди.

Хуштак чуриллади. Исмоил мелисанинг овози эшитилди.

- Тарқал! Хамманг тарқал!

Хуштак тағин бир марта чуриллаган эди, ғазабдан эс-ҳушини йуҳотган оломон секин-секин

нари кета бошлади. Бола охирги луқма нонни еб бўлиб бошини кўтарди. Юзидан қон аралаш кўз ёши оқиб тушар, нарироқда йиртиқ телпаги қорга кўмилиб ётар эди. Каловланиб ўрнимдан турдим.

– Етимларнинг насибаси эди-ку! – деди рангпар хотин чирқиллаб. – Энди нима қиламан? Болаларимга нима бераман?

Шопмўйловли Исмоил мелиса чанг солиб, боланинг елкасидан кўтарди.

- Тур! Кимнинг ўғлисан?

Бола кафтининг орқаси билан қонаган бурнини артди. Яна калтак тушишидан қўрқиб, кўзини пирпиратди. Аммо жавоб бермади.

– Урманг! – дедим мелисанинг қўлига ёпишиб. – Барака топинг, урманг. Мени танийсиз-а, Ҳусан думанинг оиласи бўламан. Гунохидан ўта қолинг!

Исмоил мелиса қовоғини солиб менга бир қараб қуйди. Аммо болани қуйиб юбормади.

- Э, опа, бунақалар кўпайиб кетган, деди хўмрайиб. Овозида жаҳлдан кўра афсус-надомат кўп эди. Ота-онанг борми? деб сўради боланинг елкасидан силтаб. Бола юлқинмади. Аммо жавоб ҳам бермади.
- Менга қара, вей! Исмоил мелиса унинг қулогидан чангалаб қаттиқ буради. Боланинг юзи огриқдан буришиб кетди. Бари бир индамай тураверди. Кармисан! Мелиса унинг боши устида мушт дўлайтирди.
- Жон укам! дедим ялиниб. Урманг! Мартабангиз бундан ҳам улуғ бўлсин! Оч қолган... Бўлмаса шу ишни қилармиди!

Хаёлимга ярқ этиб бир ўй келди. «Шу норастани уйга олиб кетсам-чи? Кимсаним урушда! Битта ўғлим иккита бўлар! Робияга ука бўлиб юрар... Оч бўлсак оч, тўқ бўлсак тўқ юраверади». Аммо ўша захоти бошқа бир андишани ўйлаб қолдим. Ўзи-

миз-ку қоққанда қозиқ, осганда хурмачасиз ўтирибмиз. Чолимга нима дейман? Эрта-индин боланинг ота-онаси дараклаб келиб, ўғлимни нега эгаллаб олдинг, деса нима қиламан?

- Қани, юр-чи бу ёққа!

Назаримда Исмоил мелиса бола бечорани ҳозир обориб ҳамаб ҳўядигандек бўлди, тағин ялиндим.

- Унақа қилманг. Жон укам...

Исмоил мелиса тўхтаб орқасига ўгирилди-да, тушунтирди:

- Қўрқманг, опа, урмайман. Ҳеч кими йўқ бўлса нима қилардик, детдом-петдомга жойлаймиз-да!
  - Рангпар хотин мелисанинг кетидан югурди.
- Мен-чи, мен нима қиламан? Ноним нима бўлади энди?!
- Дард бўлади! Бало бўлади! Исмоил мелиса бир қўллаб болани ушлаб турганча, иккинчи қўлини пахса қилди. Кўзингта қарасанг ўласанми, ҳўкиздай хотин!..
- ...Бўрижар бўйидаги ёлғизоёқ йўлдан қор кечиб келарканман, бурнининг қони тегиб қизарган нонни чала чайнаб ютаётган бола кўз олдимдан кетмас эди. Илоё уруш очганнинг уйи куйсин! Боланинг уволи тутсин!

Ўчоққа олов ёққан эдимки, кўча эшиги тағин тақиллаб қолди. Кетма-кет овоз келди.

- Хусан абзи! Ай, Хусан абзи!

Рашид абзининг овози! У ҳамманинг отига «абзи» қўшиб гапиради. Балки шунинг учун ўзиниям «абзи» деб чақиришар. Чўмични ўчоқ бошига ташлаб югурдим. Абзи эшикни ланг очиб, илжайиб турибди.

Бошида қизил нўғай дўппи, ёнбошида тақири чиқиб кетган сумка. Ўғоч оёғининг почасини шимариб олган, соғ оёғидаги этик қорга беланган...

- Суюнши бериғиз, опай! деди илжайиб. Ингичка, сариқ мўйловини учириб қўйди.
- Вой, овозингиздан айланай! Абзининг музлаб кетган озгин юзидан ўпиб олдим. Кимсандан хат борми?
- Вот, куриб қуйиғиз! У учбурчак хатни боши устида баланд кўтарди.

Хатни қўлидан қандай юлқиб олганимни билмайман. У ёгини айлантираман, бу ёгини айлантираман. Қани саводим бўлса-ю, шариллатиб ўқий қолсам. Бир маҳал ўзимга келсам, абзи ёгоч оёгини қорга чуқур-чуқур ботириб кетиб қоляпти. Чопиб бориб қўлидан ушладим.

- Шошманг, суюнчи олмайсизми? Шунақа дедиму нима суюнчи беришни ўзим билмасдим.
  - Юқ, киракми!

Хол-жонига қўймай ҳовлига судрадим, Рашид абзи айвон олдида тик турганича бир пиёла чой ичли.

– Ўқиб берсангиз-чи, барака топгур! – дедим ялиниб. – Саводингиз бор-ку, ахир.

Рашид абзи негадир хатни овоз чиқармай ўқиди.

- Ўғлиғиз молодец! деди бош бармоғини мих қилиб. Тулада суғишға қирған. Пехотада. Лично Жуков ўғлиғизни хвалить қилған, у негадир илжайди. Охо! Туй була тигиш.
- Ҳой, мундоқ овоз чиқариб ўқисангиз-чи, ўргилай, дедим ичим қуриб. Нима дебди? Қанақа Жукип? Қанақа тўй?..
  - Килин курасиз, опай, килин!

Рашид абзи хатни ўқигани билан Кимсаннинг гапларини тузук-қуруқ тушунмади.

Хатни чангаллаб Оқсоқолникига югурдим. Овсиним танча четида ётган чолининг белига Комил табиб тайёрлаб берган «туркана» дорини сураётган

экан. Айвонда кутиб турдим. Ниҳоят ичкаридан овсиним чақиргани эшитилди. Киришим билан Оқсоқол инқиллаб, ёстиққа суяниб ўтирди.

– Кимсанданми? – деди қўлини чўзиб. – Қани бер-чи!

Шоша-пиша хатни қўшқўллаб узатдим.

- Овозингизни чиқариб ўқинг, барака топкур.

Оқсоқол хатга диққат билан тикилиб қолди. Кўзига қайрилиб тушган қуюқ кўкимтир қошлари чимирилди. Сандал устидаги патнисда ётган жийда-туршакларга тикилганча, Кимсаннинг хатини эшитишга шайланиб, ҳали ўтирибман, ҳали ўтирибман. Оқсоқолдан садо чиқмайди.

- Нима дебди Кимсанжон? Овсинимнинг ҳам тоҳати тоҳ бўлди шекилли, чолига ҳаради. Соғ-саломат юрган эканми?
- Соғ бўлмаса хат ёзармиди!
   Оқсоқол жеркиб берди.
   Хати майда экан, кўзим ўтмаяпти.

Шу пайт қув-қув йўталаётган ўгилчасини кўтариб Потма келин кириб қолди.

– Вой айланай, яхшиям уйда экансиз, ўқинг, сиз ўқинг! – дедим суюниб.

Потма келин, ўғилчасини қайнонасига узатаркан, Оқсоқолга қараб кулиб юборди.

- Вой отажон, хатни тескари ўқияпсиз-ку, албатта кўзингиз ўтмайди-да.
- Ўзинг тескари! Оқсоқол мўйловини бураб, хатни узатди. Арабча имлода хат ўнгдан чапга ўқилади, ҳозирги имлода чапдан ўнгга! Сендан яхши биламан.

Потма келин хатни қўлига олиб, яна кулди:

- Тўгри-ку, ўтган куни Шокир акамнинг хатига-ям кўзингиз ўтмовди.
- Гапинг рост бўлса ўқи! деди Оқсоқол тўнғиллаб. Кимсанбой нима деб ёзибдийкин?

Болагинам доно-да! Дадаси билан мендан ташқари Оқсоқолга, Холпош холасига, Потма-Зўра келинойиларига номма-ном дуойи салом айтибди. Шокир акам, Зокир акамдан хабар борми, деб сўрабди. Хужумга ўтишгани, душманга сичқоннинг ини минг танга бўлиб қолганини, ўзи хизмат қилаётган жойга Жуков деган катта командир келганини ёзибди. Шундоқ катта одам Кимсанимнинг қўлини қисиб «маладес» деганмиш...

– Ана! Нима дегандим, сенга! – Оқсоқол хат ўқиётган Потма келининг гапини кесиб менга қаради. – Ўғлинг герой бўлади десам ишонмагандинг. Жуковни биласанми ўзи? Олий Бош Қўмондоннинг ўнг қўли! Шундоқ одам, Кимсанни «маладес» дебдими, бундан чиқди ўғлингни белида белбоғи бор экан. Кўрасан, Шокирим билан Зокирим ҳам герой бўлади. Ака-ука битта танкда, пашистни қурвақадек эзғилаётган эмиш! Немис Масковни олишига кўзи етмай думини қисиб қолди энди. Гитлер ўудрён<sup>3</sup> деган генералига «қор тушгунча Масковни оламан дегандинг, ололмадингми, энди онангни учқўрғондан кўрасан», дебди. Баттар бўлсин! Эртамас, индин ўзиям қия бўб кетади. Ўқи, болам, ўқийвур!

Потма келин ўқияпти-ю, Кимсаним шундоқ ёнимда ўтириб гапираётгандек. Ўзим ўргилай, ақлли ўғлимдан! «Дадажон», «ойижон» деган тилларингдан онанг айлансин!

- «Дадажон, ойижон... - Потма келин шошилмасдан хатнинг давомини ўқий бошлади. - Эшитишимга қараганда Робияга совчилар келаётганмиш. Ўшанда бир гапни айтишга уялгандим. Энди айтиб қўяй: Робияни узатиб юборманглар. Агар шундай қилсанглар Тошкентнинг суви менга ҳаром. Қизингиз билан аҳду паймон қилиб қўй-

<sup>&</sup>lt;sup>3</sup> Гудериан демоқчи.

ганмиз. Мени ўғлим десангиз Робиянинг бошини боғлаб қўйинглар, борган куним тўй қиламиз...»

Анграйиб қолдим. Мен Оқсоқолга қарайман. Оқсоқол – овсинимга, овсиним – менга.

Боядан бери хатни булбулигўёдек ўқиётган Потма келин ҳам тўхтаб қолди.

- Нима? - дедим гарангсиб.

Қарасам Потма келин хатнинг ўша жойини пичирлаб қайтадан ўқияпти.

Вой ўлай... – дедим бўшашиб. – Ахир, Кимсан... Робия...

Оқсоқол кўрпа тагини очиб носини сандалга туплади.

– Хўш, нима бўпти? – деди қўлини пахса қилиб. – Икки ёшнинг юлдузи юлдузига тўгри келган бўлса, сен нимага обидийда қиласан, аҳмоқ хотин? Ўқи, ўша жойини яна ўқи, қизим!

Потма келин ўша гапларни қайтадан ўқиди.

- Ана! Оқсоқол шахт билан қаддини ростлаган эди, белининг боди тутиб қолди, шекилли, оҳ чекиб ёстиққа ёнбошлади. Бирпасда пешонаси терлаб кетди. Падарингга лаънат, қаёқдан ёпишди бу дард! деди инграб. Белининг оғришига мен айбдордек ёнбошлаб ётган жойида ўдағайлади.
- Ўғлинг Робияни яхши кўради. Энди тушундингми? Ё ҳалиям ақлинг етмаяптими? Робия суқсурдек қиз бўлса, синашта бўлса, тағин нима дейсан, хумгазак? Бу ёққа бер! Оқсоқол хатни Потма келинни қўлидан юлиб олди-да, буклаб-буклаб ёстигининг тагига тиқди. Ўртоқ Жуковдек одам ўғлининг қўлини қиссаю бу ноз қилиб ўтирса! У бирдан овсинимга қараб дағдаға қилди. Нега мулла минган эшакдек анграясан. Тур ўрнингдан!

Муттасил йўталаётган неварасининг бурнини пайдарпай этагига артаётган овсиним талмовсираб чолига қаради.

- Нима дейсиз?
- Нима дердим! Умрингда тўй кўрмаганмисан? Пайшанба куни маълум оши қиламиз, уқдингми? Нон ёп, балобаттар қил! Кимсанбойга мен вакил ота бўламан. Эртага икковимиз совчи бўлиб Думаникига чиқамиз.

Овсиним чолидан эшитган дўқнинг аламини келинидан олди.

– Туғишни билган, бола боқишниям эплагин-да, сигирдек хотин! – деди неварасини Потма келинга узатиб. – Ма, гултожихўроз дамлаб ичир! Томоғига тепки кепти!

Потма келин йиглаётган ўгилчасини кўтариб, чиқиб кетди. Боядан бери хаёлимда ўралашаётган гап энди тилимга келди:

- Менга қаранг, Оқсоқол... Эл-юрт нима дейди? Булар келин туширишнинг харажатидан қочиб, асраб олган қизини ўғлига сув текин олиб беряпти, демайдими?
- Э, яна гапиради-я! Оқсоқол бели оғриганига қарамай, қаддини ростлади. Афти буришиб кетди. Сандал устига ёзилган қуроқ дастурхонни жаҳл билан муштлади. Туршак-жийдалар ҳар ёққа сачраб кетди. Икки ёш бир-бирига кўнгил қўйганми, ахир! Оғзига кучи етмаганлар билан нима ишинг бор? Айтдим-ку, қизингга мен совчи бўп чиқаман. Анови мумсик чолингга айтиб қўй: шу пайтгача Ориф оқсоқол совчи бўлиб борган хонадонда қиличи синиб қайтганмас. Гап шу: қиз Думаники, ўғил маники. Тушундингми?

Оқсоқол ҳалиям ўзимга келолмай ўтирганимни англади. Кўзимга бирпас қараб турди-да, анча паст тушиб насиҳат қилди.

– Сен, келин, эсли-ҳушли хотинсан. Хайрли ишни кечиктириб бўлмайди.

Минг хаёл билан чиқиб кетаётган эдим, ўтирган жойида ўқрайиб қаради.

- Дума келса, дарров бу ёққа ғириллат!

Калишимни кияётганимда яна бир гап эсига тушиб қолди шекилли, қўли билан имлаб чақирди.

– Шошма, ўв! Робияни олдиданам ўтиб қўй. Нима қилсаям кўнгли ярим. Аммо Кимсаннинг хатидан билиниб турибди, қизинг жон-жон деб рози бўлади!

#### ЕТТИНЧИ БОБ

### РОБИЯ ХИКОЯСИ

### Оппок тонг

Қор тушгани билан ҳали ер музламаган эди. Картошканинг қолганини шу бугун қазиб олмасак – тамом. Кечаси ер яхлайди-ю, шунча нарса нобуд бўлади. Ҳалиям қор учқунлаб турар, аммо ҳаво илиқ эди. Бобом кафти билан қорни суриб ташлаб палакни топадида, кетмон уради. Хотин-халаж шоша-пиша картошкани териб, замбилга юклайди. Олимжон иккаламиз пайкал четида турган ҳўкиз аравага ташиймиз. Нимадир деб кўнглини кўтаргим келади.

- Аканг кетдиларми?
- Бугун кузатиб келишди! Бола оғзидан буғ чиқариб энтикиб-энтикиб нафас олади. Акам ях-шилар-а, опа?
- Яхшилар! Кўрасан, яқинда орден тақиб келадилар.

Кўзойнагини йилтиратиб, «яхши кўриш айб эмас-ку», деб илтижо қилган Очил ака, тоғамнинг бўйнига осилиб, «мениям обкетинг», деб ялинган

Раъно келинойим, оппок қор босган дала, қўлга олсангиз чаёндек чақаётган муздек картошкалар – ҳаммаси аралаш- қуралаш бўлиб кўз ўнгимдан ўтади, бошим айланади...

Хайрият, кун ботмасидан охирги эгатдаги картошкани ҳам териб олдик. Қорга ботиб қолган ҳўкиз аравани ҳай-ҳайлаб катта йўлга олиб чиққунча терлаб кетдик.

Бобом, қуруқ аравани тортишга ҳам мадори қолмаган эшагини «хих-хих»лаб йўлга тушди. Уйга етгунимизча қоронғи қуюқлашиб кетди.

Ойимнинг овкати халиям пишмабди.

Бобомнинг жахли чикиб кетди.

- Падарингга лаънат, пакана! деди тўнгиллаб.– Бир қошиқ обиёвгонни пишириб қўёлмасанг!
- Ойимга ачиниб энди ошхонага югурмокчи эдим, бобом жеркиб берди.
- Баққа ке, сени бошқа ишинг бор. Жўхорипоя ташийсан.

Ойим хафа бўлмади, дастурхонга бир чойнак чой тўртта туршак қўяр экан, негадир жилмайди.

- Сабр қилинг, дадажониси! Ҳозир пишади, бирам ширин гўжа қайнатиб қўйдимки, оғзингизда эриб кетади.
- Э, гўжангниям... Бобом пиёлага чой тўлдириб жаҳл билан бир кўтарган эди, оғзи куйиб, кўзидан ёш чиқиб кетди. Чойни тупуриб ташлаб, чийилади. Қайноқ десанг ўласанми, пакана?! Ёши олтмишга чиқибди-ю, чой қайнатишни билмайди!

Ойим бу сафар ҳам хафа бўлмади.

– Эҳтиёт бўлинг-да, дадажониси, – негадир яна илжайди. – Шомуродни кузатгунимча кеч бўлиб кетди-да... Айтганча, Комил табиб ҳам ўғлини жўнатди.

Бобом ҳадеганда жаҳлидан тушадиганга ўхшамасди. Дастурхондаги туршакларни кафтининг орқаси билан туртиб менга имо қилди:

- Юр!

Энди ўрнимиздан турган эдик, ойим бобомга ялинчоқлик билан қаради.

– Дадаси-и-и! – деди чўзиб. (Зарил гапи бўлса шунақа қилади.) – Оқсоқол тайинлаб-тайинлаб айтувдилар. Келиши билан чиқсин дегандилар.

Бобом баттар тутақди.

Нима қилай, белини силаб қўяйми? – деди чийиллаб. – Хотинига силатсин! – У менга қараб тўнгиллади. – Юр анқаймасдан!

Ота-бола ҳовлига тушдик. Қоронғи қуюқлашиб кетган бўлса ҳам ҳовли сатҳини қорнинг кўкимтир нури ёритар, гултожихўрозлар кўчада қолган етим боладек қор остида бошини ўксик эгиб турарди. Токзор этагидаги жўхоризор орасига киришимиз билан устимга шувиллаб қор ёғила бошлади.

Бобом тўгри қиляпти. Жўхорипояларни шу бугун ўриб олмасак бўлмайди. Хозирча ер юмшок. Эртага музлаб қолса, иш янаям оғирлашади. Бобом зич ўсган пояларнинг беш-олтитасини кафтига жуфтлаб бир тортса, илдиз-пилдизи билан сугрилиб чикади. Лекин ташиш бориб турган азоб. Қор тагида қолған поялар зил-замбил бўлиб кетган. Хар биттасининг илдизига қор аралаш бир ботмон лой илашиб чикади. Аввал илдизга илинган лойни оёгим билан сидириб тозалайман. Кейин бир қучоқ қилиб кўтараман. Хўл бўлиб кетган япроклар юзимга тегиб, ғашимни келтиради. Бостирмага ташиб киргандан кейин хаммасини алохида-алохида ёйиб қўйиш керак. Жўхорипояни устма-уст ташласа бўлмайди. Могор босиб, чириб кетади. Кўкламда, илик узилди кунларида мол емсиз қолади. Бостирма туйнугидан кирган совуқ шамол тинимсиз изиллайди.

Ойим томорқа эшигидан киришимни пойлаб туради. Қўлимдаги жўхорипояларга ёпишиб, бостирмага ташишга кўмаклашади. Кўриб турибман, бобомнинг олдига боришга қўрқяпти. Кўзига кўринса, сўкиш эшитади.

Қиш – мисоли ёмон касал. Келиши осон, кетиши қийин. Биз биринчи қор ёғиши билан шунчалик қийналиб қолдик. Кимсан акам нима қиляпти экан?.. У ёқлар туф деса, туфук яхлармиш...

Ниҳоят ҳамма жуҳорипояни ташиб буҳдик. Ҳаво совуҳлигига ҳарамай, терҳаб, буҡиб кетган бобом, очиҳҳан экан шекиҳҳи, ҳошиҳ соҳишга сабри чидамай, оҳдидаги гуҳани косаси биҳан куҳариб, ҳуҳриҳҳатиб ичиб ҳуҳ ҳоҳди.

- Яна сузиб келайми? деди ойим унинг кўзига тикилиб.
- Эрталабга қолсин! Бобом товоқ тагини яларкан, тушунтирди, – гўжанинг совуғи жа ичишли бўлади.
  - Чиқасизми?

Чарчоқдан кўзлари юмилиб кетаётган бобом норози гўлдиради.

- Қаёққа?
- Оқсоқолникига? Зарил иши бор экан.
- Оббо! Баданига энди иссиқ ўтган бобом роҳати бузилганидан ғаши келиб ижирғанди. Шу Оқсоқолам ғирт аҳмоқ одам-да! Нима иши бор экан, ярим кечада! Шундай дедию бари бир сандалдан суғурилиб чиқди.
- Идишларни ювақол, болам! деди ойим менга қарамай.

Чиқиб кетаётганимда чол-кампир пичир-пичир қилаётганини сездим. Бобомнинг «а?» дегани қулоғимга чалинди.

Тағин нима гап? Мендан яширадиган нима сирлари чиқиб қолди яна?

Хаёл билан нимқоронғи ошхонага кирганимни биламан, сарпойчан оёғимга аллақандай нам, қитиқловчи жунли нарса урилди. Ўтакам ёрилиб, қўлимдаги товоқларни ташлаб юборай дедим.

- Пиш-те! Оёғимга суйкалған мушук лип этиб ҳовлига чиқиб кетди. Зум ўтмай ўша томондан бобомнинг товуши келди:
  - Қани, маслаҳатлашиб кўрайлик-чи!

Яна қанақа маслаҳат! Кўнглим хижил тортиб, лип-лип чироқ ёғдусида товоқларни шоша-пиша ювдим, уйга кирдим. Бурчакдаги сандиқни очиб атрофига Кимсан акамнинг яккаю ягона оҳорлик тўни, дўппилари, латта-путталарни уйиб ташлаган ойим, ўтирган жойида елкаси оша қаради. Еттинчи лампа ёруғида юзи шодон қизариб кетган эди...

- Сенам ўзингга етгунча пишиқсан, деди негадир кулиб. – Қиз бола шайтон бўлади дегани шу-да! Қайрон бўлдим.
  - Нега унака дейсиз?

Ойим ўрнидан дик этиб турди.

– Вой-вой-вой, содда муғомбир-ей! – Икки қўллаб юзимдан ушлаб кўзларимга тикилди. Кўзларида қувноқ табассум аралаш меҳр бор эди. – Шунинг учун совчи келса бир сапчиб тушаётган экансан-да!

Бундан чиқди Кимсан акамдан хат келган! Бундан чиқди у хатимни олган! Бундан чиқди... «Ростданми?» деб юборишдан ўзимни аранг тутиб қолдим.

Икки юзим ловуллаб ёниб кетаётганини сезиб турар, кўзимни қаёққа яширишни билмасдим.

– Шу гапни ўзимга айтсанг бўлмасмиди, шайтон қиз?! – деди ойим эркалаб.

Бари бир тилимни шунча тишласам ҳам юрагимни ёриштирган савол оғзимдан чиқиб кетди.

- Улардан хат келдими? (Қизиқ, ойим бобомнинг кетидан «улар» деб гапирарди. Қозир ўзим ҳам шунақа деб юборганимни билиб баттар уялиб кетдим.)
- Келди-келди! Ойим тағин кулди. Сен ўқийдиган хатмас. Қиз болага уят бўлади.

Бутун вужудимда ширин бир титрок турди. Беихтиёр ойимнинг қўлидан юлқиниб чиқиб бериги уйга кирдим. Деразанинг буғланиб қолган ойнасини артиб ховлига қарадим. Вақт ярим кечадан ошган бўлса хам ташқари ёруғ эди. Боягина етимчалардек дийдираб турган гултожихўрозлар хам, молхонанинг қор босган томи хам кўзимга оламжахон бўлиб кўринар, қор деган нарса шунақа покиза бўлишини, қиш деган нарса шунақа иссиқ бўлишини биринчи марта кўриб турганимга ўзим хайрон эдим. Оёгимга суйкалган мушукнинг хўл елкасини силадим. Мунча юмшоқ! Қор мунча тиниқ! Ана, ҳамма ёқ ёп-ёруг! Шунақанги ёругки, кашта тикса бўлади! Хаёлимга шу ўй илиниши билан тахмондаги қутини титкилашга тушдим. Мана, қийиқча! Кимсан акамники! Йўқ, бунисимас. Бунисига гул тикиб бўлганман. Хов ўшанда! Иккаламиз Тошкентга томошага борган кунимиз, ойимдан бекитиб! Яна аллақанча қийиқчани ғамлаб қўйганман. Мана! Шунисига тикаман!

Нинадан ип ўтказишга анча қийналдиму парво қилмадим. Зарари йўқ. Ипак қалин бўлади-да, ўзи. Ана, бўлди! Дераза ёруг! Чироқ керакмас. Қорнинг ўзи ёритиб турибди.

Дераза тагига ўтирганча зангори қийиқчага қизил ипак билан «К», «R» деган ҳарфларни босишга киришдим. Ойим, мени ухлаб қолди деб ўйладими, уялтиргиси келмадими, ҳайтовур бу ёққа кирмади. Сезиб турибман: нариги уйда чироқ ёниқ.

Ойим бобомни кутяпти. Нимқоронғида каштам қинғир-қийшиқ чиқди. Нима бўпти? Кимсан акам келса айтаман. «Қор ёруғида тикканман», дейман. Кимсан акам ҳайрон қолади.

Ниҳоят ҳовли томондан қорнинг ғирчиллагани, бобомнинг айвонга чиқиб гурсиллатиб ер тепгани эшитилди.

- Онаси! Пайшанбага хабар қилавер!

Хозир ойим кириб келишини билиб, қийиқчани қутига яширдим-да совиб қолган сандалға оёғим-ни тиққанча ўзимни ухлаганга солиб ётиб олдим. Ташқарида, дераза ортида оппоқ, тип-тиниқ тонг отиб келар эди.

#### САККИЗИНЧИ БОБ

## «ҚОРА АММА» ХИКОЯСИ

## Қизимга она, ўғлимга қайнонаман

Робияни тонг отмасдан ишга жўнатдим. Ўлар энди, қиз бола ўзининг «маълум оши»да ўзи ўралашиб юрса. Қўни-қўшни «учиб-қўниб» турган экан, демайдими?

Кимсанимни кузатган ўша саратон кунидан бери бунақа чиройли патир ёпмаган эдим. Қопда қолган буғдой уннинг ҳаммасини қордим. Чолимнинг ўзи айтди. Эрталаб отамдан қолган энг катта бисотим – пат гиламни эшак аравага ортиб бозорга олиб кетаркан, тайинлади:

 Ёг солиб патир ёп, онаси! Ҳаммаси рисоладагидек бўлсин!

Нонни узяпману нуқул Кимсан билан гаплашаман. Мана, болам, ҳаммаси таомилдагидек бўляпти. Вой, бола-я, кўпайгур-а! Кўнглингда-ку шу ният бор экан, кетаётганингда бир оғиз айтмайсанми? «Шунақа, шунақа, ойи, мени кўнглим Робияда», демайсанми? Аллақачон бошини боғлаб қўймаймизми? Робияям қизиқ. Бегона эмас-ку! «Ойижон, Кимсан акам билан аҳду паймонимиз бор», деса-ку, олам гулистон!

Пешинга яқин Оқсоқолникидан тўй келди. Ярим қоп гуруч, бир чирпит ёғ, бир қоп ун. Седана сепилган ҳолва, майиз, каллақанд... Гилам пулига келган ёғ билан гуручни Оқсоқолникига чолимни ўзи олиб бориб берувди. Ҳолва, майизлар қаёқдан пайдо бўлди? Оқсоқол билан овсинимнинг иши-да!

Чолим Кимсан келса оёғига сўймоқчи бўлиб юрган қўчқорни бўгизлади. Ўз қўли билан ош дамлади. Бирпасда анча одам тўпланди. Байрамларда киядиган мовут камзули устидан овсинимнинг иссиқ рўмолини белига боглаб олган Оқсоқол айвонда ўтириб ҳаммага буйруқ беряпти.

- Магизни мўлроқ солавер, пакана! Эрингга ўхшаб қурумсоқлик қилма. Қолвадан ташла, қолвадан!
- Нега анграясан, абзи? Самоварингни суви қуриб кетди-ку. Эритиб қўйсанг, нақд ўзингни тутантириқ қилиб ташлайман!

Патнисларга ҳолва ташлаётиб, разм солиб қарасам, абзи ғалатироқ кўрингандек бўлди кўзимга, Оқсоқол ҳазиллашиб дашном берса, нуқул таъзим қилади. Сариқ киприкларини пирпиратиб, илжаймоқчи бўладию лаби титрайди. Ичиб олганми...

Оқсоқол патнис ташиб юрган Холпош овсинимга тегишади.

– Ҳой семиз, кўзингга қара! Йиқилиб-нетиб юрма тағин. Сени кўтариб олишнинг ўзи бўладими?

 Лўмбиллаб хизмат қилиб юрган овсиним шарақлаб кулади.

– Ҳамма кўтармасаям сиз борсиз-ку, чол! Менга жонингиз куймасин-да, ўзингизга қаранг. Белингизга шамол тегмасин!

- Ишинг бўлмасин, тегса меникига тегади, сеникигамас!

Хазил-хузул билан меҳмонларга патнис тарқатилди. Ошхонада сопол лаганларни ювиб ўтирсам айвон томондан Оқсоқолнинг суюниб ҳайқиргани эшитилди.

- Ие, ана келин болаям кеп қолди.

Йўг-е! Нахотки Робия одамларни кўзига кўринса? Хайрон бўлиб ховлига чикдиму Раънохонни кўриб қувониб кетдим. Келиним ҳалиям онасининг уйида бўлса керак деб ўйлагандим. Қаранг, ўзи кепти! Бундан чикди Кўтармага қайтибди-да.

Югуриб бориб икки юзидан ўпдим.

– Билгандек келганингизни қаранг! Шомуроддан хат-хабар борми?

Келиним чиройли қундуз ёқали палто кийиб олган, кўҳли кўзлари маъюс кулиб турарди. Ўпаётганимда димогимга гунафша ҳиди урилди.

– Ҳозирча йўқ, – деди секин. – Тўйнинг устидан чиқиб қопман шекилли!

Ичимдан зил кетиб тушунтирдим.

- Жон келин, шошиб қолдик. Укангиз хат ёзибди. Робиянинг бошини боғлаб қўйинглар, дебди. Оқсоқолнинг маслаҳати билан шу ишни бугун қила қолдик. Хабар бермоқчи эдик, поччангиз бозорга кетди. Қайси куни Робия Кўтармага борса йўқ экансиз. Қудам тузукмилар?
- Шукр... Раънохон майин жилмайди. Кеча кайтдим.

Жуда дилбар-да, келиним. Аразлаб ҳам ўтирмади. Қундуз ёҳали пальтосини ечиб ташлаб дарров лаган ювишга тушиб кетди.

 Менга табелчилик қиласиз дейишяпти, – деди лаганни қуруқ сочиққа арта туриб: – Майлими? Қарасам кўзлари жавдираб, жавоб кутяпти.

- Ким айтди?
- Раис, Умар ака...
- Яхши-да! дедим чин дилдан суюниб. Лойга беланиб кетмон чопгандан кўра табелчи бўлсангиз ёмонми, Раънохон! Саводингиз бор, ҳисоб-китобни биласиз...

Ош энди дамланган эди, поча-пўстин кийган Умар закунчи ҳам келиб қолди. Ёнида Соли сўпоқ... Буғалтир сўпоқ бўлсаям, яхши, бечора! Кетмончигами, сувчигами ҳақ тегмай қолса, нимага тегмаганини эринмасдан тушунтиради. Колхоз МТСдан қарздор бўлиб қолганини, тракторга керосин етмаганини, ҳосил яхши унмаганини... Хуллас, инсофли одам. Икковлари олдинма-кейин кириб келишлари билан одамлар янаям жонланиб кетди.

– Тўйлар муборак бўлсин! –деди Закунчи чехраси ёришиб. Бошидан чақмоқ телпагини олган эди, қопқора сочлари чаккасига ёйилиб тушди. – Табриклаймиз! — У аввал айвонда ўтирган Оқсоқол билан, кейин чолим билан қўл олишиб кўришди. – Ака! — деди қор босган бехи тагида турган Комил табибга қамчи билан имо қилиб. – Ташқарига чиқинг, гап бор!

Комил табиб эшикка йўл олди. Бир оздан кейин икки букчайиб қоп орқалаб кираётган эди. Оқсоқолнинг кўзи тушиб, зардаси қайнаб кетди.

– Ҳой сўпоқ! – деди қўлини пахса қилиб. – Аканг тенги одамга қоп орқалатгани уялмайсанми? Ҳирсдай кучинг бор. Ол ўзинг!

Оқсоқол Комил табибни қаттиқ иззат қилади. Луқмони ҳакимнинг нафаси теккан дейди. Бутун Нўғайқўргонда фақат шу одамни сизлаб гапиради. Табибнинг ўзиям чақалоқ болагача «сизлайди». Чолимнинг айтишича, табиб сигирини ҳам сизлаб чақираркан. «Чу» демай, «чуинг» деркан... Соли сўпоқ «хўп бўлади» деб ўша томонга пилдиради. Пак-пакана, семиз гавдасини лапанглатиб табибнинг ёнига борди. Қўярда-қўймай елкасидан қопни олди.

– Мана бу бошқа гап! – Оқсоқол хижолат чекироқ туриб қолган табибни чақирди. – Баққа келинг, Комилбой. Жойингизни билиб ўтиринг.

Шляпаси қийшайиб кетган Соли сўпоқ қопни айвон тагига тираб қўйди-да, терлаб-пишиб яна бир қоп нарса орқалаб кирди.

- Совет жангчисининг тўйига колхоздан совга! деди Умар закунчи тантана билан. Ватанимиз учун жон фидо қилаётган аскардан биз ҳам ҳеч нима аямаймиз. У чолимга қараб кулиб қўйди. Бир қоп ун, бир қоп гуруч! Правление номидан.
  - Чолим шошиб қолди.
- Ўтиринг, раис, ўтиринг, деди икки қўлини кўксига қўйиб. – Ҳозир ош сузамиз.

Умар закунчи Оқсоқол билан Комил табибнинг ёнига айвонга чиқди. Қозон очилиши билан ҳовлини ош иси тутиб кетди. Чолим яхлит гўштларни капгир учига илиб олиб, тогорага солаётган эди. Оқсоқол ўтирган жойидан мўйловини бураб қўйди.

– Бугун қўшалоқ байрам, Дума! Эшитдингми, аскарларимиз немисни Волга – Масков каналининг нариги бетига улоқтириб ташлашибди.

Умар закунчи Оксоколнинг елкасига кул ташлади.

- Оқсоқол - маладес! Ҳамма нарсадан хабардорсиз-а!

Оқсоқол унга қарамай, чолимга буюрди.

– Ошнинг олдини тоғорага бос! Сергуштроқ булсин. Устига патир қуй. Қолва билан магиздан тугунга ўрагин-да, омборда пиёз тозалаётганларга юбор!

Чолим тогорага ош босди. Патир, қолваларни алохида тугунларга ўраб, қўлига бердим. Эшак

арава қорда чуқур-чуқур из қолдириб йўлга тушганидан кейин қовлига кирсам, Комил табиб лаганларга ош сузиб тарқатяпти.

Кўп ўтмай Оқсоқолнинг асабий овози гулдиради.

- Чой! Ухлаб қолдингми, абзи! Меҳмонларга чой бермайсанми?

Раънохон ошхонадан чиқиб, югуриб олдимга келди.

- Оқсоқол чой сўраяптилар.
- Вой ўлсин, абзи қаёққа кетди?

Беҳи тагида қайнаб турган самовар олдига борсам Рашид абзи йўқ. Каттакон мис самовар устида олтита чойнак тумшуғини тумшуғига тираб, териб қўйилибди. Жўмракни бураган эдим, сув жилдираб тушди. Шоша-пиша чойнакларни хонтахта устига қўйиб, самовар қопқоғини очсам, тагида икки қултум сув қолибди. Яхшиям эриб кетмагани! Абзининг бунақа одати йўқ эди-ку! Ичиб йиқилиб қолдими, нима бало!

# ТЎҚҚИЗИНЧИ БОБ

# робия хикояси

## «Шумқадам» абзи

Из тушмаган қордан юришнинг гашти ғалати бўлади. Ҳамма ёқ жимжит. Йўл четидаги қор босган толлар турмушнинг баланд-пастини кўравериб, ҳар қандай мушкулотни хотиржамлик билан кутиб олишга ўрганиб кетган қариялардек оппоқ бошини қуйи солганча ўйга чўмган. Хўроз қичқирмайди, қушлар чирқилламайди. Фақат идора яқинидаги МТС томонидан якка тракторнинг ўқтин-ўқтин гупиллагани эшитилади.

Пастак девор ортидаги тандирдан зогора нон хиди анкийди.

Бугун бизникида зогора эмас, патир ёпиляпти... Бирпасдан кейин уйимизга одамлар йигилади. Ойим айтгандек, «ирим-сирими»ни қилишади-да, бутун қишлоққа хабар тарқалади: «Робиянинг боши богланди». Қизиқ, «боши богланди...» ўалати гап-а!

Қанийди ҳозир Кимсан акам ҳам, дадам ҳам ёнимда бўлса! Дадам роса суюнарди. (Биламан, дадам Кимсан акамни яхши кўрарди, доим ўғлим дерди.)... Кейин Кимсан акам иккаламиз ҳаммаларининг кўзини шамғалат ҳилиб, шаҳарга бориб, суратга тушиб келардик. Зўр келса ҳуда холани – Раъно келинойимнинг онасини кўргани бордик, деб баҳона ҳилардик. Айтмоҳчи, Раъно келинойим ҳайтганмикин, шаҳардан! Душанба куни Кўтармага ўтганимда уйига борган эдим, эшиги таҳатаҳ берк, келмаган экан. Бугунги маросимда Раъно янгам ҳам ҳатнашса яхши бўларди...

Омборга етиб келганимда кун ҳали ёришмаган, аммо олисдаги тоғлар қирраси ҳаво очиқ бўлишидан дарак бериб гунафшаранг тусда товланиб кўринарди. Колхоз омбори – томи сомон сувоқ қилинган пастак, узун бостирма. Қамиш босилган том ҳар йили ҳайта-ҳайта сувалаверганидан ҳалин тортиб кетган: ярим газ келади. Бунинг устига ҳор ёғиб, томни янаям ҳалин ҳилиб юборган. Биров пахсадеворга ҳазиллашиб туртиб юборса, азза-базза босиб ҳоладигандек. Арава сиғадиган дарвозаси бор. Дераза ўрнига ҳинғир-ҳийшиҳ тахталар ҳоҳиб ҳўйилган. Нарироҳда тунуҳа томли идора. Идора рўпарасида чойхона. Ҳовуз атрофидаги ҳор босган толлар устида ҳарғалар чарх уриб ҳағиллайди. Ундан нарида Умар закунчининг

тунука томли уйи. Берироқда атрофи пахса-девор билан ўралган МТС ховлиси. Бояги трактор йўтал тутган одамдек ора-чора гуп-гуп қилиб қўяди, аммо муттасил тарилламайди. Ўша томондан осмонга ўқтин-ўқтин кўкимтир тутун кўтарилади. Омбор дарвозаси юзига ёпиб қўйилган экан. Топ ташлаб қолған дарвозанинг бир тавақасини очгунча харсиллаб кетдим. Тагини қор босиб қолибди. Энди ичкари кирмоқчи эдим, идора пештоқидаги тўртбурчак қора карнай қитир-қитир қилди. Хаммага таниш бўлиб қолган йўгон, салобатли овоз эшитилди. Совет Информбюросининг қирқ биринчи йил йигирма тўққизинчи ноябрь ахбороти эълон қилинди. Демак, кечаги ахборот. Диктор душман танк қисмлари Яхрома деган жойдан Волга-Москва канали кўпригидан ўтишгани, аммо бизнинг қўшинларимиз фашистларни каналнинг нариги бетига улоқтириб ташлаб, қарши хужум бошлашганини айтди. Негадир найзали милтиқ кўтариб, қор босган далада душманларни қувиб кетаётган Кимсан акам кўз ўнгимга келди. Бизникилар ҳужумга ўтган бўлса, бундан чиқди бир-икки ойда, узоғи билан бахорда уруш битади. Кимсан акам келади-да, кейин...

Юрагим ширин орзиқиб кетди. Майли, ойим уялтирсаям майли, бугун Кимсан акамнинг хатини бари бир сўраб оламан. Адресини биламан-да, яна хат ёзаман.

Совуқ, зах омборга киришим билан пиёз иси димогимга урилди. Омбор ичи нимкоронги. Рўпарадаги дераза ўрнига қоқилган тахталар орасидан тарам-тарам ингичка нур тушиб турар, аммо омборни ёритишга ожизлик қиларди.

Бир муддат туриб қолдим, кўзим қоронғиликка ўргангандан кейин омборнинг бир бурчагида тоғдек уюлиб ётган пиёз, нариги бурчагидаги карамларни илғадим. Пиёз тўдаси ёнида қанор қоплар тахлаб қўйилган эди. Бугун пиёз саралаймиз. Йиригини қопга солиб тайёрлаб қўямиз, фронтга жўнатишади, данакдек майдаларини уруғликка ажратамиз.

Қоплардан бирини тагимга ёзиб энди пиёз саралай бошлаган эдим, дарвозадан тушиб турган нур хиралашди.

 – Қайси бирингсан, ҳой? – деган кескин товуш эшитилди.

Танидим. Башор опа! Дарвоза олдида қўлини белига тираб турибди.

- Мен! дедим ўзимни танитиб.
- Қолғанлар қани? Эрини туш кўриб ётибдими?
   У чапанича катта-катта қадам ташлаб, тепамға келди. Димоғимға лампамой ҳиди урилди.
- Ўлсин, мотор ўт олмаяпти! деди ёнимга чўнқайиб. МТСда ўзимдан бошқа ҳеч зоғ қолмади. Нима бало, булар мени эркак деб ўйлайди, шекилли!

У қорамой босган қўлини этигининг қўнжига артиб тозалади-да, бекор ўтиргандан, бекор ишла қабилида тўдадаги пиёзларнинг думини юлиб, қанорга ташлашга тушди.

Башор опа – шаддод хотин. Унча-мунча эркакни бир чўқишда қочиради. Нўғайқўргонда биринчи бўлиб трактор ҳайдаган аёл ҳам, Йўлдош отанинг қўлидан мақтов қоғоз олган ҳам шу.

Ойимнинг айтишига қараганда, у ёши ўттизни қоралаб қолгунча ҳам эрга тегмабди. Бир марта совчиларни олдига солиб қувлагандан кейин қайнонасини токчага чиқариб қўядиган бунақа келинни ҳеч ким ҳавас қилмай қўйибди. Сўфинамо отаси, мусичадек беозор онаси, «қиз кўргандан туз

кўрсам бўларкан», деб куёвдан умидини узганида Башор опа Тошкентга серқатнов бўлиб қолибди. Бир куни қош-кўзи қоп-қора, суқсурдай йигитни бошлаб кепти.

– Шу йигит сизнинг куёвингиз бўлади. Кўнсангиз узатинг, кўнмасангиз ҳозир куёвингиз билан қочиб кетаман, – дебди. Сўфинамо ота «эл-юрт ўртасида шарманда қилдинг», деб соқолини юлибди. Она бечора, «оқ сутимни оққа, кўк сутимни кўкка совурдим», деб йиглабди. Башор опа пинагини бузмай сабзи тўграётганмиш (Куёвни пайгамбарлар ҳам сийлаган. Ош дамлаш керак-да, ахир.) Отаона тақдирга тан бериб, раисни маслаҳатга чақирибди. (Ўшанда Оқсоқол раис экан.) Оқсоқол индамай чиқиб кетибди-да, жума куни фалончиникига тўй деб ҳаммага хабар қилибди.

Башор опа урушгача Почча билан иноқ яшар эди. (Ичкуёвнинг отини ҳеч ким билмас, каттаю кичик хамма Почча деб чақирарди.) Поччани мен ҳам кўрганман. Колхозда дуч келган ишни қилиб кетаверар, уятчан, ювош киши эди. Башор опа ювош бўлмаганига қўярмиди! Ойим айтган: бир куни Башор опа шовлани қайнатиб ўзи тракторга андармон бўлиб кетибди. Хуллас, эрининг олдига бир лаган қирмоч обкеб қўйибди. Эркак бари бир эркак-да! Поччанинг аччиги чиқиб бўралаб сўкинибди. Шунда Башор опа сенмисан онамни сўкадиган деб, шавлани лаган-пагани билан Поччанинг юзига отибди. Почча шўрлик икки юзи шилиниб тушиб, бир ойгача одамларнинг кўзига кўринолмай юрибди... Хар кимнинг ўзига яраша ташвиши бор. Башор опа ўн йил турмуш қуриб бола кўрмаган. Икки ойча бурун Почча ҳам урушга кетди. Одамларнинг гапига қарағанда, Башор опа эрини вагонга чикара туриб тайинлаганмиш:

– Гитлерни ўзини ўлдириб хотинини банди қилиб обкемасангиз, сиздақа эрни уч талоқ қўйдим. Гитлернинг хотинини чўри қилиб ишлатмасам, хумордан чиқмайман! – деганмиш.

Омбор энди сал ёришганда Фотима-Зуҳра келинлар бошлашиб келиб қолишди. Фотима келин елкамга қоқиб кўришаркан, сирли жилмайди.

- Моро бўлсин, пошша қиз!

Зуҳра келин қоп-қора кўзини қисиб қўйди.

Уялиб Башор опага қарадим. Қозир аския қилади. Зуҳра келин «гапирма» деб опасига имлади шекилли, Фотима келин жиддий тортиб ёнимга чуҡди.

- Трактор юрмай қолдими? деди Башор опага юзланиб.
  - Сенлар қарашмаганингга юрмаяпти!
- Вой-вой-вой! Фотима келин ҳуркиб орқага ташланди. Мен тракторнинг ёнига бора оларканманми?
- Ўлмайсан! Эринг ҳайдаган тракторни сен ҳайдолмайсанми? Сен Шокир аканг минган тракторни оласан, сен... у Зуҳра келинга юзланди. Зокир акангникини. Ҳарна иккита ёрдамчи бўлади.
- Йўғ-е, деди Зуҳра келин бош чайқаб. Тракторчилик эркакларнинг иши.

Дарвозанинг очиқ тавақасида тағин бир соя пайдо бўлди. Гап узилиб қолди. Ўша томондан Парча опанинг дўриллаган овози келди:

- Ассалом алайкум! Хормайла!
- Қоч, хира қилма! Башор опа чаққонлик билан пиёз думини юларкан, дашном берди. Сенга неча марта айтаман, ҳой Парча ўлгур, эрингни қўйнида ялпайи-иб ётмасдан, тезроқ қимилла. Қачон қараса итнинг кейинги оёғи бўлиб юрасан.

Парча ёйилиб кулди. Кулиши ғалати. Эркакча овозда «ҳў-ҳў-ҳў» дейди. Дўнгдек елкалари силкиниб, оғзидан туфук сачраб кетади.

- Эрим йўқ-ку, опа! деди дўриллаб. Бўса топиб беринг!
- Вой, ҳалиям тегмадингми? Башор опа чинакамига ҳайрон бўлгандек, Парчага ҳаради. Шундоқ ҳиз эрсиз юрса, бу ҳандоҳ ноинсофлик-а, нима дединглар, ҳизлар?

Фотима-Зухра келин қаҳ-қаҳ уриб кулишди. Парча ҳам уларга қушилишиб дуриллади. Ростми-ёлгонми, билмадиму бир вақтлар Парчани эрга беришган дейишади. Куёв чимилдиққа кириб, шундоқ Парчанинг юзини очибди-ю, дод солиб қочиб чиқиб кетибди. Уша-уша бу юртлардан бош олиб кетганмиш.

– Ўтир! – Башор опа унга бурчакроқдан жой кўрсатди. – Вой, жонингни қадрини билмай ўл! Ерга ўтирсанг ҳам ҳеч бало қилмайди. Ёғинг кўп сани!

Қазил-ҳузул билан бирпасда аллақанча пиёзни қанорларга жойладик. Иш қийин эмас, аммо омбор зах, бунинг устига ачиган карам, пиёз иси димоқни ёради. Ҳаво илиқ бўлсаям, бари бир қорнинг заҳри бор. Қимирламай ўтирганимиз учун тиззаларимиз увишиб қолган... Охири ҳаммамиз жимиб қолдик. Чамаси ҳар ким ўзича хаёл сурар, ҳар ким олисларда юрган ўзининг одамини ўйлар эди.

Башор опанинг юраги сиқилиб кетди шекилли, атайлаб шанғиллади:

- Тўйни қачон қиламиз энди, Парча?
- Кимни тўйини этвоссиз, опа?
- Вой, ўзингни соддаликка солмай... Башор опа муғамбирона кулимсиради. Рашид абзи совчи қўйибди-ку, сенга!

Парча астойдил ажабланди. Кейин қўлидаги муштдек пиёзни қопга ташлаб қўл силтади.

- Э, бўмийди опа!
- Нимаси бўлмас экан! Туппа-тузук эркак. Инсофли, диёнатли. Уйи ҳам яқин. Шундоқ девор ошасану келин бўлиб тушасан. Ҳар куни мўрчасида мазза қилиб чўмиласан.
- Бўмийди! Парча юзини ўгирди. Мино ичади. Мино ичиб, гармон чалади.

Бир зум сукутдан кейин Башор опа янги таклифни айтди:

- Унақа бўлса, Закунчига айтаман, эртага совчи юборади.
  - Ким? деди Парча бақрайиб.
- Колхозда нечта Закунчи бор! Башор опа шуниям билмайсанми, дегандек чимирилиб қаради. Раисни айтяпман! Умар закунчини!
- Э, уям бўмийди! Парча пиёз думини шахт билан юлиб, четга отди. Қўрқаман, кўзи ёмон!

Башор опа астойдил жаҳли чиққандай хитоб қилди.

– Вой, кўнглингни кўчасидан ўргилдим! Шундоқ раисга обераман десам, сиз ноз қиласизми?

Ажаб, ҳеч аразламайдиган Парча опа бирдан тўрсайиб олди.

– Керакмас! – деди йиғламсираб. – Кўзи ёмон!

Гап яна узилди, пиёзнинг шитир-шитири авжига чикди. Ачиган карам иси димокка урилди. Ташкарида кун ёйилиб кетганига қарамай, совук забтига олиб, оёғимга сўзак кира бошлади.

– Адасини туш кўрибман, – деди бир маҳал Фотима келин. Овози негадир ғамгин эди.

Башор опа гапга мавзу топилганидан севиниб шодон кулди.

- Тўгрисини айт: нима қилаётганмиш эринг? Фотима келин ерга қаради. Лўппи юзи қизарди.
- Сизга шунақа гап бўлса!

Башор опа қаҳ-қаҳ уриб кулди.

- Рост-да, эрини соғинган хотиннинг тушига нима кирарди!
- Йўқ, деди Фотима келин махзун товушда. Тушимда Ойпопукни бешикка белаётганмишман. Вой, кап-катта болани бешикка белаб эсимни едимми деб мундоқ қарасам, бешикда ётган қизим эмас, Шокир акам эмиш.

Ўртага этни жунжитувчи хатарли сукунат чўкди. Хотин кишининг тушига бешик кирса, ўнгида тобут кўради, деган гап қулогимга чалинган эди. Қозир шу эсимга тушиб, ичим сесканиб кетди. Секин бошимни кўтариб қарасам, Фотима келин ўртачароқ пиёзни чангаллаб, бир нуқтага термилиб ўтирибди. Яхшиям, Башор опанинг шаддодлиги бор экан.

– Вой, оғзингга шакар! – деди суюнчи оладиган алпозда қувониб. – Унақа бўлса яна туғаркансан. Хеч нимани сезмаяпсанми?

Фотима келин баттар қизарди.

– Қизиқмисиз, – деди секин. – Кетганларига ярим йил бўляпти-ку.

Башор опа эсанкираб қолди, дами ичига тушиб кетди. Аммо Фотима келиннинг кўнглини кўтаргиси келди шекилли, Зухра келинга тегишди.

- Сен-чи, қушалоқ келиннинг кичкинаси! Сенинг тушинг бузилмадими?
- Бузилди, деди Зуҳра келин бижир-бижир қилиб. Поччани туш кўрибман. У киши дод солиб қочиб кетаётган эмишлар, сиз шавла юқи капкир кўтариб қувиб юрганмишсиз.

Омборнинг қамишлар осилиб ётган шифтини кутариб юборгудай кулги янгради. Боядан бери анграйиб турган Парча йўгон тиззаларини муштлаб шунақанги дўриллаб кулдики, қулоқни тешиб

юборай деди. Мунғайиб ўтирган Фотима келин ҳам хандон отди. Башор опа кула-кула кўзларини артди-да, тўсатдан жиддий тортиб қолди.

– Қанийди-я, поччанг ёнимда бўлса, – деди хўрсиниб. – Қар куни ўн марта деса, ўн марта, юз марта, деса юз марта шавла қилиб берардим. Ўз қўлим билан едириб қўярдим. Сув иситиб, оёқларини ювардим. – У бошини хам қилиб уҳ тортди. – Қанийди олдимда бўлса...

Ташқарида от кишнади. Дарвозадан Умар закунчи кириб келди. Бошида чақмоқ телпак, эгнида ихчам поча-пўстин, қўлида қамчи.

- Хорманглар-ов! - деди тетик оҳангда. - Настраена эўр-ку! Демак иш беш!

Раиснинг ҳурмати учун ўрнимиздан турдик. Парча, Башор опанинг бояги нияти эсидан чиқмаган экан шекилли, қайлиғидан уялган келинчакдек омбор бурчагига лапанглаб қочди. Башор опа ўрнидан турмаса ҳам бир қўзғалиб қўйди.

- Ие, сиз ҳам ҳашарга келдингизми? деди За-кунчи унга ҳараб, МТС нима ҳилади сизсиз?
- Мен-ку, ҳашарга доим келаман! Башор опа унинг кўзига тик қараб таъкидлади. Сизлар ҳам ҳашар қилмасанглар бўлмайди. Менга иккита ёрдамчи керак.
- Билмадим! Умар закунчи юзини ўгирди. Закун бўйича МТС мустақил ташкилот.
- Мустақил бўлгани билан трактор колхознинг ерини ҳайдайдими? деди Башор опа кескинлик билан.
- Билмадим! Закунчи тез-тез юриб нари кетди. Тезроқ қимирланглар! деди дарвоза олдида тўхтаб. Эртага фронтга бир вагон пиёз жўнатамиз.

Ташқарида от ту ёқларининг қорга бўғиқ урилиб дукиллаши эшитилди. – Э, ўл, закун-пакунинг билан! – деди Башор опа энсаси қотиб. – Тракторни томорқамга обориб ишлатяпманми, олифта-қуруқ!

Қизиқ, Закунчи келиб кетиши билан орага ғашлик тушди. Башор опа Парча опага ҳазил қилиб, бир-икки гап отди-ю, суҳбат илимади.

Анчадан кейин дарвоза томондан овоз келди.

- Ҳой ким бор!

Бобомнинг товушини таниб, бир сапчиб тушдим. Фотима-Зухра келинлар менга ярқ этиб қарашди. Башор опа ўрнидан тургунча дарвозада эски қулоқчин кийган бобом кўринди. Қўлтигида каттагина тогора. Бир қўлида тугун.

Димоққа ош иси урилди. Башор опа сўрамаса ҳам бобом тушунтирди.

– Тўй, Башоратхон, тўйни бошлаб қўйдик! Робияга тўй келди, Кимсанга унаштирдик.

Нима қилишимни билмай қолдим. Ташқарига қочиб чиқай десам, дарвоза олдида бобом турибди. Боя Парча қочиб борган бурчакка ўзимни урдим. Башор опа бир зумда шундай ернинг ўзига дастурхон ёзди. Бобом кетиб бўлганини билиб, энди қочиб қолмоқчи эдим, Башор опа қўлимдан маҳкам тутди.

– Эрга тегишга уялмаган, ошини ейишга ноз қиласанми, қиз тушмагур, ўтир бундоқ!

Лаган тўла зарчавали сап-сариқ ошга Парча шоша-пиша қўл чўзган эди. Башор опа билагига қарсиллатиб туширди.

– Шошма, нафсинг қургур, аввал патирдан е, ҳолвадан оғзингга сол. Кейин ҳамма ош сеники!

Қорним очиб кетган бўлсаям, ошдан бир-икки чўқиб қўлимни артдим.

Башор опа пиёз ҳиди анҳиб турган лаблари билан икки юзимдан ҳаттиҳ ўпди.

– Бахтли бўл, жон синглим. Қайлиғинг омон-эсон келсин!

Қоронғи тушиб, одам одамни ажратолмайдиган бўлиб қолгунча пиёз тозалаб, қанор қопларга жойладик. Чамамда ҳаммамизнинг кайфимиз чоғ эди. Башор опа увишиб қолган оёқларини уқалаб ўрнидан тураётганда Парчага дашном берди:

– Ноз қилмасдан Закунчига тега қолсанг-ку, сениям ошингни ердик.

Парча қоронғида дўриллади:

- Ош емасамам майли, кўзи хунук!

Бўшаган тогорани дастурхонга ўраб кўтараётган эдим, Фотима келин қўймади.

 – Ўзим, келинпошша, – деди кулиб. – Сизни аяш керак. Нима қилсаям келинсиз.

Учаламиз тизилишиб йўлга тушдик. Кечки изгирин турган, совук эди. Қор дарров музлабди. Оёқ ости гичир-гичир қилади. Осмон тип-тиник, йирик-йирик юлдузлар совукдан титраб йилтирайди. Қишлоқ жимжит. Олисда — разъезд томонда поезднинг тарақа-туруқ овози келади. Қани ўша поездга осилиб олсаму Кимсан акамнинг олдига обориб қўйса. «Айтганингиз бўлди, Кимсан ака, кўнглингизни тинч қилинг, энди менга совчи келмайди», десам.

Қоронғи бўлса ҳам Оқсоқолнинг қўшқанот дарвозаси олдида турган отни узоқдан танидим: Умар закунчининг оти! Парво қилмадим. Нима қипти. Умар закунчи Оқсоқолникига келгандир-да!

Аммо Фотима келин тогорани биқинига босганча негадир хавотирланиб синглисидан сўради:

- Тинчликмикан, Зўра?
- Билмасам, деди Зуҳра келин ҳам овози титраб. Бунақа пайтда келадиган одати йўқ эди-ку!

Музлаган қорни ғарч-ғурч босганча қадамимизни тезлаштирдик. Дарвозага яқин келишим билан

дилни ўртаб юборадиган фарёд қулогимга ўқдек кирди.

- Вой, боле-ем! Қўшмозор бўлган болам!

Фотима келин тогорани қорга улоқтириб ичкарига отилди. Кетидан Зуҳра келин, ундан кейин мен ҳовлига чопиб кирдим. Айвон токчасида фонус хира ёниб турарди. Холпош хола сочларини ёйганча, айвонда оёгини узатиб ўтирар, тиззасига муштлаб додлар эди.

- Қўшмозор бўлган бол-е-ем!

Бир томондан Фотима келин, бир томондан Зуҳра келин қайнонасини қучоқлаб олишди.

– Ойижон, нима бўлди?! – деди иккаласи баравар. Холпош хола гох у келинига, гох бу келинига талмовсираб қаради. Аммо иккаласини ҳам танимади шекилли, яна тиззасига шапатилади.

– Уйинг куйгур Рашид абзи! Боланг ўлгур Рашид абзи!

Фотима келин «а!» деб қисқа хитоб қилди-да, шилқ этиб айвон тагига, қори куралган ерга йиқилди. Зуҳра келин қайнонасини ёқасига ёпишиб, кучи борича силкита бошлади.

– Нима бўлди, айтинг! – деди чинқириб. – Нима қилди?

Бусиз ҳам чайқалиб ўтирган Холпош хола кўзи олайиб, ёнбошига ағдарилди.

- Қандоқ чидайман! - деди энтикиб.

Зум ўтмай хириллаб нафас ола бошлади, Зухра келин тўсатдан бошидаги рўмолини юлқиб ташлади. Икки қўллаб сочини юлганча ёввойи овозда чинқириб юборди.

- Зокир ака-а!

Хушим жойига келганда Фотима келиннинг бошида «ойи, туринг, ойижон», деб чирқиллаётган Ойпопукка кўзим тушди. Энди йўлга кирган

Тоҳир эса иштончан, айвон бурчагида совуқдан дийдираб турарди.

Ерпарчин бўлиб ётган Фотима келинни кўтаришга кучим етмади. Юзига қор ишқалаган эдим, амаллаб кўзини очди.

– Туш кўрмай, мен ўлай, – деди инграб. – Бешик кўрмай мен ўлай!

Қор обкелиб аввал Холпош холага, кейин Зуҳра келинга сурдим. Холпош хола ингради:

- Шокир! Зокир! Болажонларим!

Нариги уйдан аввал ёқавайрон Ориф оқсоқол, кетидан ранги ўчган табиб билан Умар закунчи чиқиб келишди.

– Подадан бурун чанг кўтарма! – Оқсоқол хотинига дагдага қилди. – Аниқлаймиз! Хаммасини аниқлаймиз! Керак бўлса Калининнинг ўзигача бораман! – У сўзини тасдиқлатиб олмоқчи бўлгандек табибга қаради. – Абзи хато қилган. Адашиб бошқа хатни олиб келган. Мени ўгилларим бекорга ўлиб кетадиган болалармас.

Холпош хола тағин фарёд чекди:

- Бир эмас, иккитасидан баравар айрилсам-а!

Иккала келин икки ёқда дод солишар, Ойпопук Фотима келинни қучоқлаб, «ойи, дадамга нима қилди?» деб чинқирар, даҳшатдан ўзини йўқотиб қўйган кичкинтой Тоҳир эса совуқдан дийдираб анграйиб турар эди.

Нима қилишимни, кимни овутишимниям билмасдим. Аллақаердан ойим пайдо бўлди. Югуриб келиб Холпош холани қучоқлади.

– Ўзингизни босинг, овсинжон! – деди ўзиям йиглаб. – Адашган, овсин, почтачи адашган.

«Почтачи» деган сўз қулогига чалиниши билан Холпош хола баттар чинқирди.

– Уйда йўгимизда Попукка ташлаб кетибди. Сизникида юрганимда ташлаб кетибди!.. Ҳалигина қандоқ хурсанд эдим-а!

Овсиним тўй кўрди, деб қандоқ суйинган эдим-а, овсинжон! Қўш боламдан айрилиб қолавераманми?

Фонус ёниб турган токчадаги ярим варақ кулранг қоғозга энди кўзим тушди. Худди қўлимни чақиб оладигандек, қоғозни қўрқа-писа ушлаб, фонусга тутдим. Қизиқ, русчани яхши билмасам ҳам мазмунини дарров тушундим.

Ёш қуйилиб келаётган кўзларимни артиб-артиб босма ҳарфда ёзган хатни ўқидим... «Танк механиги сержант Зокир Орипов Москва остоналарида «Мединск» районида бўлган шиддатли жангларда ҳарбий қасамёдига содиқ қолиб қаҳрамонларча ҳалок бўлди. Ватан қаҳрамон жангчи Орипов хизматларини унутмайди. Капитан Максимов».

Хатнинг ҳаммаси босма ҳарфда, фақат Зокир Орипов деган сўзлар қўлда ёзилган эди.

Бундан чиқди Зокир ака ҳалок бўлган. Бундан чиқди Шокир ака тирик. Хайрият...

Энди шуни айтиб, Холпош холани «суюнтирмоқчи» эдим, токчада ётган худди шунақа иккинчи қоғозни кўрдим.

Қўлларим титраганча иккинчи хатни ҳам ўқиб чиқдим. Бунисиям худди биринчисига ўхшаган. Бунисига ҳам капитан Максимов қўл қўйган, фақат «танк механиги сержант Зокир Орипов» деган сўзлар ўрнига «стрелок», оддий солдат Шокир Орипов» деб ёзилган эди.

Ориф оқсоқол, «бизнинг азаматлар битта танкда хизмат қилади», деб гапириб юргани эсимга тушди-ю, ҳаммасини англадим.

Бундан чиқди...

Айвоннинг бир томонида Фотима келин, Шокир ака деб дод солар, иккинчи томонида Зухра келин, Зокир ака деб оҳ чекар, Холпош хола эса ойимнинг қучоғида тебранганча ҳамон нола қилар эди.

-Уйгинанг куйгур, Рашид абзи! Шумқадам абзи!

– Абзида нима гунох! – Оқсоқол шундай ҳайқирдики, токчадаги фонуснинг пилиги липиллаб кетди. Доим Оқсоқолдан зириллаб турадиган Холпош хола ҳам, келинлари ҳам бу сафар эътибор беришмади. Ҳар ким ўз дарди билан овора эди.

Биринчи бўлиб Умар закунчи ҳушига келди. Йўқ, у ҳушини йўқотмаган, аммо бир йўла шунча одамнинг гам-андуҳи олдида нима дейишини билмай тургани учун гапирмаган бўлса керак. Энди ўзини ўнглаб олди. Фонуснинг пилигини кўтарган эди, айвон ёришиб кетди.

- Яхшимас, ўртоқлар... - деди юпатувчи оҳангда... - Бунақа дод-фарёд қилиш яхшимас. - У бир зум жимиб қолди-да, бошидан чақмоқ телпагини олди. - Начора, бу - ҳаёт-мамот жанги. Ундан кўра Шокиржон билан Зокиржоннинг хотирасини...

Бирдан Оқсоқолнинг кўзида ўт чақнади. Назаримда мўйлови ҳам диккайиб кетгандек бўлди. Токчадаги телефон тутқичини юлқиб Закунчига ўқталди.

– Йўқол, хотира-потиранг билан! – деди хириллаб. – Йўқол!

Умар закунчи, «мана бу овсарни қаранглар», дегандек елка қисиб чақмоқ телпагини бошига кийди. Айвон зинасидан тушиб кетаётганда Оқсоқол унинг кетидан ғазаб билан ҳайқирди:

– Мени ўғилларим ўлмайди! Ориф Оқсоқолнинг ўладиган боласи йўқ!

Оқсоқолнинг овози ҳам – қўллари ҳам, соқоли ҳам муттасил титрарди.

Унинг «йўқол» дегани оғир ботди шекилли, Умар закунчи ҳовлига тушиб бурилиб қаради.

– Нима қилайлик, Оқсоқол, – деди лабини буриброқ, – уруш қурбонсиз бўлмайди, – чирт этиб тупурди-ю, дарвоза томон кетди.

Бобом бутун вужуди қалтираётган Оқсоқолни қучоқлади.

- Қўй, ўртоқ! – деди ялиниб. – Хатолик ўтган.
 Мени айтди дейсан, командири билмасдан ёзган.

Оқсоқол оғзини каппа-каппа очиб ҳансираб турди-да, кесилган дарахтдек шилқ этиб ерга ўтириб қолди. Табиб тиз чўкканча унинг қўлини уқалай бошлади.

Бу қандай гап! Бу қандай адолатсизлик! Ҳалигина бизникида «маълум оши» бериб қувонган одамлар уйга кириши билан бошига тоғдек кулфат тушса! Ҳамиша ўзгаларнинг кўз ёшини артиб юрган Оқсоқол бугун ўзининг дардига даво тополмаса! Қандай бедодлик!

\* \* \*

Хали бошимга бундан оғир кунлар тушишини, бундан баттар бедодликлар кўришимни, Кимсан акам иккаламизнинг ўртамизда синдирилган нон увол кетиб, ушатилган ҳолва бекор бўлишини билмаган эканман.

Шу топда биров: Беҳуда овора бўляпсан, суйганинг қайтиб келмайди, бир йил эмас, беш йил эмас, ўн йил кутасан-да, охири Кимсан аканг у ёқда қолиб, яхши кўрган янганг — Раъно келинойингнинг эрига хотин бўласан, севасанми-севмайсанми, вақт-соати етиб шу одамдан ўгил туғасан, деса ўша заҳоти юрагим ёрилиб, ўлган бўлардим.

# тўртинчи қисм





#### ЎНИНЧИ БОБ

# КИЧКИНТОЙ МУЗАФФАР ХИКОЯСИ

### 1. Суюнчи беринг! Ойим ўгил тугдилар!

Ойим икки ойдан бери касал эди. Қорни ўзидан-ўзи катта бўлиб кетаверди. Кир ювса, ҳовли супурса, дарров бели огрийди. Эсимда, жийда гуллаган кунлари дадам унга қаттиқ тайинлади. «Энди ишга чиқма. Шу аҳволда трактор ҳайдашни ким қўйибди сенга!»

Ойим ишга чиқмагани менга маза бўлди. Кун бўйи ёнида ўралашиб юраман. Абдували иккаламиз ҳовлида роса тўполон қилиб ўйнаймиз. «Қора аммам» бизникига деярли ҳар куни келади. «Шовқин солманглар, ойингни қулогига ёқмайди», деб чирқиллайди.

Кечқурунлари айвонда ўтириб олиб, жажжи кўрпачалар тикади.

- Кимга? десам, ғиж-ғиж нафас олиб, кулади.
- Укангга! Насиб этса яқинда укалик бўласан, болам. Ўғил укани яхши кўрасанми, қиз уканими?
- Ўғил, дейман илжайиб. Албатта-да! Абдувалининг ўғил укаси борлиги учун мақтанади. Менгаям ўғил ука керак. Қиз бўлса, кўтармайман!

Бугун ойим жуда қийналди. Ҳовлида бостирма соясида ўрик еб ўтирган эдим, уйдан ойимнинг чинқиргани эшитилди. Қўрқиб кетдим. Чопиб

уйга кирсам, «Қора аммам» ойимни қучоқлаб олибди. Ойим кўрпачада ўтирган ерида бутун гавдаси билан тебраниб ўзини у ёқдан бу ёққа ташлаяпти. Кўзлари юмуқ, лабини тишлаб инграйди, пешонаси терлаб кетган... Чопиб бориб бўйнига осилдим. Пешонаси муздек эди.

- Ойи! дедим қўрқиб. Ойи, нима қилди?Ойим кўзларини ярим очиб илтижоли термилди.
- Жон болам, чиқиб кет! деди ялиниб. Жон болам, оҳ! Ойижон!
  - «Қора аммам» мени ойимдан нари сурди.
- Бор! деди нафаси баттар ғижиллаб. Дадангни чақир. Айт, Лазакат холангни топиб келсин. Дарров! Уй ўртасида гангиб турган эдим, аммамнинг жахли чиқиб кетди.
- Борсанг-чи, тезроқ! Табиб бувангни хотинини айтиб келсин!

Қўрқув ичида кўчага отилдим. Дадамни қаёқдан топаман! Нима кўп, дала кўп. Қайси бирига бораман? Бирдан эсимга чойхоначи тушди, Илҳом амаки ҳамма нарсани билади. Ўшанга бораман. Дадамни топиб берсин! Ойим касал бўпқолдилар, йиглаяптилар, дейман.

Халлослаб чопганча чойхонага яқинлашиб қолган эдим, биров отимни айтиб чақирди. Қарасам – дадам! Елкасида кетмон, кўчанинг нариги бетида келаётган экан! Жонҳолатда бақириб юбордим:

- Дада! Ойим касал бўп қолдилар! Лазакат холани чақираркансиз!
- Нима? Дадам қаттиқ оқсоқланғанча яқин келди. Ранги қув ўчиб кетди.
- Ма, деди кетмонни менга узатиб. Чоп уйга! Кескин бурилди-да, йиқилиб кетгудек оқсоқланганча катта йўлга югурди.
- Ҳой! деди анча нарига борганда тўхтаб, ойинг касал бўлганини биров билмасин.

Хеч балога тушунмадим. Кетмонни елкамга олмоқчи эдим, кучим етмади, зил-замбил экан. Инграб ётган ойим кўз ўнгимга келди. Кетмон бандидан икки қўллаб чангаллаганча судраб кетдим. Югурай десам, кетмоннинг ярақлаб ётган ўткир юзи оёгимни кесиб кетади, деб қўрқаман. Югурмай десам, ойимнинг олдига тезроқ боргим келади.

Ховлимизнинг эшигига етгунча терлаб кетдим. Ўша захоти орқа томондан дадамнинг ялинган овозда гапиргани эшитилди:

- Жон опа, барака топинг, тезрок!

Қарасам, дадам оқсоқланганча шу томонга чопяпти. Ўн қадамча нарида дока рўмоли елкасига тушиб кетган Лазакат хола келяпти. Дадам, қўйиб берса Лазакат холани қўлидан судраб чоптириб кетадигандек важохатда.

- Тезроқ! деди ҳам жеркиб, ҳам ялиниб.
- Вой укам, вахима қилманг. Бу савдо ҳар хотиннинг бошида бор.

Биламан. Лазакат хола яхши хотин. Олимжон акамнинг ойиси-да! Табиб буванинг хотини, ўзига ўхшаган юмшоққина...

У пилдираб эшикдан кириб бораркан, дадамга тайинлади:

- Кирманглар! Эркакни кўрса тўлгоқ қочади.

Дадам эшик олдида серрайиб туриб қолди. Ҳансираб нафас олар, кўзлари бежо, аммо ҳовлига киришга журъат этолмасди.

 - Лазакат хола ойимни тузатади-а? – дедим дадамнинг кўзига тикилиб. – Ойим йиглаяптилар.

Дадам жавоб бермади. Кетмонни қўлимдан олиб ерга типпа-тик қилиб қўйди. Тринка шимининг чўнтагига қўл суқиб тамаки халтасини олди. Титроқ қўллари билан тамаки ўради. Лабига қистирди-да, у чўнтагига, бу чўнтагига қўл тиқди.

– Минг лаънат! – деди аччигланиб. – Бор, гугурт обчик!

Югуриб кетаётган эдим, кетимдан бақирди:

– Музаффар, уйга кирма! Ошхонада гугурт бор! Ошхонага чопиб бораётганимда ойимнинг чинқирган товушини эшитдим.

«Қора аммам» билан Лазакат хола бир нима деб юпатишди шекилли, ойим жимиб қолди. Нимқоронғи ўчоқбошида ётган гугуртни пайпаслаб топдим. Қовлига отилиб чиқишим билан ойимнинг чинқириғи қулоғимни тешиб юборай деди.

- Ойижон! Рози бўлинг!

Йиглагим келди-ю, йиглай олмадим. Дахшат ичида ташқарига югурдим. Чиқсам, дадам ёнгоқ тагида ўтирибди. Кетмонни тик қилиб, бандини икки сони орасига қисиб олган. Ёнгоқ остидаги харсангтошга кетмонни қўйиб, қўлидаги яна битта тош билан кетмон юзини тарақлатиб уряпти.

Ичкаридан ойимнинг чинқиргани эшитилди. Дадам кетмонни баттароқ ура бошлади.

 – Мана! – дедим гугуртни узатиб. Аммо у қайрилиб қарамади.

Янаям яқин бордим.

- Манг!

Дадам парво қилмади. Тош билан кучи борича кетмонни ураверди.

Кетмон юзи бирпасда чўтир бўлиб кетди. Ичкарида ойим чинқирган сайин дадам кетмонни қаттиқроқ савалайди. «Жанг-жанг», «жанг-жанг» деган товуш қулоқни тешиб юборгудек бўлади.

- Дада, мана! - дедим елкасига туртиб.

Бари бир эшитмади. Тош билан кетмонни қарсиллатаверди.

Бир маҳал ичкаридан «инга-инга» деган ингичка, ожиз овоз келди. Қизиқ, дадам ҳеч нимани сезма-

япти, ҳеч нимани эшитмаяпти, деб ўйлаган эдим. Йўқ, ҳаммасини билиб турган экан. Бирдан қўлидан тош тушиб кетди. Кетмонни улоқтириб, ҳаддини ростлади. Терлаб кетган, мўйлови титраб турарди.

– Югур! – деди бақириб. – Э, тўхта!

Шимининг чўнтагига қўл солиб, шалвираб кетган ҳамёнини олди, титроқ қўллари билан кўкиш қоғоз пул чиқарди.

- Ма! Доя холангга бер!
- Кимга? дедим анграйиб.
- Лазакат холангга, ўғлим, у боядан бери биринчи марта жилмайди. Пулни олиб ҳовлига югурган эдим, эшик олдида аммамга урилиб кетдим.
- Ўғил! деди «қора аммам» мени нари суриб, дадам томонга югураркан. Битта ўғлинг иккита бўлди, укам! Муборак бўлсин!

Дадам шу томонга талпинган эди, оёғи панд берди шекилли, қалқиб кетди. Аммам муштдеккина бўлса ҳам бақувват экан, дадамни ушлаб қолди.

– Шукр! Эсон-омон қутулди, – деди ҳансираб. – Паҳлавондек ўғил туғди!

Дадам негадир кафти билан юзини тўсди.

– Отини Омон қўямиз! – деди овози титраб. – Омон бўлсин, опа. Умри узоқ бўлсин.

#### 2. «Пахлавон» нинг бешиги

«Қора аммам»нинг маслаҳати билан ўша заҳоти кўчага югурдим.

- Суюнчи беринглар! Ойим ўғил туғдилар!

Энг аввал Абдувалиларникига кирдим. Билиб қуйсин, энди бизнинг ҳам укамиз бор. Ўғил укамиз! Отини Омон қу́ямиз!

Абдувалининг ўзига ўхшаган сариқ ойиси дўппимга ўрик тўлдириб берди.

– Хайрият-ей! – деди суюниб. – Омон-эсон қутулибди, бечора!

Ўрик тўла дўппимни маҳкам ушлаганча чойхона томонга чопиб кетаётсам, кетимдан Абдували ҳам етиб олди. Унинг ойиси туғмагану бари бир суюнчига шерик бўлмоқчи. Майли, шу қилганига дадасининг сартарошхонасига кириб, суюнчи сўрайман.

«Туя» амаки иккаламизга биттадан йигирма тийинлик берди. Илҳом чойхоначи бўлса жудаям сахийлик қилиб юборди.

– Ие, гирой, сиз укалик бўласизу бизни суюнчидан қочирасизми? – деб менга кўк, Абдувалига сариқ қоғоз пул тутқазди.

Укалик бўлиш яхши экан! Бирпасда анча-мунча нарсалик бўпқолдим. Чақа пул, танга пул, қоғоз пул... Қўйним туршак билан ёнғоққа тўлиб кетди.

Буниси яхши-ку, уканг бўлишининг ёмон томониям бор экан.

Ўмонлиги шуки, кечаси ухлаб ётганимда чақалоқ «инга-инга» деб уйғотиб юборади. Ойим кўкрак тутмагунча овунмайди. Бундан ташқари, кундуз кунлариям ойим ҳовлида юмуш қилиб юрганида йиғлаб қолади.

– Укангга қара! – дейди ойим қўлини ювиш учун ошхонага югургилаб.

Укамга қараганим шу бўладики, бешикни тебратаман. Бари бир минг тебратганим билан укам овунмайди. Оқариб кетган эски гаврапўшни кўтариб юзини очаман.

Ўша куни «қора аммам» чақалоқни «паҳлавондек» деб мақтаганида укам камида дадамдек бўлса керак, деб ўйлаган эдим. Йўқ, кичкинагина. Ўзи кичкинаю овози баланд. Биттаям қоши йўқ. Гаврапўшни кўтаришим билан, митти кўзлари-

ни очиб, мени кўради-ю, овуниш ўрнига баттар йиглайди. Огзида тишиям йўқ. Ойим келиши билан овуниб қолади. Кичкина бўлиб ойимни танигани-чи!

Ойим бешикни секин-секин тебратади. Бешик муттасил ғирчиллайди.

Ойимнинг айтишига қараганда бу – менинг бешигим экан. Эски бўлгани учун ғирчиллармиш. Бугун «қора аммам» укамга янги бешик олиб келаркан.

Янги бешикни олиб келиш қизиқ бўларкан. «Қора аммам», Парча хола, яна уч-тўрт хотин безатилган бешикни кўтариб, эшикдан алла айтиб киришди.

Алла, болам, алла-ё алла! Ширин қўзим, алла-ё алла! Багримдаги тойчогим, алла! Бешикдаги мунчогим, алла!

Ўзиям, бешикмисан, бешик! Устига чўғдек қизил гаврапўш ёпилган, гаврапўш четларига чақалоқнинг кўйлакчалари, иштончалари, укпар қадалган дўпписи чатиб қўйилган... Хотинлар алла айтиб, уйга йўл олишди. Абдували иккимиз эргашиб кирдик. Бирпасда меҳмондорчилик бошланди.

Хамма-ҳамма билан Парча хола шиннига нон ботириб ураяпти. Тахмон олдида Лазакат хола янги бешикка бошқатдан жой сола бошлади.

Аввал тувак-сумакларни қўйди. Кейин шилдир-шилдир қилаётган қовусни (биламан, чақалоқнинг тўшакчаси, ичида тариқ пўсти бор) ёзди. Устидан оппоқ йўргак ташлади.

Аммам хокандозда тутаб турган исириқ кўтариб кирди. Қарсиллаб нафас олганча алланималар деб пичирлади, бешик атрофида хокандозни айлантирди. Лазакат хола пиёланинг огзича келадиган кулчани бешик бошига қўйди-да, устига ёстиқча ташлади.

– Ҳой, Робияхон-у?! – деди айвон томонга қараб. – Опкелинг!

Қарғашойи кўйлак кийиб, ясаниб олган ойим йўргакланган укамни кўтариб кирди.

Аммам укамни ойимнинг қўлидан олиб ўша томонга ўтаётган эди, Парча хола ўтирган жойида қўлини чўзди.

- Манга беринг! деди дўриллаб. Узатвораман!
- Йўқ-йўқ, худо хайрингни берсин! деди Лазакат хола шоша-пиша кўл силтаб. Чақалоқ бечора қўрқиб, шайтонлаб-нетиб юрмасин! Шиннингни ейвер!

Бир уй хотин кулиб юборишди. Айниқса, Парча холанинг ўзи кулганда уй ичи гулдираб кетгандек бўлди.

– Бу гапизам тўгри, опа! – деди каттакон кафти билан қалин лабига ёпишган шинни юқини артиб. – Мани қоронғида кўрса, котта одам қўрқади-ку!

Тағин қаҳқаҳа янгради. Аммам укамни Лазакат холага авайлаб узатди. Лазакат хола чақалоқни кўрпачага ётқизиб, йўргагини ечди. Укамнинг чап оёгини авайлаб букиб, тиззасини ўнг қўлининг учига тегизди.

- Етдими? деган эди, уй тўла хотинлар қийчув қилиб юборишди.
  - Етди! Етди!

Лазакат хола энди укамнинг ўнг оёғини букиб, чап қўлининг учига тегизди.

- Етдими?
- Етди! Етди!

Боядан бери индамай ётган укамга бунақа қилиқ ёқмади шекилли, йиғлаб юборди. Аммо хотинлар бемалол кулишар, остонада турган ойим ҳам мамнун жилмаяр эди.

– Вой, манов болани ширинлигини! – Парча хола дўриллаб, хитоб қилди. – Вой, жужуқларингдан айновний!

Тағин кулги кўтарилди.

- Туф де, кўзинг тегади!
   - Лазакат хола укамни аста кўтариб, негадир бешикка кўндаланг ётқизмоқчи бўлди.
- Қаёққа ётқизай! деб сўради баланд овозда. –
   Шу ёққами?

Хотинлар чувиллашиб кетишди.

– Йўқ! Йўқ!

Лазакат хола энди укамнинг оёгини ёстиқ томонга айлантириб ётқизмоқчи бўлди.

- Бу ёққами!

Хотинлар кула-кула баттар чувиллашди.

– Йўқ! Йўқ!

Ие, Лазакат хола қанақа ўзи! Ёстиқ қаёқдалигини билмайдими? Укам йиғлаб ётибди-ку, булар кулади-я! Энди жаҳлим чиқиб турган эди, Лазакат хола ниҳоят чақалоқни қанақа ётқизиш кераклигини «тушунди». Укамни тўғри ётқизди.

- Бу ёққами?
- Ҳа! Ҳа! Хотинлар қий-чув билан тасдиқлаш-ди. Шу ёққа!

Лазакат хола оёқ-қўлларини питирлатиб йиглаётган укамни чаққонлик билан бешикка боглади-да, дуо қилди.

– Илоё умринг узоқ бўлсин. Бахтли бўлгин! Инсофли-товфикли бўл. Мехнаткаш бўл.

Қизиқ, укам бирпасда овуниб қолди.

 – Ҳой, ким бор? – деди Лазакат хола ёнбошида турган тугунни ечиб.

Абдували шуни кутиб турган эканми, ўша томонга биринчи бўлиб отилди. Лазакат холанинг тугунидан қип-қизил, чиройли патир чиқди. Абдували патирни тишлаганча ташқарига қочди.

– Ушла! Ушланглар! – хотинлар кула-кула Абдувалини тутиб олмоқчи бўлгандек қўл узатди. Нима

қилишимни билмай Абдувалининг кетидан мен ҳам ҳовлига отилдим.

Олма тагида тамаки тутатиб ўтирган дадам Абдували иккаламизни имлаб чақирди.

– Ўртоқларинг билан бўлашиб енглар! – деди тайинлаб. – Омон ҳам сенларга ўхшаб чопқиллаб юрсин.

...Патирни ўртоқларимиз билан бўлашиб егандан кейин ўйинга берилиб кетибмиз. Кунботар паллада уйга кирсам, хотинлар тарқаб бўпти. Бурчакда чўгдек гаврапўш ёпилган янги бешик олдида чўккалаган ойим укамга кўкрак тутяпти. Аммам кавшандозда ўтириб маҳсисини кийяпти.

«Қора аммам»нинг одатини биламан. Маҳси кийдими, бўлди, уйига кетади.

– Кетманг! – дедим ялиниб. – «Қора амма», кетманг.

Ойим ярқ этиб биз томонга қаради. Аммамнинг йўлга отланиб қолгани унга ҳам ёқмаган шекилли, зардалироқ оҳангда гапирди:

- Ҳеч бўлмаса шу бугун қолинг, ойи! Борасиз-да, ўша уйингизга.
- Қўй, жон болам! Аммам ойимга қараб гапираркан, ўтирган жойида чўзилиб, менинг елкамга қоқди. Бир ойдан бери шу ёққа қатнайвериб, чолимниям чирогини ўчириб қўйдим.

Ойим аразлаб юзини ўгирди. Қаддини ростламоқчи эди, укам ҳали эмиб бўлмаган экан шекилли, ғингшиб йиғлади. Аммам шоша-пиша яқин борди.

- Қимирлама! деди ойимнинг елкасига қоқиб.
- Шу бугун қолинг ахир, ойим астойдил ялинди. Аммам хўрсинди:
- Биласанми, деди маъюс оҳангда. Шу кеча Кимсанни туш кўрибман. Безовта бўлиб юрибди. Бора қолай.

Негадир ойим сесканиб кетгандек бўлди. Укам чириллаб йиглаётганига қарамай, гаврапўш устини ёпиб, дик этиб ўрнидан турди.

– Йўқ-йўқ! – деди аммам бош чайқаб. – Ўтиравер, болани эмиз.

Ойим қулоқ солмади. «Қора аммам»нинг тугунини кўтариб эшикка йўналди.

#### ЎН БИРИНЧИ БОБ

#### «КОРА АММА» ХИКОЯСИ

## Энг бегунох одам

Биламан, шу ишни яхши қилмадим. Нима бўлгандаям бугун қизимнинг олдида ётиб қолишим керак эди. Ёшим олтмишдан ошиб, неварали бўлдим, бешик тўй кўрдим. Шукр қилсам бўлмайдими? Бу кунларга ким етдию ким етмади!

Биламан, Робиянинг дили огриди. Музаффарни айтмайсизми? Бола бечора «амма, кетманг» деб оёгимга ёпишди. Яхшиям Шомурод йўқ экан. Дуч келиб қолса, қўлимдан судраб уйга обкирарди-ю, қайтиб чиқармасди. Ҳаммасиям майли-ку, бир ишим нотўгри бўлди. Кимсанни гапирмасам бўларди. Қизим шўрлик Кимсан акасининг отини эшитиши билан галати бўлиб кетди: боласиям кўзига кўринмай қолди. Мен – эсини еган кампир нима қилардим, бечоранинг ярасини янгилаб.

Нима қилай ахир! Ростдан ҳам туш кўрдим-да! Кеча кечаси бир чимдим ухладимми-йўқми, билмайман. Бешик тайёрлаш, сарпа-суруғни жойлаш билан тонготар овора бўлдим. Охири, ёстиққа шундай ёнбошлабману кўзим илинибди. Кимсанимни аниқ-таниқ кўрдим. Кетмон дастасидан ушлаб турибди. Бошидаги дўпписига лой сачра-

ганмиш. «Болам, дўппингни қоқиб ташла, лой тегибди», десам қовоғини солиб турганмиш. Бирдан урушга кетгани эсимга тушиб, йиғлаб юборибман.

«Вой, болам, келдингми! Урушдан келдингми!» десам аразлаб, юзини ўгирибди. «Нега хат ёзмадинглар, жа бўлмаса, Робия ёзса бўларди-ку», дебди-да, кетмонни елкасига олиб бурилиб кетибди... «Шошма», деганча йиглаб қолавердим.

...Бешик тўйи ҳам татимади. Нуқул дўпписига лой ёпишган ўғлим кўз олдимдан кетмайди. Қанийди, Кимсаним урушдан омон қайтганда, шу бола ўғлимники бўларди. Бешик тўйи ўзимизнинг уйимизда ўтарди...

Қизиқ... Нега хат ёзмайсизлар дедими? Ахир ўшанда, Робиянинг бошини боглаган кунимиз қизим ўз қўли билан хат ёзган эди-ку, Кимсанга! Йўқ, у кунимас, эртасими-индиними?! Ўша куни Оқсоқолнинг уйида қиёмат-қойим бўлиб, Робия хат ёзадиган аҳволда эмасди. Аммо кейин ёзди. Аниқ биламан, ёзди. Фақат... Почтачисиз қолганимиз ёмон бўлди. Ким билади, балки кейинроқ ростдан ҳам Кимсандан хат келгандиру қўлимизга тегмагандир...

\* \* \*

Хеч банданинг бошига фарзанд догини солмасин экан. Юрса ер титрайдиган шундай Холпош овсиним уч кунда шилиниб тушди. Оппоқ лўппи юзини, кўзига сурма тортиб юришини кўрган одам невара кўрган хотин демасди. Келинлардек ясаниб, кўчага чиқса, ҳамма ёқни атир иси тутиб кетарди. Уч кунда адойи тамом бўлди. «Болам»лаб йиглайвериб, кўзида ёш, танида мадор қолмади. Қўшалоқ ўглининг еттиси куни бутунлай овози чиқмай қолди. Сочини юлиб йиглаганиям баҳарнов экан. Сандалга тиқилиб оладида, бир бурчак-

ка термилиб ўтираверади, ўтираверади. Биров чақирса, анграяди. Потма-Зўра келинлар эрталаб туриб, уввос тортганиниям эшитмайди.

Дунёнинг ишларини қарангки, ўша куниёқ Оқсоқол оёққа туриб кетди. Белининг огриги ҳам қолди. Аввал сельсоветга чиқиб келди. Кейин тиззадан қор кечиб Тошкентга – военкоматга жўнади. Икки гапнинг бирида: «Йўқ, Ориф оқсоқолнинг ўгиллари бекорга ўлиб кетадиган болалармас», дейди.

Янги йил қандай кирганини билмайман. Кетма-кет қор ёғиб, қаҳратон совуқ тушди. Маҳалланинг ҳовузида сув пасайиб кеттан, Робия шўрлик ҳар куни елкасига обкаш илиб, Бўрижардан сув ташийди. Ёлғиз ўзимизгамас, Оқсоқолларгаям. Бошига тогдек ғам тушиб турган Потма-Зўра келинларга шунаҳа пайтда ёрдам бермаса, ҳачон беради!

«Дард устига чипқон» дегандек, Кимсандан на хат бор, на хабар.

Оқсоқолнинг қўшалоқ ўғлидан «қорахат» келган кундан бошлаб, Рашид абзи ҳеч кимнинг эшигини тақиллатмай қўйган. Ҳар куни гоҳ Робия, гоҳ мен почтага қатнаймиз... Қайси куни чолим почтага чиқса, абзи ичиб, разиздаги қор босган ўриндиқда ёнбошлаб ўтирган экан. Чолим, «унақа қилманг, совуқда қотиб қоласиз», деса, кўнмабди. «Ўз ҳолимга қўйинг, Ҳусан абзи», деб йиғлабди.

...Лавлаги қайнатган эдим. Ўчоқдаги чўгни танчага солиб, энди лавлагини сузиб келсам Оқсоқол билан овсиним бошлашиб чиқиб қолишди. Оқсоқол қулогини қийиқча билан тангиб олган. Овсиним қалин рўмол ўраган. Нуқул ҳарсиллайди. Ранги бир ҳолатда.

Айниқса, овсиним чиққанига хурсанд бўлдим. Қарна дарди бўлинади. Сандал тўрига чолим билан Оқсоқол, берироққа овсиним, мен, Робия ўтирдик. Шунча қистасам ҳам овсиним туз тотмади. Мушук ўлгур токчада юрган сичқонни қуваман деб, лампанинг шишасини синдириб қўйганидан бери лип-лип чироққа кунимиз қолган. Лип-лип чироқ сасиб, юракни сиқиб юборади.

Оқсоқол хуноб бўлиб кетди шекилли, рапидадек қўли билан каттакон лавлаги бўлагини чангаллаб пуфларкан, тирсаги билан чолимни туртди.

– Зиқна бўлмай ўл! Битта лампашиша сотиб олсанг, давлатинг камайиб қоладими?

Чолим лавлаги чайнаб туриб, тўнгиллади:

- Бойвачча бўлсанг, бер битта фонусингни!
- Хўп! Оқсоқол лавлагини оғзига тиқди. Қизинг чиқсин-да, кўнгли тусаган фонусни обкелсин. Локин кўрсичқонга ўхшаб ўтирма! У гох кампирига, гох менга қараб, хўрсинди.
  - Овсининг қирқ қиламан деяпти.

Овсиним дастурхон попугини ўйнаганча жим ўтирарди.

– Дуримни сотиб келдим, – деди хаста, бўғиқ оҳангда. – Икки болага икки жонлиқ сўймасак бўлмайди. – Унинг томогини йиги бўгиб келди-ю, йиглашга кучи етмади. Лаблари титраб, кафти билан юзини яширди.

Оқсоқол қўлидаги лавлаги бўлагини дастурхонга қўйди.

– Дума! – деди чолимга юзланиб. – Майли, маърака қилгиси келса, қилсин-у, локин... – Унинг гап оҳанги ўзгариб, овози дадиллашди... – Қайси куни Тошканга борсам, военкоматда қизиқ гап айтишди. «Қорахат» ёзишда адашувлар бўлиб тураркан. Гулистон маҳаллалик бир лейтенантдан ҳам «қорахат» келган экан. Военкоматдагилар почтага жўнатибди, почтадагилар йигитнинг уйига обориб берибди. У бечораларам нима қилсин, вазифа-

си-да! Йигитнинг ота-онаси аза очибди. Боланинг қирқи ўтган куни нима бўпти де? — Оқсоқол аввал чолимга, кейин овсинимга қараб жилмайди. Овози тантанали тус олди, — лейтенантдан хат кепқопти! Госпиталдан!

Ичимда чироқ ёнгандек бўлди. Ярқ этиб овсинимга қарасам, ҳалиям дастурхон попугини ўйнаб ўтирибди. Чолидан бу гапни илгариям эшитган бўлса керак, парво қилмади.

Оқсоқол овозини янаям баланд қўйиб, шанғиллади.

– Бомба тушганда лейтенант қорга кўмилиб қолган экан. Ўртоқлари ўлди, деб командирга хабар берибди. Командир қовлиқиб хат ёзибди. Йигит бўлса бир жойиям тирналмай қор тагида ётган экан. Ҳушига келиб, қорни кавлаб чиқибди. Кантуз бўлган экан! – Оқсоқол ўзининг гапидан ўзи енгил тортиб, кулимсиради. Бармоғини бигиз қилиб тушунтирди. – Эшитдингми, онаси! Сен бўлсанг қирқ қиламан, деб ётибсан.

Овсиним индамай юзини ўгирди. Чолим лавлагини қўлида муаллақ тутганча сўради:

- Кантуз? Нима у?
- Кантузми? Оқсоқол «шуниям билмайсанми, саводсиз», дегандек аччиғи чиқиброқ тушунтирди. Кантуз дегани шуки, яъни масалан, биров қулоғингни тагида варанглатиб милтиқ отди. Гаранг бўлиб қоласанми? Ана ўшанақа-да! Менинг ўғилларим ҳам жа нари борса, кантуз бўлган.
- Хайрият-эй! дедим енгил тортиб. Илоё Шокиржон билан Зокиржон кантуз бўлгани рост бўлсин!
- Кўрасан! Кантуз бўлган! Оқсоқол ишонч билан гапини қайтарди. Кантуз бўлган! Бугун Зокир тушимга кирибди. Карамга сув боғлаб юрганмиш. Аканг қани, десам, биласиз-ку, акам Кўтар-

мада буғдой ўряпти, дейди. Сув ёруғлик, буғдой – насиба. Бундан чиқди, иккаласиниям насибаси узилмаган.

Овсиним суюниш ўрнига алам билан хўрсинди.

- Мен турай... деди титраб кетаётган лабини тишлаб.
- «Ўтиринг», деб қисташимга қарамай, оғир қўзғалиб ўрнидан турди.
- Қизим, бор, холангни кузатиб ке! Оқсоқол Робияга буюрди. Битта фонус обчиқ. У эшик олдига борган овсинимга тайинлади... Зўрага айтсанг, ошхонадаги фонусни беради.

Овсиним ҳовли эшигида совуҳдан дийдираб хайрлашаркан, елкамга ҳоҳди.

– Индинга вақтлироқ чиқинг, қирқ – хотинларнинг маъракаси.

Уйга қайтиб кирсам, Оқсоқол чолимнинг қулоғига эгилиб бир нималарни гапиряпти.

- Баққа ке! - деб бармоғи билан мени ҳам имлади. - Хаммасини аникладим, - деди пичирлаб. - Танк ёниб кетибди! Иккаласиям... - Унинг соқоли титраб кетди. – Овсинингга айт! Оксокол билиб кептилар, кантуз бўлган экан де! Бир йилда иккаласиям оёққа туриб кетармиш де! Уқдингми! – У лип-лип чирокка узок тикилиб колди. Чирокнинг ожиз нурида кўзлари ўйчан, ғамгин кўринарди. Йиглаб юбормаслик учун тескари қарадим. Совуқ, дилгир жимжитликда чолимнинг хўрсингани эшитилди. Хеч биримиздан садо чиқмас эди. Шу алпозда қанча ўтирганимизни билмайман. Бир махал кимдир дераза олдидан гурсиллаб югуриб ўтди. Ўша захоти эшик очилиб, аллакимнинг каттакон гавдаси кўринди. Аввалига танимабман: қарасам - Парча! Бошидаги йиртиқ рўмоли, гунгурсдек елкалари қорға беланған. У тап этиб остонага ўтириб қолди.

- Шўрим қуриб қолди, Ҳусан тоға! деди-ю, ҳўнграб йиғлаб юборди. Ҳаммамиз сапчиб ўрнимиздан туриб кетдик.
- Нима гап? Чолим билан Оқсоқол баравар сўрашди.

Парча Оқсоқолни энди кўрди шекилли, бошидан рўмолини юлқиб олиб, юзини артди.

- Вой, яхшиям шўтта экансиз, Оқсоқол, деди дўриллаб. Шўргинам қуриб қолди!
- Тушунтириб гапирсанг-чи, мундоқ! Оқсоқол жаҳл билан қўлини дўлғади.
- Уйимни ўгри босди! Парча рўмолини юзига босиб баттар ҳўнгиллаб йиглашга тушди.

Оқсоқол билан чолим шоша-пиша тўн кийишди.

- Қачон? Қанақа ўғри!
- Вой, ман қаттан биламан? Парча алам билан дўриллади.
- Нимангни опти? деди чолим ҳовлиҳиб калишини кияркан.
- Оса гўргайди-я! Битимни оладими? Парча йиртиқ рўмолининг учига пўнгиллатиб бурнини қоқди. Ташаб кетибди.
- Нимани? Оқсоқол билан чолим баравар ҳайҳиришди.
- Мангина ўлий! деди Парча дўриллаб. Пешинда табибникига борувдим. Атала қилишган экан, икки косагина ичдим... Ундан Башор опамникига ўтдим... Ошқовоқ сувига қориб зоғора ёпаётган экан.... Тўрттагина едим... ўира-ширада уйимга кесам, айвонимда бир нарса турибди. Инсми-жинсми, деб яқинроқ борсам, эчки! Нақ туядек келади!
- Нима! Оқсоқол тажангланиб ўшқирди. Қанақа эчки?
- Вой ман қаттан биламан! Парча мунғайиб қовоғини солди. Олдига боришга қўрқдим.

- Э, ўла! Чолим энсаси қотиб чийиллади. Бировнинг эчкиси адашиб кириб қолган...
- Адашиб кирса, бойлоқ турадими? Парча яна ҳиқиллаб йиғлашга тушди. Айвонимни устунига бойлаб қуйибди-ку.
- Қани юр-чи... Чолим билан Оқсоқол Парчани олдига солиб чиқиб кетишди.

Хаҳ ғалваларинг қурсин-а! Битта эчки деб шунча ваҳима кўтарасанми, эси паст! Алла-паллагача дилим ўйнаб, ўзимга келолмасам-а!..

Робия фонус олиб чиққанидан кейин кўп ўтмай чолим билан Оқсоқол қайтиб келишди.

- Нима бўпти? деб сўраган эдим, Оқсоқол кафтидаги ғижимланиб кетган қоғозни Робияга узатди.
- Ўқиб кўр-чи, деди қовогини солиб. Абзиникидан топдик, эшигига қистириб қўйган экан.

Робия қоғозни фонус ёруғига тутиб, ҳижжалаброқ ўқиди.

– «Мини шумқадам димағиз. Мин шумқадам имасман... – Робия бирпас тутилиб қолди-да, давом этди. – Почтада, столда икки похоронка ёта. Бириси – Дўмбирободға – Сулаймон абзиға... Бириси Хирмонтепаға – Хадича отинға. Мин Қазанға китам. Ни булса була! Миндан рози булиғиз. Хайрингиз...»

Робия хатни ўқиб бўлиб, Оқсоқолга узатди. Аммо Оқсоқол қайрилиб ҳам қарамади. Ҳаммамиз карахт бўлиб қолган эдик. Жимлик чўкди.

- Бўлса камбағалга бўлсин дебди-да, деди чолим ўйчан алпозда. – Эчкисини Парчага ташлаб кетибди... Бир одамда диёнат бўлса шунчалик бўлар-да, ўртоқ!
- Қайтариш керак! Оқсоқол Робиянинг құлидан хатни олди.
- Тўгри! деди чолим. Қишли-қировли кунда Қозонга қандоқ етиб боради. Ўзи яримта одам бўл-

- са... Бир ғарибни сарсон қилиб қўямизми? Сельсоветга айтсак, Исмоил мелиса...
- Э! Оқсоқол аччиқланиб унинг гапини кесди.
   Нима, абзи дезертирми, мелисанинг олдига тушиб келадиган! Ўзимиз борамиз.

Иккала ўртоқ иссиқроқ кийиниб, тағин чиқиб кетишди.

- ...Чолим кун ёйилганида бурнидан тортса йиқилгудек бўлиб қайтиб келди. Робия икковимиз «нима бўлди», деб баравар қараган эдик, чолим музлаб кетган қўлини танчага тиқиб, оғир бош чайқади.
- Йўқ, деди соқоли титраб. Тошканнинг вокзалига бориб келдик. Паттани олдиндан обқўйган шекилли. У бир нуқтага тикилиб узоқ ўтирди-да, оҳиста қўшиб қўйди. Диёнатли одам эди. Оқсоқол жуда хафа. Кела-келгунча овсинингни сўкиб келди. «Қарғамай тилинг кесилгур, ҳаммасини шу қилди», дейди.
  - Овсинимда нима айб? дедим секин.

Чолим носқовоқни силаб яна анча жим қолди.

- Тўғри, деди ўйланиб. Аммо абзи имонли одам эди. Қаерга борсаям, жони соғ бўлсин...
- ...Рашид абзи кетди-ю, Кимсанимдан хат келмай қўйди...

### ЎН ИККИНЧИ БОБ

### МЕХР БИЛАН ҚАХР - ОРАСИ БИР ҚАДАМ

## Оддий аскар Кимсан Хусановнинг Робияга ёзмокчи бўлган, аммо ёза олмаган хати

«Ушбу хатим гўзал Тошкентнинг Нўғайқўргон қишлогида соғ-саломат ўйнаб-кулиб юрган дадам-

ларга, ойимларга, Робияхонга тезда етиб, маълум бўлсинки, ўғлингиз Кимсандан деб билурсиз. Дада, ойи, соғ-саломат юрибсизларми? Оқсоқол, Холпош холам, Фотима-Зуҳра келинойиларим, у ёқда Раъно келинойим, ҳаммангиз соғ-саломатмисизлар!

Робия! Биратўла тўртта хатингни олдим. «Маълум оши» қилишганини эшитиб, жуда хурсанд бўлдим. Билиб қўй, сен энди боши боғлиқ қизсан. Ўзимникисан! Олдингда бўлганимда қулоғингга айтадиган гапларим бор эди. Майли, кўпи кетиб ози қолди. Шу кетишимиз бўлса, баҳорда фрицларни қувиб жойига обориб қўямиз, шекилли. Ҳозир душманнинг шашти пасайиб қолган.

Робия, ростини айтсам, Оқсоқол, уруш - ўйин эмас, деганида билиб гапирган экан. Мен урушни ўйинчоқ деб ўйлабман. Қўлингга автомат оласану дуч келган душманни отиб ташлайверасан. Ўқинг хечам адо бўлмайди. Йўк, ажалга рўпара келганингда жонинг кўзингга ширин кўриниб кетаркан. Осмонда учиб кетаётган «Фокке-Вульф»нинг қорнидан ажралиб чиқиб уввос солиб тушаётган қўша-қўша бомбаларни аниқ кўриб турасан. Ўша бомба бошқа ҳеч кимнинг эмас, худди сенинг бошингга тушаётгандек бўлаверади. Қор босган далада мўри малахдек ўрмалаб келаётган танклар худди сен турган окопга бостириб келаётганга ўхшайди. Ўзингни қаёққа уришни билмай қоласан. Нима қилайлик, биз кетмондан бўлак ниманиям кўрибмиз! Эсимда бор: биринчи кунлари немис бизга ўхшаган соддаларни тутдек тўкди. Фаргоналик Эргашали ака деган хазилкаш киши бор эди. Афанди айтиб ҳаммани кулдириб юрарди. Бир куни траншеядан бошини чиқариши билан қарс этган овоз эшитилди-ю, бечора шилқ этиб йиқилди-қолди. Фашист снайпери пойлаб турган экан. Эргашали ака йиқилиши билан ўн чоғли ҳамюртлари «вой жигарим»лаб ўша томонга отилишди. Мен ҳам чопиб бораёттан эдим, Маша деган санинструктор қиз қўлимдан тортиб қолди. Машанинг ҳайҳайлашига ҳарамай, Эргашали аканинг бошига тўдалашиб борган дўстлари устига гумбурлаб мина тушди-ю, ўн кишини парча-парча ҳилиб ташлади.

Йўқ, Робия! Энди биз ҳам жанг ҳилишни ўрганиб олдик. Мўйлови худди Оҳсоҳолникига ўхшаб осилиб тушган «дядя Вася» деган сержантимиз бор. Оғзидан мохорка тушмайди. Мен ўз улушимга тушган тамакини унга бераман, у ўз улушига тушган ҳандни менга беради. Дядя Вася ўн тўртинчи йилда ҳам Германияга ҳарши урушган экан. Уруш нималигини мана шу киши ўргатди.

Дядя Вася қайси бомба қаерга тушишини олдиндан билади. Бир чақирим нарида учиб келаётган «Фокке-Вульф»нинг қорнидан ажралиб чиққан бомбаларни кўриб, бошимни ичимга тортсам, елкамга шапатилайди.

#### - Это не наш!

Чиндан ҳам бомбалар уч юз-тўрт юз қадам олдинга тушиб ёрилади. Немис аэроплани шундоқ бошимиз устидан варанглаб ўтиб, бомба ташлаганида, ерга ёпишиб олсам дядя Вася тағин елкамга қоқади.

### – Не бойся, это тоже не наш!

Чиндан ҳам бомба анча орқага – ўрмонзорга бориб тушади. Немис самолёти уч юз-тўрт юз қадамча жойга келганида бомба ташласа, дядя Вася ҳайқиради.

– Берегись, – это наш! – дейди-ю, мени окоп остига босади. Чиндан ҳам зум ўтмай ҳамма ёҳни зулмат босиб, гумбур-гумбурдан ҳулоғим чиппа битиб ҳолади.

Нимага бу киши ҳадеб мени авайлашига ҳайрон қоламан. Бир куни сўрасам, мўйловини бураб, кулди:

– Сен ёшсан! Мен старик. Уруш битса уйингга оборасан. Тўйингда барашкадан шашлик қилиб берасан!

Уруш битса дядя Васяни албатта уйга олиб бораман. Дадамнинг узумига бир тўйдирай.

Робия! Уруш бошланган куни иккаламиз токзорда чиллаки узганимиз эсингдами? Қани қозир ўша замонлар қайтиб келса. Қани, иккаламиз ишкомга кириб узум узсакда, дядя Васяни меҳмон қилсак! Эсингдами, мени кузатишдан бир кун олдин уйимизга меҳмонлар тўпланди. Дадам қўй сўйди. Олма тагидан кетмон билан чуқурча қазиди-да, кўйни етаклаб келиб ётқизди. Учта оёгини жуфтлаб боглади. Пичоқни қинидан суғуриши билан қуй жонивор илтижоли маъраб юборди. Бошини даст кўтариб ўрнидан туришга талпинди. Назаримда кўзимга ялиниб қарагандек бўлди. Дадам пичоқ тортганида яна маъради. Бўгзидан тизиллаб қон отилиб кетди. Кўзимни чирт юмиб томорқага чиқиб кетдим.

Қуй суйилганида шунчалик сесканган одам, бировни ўлдиришга қурбим етармиди! Ахир одам – инсон боласику! Фашистми, баломи, бари бир уям одам-ку! Уни туққан она ҳам ўғлим бировнинг қўлида қуйдек суйилсин, демагандир! Худди ўзингга ўхшаган тирик одамни, уйида онаси, отаси, сенга ўхшаган суйгани кутиб ўтирган одам боласини ўлдиришга ҳандай ҳўлинг боради?

Робия! Мен аввалига шунақа деб ўйлардим. Аммо урушнинг бир куни бир йилга татир экан. Қар қадамда ўлим билан рўпара бўлавергандан кейин дийданг қотиб кетаркан. Робия, мен энди

аввалги рахмдил Кимсан эмасман. Жангга кирганимга юз эллик кун бўлди. Юз эллик йил яшадим десам ёлғон бўлмайди. Урушнинг ўз қоидалари бўларкан. Бунақа пайтда мехр билан қахрнинг ораси бир қадам бўлиб қоларкан. Ё сен ўлдирасан, ё сени ўлдиришади. Бошқа йўли йўқ. Яқин кишиларингга, юртингга мехринг борми, душманга шафқат қилма! Тамом!

Бу қоидани фарғоналик Эргашали аканинг устига дод солиб борган ўн нафар юртдошим битта фашист минаси билан қийма-қийма бўлганида тушунган эдим. Янги йил арафасида дядя Васядан айрилиб қолганимда бу гапга тағин бир марта имон келтирдим. Мени шунча ўлимдан асраб қолган одам шундоқ кўз ўнгимда оламдан ўтди. Бирпасда, бир лаҳзада...

Ўша куни траншеяда карам шўрва ичиб ўтирган эдик. Тип-тиниқ осмонда офтоб чарақлаб турар, аммо ҳаво шунақанги совуқ эдики, оғзингдан чиққан ҳовур ҳам яхлаб қолаётгандек. Телпагининг қулоқчинини тушириб олган, соқол-мўйловини қиров босган дядя Вася котелокни тиззасига қўйганча траншеянинг муз босган деворига суяниб ўтириб, карам шўрва ичар, ора-чора менга дашном берар эди.

– Менга бари бир-ку, чўчқа ёғини ейишни ўрганмасанг ўзингга жабр бўлади. Совуқ кунда чўчқа ёғидан яхшиси борми! Жоннинг роҳати-ку!

Кайфимиз чоғ эди. Чоғ бўлмай-чи! Михайлов районидаги аскарларимиз ўн кун ичида немисни қувиб Сухиничи деган жойга тириқтириб борганини билардик. Энди биз ҳужум қилишга шайланиб тургандик. Орқа томонда кўкимтир қор босган арчалар қилт этмай турар, ҳамма ёқ жимжит эди. Худди ҳеч қанақа уруш бўлмаётгандек.

Худди дядя Вася билан ўрмон сайлига чиқиб, дам олиб ўтиргандек.

Шу пайт осмонда самолётлар гўнгиллади. Немис самолётларининг овозини биламан. Қайси бири «Мессершмидт», қайсиниси «Фокке-Вульф»... Тип-тиниқ осмонда бомбардимончи «Фокке-Вульф» кўринди. Найзадек саф тортиб, учта-учта бўлиб келяпти.

Энди улардан қўрқмайдиган бўлиб қолганман. Хотиржам санаб чиқдим. Тўққизта экан. Олдинги қаторда келаётган самолётлардан бомбалар ажраб чиқа бошлади.

– Охо! Наш! – дядя Вася котелокни чангаллаганича осмонга қаради. – Берегись! – деди бақириб. Кейин нима бўлганини билмайман. Бомба увиллагани, лой аралаш қор осмонга сачраб кетганини ғира-шира кўрдим. Қулоқни қоматга келтирган портлашдан гаранг бўлиб мукка тушдим. Кейин ҳамма ёқ жимжит бўлиб қолди.

Қачон ҳушимга келганим эсимда йўқ. Оғзимга лой аралаш қор тўлиб кетибди. Ўрнимдан турай десам, устимда дядя Вася ётибди. Авваллари атроф тинчиши билан фрицни бўралаб сўкиб, туриб кетарди. Бу гал ҳадеганда қимирламади. Амаллаб ўнгарилиб олдим. Осмон қонталаш тус олган, офтоб кўринмасди.

Белимда кўндаланг бўлиб ётган дядя Васянинг этикли оёгини нари сурдим.

### - Дядя Вася!

Қаддимни ростлаб қарасам, унинг оёғи устимда-ю, гавдаси қорга кўмилиб қопти. Фақат қор орасидан котелок тутган қўли чиқиб турибди. Котелокдаги шўрва тўкилиб, ичига кир қор тўлиб қолибди.

Котелокни ушлаб тортдим.

- Дядя Вася! Живой?!

Қизиқ, у котелокни маҳкам чангаллаб олган, қуйиб юборгиси келмасди. Котелокни қаттиқроқ тортган эдим, қор орасида кумилиб ётган қули узилиб чиқди. Ваҳимага тушиб, бақириб юбордим.

## – Дядя Вася!

Қул тирсакдан узилиб кетган, қони қорайиб қотиб қолған, сарғиш гушт орасидан оппоқ суяк туртиб чиқиб турарди. Ажаб, одамнинг гушти сарғимтир буларкан.

Эсим оғиб, жинни бўлиб қолмаганимга ўзим ҳай-ронман. Палахса-палахса қорга қўшилган лой бўлакларини оёқ-қўлларим билан баравар тирмалар эканман, бўғзимга йиғи тиқилиб қичқирардим.

### – Дядя Вася! Дядя Вася!

Робия! Қорни ёрилиб, ичак-чавағи лойга аралашиб кетган одамни кўриш жуда даҳшатли бўларкан! Яқин одамингни шу алпозда кўргандан кўра ўлимингга минг марта рози бўлиб кетаркансан, Робия! Қадрдон бўлиб қолган кишинг ичак-чавағи исқирт қорга аралашиб, чўзилиб ётса, шуни кўриб туриб ёрдам бериш қўлингдан келмаса, бундан ортиқ азоб бўлмас экан!

Ўзинг айт-чи, шундоқ нарсани кўрган одам душманни аяйдими? Дядя Вася Германияга нима ёмонлик қилди! Гитлернинг нима қасди бор эди унда! Фаргоналик Эргашали ака-чи? Хамюртла-ри-чи? Гуноҳи нима уларнинг?

Янги йил кечаси – немислар маст-аласт бўлиб рождество байрами қилаётганида ҳужумга ўтдик! Робия! Мен ишонаман, бу дунёда адолат деган нарса бор! Бор! Нуқул бостириб келиб бизни қўрқитадиган фашистнинг чийиллаб қочишини кўрадиган кун ҳам келаркан! Ёлғон гапириб нима қилдим! Қор уриб турган зим-зиё кечада милтиқдан отган ўқим жилла қурса битта душманни йиқит-

дими-йўқми, билмайман. Лекин ақалли битта фашистни ер тишлатишни, қорга думалаб дод солиб чинқираётган, ҳов ўшанда олма тагида дадам сўйган қўйдек хириллаб жон таслим қилаётган битта немисни ўз кўзим билан кўришни, билиб қўй, сени мен ўлдирдим деб бошида кулиб туришни жудаям хоҳлар эдим.

Қочмас экансан-а! Чекиниш азоби қанақа бўлишини сенларам бир кўриб қўй!

Еру кўк гумбур-гумбурга тўлган, пулемётлардан отилаётган ўқларнинг оловли тасмаси кўкимтир ловуллаб кўринар, душман аскарлари окоплардан чиқиб, тўрт томонга зир югурар эди. Йўқ, биронта фрицни ўз қўлим билан ёқасидан бўгиб афт-башарасини аниқ кўрмадим, лекин жони борича қочиб, айюҳаннос солаётганини эшитиб турардим!

Сен билмайсан, Робия! Қопқонга тушган бўридек ўзини қай тешикка уришни билмай қолган душманни олдингга солиб қувишнинг завқи қанақа бўлишини билмайсан! Битта юртдоши шахид кетганида устида ўнтаси «вой жигарим»лаб йиглаётганида, бир мина билан ҳаммасини қиймалаб ташлаган, «аҳмоқ осиёлик»ларнинг соддалигидан ҳузур қилиб кулган «ақлли европалик» тозақон фашистни тирқиратиб ҳайдаш қанчалик лаззатли бўлишини билмайсан! Бомба тагида парчаланиб кетган одамнинг ичак-чавағини қор орасидан йиғиштириб олганида, шу бомбани ташлаган душмандан қасос олишга қасд қилган киши учун фрицни додлатиб қувиш қанчалик завқли бўлишини билмайсан!

Робия! Жоним! Бизда ғалати удумлар бор. Чақалоқ туғилганида танглайини кўтаришади. Шунда доя хола нима дейишини биласанми?! «Инсофли бўл, мўмин-қобил бўл!» дейди. Энди тушунсам, инсофли

бўлиш дегани мўмин-қобил бўлиш дегани эмас экан. «Мўмин-қобил» бўлиш нима ўзи? Биров ўнг юзинг-га урса, чап юзингни тутиб бер, деганими?! Душман битта мина отиб, ўн битта ўзбекни қийма-қийма қилсин, бомба ташлаб, дядя Васянинг ичагини бошига салла қилиб қўйсинда, мен қўйдек ювош, мусичадек беозор бўлиб тураверайми! Йўқ! Қонга – қон! Жонга – жон! Инсоф дегани шу!

Кеча яна бир воқеа бўлди. Тонготар пайти Красногорск деган қишлоққа кириб бордик. Ўрисчасига «Қизил тоғ» дегани экан. Бу ерда тоғнинг ўзи йўқ. Тепаликни тоғ дейишади. Красногорск ҳам пастаккина тепалик экан. Ўзимизнинг Хирмонтепадек келади.

Хали тонг отмаган бўлса ҳам, атроф бир зумда ёришиб кетди. Шохлари қор залворидан эгилиб кетган арчазор орасидан чиқиб «ур-хо-ур!» билан олдинга югурдик. Қишлоқ нега тўсатдан ёришиб кетганини кейин билдим. Кўчанинг икки томонидаги уйлар гуриллаб ёнаяпти.

Робия, сен кўрмагансан. Бу ердаги уйлар бизникига ўхшамайди. Девори пахса, томи лойсувоқ эмас. Нуқул харилардан девор тиклаб, устига похол ёпилади. Битта ўт кетса, тамом лоп этиб ёнади-ю, кулга айланади.

Душманнинг зондер командаси қишлоқдан чиқаётиб уйларга ўт қўйган экан. Фашистнинг огнемёт деган қуроли бор. Узун резинка ичакдан бензин сепадида, уйларни ёқиб юборади.

Чопиб кетяпману кўриб турибман. Олисда, яхлит гулханга айланган қишлоқ кўчасининг бошида немиснинг охирги юк машинаси қорда судралиб, сирганиб борарди. Ўрмон яланглигидан бизнинг танк чиқиб келди-да, ёнбошидан туриб, замбарагидан бир ўқ узган эди, машина парча-парча бў-

либ, устидаги немислар қорга тариқдек сочилиб кетди. Қувонганимдан бақирганча ўша томонга чопдим.

Шу пайт ловуллаб ёнаёттан уй деразасидан биров сакраб кўчага тушди. Қорда гандираклаб кетди, аммо йиқилмади. Беш-олти қадам югуриб борди-ю, ўзидан ўзи гугурт чўпидек лоп этиб ёна бошлади. Кийимига бензин теккан экан шекилли... У вахима ичида қулоқчинини қорга улоқтириб, икки қўллаб бошини таталашга тушди. Аммо огрикдан эсини йўқотиб кучи борича югура кетди. Қанча тез чопса, шунча қаттиқ ёнар, гох юзига, гох бошига шапатилаб чинқирар эди.

- A-a-a-a!

Кетидан югурдим.

Яқин борганимда унинг аъзойи бадани алангага айланиб кетган эди. Беш-олти қадам қолганида гандираклаб қорга йиқилди. Устига ўзимни ташлаб, қорда думалата бошладим. Димогимга куйган гўшт иси урилди: одам гўштининг хиди.

Охири қўлларим куя-куя тирик гулханни қорга босиб ўчирдим. Қишлоқ ҳамон ловуллаб ёнарди. Разм солиб қарасам, жажжигина бола экан. Узоғи билан етти-саккиз ёшларда, эгнига қўпол пахталик кийиб олгани учун кўзимга катта одамдек кўринган экан. Эгнидан тутаб турган пахталигини ечиб олмоқчи эдим, эплолмадим, аллақачон қоракуяга айланиб баданига ёпишиб қолибди.

Боланинг юзидан силасам, бармогимга юмшоқ, иссиқ нарса уннади. Жонҳолатда қўлимни тортдим. Аммо бармоқларимга резинкадек нарса ёпишиб қолган эди. Қўлимни тортган сайин боланинг юзи чўзилиб кетяпти. Ваҳима ичида қўлимни силтаб ажратиб олдим. Чўнқайиб ўтирганча болага термилдим.

Ловуллаб ёнаётган уйлар гулханида болакайнинг азобдан қийшайиб кетган чеҳраси аниқ кўринарди. Икки юзи, қош-киприклари куйиб, қорайиб кетган, кўзлари ваҳима билан бир нуқтага бақрайиб қотиб қолган, фақат лаблари, жажжи лаблари ярим очиқ; ҳамон «а-а-а» деб чинқираётганга ўхшар, кемшик тишлари орасидан ғарчча тишлаб олган тилининг учи чиқиб турарди...

Сен хатингда ёзибсан, Робия! Бизни унаштиришди, «маълум оши бўлди», дебсан. Энди ўзинг ўйлаб кўр. Вақти келиб, тўйлар қилсак-да, душман бостириб келиб, бизнинг болаларни ёндириб юборса! Қанақа бўлади! Тириклайин кабоб бўлган мана шу бегуноҳ болани кўрган одам душмандан қасос олмаса гуноҳга ботмайдими? Шу болани кўрган одам душманга шафқат қиладими? Билмадим, балки шафқатсиз одам — диёнатсиз бўлар. Лекин диёнатли бўлиш учун ҳам шафқатсиз бўлиш керак. Мен шунга ишондим. Уруш мени шунга мажбур қилди, Робия!

Робия! Кўнглим сезиб турибди. Яқинда катта ҳужумга ўтамиз. Энди мени қанақа жанг қилишни биламан.

Робия! Менга атаб кашта тикаётганингни ўқиб жуда суюндим. Энди иккита бўлдими? Ярим йилда иккитадан тикиб турсанг, нариси билан каштанг тўртта бўлгунча бораман. Кўпи кетиб, ози қолди.

Мендан Оқсоқолга, Холпош холага, Раъно келинойимга, Фотима-Зуҳра келинойимларга кўпдан-кўп соғинчли салом айт. Ҳа, айтгандек, ойим Шомурод тоғангдан қурут бериб юбордим деганларини ўқиб роса кулдим. Тоғамни кўрганим йўқ. Мендан дадамга, ойимга салом айт. Соғинчли салом билан сени жонидан яхши кўрадиган Кимсан аканг.

1942 йил... Январь»

#### ЎН УЧИНЧИ БОБ

## «ҚОРА АММА» ХИКОЯСИ

#### Яхши келса - қут, ёмон келса - ют

Икки ҳафта бўлдики, бўгот орқасида мов мушук кечаси билан миёвлаб чиқади. Аввалига ўлмаган қул, ҳут келган бўлса, баҳорга ҳам омон-эсон чиқдик, деб суюнган эдим. Қаёқда! Том қамишидан сариқ сумалак осилиб, энди эрувгарчилик бошланади, деб турганимизда, совуқ авжига чиқиб қиш қайтиб келди.

Ўтин-чўпнинг тайини йўқ. Эрталаб деразаларни қиров босиб қолади. Робия иккаламиз писиллаган сандалга тиқилиб кечаси билан совқотиб чиқамиз. Чолим билан Оқсоқол қиш сурилиб кетаётганидан тажанг. Гўнгни-ку, қахратон қиш демай далага олиб чиқишган. Аммо ҳали қанча юмуш бор! Ариқ тозалаш, ер ҳайдаш. Эҳ-ҳе!

Овсиним ётиқли касал бўлиб қолганидан бери Оқсоқол уйига сиғмайди. Каллаи саҳарлаб чолимнинг олдига чиқади. Бутун ҳам тонг отмасидан чопонига ўралиб кириб келди. Робия молхонада сигирга қарар, мен энди чой дамлаб келган эдим.

- Падарига лаънат! Оқсоқол сандал тўрида ўтириб, чой ҳўпларкан бўралаб сўкинди. Кеча кечқурун янги ой чиқди. Қарасам, ўроги яна бемалол ёнбошлаб ётибди. Ой ўзига тинч бўлса, ер нотинч бўлади. Ҳаливери қишнинг кети кўринмайди, шекилли.
- Кузги буғдой чириб кетмаса гўргайди, деди чолим бош чайқаб. Ҳайронман, ҳавонинг бу кетиши бўлса...

Кўча эшик зардали тақиллади-ю оғзидаги оғзида, бўғзидаги бўғзида қолди.

Учовлашиб, олдинма-кейин дарвозага чиқсак. Умар закунчи отини гижинглатиб турибди. Бошида чақмоқ телпак, эгнида поча-пўстин, қўлида қамчи.

– Йилинг уйқу, мучалинг ёстиқми? – деди ту ёғи билан қор титкилаётган отининг жиловини силтаб.

Оқсоқолни кўрди-ю, Закунчининг кўзлари қисилиб кетди.

– Сен нима қиляпсан бу ерда? – деди ингичка мўйлови титраб. – Иккита келинингни сўқимга боқиб қўйибсанми?!

Хайратдан оғзим очилиб қолди. Шу гапни Оқсоқолга айтяптими? Бутун Нўғайқўргонда чолимдан бўлак биронта одам шу пайтгача сансирамаган Оқсоқолга-я?!

Дозир катта жанжал чиқишини сезиб, юрагим увишиб кетди. Қўрқув ичида бурилиб қарасам, Оқсоқол қовоғини уйиб, Закунчига чақчайиб турибди. Энтикиб нафас олаётгани учунми, ҳаво совуқлигиданми, оппоқ мўйлови тагидан қуюқ ҳовур кўтариляпти.

Оқсоқол бир ҳатлаб, яқин борди.

– Менга қара, – деди жиловга қўл чўзиб. От ҳур-киб, бошини кўтарди. Сувлиги шиқирлаб кетди. – Бешигимни тебратганмисан?!

Закунчи лабининг бир бурчи билан илжайди, лекин ўша захоти жиддий тортди.

- Чиқиш керак-да, далага! деди муросага чақирган оҳангда. Сизгаям қойилмасман, Дума! У чолимга юзланди. Шунча иш турибди-ю. Ҳайронман, икковларингни гапинг ҳеч адо бўлмайди.
- Йўқ, шошма, бешигимни тебратганмисан?! Оқсоқол от жиловига қайтадан чанг солаётган эди, чолим олдини тўсди.
- Нима иш қилайлик, раис? деди от билан Оқсоқолнинг ўртасига туриб. – Ариқ қазиб бўлмаса,

ер чопиб бўлмаса... Ўзимизниям патагимизга қурт тушиб турибди...

- Чиқаверинглар-чи, иш топилади! Закунчи от жиловини бурди.
- Йўқ, шошма! Оқсоқол қорда сирғаниб ўша томонга отилди. Бу сафар бир талпиниб жиловдан ушлаб қолди. Агар яна бир марта сансирасанг...

Оқсоқол у ёғини айтмади. Аммо Закунчининг ранги гезариб кетганини пайқадим.

– Қўйворинг! – деди жиловини тортиб. – Тўгри гап туққанингга ёқмайди.

Чолим амаллаб Оқсоқолнинг қўлидан от жиловини айирди. Жийрон кескин бурилган эди, ту ёгидан отилган қор Оқсоқолнинг юзига сачради.

– Гап шу! – Закунчи отини қичаб нарироққа бордида, эгар устида бурилиб қаради. – Ҳозирча колхознинг хўжайини менман. ўинг деганни рабочий батальонга жўнатиб, уй ичини кўчирма қилиб юбораман!

От думини гажак қилганча қор сачратиб чопиб кетди. Қаммамиз орқасидан қараб қолдик. Оқсоқол ҳамон ўзига келолмас, соқоли титраб, пишқириб нафас оларди.

- Қуй, ўртоқ... Чолим уни юпатди. Шу ахмоққа тенг келиб ўтирасанми? Бирпас ўйлаб туриб, елкасини қисди. Туппа-тузук одам сиёхига кириб қолувди-ку, бу хотинталоқ. Нимага яна закунчиликка ўтди?
- Гап закунчилиқдамас! Оқсоқол ижирғаниб юзини ўгирди. «Қорахат» келган куни сўкканимнинг аламини оляпти.
- Вой аблаҳ-эй! Чолим дўстининг елкасига қоқди. – Қўявер, ит акиллади қўйди-да...
- Мараз!.. Оқсоқол муштини тугди. Болалари ўлди, энди қўлидан ҳеч нима келмайди демоқчи.

- У овози титраб алам билан бош чайқади. Одамзод ҳам шунчалик палид бўладими!
- Юр, борсак борайлик, далага! Чолим ўртогини судради. Қани кўрайлик-чи, нима юмуш бор экан.

...Робия иккаламиз энди бир пиёла чой ичган эдик, дарвоза тағин тақиллади. Бўйинг лаҳатда чиригур Закунчи яна келди, шекилли!

Робия дик этиб танчадан турган эди, эшик ғийқиллаб очилди. Уйга аввал лампамой ҳиди, кетидан енглари доғ-дуғ бўлиб кетган пахталик кийган, қалин жун рўмол ўраган Башорат кириб келди. Кесакига суянганча тик туриб қор босган этигини ечди, салом берди. Кўнглим ёришди.

- Вой, сизмидингиз, мен анави гўрсўхта деб...

Башорат шоша-пиша сандал четига ўтирди. Мой юққан, совукдан торс-торс ёрилган қўлини танчага сукди.

 - Ўлсин, мунча совуқ! – деди ҳансираб. – Иҳ, танчангизданам муз чиҳяпти-ку, хола.

Робия чойнак кўтариб, чиқиб кетаётган эди, имо билан тўхтатди.

– Ўтир! Чойга бало борми, совуқ кунда... Одам қатнайвериб безор бўлади.

Робия ийманиброқ сандал четига қайтиб ўтирди. Башорат бекордан-бекорга уйма-уй санқимайди. Гапи бор. Шуни билиб, юзига термилдим. Жимлик чўкди. Ташқарида мушук миёвлади. Башорат кулимсираб қўйди.

– Мушугингизни эрга берсангиз бўлмайдими, хола. Зора-мора кунлар исиб кетармиди!

Робия уялиб, юзини ўгирди. Жуда шаддод-да, Башорат тушмагур! Олдимда қиз бола ўтирибдиям демайди.

– Қишнинг бир куни қолсаям қўрқ дегани, шуда.
 Хали аямажиз бор, ахмон-дахмон...

– Қирилиб кетсин ахмониям, дахмониям!.. – Башорат жаҳл билан сўзимни кесди. Бошидаги рўмолини юлқиб олиб ёнига ташлади. – Иш қолиб кетяпти, хола!

Юзига қараб туриб, раҳмим келди. Совуқдан қорайиб кетган, ёши қирқнинг нари-берисидаю чакка сочлари оқарибди.

- Поччадан хат борми? дедим секин. (Гапим қурсин! Укам тенги одамни «почча» десам! Нима қилай, Нўғайқўргоннинг ҳаммаси Башоратнинг эрини «почча» деб ўрганган).
- Келди! У жўн гап айтгандек хотиржам бош силкиди. Пулемётчи экан.

Боядан бери жим ўтирган Робия хўрсинди.

- Кимсан акамдан анчадан бери хабар йўқ.
- Ҳеч нима қилмайди! Башорат аввал Робияга, кейин менга юпатувчан алпозда қараб қўйди. – Урушда юрган одам ҳар куни хат ёзолмайди.

Яна жимлик чўкди. Ташқарида тағин мушук миёвлади.

– Хола! – Башорат илкис бош кўтариб, кўзимга қаттиқ тикилди. – Робияни менга берасиз!

Томдан тараша тушгандек гапириши ғалати эшитилди.

- Вой, бу нима деганингиз?!
- У ўктамлик билан кулиб юборди.
- Қўрқманг, қизингизни обқочиб кетмайман, холажон! Келин қилиб оберадиган укам йўқ.

Қарасам, Робия ҳам ҳайрон қолиб, аланг-жаланг буляпти.

- Шогирдликка берасиз! Башорат Робияга юзланди. Менга шогирд бўласан, трактор ҳайдайсан! Робияни билмадиму мен бир сапчиб тушдим.
- Қанақасига? Урушдан олдин Кимсан трактор ҳайдайман деганида бунақа ишни механиклар қилади, дейишганди.

- У бошқа замон эди, хола! деди Башорат ялиниб эмас, жаҳли чиқиб. Ҳозир уруш...
- Қиз бола боши билан... Сен ҳам гапирсанг-чи, дегандек Робияга қарадим.
- Рост, опа, деди Робия сочининг учини ўйнаб.- Қанақа бўларкин!
- Нима, мен эркакманми? Башоратнинг овози қатъий жаранглаб кетди. Ё сендан ортиқ ерим борми?!
- Ахир у ерда эркаклар ишлашса... деган эдим, Башорат баттар аччиқланди.
- МТСда битта эркак бор. Ўша эркак менман!– деди алам билан. Кўчага чиқсам эркакман, уйга кирсам хотинман. Нима қилайлик! Қиш сурилиб кетяпти. Эртага йилт этиб офтоб чиқса, шунча жойни ким ҳайдайди?
  - Тўгри-ку, лекин Робия... Бобоси...
- Хотиржам бўлинг! Башорат яна огзимга урди. Чолингиз билан аллақачон гапни пишитиб қўйганман.
  - Шунақа-ку, у ёқдан Кимсан бор...
- Тўгри, деди Робия жонланиб. Кимсан акамдан берухсат...
- Дард! Башорат совуқдан торс-торс ёрилган қўлини сандалга муштлади. Трактор ҳайдаш аэроплан учириш эмас! Кимсан акангга ўзим хат ёзаман. Қаллиғинг трактор ҳайдаяпти, десам хурсанд бўлади. Сен трактор ҳайдашни ҳанча тез ўргансанг, Кимсан аканг шунча тез келади.

Робия гох менга, гох Башоратга қараб талмовсираб турган эди, Башорат бақириб берди:

– Ўтаканг ёрилмасин! Оқсоқолнинг қўшалоқ келинлариям боради. Хеч бўлмаса биттаси эрининг ўрнига трактор ҳайдайди. Қани отлан! Сочингни чамбарак ҳилиб ол! Келинкўрарга кетаётганинг йўҳ!

Шундоқ деди-ю, Робиянинг қўлидан судрагудек бўлиб етаклаб чиқди-кетди. Ҳай-ҳайлаганимча қолавердим.

## ЎН ТЎРТИНЧИ БОБ

## РОБИЯ ХИКОЯСИ

## 1. От ўрнини той босар

Башорат опа рост айтган экан. Трактор ҳайдаш – аэроплан миниш эмас. Тўгри, аввалига трактор гилдирагининг ҳар биттаси омочдек келадиган тишларини кўриб, ҳўрҳдим. Дудбуронидан кўкимтир тутун чиҳиб патиллаётганида босиб кетмасайди, деб юрагимга ваҳима тушди, лампамой исидан неча кунгача кўнглим айниб юрди. Аммо одам ҳилган ишни одам ҳила олар экан.

Бугун эгарга биринчи марта ўтирдим. Башор опа билан эмас, бир ўзим. Мотор гуриллайди. Дудбурондан тутун кўтарилади. Пўстак ташланган темир эгарга миниб олиб, МТСнинг қор босган ховлисида трактор хайдаб кетяпман. Девдек машина у ёққа бурсам, у ёққа бурилади, бу ёққа бурсам - бу ёққа! Худди достондаги тулпор минган Барчинойдек! Кўклам нафаси сезилиб колган тип-тиник осмон, эрта-индин эриб битишини билиб, мулойим тортган қор, МТС девори орқасида куртак чиқаришга шайланиб турган толлар, қиш уйқусидан уйгониб, хўрсиниб-хўрсиниб нафас олаётган ер хаммаси менга хайрон бўлиб қараяпти. Қанийди, хозир Кимсан акам шу ерда бўлса! Қаранг, Кимсан ака! Кўряпсизми, мен трактор хайдаяпман! Энди менинг қўлимдан ҳамма иш келади. Кўряпсизми, трактор менинг измимга бўйсуниб, хохлаган томонимга юряпти. Эшитяпсизми, Кимсан ака, тракторимнинг овозини эшитяпсизми?

Ие, анавилар ким? Оқсоқол-ку! Ёнида Зуҳра келин. МТС дарвозасидан кириб келишяпти. Оқсоқолнинг келинлари тракторчи бўлишни хоҳламаган эдику! Энди Оқсоқолнинг ўзи бошлаб келяпти Зуҳра келинни?! Ўзим яхши кўрадиган Зуҳра келинни!

Бир маҳал қарасам, тракторни тўппа-тўгри ўша томонга ҳайдаб боряпман. Зуҳра келин қўрқиб кетганидан Оқсоқолнинг орқасига беркиниб олди. Вой, келинойим тушмагур-ей! Мана, ҳозир, тўхтатаман! Трактор ҳайдаш — аэроплан миниш эмас! Бир маҳал Башор опа бостирмадан югуриб чиҳди. Эриган ҳорда сирғана-сирғана чопиб келиб, трактор олдини тўсди.

– Ўчир-е! – деди бақириб.

Юмшоқ қор устига сакраб тушдим. Зуҳра келин Оқсоқолнинг орқасидан секин мўралади. Эгнида униққан бахмал камзул, оё́ғида эски этик, юпқа лаблари титраганча жилмайиб турибди.

- Кўрдингми? деди Оқсоқол унга ўгирилиб. Буям омоч хайдашдек бир гап.
- Босиб кетса-чи!! деди Зуҳра келин чиройли кузларини пирпиратиб.
- Босиб кетмайди! Башор опа мени кўрсатиб жилмайди. Ана, Робия туппа-тузук ўрганиб олди-ку!
- Шуни айтгин! Оқсоқол мўйловини бураб шанғиллади. Қиз болачалик йўқмисан!

Халиям ҳуркиб турган Зуҳра келинни ҳучоҳлаб олдим.

- Қўрқманг, ўзим ўргатаман, дедим кулиб.
- Ана! Ўзи ўргатади, Оқсоқол узун тўнининг барини қайириб, шимининг чўнтагидан носшишасини чиқарди. Нос отиб, атрофга қаради. Кўклам

кириб қолди, – деди ҳавони искаб, – сезяпсанми, Башор, тупроқ ҳиди келяпти. Ер уйғонди!

У каттакон кафти билан ёшланган кўзларини артди.

- Башор! деди тўсатдан. Зокиримнинг трактори қайси?
- Ремонт қиляпмиз, Башор опа MTC бостирмасига имо қилди. – Тузатиш керак.
- Тузатасан! Зўра қарашади, Оқсоқол келинига юзланди. – Ўшани сен минасан, уқдингми! Зухра келин индамай бош ирғади.
- Буниси Шокиримникими? Оқсоқол мен минган трактор ғилдирагининг қор юқиб, ялтираб турган тишини силади. Майли, бунисини сенга бердим. Сенам ўзимнинг қизимсан-да.
- Кўнглингиз тўқ бўлсин, Оқсоқол! Башор опа Зуҳра келиннинг қўлидан тутди. Ўғлингизнинг тракторини уч кунда отдек қилиб бераман!
- Шошма, ўв! Оқсоқол Зухра келинни бостирмага етаклаб кетаётган Башор опани тўхтатди. Баққа ке, деди бармоғини илгак қилиб.

Башор опа кулимсираб қайтиб келди.

- Келинларингиздан ақалли биттаси тракторчи бўлсин деган сенсан, тўгрими? Зўрани обкеган менман, ростми?

Башор опа «тўгри» дегандек бош силкиди.

- Шу гапим қулоғингда бўлсин! Оқсоқол носини қорга тупуриб этиги билан эзғилади. Агар Зўра айтганингни қилмаса, терисига сомон тиқаман.
  - Йўқ, Оқсоқол, Зухрахон унақа жувонмас-ку...
- Шошма! Оқсоқол Башор опанинг гапини кесди. Агар Зўра эрининг ўрнини босолмаса, нима қилишни ўзим биламан. Лекин Зўранинг бошидан бир тола соч ҳаддорат тўкилса, сени сўяман! Уқлингми!

- Хўп, Оқсоқол, хўп! Башор опа, «вой чоли тушмагур-ей», дегандек кула-кула Зухра келинни бостирмага етаклади.
  - Юр, эрингни тракторини кўрсатаман.

Хаво илиб қолган бўлса ҳам МТС омбори зах, нимқоронғи эди. Қиши билан қимирламай туриб, занглаб кетган тракторнинг қаерига қўл тегизсангиз, муздек темир кафтингизни жизиллатиб куйдиргандек бўлади. Зуҳра келин аввалига трактордан ҳуркиб турди-ю, бирпасда ўзиям қизиқиб кетди. Гоҳ Башор опадан, гоҳ мендан «манави нима, буниси-чи?» деб суриштиришга тушди.

Пешинга яқин бостирмага Умар закунчи кириб келди. Қизиқ, Закунчи қаерга борса, аввал отининг кишнаши эшитиларди. Йўқ, бу сафар пиёда келди. Аммо қўлида қамчи бор эди. Бундан чиқди, отини МТС дарвозасида қолдирган.

– Баракалла, азаматлар! – деди хушчақчақ овозда. Кўзларида табассум порлаб жилмайди. – Яшанглар!

Қизиқ, бу одамнинг қанақалигини ҳеч билиб бўлмайди. Бир қарасанг юзидан заҳар томади. Қўйиб берса, ҳаммани қамчи билан савалагудек бўлади. Бир қарасанг – бундан меҳрибон одам йўқ.

- Ким? Трактор тагида ётиб, ғилдирак ўқини болға билан ураётган Башор опа зарда билан сўради. Яна нима гап?
- Менман! Закунчи ерга чўнқайиб, трактор тагига мўралади. Ишни тезлаштириб юборибсиз-ку. У елкаси оша менга имо қилди. Шогирдингиз уқувли чиқиб қолди, шекилли?

Башор опа мой аралаш занг юққан қўлини кир латтага арта-арта трактор тагидан чиқди.

– Уқувсиз шогирдни бошимга ураманми! – деди кафтининг орқаси билан сочини тузатиб. – Эрта-индин унисиям бинойидек ўрганиб олади.

Закунчи трактор орқасида турган Зуҳра келинни энди кўрди.

- Ие, яна битта колхозчимизни тортиб олдингизми? деди ўрнидан илдам туриб.
- Ёмонми! Башор опа қошини чимиди. Битта тракторчи йигирмата одамнинг ишини қилади, ўртоқ Хўжаев!

Закунчи лабини қимтиганча ердан кўз узмай турган Зухра келинга тезгина қараб олди.

– Майли, – деди рози бўлиб. – Ишни тезлатсанглар бўлди. – Қамчиси билан қор юққан этигининг қўнжига қарсиллатиб урди. – Илтимос, – деди ярим расмий, ярим тантанали оҳангда. – Бир соатдан кейин клубга чиқинглар.

У кескин бурилиб, бостирма эшигига юрган эди, Башор опа сўради:

- Тинчликми, ишқилиб?
- Закунчи тўхтаб, бурилди:
- Тинчлик! Яхши гап бор!

#### 2. Осмон юлдузсиз эмас

Уруш бошланганидан бери клуб эшигига шунча одам тўпланмаган эди. Хаво илиқ, оёқ остида аталадек саргимтил қор пилчиллар, юпун кийинган болалар у ёқ бу ёққа югурар, чоллар, хотин-халаж – ҳамманинг кўзида қандайдир сирли ҳаяжон бор эди.

Чойхона ёнидаги ҳовуз бўйида бобомнинг эшак аравасиям турибди. Эшак ҳорғин кўзлари билан атрофга бефарқ қараб қўяди, кўкимтир кулранг лабини чўччайтириб, ҳавони искайди.

Клуб зинасида турган Оқсоқол тўй эгасидек ҳаммани ичкарига таклиф қиляпти.

– Киринглар, пажалиста, ичкари кираверинглар!

Одамлар ҳайрон, худди ёнида турган киши ҳаммасидан ҳабардору ўзи эшитмай қолгандек шеригидан сўрайди:

- Нима гап ўзи? Нима бўпти?

Хаёлимга ярқ этиб ғалати ўй келди: уруш битган бўлса-я? Қар куни радиода бизникилар қарши ҳужумга ўтиб, кўп қишлоқларни озод қилишаётганини гапиради-ку. Тўгри, ҳали душман Москвадан узоқда эмас. Лекин бизникилар нуқул босиб бораверганидан кейин немис таслим бўлса, ажабмас! Ҳали Закунчиям яхши гап бор, деди-ку! Оқсоқолнинг ҳам чеҳраси очиқ. Кошкийди, уруш тугаган бўлса!

Пахтали чопонидан, жун рўмолидан зах аралаш, тер хиди анқиб турган хотин-халажни тирсагим билан нари-бери суриб Оқсоқолга яқинроқ боришга уриндим.

Ориф оқсоқол вақти чоғ пайтида мўйловини икки қўллаб силайдиган одати бор. Қозир ҳам ҳўл бўлиб кетган мўйловини бураб, оломонга жилмайиб қараяпти.

– Ичкари кирсаларинг-чи, барака топкурлар! Менинг хаёлимга келган ўй бошқаланиям миясида айланаётган экан. Тўда орасидан аёл кишининг ҳаяжонли ҳитоби эшитилди.

– Уруш тамом бўптими?!

Бирпасда ҳамма ёқ қий-чув бўлиб кетди. Ҳассага суянган чоллар, кўзида умид ёнган хотинлар Оқсоқолнинг атрофини ҳалқадек ўраб олишди.

Сийрак соқолли чол чувалган салласини қайта ўрар экан, хаста овозда сўради:

- Тушунтириб гапирсангиз-чи, Оқсоқол, Гитлер тўнғиз қўпиптими?!
- Бердисини айтгунча уриб ўлдирасанларми, барака топкурлар! Оқсоқол яна ҳайқирди. Ичкари кирсаларинг-чи!

Оломон орасидан бояги аёлнинг асабийроқ товуши келди:

– Ҳеч ким йўқ-ку, у ёқда. Ўзингиз айтиб қўя қолинг, уруш тамом бўптими, ишқилиб! Болаларим отасини соғиниб кетди-ку!

Ўша томонда Башор опанинг ўктам овози янгради:

 Болаларни баҳона қилмай, ўзим соғиндим деб қўя қол!

Гурра кулги кўтарилди. Оқсоқол ҳам илжайди.

– Башор тўгри айтади, Қумри! Жалол махсумни согинган бўлсанг, тез-тез хат ёзиб тур. Эрта-индин ўзиям кепқолади. Душман беш юз минг аскаридан айрилиб, Масковдан юз чақирим нарига қочди. Эшитдингми! Қани, кираверинглар.

У клубнинг очиқ турган қуш тавақали эшигидан ичкари кириб кетди. Уша заҳоти ҳамма ур-сур билан зинага ёпирилди. Уртага тушиб қолган эканми, оломоннинг ўзи оёғимни ерга тегизмай клубга обкириб қуйди. Ҳамма қий-чув солиб, дуч келган жойга ўтирди. Олдинги қаторни болалар эгаллаб олишди. Улар орасида жияги ситилиб кетган дуппи кийган Олимжонни кўриб қолдим. Залда эркаклар йўқ ҳисоб, деярли ҳаммаси хотинлар, чоллар эди. Ҳамма ғовур-ғувур қилар, умид билан саҳнага тикилар, лекин саҳнадаги қизил мовут ёпилган стол бўш эди. Стол орқасида беш-олтита суянчиғи баланд курси қатор тизиб қўйилибди. Тўрда Сталиннинг сурати...

Клубга яқин орада одам кирмагани учун зах босиб кетган, катта-катта деразаларнинг синиқ ойнасидан шамол ғуриллайди. Кузда чакка ўтган шекилли, бир вақтлар гул солинган деворлар нам босиб, бўёги кўчиб тушибди. Урушдан илгари саҳна тепасида «Меҳнатдан келса бойлик – турмушинг

ҳам чиройлик!» деган шиор бўларди. Ҳозир «Ҳамма нарса фронт учун!» деган ёзув илиб қўйилибди.

Сахнага энг аввал Умар закунчи кириб келди. У кулранг костюм-шим кийган, бўйнига бўйинбог тақиб, ясаниб олган эди. Тўрт-беш қадам юриб тўхтади-да, сахна бурчагига қараб чапак чала бошлади. Пастдагилар индамай ўтирганидан ғаши келди шекилли, «сенлар ҳам чал» дегандек ғайрат билан қарсак ура кетди. Залда ўтирганлар нима гаплигини билмаса ҳам жўр бўлди. Сахна бурчагидан бошяланг, сочига оқ оралаган, тўла гавдали киши чиқиб келди. Мовут костюмининг ўнг енги шалвираб ётар, оғир-оғир қадам босар эди. Мехмон якин келган захоти Закунчи баланд суянчикли курсилардан бирини чакконлик билан суриб рўпара қилди. Шоша-пиша чўнтагидан рўмолча чиқариб, курсини артди-да, мехмонни авайлаб ўтқизди. Янаям қаттиқроқ қарсак чала бошлади.

Пастдагилар унга баравар жўр бўлишди. Охири «бешқарсак» га айланиб кетган сурондан клуб томи кўчиб тушгудек бўлганида меҳмон ягона чап қўлини силкитиб, «бўлди бас» дегандек, имо қилди.

Умар закунчи эса турган жойида мулойим жилмайиб ҳамон қарсак чалар, колхозчиларни ҳам шунга ундаётгандек бўлар эди. Меҳмоннинг вақти тиғиз эканми, ё шовқин-сурондан қулоғи битдими, ўрнидан туриб кетди.

- Ўртоқлар! – деди бақириб. – Ўртоқ колхозчилар... Илтимос...

Умар закунчи жилмайган кўйи тинчий бошлаган залдан кўз узмай, меҳмоннинг қулоғига бир нимани шивирлади. Меҳмон жойига қайтиб ўтирганидан кейин жарангдор овозда, дона-дона қилиб гап бошлади:

– Ҳурматли колхозчилар! Бугун бизнинг колхозда қўшалоқ байрам! Биринчи, энг муҳим байрам шуки, сизлар билан гаплашиб олиш учун райкомнинг биринчи секретари – янги котиби, ҳаммамиз учун ҳурматли ўртоқ Абдураҳмонов ташриф буюрдилар!

Умар закунчи охирги сўзларини тантана билан эълон қилиб, шу қадар қаттиқ чапак чалдики, зал тағин жунбишга келди.

– Хурматли ўртоқ Абдураҳмонов! – Умар закунчининг жарангдор овози шовқинни босиб кетди. – Бизнинг хўжалик аъзолари сизни – уруш қаҳрамони, жонажон ватанимиз учун қон кечган жасоратли жангчини, районимизнинг отасини чин юракдан табриклайдилар. Хуш келибсиз колхозимизга, ўртоқ Абдураҳмонов!

Оломон қайтадан ғайратга тушиб қарсак чала бошлади.

Шунда кутилмаган иш бўлди. Абдураҳмонов оғир гавдасига ярашмаган чаққонлик билан ўрнидан сапчиб турди. Негадир салқиган қовоқлари учиб-учиб, шишинқираган юзлари қизариб кетди. Ягона қўлини чўзиб, ҳамон ғайрат билан қарсак ураётган Закунчининг билагидан ушлаб, шахд билан тортди.

Залга қараб, бир нима деган эди, шовқиндан ҳеч нарса эшитилмади. Аммо зум ўтмай чапак тинди, одамлар харракларни ғирчиллатиб, жойига ўтиришди.

– Ўртоқлар! – деди у титроқ, хаста овозда. Ёнида жилмайиб турган Закунчини зўрлагудек бўлиб жойига ўтқизди. – Дўстлар! Юртимизнинг бошига оғир кун тушганида кечани кеча, кундузни кундуз демай ҳалол меҳнат қилаётганингиз учун ҳаммангизга минг раҳмат! Райком ҳаммасини билади.

«Қизил деҳқон»чилар фронтга пландан ташқари беш тонна қуруқ мева юборганини, юз минг сўмлик заём олганини, жангчиларимизга иссиқ кийим жўнатганини — ҳаммасини биламиз. Душман Москва остоналарида енгилди. Шармандаси чиқиб қочяпти. Бунда сизларнинг ҳам улушинглар бор.

Энди Закунчи ундамаса ҳам одамларнинг ўзи гувиллаб қарсак ура бошлади. Абдураҳмонов ягона қўлини кўтариб шовқинни тўхтатди.

– Мен районда янги одамман! – деди толиққан овозда. – Фронтдан яқинда қайтдим... Аммо бу колхозга урушдан аввал ҳам келганман. Тўғрими, Оқсоқол!

Залнинг ўртарогидан Ориф оқсоқолнинг баланд овози эшитилди.

- Баракалла! Келгансиз.
- Дума қаёқдалар, Дума?

Хамма аланг-жаланг бўлиб қолди.

Бобом охирги қаторда ўтирган экан. Ўрнидан тургани билан биров кўриб, биров кўрмади.

- Бу ёқдаман! деди чийиллаб. Гапираверинг,
   эшитяпман.
- Бу жой, меҳмон бўш курсиларга имо қилди, сизларники. Колхозни йўргаклаб, бешигини тебратганларники. Қани, марҳамат, жойларингни билиб ўтиринглар.

Умар закунчи дик этиб ўрнидан турди.

– Шуларга асраб қўйибмиз-да жойни! Қани, Оқ-соқол, Хусан ака, президиумга марҳамат.

Оқсоқол билан бобом саҳна бурчагидаги зинадан узун-қисқа бўлиб чиқиб боришаётганида тағин қарсакбозлик бўлиб кетди.

– Мен бугун жуда хурсандман! – Меҳмон залга қараб жилмайди. – «Қизил деҳқон»дан чиққан қаҳрамон жангчини қутлашга келдим. – У ягона

қўлини мовут костюмининг чўнтагига суқиб газета чиқади.

– Раънохон, чиқинг! – деди Умар закунчи ўртароқдаги қаторга имо қилиб.

Сочини чамбарак қилиб ўраган, қундуз ёқали пальто кийган Раъно келинойим одамлар орасидан ўтиб, саҳнага чиқди. Қарасам, икки юзи қизариб, чиройли кўзлари ёниб турибди.

– Ўқинг! – Закунчи меҳмоннинг қўлидан газетани олиб, Раъно келинойимга узатди.

Раъно келинойим газета қатини ёзаётганда, «Қизил Ўзбекистон» эканини пайқадим. У гоҳ саҳнада ўтирганларга, гоҳ пастдагиларга қараб ширин жилмайган кўйи шариллатиб ўқиб кетди.

«Тошкентлик паҳлавон. Марказий фронтнинг оддий аскари, артиллериячи Очил Комилов урушдан аввал энг тинч касб – ўқитувчиликни орзу қилганди, Тошкентдаги Низомий номли педагогика институтида ўқир эди. Унинг мақсади ёш авлодни тарбиялаш эди. Немис-фашист босқинчилари юртимизга бостириб киргач, қўлига қурол олди...»

Зал яна сув қўйгандек жимжит бўлиб қолган, ҳатто биринчи қаторга ўтириб олган болалар ҳам чурқ этмас, ора-чора одамларнинг йўталгани, тарновдан эриб тушаётган қорнинг шилдираши эшитилиб турарди.

Бир маҳал эшикка яқинроқ жойда хотин киши хиқиллади:

- Очилим, болагинам...

Башор опанинг зардали товуши жимжит залда қаттиқ янгради.

– Ўғлингиз иш кўрсатганига суюниш ўрнига обидийда қиласиз-а, Лазакат хола!

Раъно келинойим ҳамон газета ўҳир, овози тиниқ, ҳаяжонли жаранглар эди.

Келинойимнинг бунчалик равон, бунчалик дона-дона ўқишини энди билишим. Ўзини тутиши ҳам, овозиям, мулойим жилмайиб туришиям – ҳамма-ҳаммаси одамларни сеҳрлаб қуйган эди. Ростини айтсам ойим кунора, «келинойингдан ҳабар ол, битта ўзи қон бупкетади», деб чирқиллашига қарамай анчадан бери уйига боролмаганимдан уялиб кетдим. Ўша заҳоти бир замбил картошкани кутаролмай, қуллари қалтираб турган Очил ака куз ўнгимга келди.

Нахотки ўша Очил ака шунчалик иш кўрсатган бўлса! Бундан чиқди юрагида ўт бор экан-да! Мен бўлсам, бечорани калака қилиб юрибман.

Раъно келинойим тўпчи Очил Комиловнинг Вязма деган жойда бир жангда ўн битта немис танкини пачақлагани, Олий Бош қўмондоннинг буйругига биноан Жанговар Қизил Байроқ ордени билан мукофотланганини ўқиётганида овози тантанали тус олди.

Газетани ўқиб бўлиб меҳмонга узатган эди, Умар закунчи чаққонлик қилиб тортиб олди. Келинойимга бир нима деди-ю, қайтадан янграган қарсаклар овозидан эшитиб бўлмади, Раъно келинойим мамнун жилмайиб зинадан тушиб кетди.

Умар закунчи пастга қараб қичқирди:

- Комил ака! Ўртоқ Комил ака!

Комил амаки дераза олдида ўтирган экан. Шошилмай ўрнидан турди. Бошида эскироқ юмалоқ дўппи, эгнида чопон. Сийрак соқоли ҳар доимгидек текис тарошланган. Янги котиб Комил амакини танир экан.

- Ие, ўзимизни табиб-ку! деди кулимсираб.
- Шу-да! Закунчи дарров гапни илиб кетди. Табиб бўлгани билан кетмонни ҳаммадан яхши уради. Стахановчи. Аммо ҳўлиям енгил. Любой касални уч кунда тузатади.

– Қани, чиқаверинг, Комилбой! – Ориф оқсоқол мўйловини ҳафсала билан буради. – Геройни отасиям герой бўлади-да.

Табиб одамлар орасидан секин-секин ўтиб, бурчакдаги зинадан саҳнага чиқди. Абдураҳмонов ўрнидан оғир қўзғалиб, Комил амакининг рўпарасига борди. Табиб унинг узатган чап қўлини қўшқўллаб қисди.

Умар закунчи саҳна бурчагига бир имо қилган эди, буғалтир Соли сўпоқ пилдираб чиқиб келди. Чамаси боядан бери кутиб турган бўлса керак, қўлида тугун бор эди.

– Ўртоқ Комил ака! – деди Закунчи тантана билан. – Шундоқ қахрамон ўғилни ўстириб тарбиялаганингиз учун минг рахмат сизга. Мана бу – колхоз правлениеси номидан совға!

Шундай дедию тугунни ечди. Ичидан яп-янги беқасам тўн чиқди. Табиб хижолат чекиб турар, гоҳ саҳнадагиларга, гоҳ залга қарар, чамаси нима қилишини билмасди.

Соли сўпоқ тугун орасидаги буклоглиқ дўппини столга ташлади-да, шоша-пиша Комил амакининг эгнидаги чопонни ечиб олди. Закунчи янги чопонни ўз қўли билан кийгизди. Қизил қийиқчани чаққон айлантириб, табибнинг белига боглади.

Соли сўпоқ дўппининг қатини очиб, кафтига қарсиллатиб ураётган эди. Оқсоқол илдам ўрнидан турди.

– Бу ёққа ол! – деди қўл чўзиб. – Калинг юқиб қолади. Шу қўлинг билан бошингни қашигансан, биламан.

Қийқириқ, кулги бўлиб кетди. Оқсоқол табибнинг бошидаги юмалоқ дўппини авайлаб ечиб, қўлига тутқаздида, янгисини кийгазди.

– Баракалла, Комилбой! – деди табибнинг пешонасидан ўпиб. – Белида белбоғи бор ўғил ўстирибсиз.

Оқсоқол жойига бориб ўтираётганида тағин қарсакбозлик бошланди.

Қизиқ, ҳали ўзининг шаънига қарсак чалинганида ғаши келган Абдураҳмонов энди қувониб кетди. Бир қўллаб чапак чалолмагани учунми, нуқул чап қўлини «баракалла» дегандек ҳавода силкитар, кўзларида қувонч порлар эди.

Умар закунчи табибга юзланиб, тантанавор оҳангда сўради:

- Сўз берайликми?

Табиб елкасини қисди.

– Мен нима дейман... – Залга қараб олди-да, паст вазмин товушда қўшиб қўйди. – Уруш тезроқ битсин. Жумла мўмин қатори Очилим ҳам эсон-омон келсин! Яхши тўйлар қилайлик!

Комил амаки саҳнадан тушиб кетаётганида Закунчи тағин миннатдорчилик билдирди.

– Рахмат сизга! Қишлоғимиздан чиққан қахрамон Очил Комиловнинг укаси Олимжон Комиловни биласизлар-а?

Орқа томондан Парча опанинг дўриллагани эшитилди.

- Биловуз! Яхши бола!
- Олимжон, чиқ бу ёққа! деди Закунчи залға аланглаб.

Биринчи қаторда ўтирган Олимжон саҳна томонга югурди.

– Маладес йигит! – Умар закунчи Олимжоннинг қулини қисди. – Законний бола! – деди райком котибига қараб. – Дарсдан буш пайтида колхозга ёрдам беради.

Саҳна бурчагидан яна Соли сўпоқ чиқиб келди. Умар закунчи патнусҳа ёгоч ручка билан қогозга ўралган алланимани Олимжонга тутқазди.

- Мана бу ойингга! - деди қоғозга ўроглиқ нарсага имо қилиб. - Рўмол. Буниси сенга. Ручка билан «московский» перо! Яхши ўқи, хўпми? Дозир нечанчи классдасан?

Олимжон нимадир деган эди, эшитилмади.

- Нима? деди Закунчи қулоғини Олимжоннинг оғзига тутиб. Қаттиқроқ гапир! Одамлар эшитсин.
- Тўртинчи! Олимжон бир қўлида ручка, бир қўлида қогозга ўроглиқ рўмолни чангаллаб жилмайди.
- Маладес! Закунчи унинг елкасига қоқди. Билиб қўй, сенинг вазифанг ўқиш. Келажакда олим бўлмасанг, ҳисобмас. Доҳиймиз Сталин шундоқ қийин пайтдаям сизларни ўқитяпти. Бошқаларга йўқ нонни мактабга беряпти. Шундоқ экан, сенлар олим бўлишинг шарт, тўғрими?

...Бобомнинг эшак аравасида уйга қайтарканмиз, бугунги тантаналар кўз ўнгимдан кетмас, нам босган кўзойнак ортидан термилиб турган Очил аканинг митти кўзлари хаёлимда жонланар, «яхши кўриш айб эмас-ку» деган, ялинган овози қулоғимда жаранглар эди. Билмадим, негадир ўша захоти хаёлимга Кимсан акам келди. Қанийди Кимсан акам ҳам орден олса! Клубда шунақа мажлис бўлса! Ҳамма Кимсан акамни мақтаса!

Бобом қулоқчини қийшайиб кетган телпагини бостирганича эшак жиловидан тутиб борар, арава ғилдираги остида кечки совуқда қайтадан музлаган қор қисирлар, ҳаво очилиб кетган, қоп-қора, чуқур осмонда бодроқдек юлдузлар порлар эди.

# 3. «Оқ илон, оппоқ илон, ойдинда ётгонинг қани!»

Ер селгир-селгимас, тракторни далага солдик. Кутиб ўтиришга вақт йўқ. Башор опа ёнига Зуҳра келинни олиб, Бўрижар этагидаги биринчи брига-

дани шудгор қилишга тушиб кетди. Менинг зиммамга Кўтармадаги олтинчи бригада тушган. Ёрдамчим – Олимжон.

Эрта баҳорда тупроқ ҳиди бошқача бўлади. Қиш бўйи қор остида ухлаб ётган ер кўкламнинг илиқ-иссиқ офтобидан уйгонади-ю, ҳузур қилиб керишаётганга ўхшайди. Ҳали селгиб улгурмаган тупроқдан нам аралаш қуёш ҳиди анқийди. Трактор оламни бузгудек тариллайди. Тутун иси керосин ҳидига қўшилиб кетади. Аммо бу ислар ернинг ёқимли бўйи олдида унча сезилмайди ҳам. Трактор омочи палахса-палахса қилиб ағдарган жой қоп-қорайиб қолади. Совуқ жойларга қайтиб кетишга улгурмаган қарғалар трактор устида ғужғон ўйнаб, пастга, қазилган ерга шўнгийди. Аммо қарғаларнинг чағ-чуғ қилиши энди ғашга тегмайди. Бари бир эрта-индин беҳи гулласа – тамом! Қузғунлар учиб кетади.

Олимжон хурсанд. Идорада бўлган ўша мажлис. Умар закунчи ўз қўли билан ручка совға қилгани болани жудаям севинтириб юборган. Биламан, мактабга ёлчитиб бормаяпти. Тушлик бўлмасидан жилдини кўтариб келиб қолади. «Иккита ўқидик, учта ўқидик», деб баҳона қилади. Сув ташийди, ёнимга ўтириб олиб трактор ҳайдагиси келади. Қўли рулга аранг етади-ю, катталардек жиддий бўлиб, бултурги марзалар дўппайиб турган даладан кўз узмай боради...

Бугун ҳам шунаҳа бўлди. Пайкал четидаги бир туп жийда тагида тушлик ҳилиб ўтирардим. Офтоб мулойим жилмайиб, елкани ҳизитади. Осмонда эринчоҳ булутлар вазмин сузиб боради. Ариҳ бўйидаги майсалар орасида очилган жимитдек зангори гуллар устида бойҳиси сарғиш ҳанотини пирпиратиб учади.

Энди бир бурда зогора еган эдим, дала бошида Олимжон кўринди. Жилдини боши устида пирпирак қилиб айлантириб чопиб келди.

- Сув опкелайми? деди жилдини жийда шохига илиб. Ҳансираб нафас олар, терлаб кетган эди.
  - Шошма, аввал қорнингни тўйғазиб ол.

Битта зогорани бўлашиб едик. Зогора яхши-ку, дарров тиқилиши ёмон. Чой йўқ.

Олимжон зогорани чала-чулпа чайнаган кўйи пачоқ челакни кўтариб, пайкалнинг нариги бошига югуриб кетди. Тол тагида булоқ бор. Суви тоза, муздек.

Керосин ҳиди анқиб турган челакдан сув ичиб тушликни тугатдик.

– Акам яхшилар-а? – Олимжон бурнининг учида илиниб турган сув томчисини артиб мамнун жилмайди.

Кулдим.

- Айтмовмидим, аканг орден оладилар, деб.
- Сизам яхшисиз! Олимжон ёйилиб илжайди. Тракторга сув оборайми?
  - Майли, кетдик.

Олимжон челакни кўтарганча ҳайдалган шудгордан тиззасигача тупроқ кечиб трактор томонга югурди. Мендан олдин етиб бориб, моторга сув қуя бошлади.

Хар қандай ишнинг ҳам охири қийин бўлади. Пайкални қўлдан чиқариб қўя қолайлик, деб харчанд уринсам ҳам, бир парча ҳайдалмаган ер қолди. Даланинг у бошидан бу бошига икки марта бориб келсак, тамом. Кечаси тракторни бешинчи бригадага олиб ўтамиз-да, эрталабдан янги жойда иш бошлаймиз.

Иккаламиз ҳам чарчаган эдик. Олисда, хўмрайган тўда-тўда булутлар орасида қуёш қонталаш

нур сачратиб бир зум осилиб турдию уфқ ортига думалаб кетди. Шамол кучайди. Кун бўйи эринчоқ кезиб юрган булутлар офтоб ботганидан кейин қахрли тус олди. Шиддат билан бостириб кела бошлади. Трактор устида безовта чарх ураётган қарғаларнинг чағ-чуғи кучайди. Кўнглимга ғашлик чўкди. Ёмғир ёғмаса гўрга эди. Бу ёқда қоронғи тушиб кетяпти.

Бир маҳал трактор тумшуғидан буғ кўтарилиб, ҳеч нима кўринмай қолди.

- Ҳозир сув обкеламан! Ёнимда ўтирган Олимжон сакраб, ерга тушди. Имиллаб бораётган трактор биқинидаги пақирни юлқиб олди-да, қоронғилик чўка бошлаган шудгордан югуриб кетди.
  - Қўрқмайсанми? дедим бақириб.

Олимжон трактор шовқинидан гапимни эшитмади шекилли, қайрилиб қарамади. Бирпасда нимқоронғи зулматга сингиб кетди. Тракторни тўхтатишим билан мотор ўчиб қолди. Э, ўла! Энг ёмони мана шу – ўчиб қолиши! Моторни қайтадан ўт олдириш осон бўлса экан.

Ерга тушишим билан этик қўнжидан лой аралаш тупроқ оёғимга тўкилди. Трактор тумшуғида осилиб ётган каттакон темир тутқични бурай бошладим. Уввало уринаман, қани айланса! Пастга боссам, қўлимни юқорига итариб ташлайди, юқорига кўтарсам, ўчакишгандек пастга силтайди. Бир зумда терлаб кетдим. Шамол кучайган, кунботар томонда чақмоқ ялтирар, зулмат қоплаган осмонда қарғалар шамол арғимчоғида учиб, бор овозда шовқин солар эди.

Олимжон кетган томонга қараб қўлимни карнай қилганча чақирдим.

- Олим-жо-он!

Шамол овозимни тескари ёққа олиб кетди. Ўзимнинг ожизлигим ўзимга алам қилди. Олимжон нима қилиб берарди! Мен буролмаган тутқични айлантиришга ёш боланинг кучи етармиди! Башор опа бўлса бошқа гап! Бунақа қайсар тракторнинг «эсини жойига киргизиб» қўйишни билади.

Башор опани ўйлашим билан ярқ этиб хаёлимга келди: бир сафар МТС ховлисида тракторнинг тутқичини айлантиролмай хуноб бўлиб турганимда Башор опа осонгина юргизиб берганди. Тутқични қияроқ солиб, бутун гавдаси билан бир босганида мотор пат-пат қилиб ишлаб кетган.

Мен ҳам шундай ҳилдим. Тутҳични суғуриб олиб, бошқатдан, ёнбошлатиброқ тиқдим-да, бандидан қўш-қўллаб ушлаганча биқинимга тираб, бутун гавдам билан босдим. Тутқич зўриқиб айланди. Трактор «поп» этди. «Овозинг чикаркану ер ютгур!» Тутқични суғуриб қайтадан солдим. Бу сафар мотор икки марта потиллади. Дудбурондан тутун аралаш чиққан чўғ қоронғида аниқ кўринди. Хаққиси уч гал! Энди юриб кетади. Бу сафар бутун гавдам билан ёнбошлаб бир силтаган эдим, тутқич банди сал пастлади-ю, шунақанги кучли зарб билан биқинимга урилдики, кўзимдан олов чикиб кетди. Ўнг бикинимда чидаб бўлмас огрик сездиму нафасим чикмай колди. Кейин нима булганини билмайман. Қоронғида соядек суппайиб турган трактор, муттасил чағ-чуғ қилаётган қарғалар, осмонда зангори қиличдек ялт-юлт қилиб ўчаётган чақмоқ – ҳаммаси гойиб бўлди.

Юзимга сачраган ёмгирдан ҳушимга келдим. Охири ёгибди-да, деган ўй гира-шира миямга урилди. Ҳали кўзимни очмасимданоқ биқиним увишиб қолганини, увишган бўлсаям жонимни сугуриб олгудек ачишиб, огриётганини идрок этдим.

- Опа, туринг, опа?

Юзимга яна ёмгир сачради. Қизиқ, ёмгирдан керосин хиди келяпти.

Кўзимни очиб, қоп-қора, думалоқ нарсани кўрдим. Олимжоннинг йигламсираган овози қулогимга кирди.

– Туринг, опа, туринг...

Синчиклаб қарасам, бояги думалоқ нарса – челак экан.

Олимжон кўзимни очганимни кўриб севиниб кетди шекилли, челакдаги сувни яна бошимдан қуйди.

Керосин ҳиди анҳиб турган сув оғзимга кириб, кўнглим ағдарилиб кетди.

- Керакмас! - дедим қўл силтаб. - Бўлди.

Олимжон челакни ерга қўйиб, ёнимга ўтирди. Кичкина, аммо дағал қўли билан юзимни силади. Ҳўл, муздай қўли юзимга тегиши билан тағин лампамой ҳиди келди. Энтикиб, юзимни, ўгирган эдим, бола қўрқа-писа қўлини тортиб олди.

– Тепдими? – деди бошимга эгилиб. Энди йигламас, аммо овозида вахима бор эди.

Трактор тутқичи тепганини энди эсладим.

- Хеч нима қилмайди!

Болани тинчитиш учун қаддимни ростламоқчи эдим, биров биқинимга пичоқ санчгандек ловуллаб ачишди. Қарчанд ўзимни тутай десам ҳам бўлмади. Ўнг ёнбошимни чангаллаганча йиқилиб тушдим. Юзим нам тупроққа урилди. Димогимга ер иси кирди. Қизиқ, гувиллаб турган шамол шовқинига қарамай тупроқнинг ожиз шивирлашини аниқ эшитгандек бўлдим. Ичим ёниб борарди. Инграб юбордим:

- CyB!

Олимжон бошимга эгилди.

– Мана, – деди жиякларидан чакиллаб сув томаётган дўппини қўшқўллаб тутиб. – Яхши сув, опа. Ўзимам ичдим. Бошимни кўтариб уч-тўрт қултум ичдим. Дўппи елими, керосин ҳиди анқиб турган сув муздеккина эди. Тағин кўнглим ағдарилди. Юзимни ўгирдим. Олимжон шундай қилса мен дарров тузалиб қоладигандек, дўппидаги сувнинг ҳаммасини ичиб битирди.

– Қаранг, топ-тоза! – деди овози титраб. – Юринг, кетайлик, опа! Тура қолинг.

Анча ўзимга келдим. Амаллаб қаддимни ростладим. Рўпарамда қоп-қора соядек трактор сўппайиб турар, тумшуғидаги темир тутқич қоранғида хира йилтирар, бошимиз устидаги қарғалар сийраклашиб қолган, аммо чақмоқ борган сайин кўпроқ ялтирар, осмондан қисқа-қисқа бўғиқ гумбирлаган садо эшитиларди.

– Туринг, опажон! – деди Олимжон қўлимдан тортиб. – Кетамиз, қозир жала қуяди.

Ўрнимдан тураётганимда биқиним яна ловуллаб ёнди. Томогим қуриб борар, сув ичгим келар, лекин кўнглим айнарди.

Олимжон ўрнимдан турганимга қувониб кетди. Дадилланиб елкасини тутди.

– Бизаникига борамиз-а? – деди мени суяб юришга уриниб. – Дадамларда-чи, кийик ўти бор. Уч марта ичсангиз тузалиб кетасиз!

Хар қадам қўйганимда биқинимга янгидан пичоқ санчилар, кўз ўнгим қоронғилашиб, аъзойи баданимдан совуқ тер чиқиб кетаётганини ўзим сезиб турардим. Ўнг қўлим ҳам сирқиллаб оғриётганини энди билдим. Бундан чиқди, тутқич тепганида биқиним аралаш қўлимга ҳам урилгану қизиқ устида сезмаганман.

– Акам келсалар сиз билан трактор ҳайдаганимни айтаман! – Олимжон қўлтиғимга кириб ҳарсиллаб бораркан, тўхтовсиз гапирарди. – Акамга айтаман, Робия опам ҳам сизга ўхшаган қаҳрамонлар, дейман. Менга трактор ҳайдашни ўргатдилар, трактор тепсаям йигламадилар, дейман.

У оёгим тагида ўралашган сайин юришга қийналар, тишимни тишимга қўйиб борардим. Олимжон терлаб кетган, қўлтигимга тегиб турган ингичка елкаси жиққа ҳўл бўлиб, баттар ғашимни келтирар, меними – ўзиними юпатиб, тўхтовсиз гапириб борарди.

– Дадамларда-чи, опа, мўмиё бор. Бир марта ичсангиз бўлди!

Пайкал четига амаллаб чиқдигу у ёғига қадам босишга мадорим қолмади.

– Шошма, Олимжон... – Болани қўрқитмаслик учун дадилроқ гапиришга шунча уринсам ҳам овозим инграб чиқди. – Дам олайлик.

Хали иккаламиз зогора еб тушлик қилган жийда тагига ўтириб қолдим. Олимжон рўпарамга чўккалаб кўзимга тикилди.

- Ёмон огрияптими?
- Йўқ. Ҳозир босилиб қолади.

Шундоқ бошимиз устида чақмоқ чақди. Бу сафар шу қадар шиддатли ялтирадики, осмонни икки бўлакка тилимлаб ташлагандек бўлди. Кўкимтир нурда Олимжоннинг қўрқувдан дум-думалоқ бўлиб кетган кўзларини, жийда шохида илиниб турган жилдини кўрдим. Ўша заҳоти еру кўкни титратиб, момақалдироқ гумбурлади. Юзимга илиқ, йирик томчи тушди. Ўтирган жойимда қўл чўзиб, Олимжоннинг бошини силадим.

- Дўппинг қани? дедим оғриб кетаётган биқинимни чангаллаб.
- Э, қўйвуринг! Олимжон қўл силтади. Челак ичида қопкетибди. Эртага оламан. Юринг, у тағин қўл чўзди, бизникига борамиз. Дадамга айтсам...

- Йўқ, дедим унинг гапини кесиб. Сен кетавер, хўпми! Эрталаб мактабга боришинг керак. Бор, жилдингни ол. Дафтаринг ҳўл бўлиб қолади.
- Опа! Олимжон мени қучоқлаб олди. Елкалари силкиниб ўксиб-ўксиб йиглаб юборди. Кетмайман!– деди бақириб. Кетмайман! Керакмас мактаби, опа!

Ёмгир кучайиб кетди. Болани багримга босиб ёмгирдан ҳўл бўлиб кетган юзидан ўпдим.

- Хўп, Олимжон, бўпти, дедим кўз ёшимни аранг ютиб.
- Юринг! У лойда сирғаниб ўрнидан турди. Қўлини чўзди. – Юринг, опа!

Ўрнимдан қўзғалишим билан биқиним тағин санчиб кетди.

– Яхши, – гандираклаб оёққа қалқдим. – Кетамиз. Лекин сизларникигамас. Етиб боргунимизча тонг отади. Биласанми... – Иложи борича дадилроқ қадам босишга уриниб, елкасидан ушладим. – Мен Кўтармада қоламан, Раъно келинойимникида. Хўпми? Трактор далада қолганини айтмасам бўлмайди.

Тағин чақмоқ чарсиллади. Уст-боши жиққа сув бўлиб кетган Олимжоннинг йиғидан титраб турган лабларини аниқ кўрдим. Момақалдироқ сурон солди.

- Юр! - дедим йўл бошлаб.

...Кўча четидаги куртак чиқарган толлар шамол қахридан титраб ора-чора чақмоқ чаққанида сесканиб кетар, ҳамма ёқни ер ютиб юборгандек, ваҳимали жимлик чўкканди.

Вақти-вақти билан момақалдироқ гумбурлаб, сукунатни портлатар, аммо ўша захоти ҳамма ёқни аввалгидан ҳам чуқур сукунат босар, ёмгирнинг шовуллаши бу хатарли жимжитликни янаям чуқурлаштириб юбораётгандек бўлар эди.

Раъно келинойимнинг эшиги орқасидан тамбаланган экан. Тирқишидан мўраласам, ҳовли ёнбошдаги уйда хира нур кўринди. Хайрият! Бошим ғувиллаганча эшик кесакисига суяниб, темир ҳалҳани ҳоҳдим. Кўнглим беҳузур бўлиб борар, ҳозир йиҳилиб тушишимни ҳис ҳилиб турардим. Ҳалҳани дурустроҳ таҳиллатишга мадорим етмади.

- Менга беринг, опа! Олимжон ҳалҳани ҳўшҳўллаб ушлади-да, кучи борича эшикка ура бошлади.
  - Кеннойи! деди бақириб. Очинг!

Уй томондан қандайдир шарпа кўрингандек бўлди. Олимжон ҳалқани янаям қаттиқроқ урди. Тағин момақалдироқ гумбурлади. Бир маҳал кўзимни очсам ичкарида чироқ йўқ. Ҳозир ёниб турувди-ку.

Олимжонга ялиндим.

– Қаттиқроқ тақиллат. Момақалдироқда эшитмаяптилар.

Олимжон икки қўллаб эшикни муштлашга тушди.

- Кеннойи! Раъно кеннойи!

Йўқ! Келинойим эшитмади. Бундан чиқди, чарчаган. Эртароқ ётиб, дам олгиси келган. Ёмгир кучайиб кетди. Эшик кесакисидан сомон сувоқ иси анқиб, кўнглим баттар беҳузур бўлди.

Бир маҳал ҳушимни тўплаб қарасам, Олимжон пастак деворга тирмашяпти. Зум ўтмай, деворга миниб олди.

- Их, тикан бор экан! - деди гижиниб.

Кейинги лаҳзада унинг ҳовли томонга гуп этиб тушгани, шап-шуп лой босиб уй томонга боргани, «кеннойи» деб чаҳиргани эшитилди. Уй эшиги гийҳиллаб очилди. Дарвозанинг тирҳишидан яна мўралаб, ҳоронгида ҳеч нимани ҡўролмадим. Бола тушмагур келинойимни ҳўрҳитиб юбормасайди!

Шу пайт аллақандай эркак кишининг «...борми сенга ҳароми!» – деб сўкингани, Олимжоннинг «қўйворинг» деб ялингани эшитилди.

Эшикни кучим борича муштладим.

- Очинг, кеннойи, менман! - дедим бақириб.

Кимдир оғир, шахдам қадамлар билан эшикка яқинлашди.

– Қўйворинг! – Бу сафар Олимжоннинг овози бўғилиб чиқди.

Тамба сурилди. Эшикнинг бир тавақаси очилди-да, кимдир Олимжонни ёқасидан мушук боладек чангаллаб улоқтириб юборди. У гандираклаб келганча куч билан менга урилди. Биқиним баттар санчиб, кўз олдим қоронғилашиб кетди. Олимжон, менга озор берганини билиб типирчилаб қаддини ростлади. Шу пайт чақмоқ ярқ этдию рўпарамда важоҳат билан турган бошяланг Умар закунчини кўрдим.

- Ие, ойимқиз, сизам шу ердамисиз? деди ғазабдан кўзлари ёниб. Бемаҳалда пишириб қўйибдими бировникида!
- Бировмас, ўзимни янгам, оғзимга келган гап шу бўлди.
- Тракторни катта холангникига ташлаб келдингми?

Умар закунчи кўзимга шунчалик дагдага билан чақчайдики, тилим айланмай қолди.

- У бошини эгиб эшикдан чиқиб бораркан, нафрат билан сўкинди.
- Падарингга лаънат. Хаммангни қамоқда чиритиш керак! Саботажчи ички душманлар!

Ичкарига киришни ҳам, кирмасликни ҳам билмай турган эдим, Олимжон ҳансираб нафас олаёт-ганини, ўқтин-ўқтин бўйнини силаётганини кўриб қўрҳиб кетдим.

- Нима қилди? - дедим ўзимнинг дардимни ҳам унутиб. - Нима бўлди?

– Ҳеч нима... Олимжон йиғламсираб бурнини тортди. – Ёқамдан бўғди. Юринг, опа, кетамиз...

Айвон томонда Раъно келинойимнинг шарпаси кўринди, чақмоқ чақди. Келинойим айвондан сакраб тушиб шу томонга югурди. Бошида оппоқ шоҳи рўмол, эгнида бахмал нимча, оппоқ шоҳи кўйлак.

– Вой, Робияхон, сизмисиз! Ўтакамни ўн бўлиб юбординглар-а! – У мени қучоқлаб олди. Юзимдан ўпаётганида димогимга гунафша ҳиди урилди. – Ким бу? – деди Олимжонга қараб.

Келинойим билан кўришарканман, ҳеч нимага тушунолмасдим. Олимжон эса ҳамон томогини силаб-силаб қўяр, ёмгирда бўкиб кетган муштдеккина гавдасини букчайтириб чуқур-чуқур нафас оларди. Раъно келинойим меҳрибонлик билан боланинг елкасига қоқди.

– Раис амакинг танимай қолибдилар-да, – деди юпатиб. – Сени ўгри деб гумон қилганлар. Қозир ёмон кўп. Қани, ичкарига киринглар.

Айвонга чиқиб бораркан, ўгирилиб қаради.

– Қайси шамол учирди, Робияхон? Уй ичларингиз тинчми, Кимсанбойдан хат борми?

Беихтиёр кетидан эргашдим. Олимжонни силаб-сийпаб овутдим:

- Билмаган-да, бўғиб қўймадими ишқилиб?
- Йўқ... Бўйним огрияпти...

Негадир Раъно келинойим тинимсиз гапирарди.

– Умар акам билан шудгор қилинган гектарларнинг ҳисоб-китобини ёзаётувдик. Лампамой ўлгур тамом бўпқолди. Кимсанбойдан хат-хабар борми ахир? Дума поччам, эгачимлар яхши юришибдими? Турмуш ҳам ўлсин, вақт топиб хабар ололмайман.

Олимжоннинг елкасидан қучганча уй остонасига энди қадам қуйган эдим, тағин момақалдироқ

гумбурлади. Бу сафар шунақанги қаттиқ сурон солдики, назаримда осмон чил-чил бўлиб кетди. Кетма-кет чақмоқ чақиб, пастак деразалардан, эшикдан отилиб кирган нур уй ичини сутдек ёритиб юборди. Ерга ёзилгану нари-бери юмалоқястиқ қилиб қуйилган тушак, иккита ёстиқ, бурчакдаги хонтахта устида турган яримлаган вино шиша, попукқандлар, хонтахта бурчагида дуппайиб турган Умар закунчининг чақмоқ телпаги куринди.

Бирдан оёқ-қўлимдан мадор кетиб, Олимжонга суяниб қолдим.

 Опа! – Олимжон бағримга кириб ҳиҳиллади. – Кетамиз, опа!

Раъно келинойим хавотирланиб, ёнимга келди.

- Робияхон! Киринглар...

Ажаб, бир зумда боядан бери азоб бераётган огриқ унутилди. Бошимнинг айланиши тиниб қолди. Яна чақмоқ чақиб, уй ичини ёритди. Келинойимнинг оппоқ рўмолини, оппоқ кўйлагини тагин бир марта кўрдим. Биринчи қор ёгиб турган ўша кечада, келинойим ошхона орқасига ўтиб «сизсиз ўлиб қоламан», деб Шомурод тогамнинг бўйнига осилганида ҳам шу кийимда эди. Фақат бошига жун рўмол ўраб олганди.

- Юр, Олимжон!

Биров ёқамдан бўғиб олаётгандай, Олимжонни судраб ҳовлига отилдим. Ўша заҳоти Раъно келинойим йўлимни тўсди.

- Бу нимаси, озиб-ёзиб бир келганда... Шундоқ ёмғирда қаёққа борасизлар! У Олимжоннинг елкасига қўл чўзган эди, болани силтаб тортдим.
  - Тегманг! Нораста болани ҳаром ҳилманг.

Қоронғи бўлса ҳам Раъно келинойим бир сесканиб тушганини пайқадим.

- Вой, бу нима деганингиз?

- Кетдик! - Олимжонни кўчага судрадим.

Раъно келинойим югуриб келиб кўндаланг бўлди.

– Йўқ, Робияхон! – деди асабий титраб. – Очиқроқ гапиринг. Нима демоқчисиз?

У билагимдан тутмоқчи эди қўлимга илон чирмашаётгандек этим сесканиб кетди. Ўзимни орқага ташладим. Олимжонни етаклаганча кўчага отилдим. Ховли томондан Раъно келинойимнинг ўкраб йиглагани эшитилди.

# - Қандоқ кунларга қолдим!

Ёмгирда вахимали шовуллаб турган ёнгоқзор ичига киргандагина ўзимга келдим. Ора-чора чақмоқ чақар, аммо қалин дарахтлар орасини аввалгидек ёритолмас, момақалдироқ эса янаям вахималироқ гулдирар эди.

- Опа, бизникига борайлик! деди Олимжон ялиниб. У ўқтин-ўқтин бўйнини силар, лекин энди ҳиқилламасди. Биқинимнинг огриги зўрайиб, нафас олсам санчиб огрир, бутунлай ҳолдан тойган эдим.
- Йўқ, Олимжон, дедим инграб. Сен уйга боравер. Қўрқмайсанми? Уйинглар яқин-ку. Мени қўявер, ўзим кетаман.

Қизиқ, Олимжон катталардек хотиржам бош чайқади.

- Обориб қўяман.

Бир томонида наъматаклар ўсиб ётган, бир томонида тубсиз жарлик шовуллаётган тор сўқмоқдан ўтгунча адойи тамом бўлдим. Ожиз майсалар ниш чиқарган, лой бўлиб кетган дўнгликка ўтириб қолдим. Тагимдан шовуллаб ёмгир суви оқиб ўтар, вужудим музлаб бораётганини сезиб турардим. Ҳали пайқамаган эканман. Таги кўчган этигимдан сув сизиб кириб, пайтавам ҳўл бўлиб кетганини энди билдим. Олимжон ёмгир-

да дийдираб, тепамда турар, ора-чора бўйнини силаб қўяр эди.

- Алвасти кўприк... - деди секин.

Индамадим. Хаёлимда бошқа ўйлар чарх урар эди. Қизиқ, бултур байрам арафасида Холпош холага кўкрак бурма кўйлак тиктирганим эсимга тушди. Ўшанда Рашид абзи мўрчасида чўмилиб келган кунимнинг эртасига Оқсоқолникига яна чиқсам, Холпош хола «Зингер» машинасида чок босиб ғалати ашула айтяпти:

Оқ илон, оппоқ илон, ойдинда ётгонинг қани, Мен ёмондан айрилиб, яхшини топгонинг қани?

Эшитиб, ҳайрон бўлгандим: илонниям ашула ҳилиб айтадими одам? Йўҳ, ўшанда бу ашулани тушунмаган эканман. Инсон боласи илонга айланиб ҳолиши ҳеч гап эмас экан.

Нахотки? Шундай кўхли, шундай доно Раъно келинойим нахотки илон бўлса? Шомурод тоғамни урушга кузатаётган куни ошхона деворининг орқасида ўксиб-ўксиб йиғлаганини ўзим эшитгандим-ку! Эрининг оёгига тиз чўкиб илтижо қилганида оппок кўйлагининг этаги лой бўлиб кетганини ўзим кўрган эдим-ку! Ўшанда кўзимга оппок фаришта бўлиб кўринган Раъно янгам шу эмасмиди! Бугун худди ўша кўйлагини кийиб олиб, Умар закунчи билан... Фариштанинг илонга айланиши шунчалик осон экан-да! Ахир тоғам ўлгани йўқ-ку! Кеча унинг оёгига тиз чўкиб «сенсиз ўлиб қоламан» деса-да, бугун... Тоғам у ёқда қон кечиб юрса-ю, келинойим бу ёқда... Одамлар мунча ёмон! Мунча ноинсоф?! Балки, Кимсан акам мени хам, шунақа деб ўйлар?.. Йўк! Бу кунидан кўра ўлгани яхши одамнинг!

Шошма! Раъно келинойим нима деди? «Умар акам билан ҳайдалган гектарларни ҳисоблаб ўтиргандик, чироқ ўчиб қолди», дедими? Нимага раис демайди? Умар акам дейди? Икки туғиб бир қолганими?

Майли, чироқ ўчса ўчгандир. Закунчи Олимжонни ўгри гумон қилса қилгандир. Аммо чала-чулпа йигиштирилган тўшак-чи? Хонтахтадаги вино шишаси-чи! Раъно янгамнинг довдириб қолгани, эшикка чиққанимизда «қандай кунларга қолдим», деб йиглагани-чи! Шўрлик тоғам!.. Ақалли тоғам олиб берган кўйлакни, эрининг оёгига тиз чўкиб ёлборганида кийган кўйлагини ҳаром қилишга уялмайдими! Садоқат билан хиёнатнинг ораси шунчалик яқинми?

- Опа, поезд!

Олимжоннинг товушидан хушимга келдим.

– Қаранг, поезд, – деди у темир йўл томонга қўли билан имо қилиб.

Чиндан ҳам Алвасти кўприк шиддатли тарақлар, ўтиб бораётган юк поезди бўлса керак, чироқлари кўринмас, бироқ шовуллаб турган ёмгирни ҳам, момақалдироқ овозини ҳам босиб кетгудек шодон шовқин солар, олдинга – уруш бўлаётган томонларга елар эди.

- Акамга пушка олиб кетяпти! Олимжон бўйнини силаб қоронғида жилмайди.
  - Огрияптими? дедим хўрсиниб.
- Йўқ, Олимжон тағин бўйнини силади, қизиб кетяпти.

Уятсизлар! Сенларнинг ҳароминг учун бола айбдор эмас-ку, имонсиз! Нега болани урасан, виждонсиз! Бу кунлар ҳам ўтар-кетар! Эртага тоғам кириб елса, кўзига ҳайси юз билан ҳарайсан, беномус! Хеч нима бўлмагандек яна тиз чўкиб йиглайсанми! – Юр, Олимжон. Юр, укам! – Чидаб бўлмас огриққа қарамай ўрнимдан турдим. Лойда сирганиб-сирганиб юриб кетдик.

Кўприкка яқинлашганда тўхтаб қолдик.

– Олимжон, – дедим ялиниб, – раис амакини Раъно келинойингникида кўрганингни ҳеч кимга айтмай қўя қол. Сени танимабди-да. Келинойинг айтди-ку...

Бу гап хаёлимга тўсатдан келди. Раъно янгам-ку, майли... Ҳар кимнинг гуноҳ-савоби ўзига. Урушда юрган тоғамда нима гуноҳ! Нима кераги бор маломатга қолдириб.

Олимжон, Алвасти кўприк вахимасини ўйлаб турган бўлса керак, дарров кўнди.

- Айтмайман, опа. Хозир кўприкдан ўтамиз-а?
- Ўтамиз, Олимжон, ўтамиз, қўрқма.

Қизиқ, бу сафар Алвасти кўприкдан ўтаётганимда заррача чўчимадим.

Қайтаға Олимжонни юпатиб елкасиға қоқдим.

– Яхшиям шу кўприк бор экан! Кўрдингми, поезд Очил акангга замбарак олиб кетди. Аканг яна орден оладилар.

Менинг дадиллигим Олимжонга таъсир қилди. Темир йўл кўтармасидан чиқиб бораётганимизда қўлтигимга кириб кўмаклашди. Қозиргина ўтиб кетган поезднинг орқасидаги бир жуфт чироқ олисда иккита қизгиш нуқтадек узоқлашиб борар, ёмгир анча сийраклашган эди.

– Опа! – деди Олимжон мени суяб нарига томонга олиб тушаркан. – Катта бўлсам, менам урушга бораман-а?

Бир қўлим билан ловуллаётган биқинимни чангаллаган кўйи, иккинчи қўлим билан унинг ёмгирда бўкиб кетган сочларини силадим. - Йўқ, Олимжон! Сен катта бўлгунингча уруш битади. Кейин ҳечам уруш бўлмайди. Ҳечам!

Қамишзор ботқоққа айланиб кетган экан. Ўзимизнинг ҳовли эшигига етгунча алламаҳал бўлди. Ёмгир тиниб қолган, фақат ҳолдан тойган сўнгги томчилар охирги аламини олгиси келгандек, яккам-дуккам томиб турар, шамол қоп-қора булутларни тог томонга суриб кетган эди. Ўша ёқларда момаҳалдироҳ бўгиҳ гумбурлайди, чаҳмоҳ оловли ҳамчисини энди бошҳаларнинг бошида ўйнатади. Қоҳ тепамизда ярим палла ой кўринди. Ўз ҳилмишидан ўзи уялгандек, пайтавадек увада, исҳирт булутлар орҳасига яширинди.

Олимжон кўча эшикни очиб, ҳовлига отилди. Силлам қуриб, зах остонага ўтириб қолдим. Зум ўтмай бобом тепамга келди.

– Ие, нима бўлди, қизим? Буни, қара, ойинг овсинининг олдига чиқувди.

Бир қўлтиғимга бобом, бир қўлтиғимга Олимжон кириб, уйга судрашди.

- Бобожон, дедим инграб. Башор опага айтинг: трактор далада қолди.
- Айтаман, жон қизим, ташвиш қилма. Бобом билан Олимжон токчада чироқ хира нур таратиб турган уйга суяб олиб киришди. Чакка ўтган шекилли кавшандозда, тахмон олдида жом, эски тоғорача турар, иккаласида ҳам сарғиш, кир сув яримлаб қолган эди.

Бобом шоша-пиша этигимни суғурди. Ҳўл бўлиб кетган пайтавамни ечиб олди. Сандал четига мук тушибману устимга кўрпа тортганча, ҳамон «пичоқ санчилаётган» биқинимни чангаллаб ётиб қолибман.

Бир маҳал ойимнинг хавотирли хитобидан кўзимни очдим.

– Вой ўлмасам! Нима қилди? Нима бўлди, жон болам?!

Токчадаги чироқ ҳамон ожиз липиллар, тепамда ойим, бобом, Комил табиб энгашиб туришарди.

- Трактор тепди. Ёмон тепди! Олимжоннинг овозини танидим. Ўтган жойимда бошимни буриб, остонада мўлтираб турган болани кўрдим. Минг азоб билан жилмайдим.
  - Зиёни йўқ, ўтиб кетади.
- Дада! Олимжон тепамда турган Комил амакининг олдига югуриб келди. Дада! деди ялиниб, опамни тузатинг. Дори беринг.
- Вахима қилманг, ўғлим! Комил амаки қўлининг орқаси билан унинг кўкрагидан охиста итарди. Бу дунёда бедаво дард йўқ! Шундай деди-да, сийрак соқолини селкиллатиб кулди. Опангизни шунчалик яхши кўрасизми? Қани, қизим... Табибнинг ингичка бармоқлари биқинимга тегиши билан сапчиб кетдим. Негадир, «яхши кўриш айб эмас-ку», деб илтижо қилиб турган Очил ака кўз ўнгимга келди.
- Аҳмоқ! Бобом шу қадар важоҳат билан чийилладики, қўрққанимдан оғриқни ҳам унутиб ётиб қолдим. – Табиб отанг-ку, ахир! – деди бобом дашном оҳангида.
- Қўй, жон болам! Ойим пешонамни силади. Бунақада оёққа туриб кетолмайсан, қизим!

Комил амаки дарров қўлини тортди.

– Бахтингиз бор экан, қизим, – деди жилмайиб. – Жигарга шикаст етмабди, – ўрнидан илдам туриб бобомга юзланди: – Худо хоҳласа, икки-уч ҳафтада ҳеч нима кўрмагандек бўлиб кетадилар.

### ЎН БЕШИНЧИ БОБ

#### РАЪНО ХИКОЯСИ

### Оқиш бурчаги

Дунёда ҳадиксираб яшашдан ортиқ азоб йўқ экан. Гўё бошингда биров қилич кўтариб тургандек, сен бўлсанг ҳар лаҳзада ўша қилич бўйнингга тушишини кутаётгандек. Бора-бора шунақанги жонингдан тўйиб кетасанки, қилич танингни бошингдан тезроқ жудо қилишига орзуманд бўлиб қоласан. Нима бўлгандаям ҳадик азобидан қутулсам, бир чўқиб, атрофга минг аланглаган қарғадек аянчли аҳволдан ҳалос бўлсам дейсан.

Эрталаб Шомурод акамдан хат келди. Тўгрироги, хат келди эмас, хатни олиб келди: ўша Умар ака. Ҳайронман, одамлар, «эримдан хат йўқ, ўглимдан хабар йўқ», деб чирқиллайди. Шомурод акамдан бўлса ойига камида иккитадан хат келади.

Энди чой ичиб бўлган эдим, эшик тақиллаб қолди. Умар аканинг тақиллатишини танийман. Бошқаларнинг дарвозасини қамчи дастаси билан саваласа, менинг эшигимни авайлаб уч марта секин-секин қоқади. Югуриб чиқсам, эгарда жилмайиб ўтирибди. Қамчи дастаси билан чақмоқ телпагини сал кўтарди-да, чўнтагидан учбурчак хат чиқариб индамай узатди. Турган жойимда шоша-пиша ўқиб чиқдим. Хат қисқа эди. Салом-аликдан кейин ҳалиям сапёрлар ротасида хизмат қилаётганини айтибди. Охирида: «Раъно, негадир кўнглим ғаш, ўзингни эҳтиёт қил, биласан-ку, сени жонимдан яхши кўраман», дебди.

Ўгрилик устида қўлга тушган одамдек этим жимирлашиб кетди.

## - Нима дебди, бизнинг ўртоқ?

Умар ака ҳалиям кетмаганини энди билдим, ярқ этиб қарасам, эгарда қийшиқ ўтирганча, кўзларини қувлик билан қисиб кулимсираяпти. Назаримда, Шомурод акамни ҳам, мени ҳам масхара қилаётганга ўхшаб кетди. Хўрлигим келди.

– Вой-бў, жаҳлингиз бурнингизнинг учида туради-я! – У от жиловини тортиб, узр оҳангида қўшиб қўйди. – Мен Дўмбирободга бораман. Сиз биринчи бригадага ўтмасангиз бўлмайди. Шудгор чўзилиб кетяпти. Тепасида турмасанг, қимирламайди, ҳўкизга ўхшаганлар! – Шундай деди-ю, отини чоптириб кетди.

Тўқайда ер ҳайдаётганлар олдига боряпману Шомурод акамнинг хатидаги охирги гап хаёлимдан кетмайди. «Кўнглим ғаш, ўзингни эҳтиёт ҳил...» Хотин кишининг кўнгли сезгир бўлади, дейишарди. Бундан чиҳди, эркакларнинг юрагиям ёмон нарсани дарров сезарканда!

«Ўмон нарса!» Ўша ёмон нарсага ким айбдор? Бу азоблардан қутулишнинг иложи борми! Бор бўлса нима ўша чоранинг оти? Чарчаб кетдим, ахир! Янги йил кечасидан буён уч ой ўтган бўлса, шу кунлар ичида ич-этимни еб ўзимни абгор қилдим-ку! Иккита одам овозини пасайтириброқ гаплашса, мени гийбат қилмаяптими, деб ичимдан қиринди ўтади...

...Биринчи бригадада иш секин кетарди. Тўқайга трактор кирса ботиб қолади. Ер заҳкаш. Ориф оқсоқол ҳўкизда, хотин-халаж кетмонда ер чопиб ётибди. Яхшиям Дума поччам кўринмади. Умуман, кейинги пайтларда эгачимни, Робияни, Дума поччани кўрсам тиззам қалтирайдиган бўлиб қолган...

Тушликка атала қилишған экан. Ориф оқсоқол каттакон сопол товоқни кўтариб, сарғиш навда-

лари япроқ ёзган самбиттол тагига, қишдан аранг чиқиб олган, баҳорнинг эринчоқ офтобида мудраб турган қушҳукиз ёнига кетди. Хотин-халаж қоқигуллар очилиб ётган ўтлоқ майдончага ўтириб атала ичаётганимизда Парча опа дўриллаб қолди:

– Вуй, Раънохонни очилиб кетганини қарайла! Эри урушда юрган хотингаям ўхшамилла-я!

Биров юзимга тарсакилаб юборгандек бўлди. Илкис бош кўтариб қарасам, Парча опа торс-торс ёрилиб кетган бармоги билан товокдаги атала юқини ялаб илжайиб турибди. Қўлларим титраб кетаётганини сездирмаслик учун товокни ўт устига қўйдим.

– Бу нима деганингиз? – дедим қалтираб, рангим ўчиб кетганини ўзим сезиб турар, ҳамма хотинлар мени мазах қилаётгандек, кўзимни қаёққа яшаришни билмас эдим.

Косани тиззасига қўйиб ўтирган Лазакат хола Парча опани жеркиб берди.

- Э, ўл одам бўлмай! Ёмоннинг бир қилиғи ортиқ деб шуни айтади-да! Ўзингни-ку, чалпакка ўраб ташласа ит искамайди! Раънохоннинг ҳуснига ғайирлигинг келдими!
- Вой, нимага ғайирлик қилий, опа? Парча атрофга ҳайрон аланглади. Очилиб кетибсиз дисамам ёмонми?!

Лазакат хола ўғлининг орден олганига бағишланган мажлисда колхоз правлениеси совға қилган қалампирнусха шоҳи рўмолни ечиб, қайта боғлади. Ўша куни Умар аканинг маслаҳати билан шу рўмолни кооператив дўкондан мен олиб келгандим.

- Очилиб кетса, кетгуйлиги сенга тушдими?
   Нима қиласан, кўнглини ўкситиб!
- Вой, ман нима дидим? Парча опа косани ерга ташлаб ўрнидан турди. Лапанглаб тепамга

келди. – Мангинани ер ютсин, Раънохон, кўнглингизга олманг! – У атала юқи ёпишган лаблари билан ўпмоқчи эди, димоғимга ачимсиқ тер ҳиди урилди. Ижирғаниб, юзимни ўгирдим.

От пишқирди. Бошқа хотинлар аллақачон ўрнидан туриб кетганини энди кўрдим. Уч қадамча нарида Умар ака жийронни жиловидан тутиб турарди. Қачон келиб, қачон отдан тушганини билмай қолибман. Унинг қоши чимирилиб кетган, ингичка, чиройли мўйлови учиб, лабини тишлаганча Парчага ўқдек қадалиб турар, ранги ўчиб кетган эди.

- Нега провакация қиляпсан? деди тахдид билан. Парча опа унга анграйиб қаради.
- Қанақа пира... пира... У ёғига тили келишмади. – Мана қивотганим йўқ, – деди лаби осилиб.

Умар ака бир зум иккаламизга қараб турди-ю, жаҳлидан тушди.

- Эшакдек кучинг бор! Гап сотгандан кўра омоч тортсанг-ку, ҳўкиз жониворлар озгина дам олади.
- Тортсам тортавураман! Парча опа «тўгрими» дегандек атрофдаги хотинларга аланглади.
- Оқсоқол! Умар ака тол тагида ҳўкизларнинг бўйинчасини текшираётган Ориф оқсоқолга қараб ҳайқирди. Ҳўкизларам абед қилдими?

Оқсоқол шошилмасдан чўнтагидан носшишасини чиқарди. Тагига кафти билан уч-тўрт қоқди. Имиллаб нос отди. Носшишани қайтиб чўнтагига суқди.

– Қилди, – деди тўнглик билан, – олдига похол ташловдим, талашиб еди! Ишонмасангиз ўзидан сўранг!

Шу Оқсоқол ҳам яхши одам-ку, ўлгудай қўрс-да! Нима қилади, колхозчилар олдида Умар аканинг обрўсини тўкиб! Шошма! Олдига похол ташладим, дедими? Нимага шама қиляпти бу?

Умар аканинг ранги бир ўзгарди-ю, Оқсоқолга жавоб қилишни лозим топмади шекилли, аламини мендан олди:

– Баракалла, ўртоқ табелчи! Ўзим бош бўлиб, икки соат абед қилдик, денг. Қани, марш, ҳамманг – далага!

Хотинлар пилдир-пис бўлиб, кетмонини елкасига ташлаганча шудгорга йўргалади. Ориф оқсоқол омочни қўлтиқлаб тол хивичи билан ҳўкизларнинг қоқсуяк гарданига беозор ура-ура дала томон йўл олди. Энди ўшаёққа юрмоқчи эдим, Умар ака чаққон сакраб эгарга минди.

– Раъно, – деди овозини пасайтириб. – Уйингга эртароқ бор, тушундингми! – Қамчини секин силтаган эди, жийрон сапчиб кетди. Дала томон йўналган хотинлар чекка-чеккага чиқиб йўл бўшатишди. Умар ака жиловни куч билан тортиб орқасига ўгирилди: – Билиб қуйинг ўртоқ табелчи! – У ҳаммага эшиттириб қичқирди, – ҳайдалган майдонни чорак сотих ошириб ёзсангиз ҳам, закун олдида жавоб берасиз!

Ту ёқлар умид билан энди кўз очиб, кўклам куёшига талпинган чечакларни осонгина янчганча голибона гурсиллади. Жийрон бир зумда узоклаб кетди. Мен бўлсам, омочни кўлтиклаганча кўшхўкизни олдига солиб ҳайдаб кетаётган Ориф оқсоқол, елкасидаги кетмони офтобда яраклаётган хотинларга қараб узок туриб қолдим.

Қизиқ, мен кимман ўзи? Умар закунчи — Умар ака ким деб санайди мени! Одамлар олдида «ўртоқ табелчи», иш юзасидан гаплашганда «Раънохон», ўзининг «иши тушиб», меҳри товланиб кетганида — «Раъно» Гоҳ отимга «ўроқ» қўшиб, гоҳ қўшмай «сизлай»ди. Ёлғиз қолганда «сен»лайди... Ёмон одамнинг номи «икки юзламачи», бўлгувчи эди.

Мен-чи? Мен қанақаман? Икки эмас, уч юзламачиманми?!

...Одам боласининг феъли қизиқ. Аввало, умид билан қурган иморатинг оғмасин экан. Бир оғдими бўлди, бари бир йиқиларкан. Тўсиб қоламан десанг, босиб тушиб ўзингни хам парча-парча қилиб ташлашидан қўрқар экансан. Негаки, ўша иморатнинг пойдевори қўпорилишига бир чеккаси ўзинг хам сабабчи эканлигингни биларкансан. Бўлмаса Шомурод акам билан не умидларда бир ёстиққа бош қўйгандик. Текстиль комбинатида эркаклар оз эмасди. Орқамдан елиб-югурганлар ҳам кўп эди. Мен Шомурод акани танладим. Бировни яхши кўрган одам нимасини яхши кўрасан, деган сўрокка жавоб беролмайди. Яхши кўради, тамом-вассалом! Мен хам Шомурод акамнинг аллақайси жиҳатини эмас, ўзини яхши кўрардим. Онам канча ёлборди. Бошингда отанг бўлмаса, от тепкиси отга ўтмайди, тоғангнинг ўглига узатаман, деб уввало ялинди, кўнмадим. Шомурод акамдан ажралсам ўлиб қоламан, деб ўйлардим. Эримни урушга кузатаётганимда хам бари бир чидолмайман, адойи-тамом бўламан деб ишонган эдим. Шомурод акамсиз қанақа яшаётганимга халиям ақлим бовар қилмайди. Лекин...

...Хайронман, Закунчининг домига қандай илиндим? Тўгриси, биринчи кўрганда ундан қўрққан эдим... Юрагим увишиб кетганди. Кейин билсам юрагим увишмаган, жиз этган экан. Қўрққаним ҳам шундан экан. Бу одамга рўпара келсам нима қилишимни билмай қолишимни сезган эканман. Эҳтимол, Шомурод акам ёнимда бўлганида Закунчидан қўрққан чогдаям яқинимга йўлатмасдим... Ким билсин тағин... Билмадим, дунёда шунақа

нарсалар бўладики, бировга тушунтириш у ёқда турсан, ўзинг ҳам тушунмайсан...

Бегона кўчага кириб қолган одам қўрқиб кетади. Қўрқади-ю, ўша захоти қайтиб кета қолмайди. Нимага шунақа қилганини ўзи билмайди. Эхтимол, маъносини тушуниб етмаган сирли бир нарса — нотаниш манзаралар, ғалати манзиллар алдаб-сулдаб уни ичкарига олиб кириб кетар. Бўлмаса, Шомурод акамни кузатаётган куним тиз чўкиб ялинганимда чин дилдан йиглаганим рост эди. Аскарларнинг овқатини пиширишга, кирини ювишга рози бўлганим рост эди. Ишқилиб севган кишимнинг ёнида бўлсам, дердим. Бунақа савдони бошига тушган одам билади. Ким нима деса десин, аммо ҳалиям Шомурод ака хаёлимдан кетмайди. Шомурод акамни ўйлаган сайин ўзимнинг теримни ўзим шилиб ташлагим келади.

Эркак киши бегона аёлнинг кўнглини овлаётганида ўзининг яқин одамлари хаёлидан кўтариладими-йўқми унисини билмайману, лекин аёл киши бегона одам билан... (Қандай шармандалик!..) Аёл киши бунақа пайтда ҳамма нарсани унутади! Ёнидаги одамдан бўлак ҳеч кимни ўйламайди. Аммо ҳуши ўзига келганидан кейин шунақанги афсус чекадики...

Мен аҳмоқ, мен уятсиз нима қилиб қуйдим узи? Ҳамма қурқадиган, бир қарашда ҳаммани зир титратиб юборадиган Умар закунчи менга шунчалик меҳрибонлигини, лозим булса, оёғимга тиз чукиб ялинишини куриб қуйинглар, дегим келдими! Сенлар закунчини курганда титрайсан. Закунчи эса менинг олдимда қалтираб қолади, демоқчи булдимми! Билмадим! Балки мен ҳалиям ёш боладирман. Онаси қулига урган сайин ширинликка батарроқ талпинадиган гудакдан фарқим йуқдир. Бироқ биламан, бу ширинлик – ҳаром! Ичида заҳар бор! Шунақанги аччиқ заҳарки, Умар ака билан мени ўлдирса майли, икки орада Шомурод акани ҳам жувонмарг қилади. Энг аввал энг бегуноҳ одамни ўлдиради – Шомурод акамни!

Одамлар эридан хат олса бир ҳафта байрам қилади, кейинги хати келгунча кўксига босиб, қайта-қайта ўқиб юради. Битта хатига ўнта жавоб ёзади. Мен бўлсам... Эримдан хат келса, бурчак жиннисидек ҳаммадан бекитиб ўқийман! Жавоб ёзсам, биров тепамга келиб, «ие, муборак бўлсин, эрингиз эсингиздан чиқмаган экан-ку», деётгандек бўлаверади.

Нахотки мен шунчалик беномус бўлсам! Ана, Ориф оқсоқолнинг навжувон келинлариям юрибди-ку! Иккаласиям эридан «қорахат» келганига қарамай сабр қилиб ўтирибди. Чилласи чиқмай куёвидан жудо бўлган қанчадан-қанча ёш-ёш келинчаклар бор. Боши туйнукдан чиқиб кетаётгани йўқ-ку! Мен шунчалик ёмонманми! Қандай кириб қолдим боши берк бу кўчага? Закунчи етакласа, индамай кириб кетавердимми? Нимага? Билмайман. Ўзим билмайман!

Ўша – биринчи қор тушган кеча, Шомурод акамнинг улфатлари тўпланган паллада Умар закунчини хаммадан кўра мен ёмон кўрган эдим. Ошхона орқасига ўтиб эр-хотин хайрлашаётганимизда ҳам бир лаҳза холи қўймади. Айвонга чиқиб Шомурод акамни чақирди. Эрталаб нима учун атайлаб арава чақиргани-ю, нимага Шомурод акамни ўзи бош бўлиб вокзалга олиб чиққанини ҳам тушунмадим. Бунақа нарсаларни ўйлаб ўтиришга вақтим ҳам, тоқатим ҳам йўқ эди.

Поезд тез жўнади. Шомурод акам билан тузук-қуруқ хайрлашолмадик. Фақат у мени бағрига босиб шивирлагани эсимда қолди.

– Ўзингни эхтиёт қил, Раъно. Хат ёзаман.

Хушимга келсам, поезд аллақачон кетиб бўлган, қор босган вокзал ҳувиллаб қолган, ойим эгачимга суянганча унсиз йиглар эди.

– Кетдикми? – деди Умар закунчи қор юққан пиймасининг қўнжига қамчи уриб. – Иш кўп. Ҳали аллақанча картошка қазилмай ётибди.

Ойим гоҳ эгачимга, гоҳ Закунчига қараб ялинди:

– Илоё умрларингдан барака топинглар. Қизим бағримда уч-турт кун турсин. Қарна дардини унутади.

Эгачим дарров рози бўлди-ю, Умар закунчи иккиланиб қолди.

– Иш кўп-да, хола, – деди қошини чимириб. Лекин ҳар томонни ўйлаб, инсофга келди шекилли, пиймаси билан ғарч-ғурч қор босиб, вокзал эшиги томон юрди. – Бўпти! – деди қатъият билан. – Ўзим обориб қўяман.

Комил табиб билан Лазакат хола ҳам ўғлини кузатишга келган экан. Энди кўрдим. Эгачим, адашиб қоладигандек табибнинг қўлидан тутган Лазакат хола бизга эргашган эди, Закунчи жеркиб берди:

- Сизлар бораверинглар!

Арава юмшоқ қорда чуқур из қолдириб юриб кетди. Онамнинг пинжига тиқилиб ўтирарканман, совуқни ҳам, ёғиб турган қорни ҳам сезмасдим. Бир маҳал арава ҳайдаб кетаётган Закунчи папирос чекди. Бурилиб орқасига ҳаради.

– Ташвиш қилманг, хола! – деди юпатиб. – Колхоз Раънохонга оталик қилади.

Совуқда дийдираб ўтирган ойим бирдан жонланди.

– Укам! Шу... Раънохон текстилда ишлайверса. Ўзининг ўрганган жойи. – У режасини аввалдан пишитиб қўйган шекилли, овози тетиклашди. – Хайҳотдек ҳовлида битта ўзи нима қилади? Ўнида қайнота-қайнонаси бўлмаса...

Закунчи индамади. Отга қамчи урди. Арава қор қоплаган тош йўлда илдам юриб кетди.

- Барака топинг, укам! - деди ойим Закунчининг индамаганидан дадилланиб. - Ҳарна ёнимда бўлади-ку!

Закунчи қордан оқариб кетган чақмоқ телпагини кафти билан юқори кутариб орқага угирилди.

– Ўйланг, хола! – деди вазминлик билан. – Бирламчи гап шуки, Раънохоннинг қайнона-қайнотаси йўқ дейиш инсофдан эмас. Дума – яхши одам. Иккаламчи, маҳалла кўй нима дейди? Фалончи, куёви урушга кетишини кутиб турган экан, қизини чиқариб кебди, деб ғийбат қилмайдими? – У ойимнинг кўзига тикилиб, таъкидлади. – Қолаверса, қизингиз қаровсиз қолмайди.

Шуурсиз бир тарзда ўтирар, у ёги менга бари бир эди. Текстилда ишлайманми – колхоздами, ойимнинг олдида тураманми – Кўтармадами, нима фарқи бор?! Шомурод акам ёнимда бўлмагандан кейин ҳаммаси бир гўр эмасми?

– Биздаям ҳар битта одам ҳисоблиқ! – деди Закунчи қатъий оҳангда. – Тем более Раънохондек саводли одам!

Галати бир янгиликни уйимга боргандан кейин билдим. Қизиқ, ойим шу пайтгача айтмаганига ҳайрон қолдим. Ростов деган шаҳардан кўчирилган рангсиз, кўм-кўк кўзлари катта-катта ўрис хотин бизникига жойлашган экан.

– Маржахон опанг (ойим унга шунақа от қўйиб олибди), жа мехрибон чиқиб қолди, қизим, – деди ойим мени тинчлантириб. – Иссиқ-совуғимдан хабар олиб турибди, буям ўзимнинг қизим-да!

«Маржа опа» (аслида оти Маруся экан) ойимнинг гапига анча тушунадиган бўлиб қолган экан. Катта-катта маъюс кўзлари билан жилмайди.

- Якши апа! - деди кулимсираб.

Текстилда ўрис хотинлар билан тиллашганим учун русчани бинойидек билиб олгандим. Ярим кечагача «Маржа опа» - Маруся билан дардлашиб ўтирдим. Мен уни ойим тенги кампир деб ўйлаган эдим. Сочлари оқара бошлаған, кўзининг икки бурчини ажин босган... Йўқ, ўттиз учга чиққан экан. Эри офицер экан. ўарбий чегарада хизмат қиларкан. Улик-тиригини ўзи хам билмасмиш. Ўзи «Ростсельмаш» заводида ишларкан. Ростовга душман якин келганида хаммани кўчирма килишибди. Маржа опа тўрт яшар Вова деган ўгли билан поездга ўтириб энди йўлга чиққанида немис олдин поездни ўкка тутибди. Кейин бомба ташлаб, ёндириб юборибди. Маржа опа ловуллаб турган вагондан ўғлини кўтариб омон-эсон олиб чикибди. Аммо эллик қадамча наридаги ўрмонга етиб борганидан кейин «Вовочкани» (у худди шунақа «Вовочка» деди) ерга қўйса, шилқ этиб йиқилибди. Қизиқ, боланинг ҳеч жойидан қон оқмас эмиш. Маржа опа ҳайрон бўпти. Қараса, боланинг чаккасида нўхотдек жойи қорайиб турган эмиш. Вагон томини тешиб ўтган ўқ Вовочканинг чаккасига теккан экан.

Маржа опа ўз қўли билан гўр кавлаб, ўғлини қайин тагига кўмганини айтиб бераётганида юмюм йиглади. Тошкентда қурилаётган янги заводда ишлаётганини, ойимни яхши кўриб қолганини айтди... Ачиндим, юпатдим, «уйимизнинг тўри сизники, насиб этса, эрингиз сизни топиб олади», деб далда бердим.

...Бир ҳафтадан кейин ярим кечада Янги маҳалладаги тор кўчамизга Умар закунчининг ўзи арава ҳайдаб келганида, «ташвиш чекманг, хола, ҳизин-

гизга ўзим оталик қиламан, Раънохонни табелчи қилиб тайинладим», деганида ойим ноилож рози бўлди. Устига-устак Маржа опа ҳам далда берди:

- Боравер, Раъно! Сенинг онанг менинг онам.
   Хавотирланма.
- ...Онамнинг бағридан олиб чиққунча мулойим илжайиб турган Закунчи Кўтармага келиши билан ўзгарди-қолди. Ҳар куни идорага чақириб, дағдаға қилади.
- Савод борми ўзи? Хисобни биласизми? Ким айтади сизни рабочий классдан чиққан деб, ўртоқ табелчи?

Кунбуйи гоҳ далага, гоҳ омборга югураман. Қанча картошка, қанча шолғом кавлангани, қанча пиёз тозаланиб, ҳимоя фондига ажратилгани, омборга қанча жуҳори топширилгани – ҳаммасини ҳисоб-китоб қилишга вақтим ҳам, ақлим ҳам етмайди. Унга сайин, Закунчининг кулранг кузларида совуқ ўт чақнайди.

– Вей, қанақа одамсиз ўзи? Закунни биласизми? Бунақа чалакам-чатти ҳисоблашда ўн йилни шилқ этиб бўйнингизга илиб қўйишади-ку!

Дўқ қиладию хатоим нимадалигини айтмайди. Ўзимдан ўзим қўрқаман. Балки ростдан ҳам ҳисобда адашаётгандирман. Шундан кўра қор чангаллаб карам узганим, сассиқ омборга кириб, пиёз тозалаганим минг марта яхшимасми! Охири бўлмади. Эгачим хабар олгани келганида ҳаммасини айтиб бердим.

– Вой, ўлсин! – деди эгачим лабини буриб. –

Юрт нима бўлса сизам шусиз-да, келин! Чолимга айтаман, эртага Закунчига тушунтиради.

Дума поччам «тушунтирди» шекилли, индинига идорага кирсам Умар закунчи бутунлай бошқа одамга айланиб қопти.

– Раънохон! – деди астойдил куюниб. – Нега тушунмайсиз? Ахир сиз колхознинг рахбар составига кирасиз. Рахбарларнинг ўзаро гапи бўлади. Уйдаги сирни кўчага обчикишнинг нима кераги бор? Саводсиз поччангиз нимани тушунарди?

«Табелчилик қилмайман», деб оёқ тираб олган эдим, азза-базза ялинди:

– Раънохон! Жон синглим! Сиздан бошқа ким эплайди бу ишни! Мен колхознинг отасиман, тўгрими! Бундан чиқди сизнинг ҳам отангизман! Ота деган шунақа бўлади-да! Боласини яхши кўрганда эркалайди, жаҳли чиққанда койийди. Шунгаям хафа бўласизми? Боринг! Эртага омборда карам тозалайдиганларга кўзқулоқ бўлиб туринг...

Энди чиқиб кетаётсам, яна тўхтатди.

- Ҳа, айтгандай, бизнинг солдатдан хат келяптими? Маладес! Хат ёзсангиз мендан салом айтинг...

\* \* \*

Янги йилни ойимнинг олдида кутиб олгим келарди. Онам касалманд бўлса... Совуқ тушиши билан оёқ-қўли шишиб кетади. Нонгаям чиқолмаётгандир. Қачондан бери хабар ололмадим...

Биламан, Маржа опа онамни қаровсиз қолдирмайди. Лекин нима қилсин! Униг ҳам ташвиши бошидан ошиб ётибди. Заводда ишлаш осонми? Аввалги сафар борганимда айтган эди. Завод снаряд чиқараётган эмишу ҳали иморати битиб, томи ёпилмаганмиш. Одамлар ёниб турган печка тафтида ишларкан. Кун бўйи станок олдида турган одамга кечқурун келиб еттиёт бегона хотиннинг бошида парвона бўлиш ёҳадими? Отам ҳам истиҳодан ўлган эди. Рост, унда жуда кичкина эдим. Лекин оёҳ-ҳўллари шишиб кетган отамга ойим тувак тутгани эсимда. Энди, касал-

манд онамга мен туриб, Маржа опа тувак тутадими? Уят эмасми? Бораман! Керак бўлса, хоҳлаганча ёнида ўтираман!

Аксига юриб худди ўша куни тонг отмасдан Умар закунчи эшикни зарда билан савалаб уйготди.

– Марш омборга! Бугун бир вагон картошка жўнатамиз. Фронтга янги йил совгамиз шу бўлади!

Изгирин гизиллаб ётган омборда кечгача ўтириб, адойи тамом бўлдим. Шунча одам ишлаб турганида тепасида ҳар битта картишкани санаб гўдайиб туриш инсофдан эмас. Мен ҳам хотин-халажга қўшилиб картишка сараладим... Онамдан хабар олгим келар, лекин энди кеч бўлганини, бир ўзим етиб боришим қийинлигини ҳам билардим.

Уйимга келганимда вақт алламахал булиб қолган эди. Танчани кул босиб, тагида тўрттагина чўг қопти. Қоронғи ошхонадан кўмир олиб чиқиб, солдим. Ақалли Робия ҳам келмаганидан кўнглим ўксиди. Ёлғизлигимни-ку билади, жилла қурса шунақа кунда хабар олишса бўлмайдими? Шомурод акам борлигида эгачим тез-тез келиб турарди. Кейинги пайтларда камқатнов бўлиб қолишди. Ўзи йўқнинг кўзи йўқ экан-да! Биламан, уларгаям қийин. Хаммаси тонг бўзармасидан ишга чиқиб кетади. Қоронғи тушганида оёғини аранг судраб қайтади. Шунақа-ку, бари бир-да! Одамзод ўлимдан қанақа қўрқса, аёл киши ёлғиз қолишдан шунақа қўрқади. Кечалари бир ўзи қоп-қоронғи, совук шифтга тикилиб ётиш азобини хеч бир хотиннинг бошига солмасин.

Бир ўзимга қозон осгим келмади. Чой дамладим. Иккита зогора билан тўртта туршакни дастурхонга қўйиб тамадди қилган бўлдим.

Қор ёғаяпти. Ҳамма ёқ жимжит. Хонтахта устидаги лампа поп-поп қилади. Керосинга сув аралашганми, нима бало? Ўтирган жойимда кўзим

илинибди. Бир маҳал кӱча эшик тақиллагандек бӱлди. Чӱчиб кӱзимни очдим. Бу сафар аниқ эшитдим. Биров эшикни секин-секин тақиллатяпти.

Юрагим дукиллаганча ҳовлига тушдиму кўнглим ёришиб кетди. Робия келган! Байрамда келинойинг ёлғиз қолмасин деб, юборишган. Шоша-пиша эшикка яқин бордим.

- Робияхон!
- Мен! Эркак овозини эшитиб, қўрқиб кетдим.
- Кимсиз? дедим титраб.
- Нега қўрқасиз, Раънохон! Байрам билан табриклагани келдим. Мумкинми, бир минутга?

Умар закунчининг овозини эшитиб, беихтиёр занжирни туширдим.

У қўлида каттагина тугун билан лип этиб ичкари кирди.

– Тишш! – деди бармогини лабига босиб. – Бир минутга кирдим. Эшикни беркитинг! Бу замоннинг одамларини биласиз-ку, огзи билан юради.

Таклиф қилмасам ҳам, айвондан ўтиб, уйга кирди. Кавшандозда туриб тугунни узатди.

- Олсангиз-чи, қўлим узилиб кетди!

Нима қилишимни билмай тугунни олдим. Чиндан ҳам зил-замбил экан.

– Эҳтиёт бўлинг, – деди кулимсираб, – ёғи оҳиб кетади.

Закунчи кавшандозга чўнқайиб этигини еча бошлаганидан кейингина хушим ўзимга келди.

- Нима бу? дедим тугунига имо қилиб.
- Мунча совуқ! У калта пўстинини ечиб бир чеккага ташлади. Бошидан қор босган чақмоқ телпагини олган эди, сочи ёйилиб пешонасига тушди.
- Меҳмонниям шунақа кутадими, Раънохон? деди таънаомуз бош чайқаб. Бугун байрам. Одамлар бир-бирини йўқлайдиган кун... Таклиф кутиб

ўтирмай сандал четига чўкди. Қўлини танчага тиқди. – Эҳтиёт бўлинг, кўмирнинг ҳиди бор экан.

Кўзлари мулойим сузилиб турганини кўриб, кўнглимга шубҳа ўрмалади. Кайфи бор шекилли?

Уй ўртасида серрайиб туриб қолгандим. Юрагим гурсиллаб урганча, оёқ-қўлим бўшашиб кетаётганини сезиб турар, нима дейишни, нима қилишни билмасдим.

- Нима ўзи? Хаёлимга биринчи келган гап шу бўлди. Эҳтимол, «нима қилиб юрибсан бу ерда?» демоқчи бўлгандирман, қўрққанимдан айтолмагандирман. Нима бу? дедим қўлимдаги тугунни силкитиб.
- Қўйинг мундоқ! Умар закунчи тугунни сандал устига қўйишга имо қилди. Ўтиринг аввал,
   деди жилмайиб.

Кулиб қараши ғашимни келтирди. Нега куйдирган калладек ишшаяди! Нияти нима ўзи? Рангим ўчиб кетган бўлса керак, важоҳатимни кўриб, бирдан жиддий тортди.

– Ўтирсангиз-чи! – деди қовоғини солиб. – Янги йилда колхозчиларни табриклаш вазифамга кирадими ахир! Мунча қовоқ-димоғ қиласиз, ўртоқ табелчи?!

Энди у расмана раиста – Умар закунчига айланган эди. Кўнглим жойига тушди, тугунни сандалга қўйиб, танчанинг этак томонига ўтирдим. У қўлини илитиб олди, тугунни ечди. Устига иккита жиззали патир босилган бир лаган палов кўринди. Ўша захоти уйни ош иси тутиб кетди. Чинакам қовурма палов! Шомурод акамни урушга жўнатган кунимиздан бери ош емаган эдим. Беихтиёр тескари қарадим.

– Шаҳардан меҳмонлар келишганди, – деди у тушунтириб. – Сизга илиндим. Ош босилган лаган ёнбошига бир шиша ароқ, бир шиша шампан қушиб тугилганини энди курдим. Юрагимга яна ғулғула тушди. У ароқ шишасининг орқасига кафти билан уч-турт урган эди, пукак отилиб кетди. Ароқ томчилари сачраб, лампанинг шишаси чирсиллаб дарз еди. Боядан бери сехрланиб қолгандек жим ўтирган одам, ҳушимни туплаб, дик этиб ўрнимдан турдим. Хаёлимга келган баҳонадан ўзим суюниб кетдим.

- Дума поччамникига боришим керак. Дозир Робияхон келиб кетди. Бормасам бўлмайди.
- Борасиз! Умар закунчи кўзимга хотиржам тикилди. Мениям ишим бошимдан ошиб ётибди. Ўтиринг! У гап орасида шампан шишасининг зарини кўчира бошлади. Ўтирсангиз-чи! деди жеркиброқ. Урушдан аламзада бўлган қанча оила бор! Ҳаммасига кириб чиқмасам бўлмайди! Бир минут ўтириш мумкинми ахир? У кўзимга жиддият билан тикилди. Вақтим зиқ деяпман-ку!

Бу гапни шунчалик самимий айтдики, беихтиёр сандал четига чўкдим.

– Ушланг! – деди шампан тўла пиёлани узатиб. – Биламан, ичмагансиз. Аммо бугун бошқача кун... Бугун ичса бўлади. Шунинг учун ичайликки, кириб келаётган янги йил – қирқ иккинчи йил урушнинг охирги йили бўлсин! Жангчиларимиз Берлингача бориб фашистларни янчиб ташласин! Урушга кетганлар соғ-саломат, қаҳрамон бўлиб қайтишсин! Энг муҳими... – У жилмайиб таъкидлади. – Эрингиз омон-эсон келсин.

Беихтиёр пиёлани лабимга олиб бордиму вишиллаб турган нотаниш исдан ижирганиб, дастурхонга қўйдим. Ростини айтсам, ош егим келарди.

– Мени хафа қиляпсиз, Раънохон! – деди Умар закунчи ҳамон ароқ тўла пиёлани қўлида тутиб ту-

раркан. – Онангизга берган ваъдамни шу кунгача бажаролмадим. Раз мен колхознинг отаси эканманми, сиздан хабар олиб туришим керак. Фақат ишда эмас, мана бунақа улуғ айём кунларида ҳам. Илтимос, сазамни ўлдирманг.

Ярим пиёла шампан ичимга олов бўлиб кирди. Бошим айланиб кетди.

Уч-тўрт чўқим ош олишим билан у тағин пиёламни тўлдирди.

- Йўқ! дедим қатъий бош чайқаб. Бўлди.
- Шунақа тилак айтаманки, ичмасангиз бўлмайди! Закунчи пиёласини пиёламга чўқиштирди. Кўкиш кўзларида яна ўша самимий олов порлади. Шомурод укамиз тезрок келсину янаги йил, шу кунларда уйингизда чақалоқ йигиси эшитилсин!

Уялиб кетдим. Пиёлани дастурхонга қўймоқчи эдим, у қўлимга ёпишди.

– И-и-и! Нима, қаршимисиз шу ниятта? Шомурод акангиздан шунчалик безганмисиз?.. Агар у кишини чинданам яхши кўрсангиз, оппоқ қилиб оласиз!

Ичим ловуллаб кетаётганига қарамай қасдма-қасдликка ичиб юбордим. Лекин хато қилганимни, бемаъни иш қилганимни тушуниб етганимда кўз ўнгим жимирлашиб борар, хонтахта устидаги лампа хиралашиб қолганга ўхшар, негадир ўзимдан-ўзим кулгим қистар эди. Қизиқ, ҳамма қўрқадиган, ҳамма ёмон кўрадиган Умар закунчи шуми? Тавба! Туппа-тузук одамгарчилиги бор экан-ку!

У қачон ёнимга ўтиб олгани эсимда йўқ. Бир маҳал елкамга қўл ташлагани, «Раъно, жоним!» деб энтиккани, юзимга қайноқ нафаси урилганини элас-элас пайқадиму қўрқиб кетдим.

– Кетинг, – дедим юлқиниб. – Кетинг! Додлай-ман! Хозир додлайман! Қоч!..

- Раъно! у янаям қаттиқроқ тармашди. Тушунсанг-чи, тентак!
- Керакмас! Бўғзимдан йиғи аралаш илтижо отилиб чиқди. Шомурод ака!

Гандираклаб ўрнимдан турдим. Кўчага отилмоқчи эдим, у тиз чўкиб оёгимдан ушлаб олди. Сочлари ёйилиб кетган кўзларида йиглагудек ялинч ифода бор эди.

- Раъно! деди ёлбориб. Тушунсанг-чи! Кетимдан эргашиб юрганлар сон-мингта! Қизлар... жувонлар...
- Боравер ўшаларга! Қанчалик қаттиқ типирчиласам у оёғимга шунчалик қаттиқ ёпишарди.
- Яхши кўраман, тентак! деди юпқа лаблари, ингича мўйлови титраб. Бошимга ураманми уларни! Сен кераксан менга! Биламан, сенга муносиб эмасман! Нима қилай, севаман сени! Биринчи кўрган кунимдан бери оромим йўқ, Раъно!
- Керакмас, қочинг! Шомурод ака! Кучим борича силтанган эдим, ерга ўтириб қолдим.
- Раъно! Жоним! Гўзалим! Нима қилай? Хеч кимнинг олдида эгилмаган бошим... Тўсатдан унинг кўзларида ёш кўринди. Ўлдириб қўя қол мени... Сен... сен... бошқачасан. Қанақалигингни ўзинг билмайсан, Раъно!

Биринчи марта кўрганимда юрагим сесканиб кетгани, вахимага тушганим лоп этиб хаёлимга келди.

- Илтимос, - дедим ялиниб. - Керакмас... Умар ака...

...Билмадим, эҳтимол, хотин кишини шону шуҳрат ҳам, илму амал ҳам, эркакнинг кучи ҳам забт этолмас. Аммо ширин сўз олдида, маҳтов олдида эримайдиган аёл йўҳ. Балки мен шунаҳадирман...

Ўша куни тонг отгунча йиглаб чиқдим. Беномус! Шарманда! Ким деган одам бўлдинг! Сенам инсонмисан!.. Ўзимни ўлдиргим келарди. Гўё эртага кўчага чиқишим билан сирим оламга ошкор бўладигандек! Ҳамма менга қўлини бигиз қилиб, «мана, эрининг кўзига чўп солган бузуқ мана шу!» дейдигандек! Ундан кўра ўла қолганим яхшимасми!

Қизиқ, ҳеч нима бўлмади! Ҳеч нима! Ҳеч ким менга шубҳаланиб қарамади. Биров таънаям қилмади. Шундаям, аввалига ҳар кимга бир термилиб, ҳуркиб юрдим. Кейин ғалати аҳволга тушдим. Ҳар қадамида мингта қиз кўз тикиб турганига қарамай мени, ёлғиз мени яҳши кўрган Умар ака, ҳаммани зир қақшатадиган Умар закунчи ўша куни шунчалик ялингани, оёғимга йиқилгудек илтижо қилгани учун севинишга ўҳшаш ҳис пайдо бўлди. Ажаб, бу одамни биринчи кўрганимдаёқ юрагим жиз этгани бежиз эмас экан-да, бундан чиқди, уям мени яҳши кўраркан-да!

Шуни ўйлашим билан лоп этиб Шомурод акам эсимга тушарди. Шунда ўзимни ўзим оқлашга уринаётганимни, хато қилганимни, ифлос одамга айланиб қолганимни ўйлардиму ўша захоти тағин ўзимга юпанч топардим. «Бўлди! Иккинчи бунақа нобакорлик қилмайман. Закунчи бўлмоқ тугул авлиё бўлмайдими! Эндиям эшигимдан кириб келсин-чи, косов олиб ҳайдайман!»

Ажаб! Иккинчи марта тағин ярим кечада эшик тақиллатганида ҳайдаш у ёқда турсин, оёқ-қўлим бўшашиб эшикни ўзим очдим. Бўлмаса, ўша куниям, Шомурод акамдан ҳат келган эди... Ҳамон тушунолмайман. Нима бу? Мен кимман ўзи!

Бора-бора Умар акамни уч кун кўрмасам согинадиган бўлиб қолдим. Йўқ, унақа... келиши учунмас. Узокдан бўлсаям кўрсам бас. Согиниб-согиниб Умар ака билан кўришганимиздан кейин эса Шомурод акам лоп этиб яна хаёлимга келади. Ке-

часи билан юм-юм йиглаб чиқаман. Гўё мен иккита Раъноман. Биттаси – Шомурод акамники, биттаси – Умар аканики!

Энди фақат бир нарсадан – одамларнинг маломатидан қўрқадиган бўлиб қолдим. Бир кунмас-бир кун сир очилади-ю, эл ўртасида расвои жахон бўламан.

Салкам уч ойдан бери бошимда осилиб турган қилич шу эди. Мана бугун ўша қилич бўйнимга тушди.

Умар акам ҳали тушлик қилаёттанимизда далага бориб, аввал одамлар кўзи учун «ўртоқ табелчи» деб дағ-даға қилиб, кейин «уйингта эртароқ бор», деб шивирлаганида дастлаб ғашим келган эди. Эрталаб эримдан келган хатни ўз қўли билан обкелсаю кечқурун... Йўқ! Чучварани хом санабсан! Шу қилганинг учун атайлаб Дума поччамникига бораман! Робия билан гаплашиб ётаман. Нима, қўғирчоқманми сенга! Хоҳласанг – келасан, хоҳласанг – кетасан! Бир қараса дўқ урасан, бир қараса – ялинасан! Ердан чиққан қўзиқоринманми? Эрим бор! Оилам бор!

Кечгача шу ўйда юрдим. Ориф оқсоқол билан Нўгайқўргонга боришга ахд қилиб қўйдим. Лекин кеч кирган сайин уйга қайтгим келаверди. Негалигини билмайман, ўлай агар, билмайман! Умар акамнинг «уйингга эртароқ қайт» дегани қулоғим остида сирли жаранглайверди. Асли Нўгайқўргонга кетаверсам бўларкан. Шундай жалада, ярим кечада Робия келишини туш кўрибманми?

Эшик тақиллаганида туз-пуз сўраб чиққан қўшни бўлса керак, деб чироқни ўчирдим. Умар акам ишни пухта қилади. Шу кунгача бу ерга қатнашини ҳеч ким билмайди. Атайлаб отини колхоз молхонасига ташлаб, пиёда келади. Қўшни бўл-

са тақиллатиб-тақиллатиб қайтиб кетар деб умид қилиб турсам, айвон тагида биров «кеннойи» деб бақирдию юрагим қинидан чиқиб кетай деди. Умар акамнинг жахли ёмон. «Чиқманг», деб қўлига ёпишганимга қарамай айвонга отилди. Девордан ошиб тушган «ўгри»ни бир нима қилди шекилли, ёш боланинг «кўйворинг» деб ялинганини эшитиб тахта бўлиб қолдим. Бола – Комил табибнинг ўғли эканини кейин билдим. Хайрият. Бола экан, алдаб-сулдаб жўнатса бўлади. Лекин эшик орқасида Робия пойлаб турганини ким билибди! Шунчалик жонкуяр экансан Дума буванг билан қора таппи ойинг шунчалик мехрибон экан, Янги йил кечасида, Умар закунчи уйимга бостириб кирганида қаёқда эдиларинг! Ўшанда шу муштипар ёлғиз қолди-ку, холи нима кечдийкин, деб хабар олишга ярамадиларинг-ку! Эримнинг уруғи тезагимнинг қуруғи, деб шунга айтади-да! Энди уйимга бостириб келдингми! Нима ҳаққинг бор? Умар ака чиқишга чиқиб кетдию Робиянинг олдида сир бериб қўйдим. Нима деганимни, қандай бахона рўкач қилганимни билмайман. Фақат Робиянинг ҳар сўзидан заҳар томиб, айтган гапи қулоғимга ўқдек кирди. «Болани харом қилманг!» Худди шунақа деди.

Билди! Ҳаммасини билди! Робия аҳмоқ эмас! Умар акамдаям айб бор. Кўриб турибдики, девордан ошиб тушган ўгри эмас. Нима қиларди, болани ёқасидан бўгиб, кўчага улоқтириб! Яхши гап билан Робияни уйга бошлаб кирса, кунлик ишнинг ҳисоб-китобини қилиб ўтирувдик, деса-ку, олам гулистон эди. Йўқ, ҳамма айб анави Робияда!

Нақдлаб қўйибдими ярим кечада? Пойлаб келган! Атайлаб пойлаб келиб, табибнинг ўғлини девордан ошириб туширган! Вой илон-ей! Тағин сенинг фотиха тўйингда хизмат қилиб юрибман-а,

ниятингга етмагур! Шунчалик душманмидинг? Нима ёмонлик қилдим сенга!

Шошма! Қўлидан нима келарди? Мен – табелчиман! Умар акам – раис! Кундалик ҳисоботни кўриб ўтирган эдик, лампамой тугаб, чироқ ўчиб қолди. Робия шпиондек пайт пойлаб эшик тақиллатди. Тамом-вассалом! Фақат битта хато қилдим. Робия болани етаклаб чиқиб кетаётганда ўзимни тутолмай қолдим. «Қандоқ кунларга қолдим», дедимми? Яхши! Қандай туҳматларга қолдим деганим шу-да! Робия туҳмат қилиб кўрсинчи, кунини кўрсатаман. Умар акам бор, ҳеч кимдан қўрқмайман!

Ўзимга ўзим таскин бериб, уйга кирдим. Ора-чора чақмоқ чақиб, уй ичи ёришиб кетарди. Яримлаган вино шишаси, Умар акам унутиб қолдирган телпаги, ярим-ёрти йигиштирилган тушакка кўзим тушди-ю, бўшашиб ўтириб қолдим! Тамом! Хаммаси тамом бўлди! Робия кўрди. Хаммасини кўрди. Вино шишаси, Умар акамнинг телпаги, қўшалоқ ёстиқли тўшак... ҳаммасини! Шўрим қурсин! Ҳозироқ бориб оқизмай-томизмай Дума чолга, қора мўнди онасига чақиб беради. Эртага узун-қисқа бўлиб бошимга келишади. Шарманда бўлдим! Урушда жон олиб-жон бериб юрган Шомуроднинг хотини бузуқ экан, раис билан тутиб олишибди, ундоқ-бундоқ, деган гап Нўғайқўрғондан тортиб Кўтармагача тарқалади. Онамнинг қулоғига етса нима дейди? Эл-юрт, махалла-кўй ўртасида қандай бош кўтариб юради, бечора!

Қизиқ, зум ўтмай, хаёлимга бутунлай бошқа ўйлар келди. Хўп, шу билан нима бўпти! Умар ака мени яхши кўрадими? Кўради! Уйланадими? Уйланади! Кимнинг нима иши бор? Гапирганлар бир ой гапирар, икки ой гапирар... Борингки, бир йил вайсар!.. Шомурод акам ҳам тақдирга тан берар...

Ахир бу – кўнгил иши-ку! Бировнинг кўнглига биров буйруқ бероладими? Худога шукр, биз феодализм жамиятида яшаётганимиз йўқ! Қайтага яхши бўлди. Уч ойдан бери бошимда осилиб турган қилич бўйнимга тушди. Энди ҳадиксираб яшашдан қутуламан. Бўлар иш бўлди, бўёги синди! Энди ҳўрҳадиган жойим йўқ!

Шу хаёл далда берди-ю, Умар акамнинг телпагини қўлтигимга қистириб йўлга тушдим. Кўчалар кимсасиз, ҳамон жала қуяр эди. Чақмоқ чақиб, йўлдаги ҳалқобларни ойнадек ёритади. Момақалдироқ енгил тортиб гулдирайди.

Чойхона берк, клубда чироқ йўқ. Фақат Умар акамнинг тунука томли уйидаги темир панжарали баланд деразасидан хира нур тушиб турарди. Хайрият, ухламаган экан. Эшикни муштим билан тақиллатган эдим, очилиб кетди, занжири илинмаган экан. Қовли этагида ётган бузоқдек овчарка ваҳшатли акиллаб дарвозага югурди.

- Қоплон! - дедим итнинг ёмғирдан ҳўл бўлиб кетган бошини силаб. - Танимадингми?

Ит таниди: думини ликиллатиб ғингшиб қўйди. Ойнабанд айвон зинасидан елкасига тўн ташлаган Умар акам тушиб келди.

- Ким? - деди бақириб.

Итнинг бошини силаганча яқин бордим.

– Ие, Раънохон! – Умар акам имо қилди. – Марҳа-мат!

Ўнинчи лампа ёритиб турган уйга кетма-кет кирдик. Бу хонадонда ҳамма нарса менга таниш. Кавшандоздаги Умар акамнинг пиймаси билан ҳайтарма ҳўнжли этигидан тортиб, ердаги ҳип-ҳизил гиламгача, бурчакдаги сим каравотдан тортиб, каравот тепасида, девордаги михга илиб ҳўйиладиган ҳамчигача, тахмондаги ҡўрпалару улар орасига ҳистирилган чойшабларгача...

 – Қадамларига ҳасанот! – деди у тўнини каравот устига ташлаб. – Хуш кепсиз!

Яна ўша мулозамат!

Одати шу. Иши битгунча «сен»лайди-да, кейин расмий одамга айланиб, «сиз»лашга ўтади.

– Келдим! – дедим иложи борича хотиржам гапиришга уриниб. – Ярашмабдими? Ўз уйимга келдим. Энди ҳеч ҳаёҳҳа кетмайман!

Кўзига қараб турибман. Нияти яхши бўлса, севинади, нияти бузуқ бўлса, қўрқади.

Суюнмадиям, қўрқмадиям! Дераза токчасида ётган қутидан папирос олиб тутатди.

- Раъно, деди секин, хотиржам оҳангда. Болани қурқитганим чатоқ булди.
- Тўгри, болада нима гуноҳ? дедим мен ҳам ўша алпозда. Комил табибнинг ўгли экан.
- Э! У жаҳҳ билан қўл силтади. Табиб ким бўпти ўзи! Гап бундамас. У бир зум жимиб қолди-да, кафти билан папирос тутунини ҳайдади. Қаёқдан биламан! Ўғри деб ўйладим! Ярим кечада бировникида пишириб қўйибдими! Тўғрими?

Унинг жон куйдириб ўзини ҳимоя қилишга уриниши ғашимни келтирди.

- Ёш бола ўгрилик қилмайди, дедим секин.
- Бўлмаса нега девордан ошиб тушади? Унинг кўзи ғазабдан қисилиб кетди. Деразани шарақлатиб очиб, ёмгир шовуллаб турган ҳовлига папиросни улоқтирди. Анави-чи, анави нимага кепти? Тушунтирдингми? Ҳисоб-китоб қилиб ўтиргандик, дедингми?
- Айтсам-айтмасам ўзи тушунди.
   Қўлтиғимда турган чақмоқ телпакни узатдим.
   Хаммасини кўрди.
- A? Умар акамнинг ранги қув ўчиб кетди. Ташқарида чақмоқ чақиб, юзи янаям оқариб кет-

гандек бўлди. – Нимани тушунади? Нима деди?! Гапирмадингми ахир. Биз иш билан...

У шу қадар эсанкираб қолған, шу қадар бидир-бидир қилиб гапирардики, кўнглимдаги умид чироғи ўчиб қолаёттандек тиз чўкиб, яланг оёқларини қучоқлаганча йиғлаб юбордим.

– Умар ака! Жон Умар ака! Мени никохингизга олинг! – дедим ёлбориб. – Жонимдан тўйиб кетдим. Ажалидан беш кун бурун ўлмасин десангиз, никохингизга олинг! Қийналиб кетдим, Умар ака!

Ташқарида кетма-кет чақмоқ чақар, лампанинг нури яшин ёлқинида хиралашгандек, уй ичи оппоқ ёришиб кетар, мен бўлсам, ҳамон унинг сарпойчан оёгини қўйиб юбормасдим.

– Олинг мени, Умар ака, ҳалоллаб олинг! Ахир яхши кўрасиз-ку, мени, ўзингиз айтгансиз-ку!

Бир маҳал у титроқ қўллари билан бошимни силади.

– Жоним! – деди овози қалтираб. – Биласан, сен менинг хотинимсан. Тўгрими? – у чўккалаб ўтирганча юзимдан ўпди. Негадир лаблари совуқ эди. – Сен меникисан! – деди кўзимга тикилиб. – Ақл билан иш қилайлик. Сен ақлли хотинсан-ку, Раъно!

У қўлтиғимдан кўтариб, ёнига ўтқазди. Елкамдан қучоқлаганча узоқ жим ўтирди-да, ўксик хўрсинди.

- Ўзинг ўйла, Раъно. Ўртамизда бир коса сув қўйиб, никоҳ ўқитиш ҳеч гапмас. Хоҳласанг эртагаёқ шу ишни қиламиз.
- Худо хайрингизни берсин! дедим ҳиҳиллаб. Жонимдан тўйиб кетдим!
- Шошма! у яна бошимни силади. Хўп, сен айтгандек бўлди дейлик... Кейин нима бўлишини биласанми? Бу ёгини ўйладингми ҳеч?

У ёғи билан нима ишим бор? Нари борса одамлар ғийбат қилар. Қилса қилавермайдими? Қайрилиб қараған эдим, ёшли кўзимдан ўпди.

– Тентак! – деди жилмайиб. – Агар шу иш овоза бўлса совет жангчисининг хотинига кўз олайтирган рахбар сифатида мени нима қилишларини биласанми?

У ўрнидан сапчиб турди. Дераза токчасида ётган кумуш портсигардан папирос олиб, чекди.

– Эртага сенга уйланаман, индинга штрафной батальонга жўнатишади: Абдураҳмонов отишга ўқ тополмай юрибди ўзи. – У тепамга келиб, ҳар сўзини таъкидлаб ҳайқирди: – Оёқ-қўлимни боглаб штрафной батальонга жўнатади. Тушундингми? Олдинги линияга, душманнинг ўқига! Розимисан! Ўн кундан кейин мендан «қораҳат» келса ҳурсанд бўласанми?

Тағин йиғлаб юбордим.

- Нима қилай ахир, Умар ака! Нима қилай! Эл-юрт ўртасида қай юз билан бош кўтариб юраман! Шўрим қурсин!
- Хотиржам бўлинг! Умар ака тағин сизлашга ўтди. Тишларини ғижирлатиб, қатъий овозда таъкидлади. Сизнинг обрўйингизга путур етмайди, ўртоқ табелчи! Комилнинг ўғлини тинчитиш осон. Анави... Робиянгизга келсак, ўша унсурваччаниям тилини қисиқ қилиб қўйиш қўлимиздан келади. У тағин ёнимга ўтириб елкамдан қучди. Асалим, бари бир сен меникисан-ку, жоним. Менга ишонмайсанми? Бўлди! Йиглаганингда-чи, янаям чиройли бўлиб кетасан!

# ЎН ОЛТИНЧИ БОБ

## УМАР ЗАКУНЧИ ХИКОЯСИ

# Тагингда отинг борми, узанги узилгунча суриб қол!

Ўмон иш бўлди! Қўймижоз Комил табибнинг мишиқи боласини сариқ чақага олмайман. Қўрқадиган жойим йўқ! Хамма гап табибнинг урушда юрган тўпчи ўғлида. Хайронман, кўзойнак тақмаса овкат ейишга огзини тополмайдиган бу шапкўр, кандок қилиб шундоқ орденни олдийкин! Жанговар Қизил Байроқ ордени-я! Салкам Қахрамонлик унвонидай гап. Райком секретари ўртоқ Абдурахмоновнинг шахсан ўзи колхозга келиб мажлис ўтказган бўлмасаям майлийди. Камбағални иззат қилсанг, чориғи билан тўрга чиқади! Ўша мажлисдан кейин тилини бир қарич қилиб, калтак еган боласини етаклаб, райкомга борса нима бўлади? Аввалги рахбарлар билан орамиз яхши эди. Буниси, янги одам, ўлгудек нонемас кўринади. Ўша куниям Сўпоқ дамлаб қўйган ошга турмай кетди-қолди. Бунисиям майли. Анави иккала чолни президиумга чақиргани-чи?»Колхозни опичлаб катта қилгансизлар», дедими? Комил табибни кўриб, «ие, сизмисиз», деб қувониб кетдими? Бундан чиқди, хаммасини танийди. Хаммасининг тили бир. Эртага райкомга бориб арз қилса... Ўша куни Абдурахмонов кета туриб нима деди? «Қарсакбозликка ўчроқ кўринасизми, раис!» Қарсак чалсам сенинг хурматингга чалдим-ку, ношукур банда! Хурсанд бўлиш ўрнига... Ана, дохиймизнинг ўзига соатлаб қарсак чалишади-ку! Индамайди-ку! Сен ким бўпсан?!

Йўқ, энг аввал табибни тинчитиш керак. Кўнади! Кўнмай қаёққа борарди. Борингки, боламни қўрқитибсан, деб закун талашган чоғидаям ўзига жабр қилади. Қўлидан нима келарди? Мен табелчи билан кундалик ҳисоботни кўраётган эдим. Биров девордан таппа ошиб тушди. Колхоз раҳбариманми, ахир! Ҳозир яхшидан ёмон кўп, қоронғида қаёқдан биламан, табибнинг ўғлими, урушдан қочган дезертирми! Тутиб олмоқчи бўлдим, вассалом!

Борингки, ўртоқ Абдураҳмонов сўраб қолди: отчётларни нега идорада эмас, эри фронтда юрган аёлнинг уйида кўрасиз, деди. Нима қипти! Табелчи идорага келмади. Бетоб бўлиб, уйига эртароқ қайтган экан. Бугунги ҳисоб-китоб эртага қолиб кетмасин деб ўзим бордим. Раис дегани хўжаликнинг отаси бўладими ахир! Нима, ота ўз қизининг уйига боришга ҳаққи йўқми! Шундан гап чиқаришнинг ўзи уят эмасми!

Ана шунақа, ўртоқ Абдураҳмонов! Фронт орқасида жон олиб-жон бериб ётган бир заҳматкашга туҳмат қилиш, большевикка ярашмайдиган иш деб ўйлайман! Айниқса, фронтовикнинг хотинини чалпишга ҳеч кимнинг ҳаққи йўқ.

Борингки, табиб райкомга бормади. Бормайдиям бу қуймижоз! Лекин чопқиллаб бориб, Оқсоқолга маслаҳат солади. Узи колхозда иккита ғаламис бор. Биттаси Оқсоқол, биттаси – Дума! Элни шулар бузиб юради. Аммо иккаласиям, аллақачон уйиндан чиққан! Ҳаёт ҳам қарта уйиндек гап. Тузми, кузурми – бари бир – уйиндан чиқдими, тамом. Сариқ чақалик қиммати қолмайди. Бир чеккада қалашиб ётаверади. Оқсоқол билан Ҳусан дума ҳам шунақа – уйиндан чиққан қарталар! Бири раисликдан, бири бригадирликдан тушганига олти йил буляпти. Биламан, иккаласиям аламзада. Ле-

кин олти йилдан бери ҳеч балони эплолмаган чолларнинг ҳўлидан энди нима келарди! Шунаҳа-ку, аммо ўша охирги мажлисда Абдураҳмонов буларни нега мунча лаганга солди? Нияти нима?!

Қизиқ, янги келган куним колхоз аъзолари мени раис қилиб сайлашга қарши бўлганида Ориф оқсоқол нимага ёнимни олди? Нега биринчи бўлиб ўзи овоз берди? Буям етмагандек, хашар бошлаб, мана шу уйни қуриб беришга нима учун бош-қош бўлди? Қўрққанидан қилдими? Йўқ, Оқсоқол илоннинг ёгини ялаган одам! Қани, кўрайлик-чи, қаёққача бораркин бу бола, деб ўйлади. Чучварани хом санабсан, Оқсоқол! Сен шохида юрсанг, мен баргида юраман! Сен ўйлагандан кўра узоққа, жуда узоққа кетаман ҳали! Мана, олтинчи йил кетяптики, «Қизил деҳқон» районда энг илғор хўжалик. Буни Абдураҳмоновнинг ўзи ҳам тан олди. Хўш, шу ишларни саводсиз Оқсоқол қилдими, менми? Тўгри, Оқсоқол отдан тушсаям эгардан тушгиси келмайди. Болаларидан «қорахат» келган куни мени ҳақорат қилди. Биламан, буям аламидан. Ким ўзи у? Мен кимману, у ким? Филга акиллаган лайчадек гап! Саводи бўлмаса, илми бўлмаса, авваллари бир эмас, икки ўглим танкист деб кўкрагига уриб юрарди, энди улар хам йўқ. Узатган қўли қаёққа етарди! Ўзиям кейинги пайтда калтакланган итдай думини қисиб қолди-ку!

Дума-чи? Дума ким бўпти?! Хоҳласам, эртагаёқ рабочий батальонга жўнатаман! Ёши олтмишга етмаган, атайлаб паспортини ўзгартириб олган дейман, тамом! Қўлимда шунақа далил борки, хоҳласам Думанинг хонумонини куйдириб юбораман. Уйида анави халқ душманини сақлаганми – сақлаган! У ёгини сўраганда Дума илондан қолган илонваччани – Робияни боқиб катта қилдими – қилди! Тоғам – тажрибали юрист. Самадовнинг, бир вақтлар тоғамга тиш қайраган, советларга қарши ташвиқот олиб борган ўша Самадовнинг халқ душмани эканини билади. Оқсоқол билан Дума ўша жиноятчи домлага ҳамтовоқ бўлганми – бўлган. Ким билсин, балки иккала чол маслаҳатни бир ерга қўйиб қизини атайлабдан изимдан юборгандир! Жуда яхши-да! Изимдан юриш қанақа бўлишини кўрсатиб қўяман! Аслида бу ҳам совет давлатига қарши қўпорувчилик!

Чарчадим. Ўлай агар чарчадим. Минг лаънат урушигаям, раислигигаям! Билмаганлар амалдор одамга осон тутади. Егани олдида, емагани кетида, нима деса оғзининг ели деб ўйлайди! Бўлмаган гап! Амал курсисига миндингми, бошингга темир қалпоқ, оёғингга темир пайпоқ кийиб олишинг керак. Ана шундагина ўзингдан юқорироқда турганлар бошингга тепса, жонинг хузур қилгандай илжаясан. Йўқ, фақат илжайишнинг ўзи камлик қилади. Оёгини ялайсан. Қанча қаттиқ тепса, шунча иштаҳа билан ялайсан. Яламай кўр-чи! Бир тепади, икки тепади... Учинчисида чиккан жойингга тиқиб юборади! Шунақа! Амалдорликниям чидаганга чиқарган, азобига чидайсан. Лекин амалдор бўлишнинг яхши томониям бор-да! Ўзингдан пастроқ турганларни темир пайпоқ кийган оёғинг билан тепасан! Ўшанда жонинг ҳақиқатданам роҳат қилади. Одамлар сендан қўрқса, кўзингга қараб мўлтираб турса, бундан ортиқ роҳат борми? Бўлмаса, уям одам. Боши думалок, чоти айри. Лекин тўгри гапирасанми, нотўгрими, бари бир таъзим қилиб туради! Қандоқ яхши! Рахмдил одамдан рахбар чиқмайди. Халқ нима? Подадай гап! Савалаб турсанг йўлингга юради. Бўлмаса ҳар битта аҳмоқ демократия деб айюҳаннос солишдан тоймайди... Ўртоқ Сталин тўғри айтади: раҳбар қаҳрли бўлиши керак. Йўқ, раислик курсисини осонликча топширадиган аҳмоқ йўқ! Мен сенларга Ориф оқсоқол эмасман...

Тонг ёришиб қолди. Ташқарида жала тинди шекилли, тунука томнинг бўғиқ гувиллаши тўхтади. Ёнимда Раъно ётибди. Сочлари паришон ёйилган, таранг кўкраги очиқ, ғира-шира тонг нурида оппок юзи янаям тиниқроқ кўринади. Иягидаги жимитдек холи қоп-қора, ўпгиси келади одамнинг! Думба еган чақалоқдек ширин тамшаниб ухлашини-чи?!

Нимагаям илакишиб қолдим шу хотинга? Қурмагур ўзиям бошқача-да! Қойилман! Бировнинг қўйнида ётган суюкли хотинини юлиб олиш осонми? Бунақа ишни қарчиғайдек чаққон, шердек довюрак одам эплайди. Қали оёғимга йиқилиб йиғладими! Вой тентаг-ей! Дунёнинг ишлари шу экан-да! Аввал сен унинг оёғига йиқиласан, кейин у сеникига йиқилади. Асли ҳаётнинг турган-битгани олди-берди экан-да!

Қўқонда уйланганим, хотинимга кўнглим илимай ажрашганимни биладими бу – йўқми? Билади! Одамлар қўйга ўхшайди! Сурувда битта қўй маъраса ҳаммаси жўр бўлгандай, битта одам «гинг» этиб гап чиқардими, бас! Бошқалари қўшилишиб вайсайверади. Раис бўлган кунимданоқ колхозчилар менинг ўтмишимни титкилагани аниқ. Хўш, нима бўпти? Қўрқадиган жойим борми! Ҳаммасини законний қилганман. Ўшанда акам норози бўлиб уйдан ҳайдашгача борган эди. Аҳмоқ! Ўзинг кимсан! Нари борса битта бўзфурушсан-да! Хотинимни сен эмас, мен қучоқлаб ётаман-ку, овсар!

Мен билан нима ишинг бор? Тўгри, акам оби-дийда қилганича бор. Нима бўлганида ҳам хотинининг олдида юзи шувит: қайинсинглиси кўнглимга ўтиришмай қолди. Совуқми-ей, нима бало? Яқинига борсам атир ўрнига ачимсиқ тер ҳиди келади.

Яхшиям тогам Тошкентга ишга келган экан. Жонимга ора кирди. Чор-атрофда юрист тоғамнинг номини эшитганда тиззаси қалтирамайдиган одам йўқ эди. Шу киши бўлмаса юридик техникумни битирган ўрта мутахассис сифатида биронта гадой топмас адвокатурада юрардим-да, ивирсиб. Қолаверса, аввалги райком - Алихон ака тоғамнинг қил ўтмас ўртоги эди. Хўп замонлар экан-да, ўшанда! Раисликка сайлашаётганида агрономияни яхши билади деб мақташгани-чи! Нима, нотўгрими? Районда сабзавот планини биринчи булиб бажариб келаётган ким? Хўжаев! Фронтга энг кўп махсулот юбораётган ким? Хўжаев! Мудофаа фондига энг кўп маблағ ажратаётган ким? Хўжаев! Битта раис бўлса менчалик бўлади-да! Мана, колхозни ипидан-игнасигача билиб олдим. Дехкон боласи ер илмини билмайдими? У ёгини сўраса - юристман! ўиринг деган ношукур билан закун тилида гаплашиб қўйиш қўлимиздан келади...

...Нега чўчийди бу? Тушига эри кирдими, нима бало?! Қуриб кетмагур, офатижон-да, ўзиям. Оловда, олов! Биринчи марта кўрганимдаёқ юрагим жиз этгани бежиз эмас экан. Аслида-ку, Шомуродни колхоздан кўчириб юбориш ниятим бор эди. Текстилда ишлайди. Ўзи колхоз ерида турса, томорқаси бўлса-ю, далага чиқиб, кетмон чопмаса! Борсин ўша фабрикасига!

Тўйи бўлган куни кимхоб паранжи ёпинган келинни узоқдан кўрганимда унчалик эътибор бер-

маган эдим. Раз колхознинг отаси эканман, ҳаммасининг тўйига боришим керак. Аммо бир ҳафтадан кейин Шомуроднинг уйи олдидан ўтиб кета туриб, келинни кўрдиму... Тонг-саҳарда колхозчиларнинг эшигини таҳиллатиб юрган эдим. Қишлоҳ одамлари муғамбир бўлади. Кун чиҳмасдан хотини уйғонади-ю, далага бориш ўрнига сигир соғади, нон ёпади. Эрлари ялпайиб ётади. Ўзининг томорҳасида балодай ишлайди, колхозга бели ҳайишгиси келмайди. Қамчилаб турмасанг колхознинг иши ўлда-жўлда ҳолиб кетаверади.

Раз Шомурод колхозда яшайдими, томорқаси борми, хўжаликдан ҳеч бўлмаса бир киши далага чиқсин! Аввал бўйдоқ эди, энди хотини бор. Ўсма-сурма қилиб ўтирмай кетмон чопсин!

Шуни айтиб қўйиш учун отни ниқтаб, эшигига борсам... ёнгоқ тагида атлас кўйлак-лозим кийган келин ер супуряпти. Қирқкокил сочининг ярмиси елкасидан ошиб ерга тегай-тегай деб турибди. Юзини аниқ кўрмасам ҳам юрагим гупиллаб кетди. Болдирини сиққан жиякли лозим, кўйлагини туртиб чиққан кўкси, хипча бели шунақанги офатижонки...

Жиловдан тортишим билан от кишнаб юборди. Келинчак хаёл суриб турган эканми, ҳуркович кийикдек сапчиб тушди. «Вой» дедию бир ҳўллаб юзини яширди. Ҳўлидан супургиси тушиб кетди.

 - Қўрқманг, келин, – дедиму овозим титраб кетганини сездим.

Келин елкаси оша ёйилиб тушган сочини орқасига олиб ташлади. Салом бериб, кафтини юзидан олган эди, томоғим қуруқшаб кетди. Нуқул ютингим келади. Ё, тавба, шунақаям гўзал қиз бўларкан жахонда! Хозир йиғлаб юборишга тайёрдек

пирпираб турган узун киприклари, ҳам ҳайрат, ҳам ҳадиксираш билан боқувчи қоп-қора кўзлари, ўсма қўйилган қайрилма қошию хина сурилган қўллари, билагузук таққан оппоқ билаклари...

- Куёв ишга кетдиларми? дедим бошқа гап тополмай.
- Ҳа... Келин чўчиб тушганидан хижолат чекди шекилли, жилмайди. Оппоқ юзи қизариб, ёришиб кетгандай бўлди. Бугун биринчи сменадалар, деди секин. Ноз қилгандек чиройли қошини чимириб кулимсиради. Шу туришида, «кўрдингизми, ноинсоф куёвни, мендек парини ташлаб, ишига кетиб қолди», деганга ўхшаш маъно бор эди. Билмадим, балки мен шунақа деб ўйлагандирман.

Ўзимни босиб, жиловни тортдим.

- -Келин, дедим иложи борича совуққон оҳангда. Мен Шомуродни яхши биламан. Ўзимизнинг йигит. Майли, хоҳлаган сменада ишлайверсин. Аммо колхозда яшагандан кейин ҳеч бўлмаса биттангиз дала юмушларига қарашиб турганингиз маъқулмикин?..
- Вой! Келин кўзимга ҳайрат аралаш истиғно билан қаради. Менам фабрикада ишлайман-ку!

Бу гапни шунақа ширин ишонч билан айтдики, тағин эсанкираб қолдим.

– Майли, чиллангиз чиқсин, кейин бир гап бўлар, дедим-да, отимга қамчи уриб чоптириб кетдим. Ўзимни шунча зўрласам ҳам, кучим етмади: эллик қадамча боргандан кейин орқага бурилиб қарадим. Келин бир қўлида супурги билан ним табассум қилиб қараб турганини кўрдиму юрагимга ўт тушгандай бўлди. Ажаб, юрсам ҳам, турсам ҳам кўз ўнгимдан кетмайдиган бўлиб қолди. Эрталаблари атайлаб эшигининг олдидан ўтаман.

Баъзан ёнгоқ тагида шакароб қилиб сув сепаётган бўлади, баъзан сочи елкасига ёйилиб кўча супураётганининг устига келиб қоламан. «Ҳорманг, келин», дейману тўхташга қўрқиб, ўтиб кетаман.

Уруш бошланиб, ҳамманинг ташвиши кўпайди. Менинг-ку, броним бор. Шомурод нимага кетмайди? Колхозчи бўлса-ку, военкомат билан гаплашиб, зингиллатиб урушга жўнатардим! Текстилга кучим етмайди-да! Хайрият, униям гали келди. Ҳеч кимни кузатишга бормасам ҳам Шомуродникига бордим. Юрагим лахча чўгдек ёниб кетяпти-ю, Раънога қайрилиб қарамайман.

Рости, ўша куни Раънонинг кекса онасига рахмим келди. Раис сифатида унга оталик қиламан, деган гапниям чин юракдан айтдим. Ўлай агар, Раънони колхозга олиб келиб, табелчи қилиб тайинлаганимда ҳам шайтонга ҳайф бериб юрардим. Аммо Янги йил кечасида Сўпоқнинг уйида ўтириш қилганимизда, тоғам ҳамиятимга тегадиган оғир гап қилди.

- Сениям оёгингни тўртта қилайлик, мундоқ, нима бало ё мижозинг сустми? Бу гапни кулиб айтди. Дастурхон атрофидаги юрист ўртоқлари ҳазилга олиб, кулгига қўшилган бўлишди. Аммо менинг юрагим шигиллаб кетди. Мастлик ростлик! Тоғам шу гапни Сўпоқнинг олдида айтиб чатоқ ҳилди. Ҳозир-ку, Сўпоқ эгасининг суяк ташлашини кутган итдай думини ликиллатиб юрибди. Аммо бир куни орадан гап қочсаю душманга айланиб қолса, ҳар нима кутиш мумкин ундан.
- Ҳайронман, ока, деди Сўпоқ тоғамга қараб. Ҳозир дарахтни бир тепсанг мингта қиз ёғилади. Раис ёлғондан оғиз солсалар, ростдан остоналарига келиб ётиб оладиганлар сон-мингта! Мундоқ кўз остига ол-

ганларини айтсинлар, ўзимиз совчи бўлайлик. Биз ҳам тўйнинг ошини ейлик бундоқ, а лаббай?! У ёгини сўрасангиз, шундоқ куёвга ўзимиз ҳам...

Сўпоқ илжайиб кўзимга қарадию ғазабдан титраб кеттанимни кўриб овози ўчди. «Аҳмоқ! Ҳозир ўз ҳузурини ўйлайдиган замонми! Уруш кетяпти, хунаса!» Важоҳатимни кўриб, итдай думини қисиб қолди. Чойни янгилаш баҳонасида уйдан чиқиб кетди.

Гап бошқа ёққа айландию хаёлимга лоп этиб Раъно келди. Қўлидан супурги тушганча, ҳуркович табассум билан жилмайиб турган Раъно! Эр кўрган хотин эркакни қўмсамайдими? Кечалари ёстиқ қучоқлаб ётиш жонига теккандир ахир... Шунақа-ку, мен жўн одам эмас, раҳбарман. Раисман! Каттакон хўжаликнинг отасиман. Қайси ота ўз қизига... Э, оталикка бало борми! Нари борса эридан уч-тўрт ёш каттадирман. Нима қипти? Унгаям яхши, менгаям! Шунақа-ку, дунёда бундан нозик масала йўқ. Агар ўзи жон деб турган бўлса ҳеч кимга чурқ этиб, оғиз очмайди-я! Бордию эшикдан киришим билан дод солиб, оламни бошига кўтарса-чи! Ана, шармандалик! Ҳамма ёққа дўмбира қиладиганлар озми?

Тугун кўтариб, Раънонинг остонасига борганимда оёгим қалтираб турарди. Эшикни қарс этиб, юзимга ёпади, деб ўйлагандим. Йўқ, ёпмади. Тўгри, аввалига қўрқиб кетди, аммо ҳайдамади. Ўзи уйига киргизганидан кейин, бирга ўтириб, бирга ичганидан кейин... Бўлди-да. Тўгри! Ҳаммаси тўгри! Лекин ўшанда иш бунчалик чуқурлашиб кетишини билмаган эканман. Бу номаъқулчиликни бир марта қилдим, иккинчи қилмайман, деб онт ичдим. Қаёқда? Уч кун кўрмасам согиниб қоламан. Ярим кечада борсам, ухламай кутиб ўтирган бўлади.

Тоғам, донишманд тоғам бир гапни кўп қайтарарди. «Бу дунёнинг жаннати ҳам хотин, дўзахи ҳам. Хотин кишига жиловингни бериб қўйдингми, тамом! Жаннатда юрибман деб, дўзахга тушиб қолганингни ўзинг билмайсан». Тўғри айтган экан. Мана, дўзахга тушдим. Бугун дўзахнинг нақд ўзига тушдим-қолдим!

Қайрилма киприкларини пирпиратиб бемалол ухлашини қаранг! Эрининг уйида ётгандек! Эртага мени урушга юборишадими, передовойда немис ўқидан ўлиб кетаманми, бунга нима? Эри урушдан келган куни унинг тўшагидаям шунақа – ойдек бўлиб ётаверади-да! Кечаси нимага ҳайдаб юбормадим?!

- Туринг! Тонг ёришиб кетди-ку!

Сесканиб уйғонишига ўлайми! Худди қаерда ётганини билмайдигандек. Худди бу ерга биринчи марта келиб, биринчи марта ётиб қолгандек! Қайрилма киприкларини пирпиратиб, ширин жилмаяди тағин! Ўргилдим ширин керишишингдан!

- Шунақа ухлабманки!
- Қолганини уйингизда ухлайсиз!

Дарров сергак тортасан-а! Сочини ёйилиб кетгани-чи!

- Чой қўяйми?

Хотин киши товуқ мия бўлади-да! Шу топда чой ўтадими томоқдан! Начора, алдаб-сулдаб йўлга солмасам, яна гапни айлантиради.

– Бўла қолинг энди! Тонг отиб кетди-ку.

Шу-да, мушук-да, булар! Асабинг қўзиб турганда суйкалади. Худди атайлаб қилгандек.

- Энди нима бўлади?

Илтижоли термулишини қара!

– Кечаси нима дедим сизга? Ишингизга борсангиз-чи! Ана, қўйиб берсанг йиғлаб оламни бузади. Кипригида ёш илиниб турибди. Бир йиғлашга тушдими, тамом, камида ярим соат чўзади, бу.

– Илтимос, Раъно! Сен боравергин. Бу ёгини ўзим тўгрилайман. Хавотир олма. Хўпми, жоним!

«Жоним» эмиш! Муроди қосил бўлган эркакка бориб турган қурилиқо қам алвасти бўлиб кўринади. Қизиғи шундаки, соғинганингда алвасти тағин қурлиқога айланади. Яна «жоним» дейсан, «азизим» дейсан. Минг лаънат бу ёлғончи дунёга!

Бўлди-бўлди, ёш боладек мунгайиб нима қиласан? Кет дегандан кейин кетиш керак-да. Ҳа, маладес! Сендан бошқа ғам-ташвишим йўқми!

Хайрият-ей, қутулдим!

Кечаси нима деди? Никоҳимга олармишман? Қўйиб берсанг ҳеч ҳаёҳҳа чиҳмайман, деб ўтириб олишдан ҳам тоймайди. Бу кишим эрлик тўкис бўлиб олсинларда, азобини мен тортай! Хотин кишининг мушукдан фарҳи йўҳ, дедим-ку! Орҳасини силасанг бас, дарров тиззангга чиҳади. Эси бор эркак ўша заҳоти силашни бас ҳилади. Яна силадингми, томом, ўрмалаб елкангга минади. Юзингни ялаб-ялаб бошингга чиҳиб олганини ўзинг билмай ҳоласан. Бошингга чиҳдими, тамом! Икки дунёда ҳайтиб тушмайди. Хоҳласа ёнғоҳ чаҳади, хоҳласа – тош. Бу кишиям мулойим бўлиб бошимга чиҳмоҳчи! Чучварани хом санабсан! Тиззамда ўтириш ёҳадими, марҳамат, ўтиравер, аммо бошимга чиҳармайман. Ёҳмаса – пишт! Тўрт томонинг ҳибла!

...Гунг отбоқар жийронимга ем бериб турган экан. Дарров эгарлаб, жиловини қўлимга тутқазди. Олисдаги тоғлар қизғиштоб тусда товланиб кўринар, ҳали қуёш чиқмаган, аммо кун ёришиб кетган эди. Чойхона олдидан ўтаётганда от ҳовузга талпинди, чанқабди. Падарингга қусур соқов!

Жониворни суғоришгаям эринган! Колхозда нариси билан олтита от қолган ўзи. Олтита отни парвариш қилганига бир иш куни ёзиладию шу арзимас юмушниям ёлчитмайди. Ҳали шунақанги савалайки, жони оғриганидан тили чиқиб кетсин!

Отнинг жиловини бўш қўйган эдим, илдамлаб, ҳовуз бўйига борди.

Гулсафсарлар ниш чиқариб ётган юмшоқ соҳилга авайлаб ту ёқ босганча сувга тумшуқ солди. Лойқа сув четида ҳалқоб бўлиб тўдаланиб қолган ўрик гуллари пароканда ҳалҳиб кетди. Ие, ўрик гуллабди-да! Қизиқ, кеча гули очилмаган эди шекилли. Билмадим, эсимда йўқ. Ҳарҳалай ҳовузнинг тўрт томонида зич саф тортиб турган, ҳар йили каллакланавериб танаси йўгонлашиб кетган толлар орасида бир туп ўрик чаман бўлиб гуллабди. Кечаги шамол аралаш ёмгирда тўкилган нимпушти гуллар ҳовуз юзини ҳоплаб олибди. Ана, от тумшугини тиҳҳанда ҳалҳиб кетган гулбарглар секин-секин сузиб бориб, ҳовуз ўртасига тўпланиб ҳолди.

Қизиқ, анавиёқларда – уруш бўлаётган жойларда ҳалиям қор белга урса керак! Бу ерда баҳор, у ёқларда ҳаҳратон ҳиш. Эртага лоп этиб Абдураҳмонов чаҳириб: «Ўртоҳ Хўжаев, раисликни топширасиз, маънавий бузуҳ экансиз», деб ҳолса-я! Абдураҳмонов, анойимас. Хоҳласа биттаю битта ҳўли билан гирибонимдан олади-да, улоҳтириб юборади. Дўзаҳнинг ҳундасига – передовойга бориб тушаман. Законний тушаман! Тоғам ҳам жонимга ора киролмайди. Энди у проҳурормас, мабодо, проҳурор бўлгандаям нима ҳила оларди. Ўзининг ҳузурини ўйлайди! Шу ҳотинга илаҳишиб нима ҳилардим. Тинчгина юрсам ўлармидим!

Йўқ, бир хонимча деб, бегона юртларда ўлиб кетадиган аҳмоқ йўқ! Тезроқ, тезроқ бориш керак. Табибнинг тилини боғлаш керак!

Кеча анови итваччасини ёқасидан бўгганимда хириллаб қолувди. Ўлиб-нетиб қолмадимикин ишқилиб? Йўг-е, анави жинқарчанинг оёгига урилиб қаддини ростлаганини ўзим кўрдим-ку. Бари бир-да, одам холис... Ҳарқалай орденли қаҳрамоннинг укаси...

Мунча тихирлик қилади бу! Ичига ўт тушганми? Чу-е! Харом ўлгур!

Қуруқдан-қуруқ боравераманми? Ақалли ўша итваччага... Шошма, уйда Қўқондан янгам бериб юборган уч-тўрт дўппи бор эди шекилли. Орасида кичикрогиям топилиб қолар... Шу-да, бу тескари дунёнинг ишлари! Пайти келса эшакни тога дейсан! Майли, овози ўчса бўлди. Чу, жонивор!

...Мунча бефайз бу табибнинг уйи! Ёнгоқзор орасигаям жой соладими одам! Тағин шундоқ жар бўйида!

Пилдираб чиқмас экансан-а! Эшигингни раис қоққанини биласан-да! Ие, хотини-ку! Табиб қай гўрда қолдийкин?

- Кун ёйилиб кетди-ку!
- Кечирасиз, раис, дадаси хозир... шафтоли гулидан...

Узр сўрамай ўл!

- Қанақа шафтоли гули?
- Дадаси шафтоли гулидан дори тайёрлаётган эдилар. Робияхон бечора ердек ётганмиш...

Нега ётади?.. Э, менга деса ўлиб кетмайдими, ўша айгоқчи Робияси.

– Устига устак қўй жонивор туғиб қолса денг, раис... Яхши! Демак, уйдан ҳеч ким ҳеч ёққа чиқмаган. Табиб анави Робияга шафтоли гулидан дори тайёрлаяпти. Хотини янги туққан қўйи билан андармон! Хаммаси жойида!

- Ие, муборак бўлсин! Нечта туғди?
- Иккита, раис, иккита.
- Уни қаранг. Қўзичоқларни семиртираверинг. Ўғлингиз келганида сўясиз. Кўрасиз, Очилбой албатта қахрамон бўлади!
- Айтганингиз келсин, раис! Мартабангиз бундан ҳам улуғ бўлсин!
  - Чақиринг бир минутга хўжайинни!

Ана, келяпти, салмоқлаб. Қўлида ҳовонча, кийими топ-тоза. Қари бўлсаям икки юзи чийқондек! Ўргилдим олифтагарчилигингдан! Табиблик қилгунча даладаги ишни эпла, Луқмони ҳаким!

- Ҳорманг, Комил ака! А, бу кун ёйилиб кетди-ку!
- Ҳозир, укам... Ҳусан думанинг қизини трактор тепиб, буйраги шикастланибди. Шунга... озгина... Қани, уйга, укам... Бир пиёла чойимиз бор.

Вой қуруғ-эй! Келиб-келиб сенга ука бўлиб қолдимми! Чойинг билан қўшмозор бўл! Орден олган шапкўр ўглинг бўлмаса-ку... Нима деди? Ҳусан думанинг қизини трактор тепибди дейдими? Демак, кеча шунинг учун... Майли, аниқлаймиз... Анави шайтонбаччаси қаёқдайкин?

– Раҳмат, ака. Бошқа сафар... Анави мажлисда... кичик ўғлингизга аталган дўппи қолиб кетган экан. Олимжонмиди? Ўшанга...

Нега илжаяди бу? «Шартмас» эмиш... Камтарлик қиляптими, туллакликми?

- Чақиринг-да, ака, кичкина қахрамонни!
- ...Балоям урмабди-ку, итваччасига. Ана келяпти! Бўз кўйлагининг енгини шимариб олибди. Қўллари тезак юқи... Мен бўлсам, қўрққан олдин мушт кўтарар деб...
- Салом қани, ўғлим! Ўзидан катта одамга салом бериш фарз!

Вой интеллигент-ей! Мишиқи болангни саломига зорманми? Начора, келишга келдим, бу ёғига...

- Қўйинг туғдими, Олимжон?
- Xм...

Қовоғини солишини қаранг. Вой хумпар-ей! Бўрига ўхшаб қарайди одамга.

- Эркакми, ургочи?
- Иккита. Биттаси эркак, биттаси...
- Маладес! Ма, кийиб ол!

Сочининг ўсиб кетганини қаранг. Қулогининг кириничи! Хайф сенга дўппи. Аммо наилож?!

- Киявер, сеники шу!
- Мен... Ҳозир, укам... Онаси, сизам бўла қолинг. Раис тўгри айтяптилар. Далада иш кўп...

Ана, табиб қовончани кўтариб уйга, хотини этагини липпасига қистириб, молхонага зипиллади.

- Менга қара, Олимжон. Сен катта йигитсан-а?
   Халиям қовоғини очмайди. Ўргилдим димоқ-фирогингдан.
- Кеча сени билмасдан хафа қилиб қўйдим. Ўғри деб ўйлабман. Бундан кейин бировнинг деворидан ошиб тушмагин, хўпми?
  - Ўгрилик қилганим йўқ... Мен...

Тилини бермайди, тирранча!

- Бўпти! Гапни кўпайтирма! Яна бир марта шунақа қилсанг, сениям, дадангниям қаматиб юбораман...
- ...Йўли осон экан-ку! Мусичага озор бермайдиган мана шу табиб устингдан шикоят қилади деб қўрқиб юрибсанми?! Ким айтади сени Закунчи деб. Йўлбарсдек важоҳатинг билан шулардан чўчидингми? Шулардан-а?! Хайф-е, сендек раисга!

Энди анави – Робия қолдими? Қўрқадиган жойим йўқ! Шунақанги тилини қисиқ қилиб қўяманки, кетимдан ўзи эргашиб юрадиган бўлади, унсурвачча. Чу, жонивор! Мунча учасан? Қамчи еб

ўрганмагансан-да! Ҳаво мунча тиниқ! Олам мунча чиройли. Мунча тез учади бу? Қаноти борми? Қаёққа кетяпман ўзи? Бари бир эмасми? Олам ямяшил бўлса, остингда арғумоқ бўлса, учасан-да! Янги йил кечасидаги ўтиришда Соли сўпоқ талинка чертиб, нима деб хиргойи қилганди?

Арғумоқ остингдадир, тогларни кез, богларни кез, Ногаҳон бу арғумоқ остингда бўлгай-бўлмагай!

Хотинталоқ Сўпог-ей! Билиб айтган экан! Остингда отинг борми, узанги узилгунча суриб қол. Эртага отингни бошқа одам минмайди деб ким кафолат бера олади? Бекор гап! Остимдаги арғумоқни бировга бериб қўядиган анойи эмасман!

Чарчадингми, Қоракўз? Вой-бў! Терлаб кетибсан-ку! Бўлди, биродар, бўлди. Қайтамиз. Шошма, секин... Ҳа, баракалла, иш бошимиздан ошиб ётибди. Биласан-ку, одамларни. Сенга-ку, бир қамчи ҳам ортиқча... Аммо одамлар арғумоқ эмасда, қайсар эшакдан фарқи йўқ. Юки енгиллашдими, ётиб олади.

### БЕШИНЧИ КИСМ





### ЎН ЕТТИНЧИ БОБ

# БИРИНЧИ СИНФ ЎҚУВЧИСИ МУЗАФФАР ШОМУРОДОВ ХИКОЯСИ

# Абдувалидан зўр чиқдим!

Укамни кўтариб келяпман. Хали ўзи юролмайди-да! Юролмайди-ку, ҳечам бир жойда ўтирмайди. Ўтқазиб қўйсангиз орқаси билан сурилиб, бирпасда анча ерга бориб қолади. Ойимнинг айтишига қараганда эрта-индин чопқиллаб йўлга кириб кетармиш. Ўшанда «Қора аммам» укамнинг оёги орасидан кулча юмалатаркан, ўзи айтган. Жуда ширин бола-да, Омон! Ҳозиргина йиглаётган эди, дарров овуниб қолди. Кўтариб боряпману нуқул қулогимни чўзгилаб ўйнайди. Шу дейман, чап қулогим осилиб, шалпангқулоқ бўп қоламан-ов! Қўлимга олдим дегунча шу қулогимга ёпишади. Ҳайронман, нимасини яхши кўради? Қайси куни ойнага қарасам, чап қулогим ўнг қулогимдан каттароқ кўринди. Ана, яна чўзгилаяпти.

# - Қўйворсанг-чи!

Қўйиб бўпти! Яккам-дуккам тишини кўрсатиб, кулади тағин!

Шундай қилиб, бугун Абдувалидан зўр чиқдим. Бурнини мўлжаллаб туриб бир урган эдим, «ойи», деб йиглаб юборди. Қарасам, бурни қонаяпти. Ўзиям, муштимни тугаётганимда ўрта бармогимни

чиқариброқ урдим-да. Вой, қўлим! Ўрта бармогим сирқиллаб огрияпти. Абдувалининг тишига тегдимикин? Нега ўзи гирромлик қилади. Буям майли, укамни йиглатгани, айниқса, алам қилиб кетди. Бўлмаса урмасдим.

Эртага мактабга борганда бари бир Абдували билан битта партада ўтираман-да. Яна уришамиз шекилли... Маъсуда опанинг жахли ёмон. Уришсак, иккаламизниям дарсдан хайдаб юборади... Бошида шу Абдували билан битта партага ўтириб қолганим чатоқ бўлган-да! Нима қилай, Маъсуда опа ўтқазиб қўйган-да! Ойим ҳам биринчи кун мактабга бораётганимда тайинлаган. «Абдували билан бирга бориб, бирга келгин, битта партада ўтиргин», деган. Ўшанда дадам менга яп-янги кўйлак-шим олиб берган. Ойим атайлабдан жилд тиккан. Жилдим Абдувалиникидан яхши. Янги-да! Абдувалиники эски: Мавлуда опасидан қолған жилди. Банди уч жойида ямалган, сиёх тўкилган... Опаси Кўтармадаги мактабда - саккизинчида ўкийди. Бизнинг мактабимиз етти йиллик. Саккизинчи синфга ўтганлар Кўтармага қатнайди, ўн йиллик мактаб бор.

Анави куни Мавлуда опа нима дейди, денг? «Жилдингни ўртогингта бера қол, ойинг сенга бошқасини тикиб беради», дейди. Индамадим. Мавлуда опа бақироқ қиз. Сариқ-да! Бир нима десанг дарров жаҳли чиқиб кетади. Гапини қаранг. Ойим атайлабдан тикиб берган жилдни у кишининг укасига берармишман. Бериб бўпман!

Ойимнинг одати қизиқ: ҳар куни жилдимга битта нон солиб қўяди. «Ўртогинг билан бўлашиб егин», дейди. «Қора аммам» келса, жилдимга жийда, майиз тўлдириб ташлайди. Жилдим эшакнинг хуржунига ўхшаб қолади. «Алифбе» билан даф-

тар солишгаям жой етмайди. «Керакмас», десам, жахли чиқади. «Ўқиб шахар оберармидинг, бир кун кечроқ олим бўлсанг бўларсан, қорнингни тўйғазиб юр», дейди. Нима кўп - «қора аммам»нинг келиши кўп! Нима кўп - мактабга жилдимни қаппайтириб боришим кўп! Орқадаги партада ўтирганимиз учун Маъсуда опа Абдували иккаламизни кўрмайди. Дарсда ёнгоқ еб ўтирамиз. Фақат омон-эсон чақиб олсак бўлди. Ёнгоқни чақсангиз овози чиқади-да! Доскага дарс ёзаётган Маъсуда опа эшитмайди дейсизми? Жудаям эшитади-да! Бир-икки марта дакки еганимиздан кейин Абдували билан буниям йўлини топдик. Танаффусда ёнгоқни чақиб оладиган бўлдик. ўалвирак ёнгокнинг иккитасини партага устма-уст қўйиб бир урсангиз, иккаласиям чақилиб кетади. Тошёнгокни чакишниям иложи бор. ўишт қидириб ўтирмаймиз. Хамма танаффусга чикиб кетганида мен синф эшигининг ошик-мошиғи ёнига ёнгоқни қистириб тураман. Абдували эшикни секин ёпади. Тамом! Чақилган ёнғоқ чўнтакда турибди-да!

Бир куни ёмон бўлди. Танаффусда чақиб, ғамлаб олинган ёнғоқларни еб ўтирган эдик, Маъсуда опа бирдан:

– Шомуродов? – деб чақириб қолди.

Ўрнимдан сакраб туриб:

– Meн! – деган эдим, оғзим тўла ёнғоқ мағзининг ярмиси отилиб кетди.

Болалар хохолаб кулиб юборишди. Қарасам, Абдувалиям икки қўли билан оғзини тўсиб маза қилиб куляпти.

Парта остидан оёгига яхшилаб тепган эдим, кулгиси тўхтаб, афти буришиб кетди.

Фақат ўқитувчи опамиз кулмади.

– Нима бало, Музаффар! Еттита қорнинг борми, қачон қараса жағинг қимирлайди-я?! – деди.

Танаффусда иккинчи синф болалари бизни масхара қилишади. Ҳаммаси баравар қарсак чалиб ашула айтади:

Биринчи чол, отга беда сол, Отинг емаса, чайнаб сол.

Аввалига алам қилиб юрдию Маъсуда опа бизни юпатди:

– Ўзлариям бултур биринчи чол эди, қўяверинглар! Ўшандан буён танаффусда иккинчилар билан ўйнамаймиз. Ўзимизнинг ўйинимиз бор. «Мушук – сичқон» – қизларнинг ўйини. Биз «Қушим боши...», «Ким урганини топ...» ўйнаймиз.

«Ким урганини топ...» – зўр ўйин. Сиз йўлак бурчагига борасиз-да, ўнг қўлингиз билан қулогингизни бекитиб, чап қўлингизнинг кафтини ўнг қўлтигингизга тиқиб, очиб турасиз. Болалардан биттаси қўлтигингиз тагидаги кафтингизга шапатилайди. Қайрилиб қарасангиз, камида ўнта бола бош бармогини диккайтириб турган бўлади. Урган болани топиб, бармогини ушласангиз, ўрнингизга ўзи туриб, калтак ейди. Тополмасангиз, ўзингиздан кўринг!

Абдували кўпинча ғирромлик қилади. Тўгри топсангиз ҳам, «мен урмадим», деб тураверади. Болалар ундан қўрқади. Биринчидан, ҳаммамиздан каттароқ. Иккинчидан, «туя» амакининг дўкони яқин! Бир нима десангиз, дадамга айтиб бераман, сочингни огритиб олади, деб қўрқитади.

... Бугун ҳам ғирромлик қилган эди, бопладим. Ҳеч кимдан қўрқмайдиган Абдувалини мен йиғлатдим.

Мактабдан келиб, чой ичишим билан ойим ялинди.

– Музаффар, жон болам, қорнинг тўйган бўлса укангни ўйнатиб кел. Биқиним оғриб кетяпти. Бирпас чўзилай...

Ойимнинг биқини тез-тез оғриб туради. Ўшанақа пайтда кўзига ҳеч нима кўринмайди, икки букчайиб қолади. «Қора аммам»нинг айтишига қараганда, уруш пайтида ойимни Алвасти кўприк тагида ажина чалган экан. Ўшандан бери ўқтинўқтин биқини оғрийдиган бўлиб қолган. Ажина чалганига ўн йилдан ошиб кетган бўлсаям ҳалигача асорати қолганмиш.

Ойим, укангни ўйнат, дейдию мен йўқ дермидим? Жон дейман-да! Омонни ўйнатиш дегани ўзимнинг ўйнаганим эмасми? Кўчага қочишга баҳона тополмай турибман-ку!

Хужрага югуриб кириб, эски сандал орқасига яшириб қўйган ланкамни топдим. Куз охирлаб, салқин тушгандан бери ланка тепиш ўйин бўлган. Биламан. Абдувалидаям ланка бор. Бир эмас – учта. Аммо уники эчки пўстагидан. Эчкининг ланкаси яхши учмайди, жуни қийшиқ. Меники қўйнинг терисидан. Ҳов ўшанда Омоннинг бешик тўйига сўйилган қўйнинг пўстагидан ойимга билдирмай қирқиб олиб, ланка ясаганман. Жуни узун. Тагига бир эмас, иккита уч тийинлик чақани сақич эритиб ёпиштирганман.

Укамни кўтариб, Абдувалиларникига бордим. Чўнтакда — ланка! Абдувалиям жон деб турган экан. Долонида роса ланка тепдик. Омон яхши бола-да! Йўлак бурчагига, эски намат устига ўтқизиб қўйган эдим, йигламадиям. Фақат битта айби борда! Орқаси билан секин-секин сурилиб девор тагига боради-ю, кесак ушатиб дарров огзига тиқади.

Билинтирмасдан еб олади. Лаби лой бўлганидан сезиб қоламан. Бугун ҳам икки марта қўлидан данакдек-данакдек кесакни олиб ташладим. Шундаям йигламади. Лой босган тилини чиқариб, кемшик тишларини кўрсатиб илжайиб қўйди.

Ўйин айни қизиганда, Абдували яна ғирромлик қилди. «Малай» бўлиб ланкани ташлаб бораётган эди. Ланкани қийшайтириброқ отганди, таги кўчган этигим билан тепдим. Ланка узоқ кетмади.

- Тегмади! деди Абдували чапак чалиб. Тегмади, галинг ўтди!
- Тегди-ку! Аламимдан чийиллаб юбордим. Ана, нарига тушди-ку!
  - Тегмади. Галинг ўтди. Бошқатдан ўйнаймиз! Алам қилиб кетди.
  - Тегди-ку! дедим бақириб. Тегди-ку!
- Тегмади! Тегмади! Абдували энгашиб ланкани олмоқчи эди, елкасидан итариб юбордим.
  - ўирром! Сариқмашак!

Абдувалининг сап-сариқ сочлари ҳурпайиб кетди. Ланкани юлқиб олиб, бир отган эди, йўлак бурчагида ўйнаб ўтирган Омоннинг бошига тегди. Укам чириллаб йиглаб юборди.

- Укамни нега урасан? дедим бақириб. Нега урдинг?
- Етти қорин! Етти қорин! Ажаб қилдим! Баттар бўлсин!

Аламимга чидолмай қолдим. Чирқиллаб йиғлаётган укамга раҳмим келиб кетди. Абдувалининг юзига мушт туширдим. Ўрта бармоғим шунақанги сирқиллаб оғридики, кўз олдим қоронғилашиб кетди. Аммо Абдували юзини икки қўллаб чангаллаганча «Ойи!» деб чинқириб юборганини кўрган заҳоти қўлимнинг оғриғини унутдим.

Ойи! – деди Абдували инграб. Бурни қонаб кетди.

Ховли томондан ойисининг жахлдор овози келди.

– Отасининг молини талашадими булар-а? Қараб кўр, Мавлу!

Қўрқиб кетдим. Ланкани ҳам ташлаб, йиғлаб ўтирган укамни кўтараётган эдим, Абдувалининг Мавлуда опаси чопиб келди.

– Нега урасан, укамни, башаранг қургур! – деди сариқ юзи қип-қизариб.

Йиглаётган Омонни кўтариб оларканман, баланд келдим.

- Нега ўзи укамни уради?
- Шу сенинг укангми, оғзингдан қонинг келгур!
- Мавлуда дағдаға билан устимга бостириб келди.
- Ўгай укангга жонинг шунчалик ачидими, етимча- етти кулча! Тур йўқол!

Омонни кўтарганча кўчага югурдим. Мавлуда бурнидан қон оқиб йиғлаётган Абдувалининг бошига борди.

– Шу шумқадамдан бошқа ўртоқ қуриб қолганми, жувонмарг! – деб укасининг бошига муштлаганини узоқдан кўриб қолдим.

Уйга келгунимча Омон овуниб қолди. Қулоғимни чўзгилаганча огзидан сўлак сачратиб «дзз» деб ўзича «ашула» айтишга тушди. Мени от, қулоғимни жилов деб ўйласа керак-да.

Мавлуда опа мени нимага «етимча» деди? Э, гапиравермайдими? Укасини урганим алам қилган-да? Яхши бўлди. Абдували энди ғирромлик қилмайди. Фақат ланкам қолиб кетгани чатоқ бўлди-да. Қўлим ачишиб огрияпти. Бари бир, ойимга айтмайман. Уришганимни эшитса хафа бўлади.

Уйга кирсам, ойим азза-базза кўрпа-тўшак қилиб ётиб олибди. Авваллари биқини огриганида бир-икки кун инқиллаб юрарди-ю, бунақа ўралиб ётмасди.

Қўрқиб кетдим. Ёнига Омонни қўйишим билан ойимга тармашди.

– Жим, – дедим қўлидан тортиб. – Уйғотиб юборасан!

Омон гапга тушунармиди? Йиглаб юборди.

Ойим дарров кўзини очди. Терлаб кетибди. Кўрпадан қўлини чиқариб, Омонни бағрига босди. Бир қўли билан бошимни силаган эди, пешонамга чўг теккандек бўлди.

- Нима қилди? дедим юрагим увишиб.
- Хеч нима қилмайди, болам! У жилмайишга уринди. Буйрагим оғрияпти. Қозир... деди-да, қаддини ростламоқчи эди, оғриқдан юзи буришиб кетди. Майли, деди инграб. Қозир ўтиб кетади.

## ЎН САККИЗИНЧИ БОБ

## РОБИЯ ХИКОЯСИ

### Алвасти

Жуда меҳрибон-да, шу болам! Омон-ку, ҳали кичкина. Энди йўлга кирай деяпти, ниманиям биларди. Музаффарим бошқача! Их десам бошимдан кетмай, ўтириб олади. Мана, ҳозир ҳам йиғлаб юборай деяпти. Нима қиламан, болани қўрқитиб? Ойим келиб қолса яхши бўларди. Ҳайронман, анчадан бери дараги йўқ. Ҳали дадаси келса Нўғай-кўргонга жўнатмасам бўлмайди, шекилли. Туриш керак. Чўзилиб ётгандан нима фойда? Энди огриётгани йўқ-ку, буйрагим! Эски дард. Қанча бўлди ўзи? Ўн йилдан ошдими? Тузалиб кетган эдику, нима бало! Омон тугилганидан бери қайтадан ёпишди. Ўшанда трактор тутқичи тепгани баҳона шунақа огир касалга чалиниб қолишимни билмаган эдим. Бўлмаса Комил табиб қанча уринди.

Жала қуйиб турган, Раъно келинойимнинг уйидан Олимжон иккаламиз чиқиб кетган ўша кечада Комил табиб «зиёни йўқ, икки-уч ҳафтада сан кўрман кўр бўлиб кетадилар», деганида адашган экан. Икки ҳафта эмас, бир ойдан ортиқ ётиб қолдим.

Кунлар илиб, далада иш қизиб кетган, уйда ётишга ийманардим. Башор опа беш-олти марта келиб хабар олди. «Обдан тузалмагунча ёта тур, иш бўлса, ўзимиздан ортмас», деб тайинлади.

Қизиқ, сўфи азон айтмасдан одамларнинг эшигини қамчи билан савалайдиган Умар закунчи бизнинг дарвозага келмай қўйди. Буни, ҳатто ойим ҳам сезди.

– Нечук Закунчининг қадами узилди, Худо юзини тескари қилгани рост бўлсин.

Айби бўйнида бўлганидан кейин келмайди-да! Ойим Закунчини гапириши билан Раъно келинойим кўз ўнгимга келди. Қандоқ яхши кўрардим. Келинойимга ўхшашни қандай ҳавас қилардим. Наҳотки шундоқ жувон... Қандай шармандалик! Закунчиям, янгам ҳам Робия ғийбат қилади, деб чўчиб юргани аниқ! Сатқаи гапим кетсин! Олимжонга қойилман. Комил табиб дори-дармон олиб шунча марта келганида бир оғиз гап очмади. Бундан чиқди, Олимжон ҳеч нима демаган!

Биқинимни чангаллаб бир ой тушакда ётганимда иккита воқеа булди. Биттаси қувончли, биттаси қайғули.

Қувончлиси шу бўлдики, бир куни Холпош хола товоқда сумалак кўтариб чиқиб қолди. Бобом билан ойим далада эди. Қиш бўйи ердек ётган холанинг ранги жойига келиб қолганини кўриб, севиниб кетдим. Ойим икки гапнинг бирида «овсиним-

нинг ахволи оғир, болаларининг ғамида адойи тамом бўлди», деб юрганидан хавотирда эдим. Йўқ, бинойидек тузалиб қопти.

– Ўз қўлим билан қилдим, қизим! – деди сумалакни ёстиғим олдига қўйиб. – Азбаройи шифо, деб еб ол! Даво бўлади.

У сумалак ялашимни бирпас томоша қилиб ўтирдида, кўзларида умид ёниб, хўрсинди.

- Оғача фолбинга борувдим «йўл кўрдим», дейди. Қайси бирилигини билмайману, аммо битта ўглингиз тирик, эрта-индин ё ўзи келади, ё хабари дейди. У бир зум жимиб қолди-да, қўшиб қўйди. Шунисигаям шукур. Зора чолим айтгандай кантуз бўлгани рост бўлса.
- Иккалалариям тирик, дедим юпатиб. Шокир акам ҳам, Зокир акам ҳам...
  - Биттаси келсаям майлийди...

Холпош хола гапиряпти-ю, Кимсан акамни ўйлайман.

Уч ойдан ошди. На хат бор, на хабар.

Касал бўлган кунимнинг учинчи ҳафталари шекилли... Пешинда ойим эшикдан қути ўчиб кириб келди.

– Қуда холанг омонатини топширибди, – деди йиғламсираб. – Келиним бечорага жабр бўлди.

Ростини айтсам, Раъно келинойимга юрагим ачиди. Холи нима кечади энди? Баттар қийналмайдими? Балки янгамда айб йўқдир. Балки анави Закунчи қўрқитиб шу йўлга солгандир. Бунақа одамдан ҳар нарсани кутса бўлади. Шўрлик келинойим!

- ... Эрталаб бобом ишга кетаётиб, тайинлади.
- Кечқурун табибникига бор. Янги дори тайёрлаб қуйганмиш. Ё ойинг оборсинми?

Йўге, ўлар энди, ойимниям овора қилсам. Туппа-тузук юрадиган бўлиб қолдим-ку! Битта-битта юриб, ўзим боравераман.

Кўчага биринчи чиқишим эди. Ажаб, бир ой ичида ҳамма ёқ шунчалик ўзгариб кетибди!

Кўчанинг икки четидаги мирзатераклар ям-яшил япрок чикарибди. Ўтиб колмасимдан илгари у ер-бу ерда битта-яримта ўриклар энди ғунчалаган эди. Ҳозир бўлса пастак деворлар ортидан мўралаб турган олмалар кийгос гулга кирибди. Бири ок, бири напармон рўмол ёпинган келинчаклардек шодумон сузилади. Ҳатто Бўрижар бўйидаги кўхна қамишзор ҳам кўкламнинг яшил бўёгидан бенасиб қолмабди.

Алвасти кўприкка яқин келганимда чарчаганим билинди. Ўнг биқинимда яна санчиқ туриб, терлаб кетдим. Нимчамни ечиб қўлимга олганча, битта-битта юриб, кўприк устига чиқдим. Темир йўл қуёшнинг сўнгги нурларида ялтираб ётар, олисда, Кўтарма томонда молларнинг маъраши эшитилар, ёнгоқзор ортидан нимтатир тутун кўтарилар эди.

Тағин жар бўйига тушдиму ёлғизоёқ сўқмоқдан юриб кетдим. Тоққа жала қуйган бўлса керак. Бўрижар лойқаланиб аввалгидан ҳам даҳшатлироқ гувиллар, тор кўприк остига кириб кетар эди.

Ажаб! Авваллари Алвасти кўприкдан ўтиш деса юрагим безилларди. Хозир қўрқиш хаёлимга ҳам келмади. Ўша куни Раъно янгамникида кўрган даҳшат олдида Алвасти кўприк нима бўпти? Бўлди! Энди мен ёш бола эмасман. Дунёда шунаҳа ваҳималар борки, ҳаршисида мингта алвасти ип эшолмайди! Ке, ҳўй! Ҳар ким ҳилса ўзига ҳилади. Бари бир, ҳийин бўлгандан Раъно келинойимга жабр бўлди. У ёҳда онаси ўлган бўлса, бу ёҳда анави Закунчи тинч ҳўймаса! Булар-ку майли, Шомурод тоғамда нима гуноҳ? Эшитса ажалидан беш кун бурун ўлмайдими?

Ана, наъматак ҳам гуллабди. Сўқмоқ четида, шундоқ жар бўйида сувга мўралаб турган очпушти гуллар орасида бултурдан қолган йирик-йирик наъматак донлари кўзга чалинади. Ҳеч ким териб олмагани учун кўплари ерга тўкилган, шохда сақланиб қолганлари эса қиш бўйи қор остида ётгани учун қорайиб жигарранг тусга кирган. Лекин бултурги мевасидан кўра бу йилги гул кўпроқ.

Ўша куни Олимжон билан ўтириб дам олган дўнгликка етгунча нафасим огзимга тиқилиб қолди. Ичимда тағин олов ёна бошлади.

Дўнгликка тикилиб узоқ туриб қолдим. Ўшанда бу ерда яккам-дуккам майсалардан бўлак нарса йўқ эди. Қозирчи? Дўнгликни тизза бўйи ўт қоплабди. Ёввойи саримсоқлар бош чиқарибди. Атрофда қизғалдоқлар ловуллаб ётибди. Худди биров ёқут парчаларини сочиб ташлагандек. Бир ойда шунча ўзгариш! Бу – қадим дунёнинг одамлар билан нима иши бор! Баҳор келаверади, қизғалдоқлар очилаверади, Бўрижар шовуллайверади. Одамлар эса келадию кетади. Дунё ўткинчи деймиз. Йўқ, дунё эмас, биз ўткинчимиз. Баҳор бир айланиб келгунча биров туғилади, биров ўлади. Биров-бировни яхши кўради. Биров-бировнинг кўзига чўп солади...

Эрталаб ойим далага чиқиб кетаётганида тайинлаган эди:

– Жон болам, табибникига борсанг, Кўтармага ўтиб, Раъно келинойингдан хабар олиб кел. Қон йиғлаб ўтиргандир келиним бечора. Сўраб кўр, тоғангдан хат бормикин? Ўзим борай десам, даладан бери келмайман.

Шўрлик ойим! Укасининг бошига не кунлар тушганини билса эди! Мабодо тоғам урушдан тўрт мучаси соғ қайтганида ҳам турмуши турмуш бўлалими энди?

Бормайман янгамникига! Онангиз қазо қилиб, бошингизга кулфат тушибди, кечирасиз, ўша кунги гапимни қайтиб олдим, дейманми! Қайтиб оламанми-йўқми, тоғамга нима дахли бор? Бари бир, кўнглим қолган одамнинг олдида илжайиб туриш қўлимдан келмайди!

Комил амакиникига кириб борганимда намозшом бўлиб қолган эди. Дўппидек тор ҳовли, бир уй, бир айвон. Бурчакда яна бир пастак ҳужра. Каталак деразаларининг синган кўзига хитой қоғоз ёпиштириб қўйилибди. Ҳовли ўртасида, гулини тўка бошлаган бир туп гилосга ўралашиб кетган аймоқи ток остида тахталари лопиллаб турган эски сўри. Сўри ёнида темирлари занглаган сим каравот. Каравот устига эчки пўстаги ёзиб қўйилибди.

Қушбурун Лазакат хола айланиб-ўргилиб кўришди. Уйга судраган эди, кўнмадим. У сўри устидаги қирқ-ямоқ бўлиб кетган, аммо озода кўрпачани шоша-пиша қоқиб, ўгирди-да, тескарисини ёзди.

Қўй маъради. Қарасам иккита қўзичоқ молхонанинг пастак эшигидан ховлига мўралаб турибди.

- Бизниям ярлақайдиган кун бор экан, Робияхон! деди Лазакат хола дастурхонга бир чойнак чой, зогора келтириб қўяркан. Совлиқ жонивор иккита туғди! Ҳов ўша сиз касал бўлиб қолган кечангиз... Дадаси айтдилар. Қўчқорни семиртириб турадиган бўлдик. Очилбой яна битта орден олса, командири отпуска бераркан. Келиши билан тўй қиламиз. Силани сигир ҳам эрта-индин...
- Қайдам, дедим кийик ўт солинган чойдан ҳўплаб. - Ҳали бор шекилли.
- Ажабмас, оғзинглар оқариб қолса. У ёнимга чўккалади. Олинг, айланай, зогорадан олинг. Эрталаб ёпувдим. Кимсанбойдан хабар борми?

Индамай бош чайқадим.

– Кимсанбой келиши билан тўйни бошлаб юбораверинглар. Бизлар ҳам унашиб қўйдик. Қаъни томонда яхши қиз бор экан. Очилбой отпускага келса дарров тўй қиламиз. Бир ҳафта турсаям майли. Ҳарна тўй кўриб қолганимиз, ўргилай.

Нахотки у бизникига совчиликка бориб, қуруқ қайтганини унутган бўлса? Ахир шундоқ қахрамон ўғлининг «шохини синдирган» мен эдим-ку! Нимага бу хотин шунчалик юрагини очиб гапиряпти? Ў, «кўриб қўй, сен бўлмасанг бошқалар бор, қиз зотининг уругига қирон келганмас», демоқчими?

Йўқ, унинг гап оҳангида истеҳзо йўқ эди.

- Олимжон қани? дедим гапни буриб.
- Вой, у даладан бери келармиди! Зўрахонга қарашяпти. Кечаси билан қолиб кетади. Зўрахон туппа-тузук трактирчи бўп қолди, айланай. Аммо Олимжон сизни жуда соғинган. Қайси куни бир кеча ётиб кетди. Нуқул дадасига хархаша қилади. «Опамни тезроқ тузатинг, опам билан ишлагим келяпти», дейди.
  - Менам соғиндим!
- Шукур, мана, оёққа туриб кетибсиз-ку. Ие, ана дадаси келдилар, Лазакат хола шошилиб сўридан тушди. Эшикдан кириб келаётган табиб томонга югурди. Худди бир ой кўришмагандек, эри билан қуюқ сўрашди.
- Ассалому алайкум, дадаси, яхши келдингизми? Чарчамадингизми?

Табиб Лазакат хола сув қуяётган обдастага қўл тутаркан, менинг саломимга алик олди. Шошилмасдан юз-қўлини, қулоқларининг орқасини ишқалаб ювди. Ҳафсала билан артинди.

– Тузукмисиз, қизим? – деди кўзимга тикилиб. – Қани, юринг-чи. Чироқ обкелинг, онаси!

Кетма-кет юриб нимқоронғи ҳужрага кирдик. Лазакат хола зум ўтмай муштдеккина бешинчи лампани ёқиб келди, дераза токчасига қуйди. Ҳужра вассажуфтларига гултожихўрозу исирик, шода-шода гармдори, жухори суталари, сарик «бошоғриғи» ўтлар, яна аллақандай мен билмайдиган қовжираб қолган кукатлар илиб қуйилган, хона ичи зах, ҳавоси оғир, ерга эски, аммо тоза намат ташланган эди.

Табиб хитой қоғоз ёпиштирилган дераза олдида узоқ туриб қолди. У нимқоронғи ҳовлидан кўзи билан бир нима излагандек қилт этмас, чамаси, бу ерга нима учун кирганини унутиб қўйганга ўхшар эди. Чироқнинг хира ёгдусида сийрак соқолли юзи ўйчан, хомуш кўринарди.

Тураверишимни ҳам, чиқиб кетишни ҳам билмай, секин йўталиб қўйдим. Табиб чўчиб уйгонган одамдек ярқ этиб менга қаради.

- А? деди паришонлик билан. Тузукмисиз энди, қизим? Ерга чўккалаганча огзи бўгиқ халталарни бир-бир ушлаб чиқди. Огриқ қолдими? деди менга қарамай.
  - Рахмат, дорингиз яхши экан.
- Буйрак сал шикастланган. Жигарни шишгани безиён насиб этса ҳеч нима кўрмагандек бўлиб кетасиз. У халтачаларни очиб, турли-туман дорилардан бир чимдим-бир чимдим чимчилаб олди-да, саргайиб кетган қоғозларга алоҳида-алоҳида ўради. Шулардан кунига уч маҳал ичиб турасиз. Тағин бир ҳафта, деди ерга ҳараб. Биламан, уйингизда товуҳ йўҳ, иложи бўлса, Оҳсоҳолдан битта товуҳ олиб, шўрвасини ичинг. Нимада олиб кетасиз буни?

Дориларни олиб кетишга ҳеч нима обкелмаганим эсимга тушиб, хижолат бўлдим.

- Зиёни йўқ! У кашнич уругига ўхшаш аллақандай саргиш доналарни қогозга тўкиб, халтачасини бўшатди-да, қогозга ўроглиқ дориларни ўша халтачага солди.
  - Мана! деди кўзимга қарамай.

Хужра эшиги ғийқилиб очилди.

- Лавлаги совуб қолади.
   деди Лазакат хола куйманиб.
   - Иссиғида еб ола қолинглар.
  - Одамни ўз холига қўясанми-йўқми, а?

Умрида ҳеч кимни сенсирамаган табибнинг шу ҳадар жаҳл билан ҳайҳиришидан чўчиб тушдим. Чамаси Лазакат хола ҳам чолидан ҳеч ҳачон бундай муомала эшитмаган бўлса керак, ҳайратдан оғзи очилиб ҳолди.

- Вой, сизга нима бўлди? - деди овози титраб.

Табиб «чиқиб кет» дегандек юзини ўгирди. Эшик ғийқиллаб ёпилиши билан халтачани менга узатди.

 Боғичини билагингиздан ўтказиб олсангиз, тўкилмайди.

Беихтиёр табиб айтганини қилдим. Богични билагимга илишим билан халтачанинг оғзи қисилиб, ёпилиб қолди. Эшик бандига энди қўл чўзган эдим, хўрсинди.

– Шошманг, – деди юзимга қарамай.

Турган жойимда тўхтаб қолдим.

- Очилбойни танирдингиз-а? - деди у тўсатдан.

Индамадим. Нима дей? Ҳа, танирдим. Совчи юборган. Йўқ, деганман. Шу билан нима бўпти! Шошма! Нимага «танийсиз» эмас, «танирдингиз» деяпти?!

– Қизим! – У ўтирган жойида секин бошини кўтарди. Сийрак соқоли титрар, хира чироқ нурида жиққа ёшга тўлган кўзлари ялтирарди. – Жон қизим, – деди инграб. – Ўғлимни сизга кўнгли бор

эди... Айрилиб қолдим! – У ўкириб юбормаслик учун кафти билан оғзини тўсди. – Беш кун бўлди, – деди йигидан нафаси қайтиб. – Сельсоветга чиқиб «қорахат» ини олиб келдим. Онаси бўлса ўглим отпускага келаркан, деб хурсанд бўлиб юрибди. Келса тўй қиламан дейди. – У титроқ қўллари билан кўз ёшини артди. Каловланиб ўрнидан турди. – Онаси эшитмасин! – деди овозини пасайтириб. – Эрта-индин ётиги билан ўзим тушунтираман. – Шундай деди-ю, ич-ичидан яна йиги бўгиб келди шекилли, кафти билан юзини чангаллади. – Олимжон, акам келса орденини тақаман деб суюниб юрибди.

Хамон эшик олдида ҳайкалдек қотиб турар, нима қилишни, нима дейишни билмасдим.

– Қизим! – У титраб кетаётган бармоқлари билан ўзининг оғзини тўсди. – Шундоқ доно боламдан жудо бўлдим, қизим!

У гандираклаб, ҳужра бурчагига, чакка сизиб узун-узун из қолдирган девор тагидаги эски қути олдига бориб чўккалади. Қутининг қулфи йўқ, аммо темир илгаги занглаб ёпишиб қолган экан. Табиб ингичка бармоқларини илгак остига тиқиб, чираниб силтаган эди, ҳалқа тарақлаб очилди. У қути қопқоғини кўтардида, узоқ тимирскиланди. Охири излаган нарсасини топди шекилли, қопқоқни ёпди. Чўккалаб ўтирганча бурилиб қаради. Энди у йиғламас, лекин синиқиб кетган юзида икки томчи ёш милтираб турарди.

– Мана, – деди мактаб болаларининг кўкиштоб муқовали дафтарини узатиб. – Олаверинг! Шу – сизники! Ўғлим айтгандики, – у овози титраб, юзини ўгирди, – айтгандики, агар ўлсам, шуни Робияга бериб қўясиз, деганди. Нима ёзилганини билмайман. Боламнинг тўйини кўрмадим. Ақалли, васиятини бажо келтирай...

Табибнинг титраб турган құлидан дафтарни қандай олганим, қандай қилиб ташқарига отилганим эсимда йуқ.

\* \* \*

Бир қўлимда мактаб болаларининг дафтари, бир қўлимнинг билагига илинган дори халтача билан ёнгоқзор орасига кирганимда қоронғи қуюқлашиб кетган, ҳамма ёқ жимжит эди. Фақат пастда Бўрижар бўгиқ шовуллайди, Кўтарма томонда итлар акиллагани қулоққа чалинади.

Табибнинг кўз ёшини шоша-пиша артганича айтган гапи қулоғимдан кетмасди. «Ўғлим сизни яхши кўрарди... Тўйини кўрмадим, ақалли васиятини бажо келтирай!..»

Нима бу? Хатми? Бултур Рашид абзининг мўрчасидан қайтаётганимизда қўлимга тутқазган хатнинг давомими?

Кучала чиқарган ёнғоқлар орасидан хира ой мўралади. Яйдоқроқ жойда тўхтаб, дафтарни очиб кўрдим. Ойнинг ўлимтик ёгдусида ҳеч нимани ўқий олмадим. Фақат билдимки, бу хат эмас, шеър экан! Текис, чиройли ҳуснихат билан ёзилган шеърлар! Биринчи варақдаги йирик-йирик ҳарфлар билан ёзилган сарлавҳа ойнинг хира ёругида ҳам аниқ кўриниб турарди: «Робияга».

Дафтарни ёпиб ёнгоқзор оралаб секин-секин юриб кетдим. Ёмгир остида кўзойнагини йилтиратганча, «яхши кўриш айб эмас-ку», деб аянчли жилмаяётган Очил ака тагин кўз ўнгимга келиб туриб олди. Тўгри, яхши кўриш айб эмас. Аммо менда нима гуноҳ?! Мен бошқа одамни яхши кўраман-ку! Дунё нимага шунақа? Биров сенга зор, сен бошқасига...

Хаёл билан кетаётган эканман, Алвасти кўприк томондан ғалати, ёввойи товуш эшитилди. Ҳали –

табибникига кетаётганимда Алвасти кўприкдан қилча ҳам қўрқмаганимга ўзим севинган эдим. Рост-да, нимасидан қўрқай! Жин-ажина, бало-баттарлар ҳаммаси уйдирма гап! Ўзимни қўлга олиб, дафтарни қаттиқроқ чангаллаганча уч-тўрт қадам юрган эдим, бояги мудҳиш товуш яна қайтарилди. Бу сафар аниқ эшитдим. Кўприк тагида биров инграяпти! Турган жойимда карахт бўлиб қолдим. Гарданим қотиб, тилим музлаб кетгандай бўлди. Кўприк тагига кириб кетаётган сувнинг муттасил шовуллаши орасида аллакимнинг қисқа аммо қаттиқ инграгани яна бир марта қулоғимга кирди. Чинқириб юборганимни бутун дунё эшитди,

деб ўйлаган эдим. Йўқ, овозим чиқмаган экан. Тор сўқмоқдан орқага - ёнгоқзор томонга қочмоқчи эдим, оёгим чалишиб йикилиб тушдим. Икки тирсагим заранг ерга қаттиқ урилди, лекин оғриқ сезмадим. Бир оёгим жарга тушиб кетаётганини пайқадиму жонҳолатда сўқмоқ четидаги наъматакка ёпишдим. Кафтимга тикан кириб жизиллатгани, биқинимда тағин санчиқ пайдо булганини элас-элас хис этиб, сўқмоққа чиқиб олдим. Билагимга чизимча билан илиб олган дори халта хамон кўлимда турар, Очил аканинг дафтари эса анча нарига – ўтлар устига отилиб кетган, варақлари очилиб, хира ойдинда оқариб кўринарди. Дафтарни шоша-пиша юлқиб олаётганимда бояги овоз яна такрорланди. Бироқ бу сафар «додлаётган» нарса одам эмас, от эканини тушундим. Кўнглимга илиқлик югурди. От кишнаяпти-ку! Бундан чиқди шу атрофда қандайдир от ўтлаб юрибди. Вахимам қурсин! Шунақа-ку, товуши нега кўприк остидан келади? Кўприк тагида от нима қилади?

Қаддимни ростлаб, синчиклаб қараган эдим, тик соҳилдан пишқириб-пишқириб чиқиб келаёт-ган отнинг қулоғи, кейин боши кўринди.

- Чу, ҳаром ўлгур! - деган овоз эшитилди.

Овоз танишдек эди. Зум ўтмай нўхтадан чангаллаган кўйи жар бўйидан сўқмоққа чиқиб келаётган одам ғира-шира кўринди. Энди орқага югурмоқчи бўлиб турганимда чақмоқ телпагидан таниб қолдим. Умар закунчи-ку! Қизиқ, кун исиб кетган-ку, ҳалиям чақмоқ телпагини бошидан ечмайди. Шуям мансаб бўптию! Майли, нима бўлгандаям бегона эмас-ку! От менинг шарпамни узоқдан сезиб таққа тўхтади. Бошини силкитиб, нолали кишнаб юборди.

- Э, ўла! Закунчи жиловни силтаб тортди. Сувлиқ шиқирлаб кетди. Ўша захоти менга кўзи тушди-да, тахдидли охангда бақирди.
  - Ким у бемахалда юрган?!
- Мен, дедим овозимдаги титроқни босишга уриниб. Табибникидан келяпман.

Закунчи от жиловини тутганча яқин келди. От ҳамон безовталаниб бошини силкитар, ер тепинар эди. Йўлим тўсилгани учун рўпарада туриб қолдим.

- Ҳа-а, сизми? Закунчи қоронғида яна бир марта синчиклаб кўриб олмоқчидай, бошдан-оёқ қараб чиқди. Далада кўринмай қолдингиз, ўртоқ тракторчи?
- Касал эдим, деди дори халтани кўрсатиб. Табибникидан дори олиб келяпман.
- Шундоқ денг... Қани, юринг-чи, отини етаклаганча устимга бостириб келаёттан Закунчидан четланай десам йўл тор, чап томон жар, ўнг томонда қалин наъматаклар чакалак бўлиб ётибди. Беихтиёр орқага тисарилар эканман, қўрқа-писа сўрадим:
  - Қаёққа?
- Тик оёқда туриб гаплашмайди-ку, одам. Шундан бошқа жой қуриб кетганми? У отнинг жило-

вини жаҳл билан силтади. – Юр-е, падарингга лаънат! Суғорса сув ичмайди, юрса тихирлик қилади. Нима жин теккан бунга!

Олдинма-кейин ортга қайтиб, дўнгликка етдик. Дўнглик орқасидаги сайҳон майдончада ҳали ўзим кўрган қизғалдоқлар ойнинг нимтатир нурида қорайиб қолганга ўхшарди.

– Шошманг, – деди у от жиловини наъматак шохига боглар экан. Қўлига тикан кирди шекилли, «иҳ» деб бармогини огзига тиқди. – Падарингга қусур... – Худди жони огригани учун мен айбдордек ўдагайлади. – Ўтирсангиз-чи! Нимага қаққайиб турибсиз!

Қизиқ, нимага энди ўтиришим керак экан?

– Закунни биласизми, ўртоқ тракторчи! – У қамчисини саланглатиб яқин келди. – Ўттиз бир кундан бери далага чиқмаяпсиз! Ҳарбий замон қонунига биноан ишга ўн бир минут кеч қолган одам қамалишини биласизми?

Юрагим шувиллаб кетди. Қаматса қаматадиям. Раис, закунчи... Қўлидан келади!

- Нима қилай? дедим эсанкираб. Трактор тепиб юборди. Бугун... энди кўчага чиқдим, ўзим...
- Справка қани? У шундай шиддат билан бошини силкитдики, ўткир кўзлари қоронғида ёниб кетгандай бўлди. Қоғоз борми?!
  - Қанақа қоғоз? Мен табибга кўрсатдим.
- Табиб эмиш... У майсалар устига чордана қуриб ўтирди. Қамчинни ерга ташлади. Табибингиз Комилми? Дўхтирмас, афирист у.

Баттар довдираб қолдим. Бир вақтлар Оқсоқолнинг бувамга айтган гапи эсимга тушди. «Шу... Комилбойнинг қўли дард кўрмасин-да... Нақд праписир Слонимнинг ўзи тан берган, қўлига ҳужжат бериб қўйибди...» Шуни айтгим келди-ю, энсам қотди.

- Ўтиринг, деди у ёнидан жой кўрсатиб.
   Гапингиз бўлса айтаверинг, дегандек анча берида тик туравердим.
- Замон оғир, синглим, тўсатдан овози майинлашди. Шимининг чўнтагига қўл суқиб, оппоқ, ялтироқ папирос қутисини олди. Папиросни бармоқлари билан эзгиларкан, қутини қирс этиб ёпди-да, ўтлар устига ташлади. Гугурт чертган эди, ҳорғин юзи, тартибли тарашланган мўйлови ярқ этиб кетди.
  - Ўтиринг, гап бор, деди менга қарамай.

Тўрт-беш қадам берига, ўтлар устига омонат чўк-каладим. Ўша куни Раъно келинойимникида кўрганларим лоп этиб хаёлимга келди-ю, бирдан дадил тортдим. Қўрққан олдин мушт кўтарар қиляпти бу Закунчи! Шошма! Нимага қўрқишим керак ундан?! Нимага қалтирашим керак?! Закунчи бўлса ўзига! Раис бўлса ўзига! Аввал ўзини тийиб олсин!

– Ўша куни... – дедим атайлаб овозимни баланд кўйиб. – Ўша куни трактор тепганида юролмай қолганим учун тоғамникига борувдим. – «Тоғамникига» деган сўзниям жўрттага таъкидлаб айтдим. – Тоғамникида ётиб қолмоқчийдим. Сиз борлигингизни билмабман. Билсам кирмасдим.

Закунчи қозир ярқ этиб қарайди, қўрқиб кетади, деб ўйлаган эдим. Қарамадиям, қўрқмадиям.

- Замон оғир... - деди ҳорғинлик билан. Папирос тутунини пуфлаб осмонга, хира ойга тикилиб қолди. - Қаҳрамонлик фақат урушда бўлмайди. Сиз билан менга ўхшаган колхозчиларнинг ҳар кунги меҳнатиям қаҳрамонлик. - У кўз қири билан мен томонга қараб қўйди. - Шунчалик касал бўпсиз, бир оғиз айтиш керак эди. Тошкентдан доктор чақирардик. Ҳар ким ўзини қуруққа обқочаверса, ғалабага қачон етамиз!

Наъматакка бойланган от ер тепиниб пишқирди. Закунчи ярқ этиб ўша томонга қаради-да, тағин папиросни сўрди. Юзи, мўйлови ёришиб кетди.

Нимадир деб узиб олгим, Раъно келинойимни эслатиб, писанд қилгим келарди!

– Кеча тоғамдан хат олдик! – дедим ёлғон гапириб. – Раъно яхши юрибдими деб сўрабдилар. Кеннойим тоғамни жудаям яхши кўради. Тоғам урушга кета-ётганида оёғига осилиб йиғлаган. Ўзим кўрганман.

Қизиқ, бу гап ҳам таъсир қилмади. Бир зум жим ўтирди-да, шошилмай ўрнидан туриб, от олдига борди. «Тек, жонивор тек», деб эркалаб, ёлини силаб қўйди-да, қайтиб келди. Хотиржамлик билан ёнимга ўтирди. Дик этиб туриб кетаётган эдим, билагимдан тутди. Сесканиб кетдим.

- Қўйворинг! дедим қўлимни тортиб.
- Қўрқманг, еб қўймайман. У жойимга ўтқиздию ўша захоти қўлини тортди. Папиросни ютоқиб сўрди, ўйчан кўзлари, чимирилган қоши, мўйлови яна ёришиб кетди.
- Гап бундай! деди бўғиқ овозда. Сиз менга ҳадеб ўша янгангизни гапираверманг. Янгангиз менга ҳеч киммас. Иш билан боргандим. Учида ҳип-ҳизил чўғ илиниб турган папирос ҳолдиғини ўт устига чертиб юборди, кескин ўгирилди. Сенга уйланаман! деди тўсатдан. Эртага совчи юбораман. Дума чол жон-жон дейди. Ҳамма гап сенда ҳолган! Тушундингми?

«Нима? Нима деяпти бу алвасти?!»

Юрагим гурсиллаб урганча, ўрнимдан сапчиб турганимни биламан, ўша ондаёқ қўлимдан шундай куч билан силтаб тортдики, ўнг биқинимга найза санчилгандек инграган кўйи ёнбошимга ағдарилиб тушдим. Димогимга қўланса ҳид урилди. Папирос аралаш ароқ ҳиди. Негадир Раъно

келинойимнинг хонтахтасида турган ичкилик шишаси, Закунчининг чақмоқ телпаги, бўйнини силаганча икки букилиб чирқиллаётган Олимжон кўз ўнгимга келди.

Тикандек мўйлови юзимга санчилиши билан биқинимнинг огриги ҳам, қўрқув ҳам аллақаёққа гойиб бўлди.

- Қоч! дедим чинқириб. Йўқол, ифлос!
- Робия! У ҳансираб юз-кўзимдан ўпа бошлади. Ҳар қадамимда мингта қиз! Сенга харидор бўлганимга суюнмайсанми, тентак!

Жирканиб кетдим. Димогидан келаётган тамаки аралаш ичкилик ҳиди ҳам, ҳансираши ҳам, муйлови ҳам ғазабимни келтирар, бутун вужудим ҳалтирар эди. Дафтар тутган ҳулим билан юзига тарсакиладим. Бошидан чаҳмоҳ телпаги учиб кетди. Аммо у ҳуйиб юбормас, кучли ҳуллари билан маҳкам ҳучоҳлаб олган эди.

– Вой овсар! – деди энтикиб. – Мен сени зарга белаб қўяман, билдингми?! Кимсан, раиснинг эрка хотини бўласан, гўнг чангаллаб юрмайсан, тентак! Керак бўлса медаль олиб бераман, пошшонинг хотинидай малика бўлиб юрасан, тентак!

Ха! Раъно келинойим бекорга табелчи бўлмаган эканда! Эрининг кўзига чўп солиш эвазига! Ўзини сотиш эвазига!

Вокзалда юзимга термилганча «кутасан-а, менга кашта тикиб қўясан-а», деган Кимсан акам ярқ этиб кўз ўнгимга келдию... шунча куч қаёқдан пайдо бўлганини билмайман. Тиззамни букиб, дуч келган жойига тепдим. У бирдан бўшашиб ёнбошлаб қолди.

– Қанжиқ! – деди инграб. – Падарингга лаънат! Нега бунча осмондасан?

Югуриб борарканман, ҳамон билагимда дори халтача, бир ҳўлимда дафтар борлигини ҳис этиб

турардим. От боғланган наъматак ёнидан сўқмоққа отилдим. Қансираб нафас олар, биқиним санчар эди. Оғриқ шу қадар кучайиб кетдики, жар бўйида чўккалаганча ёнбошимни чангаллаб қолдим. Ўша сонияда бошим устида тағин ҳансираш эшитилди.

- Ё меники бўласан, ё жарга тепиб юбораман! Тағин димогимга қўланса ҳид урилди, юзимга тикандек мўйлови қадалди.
- Бахтинг очилганига хурсанд бўлсанг-чи! деди у ҳарсиллаб.

Дафтар аралаш тарсакиламоқчи эдим, у қўлимни қайирди-да, дафтарни юлқиб, жарга улоқтирди.

Бўлдими, – деди қоронғида хунук ишшайиб. –
 Келишдикми, энди... Овсар-ей!

Биқинимнинг оғриғи яна ғойиб бўлди.

Қўлимни қўйиб юборганидан фойдаланиб, сапчиб турдим-да, Алвасти кўприк томонга чопдим. Энди Раъно келинойиму тогамни ҳам, ҳатто Кимсан акамни ҳам ўйламас, шу касофатдан қутулсам бўлди, деган нафратли хаёл олдинга – темир йўл томонга ундар эди. Кўприкка чиқиб олсам бас. Жуда бўлмаса разъездга қочиб бораман. Чироқ бор. Одамлар бор... Биқинимнинг санчишига ҳам, нафасим қайтиб кетаёттанига ҳам парво қилмасдим.

Темир йўлнинг шағал кўтармасига етганда бутунлай силлам қуриди. Эмаклаб чиқиб боряпман, шағаллар шовуллаб пастга тўкилади. Худди тушида юролмай қолган одамга ўхшаб, ўрнимдан силжишга қийналаман.

Бир маҳал яна ўша омбирдек қўллар иккала оёғимдан маҳкам қисди. Ўгирилиб қарасам чўккалаб олганча оёғимдан чангаллаб ҳансираб турибди. Хира, иркит ой нурида кўзлари ваҳшат билан ёнар, тишлари ғижирлар, мўйлови қийшайиб кетганга ўхшарди.

– Гап шу! – деди хириллаб. – Тарозига солма ўзингни! Ё менга хотин бўласан, ё ўласан!

Қўлимга қаёқдан тош илинганини билмайман. Пиёладек думалоқ тош!

- Қоч! дедим титраб. Қўйвор!
- У қилт этмади. Негадир ҳиҳиллаб кулди.
- Чертиб кўр-чи, душманнинг илонваччаси! Уругаймогинг билан қуритиб юбораман!

Лоп этиб дадам кўз ўнгимга келди. Қўй оғзидан чўп олмаган, одамларга маърифат тарқатишни ўйлаган, ҳамиша озода кийиниб юрадиган, майиздеккина мулойим дадам... Ўша кечаси сўхтаси совуқ кимсалар сўроқлаб келганида ҳам ўзини хотиржам тутган, «ўзингни асра, қизим», деган дадам... Тупроқли кўча, узоқлаб кетаётган машина чироқлари, бошимга эгилиб елкамни силаган Кимсан акам... Дадамни шулар қаматди! Шунинг тоғаси қаматди! Анави сўгалли рўдаполар қаматди! Овозим борича чинқирдим:

- Қўйвор! Ўлдираман!
- Авлод-аждодинг билан турмада чиритаман, унсурнинг боласи! деди у вишиллаб. Мен кимману сен кимсан?

Кўз ўнгим қоронғилашиб кетди. Кейин нима қилганимни билмай қолдим. Шуниси эсимдаки, қўлимдаги тошни кучим борича отдим. Ўша заҳоти қулоғимга даҳшатли чинқириқ кирди.

– Единг, илон! Оҳҳ!

Оёғимни омбирдек қисган қўллар бир зумда бўшашди. Кейинги лаҳзада Закунчинниг пешонасини чангаллаган кўйи оҳ чекиб ёнбошига йиқилганини кўрдиму даҳшатдан додлаб юбордим.

Шағал устида ўтирган кўйи оёқ-қўлимни типирлатиб орқага-юқорига талпинардим. Харчанд уринмай ўрнимдан силжий олмасдим. Шағаллар

шовуллаб пастга тўкилар, бошини чангаллаганча гужанак бўлиб тўлғаниб ётган Закунчи устига ёгилар эди.

Охири эмаклаб кетдим. Нихоят қўлларим аввал шпалларга, кейин темир изларга ёпишди. Қизиқ, негадир темир йўлнинг илиқ излари титраб турар эди. Билмадим, балки ўзим титраганим учун шунақа туюлгандир. Бир маҳал кўзимга ёрқин чироқ урилди. Паровоз гупиллагани, чинқироқ гудок эшитилди. Яқинлашиб қолган поездни энди кўрдим. Паровоз фарёд солиб яна гудок чалди. Изларни чангаллаб олган қўлимни тортиб, ўзимни пастга ташлаган заҳотим ғилдираклар кўприкка урилиб қаттиқ гулдиради. Димоғимга самовар дудининг ҳиди урилди. Анчагача қулоқни қоматга келтирадиган таҳа-туқ, таҳа-туқ садолари эшитилиб турди-да, ниҳоят ҳамма ёқ тинчиб қолди. Бўрижарнинг шовуллаши аниҳроқ эшитила бошлади.

Қўрқа-писа кўзимни очиб қарасам, Закунчи ҳамон бошини чангаллаб гужанак бўлиб ётибди. Қимир этмайди.

Одам ўлдирдим! Мен одам ўлдирдим! Шу хаёл миямга михдай қоқилдию дод солганча темир йўл изларидан қоқилиб-суқилиб ўтиб, бериги томонга, хира ойдинда шовуллаб турган, қурбақалар тинимсиз вақиллаётган қамишзорга ўзимни урдим. Шўрхок сув билчиллаб ётган тўқай ичидан югуриб борарканман, чап оёгим ерга муздай тегаётганини пайқадим. Шундагина бир пой калишим тушиб қолгани хаёлимга келди. Аммо қачон, қаерда тушириб қолдирганимни билмасдим. Биқинимнинг огриги сезилмас, лекин негадир чап қўлим борган сайин огирлашиб кетаётгандек бўларди. Кейин билсам, богичи билан билагимга илиб қўйилган дори халта ҳалиям осилиб турган экан.

...Уйга қандай етиб келганим эсимда йўқ. Деразада хира чироқ ёғдуси кўринар, қия эшикдан айвонга бир парча сарғиш нур сочилиб турарди.

Кавшандозда бир пой калишимни ечаётганимда мункиб кетдим. Эски намат устига гурсиллаб йиқилдим. Икки қўллаб юзимни чангаллаганча ўкраб юбордим. Негадир кўнглим ағдарилар, ҳушим учиб бораётганини ғира-шира сезардим.

Ойимнинг дахшат тўла овози узоқдан эшитилгандек бўлди.

- Ҳой, тезроқ келинг! Кўзингни оч, қизим.

Юзимга муздай сув сачраб, сескандим. Обдаста тутиб турган бобом ховликиб сўради:

- Нима бўлди? Гапирсанг-чи!
- Одам... дедим қалтираб, у ёғини айтолмадим.
- Нима? Бобом билан ойим баравар бошимга эгилишди.
- Одам ўлдирдим... Ҳиқиллаб йиғлаб юбордим.
   Қўрқиб кетяпман... ойи! Мен одам ўлдирдим! Алвасти кўприкда!
- Ким? Қанақа одам! Бобом мени алаҳлаяпти деб ўйлади чоғи, обдастадан кафтига сув қуйиб яна юзимга сепди. Қачон? Қанақа одам? Шундай деди-ю жавобимни кутмай обдастани улоқтирганча кўчага отилди.
- Нима деяпсан, жон болам, куйган онангни кўрқитиб нима қиласан? Ойим бошидан рўмолини ечиб, ҳўл бўлиб кетган юзимни артди. Бағрига босди. Ким? Танидингми ўзи?

Тўсатдан ҳушим жойига келгандек бўлди, нима ҳиламан айтиб? Нима кераги бор?

- Билмадим, дедим бош чайқаб. Танимайман.
- Кўзингга кўрингандир, болам? Ойим енгил тортиб бошимни силади. Инс-жинслар дап қилгандир. Ажаб қипсан, энди ёпишмайдиган бўлади.

Майли, пешонамда борини кўрдим! Нима бўлса бўлар! Шу хаёлга боришим билан бошини чангаллаб гужанак бўлиб ётган Закунчи яна кўз олдимга келди. Ичимда титроқ турди. «Одам ўлдирдим! Мен-а? Энди нима бўлади?»

- ...Бобом ҳарсиллаб эшикдан кириб келди. Ранги ўчиб терлаб кетганди.
- Ҳеч ким йўқ-ку, қизим! деди энтикиб. Ваҳиманг қурсин, Кўтармагача бориб кепман-а? У ойим томонга қараб қўйди. Шу Алвасти кўприк хосиятсизда ўзи!
- Биларкансиз-ку! Ойим жаҳл билан шанғиллади. – Робия кеч қоп кетди, йўл-юзда болага алвасти дап қилиб юрмасин, десам, ўтирдиз, ялпайиб! Бора қолсангиз бутингиз бичилиб қолармиди!
- Қўй, қизим! Бобом пешонамни силади. Ётиб, дамингни ол.

# ЎН ТЎҚҚИЗИНЧИ БОБ

# УМАР ЗАКУНЧИ ХИКОЯСИ

### Жар ёқасидаги гул

Менга нима бўлди? Қаерда ётибман ўзи? Нимага ҳамма ёқ зимистон? Бошим сирқиллаяптими? Пешонамдан тер оқяптими? Ҳаво салқин шекилли! Ие, қон ҳиди-ку! Қон! Бошим қонаяпти-ку!

Э-ҳа! Бўлди! Анави илонвачча урди. Тош билан урди. Мана, мана шу еримга! Оҳҳ! Ана, қон оқяпти... Мени урдими? Мени-я?! Эсини таниб ўз отасидан бир тарсаки емаган одамни-я! Келиб-келиб аллақандай жинқарчадан келтак едимми? Мен-а? Ҳамма кўрса бир чақирим наридан қочадиган одамни урдими? Отининг кишнашини эшитса салом бериб чиқадиган Умар Хўжаевни-я!

Шошма, отим қани? Қоракўз қани?

- Қоракўз!

Оббо! Анча йўл-ку! Наъматакка богловдим-а? Ана, ер тепиниб кишнаяпти.

Раҳмат, биродар! Ҳозир, ҳозир бораман олдингга! Оёгим мунча чалишади. Шунаҳа ёмон урдими-а? Вой мегажин-ей! Шошмай тур ҳали! Уй ичинг билан йўҳ ҳилиб юбормасам, отамнинг боласимасман!

Қанча ётдим ўзи! Биров кўрмадимикин! Ҳех! Кимсан Умар Хўжаев қонга беланиб ётса! Тағин нимага денг?.. Дўстдан кўп душман. Ҳеч ким кўрмадимикин? Йўқ! Бу гадойтопмас жойда ким ҳам юрарди бемаҳалда? Ҳеч ҳанча ваҳт ўтмабди-ку! Боя ҳам ой тепада эди. Мунча хунук бу? Куйдирган калладек иршайишини ҳара! Худди масҳара ҳилаётгандек. Ой ҳам шунаҳа совуҳ бўладими?

- Бўлди, Қоракўз, тек, биродар, тек! Ҳа, қон ҳиди келяптими? Зиёни йўқ, оғайни, ҳозир уйга борамиз. Ҳаммаси яхши бўлади. Бир шунақа бўпқолди-да, биродар...
- Э, минг лаънат! Мунча тикани кўп бунинг! От боглашга бошқа дарахт қуриб кетганмиди. Нимага ҳовлиқдим? Ана, нарида ёнгоқ ҳам бор экан-ку, ўшанга богласам ўлармидим... Мана, бўлди, биродар, бўлди. Жим, бирпас тинч тургин, Қоракўз! Ҳозир... йўлни ўзинг биласан-ку, огайни, Шошма! Қамчи қани? Ие, телпак ҳам йўқ-ку. Э, бўлди. Боя анави илонвачча типирчилаганда тушиб кетувди, чоги. Ҳозир... Қани, озгина юрайлик-чи! Тишш, секин, секин, ўзингни бос, Қоракўз! Мана, ётган экан-ку, ие, ана, қамчиям топилди. Ҳа, иш деган бундоқ бўпти! О! Қанийди ҳозир ёнимда бўлса, итдай вангиллатиб қамчилардим! Қовургаларини мажақлаб ташлардим. Қўрқма, огайни, сени ай-

таётганим йўқ. Анави унсурни! Оббо, ҳамма ёқ пайҳон бўп кетибди-ку! Худди иккита полвон бир кун эринмай кураш тушгандек! Вой ифлос-ей! Ўзи читтакдай бўлсаям хирсдай кучли эканми?

Хали нима дедим! «Уйланаман» дедимми? Шунга-я! Халқ душманининг қизига-я! Биографиямга доғ туширадиган анойи эканман-да!

- Шошма, Қоракўз, шошма... Дрр! Хоп! Ана бўлди. Кетдик.
- Чу, биродар.

Хунук иш бўлди. Ҳозир анави жинқарча уйига бориб дод устига дод солади. Дума пакана Оқсоқолни бошлаб уйимга келади. Шу етмай турувди ўзи!

– Чу, жонивор, тезроқ!

Нимага келдим ўзи? Нима палакат хайдади? Негаям чикиб колди оёгим остидан? Ўзим-ку, анави, қўймижоз табибнинг итваччасини амаллаб тинчитган эдим. Бунисига ёпишиб бало бормиди! Юрувди-ку, бир ойдан бери думини қисиб! Нима қилай? Қўймади-ку, анави Раъно? Кун ора эшигимга келади. «Уйланинг», дейди, йиглайди-сиқтайди. Охири, нияти амалга ошмаслигига ақли етганидан кейин бошқача ашула айтишга тушди. Онаси ўлишидан уч кун аввал хам ўша гапни айтди. «Недурки Робияхон, оғир ётганмиш, ўша куни трактор тепиб юборгани учун уйига етолмай уникига борганмиш. Энди мен бориб, қолидан хабар олишим керакмиш». Ким билсин, бу гапни пакана Дума ўргатганми, қора мўнди эгачисими? Нима деб бораман? Ялинаманми? Биратўла тилини қисиқ қилиб қүйсам Раънонинг машмашасидан ҳам қутуларман, девдим-да! Йўқ, бу гап аввал хаёлимда йўқ эди. Ўзи оёгим тагидан чиқиб қолганидан кейин тўсатдан... Бу илонвачча шунчалик захар солишини туш кўрибманми? Бўлмаса,

орқамда эргашиб юрган келинчаклар қанча! Қизлар-чи? Соли сўпок очиқ айтмаса ҳам тўнгичини менга атаганини неча марта имо-ишора қилди. Ўн олти яшар ўша қиздан ҳам яхши бўптими Думанинг асрандиси!

Хаммасига Сўпоқ сабабчи. Шуникига кирмасам, ичмасдим. Ичмасам... Бугун яна ўша гапни бошлади-ку! «Бу дунёда одам ўзиниям ўйлаши керак, улуг одамсиз, ўйнаб-кулиб қолинг... Пас десангиз хаммаси товукдек ётиб беради...» Падарингга қусур, Сўпоқ! «Бўрижарда сув кўпайиб кетибди», деган гапниям шу айтди. Сув кўтарилса, иш пачава! Тўқайдаги карамни ювиб кетади. Ош дам егунча бориб кела қолай дегандим. Рўпарамдан чиқиб қолганини кўрмайсизми! Негаям ичдим? Эркак киши бунақа пайтда итмижоз бўлиб кетади, ўзи. Қўқондан кетаётганимда акам ҳам шунақа деган эди. «Мучалинг – ит, ўзинг хам итга ўхшайсан...» Ўргилдим сендан! Сиз одам бўлдингизу биз ит бўлдикми энди! Нимага шу топда эсимга тушди! Минг йил кўрмасам кўнглим бирдек-ку!

Нима, ит бўлиб, дуч келганга илиқдимми? Шунча имкониятимга қарамай жим юрувдим-ку! Қайси шайтон йўлдан урди? Аҳмоқман! ўирт аҳмоқман! Тоғам донишманд дейман-ку. Айтарди-я! «Одамнинг нафси иккита бўлади. У нафсга берилган ҳам охир-оқибат хор бўлади, бу нафсга берилган ҳам...» Рост экан. Мен-ку, нафсга берилмадим. Нима, бошқалардан ортиқ еб-ичяпманми? Раис номим бору турмушим ит ётиш мирза туриш. Тонг отмасидан бир пиёла чойсиз далага югураман. Оилам бўлмаса, қўша-қўша гиламим, атлас-адрас кўрпа-тўшагим бўлмаса! Битта уйимниям колхозчилар қуриб берган! Эртага раисликдан тушсам, кетимга биттани тепиб, уйданам ҳайдашади. Бу қа-

нақа турмуш! Балки ҳали анавинга «уйланаман» деганимда ўзим ҳам билмай, юрагимнинг бир бурчида ётган гапни айтиб юборгандирман. Балки мен ҳам оилам, бола-чаҳам бўлишини хоҳлаётгандирман.

Ўруғ дунёга келиб, нима рўшнолик кўрдим ўзи? Кўнгилсиз хотиннинг ғиди-бидилари-ю, ўзинг юрист бўла туриб, қонунни бузяпсан, деб айюҳаннос солишими! Сил акамнинг бемаъни насиҳатлари-ю янгамнинг инсофга чақиришларими? Қочоқ одамдек поездда осилиб келганиму адвокатуранинг каталакдек ҳужрасида бировларнинг жонга тегадиган йиғи-сиғисига қулоқ солганимми! Тоғамнинг елиб-югуришлари-ю раис бўлганимдан кейин суткасига уч соат ухлаб, жон-жаҳдим билан ишга киришганимми?

Ҳа, айтмоқчи, Раъно бор-ку! Шу билан озми-кўпми хушнуд дамларни бошимдан кечирдим-ку. Хушнуд дамлар эмиш! Тфу, падарига лаънат! Нимаси хушнуд! Тошкентга – беш-олти марта ресторанга боргандаям ўгри ҳаккадек аланг-жаланг бўлиб ўтирганим, ишқилиб таниш одам учраб қолмасин, деб юрагим така-пука бўлганими? Шуми, менинг бахтиёр кунларим? Райком сезиб қолмасин, тоғам билиб қолмасин деб, тезагини бекитган мушукдек пусиб юрганимми? Шуми бошимдан кечирган қувончли соатлар?!

Асли ҳаммасига шу хотин сабабчи! Йўқ, айб ўзимда! Тоғам айтган нафснинг биттасини тийдиму иккинчисини тиёлмадим.

Хўш, нима бўпти? Менам эркакман, ахир! Мен фақат биттасини биламан. Мени тергайдиганлар аввал ўзини эплаб олсин. Қар бирининг ўнтадан ўйнаши бор. Қолаверса, ғунажин кўзини сузмаса, буқача ипини узмайди. Мана, илонваччами – баломи, ўзини сақлаб қолиш қўлидан келди-ку! Анави

киши бўлса, янги хунар чиқардилар! Бошлари айланаётганмиш. Кўнгиллари гилвата тусаб қопти. Қусаёттан эмишлар. Менга деса қон қусмайсанми! Хамиртуриш ичасанми, бало қиласанми, нима бўлгандаям ўзинг эпла! Жудаям тихирлик қилаверса, Тошкентга — дўхтирга жўнатаман. Шундоқ қилмоқчи бўлиб турганимда онаси ўлиб қолди. Ким билсин, ҳали яна нима гап топиб келаркин! Биламан, у қилиб бу қилиб, тегиб олмоқчи! Аҳмоғинг ҳаммомга кетган! Сенга уйланаманми? Сенга-я! Бировнинг қўйнида ётган жувонга-я!

– Чу, Қоракўз, яқин қолдик! Тезроқ биродар, тезроқ!

Аввал-ку, ҳаммаси хамирдан қил суғургандек осон кўчган эди. Бу сафар чатоқ бўлади. Абдураҳмонов тиш қайраб юрибди ўзи! Шу гап қулоғига етиши билан штрафной батальонга жўнатади. Йў-ўқ! Кечирасиз! Хотин деб ўлиб кетадиган анойи йўқ! Мендан яхши раис тополмайсиз! Планни ошириб бажариш ўз йўлига. Сут солиғими, гўшт, жун, дон солиғими – ошириб бажарган ким? Заёмни ҳаммадан кўп сотиб олган колхоз қайси? Яқинда ҳимоя фондига ёрдам керак, сизлар тўплаган маблағга замбарак ясалади, деган гап чиққанида ҳаммадан кўп тиллаю кумуш тўплаб берган хўжалик раиси ким? Хўжаев эмасми?

Бу нокаслар жонини берса берадики, молини кўзи қиймайди. Эргаш сельсовет билан Исмоил мелисани ёнимга олиб, уйма-уй юрганим бир пул бўлди. Битта-яримта валломатдан бошқа ҳаммаси «ҳеч вақомиз қолмади», деб безрайиб тураверди. Ўшанда орага Оқсоқол тушмаса райком олдида расво бўлардим. Оқсоқол одамларни клубга тўплаб, ваъзхонлик қилди. Қизиқ, чол қўлини пахса

қилиб, шунақанги гаплар айтдики, ҳаммаси қулоғимга михланиб қолди.

«Биламан, ўлдим деганда хар бирингда сандик бурчагига бекитиб қўйган битта билагузук, бир жуфт зирак бор. Яхши ният билан бирини қизингга, бирини келинингга атаб қўйибсан. Аммо ўнг қулоқ, чап қулоғинг билан эшитиб қўй. Бугун ўша савил қолгур тилла тақинчоғингни олиб чиқмасанг, эртага қизингни узатолмайсан. Нега деганда қизингни унашиб қўйган қайлиғи немис танкининг тагида қолади. Келин туширолмайсан. Нега деганда ўғлинг душманнинг ўқига учади. Ана, унда кўрасан, томошани! Танангга ўйлаб кўр, халойиқ. Харна битта ортикча замбарак ясаб душманни қирганинг фойдамасми... Жон омон булса мол топилади. Боланг сор-саломат келса туйни такинчоқсиз ҳам қилаверасан. Омади гап шу: белимда белбоғим бор деганинг обчиқавер лаш-лушингни!»

Ажаб, ўша куни кечқурун идорадаги чогроқ қути олтин-кумуш тақинчоқларга тўлиб кетди.

Биламан. Оқсоқол, бу ишни азбаройи менга ёрдам бериш учун қилмайди. Райком олдида ўзини кўрсатгиси келди. Халиям раис бўлишдан умидини узмаган. Айниқса, Абдураҳмонов секретарь бўлганидан бери ғимиллаб қолди. Ажаб қилдим: олтин тўла кутини Дом-деҳқонга ўз кўлим билан обориб топширдим. Санаб, битта-битталаб! Раисликни сенга қўшқўллаб топшириб қўядиган аҳмоқ бор экан-да, сассиқ чол! Амал— асов отдек гап. Қўлингдан бир чиқардингми, икки дунёдаям етолмайсан. От-ку, охир-оқибат эгасига қайтиб келса— келар. Лекин амал қайтмайди. Уни аллақачон бошқаси эгарлаб миниб олган бўлади. Мабодо сени амал отидан туширганлар бир эмас, минг

марта ноҳақ бўлганида ҳам қайтиб ўша отни минишинга йўл қўймайди. Ўзи отдан тушишини ўйлаб қўрқади. Шунақа, ўртоқ, Оқсоқол! Чиранавер! Қайтага район олдида менинг обрўйимни яна бир қарич кўтардинг! Маладес! Аммо бугунги иш... Аҳмоқман! Бориб турган аҳмоқ! Тоғамнинг гапи рост. «Косага ўн ҳовуч сув солсанг индамай туради-ю, бир томчи ортиқ томса тошиб кетади!» Тўгри айтган экан. Шу бугунги томчи ортиқча бўлмаса эди. Бошим тағин сирқиллаяпти. Яна қонадими, нима бало? Йўқ, ҳаммаси жойида.

- Чу, Қоракўз, ана, идорага етдик.

Ким у тол панасида арвохдек сўрайиб турган?

- Кимсан, хой?

Ие, отангни гўрига!.. Соқов-ку! Икки букилиб таъзим қилишига ўлайми! Жиловга нега ёпишади?

- Қуйвор! Отхонагамас! Қоракузни уйга обкетаман! Нима? Падарингта қусур, сениям, Супоқниям! Ош еяётгандек қулини оғзига олиб бориб имо қилишини қара!
- Йўқол, ош-пошинг билан! Менга қара, ҳей! Сўпоққа айтиб қўй. Тугун кўтариб уйимга борса, бутини йириб ташлайман! Тушундингми? Айтмасанг гунг тилингни суғуриб оламан.

Нимага илжаяди бу соқов? Ё бир нимани сездими? Юзим қонмикин! Қоронғи-ку! Кўриб ўтирибдими?

– Қоч-е, итдан тарқаган!

Ха, қўрқмас эканман-а! Бир қамчилик ҳолинг бор экан-ку. Зипиллаб чопишини қара! Соқов бўлсаям балога ақли етади. Ҳозир боради-да, ҳамма гапни тили бир қарич одамдан яхшироқ тушунтиради Сўпоққа.

– Дрр! Мана, келдик, Қоракўз! Шошма, дарвозани очайлик. Бўлдими? Чанқадингми? Қара, Қоплон ҳам чанқабди. Ҳозир... Чироқни ёқайлик.

Ў-ў-ў! Минг лаънат! Юзим қоп-қора қон-ку! Ихх! Қанжиқ! Яна қонаяптими? Ювмасам бўлмасди-да! Йўқ, яра чуқурмас. Аксига олиб докаям йўқ. Майли, қийиқча билан боғлаймиз. Қайтага яхши бўлади. Қон юқи билинмайди. Мана, бўлди. Ҳаммаси законний!

Минг лаънат шунақа турмушга! Бир бурда қотган нон ҳам қолмабди! Ўзим оч, от оч, ит оч! Қанақа ҳаёт бу! Ким айтади сени раис деб? Ҳар раислар борки, кун ора базми жамшид қилади. Замон оғир, уруш кетяпти, аммо маишатни ўрнига қўяди. Мушугини пишт дейдиган одам йўқ. Ишниям эплайди, маишатниям. Сен бўлсанг ичган юз грамм арогингга шунча машмаша орттирдинг! Йўқ, сен маишатни эплолмайсан. Ишдан бошинг чиқмайди. Сўфи таҳорат қилмасдан эшикмаэшик югур, чопиқни текшир, сувни текшир, омборга чоп... Баттар бўл! Шунга туғилгансан ўзи!..

Дарвоза тақиллаяптими? Ана, ит, акиллади! Отангни гўрига... Дума келган! Демак анави итвачча сочини юлиб, пакана Думага арзи дод килган! Биламан, Дума бир ўзи келишга хадди сиғмайди. Оқсоқолни бошлаб келган. Яхши! Гаплашиб қўямиз! Қайтаға яхши бўлади. Анави илонвачча уруш даври қонунини бузди. Арзимаган нарсани баҳона қилиб, тракторни далага ташлаб кетди. Ишга ўн бир минут кеч қолғанлар кесилиб кетаётған бир пайтда роппа-роса ўттиз бир кун далага чиқмади. Қўлида хужжати йўқ. Демак, МТСни алдади, колхозни алдади, давлатнинг кўзига чўп солди. Бугун йўлда кўриб қолиб, нега ишга чиқмаяпсан, десам, тош отиб, бошимни ёрди! Хизмат бурчини бажараётган раиснинг ҳаётига суиҳасд ҳилди. Тамом, Исмоил мелисага хабар қиламан, хозироқ оёгини ерга тегизмай районга олиб кетади. Жуда соз-да!

Бир йўла Оқсоқол билан Думаниям жойи ростонига тиқиб юбораман! Рахбар шахсга туҳмат қилгани учун! Жиноят кодексида статья бор...

### - Ким у?

Оббо? Сен етмай турувдинг ўзи! Кеча онасининг йигирмасига кетувди-ку. Колхоз ҳисобидан бир қоп ун, бир пуд гуруч ажратиб берувдим-ку. Дарров ҳайтибди-да.

– Яхши ўтказиб олдингларми, Раъно? Қўлингдаги нима? Ош? Маъраканинг ошими! Қорним таталаб кетаётганди. Қаёқдан билдинг? А? Э, ҳеч гап йўқ. Йиқилиб тушдим.

- Неча марта айтдим, Раъно! Биламан, мехрибонсан, ақллисан. Аммо тушунсанг-чи. Одамлар оёги биланмас, огзи билан юради хозир! Нима кераги бор эди?! Кани, юр эшикни ил... Яна сўрайсан-а? Хеч нима бўлгани йўқ. Кўтармага борувдим. Карамни экиб бўлишгунча тепасида турдим. Кеч қопкетдим. Ёнғоқзордан ўтаётганимда... Анави табибнинг қўргони ёнидаги ёнгоқзор бор-ку, ўшандан ўтаётганимда от хуркиб кетди. Бошим шохга урилиб, йикилиб тушдим. Яхшиям оёгимни узангидан чиқариб олганим. Бўлмаса суягимгача қийма-қийма бўлиб кетарди... Нега йиғлайсан, жоним? Қўрқма, тентак. Оёқ-қўлим бус-бутун! Нима? Вой, тентак-ей! Бели синган одам соғ қоладими, овсар! Мана, қара, мана! Кўнглинг жойига тушдими энди! Худо сени бахтингга Умар акангни бир қайтиб берди, Раъно! Оҳ-оҳ-оҳ! Бунақа мазали ошни умримда емаганман! Йўқ, тегма! Қони тўхтаб қолди. Оғриётгани йўқ деяпман-ку! Хавотир олмагин... Бўпти, кўйлагимни ечиб бераман, хали ювиб қўясан. Жиндай қон теккан. Нима қипти! Ҳа, яна

бошландими?! Арт-э! Кўзингни ёшини оқизаверасанми? Ўз ғамим ўзимга етмайдими? Нима? Минг лаънат! Иштаханиям расво қилдинг. Ўзим эрта пешиндан буён туз тотмагандим. Менга қара, вей! Қўйнимга кираётганингда туғиб бераман деганмидинг?! Бўпти-да! Нима қиласан гапни айлантириб!.. Бўлди, жоним, бўлди. Жонингдан аканг, бас қил. Бўлдими? Маладес! Раъно! Тушунсанг-чи, ахир. Ўзинг шарманда бўласан - бир! Мени шарманда қиласан - икки! Ростини айт: мени шунчалик ёмон кўрасанми? Передовойга юбориб ўлдириб қутулмоқчимисан?! Унақа бўлса майли, туғавер! Ана, тағин бошланди. Йиғламагинда, тентак. Йигирмани яхши ўтказиб олдингларми ишкилиб? Тўгри, боришим керак эди. Нима қилай? Иш кўплигини биласан-ку! Аммо ажойиб хотин эдиларда, ўзи. Оббо, тагинми? Қўй энди, шуям проблема бўптими? Сўпокнинг хотинига бир оғиз шипшитсанг... Дунёнинг тагига ўт қўядиган хотин. Аммо зинҳор мени айта кўрма... Ие, секин! Бўлди-е! Биров деразадан қулоқ солиб турган бўлса нима қиламиз! Э, ўчир! Ўргилдим оби-дийдангдан! Бўлди, Раъно, бўлди. Хўп, сен нима десанг шу. Бўпти, шахарга обораман, таниш дўхтир бор. Кўнглинг жойига тушдими? Жоним! Ёш болага ўхшайсан-а! Шунга шунчаликми? Йўқ, шошма, кўйлакни ювиш қочмас. Чироқни ўчир. Бирпас олдимда ўтир. Соғиниб кетдим, жоним!..

...Ё тавба! Хотин зоти ғирт лақма бўлади-да! Ана, ошхонада тараша ёряпти. Самоварда сув иситади, кўйлак-шимимни ювади... Ҳалиям бошим сирқиллаяпти. Ифлос-ей! Шундан калтак едимми-а? Ҳеч кимга гапирмагани аниқ. Оғзидан гулласа Оқсоқол билан Дума аллақачон узун-қисқа бўлиб кириб келарди. Аммо иккаласиниям тузлар-

дим! Майли, қораси ўчсин! Ҳарқалай уйда Раъно бор. Бари бир, ўша унсурваччадан қасдимни олмай қўймайман. Раисга, мендак одамга қўл кўтариш қанақа бўлишини кўриб қўйсин! Шунақанги додини берайки, онасидан туғилганига минг арава пушаймон есин!

### ЙИГИРМАНЧИ БОБ

### «ҚОРА АММА» ХИКОЯСИ

### 1. Дума чол, Дума чол...

Кўча эшик томонда арава ғийқиллади. Қулоғимга шумтака болаларнинг қий-чуви киргандек бўлди:

> Дума чол, Дума чол, Лавлагига «шарбат» сол...

Йўқ, болалар ҳозир унақа демайди. Чолимнинг бир эмас, тўртта ёгоч бочка ортилган эшак аравасига эргашиб иргишлашмайди. Ориф Оқсоқол бунақа адабсиз «така»ларни тарбиялаган ота-онаси билан гаплашиб, шунақанги танобини тортиб қўйганки, энди ашула айтишмайди. Лекин айтишган... Бир вақтлар...

Аслида ҳаммаси ўшанда – Робия «одам ўлдирдим», деб эшикдан додлаб келганида бошланган эди.

Қизим бояқиш ёмон қўрққан экан. Кўзига алвасти кўринади-ю, қўрқмайдими! Лабига учуқ тошиб икки кун алаҳлаб ётди. Нуқул «қўйвор» дейди, дод солади. «Бобо» дейди, «ойижон» дейди. Закунчининг отини айтадими-ей... Робия билан андармон бўлиб, Комил табибникига ҳам боролмадим.

Бечоранинг ўглидан «қорахат» келган экан. Очил рахматлик яхши бола эди. Робияга совчи юборгани эсимга тушиб, юрагим туздек ачиди. Нима қилай, Кимсаним билан Робия бир-бирига кўнгил қўйган экан, иложимиз қанча! Ишқилиб, Кимсаним омон-эсон келсин...

Ўша кунгача шу ниятда ўзимни ўзим юпатиб юрган эдим. Бир кунда ҳамма орзуларим чиппак-ка чиҳди-кетди. Шамолга совурилган сомондек...

Эрталаб тонг отмасидан сигирдан хабар олдим. «Тикилган қозон қайнамас» деганларидек, галанска сигирнинг думига термиламан, туғишидан дарак йўқ. Яхшиямки, бахтимизга баҳор серёмғир келди: чолим тонг қоронғисида туртиниб томорқада ўт ўраётган эди.

Бир маҳал эшик қарсиллаб қолди. Юрагим шиғ этди: Закунчи! Анчадан бери қадами узилганди. Охири баҳайр бўлсин, деб юрагимни ҳовучлаганча дарвозага югурдим. Закунчи отини гижинглатиб турибди. Қўлида қамчи. Кунлар исиб кетгани учун бошига чақмоқ телпак ўрнига дўппи кийиб, пешонасини қийиқча билан танғиб олибди.

Салом берганимни биламан, тўсатдан дағдаға билан сўради:

- Қизинг қани?

Қўрққанимдан тилим калимага келмай қопти. Яхшиям кетимдан чолим чиққан экан.

– Робия касал, – деди тушунтириб. – Чол-кампир иккаламиз ҳозир етиб борамиз.

Энди ўзимга келдим.

- Қизимга жин-ажиналар даф қипти, ўргилай! дедим ялиниб. Ўзининг дарди етмагандай, Алвасти кўприкда кўзига ажина кўринибди. Бир ҳолатда ётибди, айланай!
- Ўзларинг ажинасан! Закунчининг юзи қаҳрли қийшайиб кетди. – Қизингга айт! Шунақа ял-

пайиб ётаверса сочидан судраб чиқаман. Қамоққа тушгиси келмаса ишга чиқсин! Бугун, ҳозир!

– Хўп, – деди чолим ерга қараб. – Чиқади. Қўрқитишнинг хожати йўқ.

Хайронман, чолимнинг гапи Закунчига оғир ботди. Эгар устида ўтирган жойида илон чаққандек сапчиб кетди.

– Ие, ҳали ҳеч нимадан қўрқмайдиган бўлиб қолдингизми, Дума! – деди ғазабдан мўйлови учиб. – Ҳаммангни қатор қўйиб, биттама-битта пешонангдан отиш керак! Ҳаммангни! Авлод-аждодинг билан! Хоинлар!

Чолим ярқ этиб Закунчининг кўзига қаради. Қаддини ростлади. Бақириб-чақирмади. Аммо овозидаги бояги мутелик йўқолди.

- Ҳақорат қилманг, раис, деди секин, дона-дона қилиб. Шукур, авлодимиздан хоин чиққанмас. Ўғлим жон олиб-жон бериб юрибди.
- Сенинг ўғлинг-а?! Жон олиб-жон беряптими?-Закунчи киноя билан шундай мазза қилиб илжайдики, мўйлови қийшайиб кетди. Ҳусанов Кимсан сенинг ўғлингми ахир?! деди ижирғаниб. Эгарда ўтирганча бир томонга ёнбошлаб, шимининг чўнтагига қўл суқди-да, аллақандай қоғоз чиқарди. Ҳақиқий жангчи сўнгги томчи қони қолгунча уришади! Олий Бош Қўмондоннинг 270-буйруғига биноан бунақалар хоин саналади! Бояги қоғозни нафрат билан ғижимлаб, чолимнинг юзига улоқтирди. Қоғоз чолимнинг елкасига тегиб, ерга тушди.

«Қорахат! Кимсанимдан қорахат кепти!» Миямга шу хаёл урилди-ю, эс-ҳушимни йўқотдим. Бир маҳал кўзимни очсам, қаро тупроққа беланиб ўтирибман. Йиғлай десам овозим чиқмайди. Турай десам мадорим йўқ. От ҳам, Закунчи ҳам кўринмайди. Чолим ҳам ерга тиззалаб қолган. ўи-

жимланиб кетган қоғознинг у ёғини айлантиради, бу ёғини айлантиради. Чўққи, соқоли, қоқшол қўллари титрайди. Бошидан тушиб кетган дўпписи тупроқда тўнкарилиб ётибди.

- Роби-и! деди ингичкаланиб кетган овозда чинқириб. Роби-и!
- «Бўлди! Боламдан айрилиб қолдим. Ёлғизимдан жудо бўлдим!»
- Болам! Жоним болам! Тупроққа мук тушиб инграб юбордим.
  - Ойи! Бобожон? Нима бўлди?

Робиянинг хавотирли ҳайҳириғидан ғира-шира ҳушимга келдим. Олазарак ҳарасам, чолим бояги ҳоғозни биҳинини чангаллаган кўйи тепасида турган Робияга узатяпти.

– Ўқи! – деди тутқаноқ тутган одамдек оёқ-қўли баравар титраб.

Робия хатга шоша-пиша кўз югуртирди, ранги ўчиб кетди.

 Овозингни чиқариб ўқи-и! – деди чолим илтижо қилиб.

Робия лаблари пирпираганча, хатни қайта ўқиди.

- «Пиёда қўшинларининг оддий аскари Кимсан Хусанов Калуга остоналарида бўлган жангда бедарак йўқолди».
- Нега? Чолим соқоли титраганча илкис бош кўтариб Робияга чақчайди. Қанақасига?! Ич-ичи-га тушиб кетган кўзлари жиққа ёшга тўлди. Нега?! деди инграб. Ўзидан ўзи йўқолаверадими?

Карахт бўлиб қолгандим. Қулоғим шанғиллар, нима учундир нафасим бўгилиб, томогим гижиллар, кўнглимда шамолда липиллаб турган шамдек ожиз бир илинж уйгонган эди. «Хайрият! «Қорахат» эмас экан!»

- Бу қанақа ўтириш, ўв!

Шундоқ бошим тепасида гулдираган овоздан чўчиб тушдим. Аввал таг чарми кўчиб кетган бир жуфт каттакон этик, тиззасига ямоқ тушган шим, кейин Ориф оқсоқолнинг барваста гавдасини кўрдим.

- Нима бўлди? - деди у гулдираб.

Чолим каловланиб ўрнидан турди.

- Кимсан... - деди овози қалтираб.

Оқсоқол ҳам бир сесканиб кетгандек бўлди. Гоҳ чолимга, гоҳ Робияга аланг-жаланг қаради.

- Нима «Кимсан?»

Робиянинг қўлидаги хатга кўзи тушиб, буюрди:

– Ўқи-чи, қани?

Робия хатни яна бир марта ўқиди.

- Қанақасига? Чолим энтикиб Оқсоқолга яқин келди. Нимага йўқолади?
- Э, ўле! Оқсоқол жеркиб берди. Одамнинг капалагини учириб юбординг, пакана! деди енгил тортиб. Ўзимам сезувдим, қорахат бунақа бўлмайди... Носингдан ол.

Чолим орқага тисарилиб, бошини сарак-сарак қилди.

- Йўқ! деди ҳансираб. Закунчи бошқа гап айтди. Ўғлинг хоин деди, билдингми? Унинг кўзларига яна ёш тўлди. Мен... деди кичкина, чайир муштини тугиб. Мен... хоиннинг отасиманми? Шунча йил хоинни боқдимми?
- Саннама-е хотинга ўхшаган! Оқсоқол шундай ғазаб билан ҳайқирдики, чолим сийрак киприкларини пирпиратиб анграйиб қолди. Робия нажот кутиб, Оқсоқолнинг кўзига термилди. Мен ҳам оёгимга қувват киргандек амаллаб ўрнимдан турдим. Лекин нафасим баттар қисар, аллаким томогимни шошилмасдан, ҳафсала билан бўғаётганча ўхшарди.
- Ўша Закунчинг-чи... Оқсоқол уят гап айтиб юборди, чолимнинг устига бостириб борди. –

Эшитдингми? Ким айтади, бедарак йўқолганлар хоин бўлади деб? Балки партизанларга қўшилиб кетгандир! Шунақасиям бўлади-ку тўгрими? – Қизиқ, у охирги гапни анча шаштидан тушиб, иккиланиброк гапиргандек бўлди. – Носдан олсанг-чи, – деди қовоғини солиб. – Ана, қаънилик Холмат аравакашнинг ўглидан ҳам шунақа хабар келган. Нима, қипти? Ўглингдан қорахат келмаганига суюнмайсанми, эси паст!

Чолим анча дадилланди. Бироқ Закунчининг бояги қилиғи яна эсига тушди шекилли, Оқсоқолга носқовогини узатаркан, овозида шубҳа билан сўради:

- Нимага бўлмаса анави?..
- Яна гапиради-я! Оқсоқол «садқаи одам кет» дегандек қуюқ қошини чимирди. Кимсанни биламанку! деди бақириб. Белида белбоғи бор бола! Партизанларга қушилиб кетган. Радио эшитасанми ўзи? Желан деган жойда бизнинг партизанлар немиснинг қанча поездини аспаласопилинга жунатганидан хабаринг борми? У носқовоқни чолимга қайтариб бераркан, тунғиллади. Ўзи хеч балони билмайди-да, тағин хотинга ўхшаб чийиллайди. Курасан, эрта-индин хат келади.

Хушим энди ўзимга келди. Қарасам, Робия биқинини чангаллаган кўйи кўчага йўл оляпти.

- Ҳой, қизим? деган эдим, қўл силтади.
- Кетдим! Тракторга бораман!
- Юр, ўртоқ! деди Оқсоқол носини тупуриб. Ёш болани етаклагандек, чолимнинг қўлидан тутиб, юриб кетди.

\* \* \*

Пиёз ўтоқ қилиш – хотинларнинг иши. Нима бўпти! Ариққа ўтириб оласизу пуштадаги пиёзни

бўғиб қўйган ўтни юлиб ташлайверасиз. Баҳор серёмғир келгани мол-ҳолга яхши бўлди-ю, экинларга жабр қилди. Пиёздан кўп – ўт!

Бўрижар бўйи — эски тўқайзор эмасми, битта пиёз четидан ўнта ўт ўсиб чиқади. Қамишни-ку, турган-битгани азоб. Бугун юлсангиз, эртага салом бериб бош кўтараверади. ўумай бор, сариқ печак бор. Бошқа жойда бир марта ўтоқ қилсангиз бу ерда беш марта қилиш керак. Ер зах. Битта пиёзнинг ўтини юлиб олиш учун кам деганда бир пиёла чой ичгулик вақт кетади. Чўнқайиб ўтиравериб оёқ жонивор увишиб қолади. Аллақачон, олма гуллаб, кунлар исиб кетган. Елкангиз қизийди-ю, оёгингиздан муз ўтиб, қақшатиб юборади.

Бир соат ишламасимдан пешонамдан совуқ тер чиқиб кетди. Баданим қизиб боряпти-ю, ўзим қалтирайман. Закунчининг эрталаб айтган гапи қулогимдан кетмайди. «Хоинлар! Ҳаммангни пешонангдан отиш керак!» Наҳот менинг ўғлим, яккаю ёлғиз Кимсаним хоин бўлса! Ишонмайман! Майли, пешонамдан ота қолсин. Ишонмайман, юрагим сезиб турибди. Ўғлим хоинмас, ўлган ҳам эмас. Оқсоқол рост айтади, соғ-саломат. Анави... оти нимайди, партизанларга қўшилиб кетган... Унаҳа бўлса Закунчи нимага бунаҳа деди? Уям ахир закунни билади, Оқсоқолдан яхшироқ билади. Худо кўрсатмасин, ростдан ҳам...

Тушликка занг чалинганида бўларимча бўлган эдим. Ўрнимдан тураман деб йиқилиб тушдим. Икки қўлим лойга ботди. Этагимга йигилган ўтлар пиёз пуштасига сочилиб кетди. Жонҳолатда лой аралаш ўтларни тагин этагимга солдим-да, пушта четига бора туриб, нафасим галати чиқаётганини яна сездим. Ҳали Закунчи Кимсандан келган хабарни улоқтириб кетганида ҳам нафасим қисган

эди. Лекин бунчалик бўлмаганди. Тавба! Худди ичимга биров кириб олиб, нуқул ҳуштак чалаётганга ўхшайди. Нима бало! Қишда — Холпош овсиним Шокир-Зокир ўғилларига қирқ қилган куни шамоллаб қолганимда ҳам шунақа бўлувди. Робия орқамга ёг суркаб, беҳини қўрга кўмиб едириб амаллаб тузатганди. Унда-ку, иситма чиққан, йўтал бор эди. Ҳозир туппа-тузукман. Йўтал йўқ. Аммо нафасим муттасил ғижиллаяпти. Шунақа қилсам ўтиб кетар, деган умидда атайлаб, уч-тўрт марта йўталиб ҳам кўрдим. Қаёқда! Баттар бўлди. Ўпкам, темирчининг босқонидай вишиллаб, нафас ололмай қолдим. Тавба, нима бўлди менга?

Тушликка, ҳар кунгидай атала қилишган экан. Авваллари бир коса аталани кўрдим демасдим. Баъзан ўзимнинг вахмим келарди. «Нима бало, қаҳатчилик одамни очкўз қилиб қўяди шекилли», деб ўзимдан ўзим ичимда кулардим. Бу сафар тўрт қошиқ атала ичишим билан нафасим қайтиб кетди. Томоғим янги махсига ўхшаб ғижир-ғижир қилади. Ёнимда ўтирган хотинлардан уяламан... Косани ерга қўйдим-да, оёгим увишиб қолганидан чўлоқлана-чўлоқлана пайкал бошига - арик бўйига кетдим. Муздай сувга юзимни чайсам зора тузалса! Қизғалдоқлар очилиб ётган ариқдан энди сув ховучлаётсам, офтоб чараклаб турган даладан тўппа-тўгри шу томонга келаётган жувонга кўзим тушди. Ким бўлди бу! Вой, менгина ўлай! Раънохон-ку! Ўзимнинг келиним-ку. Унниққанроқ холхол куйлак кийибди, сочини чамбарак қилиб олган. Қўлида дафтари. Уруш хам ўлсин! Одамларни бир-бирига шунчалик беқадр қилиб қўйдими-а! Қудам бечоранинг йигирмаси ўтганидан бери келинимдан хабар хам ололмадим. Раънохон хам айтса керак, жигар-жигар, дигар-дигар экан-да! Нима қилгандаям эримнинг онасимас, опасисан-да, қайнонам бўлса, шундоқ кунда ёнимда турарди, деб. Нима қилай, эртаю кеч даладан бери келмасам, бу ёқда қизим шунча дард чеккан бўлса?

Нафасим қистанига қарамай, югуриб бориб, қучоқлаб кўришдим. Гулдек қиз эди, бечора! Сўлиб қопти. Қорайибди, юзини доғ босибди...

У юзидан-бу юзидан ўпиб кўришдим.

- Шомуроддан хат борми? десам, негадир қизаргандай булди. Бари бир ёш-да! Уялади.
- Ҳа, деди ийманиб. Яхши эканлар, сизларга салом айтибдилар.

Хайрият, укам соғ-саломат экан. Шуни ўйлашим билан, бугунги ҳангома яна эсимга тушди. Раиснинг «хойинсанлар» дегани тағин қулоғим тагида эшитилгандай бўлди-ю, ич-ичимдан зил кетиб, тушунтирдим.

– Робия касал эди, келинпошша, сизниям ҳолингиздан хабар ололмадик.

Раънохон, ўтоқчи хотинлар ғуж бўлиб овқатланиб ўтирган тол томонга қараб, юзи ёришгандек бўлди.

- Умар ака келдилар... - деди секин.

Тол тагида жийронни жиловидан тутиб турган Закунчини кўриб, юрагим зил кетди.

 - Юринг, опа! - Раънохон қошини чимирди. - Жаҳллари чиқиб юрмасин!

Шундай деди-да, ўқариқ четидан югургудек бўлиб, илдам юриб кетди. Келинимга етиб юролсам экан! Нафасим қисиб кетяпти. Оёгим чалишади. Юрагим гурсиллаб уради. Яна бир қадам боссам йиқилиб тушадигандек гандираклаб боряпман...

Амаллаб етиб келдиму аталадан бушаган косаларини олдига қуйиб, давра қуриб утирган хотинлар ёнидан утганча толга суяниб чунқайиб қолдим. Қулоғимга Умар закунчининг овози кирди:

- Колхозчи ўртоқлар... Замон оғир. Аммо ғалаба яқин. Душман чекиняпти...

Қовоғимга тош осилганми? Кўзимни очолмайман. Хадеб нафасим қайтади. Пешонамга кафтимни боссам, ўт бўлиб ёняпти! Нима бало, яна огриб қолдим шекилли.

Закунчининг гапи қулоғимга элас-элас чалинади.

– Душман чекиняпти, – деди у қайтариб. Менсимади демасин деган ўйда амаллаб кўзимни очиб қарасам, менга тикилиб турибди. Бошида ўша дўппи. Пешонаси қийиқча билан танғилган. Кўзида эрталабдагига ўхшаган заҳарли киноя. – Душман чекиняпти-ю, аммо... – У менга бир қараб, ҳазар қилгандек юзини чир ўгирди. – Бизнинг орамизда ҳам жангсиз, курашсиз чекинаётганлар йўқ эмас. Бирининг у ери оғрийди, бирининг бу ери... Бирини «ажина чалади»...

Аталага тўймагани учун туршак чайнаб ўтирган Парча ҳў-ҳўлаб кулди.

 - Ўша ажинани кўрсамийди, обши қозонга босиб, қайнатма шўрва қилардим!

Хотинлар кулиб юборишди.

Закунчи ҳам мўйловини ҳийшайтириб мийиғида кулди.

– Маладес! Сиз-ку, шунақа дейсиз. Лекин арпа унини баҳона қиладиганлар ҳам бор-да! Нима дедингиз!

Бувиллаб кетаётган бошимни кўтариб қарасам, Закунчи менга тикандек қадалиб турибди. Кўкиш кўзларидан совуқ учқун сачраб кетаётгандек.

– Бу уруш – ҳаёт-мамот жанги, – тишларини ғижирлатиб таъкидлади у. – Одам нина эмаски, шудгорга тушиб йўқолиб қолса. Лекин айрим жангчилар йўқолиб қолаётганмиш. – Закунчи кинояли кулди. – Қизиқ, бутун бошли жангчи йўқолиб қолса! Ватан ишониб топширган қурол-яроғи

билан. Балки ҳозир, немиснинг товонини ялаб юргандир? А, лаббай? – Закунчи «жавоб бер!» дегандек кўзимга қаттиқ тикилди.

Хотин халаж ҳайрон бўлиб қолган, ҳамма бунақа хунук гапни биринчи марта эшитаётгани учун сеҳрланиб қолгандек ундан кўз узмас, Раънохон бошини қуйи солганча, қўлидаги дафтарга қалам билан алланимани чизиб турарди.

Юрагим қинидан чиқиб кетгудек ура бошлади. Нафасим бўғзимга тиқилиб қолаётганини, кўз ўнгим хиралашиб кетаётганини сезиб турардим.

Закунчи чўнтагини узоқ титкилади. Охири папирос олиб, тутатди.

- Гапиринг! деди бошини маломат билан чайқаб. – Гапга устасиз-ку, авлод-аждодингиз билан!
- Ёлғон! дедим чиңқириб... Умрим бино бўлиб бўғзимдан шунчалик дахшатли, аламли ҳайқириқ отилиб чиқмаган бўлса керак. Ёлғон! Туҳмат қилган туҳмат балосига учрасин! Учрамаса у дунёю бу дунё розимасман!
- Тағин шаллақилик қилади! Закунчи папиросини ғазаб билан чертиб юборди.
- Бу қандоқ бедодлик! дедим икки қўлим билан тиззамни муштлаб. Бу қандоқ туҳмат!

Одам эсдан оғиши ҳеч гап эмас экан. Жиннилардек чинқирганча Закунчига талпиндим. Аммо икки қадам юрмасимдан еру кўк чирпирак бўлиб айланди-ю, юзтубан йиқилиб тушдим. Кўзимни очсам, атрофимни хотинлар ўраб турибди. Парча пиёз ўтайвериб кўкариб кетган каттакон, дағал кафти билан юзимни силаяпти.

- Қўйинг, опажон! деди дўриллаб. Ит акиллади қўйди-де!
- Кўзингизни очинг! Раънохон пешонамни силади. Хафа бўлманг. Биласиз-ку. Умар акагаям осонмас...

Уйга қандай етиб келганимни билмайман. Шуниси эсимдаки, Раънохон қўлтиғимга кириб, анча жойгача олиб келди. Йўл-йўлакай юпатди. «Раисдан хафа бўлманг, унгаям қийин», деди. Негадир қовлига киргиси келмади. «Олтинчи бригадага боришим керак», деб кўча бошида хайрлашди. Бу ёгига маст одамдек гандираклаб келдим. Бошим ёрилиб кетгудек лорсиллар, нафасим қисар, оёқларим чалишиб-чалишиб кетар эди. Кўча эшик олдида турган эшак аравани кўриб ҳайрон бўлдим. Ҳали кун ботгани йўқ-ку! Чолим нимага эрта ҳайтибди? Бу ўйлар хаёлимдан лип ўтди-ю, ўша заҳоти унутдим. Ҳеч нимани ўйлагим келмас, ҳеч кимни кўришга тоҳатим йўқ эди.

Довлига киришим билан бехи тагида ёқа бўғишиб турган Оқсоқол билан чолимни кўриб, аранг ҳушимни тўпладим.

- Жинни! Оқсоқол узун камзул кийган чолимнинг ёқасидан чангаллаб силкитарди. Ўшанинг гапига учасанми, пакана!
- Қўйвор! Чолим қўшқўллаб Оқсоқолнинг ўғир дастасидек йўғон билагига ёпишти. Оқ қилдим! деди чийиллаб. Бунақа ўғлим йўқ! Оқ қилдим!
- Ўв аҳмоқ! Оқсоқол камзул ёқасидан ғижимлаб даст кўтарган эди, чолимнинг оёғи ердан узилиб типирчилаб қолди. Нафас ололмай кўзлари олайиб кетди. Ўз дардимни унутиб, дод солганча Оқсоқолга ёпишдим.
  - Бу нимаси?.. Уялмайсизларми?
- Кўрмайсанми, паканангни! Оқсоқол ҳарсиллаган кўйи чолимнинг ёқасини бўшатган эди, чолим шилқ этиб ерга ўтириб қолди. Оқсоқол ўзининг қилигидан ўзи қўрқиб кетди. Чўккалаб ўтирганча чолимнинг юзига авайлаб шапатилади. Ўв! Жиннимисан, кўзингни оч, ўртоқ!

Чолим ола-кула бўлиб кетган кўзлари билан атрофга аланглади.

- Айтди-ку! деди инграб. Хаммага айтиб чиқди-ку! Думанинг ўғли хоин деди-ку! 270-буйруқ...
- Э, туққанингни! Оқсоқол жаҳл билан ўзининг тиззасига муштлади. Ишонма, дедим-ку. Ишонма, ўша лўттивознинг гапига! Қайтиб ол, аҳмоқ! Гапингни қайтиб ол! Гуноҳга ботасан, тентак! Хоҳласанг эртага Тошкентга тушиб военкомат билан гаплашаман, овсар!

Хамон гарангсиб турардим. Бундан чиқди Закунчи Кимсан бедарак йўқолганини ҳаммага гапириб чиққан. Худди боягидек ҳамманинг ўртасида гапирган. Чолим иснодга чидолмаяпти. «Оқ қилдим!» дедими?

Каловланиб бориб чолимнинг оёгига ўзимни ташладим.

– Дадаси! Қайтиб олинг гапингизни! Кимсан унақамас!

Ёш тўла кўзларим билан қарасам чолим киприкларини пирпиратиб ҳайрон бўлиб турибди.

- Унақа бўлса мениям талоқ қўйинг! Менам ҳа-ромман! дедим томогимни қисиб келган йигидан бўгилиб.
- Ана! Эшитдингми, эшшак! Оқсоқол чолимга дағдаға қилди. Қайтиб ол гапингни!
- Бўпти! Чолим бошимга эгилиб, сочимни силади. Оллоҳнинг ўзи кечирсин!

Оқсоқол баттар ўшқирди.

- Айт! Ўглим, адашдим, кечир мени, де!

Чолим титроқ қўллари билан юзини чангаллади.

- Ўғлим! деди йиғламсираб. Кечир мени. Кимсаним! Биламан, сен мард боласан! Ё Худо, дўст-душман олдида юзимни ёруғ қил, Худойим!
- Мана бу бошқа гап! Оқсоқол енгил тортиб, чолимнинг кўзига тикилди. Тур, ўртоқ! У дўс-

тини суяб ўрнидан тургазди. Мен ҳам эмаклагудек бўлиб, турдим. Бошим баттар ғувиллар, нафас олишга қийналардим. Энди айвон томон юрган эдим, чолим тўсатдан яна «айниб» қолди.

– Обчик! – деди чийиллаб. – Обчик, боягини!

Қарасам, чолим Оқсоқолнинг қорнига калла қуйишни мулжаллаган сузонғич эчкидек бошини қуйи солганча, кузини олайтириб турибди.

- Бочкани нима қиласан, аҳмоқ? Оқсоқол хуноб бўлиб икки қўлини силкитди. Мадад кутгандек менга юзланди... Бунингни қара, келин, боядан бери бочка сўрайди Нияти нима ўзи?
- Обчиқасанми-йўқми? Чолим алам билан шундай чинқирдики, Оқсоқол беихтиёр орқасига тисарилди. Обчиқ! деди чолим ҳансираб. Биламан, уйингда тўрттаси турибди.

Оқсоқол эсдан оғиб қолған дўстини инсофга келтирмоқчи бўлди шекилли, секин-секин тисарилиб, юпатди.

- Тўрттамас, учта. Қишда, ўтин йўғида биттасини синдириб ёққанман.
- Учта бўлса учта! Обчиқ! Чолим яна хезланиб келган эди, Оқсоқол кўча эшик томонга лапанглаб қочди.
  - Хўп, дедим-ку!

Оқсоқол чиқиб кетиши билан чолим молхона ёнбошидаги ҳужрага йўл олди. Қорайиб кетган эски бочкани дақир-дуқир қилиб думалатиб ҳовли ўртасига олиб келди. Бочкани тик қилиб қуйди-да, ошхонага кириб, теша топиб чиқди. Бочканинг темир ҳалҳаларини даранглатиб ура бошлади. Бир вақтлар, урушдан олдин шу бочкага бодринг тузлардик. (Кимсан қишда тузланган бодринг ейишни яхши кўрарди).

Чолим бочкага эмас, менинг бошимга ураётганга ўхшар, теша ҳар гал темир ҳалҳага урилганида ҳулоғим шанғиллар, кўнглим беҳузур бўлиб, нафасим ҳисилар, беҳи шохини ҳўйиб юборсам, йиҳилиб тушишимни сезиб турардим. Робия ҳаёҳда ҳолди? Нима ҳилмоҳчи бу ҳайсар чол!

Амаллаб айвонга чиқдим, у ёғига юришга мадорим етмади. Айвон пешига ўтириб қолдим.

Оқсоқол айтганини қилди. Битта бочкани думалатиб қовлига олиб кирди. «Ма, жинни, билганингни қил», дегандек бочкани жаҳл билан тепиб юборди. Бочка думалаб супа олдига борганида чолим чаққонлик билан тиклаб, темир ҳалҳаларини даранглатиб теша билан уришга тушди.

Бирпасдан кейин Оқсоқол иккинчи бочкани ҳам думалатиб кирди.

- Кўнглинг тўлдими! деди ҳарсиллаб. Бўлдими! Ана, иккаласиям сенга! Ичига тушиб ётавер!
- Зиқналик қилма! Чолим Оқсоқолға ўқрайди.Обчиқ унисиниям!
- Оббо! Оқсоқол тўнғиллаб чиқиб кетди. Анчадан кейин у яна битта бочкани елкасига ортмоқлаб кириб келди. Буниси кичкинароқ эди.
- Бўлдими? деди жаҳл билан бочкани чолимнинг оёги остига ташлаб. Қутулдимми, бочка жинниси!

Оқсоқол супага чордана қуриб ўтирганча чолимнинг ишини кузата бошлади.

Чолим бочкаларни тартибга солиб бўлгач, энг каттасини думалатиб, хожатхона эшигига борди.

Орадан анча ўтди. Бир махал супада ўтирган Оқсоқол илдам туриб кўча эшикка йўналди.

– Э, қилиғинг қурсин! – деди эшикдан чиқиб кетаркан, тўнғиллаб. – Жинни, пакана!

Аммо ғира-шира қоронғи тушганида яна қайтиб келди. Ҳамон ҳовли бурчагида куйманаётган чолимнинг олдига борди.

- Нима зарил сенга, Дума! Шундан бошқа иш қуриб қолдими? деган эди, чолимнинг овози титраб, ҳайқиргани эшитилди.
  - Ўз ҳолимга қўясанми-йўқми?

Ўша захоти йиги аралаш ингради!

– Юрагим ёниб кетяпти, ўртоқ! Мана бу ерим куйиб кетяпти, жон ўртоқ!

Иккаласи ғўнғир-ғўнғир қилиб алланималарнинг маслаҳатини қилишди.

Қоронғи уйга кирдиму шапарак кўрпачага ўзимни ташладим. Шу кўйи уч ҳафта ётдим...

Гоҳ ҳуд, гоҳ беҳудман. Иситма аралаш Кимсаним тушимга киради. Бировдан уялгандек жилмайиб турганини кўраман. Ҳушим жойимга келганида нафасим қисилиб, ичимда биров ҳуштак чалаётгандек бўлаверади. ўашим келади. Чолим ишда, Робия ишда.

...Қизим озиб-тузиб кетди. Аллақандай одамови, камгап булиб қолди. Купинча кечалари ҳам далада қолиб кетади. Сурасам бир оғиз, «тракторни бекор қуйгим келмади», деб қуя қолади. Уйга келганда ҳам индамай айвон пешига утиради-ю, ойдин кечалари қийиқчага гул босади. «Кимга?» десам, «Кимга буларди, Кимсан акамгада», дейди жилмайиб. Жилмаяди-ю, лаби титраб кетади.

Яхшиям бахтимга Холпош овсиним бор экан. Икки ҳафтагача уззукун бошимда ўтирди. Комил табибнинг «туркана» дориларидан ичиради. Огзимга бир қошиқ иссиқ тутади. Икки гапнинг бирида Робияни дуо қилади.

– Робияхон умридан барака топсин! Ажабам трактор ҳайдашни ўргатган экан. Зўрам анча овуниб қолди, овсинжон!

Бир куни чолимниям мақтаб қолди.

– Эрингизни ақли тошни ёради, овсинжон! Лавлагига «шарбат» оқизяпти. Экинга жа қувват бўларканда, бу ордона қолгур!

## 2. Ёмоннинг кучи - япалоққа...

Куз эрта тушди. Қовун палаги қуримасидан ҳавода мезон учди. Кечалари осмонда турналарнинг ҳорғин ноласи эшитилди. Бу йил қиш қаттиқ келадиганга ўхшайди. Тераклар баргини эрта тўкди.

Лавлаги кавлашга тушганимизга бир ҳафтадан ошди. Чолим, ростдан ҳам ҳамма ёқни «шарбат»га тўлдириб юборган экан. Қайси пайкалга кирманг, ўқариқ бошидаги «тиллахона»га кўзингиз тушади. Узунлиги беш қулоч, эни икки қулоч чуқурга чолим ҳовлима-ҳовли юриб, бочкага ортиб келиб «маданий» тўлдирган. Ўз бўйи сувга қўшиб «шарбат» қилиб оқизган.

«Шарбат»нинг ўзи ёмон бўлгани билан «ҳикмати» зўр экан. Лавлаги шунақанги «қутуриб» кетганки, ҳар биттаси самовардек келади.

Кеча Раънохон лавлаги қазиётган жойимизга келиб, атайлаб одамларни тўплади. Газетада Умар закунчининг камида бир пуд келадиган лавлагини кўтариб турган сурати чиққан экан. Сурат тагидаги ёзувни ҳаммага эшиттириб ўқиди:

«Стахановчи Умар Хўжаев раислик қилаётган «Қизил деҳқон» колхозининг азаматлари ҳар гектардан олтмиш тоннадан лавлаги олишга аҳд қилганлар. Бу – қаҳрамон колхозчиларнинг қаҳрамон жангчиларга муносиб совғаси бўлади...»

...Қизиқ... Ориф оқсоқол ўшанда тўгри айтган экан. Бедарак йўқолди, дегани хоин дегани эмас экан. Нўғайқўргонга яна икки одамдан шунақа хабар келди. Бунақа хат олганлар хафа бўлиш ўрнига қайтага қувонишди. Бундан чиқди, ўғли тирик. Ким билсин, балки госпиталга тушгандир, балки партизанларга қушилиб кетгандир... Чолим хам ўлгудек ховликма-да! Закунчининг бир оғиз совук гапига аччиқ қилиб, эрта-индин туғай деб турган галанска сигирни сотиб келди. Ўрнига ўрин тиррақи бузоқ опкепти. Бу жонивор қачон сигир бўладию қачон сутга киради... «Қолган пулни нима қилдиз», десам, «ишинг бўлмасин», деб жеркиб берди. Кейин Оқсоқолдан эшитдим. Чолим «Ўзбекистон» танк колоннасига хаммадан кўп пул топширганмиш. Закунчи мажлисда чолимни роса мақтаганмиш. Мақтамай тилинг кесилгур! Нима қилардинг тухмат қилиб! Нима қилардинг эл ўртасида бизни маломатга қолдириб! Шуни айтсам, Оқсоқол сўкиб берди: «Ёш бола тушунадиган нарсага ақлинг етмайди-я, келин! Закунчи сенинг паканангни азбаройи яхши кўрганидан мақтабдими? Чолинг обрў оберяпти Закунчига, тушундингми! Хеч ким қилмаган оғир ишни зиммасига олиб «шарбат» ташияпти. Раиста шундан бошқа нарса керакмас!» Менинг ақлим етмаган нарсани чолим жуда яхши биларкан. Бугун Закунчи ёнига суйкалиб келган эди, жанжал чиқаришига бир бахя қолди. Начора, ёмон гап одамнинг кўнглидан кетмас экан. Бугун ғалати күн бўлди ўзи. Кулишингниям билмайсан, хафа бўлишингниям...

...Чолим билан Парча лавлаги қазир, бизлар сават замбилга ортиб, пайкал бошида турган ҳўкиз аравага ташиётган эдик. Айтдим-ку, лавлаги жонивор шунақанги бўлиб берганки, каттароқ кетмон билан

қазимасангиз, бўлмайди: кесилиб, ярми ерда қолади. Чолим-ку, эркак. Парчани айтмайсизми! Кетмони баркашдек келади. Ҳар кетмон солганда ер зириллаб кетади. Билакларини шимариб олиб, ғайрат билан ишлаб ётибди. Лазакат иккаламизга битта замбил теккан. Ўнта хотин чолим билан Парча қазиб бераётган лавлагини ташиб етказолмаймиз. Сават замбил беш-олтита лавлаги билан тўлиб қолади. Арава ўлгур битта. Бултур картишка қазиганимизда чолимнинг эшак араваси ҳам коримизга яраб турувди. Энди унга лавлаги ортиб бўлмайди, ҳазар қилишади. Ҳўкиз арава омборга бориб-келгунча лавлагини хирмон қилиб уйиб ташлаймиз.

Иш айни қизиганида Закунчи келиб қолди. Кайфи чоғ. Салқин тушиб қолгани учун бўлса керак, яна ўша чақмоқ телпагини кийиб олган, оёғида қайтарма қўнжли этик, қўлида қамчи... У отдан чаққон сакраб тушди. Жиловдан тутган кўйи кулимсиради.

– Хорманглар-ов! – деди тетик овозда. – Бир минут вақтингларни оламан.

Хамма бирин-сирин яқин келди. Фақат Парча ўқариқ бошида, яримлаб қолған, устига тупроқ сепилган «тиллахона» ёнида кетмонига суянганча тураверди. Закунчи тоғдек уюлиб ётган, ҳар биттаси дўнгдек келадиган қанд лавлаги хирмонига кўз ташлаб, қамчили қўли билан ингичка мўйловини силади.

– Ўртоқлар! – деди тантанали, жарангдор оҳангда. – Бугундан бошлаб Янгийўлда қанд заводининг янги цехи ишга тушди. Бизнинг лавлаги билан ишлайдиган цех! Биласизларми, бу – нима дегани! – У мамнун жилмайиб, ҳаммага бирма-бир ҳараб чиҳди. – Бу дегани шуҳи, бизнинг лавлаги эртага тонна-тонна ҳанд бўлиб жангчиларга жўна-

тилади. Бу законний ишга сиз ҳам ҳисса қўшдингиз, Ҳусан ака! – У от жиловидан тутганча чолимга яқин борди. – Маладес, бобой! – деди ҳамчили ҳўли билан чолимнинг елкасига ҳоҳиб. – Маладес!

Қизиқ! Чолимнинг ранги гезариб кетди. Закунчининг қўлини елкасидан силтаб ташлади. Закунчининг авзойи ўзгарди.

– Ҳа! – деди мўйлови учиб. – Арпангизни хом ўрдикми?

Чолим хўмрайиб турганини кўриб, мийигида кулди.

– Яхшилик ёқмаган банда! Иззат қилсанг тўрга чиқиб... – У кителининг чўнтагидан папирос олди. Шунда чолим ғалати иш қилди. Шимининг чўнтагига қўл суққан эди, ялтироқ папирос қутиси чиқди. Эсини еганми чолим! Папирос чекмасди-ку, қаёқдан келди бунақа қути!

У индамасдан қутини Закунчига узатди. Закунчи негадир эсанкираб қолди. Гоҳ чолимга, гоҳ қўлидаги ялтироқ папирос қутисига қараганча орқага чекинди. Боши от тумшуғига тегиб, чақмоқ телпаги қийшайиб кетди.

– Тек, падарингта лаънат! – деди жийронга қамчи ўқталиб. От қулоғини чимириб, бош силкиди. Сувлиқ шақирлади. Чолим бир зум Закунчига тикилиб турдида, папирос қутисини ерга улоқтирди. Қути пушта устига тушиб, дириллаб сакраб кетди. Ичидаги папирослар ҳар ёққа сочилди. Чолим кетмонини елкасига ташлаб, индамай кетаверди. Орага таранг сукунат чўкди.

Боядан бери кетмон дастасидан ушлаб турган Парча раис олдида ўзини кўрсатиб қўйгиси келди шекилли, икки кафтига мўлгина туфлади-да, кетмонни боши устида баланд кўтарганча «хах» деб лавлаги пуштасига урди. Мўлжаллаган лавлагиси

«тиллахона» яқинида ўсгани учунми, росаям битиб кетган экан! Кетмонни ҳарчанд чуқур солмасин, қоқ ярмидан кесилиб отилиб кетди. Силлиқ кесилган лавлагининг ерда қолган палласи лагандек оппоқ кўриниб қолди. Бирдан Закунчининг кўзлари қисилиб, кўкимтир ўт чақнади.

- Сволич! - деди ҳайқириб. - Нима қилдинг, аблаҳ! - От жиловидан тутганча, қамчи ўйнатиб Парчанинг тепасига борди. - Мана шу лавлаги бир жангчининг ҳаётини сақлаб қолишини биласанми! - У пушта устида ётган лавлаги палласини этиги билан тепди. Лавлаги яримта бўлса ҳам ўртачароқ пақирдек келарди. Тепки зарбидан учиб кетмади. Бир томонга думалади, холос.

Парчанинг қалин лаби осилиб кетди. Қўрқиб, кипригини пирпиратди, аммо чекинмади, анграйиб тураверди.

- Ман билмадим-де! деди дўриллаб. Котта экан!
- Билмадинг?! Закунчининг овози тахдидли жаранглади. Сен очофат хаммасини биласан! Лавлагининг ярмисини ерда қолдириб, уйингга обкетмоқчисан! Аждахо нафсингга қайнатиб емоқчисан.

Парча атрофдаги хотинларга ҳайрон аланглади.

- Манов кишини қарайла! Жинними бу?
- Мана жинни! Ҳавода қамчи визиллади. Парчанинг чаккасидан иягигача ингичка кўндаланг из тушиб қолди. Из аввал қизғиштоб бўлиб турди-да, ўша заҳоти арқондек бўртиб чиқди. Бурнидан тирқираб қон оқа бошлади.
- Қочсанг-чи! деди Лазакат чирқиллаб. Қоч!
   Шу пайт кетмонини боши устида баланд кўтариб югуриб келаётган чолимга кўзим тушди.
- Борманг! Қўшқўллаб кетмон дастасига осилдим. Аралашманг, қаматади!

– Нари тур! – Чолим кетмонни силтаб тортди. Кучим борича дастага ёпишиб олдим. Иккаламиз пуштага чўккалаб қолдик.

Орқа томонда яна қамчи визиллади. Қўрқув ичида бурилиб қарадим. Парчанинг юзида арқондек иккинчи чизиқ бўртиб чиқди. Парча бу гал ҳам қочмади. Лекин илондек тўлғанаётган қамчини маҳкам чангаллаб олди. Чолимнинг қўлидаги кетмон дастасига ҳамон ёпишганча қарасам, Закунчи қамчи дастасини силтаб тортяпти.

- Қўйвор! - деди ғазабдан хириллаб.

Бурни қонаётган Парча қамчини бўшатмади. Чолим кетмонни ташлаб, ўша томонга югураётган эди, оёгига осилиб олдим.

- Борманг!
- Қўйвор, ит эмган! Закунчи тишини ғижирлатиб, қамчи дастасини яна силтади. Парча қимир этмас, ҳуркиб кетган от нуқул ер тепиниб бошини силкитар эди.

Закунчи от жиловини қўйиб юборди. От думини гажак қилиб шаталоқ отди.

– Қўй-ворр! – Закунчи қамчи дастасини қўшқўллаб чангаллаган кўйи кучи борича орқага силтаган эди, Парча кафтини ёзиб юборди. Закунчи орқасига тисарилиб кетди. Уч-тўрт қадам гандираклаб борди-ю, ўқариқ пуштасига қоқилиб «тиллахонага» чалқанча йиқилди.

Бу – шунақанги кутилмаганда бўлдики, ҳамма анграйиб қолди. Ҳатто боядан бери ўша томонга талпинаётган чолим ҳам пуштага чўккалаганча оғир-оғир киприк қоқди.

Закунчининг қайтарма қўнжли этиги ҳадеб типирчилар, аммо ўзи кўринмасди. Ниҳоят этиклар ҳам бир зум кўздан ғойиб бўлди-да, кейин «тиллахона» қирғоғида бир жуфт қўл кўринди. У қирғокдаги кесакларни

таталаганча эмаклаб юқорига чиқа бошлади. Бошидаги чақмоқ телпак тушиб қолган, аммо нажасга беланган қамчисини ҳалиям қўлидан қўймаган, юз-кўзини кўриб бўлмас, оғзини каппа-каппа очиб нафас оларди. Ҳамма ёқни бадбўй ис тутиб кетди. У юзини артмоқчи бўлган эди, баттар ифлос қилди. Этигининг қўнжидан шўлтиллатиб «шарбат» сачратганча дуч келган томонга югуриб кетди.

### ЙИГИРМА БИРИНЧИ БОБ

### РОБИЯ ХИКОЯСИ

## Ориф оқсоқолнинг қарори

Урушнинг иккинчи бахори хам қахрли келди. Энди ўрик гуллаганда қора совуқ бўлиб, ҳамма ёқни қақшатиб кетди. Умар закунчи ўшанда хат олиб келганида Кимсан акамнинг дом-дараксиз кетишини жудаям хохлаган эканми, билмайман. Бир йилдан бери на хат бор, на хабар. Ойимнинг айтишича, одам ухлаганида жони танидан чиқармиш-да, қанотли от бўлиб осмонга учиб кетармиш. Учиб юриб, яқин кишиларининг жони билан учрашармиш. Шу гап рост бўлса менинг жоним Кимсан акамники билан тез-тез учрашиб туради. Гох икковлашиб ишкомда узум узамиз, гох аллақандай нотаниш кўчаларда юрган бўламиз. Бундан чиқди, Кимсан акам тирик. Унинг жони хам мени излаб юрибди. Шунақа пайтларда уйгониб кетсам, кўзимни қайтадан юмиб оламан, тушимнинг давомини кўргим келади. Кечалари сандал четида ўтириб, қийиқчага Кимсан акамнинг номини ёзиб, кашта тикаман...

Кўклам сурилиб кетгани учун тракторларни кечаси ҳам ишлатадиган бўлдик. Яхшиям Зуҳра

келинни трактор ҳайдашга ўргатганимиз. Башор опа иккаламизнинг қўлимиздан нимаям келарди. Зуҳра келин ёрдамчиси Олимжон билан бинойидек ишлаяпти. Кузда ҳам анча жойни шудгор қилган эди. Аввалига Олимжон, «опа, сиз билан ишлайман», деб кўп хархаша қилди. Болани алдаб-сулдаб йўлга солдим. Менга балоям урмайди. Ёрдамчи керакмас. Сув ташиш бўлса ўзимдан ортмас. Ҳарна Зуҳра келинга ёрдам бергани. Нима бўлгандаям кўнгли ярим.

Тонготар уйқуси қанчалик ширин бўлишини кечаси билан мижжа қоқмаган одам билади. Қаммасига чидайсизу олисда – тоғлар ортида осмон бўзара бошлаганда шунақанги уйқу босадики, дунёдаги ҳамма нарсани унутиб, захкаш тупроққа таппа ташлаб ётиб олгингиз келади. Билмаган одам тракторнинг тариллаши уйқуни бузади, деб ўйлайди. Унақамас, аксинча, тракторнинг овози аллалайди: бултурдан қолган марзалар устидан силкина-силкина ўрмалаётган трактор бешикдек тебранади. Ўтирган жойингизда мудраб кетганингизни ўзингиз билмай қоласиз.

Зухра келин уйқучироқ! Кўпинча тонг-саҳарда тракторни дала ўртасида тўхтатади-да, рул чамбарагига бошини қўйганича ухлаб қолади. Бу сафар ҳам шунақа бўлди. Марза этагига борганда тракторни бураётсам нариги пайкал ўртасида бир кўзли чироги ёниб турган тракторни кўрдим. Зуҳра келин яна ухлаб қопти. Трактор бир жойда қимирламай турибди.

Моторни ўчириб, тупроқ кечганча ўша томонга юрдим. Биламан, Зуҳра опамга қийин. Оқсоқолникиям катта даргоҳ. Фотима опа бола-чақадан ортмайди. Уйдаги кўп юмушлар Зуҳра келиннинг зиммасида. На уйда тиним бор, на далада. Аммо

трактор тўхтаб турганини Башор опа кўрса хафа бўлади. У кишиниям жони ўнтамас, юрибди-ку, кеча-кундуз тиним билмай. Буям майли, Умар закунчининг тонг отар-отмас дала айланадиган одати бор. Шу ишнинг устига келиб қолса, Зуҳра келиннинг дилини сиёҳ қилади...

Қизиқ, Олимжон қаёққа кетдийкин? Уям ухлаб ётгандир-да. Бола-ку ахир.

– Зуҳрапа! – дедим йўл-йўлакай бақириб.

Яқин келсам Зуҳра келиннинг трактори тариллаб турибди.

- Зухрапа! Туринг! Тонг отяпти.

Гаранг одам бўлсаям эшитарди. Қаттиқ ухлаб қолган шекилли. Тракторнинг темир зинасига оёқ қўйиб, ичкарига мўраладиму ҳайрон бўлдим. Трактор ишлаб турибди, чироги ёниқ, аммо устида ҳеч ким йўқ.

Бирдан юрагимга ғулғула тушди. Бултур трактор тепиб, бир ой азоб чекканим ёдимга келди. Мотор ўчиб қолган бўлса, юргазаман деб униям тутқич тепкиси уриб юборган бўлса-чи.

Йўқ, унақа десам мотор ишлаб турибди-ку! Хаёлимга ундан ҳам ваҳимали ўй келди-ю, вужудим музлаб кетгандек бўлди. Трактор ҳайдаб кетаётиб ухлаб қолган бўлсачи! Уйқусираб йиқилиб тушиб, ғилдирак тагида қолган бўлса. Мажақланиб ўлиб ётган бўлса... Жонҳолатда орқага, трактор қазиб ўтган қоп-қора шудгорга югурдим.

– Зуҳра-па-а-а! – дедим ваҳима билан чинқириб. Олисда хира ойдинда мудраб ётган қирлар ортидан «а-а-а» деган садо келди.

Олимжон-чи? Олимжон қаёқда? Ҳали пачоқ челакда сув кўтариб, Зуҳра келиннинг трактори томонга кетаётганига кўзим тушувди.

- Олимжон-он?! - дедим бақириб. - Олимжон-о-он!

Пайкал этагида ўрмалаб келаётган Башор опанинг трактори ҳам тўхтаганини кўрдим.

– Олимжон! Зухрапа! – Қўрққанимдан кафтимни карнай қилиб овозим борича бақирдим. – Олимжон-он!

Пайкалнинг юқори томонидан – тутзор орасидан бир қора ажралиб чиқди-да, шу томонга югурди. Яқинроқ келганда илғадим – Олимжон! Эгнида эски чопон, бошида дўппи. Қўлида челак.

- Зухра опанг қани? - дедим титраб.

Олимжон рўпарамга келиб челакни ерга ташлади. Бўш челак даранглади.

- Сув керакми? деди мушти билан кўзини ишқалаб. Ухлаб қопман, опа!
- Зухра опанг қани, деяпман! Гўё Зухра келинни Олимжон бир ерга яшириб қўйгандек жаҳл билан сўрадим. Қаёққа кетди?

Бола ерда ағдарилиб ётган челакнинг бандидан ушлаганча орқасига чекинди.

– Билмадим, опа... <u> Хали сув опкелганимда бор</u> эдилар.

Орқа томонда этикнинг юмшоқ ерга урилаётгани эшитилди. Башор опа ҳарсиллаб яқин келди.

- Нима гап? деди гоҳ менга, гоҳ Олимжонга ҳараб.
  - Зухра опа йўқ. Хали Олимжон кўрган экан.

Башор опа темир зинадан чиқиб, Зуҳра келиннинг тракторини ўчирди.

- Бирон жойда ухлаб ётгандир, деди юпатиб. Қарайлик-чи. Сен қаердайдинг?
- Менми? Олимжон айбдор қиёфада бурнини тортди. Тутзорда... Ухлаб қопман.
  - Бор, ўша тутзорни қара.

Олимжон тупроққа бота-бота пайкал этагида қорайиб турган тутзорга югурди.

- Опа, дедим вахимам ошиб. Трактор юриб кетаётганда уйқусираб йиқилиб тушган бўлса-я.
- Йўг-е, ёш боламас-ку... Башор опа шунақа деди-ю, ўзининг ҳам юрагига ғулғула тушди шекилли, орқа томонга, Зуҳра келиннинг трактори ўтган шудгорга чопди. Юр-чи...

Бутун шудгорни, пайкал четларини айланиб чиқдик. Олимжон ҳам ҳаллослаб келиб бир оғиз сўз айтди:

- Йўқлар!

Ой умидсиз, қизғиш нур сочиб ботиб борар, шудгор қилинган дала янаям қорайиб кўринар, атрофга сирли, вахимали сукунат чўккан эди. Хаммамиз ҳар ёққа зир югуриб чақира бошладик:

- Зўра-ю-ю?!
- Зухра опа а-а!
- Кеннойи-и!

Холдан тойиб, терлаб кетдим.

Тонг ёришиб, тоғ томон қизариб келар, кунботар томондан, қирлар ортидан ўзимизнинг ҳай-қириғимиз акс садо бўлиб қайтар эди: «Ю-ю-ю!», «А-а-а», «И-и-и».

Охири тонг отиб кетди. Башор опа уйқусизликдан қизарган кўзлари билан Олимжонга чақчайиб сўроқ қила бошлади:

- Ростини айт, бола! Қачон сув обкелувдинг?
- Ой чиққанда! Олимжон гоҳ менга, гоҳ Башор опага олазарак қаради. Худо урсин, кеннойимга сув обкеганим рост.
  - Соат нечайди ўшанда?
- Қаёқдан билай! Олимжон бурнини тортиб,
   елкасини қисди. Ой энди чиққанди.

Учовимиз ҳам талмовсираб қолгандик. Ориф оқсоқолга нима деймиз? Шу келинини, айниқса, яхши кўради. Ерга қўйсам чанг, осмонга қўйсам

гард юқади, дейди. Фарзанд кўрмагани учун кўнгли ярим деб авайлайди. Шўримиз қурсин! Балога қолдик. Худо кўрсатмасин, Зуҳра келинга тирноқча озор етган бўлса Оқсоқол аяб ўтирмайди. Башор опаниям, мениям қийма тахтага тортиб чучвара қилиб тугиб ташлайди!

Қизиқ, иккита кап-катта одамнинг хаёлига келмаган гапни Олимжон айтди:

– Нега қўрқасиз, опа! Кеннойим чарчаган бўлсалар, уйга кетгандирлар.

Рост айтади Олимжон. Бир ҳафтадан бери уйқу йўқ. Зуҳра келин чарчаган, уйқуси келган, бор-е деб уйига кетган. Шу...

Қишлоққа кириб борганимизда Башор опа тўсатдан тўхтаб, менга ўгирилди.

– Зуҳра тракторни ташлаб уйига кетганига ишонмайман. Бир гап бӱлган.

Юрагимга яна вахима ўрмалади. Унда қаёққа кетади?

Кунгурадор дарвозадан киришимиз билан Холпош хола пешвоз чиқди. Нимча кийиб олган, бир қўлида хурмача: қатиқ ивитмоқчи шекилли, хурмачани ювиб, сувини силқитиш учун тўнкариб ушлаб турибди.

– Вой айланай сиздан, бормисиз? – деб Башор опанинг елкасига хурмача билан туртиб кўришди. – Робия қизим, эсон-омонмисан? Ишинглар битдими? Зўра қани?

Башор опа ялт этиб менга қаради, мен унга! Холпош хола ҳовли ичкарисига, ошхонага қараб

қичқирди:

– Потма-ю! Чойингни тезлат, болам, меҳмон келди... Чоймиш-а!

Башор опа мингиллаб, бир нима баҳона қилди. Иккаламиз Оқсоқолнинг дарвозасидан узун-қисқа булиб чиқдигу келган йулимиздан орқага югур-

дик. Қуёш кўтарилиб қолган, ҳайдалган ер устида нимтатир буғ таралар, тупроқнинг майин, дилни орзиқтирувчи иси димоққа урар эди. Кечаси тракторлар ўтган пайкалларни яна айланиб чиқдик. Шунақа қилсак, Зуҳра келин топиладигандек, дала ўртасида тўхтаб қолган тракторнинг тагига қайта-қайта мўраладик.

Йўқ! Зухра келин ердаям йўқ, кўкдаям! Одам тугмача эмаски, шудгорга тушиб йўқолиб қолса! Бир бало бўлган. Иккаламизнинг кўнглимиздан шу гап муттасил ўтиб турса ҳам, Башор опа менга, мен унга қарашга ботинолмасдик. Гўё кўзимиз кўзимизга тушса шу андишани албатта бир-биримизга айтадигандек... Охири дала бошидаги тутзор томонга кетдик.

Бултур пилла пайтида каллакланган тутларнинг кузда қайтадан ўсган ялангоч навдалари нола қилиб, осмонга қўл чўзиб турганга ўхшар, аммо кўклам келганини ҳис этиб, ожиз, нозик тугунчалар чиқарган, «кўриб қўйинглар, мен ҳали ёшман, яшашни хоҳлайман», деб хитоб қилаётгандек эди.

Иккаламиз икки ёқдан тутзорга кириб, қуриб қолган ариқ ичига ёзилган эски пўстакда ухлаб ётган Олимжоннинг устидан чиқиб қолдик. Бола бари бир болада! Олимжон мушукдек ғужанак бўлганча пишиллаб ухлар, бошидан дўпписи тушиб, пешонаси терлаб кетган, нарироқда пачоқ челак тўнкарилиб ётарди. У ора-чора тамшаниб қўяр, негадир жилмаярди. Хаёлимга келган ғалати ўйдан ўзим сесканиб кетдим. Тушида Очил акаси билан гаплашяпти. Ўлган акаси билан...

Башор опанинг қаҳри қаттиқ экан. Боланинг елкасига жаҳл билан туртди.

- Typ!

Олимжон сапчиб туриб чўккалади. Иягига оққан сўлагини кир кафти билан сидириб атрофга аланг-жаланг қаради.

– Сув обкелайми? – деди тўнкарилиб ётган пақирга талпиниб.

Башор опа унинг кўзига чақчайиб тикилди.

- Шошма. Ростингни айт: Зухра қани?

Олимжон бошини елкасининг ичига тортиб қунишди.

- Қаттан биламан? Кечасиям айтдим-ку. Ой чиққанда бор эдилар...
- ...Башор опа Олимжонга қанақа дағдаға қилган бўлса, пешиндан кейин Ориф оқсоқол ҳам Башор опага шунақа зуғум қилди:
- Зўрани келиниммас, қизим деганман, биласан-а? Трактор ҳайдасин деганингда айтганман: қизимнинг бошидан бир тола соч ҳаддорат узилса, сени сўяман деганман! Топ! Ҳозир топасан!

Шу гап чиқиши билан Оқсоқолнинг ёнидан жилмай қолган бобом қулини пахса қилиб юпатди:

– Жа, оласан-да, сенам! Қудангникига кетган, билдингми! Онасини соғинган. Шу!

Оқсоқол кафтини тўлдириб нос отаркан, бобомга ижирганиб қараб кўйди:

- Бориб келдим, у ёқда йўқ.

Башор опа иккаламиз ичимизда қиринди ўтиб, бир-биримизга қарадик.

- Ҳай овсар! Бобом жаҳл билан чийиллади. Сени қадаминг билан Зуҳрани қадами бир эканми! Сен ҳаллослаб боргансан. Зўра секин-секин борган. Юр, яна хабар оламиз...
- ...Бобом ярим кечада уйга қориб-чарчаб келди. Ойим билан мен ярқ этиб қараган эдик, қовоғини солиб, бир оғиз «йўқ» деб қўйди.

Зухра келин бедарак йўқолди. Қудуққа тушган тошдек, на ўлигини дараги бор, на тиригини.

Икки орада Холпош хола билан Фотима келинга жабр бўлди. Фотима келин ҳар куни бизникига чиҳади. «Ўмон кўп синглим, ёмон кўп, биров ўлдириб кетган», дейди йиғлаб. Холпош хола йиғламайди. «Бир эмас, икки боламдан айрилганим етмасмиди, энди шу кўргилик бормиди», деб инграйди. Ойим овсинини юпатади-ю, кечалари менга ёрилади: «Сенга ёпишган жин-ажиналар Зўра бечорани хароб қилган, кўрасан, шўрликнинг ўлигини қирҳ кунда Бўрижардан топишади».

Умар закунчи ҳамма ёҳни остин-устин ҳилиб юборди. Ёнида Исмоил мелиса, Раъно келинойим уч киши бўлиб, ҳар куни тушликда далага келади. Аввал Башор опани, кейин мени сўроҳ ҳилишади:

– Охирги марта қачон кўрувдинг? Ким билан кўрувдинг? Нимага хабар қилмадинг?

Раъно келинойим ҳам қизиқ. Худди Зуҳра келинни мен ўлдиргандек, Закунчининг сўрогини, менинг жавобимни сўзма-сўз ёзиб олади... Биламан, Раъно келинойим мени ёмон кўради. Бултурги воқеадан кейин уйига қадам босмаганим алам қилса керак. Лекин ойим тоғамникига тез-тез бориб туради. Раъно келинойим ҳам бизникига келади, кўп эмас-ку, ҳарҳалай келиб туради. Келгандаям «яхшимисиз» деб елкамга қоҳади-ю, бошқа гапирмайди.

Хамма ҳаракатлар зое кетди. Районга хабар беришгани ҳам. Исмоил мелисанинг елиб югуриши ҳам. Охири ойим айтган гапга ишондим. Қирқ кундан кейин бечоранинг ўлигини Бўрижардан топишади...

Қирқ кун эмас-ку, орадан бир ҳафталар ўтганидан кейин тракторга сув кўтариб келган Олимжон қизиқ гап айтиб қолди.

– Кеннойим тирик бўлсалар керак, – деди ғалати илжайиб.

Кўнглимда илинж уйгонди. Бир нимани билади, бу шумтака!

- Тирик бўлса дараги чиқмасмиди, дедим кўзига тикилиб. Кўрасан, ўлиги яқинда Бўрижардан чиқади. Биров ўлдириб кетган.
- Ўлдирмаган, Олимжон вошиллаб буғ кўтарилиб турган тракторга сув қуяркан, яна илжайди.
   Кеннойимни яхши кўради.
- Ким? Олимжоннинг пақир тутган қўлидан маҳкам ушладим. Ким ўлдирмайди? Кимни айтяпсан?

Олимжон қўрқиб кетди.

- Хеч ким, деди ўзини орқага ташлаб. Мен билмайман.
- Менга қара, Олимжон, болани қучоқлаб олдим. Оқсоқол бувангникидагилар қон йиғлаб ўтиришибди. Ростингни айт, Зухра келинойингга нима бўлган? Тўгрисини айт, яхши биласан-ку, ўзинг!
- Айтиб берасиз-да! Олимжон ҳуркиб кўзини олиб қочди. Мен билмайман. Аммо кеннойим тирик.
- Хўп, дедим ялиниб. Хеч кимга гапирмайман. Фақат тўғрисини айт. Кеннойингга нима бўлди?
  - Онт ичсангиз айтаман!

Билдимки, Олимжон жудаям гапиргиси келиб турибдию қўрқяпти.

- Ҳеч кимга айтмайман, деб онт ичинг, деди зада бўлган қушчадек ҳурпайиб.
- Бировга оғиз очсам нон урсин! дедим шоша-пиша. – Зухра опа тирикми?
- Тирик. Козим ака ўлдирмайди. Кеннойимни яхши кўради! Ҳеч кимга айтмайсиз-а?!

Ниманидир тушунгандек бўлдим. Бултур, кеч кузда, тракторларни энди далага олиб чиққани-

мизда, шудгор қилинаётган пайкалда юрган, ҳарбий кийим кийган шапкали одамга кўзим тушган эди. Бир марта Зуҳра келиннинг трактори ёнига борганини ҳам кўргандим. Зуҳра келиндан сўрасам, «холаваччам, урушдан ярадор бўлиб отпускага кепти», деганди. Бу гап аллақачон эсимдан чиқиб кетган, ростини айтсам, эътибор ҳам бермагандим. Ўша гап нимага шу пайтгача хаёлимга келмаганига ўзим ҳам ҳайрон қолдим.

– Ким дединг? Анави... Козим аканг кўп келганми бу ерга? – дедим ўсмокчилаб.

#### Олимжон:

– Куздаям келувдилар... – дедию тутилиб қолди. – Онт ичдингиз. Ҳеч кимга айтмайсиз... Яна сув обкелайми? – У бўш челакни даранглатиб чопиб бораркан, шудгорга ботганча тўхтаб, ўгирилди. – Айтмайсиз-а, опа?!

\* \* \*

Мен-ку, ҳеч кимга оғиз очмадим. Гапириб нима қилдим? Бундан чиқди Зуҳра келин соппа-соғ. Шунинг ўзига шукур қилиш керакмасми?

Айтсам-айтмасам бугун ора очиқ бўлди. Дўмбирободда, Қонқус бўйида ярим кечагача ер ҳайдаб толиққан эдим. Билмадим, уйга келиб уч соат ухладимми, тўрт соатми. Кун чиқмасдан уйгониб кетдим.

Ойим сопол пиёлада олма-чой узатаркан, чамаси боядан бери ичида қизиб ётган гапни ҳовлиқиб айтиб қолди:

– Етти номус – бир ўлим, болам! Шарманда бўлдик, қизим, шарманда бўлдик! Оқсоқол келинини тутиб кепти! Ўйнаши билан қочиб кетган экан, яшшамагур! – Ойим икки қўллаб юзини юмдалади. – Зўра ўлгур бузуқ экан! Дўрмон деган жойда ўйнаши билан бекиниб ётган еридан қайнотаси

тутиб кебди. Иккаласиниям бўйнига арқон солиб обкебди. Юрт устида юрган Оқсоқол бундоқ диёнатсизликка қандоқ чидайди! Сўяди! Тикка сўяди! Шўримиз қурсин!

Ўтирган жойимда тахта бўлиб қолдим. Ойим тўгри айтади. Ориф оқсоқол бунақа шармисорликка чидамайди. Иккаласиниям чавақлаб ташлайди!

Сапчиб ўрнимдан турган эдим, ойим этагимга ёпишди.

- Кирма у ёққа! Қиз бола нарса, нима зарил сенга! Бўшашиб, туриб қолдим. Олимжон гапирганда Зухра келиннинг тириклигини эшитиб хурсанд бўлган эдим. Қозир уни ёмон кўриб кетдим. Тўгрида! Оқсоқол бунақа иснодни қандоқ кўтаради? Холпош хола-чи! Бир эмас, икки ўглидан баравар айрилган бўлса! Устига-устак келини бунақа қилиқ қилса! Зухра келин Зокир акани яхши кўрарди-ку! «Қорахат» келса бўлди эканда! Ўзимнинг янгам-чи? Раъно кеннойим-чи? Шомурод тогамдан «қорахат» келганиям йўқ-ку. Тирик-ку! Эри тирик бўла туриб... Одамлар нимага бунақа ёмон...
- Бувангга тайинладим... Ойим бир бурчакка маъюс термулиб ўтираркан, куйманиб тушунтирди. Оқсоқолни инсофга чақиринг, дедим. Зора раҳм қилса... Яхшими-ёмонми бировнинг боласи... Аммо сен кирма...

Нимага кирарканман! Эрининг кўзига тупроқ тўлмасидан туриб, бировнинг этагига осилиб кетган хотинни томоша қилишгами? Зуҳра келин унақа эмасди шекилли... Зокир ака ўлганида сочини юлиб қандоқ додлаган эди. Одамни билиб бўлмас экан-да!..

Иложи борича тезроқ ўтиб кетаман, десам ҳам Оқсоқолнинг дарвозаси олдида тўпланиб турган тумонат одамни кўриб беихтиёр тўхтаб қолдим. Бола-чаҳа, эркак-хотин... Бировнинг елкасида

кетмон, бирининг қўлида, урушдан олдин туғилган, тойлоқдек бўлиб қолған боласи... Бирининг юзида ҳайрат, бириникида ғазаб, яна бири лабини буриб мунофиқона илжайиб турибди. Нима кераги бор? Ишлари йўқми? Текин томошага мунча ишқибоз бўлишмаса бу одамлар... Бировнинг кулфатини томоша қилиш шунчалик роҳатми?

Энсам қотиб бурилиб кетаётган эдим биров билагимдан ушлади. Қарасам – Башор опа! Ранги қув ўчган. Уям кечаси билан ухламаган шекилли, кўзлари қовжираб турибди. Бошига дакана танғиган, рўмол остидан яккам-дуккам оқарган сочлари чиқиб турибди.

- Юр, Робия! деди қўлимдан силтаб. Юр! Кирмасак бўлмайди!
- Мен нима дейман, опа! Билагимни чиқариш учун юлқиндим. – Мени нима ишим бор?
- Зухра ўлиб кетса майлими? Башор опа кўзимга илтижо билан термилди. Юр, Оқсоқолга ялинамиз. Бечоранинг ёш жонига жабр қилмасин.

У гапиртиришга ҳам қўймай, қўлимдан судраб кетди.

Оломон орасини ёриб ҳовлига кирдик. Энг аввал Оқсоқолга кўзим тушди. Айвон ўртасида елкаси баланд курсида, устига дастурхон ёпилмаган хонтахта олдида ўтирибди. Эгнида оқ яктак, оқ иштон... Айвон токчасида ёгоч бандли телефон турибди. Кейин Зуҳра келинни кўрдим. Айвон пешида икки букчайиб ўтириб олган. Сочини қирқ кокил қилиб ўрган экан. Икки қўллаб сочини чангаллаб юзини тўсган. Қандайдир ингичка тортиб кетгандай, гавдаси муштдек бўлиб қолгандек...

Башор опа интилиб, айвон олдига борди. Шундаям билагимни қуйиб юбормади.

– Оқсоқол... – деди илтижо билан. – Зуҳрахонни мен биламан. Унда гуноҳ йўқ! Балки битта-яримта Худо бехабар... Жон Оқсоқол!

Ориф оқсоқол «кишт» деб товуқни ҳайдагандек кафтини тескари қилиб силкитди.

Башор опанинг дами ичига тушиб кетди. Икки қадам орқага чекиндию «энди сен гапир», дегандек билагимни қаттиқ қисди. Мен нима дей? Нима ҳаққим бор?

Бобом ҳам шу ерда, ичкарида экан. Пилдираб келиб, Оқсоқолнинг елкасига қўл ташлади.

– Ўш-да, – деди юпатиб. – Кичикдан хато, каттадан узр, биродар. Худо хайрингни берсин, кечирақол энди.

Зуҳра келинга разм солдим. У ҳамон юзини тўсиб ўтирар, қирқ кокил сочи елкаси билан битта бўлиб, ерга тўкилиб турар, сочининг учи тупроққа қоришган эди.

Оқсоқол қаддини ростлади. Юзи қахрли, соқоли титраб турарди.

– Ҳой! – деди ҳайқириб. – Баққа ке!

Довлини тўлдирган оломон Оқсоқол ҳайқирган томонга – ошхонага ўгирилди. Ошхонанинг пастак эшиги очилиб, ихчам гавдали, ҳарбий кийим кийган, бошяланг йигит чиқди. Оёғидаги этиги лойга беланган, сийрак соқоли тикандек ўсган, сочи ҳурпайиб икки қулоғи устига қайрилиб тушган, ҳарбий кийимда бўлишига қарамай, елкасида погон йўқ эди.

Оломон жунбишга келиб ув тортиб юборди.

- Ҳароми! деди кимдир ҳайқириб.
- Нахс-касофат!
- Ур, ур, итваччани!

Дахшат ичида Башор опанинг пинжига кирдим. Йўқ, уни Оқсоқол сўймайди. Оломоннинг ўзи тошбўрон қилиб ўлдиради! Уруш бошига солган жудоликлар ҳаққи, қон ютиб юргани ҳаққи, номус ҳаққи, жангда жон фидо қилган аскарларнинг руҳи поки ҳаққи ҳозир тошбўрон қилади! Оломон орасидан аллақандай аёл қулоқни тешиб юборгудек чинқирди:

– Ур, оломон! Ўзбекчиликка доғ туширган чўчқани ўлдир!

Бурчак томондан Парча опанинг дўриллагани эшитилди:

- Қўйсайла-чи. Нима кераги бор...

Аммо унинг овози қий-чув орасида кўмилиб кетди.

Оломон бирдан ҳаракатта келди. Кетмонлар, паншахалар офтобда ялтиради. Даҳшатдан дағдағ титраб Башор опанинг бағрига юзимни яширдим. Лекин ўша заҳоти янграган ёввойи чинҳириҳ ҳайрилиб ҳарашга мажбур ҳилди.

- Козим ака! Козим ака!

Зухра келин ўрнидан отилиб турди. Сочлари паришон ёйилганча кўзидан тирқираб ёш оқиб, аскар бола томонга талпинди. Бирок икковининг орасини оломон тўсиб қўйган, кетмонлар, паншахалар тахдидли ярақларди.

- Бас! Оқсоқолнинг овози шу қадар ҳокимона гумбурладики, Зуҳра келин ҳам, кетмон кўтарган оломон ҳам, ранги бўзариб кетган аскар йигит ҳам турган жойида қотиб қолишди.
- Ўтир! Оқсоқол бу гапни Зуҳра келинга айтди. Лекин бошқалар ҳам жой-жойида тек қотди.
- Баққа ўтир! деди у вужуди титраб. Сенам баққа ке!

Аскар йигит ранги бўздай оқарганча одамлар орасидан ўта бошлади. Оломон еб қўйгудек бўлиб тишини гижирлатар, мункиллаб қолган чоллар, асабий қалтираётган хотинлар худди нопок, ши-

лимшиқ нарса баданига тегиб ҳаром қиладигандек ирганиб йўл бўшатарди. Йигит гарангсиб айвон олдига келди.

– Ўтир! – деди Оқсоқол паст, тахдидли оҳангда.

Йигит индамай келиб Зухра келиннинг ёнига чўкди. Оломон ғазабга миниб, баттар жунбишга келди.

Яна ўша чинқироқ аёл овози қулоқларни тешди:

- Харом қилди! Иснодга қолдик!

Ким? Ким бу шунчалик чинқираётган? Билмадим. Ит эгасини танимайдиган оломонда ким билиб ўтирибди?

Парча опанинг дўриллаши бу сафар аниқ эшитилди:

– Вой, нима қипти? Нима бўпти ўзи?

Оломон орасида ҳуштак чуриллади. Зум ўтмай Исмоил мелиса билан Умар закунчи айвонга чиқиб келишди.

– Тарқал! – Исмоил мелиса мўйлови тагига хуштагини тиқиб чуруллатди. – Тарқал ҳамманг! Очиб қўйибдими сенларга!

Оломон қилт этигиси келмасди.

– Жим! – Умар закунчи ўнг қўлини баланд кўтарди. – Тише! Бизнинг илгор тракторчини, стахановчи Зухрахонни йўлдан урган дезертирни, қанақа жазолашни ўзимиз биламиз. – У Зухра келиннинг ёнида бошини қуйи солиб ўтирган аскар йигитга нафрат билан бурилиб қаради. – Тур ўрнингдан, дезертир!

Аскар йигит сапчиб ўрнидан турди. Бир ҳатлаб айвонга чиҳди.

Қизиқ, унинг юзидаги айбдор, муте ифода ўрнини ғазаб эгаллади. Митти кўзлари ёниб кетди.

К-ким? К-ким дезертир? – деди дудуқланиб.
 Негадир боши афсус-надомат билан муттасил чай-

қала бошлади. – М-м-мен Смоленскда қ-қон к-ке-чиб юрганимда с-сен қаёқда эдинг, х-х-хезалак! С-сендақаларни о-осиш к-к-керак! О-о-ёғидан о-сиш керак!

Унинг оғзидан кўпик сачраб кетди. Боши боягидан баттарроқ чайқала бошлади. Шундагина буйигит бошини атайлаб чайқамаётганини, касал эканини англадим.

Закунчининг ранги гезариб кетди.

– Ол буни! – деди айвон пешида серрайиб турган Исмоил мелисага қараб. – Обориб тиқ жойрастонига!

Исмоил мелиса бир ҳатлаб аскарга рўпара бўлди. Йигитнинг қўлини ҳайирмоҳчи эди, Зуҳра келин учиб ўрнидан турди.

- Қўйвор! деди мелисанинг юзига чанг солиб.
   Тегма! Қўйвор! Козим акам сенга ўхшаб кавакка бекиниб ётганмас!
- Жим! Оқсоқол шу қадар қахр билан ҳайқирдики, Закунчи кўзларини пирпиратиб беихтиёр орқага чекинди. Исмоил мелиса гоҳ аскар йигитга, гоҳ Оқсоқолга талмовсираб қаради. Йигит бошини муттасил ликиллатиб Зуҳра келиннинг елкасига қўл ташлади.
- Ҳой, мўйлов! деди Оқсоқол Исмоил мелисага чақчайиб. Ким чақирди сени?

Мелиса нажот кутгандек Закунчига қаради.

- Жамоат тартиби бузилган, деди гарангсиб. Бизнинг вазифамиз...
- Сен нонни очиридини текшир, хўпми?! Оқсоқол Умар закунчига юзланди. Сизга нима керак, ўртоқ Хажайип?

Умар закунчи жахл билан қошини чимирди.

- Стахановчи колхозчимизни обкочган даюсга...

- Истихонипчи колхозчи мени келиним, тўгрими?– Оқсоқол тишини ғижирлатиб таъкидлади. Зўра менинг келиним, шундоқми?
- Бунақа шармандаликка сиз чидасангиз, биз чидолмаймиз! Умар закунчи истеҳзо билан ҳовли тўла оломонга ўгирилди. Ўртоқ колхозчилар! Шу кунгача колхозимизда бунақа незаконний иш бўлганмиди?

Ажаб, бу сафар оломон гувилламади. Ҳатто бояги чинқираётган аёлнинг ҳам овози ўчди. Ҳамма Оқсоқолнинг огзига қараб турарди. Ҳамон Башор опага суянганча, сеҳрланиб қолгандек гоҳ Ориф оқсоқолга, гоҳ талмовсираб қолган Закунчи билан Исмоил мелисага, гоҳ боши муттасил чайқалган кўйи Зуҳра келиннинг елкасига қўл ташлаб турган аскар йигитга мўлтайиб қарардим. Орага совуқ, аммо битта учқун тегса портлаб кетадиган таранг сукунат чўккан эди.

Жимликни биринчи бўлиб, Закунчи бузди.

– Қизиқ, – деди лабининг бир бурчи билан илжайиб. Шунақа истеҳзоли кулдики, ингичка мўйлови қийшайиб кетди. – Белида белбоғи бор одам шундоқ иснодга чидаса, майли, биз нима дердик.

У Оқсоқол эл-юрт ўртасида доим айтадиган гапни юзига солиб, мўлжалга бехато урган эди. Оқсоқол ўқ егандек қалқиб кетди. Шахт билан эгилган эди, қўлида болта ярақлади. Хонтахта остида ётган экан. У болтани қаҳр билан боши устида баланд кўтарди.

– Ўзингни бос! – Бобом қўшқўллаб Оқсоқолнинг билагига ёпишди. Оқсоқол болтани силкитган сайин, бобом ҳавода муаллақ осилиб қолар эди. – Аввал ўзингизни эплаб олинг, раис! – деди бобом Закунчига кўзини ола-кула қилиб.

Шу пайт уй ичкарисидан дод-фарёд эшитилди. Икки аёл кетма-кет отилиб чиқишди. Бири бобомни болтадан нари суришга уринаёттан Оқсоқолга ёпишди. Бу Холпош хола эди.

– Дадаси! Гуноҳга ботманг, дадаси! – деди чирқиллаб. – Майли! Билганини қилсин! Ўғлимнинг уволи тутсин! Болам деб бағримга босгандим. Илоё косаси оҳармасин!

Иккинчиси – Фотима келин экан. Дафъатан таниёлмадим. Бир кечада қариб қолған, қовоқлари шишиб кетган, кўзида маъно йўқ эди. У Зуҳра келиннинг бошига қуюндек ёпирилиб келди.

– Жувонмарг! – деди синглисининг эмас, ўзининг сочини юлиб. – Илоё Зокир аканинг арвохи урсин, хўпми? Сендек синглим йўқ, билдингми! Отамнинг арвохига солдим, беномус! Илоё бу кунингдан баттар бўл, шарманда!

Бобом Оқсоқолнинг қўлидаги болтага яна ёпишди.

- Бу ёққа бер, жинни! - деди чийиллаб.

Оқсоқол болтали қўлини бобомдан кучи борича силтаб тортди. Тиззаси билан Холпош холанинг қорнига тепди.

– Йўқол!

Бобом айвон бурчагига учиб кетди. Холпош хола бечора наматга чалқанча йиқилди, оғзидан кўпик чиқиб инграй бошлади. Фотима келин синглиси бу ёкда қолиб қайнонасига ёпишди.

- Ойи, туринг, ойи, деди илтижо қилиб. Ойижон, мен борман-ку! Невараларингиз бор-ку!
- Шунақа дегин! Оқсоқол болтани саланглатиб Закунчи томонга икки қадам босди. Закунчи чекинмади. Кўзларини пирпиратиб чирт этиб тупурди.
  - Омади гапни айтдим-да! деди ранги ўчиб.
- Дума! Оқсоқол тўсатдан бобомга ўгирилди. Югур! Афанди домлани обке!

Айвон четида йиқилиб ётган бобом каловланиб ўрнидан турди. Оғи кенг иштонининг бўшаб кетган боғичини шоша-пиша қайтадан боғлашга уринди.

- Нима? деди овози ингичкалашиб.
- Қулоғинг карми?! Оқсоқол бобомни чопиб ташлайдиган важоҳатда болтани кўтарди. Афанди домлани обке! Оёғини ерга тегизмай обке!

Бобом маҳсили оёғига калишини чапақай кийиб ҳовлига отилди.

Яна сукунат чўкди. Айвон ўртасида худ-бехуд бўлиб ётган Холпош холанинг инграши, қайнонасининг юзига сув сепаётган Фотима келиннинг «ойижон» деб ёлворгани, ойимнинг (у қачон айвонга чиқиб борганини кўрмай қолибман) «овсинжон, кўзингизни очинг», деб шивирлаши аниқ эшитила бошлади.

- Ўв, итвачча! Оқсоқолнинг гулдураган овозидан сесканиб кетдим. Ҳайкалдек қотиб турган Башор опанинг пинжига баттар тиқилдим.
- Сенга айтаяпман! Оқсоқол аскар йигитнинг бошига борди. Ўтир! Сенам! деди болта дастаси билан Зухра келиннинг гарданига нуқиб.

Аскар йигит ҳамон Зуҳра келиннинг елкасидан тутганча айвон пешига ўтирди. Иккаласининг ранги бўздек оқариб кетган, иккаласи ҳам муттасил титрар эди.

- Шу керакми сенга? деди Оқсоқол қахр билан.
- Ҳ-ҳа! Аскар йигит бошини сарак-сарак қилди. – Ях-х-хши кўраман... Ав-валам...
- Сендан сўраётганим йўқ! Оқсоқол болта тутган қўли қалтираб Зуҳра келиннинг бошига эгилди. – Керакми, сенга шу?!

Зухра келин кафтлари билан юзини яшириб бир нима деди. Йиглаб юборди.

– Гапир, минғилламасдан! – деди Оқсоқол ҳайқириб. Аммо энди товушида дағдаға эмас, инграшга ўхшаш оҳанг бор эди... – Отажон! – Зуҳра келиннинг бўғзидан йиғи аралаш нидо отилиб чиқди. Гапиролмай қолди. У юзини қўш-қўллаб яшириб олган, лекин ҳамон аскар йигитга суяниб ўтирарди...

Узун яктаги ерга тегиб оёғига ўралашаётган, кўзойнагининг бир ойнаси синган Афанди домлани бобом ёқасидан судрагудек бўлиб айвонга олиб чиқди.

Домла тавозе билан салом бераётган эди, Оқсоқол жеркиб берди:

– Эри ўлган хотин қанчадан кейин шаръий никохдан чиққан саналади домла?

Домла эсанкираб қолди.

- Эри дорулбақога рихлат қилган, деди минғиллаб, яъни, масалан...
- Гапни кўпайтирма! Оқсоқол дағдаға билан болтани силкитди. Рихлат-пихлатингни йигиштир! Одамга ўхшаб гапир. Эри ўлган хотин қанчадан кейин бошқа никоҳга киришга ҳақли?
- Эри дорулбақога рихлат қилган заифа олти ойдан кейин боши очиқ саналади, домла шундай деди-ю, енгил тортгандек атрофга олазарак қараб олди.
- Хўп! Оқсоқол ҳамон ҳуд-беҳуд бўлиб ётган Холпош холанинг бошида ўтирган Фотима келинга буюрди. Бор, бир коса сув обке!

Фотима келин боя қайнонасига сув сепган косани олиб ўрнидан турди. Гарангсиб, тўхтаб қолди. Аммо қайнотасининг сўзини икки қилмади. Одамлар орасини ёриб ошхонага югурди. Тўкиб-сочиб косада сув олиб келди.

– Қўй, мундоқ, – деди Оқсоқол оппоқ қошини учириб.

Фотима келин сувни хонтахта устига қўйди-ю, тағин Холпош холага ёпишди.

- Ойи, деди ялиниб. Кўзингизни очинг.
- Халойик! Ориф оксокол оломонга юзланди. - Зўрани келиниммас, қизим дегандим. Афсус, Худо уни боладан сиқди. Агар ақалли битта боласи бўлганида, Зокиримдан битта зурёд қолганида, - унинг овози титраб кетди. - Зўра менга битта невара туғиб берганида мана шу қилмиши учун ўз қўлим билан чопиб ташлардим. Неварамни тирик етим қилганидан кўра, ўлик етим қилиб ўзим боқардим. Нораста болани харом онанинг қўлига бериб қўймасдим... Шокиримга берган ту ёғини Зокиримдан аяди. Давлат билан фарзанднинг эрта-кечи йўқ. Болам тирик бўлганида Зўра қўчқордек ўғил туғиб берса ажабмасди. Уруш бўлмаганда, балки шу бугун невара тўйи қилармидим... -Оксокол энтикиб колди. Юзини четга бурди. Кўзи намланди-ю, аммо йигламади. Хаво етмаётгандек беш-олти марта чуқур-чуқур нафас олди-да, давом этди... - Нима қилай, пешонамга сиғмаган экан. Зўраям ўзимнинг фарзандим. Йўлига тўғаноқ бўлсам, гуноҳга ботаман. - У кутилмаганда икки букилиб одамларга таъзим қилди. Қўлидаги болта тарақлаб ерга тушди. - Мени маломат қилма, халойиқ! - деди илтижоли оҳангда. - Ҳозир манави айтди, – деди тирсаги билан Закунчига имо қилиб. - Белингда белбоғинг йўқ, деди. Майли, ҳар кимнинг гунох-савоби ўзига. Белимда белбогим борми-йўқми, унисини эл-юрт билади. Аммо-локин бошқа иложим йўқ. – У соқоли титраганча домлага буюрди. - Бошла!

Боядан бери айвон ўртасида чўзилиб ётган Холпош хола ярқ этиб кўзини очди.

– Дод! – деди тўлғаниб – Зокир! Болам! Қандоқ чидайман. Илоё арвохинг урсин, жон болам! – Амаллаб қаддини ростлади-да, кўзи тўла ёш билан

Зухра келинга юзланди. – У дунё-бу дунё косанг оқармасин, жувонмарг! Кун кўриб, куни рўшнолик кўрмагин, имонсиз!

- Қарғаманг, ойижон! Фотима келин қайнонасига ёпишди. Дуоибад қилманг синглимни! Майли, бир кунмас, бир кун ўзи...
- Ман санга нима ёмонлик қилувдим, жувон ўлгур! Боламнинг кўзига тупроқ тўлмасдан...
  Холпош хола пешонасига шапатилаб ура бошлади.
  Болам! Жоним болам!
- Бас! Оқсоқол хотинининг устига бостириб бордию бирдан чўккалаб қолди. Қўй, хотин, ёмон ният қилма, деди Холпош холанинг оппоқ сочлари ёйилган пешонасини силаб. Қўй, онаси, буям боланг-да! Буниям бахтини ўйлашинг керак-да, хотин. Сен билан мен эртага бормизми-йўқми... Ана, домла айтди. Эри ўлган хотин олти ойдан кейин боши очиқ бўларкан. Зўра бир ярим йилдан бери бева-ку, онаси.

Холпош хола баттар ув солди.

- Болам, жон болам, деди кўксига муштлаб. Қандоқ чидайман!
- Нимага анқаясан, ҳов! Оқсоқол оғир қўзғалиб ўрнидан турди. Бўлсанг-чи! деди домлага.

Бир зумда ҳамма расм-русум тугади. Холпош хола сўнгги бор оҳ чекди-ю, ранги докадай оҳариб, боши шилҳ этиб ёнига тушди. Беҳуш холани бир ҳўлтиғидан ойим, бир томонидан Фотима келин ҡўтариб, судрагудек уйга обкириб кетишди.

Ховлидаги оломон, айвонда турган бобом, Умар закунчи, Исмоил мелиса – ҳамманинг оғзи очилиб қолган эди.

Зухра келин каловланиб ўрнидан турди. Яқин келиб ўзини Оқсоқолнинг оёғига ташлади.

- Отажон! Отажон! - деди илтижо билан.

Оқсоқол оёғини тортмади, аммо Зуҳра келинга қарамади ҳам. Шошилмай ўрнидан турди-да, ҳозиргина Холпош холани судраб обкириб кетишган уйга йўл олди. Зуҳра келин чўккалаганча ўша томонга қўл чўзди.

– Ота... – деди ялинчоқ, умидсиз оҳангда.

### ОЛТИНЧИ КИСМ



# БИРИНЧИ СИНФ ЎҚУВЧИСИ МУЗАФФАР ШОМУРОДОВ ХИКОЯСИ

## Бозордаги ўгри

Ойим елкамга туртиб уйготганида энди тонг отаётган эди. Деразадан ғира-шира нур тушиб турибди. Ёнимда укам ухлаб ётибди. Тўгри ухласа майли, нуқул иккала оёғини менинг қорнимга кўндаланг ташлаб ётади. Тўгрисини айтсам, Омон йўлга кирганидан бери менинг ишим кўпайди. Пайт пойлаб туриб, кўчага пилдираб қолади. Ойим чирқиллайди: «Укангга қара, Музаффар, арава босиб кетмасин!» Кўчамиздан бир кунда уч марта арава ўтса ўтади, бўлмаса йўқ. Шундаям ойим хавотир олаверади. Омон хам шўх-да ўзи. Дуч келган эшикка бошини тиқади. Худди дайди эчкига ўхшаб! Тайёрлаб ўтирган дарсимни ташлаб, кетидан югураман. Тағин сал уришсам, дарров ойимга чақиб беради. «Ака бижий», дейди. Кечасиям тинчлик йўқ. Иштончан югуриб келиб ёнимга ётиб олади. Хаммасиям майли-ку, уйқусида менга қараб чоптириб юбориши ёмон. Қилар ишни у киши қиладилар-да, эрталаб мактабга шошиб турганимда иштонни мен алмаштираман.

Йўқ, бугун унақа «хунар» кўрсатмабди.

– Ҳали вақтли-ку! – дедим ғингшиб. – Мактабга ҳаммадан олдин бораманми?

– Вой, даданг кеча нима девдилар? – Ойим елкамга қоқди. – Бўла қол ўғлим, «пассажир» кетиб қолади.

Кўзим ярқ этиб очилиб кетди. Кеча дадам «сени бозорга обораман, бош-оёқ кийим обераман», деган эди-ку. Уйқум дарров ўчди. Дадам бозорга олиб тушиб ясантиради-ю, мен йўқ дейманми. Ховлидан оқаётган ариқчадаги лойқа сувда юзимни шапир-шупир ювиб келсам дадам аллақачон отланиб олибди. Оёгида мойланган этик, носранг шим, жужунча китель кийиб олган. Мўйловини тарашлаб атир ҳам сепибди. Уйни атир ҳиди тутиб кетганидан билдим.

- Кетдикми, ўғлим? деб қўлимдан тутаётган эди, ойим уришиб берди.
- Ичига бир пиёла иссиқ кирсин. Оч наҳор кетадими бола?

Бир бурда нон билан шоша-пиша чой ичишга тушдим. Ойим рўпарамда ўтирар, дадам остонада папирос тутатиб турар эди. Дадам энди тамаки чекмайди, папиросга ўтган. Папирос қутисидаги ёзувни биламан: «Беломорканал». Савод бор-да, бемалол ўқиймиз!

Ойим пиёлага чой қуяркан, дадамга юзланиб, хўрсинди.

– Дадаси, шу кеча яна отамни туш кўрдим...

Дадам, бетоқат бўлиб турганига қарамай, хотиржам жавоб қилди:

- Ҳа, Ҳусан поччам яхши одам эдилар...
- Бобомнимас! Ойим зардалироқ оҳангда тушунтирди. Ўзимнинг отамни... Оқ от миниб юрганмишлар...
- Э... шунақа демайсанми, Роби, деди дадам ўйчан оҳангда. Оғзидан паға-паға тутун чиқариб хўрсинди. Яхши туш кўрибсан, онаси! Бундан чиқди маълим эрта-индин қайтиб қолса ажаб-

мас... – У ярқ этиб менга қаради. – Бўлақол, ўғлим... Бозор тарқаб кетмасин.

Ойим қуйган чойни ҳовлиқиб ичганча дик этиб ўрнимдан турдим. Дадам билан ойимнинг ҳозирги гапини ўйлаб ўтиришга вақтим йўқ эди. Ростини айтсам, бодом гуллаганида қизамиқ бўлганимга ҳозир жуда хурсанд эдим.

...Яхшиям қизамиқ бўлганим. Ўшанда дадам ваъда қилган эди-да. «Кўчага чиқмай яхши бола бўлиб ётсанг, тузалишинг билан бош-оёқ ясантираман, гирой», деган эди. Мана, сўзининг устидан чиқяпти. Қизамиқ ўзи ёмон нарсамасу чилласи чиқмагунча ётиши чатоқ экан. Эсимда, қиш охирлаб, бостирманинг қамиш томидан сариқ сумалак осилган куни мактабдан бошим огриб қайтдим. Чой ҳам ичгим келмади. Ойим пешонамни ушлаб кўрдию қўрқиб кетди.

 Вой, иситманг бор-ку, сумалак шимдингми, ростингни айт! – деди.

Ўлай агар сумалак шимганим йўқ эди.

– Шамоллабсан шекилли, – деди ойим чирқиллаб. – Ўралиб ёт, зора босилиб қолса.

Ўралиб ётиб баттар бўлдим. Бошим сирқиллаб огрийди, ҳамма ёгим қизиб кетяпти. Кўзимни юмсам ҳўкизми-ей, сигирми-ей сузмоқчи бўлади. Йўтал тутади. Бир маҳал кўзимни очсам тепамда «Қора аммам» турибди. У негадир қулогимни орқасини текширди. Кейин кўйлагимни кўтариб, қорнимни ҳидлади.

– Қўрқма, қизим, – деди ойимга қараб. – Гул ҳиди келяпти. Гул тошади.

«Қора аммам» қизиқ, нима, мен дарахтманми гуллаб?

Ойим негадир жуда хафа бўлди.

- Пешонам қурсин, деди хўрсиниб. Шу етмай турувди, бола бечорага.
- Қизамиқ қутлуғ дард, Робия. «Қора аммам» устимни ўраркан ойимни юпатди. Ҳаммагаям тошадида. Қизил ипагинг борми?

Ойим шоша-пиша бир қулоч қизил ипак олиб келди. Аммам билагимга ипакни боғлади.

– Насиб этса қирқ кунда чопқиллаб кетасан, болам, – деди юпатиб.

Қирқ кун? Энди мен қирқ кун ётишим керакми? Хечам-да!

Тахмондан қизил, оғир кўрпани олаётган ойим хўрсинди:

- Энди Омонгаям тошади.
- Мижози бир бўлса тошади. Бўлмаса йўқ, «Қора аммам» хотиржамлик билан ойимга, юзланди. Нафаси баттар гижирлаб ичидаги «одамчалар» бор овозда ҳуштак чала бошлади. Бари бир тошиши керакда. Қайтага шу ёшда қутулиб олгани яхши. Қизамиқ ўлгандаям тошади, қизим.

Ойим солиб берган қизил кўрпага ўралиб ётарканман, баттар исиб кетдим. Бошимда ўтирган «Қора аммам»нинг ҳарсиллаб нафас олишидан ўзим ҳам бўғилиб кетаётгандек бўлардим.

Ростдан ҳам уч кунда ҳамма ёғимга қип-қизил, майда «яра» тошиб кетди. Аъзойи баданим оловдек ёниб кетаётганини ҳис қиламану ўрнимдан туролмайман. Кечалари уйғонсам бошимда ойим мук тушиб ўтирган бўлади. Кўзимни очишим билан у ҳам чўчиб уйғонади.

Гултожихўроз дамладим, озгина ичасанми? – дейди кафтини пешонамга босиб.

Яхшиям Комил бува бор экан. Уч-тўрт марта тепамда сийрак соқолини селкиллатиб кулимсираб ўтиргани, «қани буни ичиб юборинг-чи, азамат йигит», деб тумшуғимга аллақандай ачимсиқ ҳид анқиб турган пиёлани тутгани эсимда. Қизиқ, ўшандан кейин дарров енгил тортдим.

Жудаям қирқ кун эмас-ку, йигирма кунларда тузалиб қолдим. Лекин «Қора аммам» бари бир ўрнимдан тургизмади.

– Энди кичик чилласи чиқди, каттаси чиқмагунча ётсин, – деб тайинлади ойимга. – Майли, менам уйимга бора қолай энди.

«Қора аммам» рост айтган экан, Омоннинг мижози бошқа булгани учун укамга қизамиқ юқмади.

– Питтилламасдан тинч ётсанг, – деди дадам тайинлаб, – бошдан-оёқ ясатаман. Куёвбола бўп кетасан.

«Куёвболаси» билан ишим йўқ-ку, аммо дадам бугун мени бош-оёқ ясантирмоқчи.

Ота-бола кўчага чиққанимизда, тонг ёришиб кетган эди. Ер ҳали яхши қуримаган, деворларнинг кунгай этаклари селгиб қолган бўлса ҳам, ўрадаги арава изи пилчиллаб ётар, бултур каллакланган толларнинг силлиқ навдалари ҳуштак ясаса бўладиган даражада сарғимтил рангга кириб сув йиғиб қолган эди. Эрта-индин Абдували иккаламиз толдан ҳуштак ясаймиз. Абдували бунаҳа ишларга уста. Дадасининг устараси ўткир-да.

Чойхона очиқ экан. Сўрига ёзилган наматни чўлтоқ супурги билан супураётган Илҳом чойхоначи дадамни узоқдан кўриб салом берди.

- Баҳай? Ота-бола тўрғай уйғонмасдан, пойма-пой кавушдек йўлга тушиб қопсизлар?
- Бозорга! Дадам папиросини оғзидан олиб тутун қайтарди.
   Бирон ҳовуч тариқ олакелайми?
   Илҳом чўтир қаҳқаҳ уриб кулди.

– Янтоқ денг, зўр! Янтоқ! – Сартарошнинг дўконига имо қилди. – Ўзгача етиб олсин бечора! Қиши билан янтоқсираб қолди.

«Пассажир» энди кетаман деб турган экан. Дадам чўлоқланиб югурди. Кетидан мен чопдим. «Пассажир» дегани тумшуғи чўзиқ автобус. Атрофи панер билан ўралган. Деразалари дарз кетган. Бултур кеч куздан бошлаб, Кўтармага «пассажир» қатнайдиган бўлди. Дарсда ўтириб ўзим санаганман. Ҳар куни уч мартадан келади. Эрталаб, пешинда, кечқурун...

Бешёгочга бориб, автобусдан тушганда, қутулганимга шукур қилдим, ҳайрият, ҳаво ҳам бор экан. «Пассажир»да одамлар ҳар томондан қисиб патир қилиб ташлади-да!

Осмонни булут қоплаган, темир панжара билан ўралган кўл томондан мусиқа янграр эди. Худди йиглаганга ўхшаш оғир мусиқа: кечадан бери радио шунақа куй чаляпти. Халқлар отаси Сталин касал бўлиб қолганмиш.

– Бўлақол, ўғлим. Хастимом узоқ, – дадам тағин папирос тутатиб, қўлимдан тутди.

Автобус тиқилинч бўлсаям бари бир яхши экан. Пиёда юравериб оёғимда оёқ қолмади. Дадам оқсоқлансаям тез юради. Бир маҳал кунгурадор гумбазининг кўм-кўм нақшлари ярақлаб турган каттакон иморат олдига келдик. Гумбаз остида кўкимтир қанотли ёввойи каптарлар парт-пурт қилиб учиб юрибди.

Маҳлиё бўлиб тўхтаб қолдим.

- Бу қанақа уй, дада?
- Уймас, мадраса! Кўкалдош мадрасаси. Дадам қўлимдан судради. Бўлақол!

Тор кўчага киришимиз билан юриш баттар қийинлашди. Мунча кўп бу одамлар. Чумолига ўх-

шайди-я! Паранжи ёпиниб бошига тугун қўйганча зипиллаб кетаётган хотинлар, (ҳайронман, ушламасаям, тугуни тушиб кетмайди) қоп орқалаган кишилар, кўмир ортилган от-аравалар... «Пўшт, от тепади!» деб ҳайҳирган аравакашлар...

Бир маҳал тор кўча янаям тиқилинч бўлиб кетди. Сарғиш машина папиллатиб сигнал берди. Машина тумшуғидаги ялтироқ ёзувни ҳижжалаб ўқидим: «Победа». Тор кўчада машина билан кўмир ортилган арава бир-бирига рўпара келиб иккаласи тўхтаб колибли.

Машина сигнал берган сари кўмир юқи ёпишавериб, ёллари қорайиб кетган от пишқиради. Аммо аравакаш аравани четга олмайди. Охири машина эшиги очилди. Бошига айвонли шапка кийган ҳайдовчи бир оёгини ерга тираганча бақирди:

– Ҳой кўмирчи! Қоч йўлдан! Райисполкомни олиб кетяпман, саводсиз.

Аравакаш пашша қўригандек бепарво қўл силтади:

– Паттачига бўшатмаган йўлни райисполкомингга бераманми, ўзинг қоч!

Дадам қўлимдан жаҳл билан силтади.

- Анқайма! Адашиб қоласан!

Тор дарвозадан киришимиз билан баттар тиқилинчга дуч келдик. Нима бу? Ҳамма бозорга кўчиб келганми?

– Хўш... – деди дадам салмоқлаб. – Ишни дўппидан бошлаймиз. Укангаям оламиз, хўпми! Кейин ойингга туфли қидирамиз. Саккизинчи март келяпти, ўглим.

Қўлимдан тутган эди, индамай эргашдим. Дўппи бозори чеккароқда, ғиштин девор ёнида экан. Ундан нарироқда «аралаш» бозор. Биров соатини мақтайди, биров «атиги икки марта» кийилган

«офицерский» этигига харидор чақиради. Дадам қўлимдан маҳам тутганча дўппифурушлар тўдасига кирди. Чачвонининг тагидан чиқариб турган қўлига дўппи қўндирган хотинлар, бошига устма-уст беш-олти дўппини кийиб олган эркаклар атрофимизни ўраб олди. Паранжили хотин дадамнинг бошидаги жияги титилиб кетган дўпписини илдам ечиб, бидиллади:

- Ушланг. Ушлаб туринг муни!

Дадамнинг жавобини кутмай, бошига яп-янги қалампирнусха дўппи илди.

– Ана! Буюртирсангиз ҳам бунаҳасини тополмайсиз, амаки! Пулингиз ўзингиз билан кетади!

Дадам жаҳл билан хотиннинг қўлидаги ўз дўпписини юлқиб олди.

- Менгамас! - деди бақириб. - Болага! Болага оламан!

Қизиқ, бояги хотин ҳечам хафа бўлмади.

- Вой, шунақа демайсизми, амаки, деди-ю, менинг бошимдаги дўппини олди. Вой, ширинтой, вой тўйболадан айланай. Мана-да, мана! Чачвонининг тагига қўл суқиб, қати букилган беш-олтита дўппи чиқарди. Бирини олиб бирини қўйиб бошимга кийгиза бошлади.
- Уялмайсизми, келинпошша! Бошига мурсак ташлаган, баркашдек юзи бўгриқиб кетган семиз бир хотин бояги паранжилини тирсаги билан итарди. Ёш бола маҳалла қозондек дўппи киядими? Мана, мана буни кийиб кўр-чи.

Семиз хотиннинг дўпписи бошимга лоп-лойиқ келди. Ўзиям қизил духобадан!

– Қуйиб қуйгандек ярашди! – деди семиз хотин юзимни силаб. – Буюрсин! Туйларингга кийгин, илойим, бошинг тошдан булсин!

Чамаси дўппи дадамга ҳам ёқди шекилли, дағалроқ қилиб сўради:

- Нархини айтинг.
- Вой айланай, от билан туя бўлармиди! Семиз хотин дадамга жилмайиб қаради: Юз сўмда, иним. Эртаматдан бери юз элликдан сотаётган эдим. Сизга юз сўм. Муни қаранг. Жиягини қаранг, майда тепки!
- Инсоф борми сизда, опа! деди дадам қўлини пахса қилиб. Давлат ҳар йили арзончилик қилиб турибди. Яқинда тағин нарх-наво тушади. Газета ўқийсизми ўзи!
- Майли, бозорингизни берсин! Хотин бошимдан дўппини ечиб олди. Эрим урушда ўлган. Менам бирамас учта етимни боқиб ўтирибман. Битта дўппини бир ҳафта тикаман, оповси.
- Етмиш! деди дадам дўппидан ажралиб қолгиси келмай.
- Тўқсон! Ундан ками бўлмайди. Мениям болаларим эшикка термилиб ўтирибди.
- Саксон, деди дадам хуноб бўлиб. Инсоф қилинг-да, сизам, опа!
- Майли. Семиз хотин дўппини қайтадан бошимга кийгизди. Яхши кунларингга кийгин, болам, умринг узоқ бўлсин.

Дадам шимининг чўнтагидан оқариб кетган чарм ҳамёнини олиб, пул чиқарди. Қўлини лабига тегизиб ҳўллади-да, ҳафсала билан санаб, семиз хотинга узатди. Хотин ҳам пулни шошилмай санаб, энгашганча маҳсисининг ҳўнжига тиҳди.

– Буюрсин! – деди қаддини ростлаб. – Яхши кунларга кийсин.

Боя атрофимизни ҳалҳадек ўраб олган эркак-а-ёл дўппифурушлар ҳафсаласи пир бўлиб бир зумда нари кетган, янги харидор излашарди.

– Опа! – деди дадам бурилиб кетаётган семиз хотинга. – Кичкинарок дўппингиз борми?

Семиз хотин умид билан ўгирилди.

- Бор! Неча ёшга?

Дадам бир зум ўйланиб қолди. Чамаси, Омоннинг неча ойлик бўлганини ичида санаб чиқди.

– Бир ёшу етти ойлик! – деди ишонч билан. – Бунисига олдим, унисиям қуруқ қолмасин!

Семиз хотин бош чайқади.

– Унақаси йўқ. Ёлғон гапириб нима қилдим. Етимларимга ҳаром едирмайман, оповси.

Бояги паранжили хотин яна бизга якин келди.

- Бунисини кўринг-чи! деди жажжи, чамандагул дўппини дадамга узатиб. Дадам энди дўппига қўл чўзган эди, одамлар орасидан бир киши сиргалиб чиқди. Эгнида оқ жужунча кител худди дадамникига ўхшаган, аммо саргишроқ, қаймокранг. Кенг почали шимиям шунақа, топ-тоза. Оёгида амиркон туфли. Мўйлови дадамникига ўхшаганмас, чиройли, ингичка.
- Соат олмайсизми, ака? деди кулимсираб. Асл мол. Швейцарский. У жужунча кителининг кўкрак чўнтагидан занжирли соат чиқариб, чиқ этиб оппоқ, ялтироқ қопқоғини очди. Мана, кўринг. Шундай деди-да, дадамнинг юзига қараб, бирдан ранги қув ўчди. Ингичка, чиройли муйлови титраб кетгандек бўлди. Хайрон бўлиб, дадамга қарадиму қўрқиб кетдим. Дадамнинг кўзлари ғазабдан қисилиб кетган, бурун катаклари керилиб, энтикиб-энтикиб нафас оларди.
- Яхши! деди хириллаб. Оламан. Бошинг билан қўшиб...

Охирги гапини айта туриб, шахт билан пастга эгилди. Этигининг қўнжига қўл суқди-да, суяк сопли пичоғини суғурди. Бир вақтлар қўлим синганида «сўяман!» деб бир уриб патнисни тешиб юборган пичоғини! Дахшат ичида чинқириб юбордим:

- Дада!

Хотинларнинг қий-чуви эшитилди. Кимдир «дод, сўяди!» деб чиқирди... Қарасам, пилчиллаб кетган майдонда ўзимиздан бошқа ҳеч ким қолмабди. Дўппифурушлар, этигини мақтаб, харидор чақираётганлар анча нарига бориб қолган, оломон орасида бояги жужун кителли киши кўринмасди. Дадам бир қўлида пичоқ тутган кўйи иккинчи қўли билан елкамдан тутиб турар, кафти муттасил титраётганини сезардим.

Узоқда хуштак чуриллади. Дадам пичоқни қўнжига тиқди. Ҳамон лаби титраб, пишқириб нафас оларди.

- Юр, ўғлим! деди хириллаб. Кетдик. Шоша-пиша қўлимдан судраганча оломон орасига ўзини урди. Бозор дарвозасидан чиққандан кейингина қўлимни қўйиб юборди. Папирос олиб чекди.
- Ҳалиги киши ким эди, дада? дедим қўрқа-писа кўзига қараб.

Дадам тиқилинч кўча четидан шошилмай бораркан, саволимни эшитмадими, жавоб бергиси келмадими, индамади.

– Ўгрими? – дедим одамларга туртиниб-суртиниб борарканман. – Соатни ўгирлаб олганми?

Дадамнинг бир мўйлови қийшайиб кетгандай бўлди.

– Ҳа, – деди мўйлови титраб. Кейин негадир кулимсиради. – Ўгри! Қулогини кесиб олмоқчийдим, қочиб кетди. Бўлақол, «пассажир»дан қолиб кетмайлик.

Мен-ку дўппилик бўлдим. Омонга ҳеч нима олмаганимиз ёмон бўлди-да. Йиглайди. Ойимгаям туфли ололмадик. Шуни айтгим келдию дадамнинг важоҳатидан қўрқдим.

Майли, янаги бозорга тағин келамиз. Уйга бориб, ойимга ҳаммасини гапириб бераман. Дадам бозорда ўғрини сўймоқчи бўлганини, ўғри қочиб кетганини...

Бешёгочга етиб келганимизда ҳаво айниди. Қоронғи тушиб қолгандай, ҳамма ёқ кулранг тусга кирди. Осмонни булут қоплаган, паркдаги карнайдан эшитилаётган йиглоқи музика янаям кучайган эди.

...«Пассажир» Кўтармага яқинлашганда ёмғир ёға бошлади. Автобуснинг фанер деворига шатур-шутир томчилар урилди. Ерга тушганимизда ёмғир кучайиб кетган эди. Худди челаклаб қуйгандек... Дадамнинг жужунча кители бирпасда жиққа ҳўл бўлиб баданига ёпишиб қолди. Ҳатто чап елкасидаги чуқурчаси пиёладек ўпирилиб аниқ кўриниб кетди...

Эшикдан бақириб кирдим:

- Ойи-и! Биз келдик!

Ёмгирдан тезроқ қочиш учун айвонга отилиб чиқдим.

- Ойи! дедим иргишлаб. Биз келдик! Айвон бурчагида букчайиб ўтирган ойимни кўрдиму нафасим ичимга тушиб кетди. Ойим икки кафти билан юзини тўсиб олган, сочлари ёйилиб кетган эди. Кетма-кет етиб келган дадам ҳам айвон пешида туриб қолди.
  - Нима гап? деди харсиллаб.

Ойим юзидан кафтини олиб, ёш тўла кўзларини дадамга тикди.

- Эшитмадингизми? деди титраб. Отамиздан айрилиб қолдик-ку?
- A? Дадам ҳайрон бўлиб пешонасига оқиб тушаётган ёмғирни сидирди. – Ким?
- Эшитмадингизми? Ойим ўтирган жойида бутун гавдаси билан чайқалди. Радиони эшит-

мадингизми? Ҳали айтди-ку... Сталин вафот этди деб. Энди нима бўлади?

Дадам талмовсираб айвон пешига чўкди. Уст-бошига шамол билан селпиб ураётган ёмгир остида узок ўтирди.

Ичкарида бешик ғижирлади. Омоннинг «ой-йи» деб чақиргани эшитилди. Кейин йиғлаб юборди. Аммо ойим қимир этмади. Дадам ҳам, ойим ҳам карахт бўлиб қолишган эди...

Бозорда ўғри кўрганимиз, дадам уни сўйиб ташламоқчи бўлгани, укамга дўппи ололмай қолганимизни ойимга айтиб бериш ҳам эсимдан чиқиб кетди. Дадам билан ойим меровсираб ўтиришар, ёмгир баттар кучайиб кетган, ҳовлидаги олмаларнинг сув йигиб қолган шохлари шамолда аянчли силкинар эди.

Анчадан кейин ойим укамни бешикдан ечиб олди. Дадам ичкарига кириб кетди. Ёмғир тинар-тинмас кўчага югурдим. Абдували билан толдан ҳуштак ясадик. Кечқурун ҳаво чарақлаб кетди...

## ЙИГИРМА УЧИНЧИ БОБ

# РОБИЯ ХИКОЯСИ

### 1. Олимжоннинг «гунохи»

Агар ўн йил илгари, қирқ учинчи йил бахорида биров «ўн йилдан кейин Олий Бош қўмондан вафот этади», деса борми, бунақа одамнинг холи билмадим нима кечарди... Одамлар улуғ дохийнинг қачондир ўлишини хаёлига келтирмасди, ғалабага бўлган ишонч одамларни кеча-кундуз тиним билмай ишлашга, ҳафта сайин янги шаҳарларни озод қилаётган жангчиларга кўпроқ ёрдам беришга ун-

дар, мана шу катта юмуш олдида оилалар бошига тушган кулфат ҳам унчалик сезилмас эди. Гўё баҳор кирганидан кейин ёққан қор эртами-кечми, бари бир эриб кетиши муқаррарлигини билган одам ўзини ўзи юпатгандек. Ким билсин, эҳтимол ҳар ким ўзининг бошига ёққан қорни ўзи эмас, кўпчилик бўлиб курагани учун, биров йиқилса иккинчиси ёнига кириб суягани учун шунақа бўлгандир. Эҳтимол Кимсан акамдан ҳамон ҳат-ҳабар йўқлигини, дадам эса бегуноҳдан бегуноҳ зим-зиё бўлиб кетганини ўйлаб ҳарчанд эзилсам ҳам, ўша катта ташвиш билан бўлиб, дардимни озми-кўпми унутгандирман.

Қирқ тўртинчи йил ёзига чиққанимизда эса уруш эрта-индин битишига ҳамма ишониб қолди. Энг қувончлиси – Оқсоқолнинг бир гапи кўнглимизда липиллаб турган умид чирогининг пилигини кўтариб қўйгандек бўлди.

– Эшитдингми, Дума! Хужум қилиб борган аскарларимиз партизанлар билан бирлашибди. Белоруссиянинг ўрмони партизанларга тўлиб кетган экан. Мени айтди дерсан: Кимсанинг шуларнинг орасида. Эрта-индин дараги чиқади. – Оқсоқол ўзининг гапи ўзига нашъа қилди шекилли, соқолини селкиллатиб кулди. Гитлернинг ҳолига маймун йиглаяпти, ўртоқ! Олдидан аскарларимиз саваласа, орқасидан партизанлар тепкиласа, у ёқда союзникларимиз фронт очган бўлса... Қопқонга тушди ит эмган!..

Оқсоқол-ку, бизнинг умид чироғимизни ёқди. Аммо ўзининг бошига яна битта тоғдек кулфат тушди: Холпош хола қазо қилди. Зуҳра келиннинг ўша қилмишидан кейин ўнгланмаган хола каловланиб юра-юра охири йиқилди... Қизиқ, икки ўғлидан айрилганда ҳам қаддини букмаган Оқсоқол

кампирини ерга қўйганидан кейин мункиллаб қолди. Бобом қўлидан судрагудек бўлиб, далага олиб чиқади. Оқсоқол эса ҳамма тушлик қилаётганида йўқолиб қолади. Бобом гўристондан топиб келади.

Фотима келин кўпинча йиглаб чиқиб ойимга ҳасрат қилади:

– Отам ғалати бўлиб қолдилар. Бугун кечаси яна ойимнинг мозорига бориб ётдилар.

Бобом кўпинча дўстининг ёнига чиқиб ётади. Холанинг еттисида хизмат қилиб юрсам, супада ўтирган Оқсоқол бобомга айтган гапини эшитиб қолдим.

- Кампиримни туш кўрибман, Дума. Аравада бир ёққа кетаётган эмишмиз. Мени ёнига чақиряпти, ўртоқ...
- Жиннимисан! Бобом тажанглик билан чийиллади. Кейин дўстининг ёнига ўтирди. - Ма, чек! – деди носковогини узатиб. Кейин овозини пасайтириб юпатди. - Унақа гапларни қўй, дўстим. Шукр қилмайсанми? Шундоқ келининг бор. Барака топгур Потмани қара, қиздан аълоку, келининг. Бир эмас, иккита неваранг бор. Насиб этса яхши тўйлар қиламиз. Попукни узатамиз. Тоҳирингни уйлантирамиз. - Бобом анчагача жимиб қолди-да, Оқсоқолнинг елкасига қоқди. - Битта гап айтайми, – деди дўстининг кўзига тикилиб. – У кулок-бу қулоғинг билан эшитиб қўй: бирга келдик, бирга кетамиз! Сенсиз бир кун ҳам юрмайман бу дунёда! Қўй, бунақа юриш сенга ярашмайди. Эл назаридаги одамсан, ўрток! Яхшиси далага чик, овунасан. Эртадан буғдой ўришга тушамиз.

Буғдойнинг ҳосили яхши. Айниқса, Хирмонтепа томонда... Ўрим бошланиши билан Умар закунчи янги қоида ўйлаб топди. Одатда ўримга ҳамма баравар тушади. Кетмончи ҳам, сувчи ҳам. МТС колхоздан ташқарида. Аммо ўрим пайтида тракторчилар ҳам бошқа ишини йиғиштириб ўроққа тушиб кетади. Буғдойни хирмонда ҳўкиз билан янчиб, биттаям дон қолдирмай омборга ташиймиз. Кейин машоқ бошланади. Далада тушиб қолган битта-яримта бошоқлар қайтадан терилади. Бу эски одат.

Закунчи топган усул янгича. Машоқдан кейин далага трактор солиш олдидан буғдойпояга одамлар иккинчи марта тушади. Бу ишга болалар жалб қилинади. Хотин-халажнинг юмуши ўзига етиб ортади. Картошка бор, лавлаги бор... Раиснинг ўйлагани тўгри. Болалар бари-бир бекор ҳам юради-да! Буғдой бошоқ тортганида далага ёпирилган қуртни терган ҳам болалар эди. Энди ҳарна бир ҳовуч бўлсаям машоқ қилгани. Бир томонда фронтга ёрдам, иккинчи томонда ўзига яхши.

Янгича усулнинг оти – шериклик! Ҳар бир бола уйидан биттадан қоп олиб келади. Тап-тақир бугдойзорга киришади-да, унда-мунда қолиб кетган бошоқларни, тўгрироги чумоли ташиёттан доналарни битталаб теришади. Эртадан кечгача уринган одам нари борса ярим қоп машоқ терса-теради, бўлмаса йўқ. Ҳаммаси қопини кўтариб дала чеккасига олиб чиқади. Кейин баравар бўлашилади. Ярмиси – колхозга, ярмиси – ўзига. Ишни Умар закунчининг ўзи назорат қилади!

Машоқ қилинадиган майдонга тонг отмасдан аллақанча бола тупланади. Аммо Умар закунчи келмагунча ҳеч бири тушолмайди. Буйруқ шу. Ниҳоят Закунчи от миниб келади. Далани тақсимлайди.

- Ўн киши бу ёққа!
- Сенлар у ёққа! Эллик метрда тўхтайсан. Биттаям дон қолмасин!

Болалар қопни судраганча тап-тақир далага ёпирилади. Ўн қадамда яримта бошоқ, бир кафт дон учраса учрайди, учрамаса – йўқ. Бола – бари бир бола-да! Каттароқ бошоқни кўриб қолса, бир-биридан талашиб югуради. Энди бошоққа чанг солганида бошида қамчи визиллайди.

– Эллик метр дегандим-ку, ҳароми! Нега ўтдинг! Бола қамчи зарбидан кўра раиснинг важоҳатидан қўрқиб орқасига қочади. Буғдойзорда пайкал бўлмаса, боланинг қўлида метрлаб ўлчайдиган газ бўлмаса, қаёқдан билсин! Лекин раис тартибни яхши кўради, далани яхшилаб тозалашни ўйлайди.

Бугун Хирмонтепадаги буғдойзор иккинчи машоқдан чиқади. Башор опа қаттиқ тайинлаган: шудгорни бошламасак бўлмайди. Қарна эртароқ ҳайдаб қўйганимиз.

Трактор ҳайдаб келаётсам, олисда – бир туп ҳайрағоч тагида ғуж бўлиб турган болаларга кўзим тушди. Демак, ҳали Закунчи етиб келмаган. Далага тушишга ҳўрҳиб, раисни пойлаб туришибди. Юз ҳадамча ҳолганда болалар, ҳизалоҳлар тўдасидан бир бола ажралиб чиҳиб, шу томонга югурди. Дарров танидим: Олимжон! Боши устида ҳопни пирпирак ҳилиб, чопиб келяпти. Эгнида офтобдан унниҳиб, шўралаб кетган кўйлак, бошяланг. Сочи ўсиб икки чаккасига тушган, рангини ҳисиб ҳўйган... У ҳарсиллаб келганча, юриб кетаётган тракторга – ёнимга чиҳиб олди.

– Олма ейсизми, опа? – деди трактор шовқинидан баланд келиш учун бақириб. Иштонбогига қистирилган иккита хом олмани чиқариб, биттасини узатди, «емайман» деб бош чайқадим. У олмалардан бирини кўйлагининг олдига ишқаб артди-да, карсиллатиб чайнай бошлади. Оғзим сув очиб кетди. Қандоқ ейди шундоқ нордон олмани!

- Опа! деди илжайганча олма чайнаркан. Сув обкеб қуйдим! Икки челак! Тракторни далага обкиргунча шериклик қилсам майлими? Ойим айтдилар.
- Раҳмат, Олимжон! Ўнқир-чўнқир жойдан тракторни ҳайдаб борарканман, кўйлаги шўралаб кетган елкасига қоқдим. Бари бир, далага тоза бўлмагунча трактор кирмайди.

Олимжон трактордан сакраб тушди-да, бир қули билан ҳамон олма ғажиганча, иккинчи қули-даги қопини боши устида пирпирак қилиб чопиб кетди. У оёқяланг югуриб борар, товонлари тош булиб кетганми, ердаги янтоқларни бемалол босиб сакраб-сакраб чопар, ирғишлар эди.

Трактор қайрағоч олдига имиллаб боргунча нариги томондан Закунчининг жийрони кўринди. От елиб келиб, дарахт соясида тўхтади. Закунчи эгардан илдам сакраб тушиб, от жиловини қайрағочнинг пастки шохига илди. Турганларга қараб бир нима деди: трактор шовқинидан эшитмадим. Сон-саноқсиз болалар, узун этаги ерга тегай деб турган қизалоқлар дув этиб, далага ёйилди.

Тракторни яқин олиб борсам, Закунчи далада чумолидай ўрмалаб юрган шерикчилик ишқибозларидан кўз узмай, қайрағочга суянганча папирос тутатиб турибди. Йўл-йўл кўйлагига орден тақиб олган. (Бултур бобом «шарбат» солган даланинг ҳар гектаридан режадан икки ҳисса ортиқ қанд лавлаги олингани учун Закунчи «Ҳурмат белгиси» ордени билан мукофотланган. Орденни ҳишда костюмига, ёзда кўйлагига таҳиб юради.) У шовҳиндан ҳулоғи битиб, ғаши келди шекилли, шахдам бурилиб, «ўчир» дегандек ҳўл силтади. Моторни ўчириб, ерга тушдим.

Аввал йигиб олсин, кейин тушасиз! – деди қовоғини солиб.

Дов ўшанда Алвасти кўприкда боши ёрилганидан бери у мен билан деярли гаплашмас, мабодо зарурат юзасидан мажбур бўлгандаям «сизлаб» гапирарди.

Энсам қотиб, плугларни текширган бўлдим. Олимжон яхши бола-да! Иккита пачоқ челакни аллақачон сувга тўлдириб қўйибди.

Елиб-югуриб, машоқ қилаётган болалар томон юрган эдим Закунчи кинояли кулди.

– MTCдан олаётган натурангиз камлик қилдими, ўртоқ тракторчи?

Бурилиб қарадиму индамай далага кирдим. Бирпасда кун қизиб кетди. Саратон офтоби ёндираман дейди. Ер – олов, осмон – олов, қиртишлаб ўриб олинган бугдойзордаги гувалалар - олов. Сочи олинган одамнинг бошидек такир далада ярим қарич диккайиб турган буғдой поялари ўтли нина бўлиб ёкқа санчилади. Терадиган бошоқнинг ўзи йўқ. Болалар, қизалоқлар оёқ остида ўрмалаётган чумолилар оғзидаги донни битталаб териб олгудай. Дарров терлаб кетдим. Вой, Олимжон тушмагур-ей! Бирпасда ярим қопча бошоқ терибди. Қаёқдан топди бу болакай?! Разм солиб қарасам, ҳарқалай у ер-бу ерда яримта-чоракта бошоқлар тўкилиб қолган экан. Мен ҳам териб, Олимжоннинг ҳопига сола бошладим. У бир қўллаб қопининг оғзидан ушлаб олган, энгашиб букланганча шатир-шутир қилиб олдинга интилади-да, иккинчи қўли билан бошоқ қолдиғини териб, қопга ташлайди. Қоп икки оёғи ўртасида судралиб боряпти. Қарасам, ўн қадамча нарида бир эмас, учта бошок ётибди. Ўша томонга юрган эдим. Олимжон бақирди:

– И-и! У ёққа ўтманг. Закунчи ўлдиради! Эллик метрдан ўтмайсанлар, деган. Қаранг, опа, бу ёқдаям кўп.

Беихтиёр тўхтаб қолдим. Олимжон кўп деган жойда ярим кафтча бугдой сочилиб ётган экан. Қовучимга олиб, пуфлаб тозаладим-да, қопига солдим.

Олимжоннинг қопи ярмидан ошгунча пешин бўлиб кетди. Пешонамдан дувиллаб тер оқар, кўйлагимнинг орқаси гарданимга ёпишиб ачиштирарди. Олимжон бўлса парво қилмайди. Гувалаларни, чақир тиканакларни ялангоёқ босиб, ердан кўз узмай, бошоқ излайди. Топиши билан шоша-пиша қопига тиқади.

– Юрақол, Олимжон, – дедим ялиниб. – Қара, қопинг тўлиб қолди. Ҳали яна терасан-ку.

У қопини орқалаганча истар-истамас орқамдан эргашди.

– Майли, ярмини уйга ташлаб келаман-да, яна тераман. Ҳали кўп-ку, а!

У икки букилиб қоп кўтариб бораётганда ҳам ердан кўз узмади. Йўлида яримта бошоқ кўринса, эринмай тўхтайди. Қопи халақит бераётгани учун ерга қўяди-да, бошоқ увогини илдам юлқиб олади, қопига ташлайди. Юзидан тер оқиб кетаётганига парво қилмайди.

Қайрағочга яқин келишим билан ўзимни сояга урдим. Олимжон «уф» деб қопини Закунчининг оёғи тагига қўйдида, югуриб бориб, боя ўзи тракторга сув олиб келган челакка ёпишди. Челакни кўтарса, сув тўкилиб кетишидан қўрқди шекилли, юзини пақирга ботириб, ича бошлади.

Закунчи қопни тепиб кўрди.

- Маладес! деди кулимсираб. Бўлдими! Бошқа термайсанми?
- Тераман. Олимжон челакдан бошини кўтариб илжайди. Қоп-қора юзидан сув аралаш кир тер оқиб, кўйлагининг олди ҳўл бўлди. Яна тераман.

- Маладес! Умар закунчи қопни бир қўллаб кўтарди-да, думи билан ҳадеб пашша қўриётган жийрондан нарироққа, текисроқ жойга ағдарди. Ярим-ёрти бошоқлар, ярим ғалвирча келадиган дон тупроқ аралаш чангиб, ерга тўкилди. Закунчи бошоқ уюмини бир зум чамалаб турди-да, кафти билан чангаллаб озгина бошоқни қопга қайтиб солди. Яна икки марта қўл солиб, тўхтаб қолди. Кейин, инсоф қилди шекилли, тағин бир чангал бошоқ олиб, қопга ташлади.
- Оборақол! деди Олимжонга қараб. ўизиллаб, уйингта ташлагин-да, қайтиб кел, хўпми?

Анграйиб қолдим. Бу қандоқ бедодлик? Бу қанақа «шерикчилик» бўлди? Авваллари бир машоқдан қолган супуриндини болалар уйига олиб кетарди. Майли, уруш бўляпти, майли, замон шуни талаб қиляпти. Аммо нораста бола терган насибани, ақалли ярмини бермаслик бориб турган ноинсофлик-ку! Нима қилсин, очидан ўлсинми энди! Олимжон тўплаган бошоқнинг бешдан бириям тушмади-ку, қопга!

Олимжон ҳам ҳайратдан оғзини очиб қолган, нуқул бурнини тортар эди.

- Кам-ку! деди қўрқа-писа.
- Нима? Умар закунчи истехзо билан лабини бурди. Мана! Зарда билан энгашиб, қопга тағин бир сиқим бошоқ ташлади. Бўлдими? Бор энди, бошимни қотирма!

Олимжон иккиланиб турди-да, секин бориб, бир қўли билан қопининг оғзини очди. Иккинчи қўли билан, худди биров тортиб олаётгандек, уюм бўлиб ётган бошоқларни чангаллади.

– Алдаманг! – деди илжайиб. Чамаси раис ҳазиллашяпти, деб ҳаёл ҳилди. – Ярмини берасиз. Ўзингиз айтгансиз! – У раисдан ҡўз узмай, бошоҳларни чангаллаб, ҳайта сола бошлади.

Закунчининг кўзлари тахдидли қисилиб кетди.

– Торт қўлингни! – деди вишиллаб. Энгашиб, боланинг қўлидаги қопга чанг солди.

Олимжон унинг ҳазиллашмаётганини энди тушунди. Юзида қўрқув аралаш болаларча содда ҳайсарлик пайдо бўлди. Икки қўллаб ҳопини чангаллаб олди.

- Берасиз, ҳа берасиз! деди ранги ўчиб. Ярмини берасиз! Ўзиз айтгансиз!
- Ярми керакми сенга! Раис этигининг қўнжига қўл суққан эди, пичоқ ялтиради. Юрагим орқага тортиб кетди. Болани пичоқлаб қўяди, деган вахимада чопиб яқин бордим.
- Тегманг! дедим ялиниб. Олимжон, қўйвор! Ташла қопингни!

Аммо Олимжон қопига маҳкам ёпишиб олган, қуйиб юборгиси келмас эди. Закунчи қопнинг оғзидан ушлаб, силтаб тортди. Олимжон қопини қучоқлаб олди. Закунчи яна тортган эди, Олимжон қопига ёпишганча тупроқда судралиб унинг оёги остига келиб қолди. Жонҳолатда чинқириб, Закунчининг пичоқ тутган қулига ёпишдим.

- Олимжон, қоч! дедим чинқириб.
- Нари тур, мегажин! Закунчи елкасини бир силкиттан эди, анча нарига янтоқлар устига бориб тушдим. Тирсагимга тикан кириб, ловуллаб ачишли.
- Ярми керакми сенга? Мана ярмиси! Мана! Закунчи пичогини уч-тўрт силтаган эди, қоп ширшир йиртилиб кетди. Олимжоннинг қўлида қопнинг бир тутами қолди. Икки-уч бошоқ шилдираб ерга тўкилди.

Олимжон чўккалаб ўтирганча бир зум Закунчига ҳайратланиб қараб қолди. Ўша заҳоти алам билан чинқирди. – Қопимни нима қилдинг?! – деди ерга муштлаб.
 Нима қилдинг! Дадамга нима дейман? Нима қилдинг?

Боланинг сансираши алам қилиб кетди шекилли, Закунчининг кўзида дахшатли ўт чақнади. Қўлидаги қоп парчаларини нафрат билан улоқтириб юборди-да, менинг тепамга келди. Қўлимга тикан кира-кира талмовсираб ўрнимдан турарканман, Закунчи чўнқайиб ўтирганча янтоқларни тагидан пичоқ билан кесаётганини кўрдим. Дахшат ичида шуни пайқадимки, янтоқларнинг нами қочмаган, аммо тикани сарғайиб пишганларидан танлаб-танлаб уч тупини кесди. Олимжон эса ҳамон ўксиб йиглаб, нуқул бир гапни қайтарарди. – Қопимни нима қилдинг? Ўзи битта эди-ку...

Закунчи янтоқларни силкитиб-силкитиб Олимжоннинг устига бораётгандагина ниятини тушундим.

- Қоч, Олимжон! - дедим бақириб. - Қоч!

Олимжон қоп парчасини юзига босиб, ҳамон йиғлар эди. Закунчи уч ҳатлаб боланинг бошига борди. Билагидан маҳкам чангаллаб олди-да, силтаб турғазди.

– Мана ярмиси! – деди тишини ғижирлатиб. Янтоқ шувиллади. – Мана қоп! Мана!

Олимжон оғриқдан додлаб юборди. Силтаниб Закунчининг қўлидан чиқмоқчи бўлди-ю, кучи етмади. Боланинг офтобдан унниқиб кетган кўйлаги бир зумда қип-қизил қонга беланди. Закунчи нима учун суви қочмаган янтоқларни танлаганига энди ақлим етди. Қуруқ янтоқ мўрт бўлади, тез синиб кетади.

– Мана! Мана! – Закунчи вахшийлашиб кетган, кўзларида қахрли олов ёнар, ҳар бақирганида оғзидан кўпик сачрар эди. – Мана сенга қоп!

Олимжон жонҳолатда чинқирди:

- Қўйвор, эшшак - закунчи!

Закунчи «эшак» деган сўзни эшитиб баттар қутуриб кетди.

- Мана! деди кучи борича уриб. Мана! Дод солиб қўлига ёпишдим.
- Ўлади! Бировнинг боласини ўлдириб қўясан, ноинсоф!
- Қоч, душманнинг итваччаси! У янтоқни қулочкашлаб юзимга туширди. Кўзимдан олов чиқиб кетгандек бўлди. Чалқанча йиқилиб тушдим.

Кўзимни очсам, Олимжон ер тишлаб ётибди. Кураги қоп-қора қонга беланган. Икки кўзи ваҳший ҳайвонникидек қизариб кетган Закунчи боланинг тепасида ҳарсиллаб турибди. У шохлари нимтанимта бўлиб кетган янтоқларни нарига улоқтирди. Югуриб келаётган болаларнинг қий-чуви эшитилди. Қандайдир қизалоқ чинқириб юборди:

- Ўлдирди! Олимжонни ўлдириб қўйди!

Закунчи шошилмай бориб, безовта типирчилаётган от жиловини қайрағоч шохидан ечди.

Чайқалиб, ўрнимдан турдим. Бўғзимдан аламли нидо отилиб чиқди:

– Имонсиз! Сенгаям боққан бало бордир, виждонсиз! Нораста нима гуноҳ қилди, уятсиз? Бу кунларам ўтар-кетар, жавобини берадиган кунинг келар, имонсиз!

Закунчи чирт этиб тупурди-да, отини чоптириб кетди. Юз-кўзим ловуллаб ачишаётганини унутиб, Олимжоннинг тепасига югуриб бордим. У ҳамон юзтубан ётар, дабдала бўлиб кетган кўйлаги устидан баданига санчилиб қолган сон-саноқсиз тиканлар дикайиб чиқиб турарди.

– Олимжон-он! – дедим йиглаб. Боланинг бошини кўтарган эдим, лаби, ияги қоп-қорайиб кетганини кўриб, сесканиб тушдим. Огзидан қон кепти! Даҳшат ичида лабига кафтимни боссам, лой экан.

Чамаси, ҳали сув ичганида лабида қолган нам, тупроққа қоришиб лой булган.

– Олимжон... – дедим секин. Унинг кўзи очиқ, лекин бир нуқтага маъносиз тикилиб, қотиб қолган эди.

Бир қўлим билан суяб ўтқазганча, иккинчи қўлим билан баданидаги тиканларни тера бошладим.

Кимдир челакдаги сувни олиб келиб, Олимжоннинг бошидан қуйди. У хушига келиб ингради.

- Қопим... Қопимни йиртди...
- Жон укам! Ўргилай сендан, Олимжон! Боланинг муздай юзларидан ўпдим. Ўзим қоп бераман сенга, ўнта қоп бераман. Кўзингни оч!

Арава шалдиради. Болалардан биронтаси хабар берган шекилли, Комил табиб ҳўкиз аравадан сакраб тушиб, ҳаллослаб келди.

- Ўғлим! деди инграб. Олимжон!
- ...Бола похол тўшалган арава ўртасида осмонга тикилиб ётар, чехраси катта одамларникидек осойишта, ўйчан эди. Юзимга термилиб ётди-ётди-да, сўради:
  - Сизниям урдими, опа?
- Жим, жим, дедим бошига эгилиб. Хеч нима қилмайди. Даданг табиблар-ку, мўмиё сурадилар, тузалиб кетасан...
- ...Холпош хола ўлганидан бери каловланиб қолган Оқсоқол шу воқеани эшитди-ю, бирдан қаддини ростлади. Худди ўша қадимги Ориф оқсоқолга айланди. Қуюқ қошларини чимириб, ҳовончадек муштини хонтахтага урди.
- Қачонгача зулм қилади бу? Совет ҳокимияти борми-йўқми, ўзи?
- Сельсоветга чиқиш керак! деди бобом. Танобини тортиб қуймаса қутуриб кетди бу Закунчи!
- Ёшинг етмишга киряптию товуқча ақлинг йўк! – Оқсоқол баттар хуноб бўлди. – Қўлидан нима

келарди ўша хезимчалиш Эргашни! Закунчини кўрганда эридан қўрққан хотиндек типирчилаб қолади-ку! Йўқ, районга бораман! Ўртоқ Абдурахмоновга йўлиқаман! Уям қулоқ солмаса каттасига бораман! Робия! Ол, давотқаламингни. Ёз, қизим!

Оқсоқол менга айтиб туриб, ариза ёздирди. Иккала ўртоқ қоғозни олиб Комил табибникига кетишди. Аммо ярим кечада иккаласиям қовоқ-тумшуғи осилиб қайтиб келишди.

– Э, муллаваччаларга ўхшамай ўл! – деди Оқсоқол табибни орқасидан сўкиб. – Латта! Бола бечоранинг бадани илма-тешик бўп кетибдию қўл қўй деса кўнмайди. Бир жойдаги одаммиш. Раис бир кунмас бир кун жазосини олармиш. Ёмонлик жавобсиз қолмасмиш. Арзабозлик қилиб юриш ўзбекчиликка тўгри келмасмиш. Ўргилдим, сенга ўхшаган пайтавақулоқ ўзбекдан! Кетдик, Дума! Табиб даъвогар бўлмаса, мана, мен даъвогарман!

# 2. «Яхшилик ҳам, ёмонлик ҳам жавобсиз қолмайди»

Бу йигиннинг отини нима дейишни ўзим билмайман. Мажлис десам, мажлисга ўхшамайди, суд десам, судга... Умар закунчи Олимжонни сулайиб қолгунча янтоқ билан савалаган жойда – худди ўша қайрагоч тагида тумонат одам тўпланди. Ўрогининг бандини қахрли чангаллаган хотинлар, машоқ қилаётган қопини орқалаб олган болалар, олисда Дўмбиробод томонларда картошка чопиқ қилаётган, лекин аллақаердан хабар топиб, кетмонини елкасига ташлаб, ҳаллослаб етиб келган қари-қартанглар...

Эрталаб пайкалда «шериклик» машоқ яна давом этди. Болакайлар, қизалоқлар қоп судраб

бошоқ қолдиқларини териб юришар, аммо кечаги дахшатли вокеадан кейин қўрқиб қолишгани учунми, «шерикчилик»ка келган болалар оз эди. Менинг тракторим хамон бир чеккада турар, дала тоза бўлмагунча пайкалга киролмасдим. Закунчи отини қайрағочга боғлаб қўйиб, сояда чўнқайиб ўтирар, мен томонга қарамай папирос тутатар, даладаги болалардан кўз узмас эди. Олимжоннинг гарданига янток билан савалаётган Закунчининг вахший хайвондек хириллаши, огзидан кўпик сачратиб «мана, мана!» деб ҳайқириши ҳамон қулоғим остида жаранглар, аравада чалқанча ётганча катта одамлардек осмонга ўйчан кўз тикиб бораётган бечора бола хаёлимдан кетмас, Закунчининг башарасига қарагим келмас эди. Бир маҳал олисда арава шалдиради. Тракторни текширган бўлиб разм солсам, Закунчи сапчиб ўрнидан туриб кетди. Қамчисини ерга ташлаганча югурди. Қарасам, тупроқ йўлдан чанг кўтариб, хўкиз арава келяпти. Худди ўша – кеча чалажон бўлиб қолган Олимжонни олиб кетган ҳўкиз арава. Фақат бу сафар устида Комил табиб эмас, бобом билан Оқсоқол ўтирибди. Закунчи нега типирчилаб қолганини аввал тушунмадим. Бироқ арава яқинроқ келганда похол шляпасини бостириб олган одамни илгадиму ҳаммасини англадим. Оқсоқол билан бобом кечаси чикиб кетганча қайтишмаган эди. Демак, Абдурахмоновни бошлаб келишяпти.

Закунчи чопиб бориб, Абдураҳмоновга қўшқўллаб қўл узатди. Лекин райком секретари негадир юзини ўгирди. Оқсоқолга бир нима деди. Оқсоқолхипчин билан ҳўкизларни савалади. Закунчи арава ёнида пилдираб келаркан, ёйилиб илжайганча Абдураҳмоновга яна алланималарни гапирди. Арава шовқинида нима деганини эшитмадиму райком бу сафар ҳам юзини чир ўгирганини кўрдим.

Кўп ўтмай, арава қайрағоч соясига келиб тўхтади. Аввал Оқсоқол, кейин бобом сакраб тушишди. Закунчи бир қўллаб арава ёндорини чангаллаганча ғилдиракка оёқ қўяётган Абдураҳмоновнинг қўлтиғидан олаётган эди, райком қошини чимирди.

- Рахмат... Ўзим.

У қийналиб аравадан тушди. Бўлиқ юзи бўгриқиб кетган, кўйлаги жиққа ҳўл бўлиб икки елкасига ёпишиб қолган, чаккасидаги оқ оралаган сочларидан дув-дув тер оқар эди.

- Бир пиёла сувингиз борми, қизим? деди ҳансираб.
- Ҳозир чой ташкил қиламиз, ўртоқ Абдураҳмонов! Закунчи ёнимга келиб, ғазаб билан вишиллади. Эрталабдан бери трактор атрофида ивирсийсиз? Ақалли чой-пойга ҳаракат қилсангиз қўлингиз синганмиди, ўртоқ тракторчи!
- Чой керакмас! Абдурахмонов қайрағочга суяниб ўтирганча сомон шляпаси билан юзини елпиди. Бир пиёла сув бўлса...

Кеча Олимжон трактор учун олиб келган сув эсимга тушди. Хайрият, бир челак сув ҳалиям сояда турган экан. Аммо пачоқ челакдаги керосин ҳиди анқиб турган, илиб қолган сувни олиб боришга ийманар эдим.

– Бераверинг, қизим! – Абдураҳмонов шляпасини ерга ташлаб имо қилди. – Обкелинг!

Соддалигим қурсин! Челакни олиб бориб Абдураҳмоновнинг ўнг қўлига тутқазмоқчи бўпман. У тирсагидан узилиб кетган, бир парча гўштдек қизариб турган тўмтоқ билагини орқага тортиб, чап қўлини челак бандига чўзди. Закунчи чаққонлик билан пақирни қўш-қўллаб чангаллаган эди, ҳансираб, яна қошини чимирди:

- Керакмас! У чап қўллаб челакни қучоқлаган кўйи оғзига олиб борди. Сув шариллаб, кўйлагининг олдига оқиб тушди.
- Раҳмат, қизим! деди мулойим жилмайиб. Ширин сув экан...
- Ўртоқ Абдураҳмонов... Закунчи нарироқда турган Оқсоқол билан бобомга адоватли қараш қилди-да, илжайиб бидиллади. Мана, иккинчи марта машоқ қиляпмиз. Ҳарна фронта ёрдам. Биттаям дон қолмасин деб...
- Кўриб турибман! деди Абдураҳмонов унинг гапини кесиб. Ишларингиз жуда зўр!

Закунчи унинг овозидаги яширин ғазабни сезди. Ранги қув ўчиб атрофга аланглади. Мен ҳам ўгирилиб қарадиму атрофимизни ҳалҳадек ўраб олган одамларни кўриб ҳайрон қолдим.

Ажаб, бир зумда қаёқдан тупланди. Қаёқдан келди шунча оломон? Болалар, хотинлар, чоллар?.. Қалқа борган сайин зичлашиб, торайиб борар, гуё бутун колхоз шу ерга, қайрағоч тагига кучиб келгандек эди!

Абдураҳмонов чап қўллаб ерга таянганча ўрнидан турди. Одамларга бир-бир қараб чиқди.

- Ўртоқлар... деди осойишта оҳангда. Қизиқ, энди у бояги толиққан, хаста кишига ўхшамас, овози ўктам, ишончли эди. Нима бўляпти ўзи «Қизил деҳқон»да? Ахир сизларнинг хўжалик райондаги энг илғор колхоз-ку!
- Мумкинми? Умар закунчи лип этиб ўртага чиқди. Ўртоқ Абдураҳмонов! деди жарангдор овозда. Эртанги картошкани йиғиб бўлдик. Буғдойниям юз йигирма процент...
- Шошманг! Абдураҳмонов ягона чап қўлини силкитди. Ҳаммасини биламиз. Планларни ўринлаяпсиз. Шунинг учун ҳам «Қизил деҳқон»га вакил юбориш шарт эмас, деб ўйлардик. Энди билсам,

хато қилган эканмиз. Тўгри, замон огир. Ҳаммагаям огир. Режани бажариш керак. Аммо зулм ҳисобига эмас.

Закунчининг ранги гезариб кетди.

- Қанақа зулм? деди лаби титраб. Мана, одамларнинг ўзи гапирсин.
- Райкомнинг ниятиям шу... Абдураҳмонов «сен жим тур» дегандек имо қилди. –Қани, одамлардан эшитайлик.

Оғир сукунат чўкди. Ҳеч кимдан садо чиқмас, осмонда тўрғай фарёд солар, аллақаерда чигиртка нола чекар эди. Закунчи ҳаммага бир-бир қараб чиқар, «Биттанг гапирсанг тилингни суғуриб оламан», дегандек тишини ғижирлатар эди.

- Оқсоқол... Абдураҳмонов арава ёндорига суянганча нос шишасини кафтида айлантираётган Ориф оқсоқолга юзланди. Айтинг, гапингизни.
- Гапим шуки... Оқосоқол носини жаҳл билан тупурди. Ўртоқ Хажайип жа оширворди! Амир Олимхон бўлсаям жойини билиб ўтирсин! Тўгрими, Дума!
- Тўғри! Бобом ўртага чиқиб, асабийлик билан қўлини пахса қилди. Майли, юмуш буюрсин! Ишни сўрасин. Локин...
- Хўв, Оқпошшонинг думаси! Умар закунчи истехзо билан лабини бурди. Бизлар жанг қиляпмиз! Фронт орқасида жанг қиляпмиз. Нима энди, бошимда кўтариб юришим керакми, ҳаммангни!
- Менимас! Бобом жазаваси тутиб яна қўлини пахса қилаётган эди, Абдураҳмоновнинг босиқ овозини эшитиб жимиб қолди.
- Оқпошшонинг нима алоқаси бор? Абдураҳмонов Закунчига юзланди. Нима, Ҳусан ака меҳнатдан бўйин товлаяптими! Алдам-қалдам иш киляптими?

Закунчи эсанкираб қолди. Лекин дарров ўзини қўлга олди.

- Ўртоқ Абдураҳмонов, деди лаби бурилиб. У ёқда планни талаб қиласиз... Бу ёқда... Ўзингиз биласиз, бу ер ҳам фронт...
- Фронт денг! Абдураҳмоновнинг товуши бирдан ўзгарди. Қаҳрли тус олди. Она сути оғзидан кетмаган болалар билан жанг қилиб ётибман денг! Табибнинг ўғлини нима қилдингиз?
- Мен... мен... Закунчи бирдан бўшашди. Тартиб бўлсин деб... У ингичка мўйлови титраганча яна қаддини ростлади. Ўртоқ Абдураҳмонов! деди овози қатъийлашиб. Мен нима қилсам, жангчиларимизга мадад бўлсин деб қиляпман! Доҳиймиз айтгандек...
- Яхши! Абдураҳмоновнинг товуши Закунчиникидан ҳам қатъийроқ жаранглаб кетди. – Лекин ким сизга рухсат берди, ёш болани майиб қилишга!

Шунда кутилмаган иш бўлди. Ўроқлар, паншахалар, кетмонлар офтобда тахдидли ярақлаб кетди. Ҳатто болалар ҳам қопини боши устида баланд кўтариб чувиллашди:

- Жонимиздан тўйдик!
- Керакмас!
- Колхозда ё Закунчи турсин, ё биз!

Тинч оққан сув тўгонни бузса ёмон бўларкан. Одамлар гувиллаб олдинга ташланди. Қўйиб берса ҳозирнинг ўзида Закунчини қийма-қийма қилиб ташлагудек важоҳатда эди. Шу пайт узун кўйлагининг этаги ерга тегиб турган хотин отилиб чиқиб, Абдураҳмоновнинг оёги остига тиз чўкди, Аввалига танимабман. Қарасам, Лазакат хола: сочлари ёйилган, юзи қаҳрли.

– Жон укам! – деди титраб. – Ўргилай сиздан, укам! Хақиқат қилинг. Бир боламдан айрилдим!

Очилимдан жудо бўлдим. – У йиглаб юборди, бошидан оқариб кетган гармдоринусха рўмолини юлқиб олиб, нарироқда кўзи олайиб турган Закунчига улоқтирди. – Рўмолинг бошингда қолсин! Битта боламни немис ўлдирди. Иккинчиси манави немиснинг қўлида ўлсинми энди. Нораста болани шунчалик урасанми, диёнатсиз!

– Опа! – Абдураҳмонов бир қўллаб Лазакат холанинг қаддини ростламоқчи эди, кучи етмади. – Хўжаев! – деди ғазаб билан. – Эшитяпсизми бу гапларни! Фашистдан нима фарқингиз бор!

Ўроқлар, паншахалар, кетмонлар баттарроқ тахдид билан ярақлади. Оломон ув солиб юборди:

- Йўқол!
- Даф бўл, Закунчи!
- Керакмас бизга бунақа раис!

Умар закунчи серрайиб турар, аммо энди боягидек эсанкирамас, юзи қаҳрли, қатъий тусга кирган эди.

- Ўртоқ Абдураҳмонов! –деди чертиб-чертиб. Мен ҳарбий замон талаби бўйича иш қилдим. Бундан кейин ҳам законний...
- Бас! Абдураҳмоновнинг бўлиқ юзи қизариб, осойишта боқувчи кўзлари ғазабдан қисилиб кетди. Ҳеч ким сизга халқни давлатга қарши қўйгин деган эмас!

Халойиқ тағин жунбишга келди. Яна ўша ҳай- қириқлар янгради:

- Кетсин!
- Кетмонини олиб кетсин, Закунчи.
- Тўрт томони катта кўча!

Оқсоқолнинг овози ҳаммадан кучли гумбурлади:

- Сиз нима дейсиз, табиб? Айтинг гапингизни.

Бобом Комил табибнинг билагидан чангаллаб, Абдураҳмоновга рўпара қилди. – Гапиринг, табиб!

Табиб бир зум ўйланиб турди-да, хўрсинди.

– Мен нима дейман? – деди секин. – Хамма гапни айтиб бўлишди-ку. Бу дунё қайтар дунё. Яхшилик ҳам, ёмонлик ҳам жавобсиз қолмайди. Ўзини билган одам учун эл назаридан қолишдан ортиқ жазо борми?

У ингичка мўйлови титраб турган Закунчига жирканиб бир қарадию нари кетди.

- Эшитдингиз-а, ўртоқ Хўжаев? Абдураҳмонов елкаси оша ҳамон ғўдайиб турган Закунчига юзланди. Тушунарлими энди?
- Яхши! Закунчи шахт билан қаддини ростлади. Бундан чиқди ҳамма яхши мен ёмонман. Колхознинг қаддини кўтарганим ёлғон. Етти йил эшакдек ишлаганим ёлғон!.. Ўзим оч юриб топган-тутганимни фронтга жўнатганим ёлғон! Гектаридан тонналаб лавлаги олганим ёлғон! Мана бу орденга, у энтикиб, кўйлагига тақилган, офтобда ярақлаб турган орденни чангаллади, мана шу орденга сиз қўл қўйганингиз ҳам ёлғон.
- Тўғри, мен қўл қўйганман. Абдураҳмонов афсусланиб бош чайқади. Ўша орденга... деди ҳар сўзини чертиб, «Ҳурмат белгиси» деб ёзиб қўйибди. Биз сизни ҳурмат қилардик. Лекин эшитиб қўйинг: халқ ҳурмат қилмаган одамни биз ҳам ҳурмат қилмаймиз.
- Мен... Закунчи нимадир демоқчи эди Оқсоқолнинг гулдираган овози унинг гапини кесди.
- Менга қара. Хажайип! Агар Дума етти қишлоқнинг қожатхонасини кавлаб «шарбат» оқизмаса, орденни тушингда кўрардинг. У ёгини сўрасанг, орден Думаники бўлиши керак эди.
- Ана! Закунчи асабийлик билан қаҳ-қаҳ уриб кулди. Мана энди асл мақсадга кўчдинг, Оқсоқол! Раисликдан тушибсанки, аламинг ичингда эди.

Олақол, мансабингни! – У райкомга ўгирилиб изтироб билан ҳайҳирди. – Олиб беринг шунга раисликни! Ўзим ҳам бунаҳа ит ётиш, мирза туришдан чарчадим. Юборинг! Передовойга юборинг мени!

Абдураҳмонов ягона қўлини беписанд силкиди.

– Хотиржам бўлинг, ўртоқ Хўжаев! Қаёққа юборишни райком бюроси ҳал қилади. Аммо янги раис сайлашни халқнинг ўзига қўйиб берамиз.

Ўша захоти яна гувиллаган садо саратон ҳавосини титратди:

- Оқсоқол!
- Оқсоқол раис бўлсин!
- Бошқаси керакмас!

Ориф оқсоқол тўсатдан эсанкираб қолди.

– Мен... мен... – деди довдираб. Худди биров қозироқ раислик курсисига ўтқизиб қўяётгандек орқага тисарилди. – Ўртоқ Абдураҳмонов... – деди ялиниб. – Наҳот мен... раис бўламан деб. Илтимос... – У икки қўлини баланд кўтариб ҳайқирди. – Халойиқ! Қисқа ўйлама! Эрта-индин уруш битади. Колхозлар бошқача бўлиб кетади. Мен энди – ўтдим. Мошинани биладиган... – Оқсоқол атрофга аланг-жаланг қаради-да, бирдан юзи ёришди. – Яхши раис керакми? Мана! Мана! – У бобомнинг ёнида турган Башор опанинг қўлидан тутиб, ўртага олиб чиқди. – Мана ҳақиқий раис! Ҳалол, мехнаткаш. Мошинани...

Энди Башор опа довдираб қолди.

– Йўқ! – деди кескин бош чайқаб. Оқсоқолнинг каттакон кафтини қўш қўллаб чангаллаганча илтижо қилди: – Оқсоқол, барака топинг. Йўқ деманг. Нима юмушингиз бўлса...

Одамлар тағин бараварига гувиллади:

- Тўғри!
- Башоратхон рост айтяпти.

- Оқсоқол!
- Нега таранг қиласан! Бобом Оқсоқолға рўпара бўлиб бўйнини чўзди. Қачондан бошлаб элюртнинг сўзини ерда қолдирадиган бўлдинг!

Оқсоқол нима дейишини билмай қолган, одамлар ҳамон гувиллар, Абдураҳмонов эса мамнун жилмайиб турарди.

Умар закунчи «томошанг бошингда қолсин» дегандек шахт билан даврадан чиқди-ю, қайрағоч танасига боғланган жийроннинг жиловини титроқ қўллари билан ечди. Қайтиб келиб, ерда, Абдурахмоновнинг оёғи остида ётган қамчинни юлқиб олиб от томонга югурди. Бойлоқдан бўшаган от, эгаси яқин бориши билан, қўрқдими, бегонасирадими, тўсатдан шаталоқ отиб, машоқ қилинаётган буғдойзорга югурди.

– Тўхта! – Закунчи ҳам илтижо, ҳам ғазаб билан ҳайқирди. – Тўхта, Қоракўз!

Лекин жийрон қайрилиб ҳам қарамади. Қизғиш ёллари, гажак бўлган думи ёз қуёшида товланганча югуриб кетди. Закунчи қамчисини боши устида баланд кўтариб, жийрон кетидан чопиб бораркан, алам билан чинқирди:

## - Қоракўз! Тўхта!

Қайрағочга суяниб турган Раъно келинойимга энди кўзим тушди. Сочини бошига чамбарак қилиб олган, қўлида дафтар бор эди.

У жийрон кетидан чопиб бораётган Закунчидан кўз узмас, дафтар тутган қўллари титрар эди. Назаримда кўзи жиққа ёшга тўлгандек бўлди.

## 3. Устун йиқилса, устун зил кетади

Одамларнинг бахтига куз яхши келди. Картошка, сабзиларни йигиб олгунимизча ҳаво туриб берди. Тўгри, октябрнинг бошларида бир-икки дафъа ёмгир ёгди-ю, ҳаво яна жўнашиб кетди. Фақат кечкузга бориб, учкун эзиб ёмгир ёгди. Эрталаблари қуюқ туман тушадиган бўлди. Офтоб кўтарилиши билан қуёш чарақлаб кетади. Аммо кун ботмасидан тагин ер- кўкни туман ўраб олади.

Колхоз ҳамма планни бажариб бўлган, ер музлаб қолмасидан шудгордан қутулиб олишга уринардик. Қанд лавлаги бу йил ҳам яхши бўлди. Оқсоқолнинг маслаҳати билан разъезд яқинида лавлагини қабул қилиб оладиган янги омбор қурилди. Янгийўлдаги завод одамини жўнатади-ю, лавлагини шундоқ омборнинг ўзидан олиб кетаверади.

Халқ Оқсоқолнинг раислигини қўмсаб қолган эканми, нима иш чиқса чиппа ёпишади. Закунчи пайтидаги уриш-сўкишлар йўк. Қизик, хеч ким Закунчини эсламайди ҳам. Гўё бу дунёда Умар закунчи деган кимса ҳеч қачон бўлмагандек. Тўгри, аввалига хар хил мишмишлар тарқалди. «Закунчини райкомда моховга ошна қилишибди», «Закунчини урушга жўнатишмокчи экан, тогаси ўртага тушиб олиб қолганмиш...», «Закунчи молияга ишга ўтганмиш, налугчи бўлиб олганмиш...» Аммо у «Қизил дехкон» тарафларда корасини кўрсатмади. Шу-шу одамларнинг эсидан чиқиб кетди. Оқсоқол унинг дангиллама уйини Ленинград қамалидан чиқиб келган оилаларга берди. Назаримда фақат битта одам – Раъно келинойим халиям Закунчини эслайди. Шу уч-тўрт ой ичида озиб-тўзиб кетди...

Кўтармадаги охирги пайкални ҳам ҳазиб бўлдик. Кунботар палласи туман ҳуюҳлашиб, одам

одамни танимайдиган бўлиб қолганида аравани тўлдириб омборга жўнатдик.

Оқсоқол тўрт аянчли ғийқиллаганча лойга бота-бота имиллаб кетаётган тўрт ғилдиракли ҳўкиз арава ортидан қичқириб қолди:

– Омбордагиларга айт, Олимжон! Тезроқ тушириб, олишсин. Кейин дарров изингга қайт, уқдингми?

Туманлик орасидан Олимжоннинг ингичка овози янгради:

- Дарров келаман. Чу, жонивор!

Қандоқ яхши-я, бу бола! Ўшанда – Закунчи қишлоқдан бадарға қилинган куни қолидан хабар олгани борганимда болани кўриб қўрқиб кетувдим. Тикан кирган жойлар маддалаб яра бўлиб кетган экан. Йўқ, ҳайтовур Комил табиб дори-дармон қилиб, оёққа турғазди. Олимжон яна ишга киришиб кетди. Тағин ўша-ўша: мактабдан қайтади-ю, далага югуради. Ҳозир аравакашлик қиляпти. Эртадан ер ҳайдашга тушсак, тракторга сув ташийди.

Одамлар туманлик орасидан шарпадек сиргалиб чиқиб, аравага сиғмай қолган беш-олти замбил лавлаги уюми олдида турган Оқсоқолнинг атрофига тўпланишди. Туман билан қўшилиб, совуқ ҳам тушган, кунбўйи замбил кўтарганим учун биқинимга яна огриқ турган, бўгилиб кетаётганга ўхшардим.

Оқсоқол атрофини ҳалҳадек ўраб турган одамларга ҳайҳирди:

- Болали хотинларга жувоб. Эркаклар қолсин, яна жиндай иш бор.
- Биз-де, ўша эркак, Оқсоқол! Парча опа туманлик орасида дўриллади. Хизмат бўлса этвуринг!

Оқсоқол мамнун кулди:

- Тўгри, сен, ўнта эркакни қочирасан.

Туманликда ивирсиган шарпалар секин-секин гойиб бўлди. Оқсоқол менга кўзи тушиб жеркиб берди:

– Сен нега анграйиб турибсан, бор, онангга бокиш!

Совуқдан муштдеккина бўлиб жунжикиб турган бобом яқин келди.

- Қўявур, Робия мен билан кетади.

Оқсоқол маъқул, дегандек бош ирғади. Кетмон дастасидан ушлаб дийдираб турган Комил табибни кўриб раҳми келди шекилли, овози юмшади.

- Сизам борақолинг, Комилбой.
- Йўғ-е! Туман орасида табибнинг юзини аниқ кўрмасам ҳам, хижолат чекиб илжайганини пай-ҳадим. Унаҳа деманг, Оҳсоҳол.
- Бўлмаса гап бундоқ... Оқсоқол ёнида қолган, беш-олти одамга бир-бир қараб чиқди. Яна озгина ғайрат қиламиз. Пайкални қадамлаб айланиб чиқамиз. Яримта-юримта лавлаги қолиб кетган бўлсаям териб олайлик, барака топгурлар. Завод қараб турибди. Қозир арава қайтади. Ўзи биринчи бўлиб пайкалга кириб кетаркан, таъкидлади. Бир бўлак ҳам қолмасин. Эртага трактор тушади.

«Бир бўлак ҳам қолмасин» деб айтишга осон. Туман бўлса, қоронғи тушиб қолған бўлса! Лавлаги бўлагини гуваладан ажратиб бўлармиди?

Ўнимда пишиллаб келаётган Парча опа йўлини ўргатди.

– Қўлиз билан чангаллаб нима қиласиз, Роби?
 Тепиб кўринг, ўзи билинади.

Тўғри айтган экан! Каттароқ кесакни тепиб кўрасиз: этик учига юмшоқ уннаса ёмғирда ивиган гувала бўлади, қаттиқроқ тегса – лавлаги! Аммо қаттиқроқ уннайдиган лавлаги қолдиғининг

ўзи йўқ. Чорак замбил лавлаги тергунимизча анча вақт ўтди. Хамма ёқни зулмат қоплаган, совуқ тушганига қарамай, терлаб кетгандим. Қуюқ туман одамни бўгишини энди билдим. Парча опа билан икковлашиб замбилни хирмонга олиб чиққанимизда алламаҳал бўлган эди. Осмонда, кунботар томонда кўр одамнинг кўзидек хира ой туманлик орасида сарғайиб турар, аммо атрофни ёритиш ўрнига ғашга тегарди.

Бобом билан Оқсоқол сирғана-сирғана замбил кўтариб яқин келишди. Замбил тагида ётган лавлаги бўлакларини хирмонга ағдаришди.

- Сениям суробинг тўгри бўлди-а, ўртоқ! Оқсоқол бобомнинг елкасига шапатилаб эркалади. Дамингни ол... Сават замбилни тўнкариб ўтирди-да, ёнидан жой кўрсатди. Ўтир, носингдан ол.
- Ўзимам айтувдим, нечук бу меҳрибон бўпқолди, деб! Бобом тўнгиллади. Шу одатинг қачон қолади-а? Ўзингникини чексанг ўласанми?
- Меникини ишқори кўп экан. Оғзимни ўйиб юборди.
- Бўпти! Бобом лойга беланган узун камзулининг чўнтагидан носқовоғини чиқарди. Алмашамиз.

Оқсоқол қоронғида ҳе-ҳелаб кулди.

- Қўй, ўртоқ! Тилинг ўйилиб, кампирингдан балога қолиб юрмай.

«Хазончинак» қилинган лавлагининг чўғи кўп эмас эди. Одамлар чекка-чеккадан чиқиб келиб, тағин хирмон атрофида тўпланишди.

- Тайиб, сиз кетвуйинг! Оқсоқол оғзида нос борлиги учун тили яхши айланмай буюрди. Ҳаммайлага жувоб.
- Лавлагини ким ортади? деди Парча опа дўриллаб.
- Ўзивуззи қўливуз йўқми? Оқсоқол тилаб олган носини роҳат қилиб чеколмаганига жаҳли

чиқди шекилли, ерга тупириб, кафтининг орқаси билан мўйловини артди. – Бор дегандан кейин боравермайсанми!

Атрофни шарпадек ўраб турган одамлар бир зумда гойиб бўлишди. Жимлик чўкди. Қуюқ туман баттар исканжага олиб бўгаётганга ўхшар, биқиним симиллаб огрир эди.

– Менга қара! – деди бобом хавотирли оҳангда.– Олимжондан дарак йўқ-ку!

Оқсоқол ҳам боядан бери шуни ўйлаб ўтирган экан шекилли, ўрнидан туриб кетди.

- Юр, ўзимиз бора қолайлик.

Қаторлашиб йўлга чиқдик. Оёқ остида лой пилчиллайди. Оқсоқол қаддини гоз тутиб боряпти. Бобом унинг қадамига етолмай пилдирайди. Мен ҳам тезроқ юришга ҳаракат қиламан. Унга сайин биқиним санчиб-санчиб қўяди... Хазоннинг аччиқ ҳиди анқиб турган ёнгоқзорга кирганимизда зулмат янаям қуюқлашиб кетгандек бўлди.

- -Дума! деди Оқсоқол орзумандлик билан. Қор тушса Тоҳиримни тўй қиламан. Потма айтди: ота, неварангизни суннат қилмаймизми, деди. Тўғри айтади... Бир тўй қилайки. У жимиб қолди-да, қўшиб қўйди. Беш-олти йил ўтсин, қарабсанки, Ойпопукни узатамиз. Чевара кўраман, а лаббай?
- Мана бу бошқа гап! Бобом дадилланиб шанғиллади. Айтмовмидим, ҳеч кимдан кўрмаганингни мана шу Потмадан кўрасан деб. Қиздан афзал-да, келининг.

Икковлари сукутга чўмишди. Билдимки, Оқсоқол Фотима келин ҳақида гап бошланиши билан Зуҳра келинни эслади... Олд томонда Алвасти кўприкнинг шовуллаши эшитила бошлади. Оқсоқолнинг юраги сиқилди шекилли, яна шанғиллади:

- Кимсандан хабар йўқми?

Юрагим бир қалқиб кетди. Уч йил бўляпти. Кимсан акамдан дарак йўқ. Бу қандоқ азоб?! На тирик деб қувонолмасак, на... Йўқ, биламан. Кимсан акам тирик!

- Ҳайронман... Бобом хўрсинди. Тирик бўлса шу кунгача дараги...
- Э, ўле! Оқсоқол жаҳл билан бақириб берди. Шунча ёшга кирибсан-ку товуқча ақлинг йўқ...
- Нима бўпти менга? деди бобом унинг гапини кесиб. Қолаверса, сенинг йилинг ҳам товуқ!
- Хўш, нима қипти, товуқ бўлса? Оқсоқол энг мухим масалани талашгандек тажанглик билан ҳайқирди. Биламан, иккаламизнинг мучалимиз бир. Аммо онангни қорнида ётган тўққиз ойниям ҳисоблаш керакми керак. Бундан ташқари мучалинг икки марта айланганида бир ёш қўшиладими қўшилади! Тушундингми, саводсиз?
- Бўлса бордир... Бобом яна уф тортди. Лекин Кимсаним...
- Яна гапиради-я! Оқсоқол баттар тажанглашиб кетди. Хеч радио эшитасанми, пакана! Бизникилар Булғорияни озод қилди. Ўшаларнинг ичидаям ўзимизнинг партизан болалар бор экан. Мени айтди дерсан. Кимсан булғор партизанларига қўшилиб кетган.

Кўнглим ёришди. Оқсоқол рост айтяпти. Кимсан акам Болгария партизанлари орасида юрибди. Шунинг учун хат ёзмаган. Эрта-индин дараги чиқади. Булғория озод бўлдику.

Хаёл суриб кетаётган эканман, бир маҳал Оқсоқолнинг хавотирли хитобидан чўчиб тушдим.

– Анави нима, Дума?

Оқсоқол қўли билан кўрсатган томонга қарадиму Алвасти кўприкдан эллик қадамча нарида, темирйўл устида шарпадек қорайиб турган нарсага кўзим тушди.

- Вагонми? - деди бобом дудмал қилиб.

Ўша томондан, туманлик орасидан асабий, ингичка овоз эшитилди:

- Yy! Yy!
- Ие, арава-ку! Оқсоқол ўша томонга югураркан, йўл-йўлакай койинди. – Ҳа бола-я! Катта йўлдан юрмасдан...

Лойда сирганганча мен ҳам чопиб кетдим.

Оқсоқол тўғри айтади, Олимжон болалик қилган. Катта кўчадан айланиб юрмаслик учун, аравани эски йўлдан солган. Тўғри, бу йўл яқин: омбор рўпарасидан чиқади. Аммо лойда арава ботиб қолган бўлса...

Туманлик орасида Олимжоннинг йигламсираган овози яна янгради:

- Yy! Yy!

Яқин боришимиз билан юрагим орқага тортиб кетди: лавлаги тўла арава темирйўлга кўндаланг туриб қолган, Олимжон нуқул ҳўкизларни хипчин билан савалар эди. Хаёлимга келган ўйдан ўзим сесканиб кетдим: «Поезд келиб қолса-чи!»

Оқсоқол югуриб бориб ҳўкизнинг тасмасини чангаллади.

- Катта йўл қуриб қолганмиди, бадбахт!

Олимжон анчадан бери ҳўкизларни тортқилайвериб чарчаган, қўрқиб кетган бўлса керак, йиғлаб юборди:

- Ман билмадим... Пешиндаям шу ердан...
- Э, шу ердан ўтмай... Оқсоқол бобомга ҳайқирди. – Орқага ўт, Дума. Ҳамманг орқага ўт... – У тасма жиловини күч билан тортди. – Чу жонивор!

Бобом, Олимжон, мен – учовлашиб, арава орқасидан итара бошладик. Арава қилт этмас, олдинги иккита ғилдирак темир йўлнинг нариги изига, орқа ғилдираклар бериги изига тақалиб, михланиб

қолган, ҳўкизлар ҳарчанд чирангани билан арава жойидан жилмас эди.

- Юр-е, ҳаром ўлгур! Оқсоқол ғазаб билан ҳўкизлардан бирининг қорнига тепди. Ҳўкизлар яна бир талпинган эди, арава тагида алланима қарсиллади.
- Ўқ синдими, нима бало! Оқсоқолнинг ҳаяжонли хитобидан қўрқиб кетдим. Оқсоқол лип этиб, арава тагига шўнгиди. Кўп ўтмай эмаклаб чиқиб, орқага ўтди. – Ҳаммаси жойида! – деди жонланиб. – Қани, кўтардик! Куч борми ўзи!

Тўртовлашиб арава орқасидан кўтара бошладик.

- Чу, харом ўлгур! - деди Оксокол чираниб.

Орқа ғилдираклар из устига чиқдию сирғаниб яна қайтиб тушди.

– Торт! – Оқсоқол қоронғида кўзини ола-кула қилиб менга ўшқирди. – Ҳўкизни торт дейман!

Югуриб олдинга ўтдим. Қарасам, ҳўкизлардан биттаси бемалол чўккалаб, шағал устида ётибди. Қамма ёқни туманли зулмат қоплаган бўлса ҳам ҳўкизнинг оғзидан тили чиқиб кетганини, лабидан сўлак оҳаётганини кўрдим. Чинҳириб юбордим:

- Бобожон! Ҳўкиз ўляпти!

Оқсоқол бўралаб сўкинганча чопиб келди.

- Менга деса ҳаром ўлмайдими! Поезд кепқолади ҳозир!
- Посирани кес! арава орқасидан бобом бақирди. Кес дейман!

Оқсоқол этигининг қўнжига қўл суқиб, пичогини суғуриб олди. Бўйинчага богланган тасмаларни ширтиллатиб кесиб ташлади. Шериги чўккалаб қолганида бўйни бир томонга қийшайиб кетган ола ҳўкиз лапанглаб нари кетди. Оқсоқол иккинчи ҳўкизнинг шохидан ушлаб торта бошлади.

- Тур, ҳаром ўлгур! Тур!

– Поезд! – Орқадан Олимжоннинг ҳаяжонли ҳайқириғи эшитилди. – Поезд келяпти!

Бурилиб қарадиму Алвасти кўприк томонда ловуллаб яқинлашаётган учта чироқни кўриб қўрқиб кетдим.

– Дума! – Оқсоқол харсиллаб ҳўкизни яна тепди. – Дума! Поездда аскар болалар бор. Биламан! Ярадорлар бор.

Эсанкираб қолған бобом арава орқасида туриб ингичка овозда чинқирди:

- Нима қилай?
- Бу ёққа кел, аҳмоқ! Чоп!

Жонҳолатда ҳўкизнинг қулоғига ёпишдим. Ростдан ҳам поезд фронтдан ярадор йигитларни олиб келаётган бўлсачи! Вагонда Кимсан акам ҳам бўлса-чи!

Оқсоқолга қўшилиб бақирдим:

– Чу, ҳаром ўлгур, чу!

Орқа томонда Олимжон йиғламсираб чинқирди:

- Тезрок! Дума бува, тезрок боринг!

Бобом етиб келганида чўккалаб ётган ҳўкиз туриб кетган эди.

- Олимжоннинг ёнига ўт, Роби!
   Югуриб арава оркасига ўтдим.
- Мен нима қилай, опа? деди Олимжон титраб. Нариги томондан Оқсоқолнинг асабий бақиргани қулоғимга кирди.
  - Шотини кўтар, Дума! Шотини.

Туманлик қўйнида ёриб чиққан нур самовар дудбуронидан отилаётган оловдек ловуллаб, тезлик билан бостириб келарди. Бобом билан Оқсоқол аравани лайлак қилиб кўтаришди шекилли, устимизга лавлагилар ёгила бошлади. Яқин келиб қолган паровоз сурон солиб гудоқ чалди. Чироқ ёруғи-

да лайлак бўлиб бошимдан босиб тушаётган аравани кўрдиму дахшат ичида чинқириб юбордим:

- Олимжон, қоч!

Кўзимни очсам, қоп-қора зулмат ичида ётибман. Атроф жимжит. Олисда – разъезд томонда узоқлаб бораёттан поезд ғилдиракларининг бўғиқ гулдираши эшитиларди. Пастда Алвасти кўприк шовуллайди. Ўрнимдан турмоқчи эдим, биқинимга санчиқ туриб, чўккалаб қолдим. Тиззам тошга урилган шекилли, қаттиқ оғриб, кўнглим бехузур бўлди. Уч-тўрт қадам нарида ёнбошлаб ётган аравани энди кўрдим. Араванинг ғилдираклари ҳамон секин-секин айланиб турар, нолали ғийқиллар эди.

Тепамда ҳансираган нафас эшитилди.

– Опажон! – Олимжон қўлимдан тортди.

Оғриқни унутиб, сапчиб турдим. Оёқ остида сочилиб ётган лавлагиларга қоқилиб, сурилиб, темир йўл устига чиқдик. Юз қадамча нарида омбор чироқлари хира милтираб турар, берироқда туманлик орасида соядек иккита ҳўкиз кўринар эди.

– Бобожон! – Оқсоқланганча энтикиб, ўша томонга югурдим. – Бобожон, қаёқдасилар?

Чопиб борарканман, ёнбош томонда Олимжоннинг бақиргани қулоғимга кирди.

– Опа! Бу ёққа келинг, опа! – деди йиғламсираб.– Туринг, Оқсоқол бува!

Етиб борганимда Оқсоқол бошини чангаллаганча чўккалаб ўтирар, ҳансираб нафас оларди.

– Мени қўй... – деди энтикиб. – Думага қара... – У каловланиб ўрнидан турмоқчи бўлди-ю, яна чўк-калаб қолди. – Борсанг-чи, – деди инграб.

Эс-хушимни йўқотиб, тағин чопиб кетдим.

Пастда, чап томонда ожиз инграш эшитилди. Лойга ботиб, аллақандай дарахт тагига тушиб бордим. Бобом кўлмакда чалқанча ётар, инграр эди. – Бобожон! – Кўксимдан йиги аралаш нидо отилиб чиқди. – Туринг...

Аввал Олимжон, кейин гандираклагудек бўлиб, Оқсоқол етиб келди. Кўлмакка ўтирганча бобомнинг бошини тиззасига олди.

- Кўзингни оч, ўрток! деди бобомнинг юзини силаб. Мана... Бўлди... ҳозир... Ҳаммаси яхши бўлади. Бобом энтикди.
  - Мен... ўламан...
- Унақа дема, ўртоқ! Оқсоқол овози титраб, ялинди. Нос чекасанми? Мана ҳозир... У бир қўллаб бобомнинг пешонасини силаганча, иккинчи қўли титраб шимининг чўнтагини титкилай бошлади.
- Кимсанимни кўролмадим... Бобом гапирмоқчи эди, оғзидан қон оқиб, хириллаб қолди.
- Жон ўртоқ... Унақа қилма... Оқсоқол эгилиб, бобомнинг юзига юзини қўйди. Ўзинг айтгансан-ку, бирга келганмиз, бирга кетамиз.

Билмадим, туман тарқалдими, ой чиқдими, бобомнинг юзи ёришгандек бўлди. Сесканиб кетдим. Қали қоронғида кўрмаган эканман. Бобом бошяланг, юзини таниб бўлмас, кийимлари пора-пора бўлиб кетган, ҳамма ёғи лой аралаш қонга беланган эди.

– Чопсанг-чи! – Оқсоқол титраб-қақшаб Олим-жонга буюрди. – Югур, отангни чақир!

Олимжон сапчиб туриб, темир йўл томонга чопиб кетди.

- Ўғлимни кўролмадим... деди бобом шивирлаб. Келса... Ўзинг... Кимсан... У ёғини айтолмади. Тўсатдан кўкраги босқондек қаттиқ-қаттиқ кўтарилиб туша бошлади. Оғзидан қон отилиб, Оқсоқолнинг юзига сачради.
- Бобожо-о-он! Чинқириғим туманликни тилка-пора қилиб юборганини, хира чироқ ёниб тур-

ган омбор томондан шу ёққа одамлар югуриб келаётганини элас-элас ҳис этдиму ҳушимдан кетдим.

### ЙИГИРМА ТЎРТИНЧИ БОБ

## ТЎРТИНЧИ СИНФ ЎҚУВЧИСИ МУЗАФФАР ШОМУРОДОВ ХИКОЯСИ

#### **Галати** хотин

Укам билан гаплашиб ётибмиз. Иккаламиз бир кўрпанинг тагига кириб олганмиз: уй совук. Деразадан ой тушиб турибди. Девордаги Хусан бувамнинг сурати бизга қараб, қовогини соляпти. Кичкина салла ўраган чўққисоқол бувам менга қараб: «Нега укангни урдинг, нега ойингни хафа қилдинг», деётганга ўхшайди. Бу – ўша «Қора аммам»никидаги суратнинг ўзи. Яқинда ойим атайлабдан Тошкентга тушиб катталаштириб келган. Биламан, ойимда Кимсан амакимнинг ҳам сурати бор. Аммо уни деворга осмайди. Кашта тикилган қийиқча орасига, қутига яшириб қўяди. Ҳеч ким йўгида қараб-қараб томоша қилади-да, кейин қийиқчага ўраб, яна қутига беркитади.

- Ака! Ҳусан бувам поездни тўхтатганини айтиб беринг.

Омоннинг одати шу. Бир гапни эшитдими, қайта-қайта сўрайверади. Авваллари Сичқонбой билан Қўнғизвойни айтиб чарчардим. Энди бу чўпчакка ёпишиб олган. Ойим бувамнинг суратини катталаштириб келган куни бувам билан Оқсоқол поездни қандоқ қутқаришганини айтиб бергандим. «Қора аммам»дан қандоқ эшитган бўлсам, худди ўшандоқ қилиб. Ҳар куни шуни сўрайди. Мана, тағин бошлади.

- Поездни тўхтатганмас, қутқариб қолишган! дедим тушунтириб. Шунақа қилишмаса бўлмасди. Поездда ўзимизнинг аскарлар бўлган. Билдингми?
  - Қанақа қилиб?
  - Нима «канака килиб?»
  - Қанақа қилиб қутқариб қолишган?
- Айтдим-ку, сенга! Кўприк тагидан алвасти чиққан. Ҳусан бувам билан Оқсоқол бува зўр полвон бўлишган, билдингми?! Икковлари бир бўлиб, алвастини Бўрижарга отиб юборишган. Кейин ўзларини поезд уриб кетган, тушундингми! Оқсоқол бува берироқда тургани учун лат егану тирик қолган. Ҳусан бувам ўлган.

Омон шу билан тинчиса экан. Сўрайверади.

- Ака, алвасти қанақа бўлади?
- Алвастими? Сочи узун, мўйлови қалин бўлади...
- Дадамникига ўхшаганми?
- Йўқ, алвастининг мўйлови тиззасига тушиб туради.
  - Поезд алвастидан қўрқадими, ака?

Нима дейишимни билмай қолдим. Рост-да. Шунақанги катта поезд алвастидан қўрқадими? Босиб кетса-ку бўлди эди. Хусан бувам тирик қоларди.

Асли, бу гапларни Олимжон акамдан яхшилаб сўраб олсам бўларкан. Хозир Олимжон акам йўқ. Ўқишни битириб, Фаргонага ишга кетган. Оқсоқол бува билан Хусан бувам поездни сақлаб қолишганини ойим ҳам кўрган экан. Аммо ўша гапларни эслагиси келмайди. Мен аммамдан эшитганимни айтаман. Омон бўлса суриштираверади.

- Бўлди! - дедим жеркиб. - Ухла...

Укамга гапиряпману икки қулоғим нариги уйда. Биламан, қозир дадам келади. Ойим бугун бўлган воқеани чақиб беради. Бугун ойим ёмон йиглади.

Уни мен хафа қилдим. Омонни йиқитмасам бўларкан. Йўқ, гап бундаяммас. Қоровул амакининг ёнгогини ўгирлаб чатоқ қилдик. Ҳаммасини Абдували бошлади-да.

Катта танаффусда болалар билан қувлашмачоқ ўйнаб роса терладим. Чанқаб кетдим. Ўрикзор этагида ариқ оқади. Кузда ариқ шунақанги тиниқ бўладики, қиргоққа ётиб олиб, сув ичаётганингизда ариқ тагида соч толасидай силкиниб ётган сув ўтларини, иланг-биланг қилиб юрган ипдай ингичка «чувалчанг болалари»ни аниқ кўрасиз. Сув шунақанги ширин, шунақанги муздайки, ичсангиз тишингиз қамашиб кетади. Зах қиргоққа ётиб олиб, энди оғзимни сувга босган эдим, биров елкамга туртди. Сулаймон ака бўлса керак деб қўрқиб кетдим. Сулаймон ака директоримиз. Ариқдан сув ичаётган болаларни кўрса жахли чиқиб кетади.

Қўрқа-писа бошимни кўтарсам, тепамда Абдували илжайиб турибди.

– Ёнғоқ! – деди сирли шивирлаб.

Хеч балога тушунмадим. Шоша-пиша сув шимириб, ўрнимдан турдим.

- Қанақа ёнғоқ?
- Конини топдим. Абдували атрофга аланг-жаланг қараб олди.

Ўрикзор этагидан «туку-туку» деган қўнғироқ товуши эшитилди. Абдували қўлимдан судраётган эди, оёғим тортмай туриб қолдим.

- Э, дарсга чалди.
- Немис тили-ку, уришимайди! Абдували қўлимдан ушлади.

Немис тили ўқитувчимиз Анна Ивановна деган кампир. Дарсда нуқул Ленинградда очарчилик бўлганини, шаҳар озод қилинганидан кейин Тош-

кентга келишганини, Оқсоқол бува бир эмас, етти оилага уй топиб берганини айтади. Бизларни ҳеч уришмайди.

- Юрсанг-чи, конини топдим, деяпман-ку!

Абдували қўлимдан судраб сап-сариқ хазон гиламдек тўкилиб ётган ўрикзор ичкарисига бошлаб кетди. Анча юрдик. Тоғдек дўмбайиб ётган тепалик этагига етганимизда Абдували қўлимни қўйиб юборди-да, имо қилди.

- Ана! Зўрми?

Қарасам, тепалик панасида бир туп каттакон ёнғоқ бор экан. Танасида қоп-қора қурбақа саллалар бўртиб чиққан ёнғоқ. Бу йил ўзимизнинг ёнғоқ унча кўпа мева солмади. Бу дарахтнинг шохларида ғуж-ғуж ёнғоқлар, паққа бўлиб, пўстидан ажралиб турибди. Битта кесак тегса дув тўкилади. Энгашиб қўлимга кесак олаётган эдим. Абдувалининг жахли чиқиб кетди.

– Жиннимисан? Сулаймон ака эшитиб қолади-ку! Устига чиқиб силкитаман!

У ерга ўтириб олиб, эски ботинкасини чаққонлик билан ечди. Маймундек тармашиб, дарахтнинг шохига миниб олди.

 – Хой, – деди овозини пасайтириб. – Тезроқ тергин, хупми. Қоровул амаки кепқолса ҳуштак чаласан!

Юрагимга вахима тушди. Бундан чиқди, ёнгоқ қоровул амакиники экан-да! Билиб қолса ўлдира-ди-ку!

Хушимни йиғиб олмасимдан Абдували миниб ўтирган шохга тик туриб олди-да, юқорироқдаги шохни икки қўллаб чангаллаганча оёқ-қўлини баравар силкита бошлади. Бошим, елкаларим устига ёнғоқ дувиллаб тўкилди. Шошиб қолдим. Бақироқ қоровул амакини ҳам, немис тили дарсини ҳам унутиб, ёнғоқ теришга тушиб кетдим. Шимим-

нинг икки чўнтаги бирпасда тўлиб чиқди. «Қора аммам» бу йил тўртинчи синфга боришимга атаб, Фотима холага айтиб, чийдухоба камзул тиктириб берган эди. Камзулнинг чуқур-чуқур чўнтаклари ҳам ёнгоққа тўлди.

– Бўлди! – дедим Абдувалига имо қилиб. – Туш! Абдували қулоқ солмади. Тепароқдаги шохга чиқиб яна силкитди. Тағин анча-мунча ёнғоқ тўкилди. Бошимдан дўппимни юлқиб олиб, унга ҳам солаётган эдим, шундоқ тепамда аёл кишининг овози эшитилди:

### Хой!

Бир қўлимда дўппи, бир қўлимда тўртта ёнғоқ билан чўккаланган жойимда қотиб қолдим. Бўлди! Қўлга тушдик! Ҳуштак чалиш ҳам эсимга келмай, овозим борича бақириб юбордим:

- Абдували! Атас!
- Қўрқма... Бояги овоз яна эшитилди. Елкам оша орқага қарадиму тап этиб ўтириб қолдим. Маъсуда опа! Тура қочишни мўлжаллаб, яна бир қараган эдим, Маъсуда опа эмаслигини билдим. Бултур кузда ўқитувчи опамиз ҳам худди шунақа зангори макентош плаш кийиб юрарди. Йўқ, қарасам, бошқа: шоҳи рўмол ўраган, қўлида сумка. Ойим дўконга чиққанида кўтариб юрадиган сумкага ўхшаганмас, кичкина, чиройли.

Бўлди! Бундан чиқди қоровул амакининг келиними, қизими... Ишқилиб қўлга тушдик-да!

Дўппимни чангаллаб каловланиб ўрнимдан турдим.

- Қоч! - дедим Абдувалига қараб.

Абдували ҳамон шохга осилиб турарди. Икки кўзи ҳалиги хотинда, ранги ўчиб кетган.

– Қочсанг-чи! – Дўппимни ёнгоқ аралаш қорнимга босганча ўрикзор ичига ўзимни урдим. Аммо атайлаб секинроқ чопдим. Билиб турибман, қоровул амакининг келини (қизими, келиними,

бари бирмасми) мени қувлайди. Унгача Абдували дарахтдан тушиб олади.

Йигирма қадамча лўкиллаб борган эдим. Бояги хотин яна чақирди.

- Қўрқма, ёнғоқ айлансин, сендан!

Иккиланиброқ тўхтаб қолдим.

– Шошма! – У қочиб кетишимдан қўрқди шекилли, турган жойида икки қўлини мен томонга чўзди. Ўнг билагига илиб олган чиройли сумкаси лопиллаб кетди. – Кетма...

Кўз қирим билан қарасам, Абдували шохдан-шохга осилиб, пастга тушяпти. Кўнглим анча тинчиди.

- Сен Музаффарсан-а? Бояги хотин мен томонга бир қадам босган эди, мен ҳам Абдувалидан кўз узмай, бир қадам чекиндим. Тутқазиб бўпман! Абдували омон-эсон ерга тушиб олсин, кейин ўзим биламан! Қоровул амакининг келини балки ростдан ҳам урмас. Аммо бу гап дадамнинг қулоғига етса соғ қўймайди. Бир марта Комил буванинг уйи ёнидаги ёнгоқзорда болалар билан қўй боқиб юрганимда битта темир қозиқ топиб олиб балога қолгандим. Қозиқни уйга олиб келганимда дадам кўриб қолиб, роса таъзиримни берган, ярим кечада қозиқни қаердан топган бўлсанг, худди ўша жойга ташлаб келасан деб мажбур қилган. Бир ўзим боришга қўрқиб, Абдувалига роса ялинганман...
- Бизлар билмадик, хола! дедим, шохдан-шохга осилиб тушаётган Абдувалидан кўз узмай. – Мактабники деб ўйлабмиз.

Хотин қочиб кетишимдан хавотирланиб тўхтаб қолди.

– Сен Музаффарсан-а? – деди товуши титраб. – Ўртоқларинг айтишди. Дарсга кирмабсан.

Индамадим. Кўз қирим билан қарасам, Абдували ерга етай деб қолибди.

- Ҳа! дедим Абдувалидан кўз узмай. Нимайди?
- Ўғлим! Хотин инграб юборди, қўлидан сумкаси тушиб кетди. Қучоқ очганча мен томонга отилди. Қараб турибман: Абдували ерга уч қулочча қолганда, тап этиб сакрадию тепалик орқасига уриб кетди. Бўлди! Қутулдик! Мен ҳам жоним борича чопиб ўрикзор оралаб кетдим. Анча нарига бориб қолганимда орқа томондан қулоғимни тешиб юборгудек нола эшитилди:

# - Музаффар! Кетма-а!

Нимага унақа бўлганини ўзим билмайман. Лекин оёгим чалишиб тўхтаб қолдим. Бурилиб қарасам, бояги хотин қалин ҳазон тўкилган ўрик тагида мук тушиб ўтирибди. Илтижо билан бошини кўтарди-да, яна нола қилди:

- Кетма. Шошма...

Ўнғоқ тўла дўппини қорнимга босганча туриб қолдим.

- Музаффар! Бояги хотин чўккалаб ўрнидан тураркан, яна қўлларини олдинга чўзди. Тўхта! Рўмоли сиргалиб елкасига тушди. Негадир кўзидан тирқираб ёш чиқиб кетди. Ҳаворанг плашининг этаклари ҳазон чангига беланганча каловланиб шу ёққа юрди. Елкасига тушган рўмолини юлқиб олди. Рўмолининг бир учи ерга тегиб тупроққа қоришганига ҳам парво қилмади.
  - Кетма! деди титраб. Қўрқма...

Қоққан қозиқдек туриб қолдим. Олдига боришга қўрқар, аммо қочгим ҳам келмасди. Нимага йиғлади бу хотин?

У маст одамдек гандираклаб секин-секин ёним-га кела бошлади.

Индамай туравердим. Яқин келганда у бирдан тиззалаб қолди.

– Болам! – дедию ўкраб юборди. Маҳкам бағрига босиб юз-кўзимдан ўпа бошлади. Кўз ёшидан ҳўл

бўлиб кетган юзидан аллақандай бегона ҳид келар эди. Ойим ҳеч қачон атир сепмагани учунми бошим айланиб кетди. Қизиқ, нимага ўпади мени? Ким бу хотин!

- Бор экансан-ку, ўғлим! У ёш тўла кўзлари билан кўзимга узоқ термилиб қолди. Лаблари титраб кетди. Шунда иягида холи борлигини пайқадим. Тирик экансанку! Мен сени... У тағин қучоқлади. Қулоғим тагида алланима жиринглаб кетди. Қўлидаги билагузуклар бир-бирига урилиб жиринглаётганини пайқадим. Бир маҳал қорнимга алланима қаттиқ ботаёттанини сездим. Кейин билсам, ёнғоқ тўла дўппини ҳалиям қорнимга босиб турган эканман. У бағрига босган сайин ёнғоқлар ботиб қорнимни огритарди.
  - Қуйворинг! дедим ўзимни орқага ташлаб.
     Қанча юлқинсам, у шунча қаттиқ қучоқларди.
- Қўйворинг! Дамим қайтиб типирчиладим. Жинними бу? Нимага менга ёпишиб олди?!
- Биласанми, мен кимман? деди у инграгудек бўлиб. Кейин оғир-оғир бош чайқади. Билмайсан, болам, билмайсан.

Қўнғироқ жаранглади. Танаффус бўлди. Кейинги дарс – зоология! Сулаймон ака ўлдиради.

- Қўйворинг! Оёқ-қўлимни баравар силкитиб, юлқиндим. Дўппим қўлимдан тушиб, ёнгоқлар ҳар томонга думалаб кетди. У қўйиб юбориш ўрнига баттар қучоқлаб олди.
- Музаффар! деди энтикиб. Негадир ёш тўла кўзлари билан жилмайди. Кетасанми? Қўқонга кетасанми?

Ие, нима деяпти бу? Қаёқдан келди ўзи?

- Қочи-и-инг! дедим типирчилаб.
- Қўқонда-чи, синглинг бор: Насиба... Сени жудаям яхши кўради. Кетамизми-а, Музаффар?

Қўрқиб кетдим. Бола ўғирлайдиган лўли бўлмасин тағин. Атрофга аланглаб бақирдим: - Абдували-и!

Хеч ким кўринмасди. Хозир кичкина танаффус. Болалар бу ёққа келмайди.

– Қўйвор! – дедим йиғлаб.

Хотиннинг раҳми келдими, чўчидими, ҳайтовур қучоғидан бўшатди. Аммо қочиб кетишимга йўл бермади. Тиз чўкиб оёғимга ёпишган эди, орҳамга ўтириб ҳолдим.

– Музаффар! – деди титраб. – Ўғлим!..

Бир оёгимни амаллаб бўшатиб, елкасига тепдим.

- Қўйвор! Ойи-и-и!

У негадир сесканиб кетди. Қўллари шалвираб оёгимни бўшатди.

– Ёлғон! – Бўғзидан йиғи отилиб чиқди. – У сенинг ойингмас! Ўгай! Билдингми, ўгай! Ишонмасанг, қўшнилардан сўра!

Энди ўрнимдан турганимда қўлимни ушлади. Аммо боягидек қийнаб қучоқламади. Атир ҳиди келиб турган шойи рўмоли билан юзимни артди.

– Йиғлама, – деди секин. – Йиғлама, Музаффар. – Шундай дедию ўзи йиғлаб юборди. – Кечир мени, ўғлим, гуноҳкор онангни кечир. – У додлаб юбормаслик учун мушти билан оғзини тўсди. – Алдашибди... Сениям алдашибди, мениям... – Бир зум жимиб қолдида, ёш тўла кўзлари билан кўзимга термилди. – Биласанми, мен кимман? – деди лаблари титраб. – Мен сенинг онангман, тушундингми! Эслаб қол, ўғлим! Қўқонда тураман.

Юрагимни яна қўрқув босди. Сапчиб ўрнимдан турдим. Қўлимни силтаб тортдим. Чинқириб юбордим.

Бу сафар у ёпишмади.

– Ўғлим... – деди титраб. – Мен сени... – Яна кўзидан ёш тирқираб кетди. – Мен келаман, – деди йиғлаб. – Ҳар куни келаман.

Яна қўнғироқ жаранглади.

– Шошма, битта ўпай! – деди у чўккалаб ўтирганича ялиниб. Орқамга қарамай югурдим. Синф томонга чопиб борарканман, хотиннинг ўкиниб йиглаётганини эшитиб турардим. Камзулимнинг чўнтаги огирлашиб кетганини энди билдим. Чўнтагимда ёнгоқлар шиқир-шиқир қилар, чопишимга халақит берарди. Йўл-йўлакай ёнгоқларни қисимлаб олиб, улоқтириб юбордим.

\* \* \*

Сулаймон аканинг дарси қулоғимга кирмади. Ерда чўккалаб ўтирганча «мен сенинг онангман», деб йиглаган хотин хаёлимдан кетмас, «алдашибди... ўгай...» деган ҳайқириқ қулоғимда қайта-қайта жаранглар эди. Бу ҳам етмагандек ёнимда ўтирган Абдували нуқул тиззаси билан сонимга туртади. «Ўнғоқни чўз», деб им қоқади. Башарасига мушт туширгим келдию Сулаймон акадан қўрқдим. Шунда ҳов бир марта Абдувалининг бурнини қонаттан куним Мавлуда опаси кўзини ола-кула қилиб айтган гап тўсатдан эсимга тушди. «Укамни нега уради» десам, «шу укангми, ўгай-ку», дегани... Бояги хотин ҳам шуни гапирди. «Ишонмасанг, қўшнилардан сўра», деди. Нимага, нима учун унақа дейди?

Танаффусга чиқишим билан жилдимни осилтириб, уйга жунадим.

- ...Агар эшикдан киришим билан ойим жаҳлимни чиқармаса шунақа бўлмасди. Нимага ҳадеб уришади? Жилдимни елкамга осаманми, қўлимда кўтараманми, нима иши бор? Ойим челак тўла қовоқ пўчоқ кўтариб, молхонга кириб кетаётган экан.
- Одамларнинг говмиш сигири бор, сен бола иккита қуйниям эплолмайсан, деди узидан узи

таъна қилиб. – Мактабингдан кейин шу ҳаром ўлгурларни ўтлатиб келсанг, ҳақинг кетмайди-ку! Бари бир кечгача шаталоқ отиб ўйнайсан! Эрталабдан бери маъраб жонимдан тўйдирди. Ўзимнинг тан-жоним соғ бўлсаям майлийди.

Ойим авваллариям уришиб турардию у қулоғимдан кириб, бунисидан чиқиб кетарди. Негадир бу галгиси алам қилди. Ўшшайиб турган эдим, баттар жаҳли чиқиб кетди.

– Жилд жонворни елка кўтармайдими, ерга судраш шартми, болам?!

Тасмани бир силтаб жилдни буйнимга осиб олдим.

- Бўлдими? дедим алам қилганидан чийиллаб.– Қутулдимми энди?!
- Тағин бурнидан ортиқ гапириб бўлмайди бунга. Дўппинг қани? Аҳволингни қара!

Бошимни ушлаб кўрсам, ростдан ҳам дўппим йўқ! Бояги хотин қучоқлаганида ёнғоқ тўла дўппим ерга тушгани энди эсимга келди. Ўша заҳоти унинг йиглаб туриб айтган гапи қулогим остида жаранглади. «Алдашибди, сениям, мениям... У сенинг ойингмас, ўгай...»

- Билмадим, дедим тўнгиллаб. Йўқотиб қўйдим.
   Ойим кўзимга қараб турди-да, хўрсинди.
- Кап-катта бола... Шу кетишинг бўлса, яқинда ўзингниям йўқотиб қўясан. Бўпти, бор! Қовоқ сомса ёпдим, еб ол.

Шундай дедию бир қўли билан биқинини чангаллаганча, бир қўлида қовоқ пўчоги солинган челакни кўтариб, молхонага кириб кетди.

Энди айвон томон юрган эдим, олма шохида илинган арғимчоқда оёғини осилтириб ўтирган Омон чақириб қолди:

- Учиринг, ака! Битта учиринг!Энди сен қолувдинг!

Арғимчоқни ўзим ясаганман. Икки қулоч арқонни шохга илиб, пастига эски кўрпача ўраган эдим, тап-тайёр арғимчоқ бўлган. Омон иккаламиз галма-галдан учамиз. Мен ўтираман, Омон силкитади. Омон ўтиради, мен силкитаман... Бу гал унинг эркалиги ёқмади. Қиз боладек тантиқлик қилишини қаранг!

Индамай айвонга чиқиб кетаётсам Омон арғимчоқдан тушиб келиб, йўлимни тўсди.

– Учирасиз! – деди жилдимнинг бандидан чангаллаб. – Учирасиз! Ҳа! Йигирмата санаб учирасиз!

Жилдимнинг латта бандидан ушлаганча арғимчоқ томонга судради. Бўйним қийилиб кетди. Худди бўйнига арқон солинган қўйдек эргашганим ўзимга алам қилди.

- Қўйвор! дедим жилдни бўйнимдан олиб. Омон аллақачон арғимчоқ кўрпачасига ўтириб олган эди. Икки қўллаб жилд бандини чангаллади.
- Учирасиз, ҳа! Учирасиз, деди арғимчоққа осилиб турган оёғини типирлатиб.
- Қўйвор! Жилдни икки қўллаб ўзим томонга тортдим.
- Олдин учиринг-де! Омон эркаланиб, бошини чайқади.

Мунча тантиқ бу? Нима, малайманми? Жаҳлим чиқиб кетди.

- Йигирмата санаб учирасиз! Омон тантиқланиб жилд бандидан тортқилади. Учирасиз!
  - Бу ёққа бер! Жилдни алам билан силтадим.
- Бермайман, алам қилсин! Аввал йигирма марта учиринг, кейин...
- Мана алам қилиш, мана! Жилдни кучим борича силтаган эдим, арғимчоқ Омон билан қушилиб баланд кутарилди. Омоннинг оёғи кукрагимга урилди. Жилд банди қулидан чиқдию чалқанчасига йиқилиб, боши билан заранг ерга

урилди. Жилдимни кўксимга босганча, анграйиб қолдим. Омон додлаб ойимни чақиради деб қўрқиб кетдим. Қизиқ, у йиғламади, фақат оёқлари типир-типир қилиб, оғзидан кўпик чиқа бошлади. Молхона томондан челакнинг даранглагани эшитилди. Ойим бўшаган пақирни ерга улоқтириб шу томонга югурди. Заранг ерда чилпарчин бўлиб ётган Омоннинг оғзига бармогини тиқди. Бирпасдан кейин укамнинг лабидан қон сизиб чиқди. Ожиз ингради. Кейин энтикиб-энтикиб йиғлаб юборди.

Ойим уни ердан кўтарганча тепамга келди. Қўлини тарсаки қилиб бошим устида кўтарди. Қочмадим. Серрайиб туравердим. Қизиқ, ойим урмади.

- Укангни ўлдирмоқчимисан, ярамас! деди овози титраб. Мана, ўлдириб қўя қол! У лабидан қон сизиб чириллаб йиглаётган Омонни багрига босганча титраб, ҳайқирди. Уялмайсанми, ўз укангни шу аҳволга солишга, эшшак!
- У мени укаммас, ўгай. Сизам ўгайсиз! Ер тепиниб йиглаб юбордим. Қўлимдаги жилдни ерга улоқтирдим. Китоб-дафтарларим сочилиб кетди. Хаммаларинг мени ёмон кўрасизлар! Нима деётганимга ўзим ҳам тушунмай бақирдим. Ҳаммаларинг ўгайсизлар.

Ойим ҳайратдан кўзларини катта-катта очиб бир зум тикилиб қолди. Ранги ўчган кўйи лаблари титраб, юзимга қараб турди-турди-да, Омонни кўтариб уйга кириб кетди.

Нима қилишимни билмай туравердим. Ҳам йиғлагим келар, ҳам Омон ўлиб қолмадимикан, деган ваҳима кўнглимга даҳшат соларди. Анчадан кейин уй ичидан Омоннинг йиғи аралаш «акам ёмон, акам урди», дегани эшитилди.

– Ўл! – деди ойим бақириб. Тарсаки туширди шекилли, Омон баттар чирқиллади. – Аканг мак-

табидан чарчаб келди-ку! Ўласанми, бирпас сабр қилсанг, жувонмарг!

Кўчага чиқиб кетдим. Биламан, бугун дадамдан калтак ейман... Уриб кўрсин-чи! «Қора аммам»никига қочиб кетаман.

Уйга қоронғи тушганда келдим. Дадам ишдан келмаганини дарров билдим. Айвондаги кавшандозда этиги йўқ. Омон эшик олдида кутиб турган экан.

Юринг, ака, – деди қўлимдан тутиб. – Ойим йиглавоттила!

Ойим сопол лаганда мошкичири олиб келди. Қорним роса оч эди. Омон иккаламиз маза қилиб едик. Аммо ойим бир-икки қошиқ олдию чой дамлашни баҳона қилиб туриб кетди. Секин қарасам, йиғлайвериб юзи шишиб кетибди.

- Ухла, иккаланг хам! - деди қовоғини солиб.

Омон иккаламиз бир кўрпа тагида ётибмиз, уй салқин, деразадан ой қараб турибди. Хусан бувамнинг сурати «укангни нега йиглатдинг, ойингни нега хафа қилдинг», деб хўмрайиб турибди. Омон аллақачон ухлаб қолган. Мен бўлсам, нариги уйга қулоқ солиб ётибман. Ўртадаги қия очиқ эшикдан нур тушиб турибди. Биламан, ойим дадамни кутяпти. Қозир дадам келади. Ойим бугунги гапни айтиб беради.

Ана, ҳовли томондан дадамнинг йўталгани эшитилди. Ойим айвондан ўтиб ҳовлига тушганини пайқадим. Дадам ҳовлидаги ариқда кетмон чайди шекилли, сув шапиллади. Кейин айвонда гурс-гурс қадам товуши эшитилди. Қошиқ шиқиллади. Дадамнинг ора-чора «олсангчи ўзинг ҳам» деганини эшитиб ётдим. Негадир ойимдан садо чиқмасди. Ниҳоят дадам хўриллатиб чой ичди. Кетидан папирос тутатди шекилли, биз ётган уйга ҳам тамаки ҳиди кирди. Бир маҳал дадамнинг хотиржам овози эшитилди:

- Идорада майлис бўлди, онаси...
- Ойимдан садо чиқмади.
- Оқсоқол айтдилар, кексайиб қолдим, раисликни бошқага топширинглар десалар, одамлар тўполон қилиб юборди. Ўртоқ Абдураҳмонов юборган вакил ҳам Оқсоқолга ялинди: «Колхозингиз йилдан-йилга ўсиб боряпти, халқпарвар одамсиз-ку, Оқсоқол, унақа қилманг», деди. Дадам папиросини қаттиқроқ сўрди шекилли, биз ётган уйга янаям қуюқроқ тутун кирди. Зўрға кўндирдик, деди тағин ўша оҳангда. Бари бир шу йилча ишлаб бераману янаги йилга бошқасини топинглар деяптилар, Оқсоқол... Ҳайронман, бунчалик ишнинг кўзини биладиган раисни қа-ёкдан топамиз...

Ойим яна жавоб бермади. Жимлик чўкди. Охири дадамнинг хам хадикли, хам тажанг овози келди:

- Нима бўлди, тинчликми?

Зум ўтмай ойимнинг йиглагани қулогимга кирди. Аввалига нафаси қайтгандек ҳиқиллаб турди-ю, охири овозини баралла қўйиб юборди.

Тамом! Қозир дадам кириб мени савалайди. Ухлаб қолған Омоннинг қўлини бўйнимдан олиб ташлаб чўккалаб олдим. Дадам кириши билан деразадан ташлаб қочаман. Боя ҳалҳасини чиҳариб ҳўйганман.

- Нима гап? Дадам аввалига жаҳл билан ҳайқирди, кейин юпатиброқ сўради. – Ўзингни бос, Роби, нима бўлди?
- Хат келди! Ойим йиғи аралаш энтикди. Хат олдим!
- Қанақа хат? Дадам яна тажанглаша бошлади. – Нима деяпсан ўзи?
- Отам туҳматга қолған экан! Ойим мадори қуригандек ингради. Халқ душмани деган гап

бўҳтон экан. Москвага хат ёзгандим. Жавоб келди. – «Садриддин Самадов умрининг охиригача, сидқидилдан меҳнат қилди, ўттиз тўққизинчи йили Магаданда вафот этган», деб ёзишибди. Бечора отам! – Ойим яна ўкраб юборди. – Умид қилиб юрувдим. Ҳалиям умидимни узмагандим. – Кеча... кечаям тушимга кирган эди.

Нариги уйдан дадамнинг гурсиллаган қадам товуши келди. Чамаси ўрнидан туриб, ойимнинг тепасига борди.

- Қўй, онаси! деди эркалаб.
- Тушларимда кўриб чиқардим. Бундан чиқди шунча йилдан бери отам бечоранинг арвохи билан гаплашарканман. Ойим бир зум жимиб қолди-да, кўксида аламли хитоб отилди. Илоё ўша сўхтаси совуқ рўшнолик кўрмасин! Уйи куйсин! Болалари чирқиллаб қолсин!
- Ҳақ жойида қарор топди-ку, хотин! Муаллимни душман деганларнинг ўзи жазосини олди-ку! – Дадамнинг овози майинлашди. – Қўй, қийнама ўзингни. Сен борсан, мен борман. Муаллим ёдимиздан чиқмайди.

Икковлари жимиб қолишди. Ора-чора ойимнинг хўрсингани эшитилиб турарди. Хеч нимани тушунмасам ҳам кўнглим тинчиди. Бундан чиқди, ойимни мен йиглатганим йўқ. Аллақандай хат келган, шунга йиглаяпти. Энди кўзим илинган экан, ўзимнинг отимни эшитиб, яна уйгониб кетдим.

- Музаффар қачон келди мактабдан? Бу дадамнинг овози эди.
- Қачон бўларди, пешинда, деди ойим ишонч билан.
  - Хеч нима демадими?
- Йўқ... Ойим бир зум жимиб қолди-да, сўради. - Нима бўпти?

– Хеч нима... – дадам хўрсинди, – жойни сол, онаси, чарчадим.

Бутунлай хотиржам бўлдим. Омонни қучоқлаб ухлаб қопман.

### ЙИГИРМА БЕШИНЧИ БОБ

# РАЪНО ХИКОЯСИ

#### Энг бахтли одам - энг бахтсиз одам

Одам бир куннинг ўзида дунёда ҳам энг бахтли, ҳам энг бадбахт кимсага айланиб қолиши мумкинлигига ишонасизми?.. Билмадим... Мен ҳам авваллари ишонмасдим. Бугун ўзим шу аҳволга тушдим.

Бугун дунёда мендан бахтли одам йўқ! Ўғлимни топдим. Музаффар тирик экан! Болам ўлмаган экан! Багримга босганимда, юз-кўзларидан ўпаётганимда ундан анқиб турган ўзимнинг хидимни туйдим. Бўйи чўзилиб қопти. Кўзлари, катта-катта, қоп-қора кўзлари ўзимники! Қизларникига ўхшаган қайрилма киприклари худди ўзимга ўхшайди. Ўғлим! Ўзимнинг ўглим! Ўнйил кўрмаган Музаффарим... Қизиқ, у ҳамон тушимга кириб турарди. Негадир чақалоқлигини кўрардим. Жажжи қўллари билан кўкрагимга талпинаётганини. Бежиз эмас экан-а! Тирик экан-да... Бугун уни кўрдим. Багримга босдим. Мендан бахтли одам йўк!

...Бугун дунёда мендан бадбахт одам йўқ! Ўз ўғлим, юрагимдан бино бўлган ўз болам, типирчилаб қочиб кетди. Кўксимдан итарди, тепкилаб ташлади. Худди еттиёт бегонадек! Хўп, нима қилсин эди? Мен кимман унга? Нима каромат кўрсатдим?.. Йиглади. Болам бечора чирқиллаб йигла-

ди. Нега озор бердим? Нега ўкситдим кўнглини? Умрида кўрмаган бўлса, она бўлиб бирон марта бошини силаган бўлмасам, нима тилайман, ундан! Чақирсам чопқиллаб келаверсинми? Пинжимга кираверсинми?

Нимага ишондим анави имонсизнинг гапига? Боланг нобуд бўпти деса, нега лаққа тушдим? Ўн йил! Ўшанинг кетидан ўн йил итдек эргашиб юрибману бу ёқда ўғлим борлиги, болам тириклиги хаёлимга келмабди. Нега ишондим? Нега келмадим Тошкентга?

Нима деб келардим? Кимнинг олдига? Онам ўлиб кетган бўлса, қариндош-уруғим бўлмаса, суянган одамим бўлмаса? Думимни қисиб Кўтармага келишим керакмиди! Қайси юз билан? Анави чўлоқнинг олдида бўйин эгишим керакмиди! Ё тоғасига хотин бўлиб олган Робиянинг олдигами? Ё бўлмаса қизини ўз укасининг қўйнига солиб қўйган қора эгачимга ялинишим лозиммиди? Хечам-да! Ўша мудхиш воқеадан кейин Тошкентнинг суви ҳаром эди менга! Нима? Тошкентнинг суви ҳаром дедимми? Балки менинг ўзим ҳаромдирман! Балки Тошкентнинг суви ҳаром дедиментнинг суви ҳазар қилар мендан?!

Билмадим. Эҳтимол одамзод фаришта бўлиб туғилса-туғилар. Аммо бир умр фаришта бўлиб яшолмайди. Ҳеч ким! Ҳеч ким фаришта эмас. Фақат ўзини оппоқ қилиб кўрсатгиси келади. Минг урингани билан фаришта бўлолмайди. Йўлидан шунақанги шайтонлар кесиб чиқадики, гуноҳга ботганини ўзи ҳам сезмай қолади.

Мени йўлдан урган анави ифлос – унча-мунча шайтон эмас. Шунга ишондимми-а?! Ўглинг ўлибди, такдирга тан бер деса кўна қолдимми-а? Майли келишга ҳаддим сиғмас экан, нега аҳалли хат ёзмадим! Ҳеч бўлмаса Маржа опага?! Нега сўра-

мадим, суриштирмадим?! Ха, айтмоқчи Маржа опанинг олдига боришим керак эди-ку?! Шунинг учун келгандим-ку, Тошкентга! Уйдан бир қадам жилдирмайдиган Закунчи Тошкентга бориб кел, деб зўрлаганида сир очилиб қолишидан нега чўчимади? Нимага чўчисин! Умуман нимадан қўрқади у? Одамларданми? Андиша деган нарсани билса қўрқади-да, одамлардан! Қонунданми? Қонуннинг нимасидан чучисин? Узи закунни пеш қилиб, ҳаммани қўрқитишга ўрганиб қолган-ку?! Худоданми? Имон нима қилади унда?! Ўртада пул масаласи турганда имонни бошига урадими?! Ўн минг сўм! «Акам ўлим тўшагида ётибди, кўмишим керак, кизинг катта бўляпти, эрта-индин орзу-хавас кўрасан. Маржа опанг икки туғиб, бир қолганинг эмас, отангдан қолган саройдек үй-жойингни сувтекинга олганига хурсанд бўлсин!» Мана, унинг гапи! Қонунни сув қилиб ичиб юборган. Йўл-йўрикни билади. Қўқондан Тошкентга бўзчининг мокисидай қатнаб, райисполкомга, БТИга, яна минг тешикка бош суқиб чиққан! Хаммасини қонуний тўгрилаган. Энди Маржа опадан ўн минг олиб бориб қўлига тутқазишим керак. Шунинг учун юборди. Пул эмиш! Ўша Маржа опа онамга уч ой тувак тутди. Мен қилмаган хизматни қилди. Энди юзимни шилиб ташлаб, пул сўрашим керак ундан. Йў-ўқ, уй-жой отамнинг номидами, меросхур менманми, ўзим биламан! Хаммасини хатлаб Маржа опага топшираман! Қўлидан келганини қилсин. Айтаман! Умр бўйи алдадинг мени! Умр бўйи лақиллатдинг. Тирик боламни ўлдига чиқариб, жудо қилдинг, виждонсиз! Бугун Парча опани кўриб қолмасам, юраверарканман-да, сенга ишониб!

Хаммаси ўша – троллейбусдаги воқеадан бошланди.

Тошкент ўзгариб кетибди. Нега ўзгармасин? Ўн йилда одамлар минг турланади-ю, бутун бошли шаҳар ўзгармайдими! Вокзал ёнидаги майдон кенгайиб, янги уйлар қурилибди. Эскижўвага троллейбус қатнай бошлабди.

Троллейбус тиқилинч экан. Амаллаб чиқиб олдим. Озроқ юргандан кейин шундоқ ёнимда дўриллаган овоз эшитилди:

- Хой, оповси! Хаммомга яқин қолдими?

Овоз танишдек эди. Одамлар орасида ўзини кўролмасам ҳам, негадир юрагим ҳалҳиб кетди.

- Қанақа ҳаммом, опа? деди шляпа кийган йигит.
- Вой, оповси! Қанақа ҳаммом бўларди. Бешёгочдаги ҳаммом-де!

Йигит кулиб юборди.

- Қизиқ экансиз-ку, опа! Бешёгоч тупканинг тагида! Сиз вокзалда юрибсиз-ку!
- Вой ман ўлий! Қочинг бўмаса! Дўриллаган хотин одамларни бақувват тирсаклари билан туртиб-суртиб, менга рўпара бўлди.
  - Тушасизми?

Қарасам, Парча опа! Чит кўйлаги устидан кир нимча кийган, бошидан рўмоли тушиб кетган...

Қочиб қолишни мўлжаллаб, юзимни ўгирдим. Умуман, Кўтармаю Нўғайқўргон томонлардан биронта одамга кўринишни хоҳламасдим! Қочиб, қаёққаям борардим? Одам тирбанд. Парча опа танимас деб ўйлаган эдим. Кўриши билан бақириб юборди:

– Вой, Раънохон! Худонинг ўзи еткизди сизни! Эртаматдан бери адашиб юрибман. – У қалин лаблари билан икки юзимдан чўлпиллатиб ўпа бошлади. – Эсонмисиз, омонмисиз! Эсон-омон бормисиз! На кемийсиз биз томонлага?! Ўглиз котта йигит бўпқолди! Хабар обтурсайиз бўмийдими?!

Турган жойимда кесак бўлиб қолдим. Нима деяпти бу телба! Робиянинг ўғлини айтяпти шекилли! Умар акам уч йилми-тўрт йил аввал Тошкентга келганида, «чўлогинг Робиядан ўгил кўрибди», деб «табриклаган» эди.

Одамлар бизга ҳайрон бўлиб қараётганини кўриб баттар довдираб қолдим.

- Адашманг-да, Парча опа, дедим эсанкираб.Робиянинг ўғли...
- Вой нимага адашаман. Раънохон! У бутун троллейбусни бошига кўтариб дўриллади. Робини ўғли кичкина! Музаппар котта бўпколди. Мактабга борвотти! Ўшани сиз туққанмисиз ахир!

Кўз ўнгим қоронғилашиб кетди. Бир маҳал ўзимга келсам, троллейбуснинг орқа деворига суяниб турибман. Парча опа ҳамон дўриллаяпти.

– Роби бечора Музаппарга шунақа меҳрибон, шунақа меҳрибон! Оҳига озор бермийди. Емий едиради. Узоқ йили бир тўй қилди, бир тўй қилди. Эрийиз уч пуд ош дамлади!

...Кўтармага қандай етиб келганимни билмайман. Фақат шуниси эсимдаки, Парча опа йўл-йўлакай Музаффарнинг тўйида эрим «думбасини кўтаролмайдиган кўй сўйганини», Робия унга бир кийимлик қарғашойи атлас қўйганини, ундан олдин Омоннинг бешик тўйида ҳам лозимлик берганини айтиб мақтаниб келди.

- Юринг, чақириб бераман, ўғлиззи! деди мактабга судраб. Синфхона эшигига боришга қўрқиб турган эдим, ўзи бориб билиб келди.
- Ўртоқлари этди, дарсга кирмабди. Жа шўх бўганде, Музаппар тушмагур. Ўйнаб юрганде! Юринг, боққа кириб кўрийлик-чи!

Ўрикзор этагига етганда бир туп ёнгоқ тагида юрган қора чийдухоба камзул кийган болани кўрсатди.

- Ана! Чақирийми? У кафтини карнай қилиб энди чақирмоқчи эди, қўрқиб кетдим. Дарсга кирмаганим учун қидириб келишди деб қочиб кетса-чи!
- Қўйинг! дедим ялиниб. Парча опа! Илтимос кетинг!
- Майли, ўзиз биласиз. Парча опа бирпас иккиланиб турди-да, нари кетди.

Ерга тўкилган ёнғоқларни шоша-пиша дўпписига солаётган болага яқин бордим... Одам ўз фарзандидан ўзининг қиёфасини излар экан. Айниқса, ўн йил кўрмаган бўлса. Ўлди деб юрган бўлса!

Бугун мендан бахтли одам йўқ. Ўғлимни топдим. Кўзлари, қиз болаларникига ўхшаш эгик киприклари худди ўзим. Аллақаери Насибага ҳам ўхшаб кетади. Синглисига! Бугун мен энг бахтиёр одамман. Мана, ўғлимнинг дўпписи! Ўзимнинг ҳидим келяпти.

Бугун мен энг бахтиқаро одамман. Ўз боламга ўзим озор бердим. Йиғлатдим. Ўз болам ўзимни тепиб юборди. «Қўйвор», деб чинқирди... Ўн йилдан бери нимага хабар олмадим ўғлимдан?! Нимага ишондим ўша виждонсизга?! Бориб ёқасидан оламан! Тирик боламни нега ўлдига чиқардинг, беномус! Ўғлимдан нега жудо қилдинг, ифлос! Жавоб бер! Инсоф борми сенда, виждон борми?! Мунча имиллайди бу поезд. Қачон етади ер ютгур Қўқонга!

### ЙИГИРМА ОЛТИНЧИ БОБ

### ШОМУРОД АКА ХИКОЯСИ

#### Хиёнат

Муаллим оқлангани яхши бўпти. Эртами-кечми, бари бир шунақа бўлишини билардим. Ҳақиқат эгилади-ю синмайди, деганлари рост. Шунақа-ку, ҳақиқат эгилади. Вақти келиб тикланади. Аммо то тиклангунча анча-мунча қовурғаси сингани ёмон... Муаллимни кўп кўрган эмасман. У пайтда текстилда ишлаганим учун Нўғайқўрғонга кам борардим. Аммо ўша кезлари Ориф оқсоқол, поччам, муаллим — ҳаммаси бир бўлиб мактаб қуришгани эсимда. Робия ёш эди унда...

Бугун хафа бўлиб ўтирганини кўриб, тўгриси, юрагимга гулгула тушди. Гап бу ёқда экан-ку, мен Музаффардан хавотир олиб ўтирибман. Мабодо анави келган бўлса... Йўқ, уйга-ку, қадам босолмайди. Қайси юз билан келсин?! Кўча-кўйда болани тутиб олиб дилини огритдими деб қўрққан эдим.

Пешинда карам узаётган жойимизга Парча бориб қолди.

– Вой ўргилий силадан! Раънохонни кўрдим! Бирам ясанибди, бирам ясанибди! Эгнида-чи, минг сўмли палта! Билагида қўша-қўша билагузук! Оёгида амиркон тупли... – У дўриллаб мақтанаётган эди, одамлар имо қилиб мени кўрсатишди шекилли, дами ичига тушиб кетди. – Вой ман нима дидим!.. – деди бўшашиб. – Кўрганимни эттим-де. Аммо ранги кетиб қопти, Раънохонни...

Кетмонни олиб нари кетдиму кўнглим гаш тортди. Нега кепти? Ўн йил йўқ бўлиб кетган одам, юравермайдими, ўша ўйнашининг этагига оси-

либ. Уч йил аввал Музаффар билан бозорга бориб, дуч келиб қолганимизда-ку, Закунчи амаллаб қочиб қолган эди. Ҳадеб шунақа қилаверса Қўқонга бориб бўлсаям сўйиб келаман! Бир бошга – бир ўлим. Нима қилади эски ярамни янгилаб.

...Хар қадамда ўлим кутиб турган жанггоҳдан тирик қайтишимга ишонмаган эдим. Лекин уруш оёқлаган сайин умидим кучая бошлади. Назаримда соғ-саломат уйга қайтсам, бу ёғи нуқул байрам бўладиганга ўхшарди. Уй-жойим, жондан ширин хотиним. Эрталаб ишга бораман. Кечқурун уйга келсам овқат тайёр, иссиқ ўрним тайёр. Бундан ортиқ бахт борми одамга?

Хом сут эмган банда! Бу ёқда шунча савдолар бошимга тушишини билмаган эканман.

Бир хиллар бор. Уруш нуқул қахрамонликдан иборат деб ўйлайди. Бекор гап! Урушни биз кўрдик, бошқалар кўрмасин. Музаффар кўрмасин, Омон кўрмасин... Уруш нима ўзи? Одамни минг бир азобга соладиган нарса. Тўгри, душман дзотига кўксини қалқон қилганлар ҳам бўлган, ёниб турган самолётини немис поездига обориб урганлар ҳам. Аммо жангга кирган кунидан уруш охиригача жамики машаққатларга чидаб, ўзининг вазифасини сидқидилдан бажарган одамлар ҳам озмунча эмасди. Мен ҳеч қанақа қаҳрамонлик кўрсатмадим. Лекин учта медаль беришди. Нимага?.. Балки имоним бутлиги учундир. Тош келса кемириб, сув келса симириб эл қатори жанг қилганим учундир...

Шарқий Пруссиянинг пойтахти Кенисберг яқинидаги жанглар, айниқса, оғир бўлди. Учинчи Белоруссия фронтининг қўмондони Черняховский Дайме дарёси бўйида аскарларнинг окопига бирма-бир кириб чиққани ҳеч эсимдан чиқмай-

ди. Черняховский энг ёш қўмондон эди. Кейин.. аллақаери ўзбекка ўхшаб кетарди. Қорақош, қоракўз... Кирк бешинчи йилнинг аёзли январида у ҳаммамиз билан бирма-бир кўришиб чиқиб, далда берди. Эрта-индин уруш ғалаба билан битишини айтди. Кейин Дайме, Алле деган дарёларни кечиб, хужум қилдик. Еру кўкни қуюқ туман қоплаган, бунинг устига фашистлар тўгонларни бузиб ташлаган, ҳамма ёқ тизза бўйи сув эди. Февралнинг бошларида Кенисбергга хужум бошладик. Биз - сапёрларнинг ишимиз оғир эди. Белгача муздек сувга тушиб минани топиб бўладими! Жангчилар орасида сапёр умрида бир марта адашади, деган гап бор. Минага дуч келдингми, тамом. Парча-парча бўлиб кетасан. Мен хам бир марта, атиги бир марта адашдим. Тўгрироги, мен эмас, беш қадам нарида кетаётган Муртазин деган татар ўртогим бехосдан минага урилиб кетди. Сув аралаш олов портлагани, Муртазин «ани-и» деганча инграб, осмонга учгани, ўша дахшатли олов менга хам ёпирилгани эсимда...

Кўзимни очсам, пастак шифтли уйда, каталак дераза олдида ётибман. Деразадан найзадор томи булутли осмонга санчилган қизғиш бино, пастда эса тор-танғиз тошлоқ кўча кўриниб турибди. Хамма ёқ жимжит. Гўё уруш ҳам, миналарнинг портлаши-ю, ўлаётган одамларнинг жон талвасасида қичқириши, самолётларнинг гувиллаши, замбаракларнинг ўкириши ҳам – ҳеч нима йўқдек. Ажаб... Жанг шовқинларига ўрганиб қолган киши бунақа жимжитликка кўниколмай юраги увишаркан. Худди телба одам ўзидан бошқа ҳаммани жинни деб ўйлагандек...

Бора-бора осойишталикка ҳам, пастда – дераза тагидаги тошлоқ кўчада онда-сонда эшитилиб қоладиган гармон овозига ҳам кўникдим.

Билсам, мени Вильнюсга олиб келишган экан. Бу ерда, ҳарбий госпиталда тағин иккита нарсани билиб олдим. Биринчиси – ўзимизнинг ўзбекка ўхшаган қорақош, қоракўз, мулойим қўмондонимиз Черняховский Кенисберг яқинида ҳалок бўлибди. Иккинчиси – «ампутация» деган гапнинг маъносини англадим. Бу – кесиб ташлаш дегани экан. Ёнимдаги койкада ётган, икки оёғи кесилган йигит тушунтирди: «Ампутацияга рози бўлма!»

Оёғимга теккан мина парчаси тўпигимни мажақлаб юборган экан. Кечалари ўзимнинг оёгимдан чиқаётган сассиқ ҳидга ўзим чидолмай бурнимни жийириб, юзимни ўгирардим. Ўнимдаги йигит эса доим бир гапни қайтарарди. «Суягинг чиримаган бўлса, ампутация қилдирма! Билиб қўй, чўлоқ бўлиб борсанг, хотининг ташлаб кетади. Мана, менинг яхши кўрган қизим хат ёзмай қўйди». Қизиқ, оёгимдан кўра елкам кўпроқ азоб берарди... Докторларнинг огзидан «ампутация» деган сўз чиқиши билан ҳамма ёқни остин-устин қилиб юбордим. «Йўқ-йўқ-йўқ! Яхшиси ўлдир! Отиб ташла! Розимасман!»

Билмадим, аравага ётқизиб, операцияга олиб кириб кетишаётганида ўрисча сўкиндимми, ўзбекчами, хуллас оламни бузиб юбордим. Аравача ёнида бораётган сапсариқ сочли эстон ҳамшира қиз негадир кулади. Эркалаб бошимни силайди.

Кўзимни очсам, ёнимдаги аскар йигит кулиб турибди.

«Во! – деди бош бармоғини мих қилиб. – Оёғинг бутун!»

Хайрият, докторлар инсоф қипти! Бундан чиқди Раънонинг олдига «уч оёқлаб» бормайман!

Негадир Раънони ўйласам, нукул ошхона орқасига ўтиб, оёгимга тиз чўкканча «мениям обкетинг», деб йиглагани хаёлимга келарди. Ўшанда нега жеркдим? Ахир яхши кўрганидан, азбаройи куйиб кетганидан шунақа қилди-ку! Нега мен ҳам тиз чўкиб унинг оёгидан ўпмадим!

Эсон-омон борай, ўзим биламан! Бошимда кўтариб юраман. Ёнимдан бир қадам жилдирмайман. Текстилга ҳам бормайман. Колхозда ишлайман. Майли, аравакашлик қилсам ҳам, гўнг ташисам ҳам... Раъно ёнимда бўлса бас.

Галабанинг хушхабарини Саратовга келганда эшитдим. Ўша куни поездимиз бир сутка тўхтаб қолди. Автоматлару пистолетлардан қарсиллатиб ўқ узилар, ҳамма бир-бирини қучоқлар эди. Шу куни эсимни таниганимдан бери биринчи марта бошимни шинелимга ўраб тўйиб-тўйиб йигладим. Энг яқин дўстларимнинг жасадини қорга кўмганда, боши бир томонга қийшайиб, бўйни чўзилиб дорга осилиб ётган бегуноҳ хотинларнинг ўлигини сиртмоқдан чиқариб олаётганда қилт этмаган одам шу куни йигладим. Биламан, йигини хотинларга чиқарган. Аммо онда-сонда эркак киши ҳам йигласа ёмон бўлмас экан. Чин юракдан йиглаган одамнинг кўнглида қаҳр ўрнини меҳр эгалларкан.

Дунёда аёлдан мехрибон зот йўқ. Раънони – суюкли хотинимни кўрганимда шу гапга минг марта имон келтирдим. У менинг оқсоқлигимга ҳам, елкамдаги ўрадек чуқурча хунук йилтираб туришига ҳам парво қилмади. Қайтага худди ўша елкамдаги чуқурчани ўпиб эркалади.

Одам ўзини жудаям бахтиёр хис этса, худбин бўлиб қоларкан. Ўзгаларнинг дардини сезмас экан. Ориф оқсоқол «иккита нордек боламдан жудо бўлдим, ўғлим, у ёқда кампиримни ерга қўйдим, бу ёқда энг ишонган суянчиғим – Думадан айрилиб қолдик», деганида унчалик ҳайрон қолмадим. На-

чора, уруш ўз номи билан - уруш. Фақат окопдаги аскарни эмас, минг чақирим нарида турган одамнинг хам ёстигини қуритади. Опам шўрлик поччанг поездни сақлаб қоламан, деб ўлди. Кимсанимдан на хат бор, на хабар, деб чирқиллаганида ҳам қўшилишиб йигламадим. Тўгри, ачиндим, юпатдим. «Кимсан Югославия партизанларига қўшилиб кетган бўлса керак, охирги жанглар ўша ерда бўлди, эрта-индин дараги чиқиб қолар», деб қўя қолдим. Негаки мен ўз бахтимдан ўзим маст эдим. Худди кўзини қуёш қамаштириб қўйган одамга ўхшардим. Шунчалик кўр эканманки, ҳамқишлоқларим нима учун «муборак бўлсин»га кира солиб, дарров қайтиб чиқиб кетишганига ҳам, нима учун кўзимга қарашга ботинолмаётганига ҳам, нима учун опам бизникига кам келиши, Робия умуман қадам босмаслигига хам эътибор бермабман.

Шунчалик кўр эканманки, опам: «Раънохон бечора сен йўғингда кўп азият чекди, энди ёнингдан жилдирма», деб тайинлаганида, Оқсоқол, «Текстилдаги ишингни қўй, колхозга сенга ўхшаган йигитлар керак, ҳарна келиннинг ёнида бўласан», деганида хеч балога ақлим етмабди. Нега хеч ким Умар закунчининг отини атамайди-ю, аммо Раъно, «Умар ака бари бир яхши ташкилотчи эди, қаттиққул булсаям оғир пайтда катта хизмат қилди, одамлар игво қилаверади-да», деганига ишонибман. Закунчи бекордан-бекорга ишдан ҳайдалибди, деб ўйлабман. Билмабманки, Раъно бугун менинг мина ўпириб кетган елкамни ўпяпти-ю, кеча... Хаёлимга келмабдики, бугун менинг чўлоқ оёгимни уқалаяпти-ю, кеча... Нимага шунақа! Мен сиғинган қуёш шуми! Кўзимни қамаштирган офтоб шуми!.. Қанақасига! Бугун қўйнимга кириб мени иситса-да, кеча...

Билмадим... Аввало, бунақа кулфат эркак зотининг бошига тушмасин. Тушган одам билади... Мабодо шу ишлар кеча, мен йўғимда ўтиб кетган бўлса кўрманми, басирманми, ҳеч нимани сезмасам, борингки, бефаросат, молдек ҳеч нимани билмай ўтиб кетсам, бошқа гап эди. Лекин хотиним бағримда ётиб, эркалаб туриб, яна ўша нопок нарсани еса...

Шунчалик гўлмидим! Шунчалик қўймижозмидим! Ундан кўра очиқ айтса бўлмасмиди! Сен менга ёқмайсан! Тўрт томонинг қибла, деса-ку, олам гулистон эди! Йўқ, қўйнимда жилпанглади. Кўнгли аччиқ нарса тусаганида қўшилишиб қалампир чайнадим. Ой-куни яқинлашганида ялиндим:

– Илтимос, Раъно! Ўғил туғиб бер, отини Музаффар қўяман. Эсингдами, урушга кетаётганимдаям шуни айтгандим...

Раъно бу сафар ҳам бахт ҳадя этди. Ўғлимни, ҳип-ҳизил гўшт чаҳалоҳни бағримга босган куним мендан бахтли одам йўҳ эди. Раъно чилласи чиҳмаган чаҳалоҳни кўрсатиб, «ҳаранг, дадаси, ҳулоғи сизга ўхшайди, лаби сизга ўхшайди», деганида севинчимдан теримга сиғмаган эдим...

Эҳтимол ўғрилик қилган одамнинг сири очилмас. Эҳтимол қотиллик қилган олчоқнинг ҳам сири билинмас. Аммо хиёнат фош бўлмай қолмайди. Негаки, хиёнатни бир одам қилмайди. Албатта, шериги бўлади. Фақат, ёмон жойи шундаки, хиёнатдан озор чеккан одам бу сирни ҳаммадан кейин билади. Шуниси алам қилади.

Баъзан ўйлаб қоламан. Одам бошқаларни айблашдан олдин ўзининг гуноҳиниям ҳисоблаб кўриши керакми-йўқми! Балки айб ўзимдадир? Хотин киши ёмон йўлга кирса – демак, эр айбдор. Демак, хотиннинг кўнглини ололмаган. Дилини огритган. Аёл зоти – гулдек гап. Сен хор қилсанг,

сен ноҳақ эзғиласанг, албатта бегона қўл сийпалайди. Аммо менда нима гуноҳ? Юртга келган тўй экан, урушга бордим. Бир нарсани билар эдим: ҳалол жанг қилсам, хотинимни асрайман. Раънони ҳимоя қиламан. Бундан чиқди – имонли аскар бўлишим керак. Раъно севар эди-ку мени! Яхши кўриб турмуш қурган эди-ку! Ўша қор ёғиб турган кеча хайрлашаётганимизда «мениям олиб кетинг», деб зор қақшаб йиғлаган эди-ку! Мен у ёқда, хотинимнинг номусини ҳимоя қилиб юрсамда, у бу бу ёқда номусини сотса! Қайтиб келганимдан кейин ҳам анави билан қўшилиб, кўзимга чўп солса! Икковлари бир бўлиб, маза қилиб устимдан кулишса! Чидаб бўладими шунга!

\* \* \*

Госпиталда ётганимда уйга борсам, нуқул роҳатда яшайман, деганим хомхаёл эканини Кўтармага қайтган кунимоқ тушундим. Қирқ олтинчи йил оғир келди. Лалми донлар ёз бошидаёқ қовжираб кетди. Урушдан янги чиқилган, одамлар эзилган... Хайрият, Бўрижар бўйларидаги далаларда, Кўтарма томонда буғдой дуруст ҳосил берди. Аммо ҳар битта бошоқ ҳисобли эди. Начора, юрт оч. Украина ҳали ўзини тиклаб олмаган. Қозоғистонда ҳам доннинг мазаси йўқ. Бутун мамлакат бизга кўз тикиб турибди... Жанг қилган одам хоҳласа-хоҳламаса дунё миқёсида ўйлайдиган бўлиб қоларкан. Бунақа пайтда ўз қорнингни эмас, мамлакат ғамини ейсан.

Саратон қаҳрига минди. Қуёш шафқатсиз қиздиради. Қушлар очлик азобидан нажот излаб, ўзини буғдойзорга уради. Каттадан-кичик ҳамма далада. Оқсоқолнинг ўзи ҳам терлаб-пишиб буғдой ўради.

– Барака топкурлар, яна жиндай ғайрат қилайлик, белида белбоғи бор одам шунақа пайтда ўзини кўрсатмаса, қачон кўрсатади! – деб одамларга бош-қош бўлади. Комил табиб ўғли Олимжон билан хирмонда дон янчади...

Пешинга бориб кун тандирдек қизиб кетди. Бўрижардан эрталабдан бери эсиб турган салқин шабада ҳам таққа тўхтади. Ҳамма ёққа қайноқ сукунат чўккан, жонсараклик билан буғдойзорга ёпирилаётган қушлар ҳам ўзини сояга уриб кетган, фақат ўроқнинг шир-шир қилиши эшитилади. Ярадор оёғим сирқиллаб оғриётгани учун чўккалаб олиб буғдой ўрар, бошқа ўроқчилар олдинга ўтиб кетганидан уялар, ўзимни-ўзим ёмон кўриб кетганимдан ўроқни иложи борича қулочкашлаб солишга, кўпроқ майдондаги буғдойни ўришга ҳаракат қилардим.

Оқсоқол, «янги бўшанган, офтобда юриб, боласи ичкетар бўпқолмасин», деб Раънони вақтинча табелчиликдан озод қилиб қўйган эди. Кўз тегмасину Музаффар касал бўладиган боламас. Уч ой ичида кўзга кўриниб қолди: полвон бола! Уйга киришим билан отини айтиб чақирсам, бешикда ётган жойида кўзи билан мени излаб қолади.

Раъно туққанидан кейин янаям очилиб кетган. Қар куни пешинда Музаффарни кўтариб, далага нонми, бир коса овқатми олиб келади. Бугун эрталаб зогора ёпаётганида ҳам абедда бораман, деган эди. Шуни эслашим билан қорним таталаб кетди. Тўгри, қоқ пешинда хирмонда гўжа пиширишади. Аммо тонг қоронғисидан ишлаган одамга бир товоқ гўжа нима бўларди? Қизиқ, Раънодан нега дарак йўқ?..

Олисдан чақириб қолармикан, деган умидда, хирмон томонга қараб, ўроқ солаётсам, бир нар-

са қарс этди! Минг лаънат! Одамнинг иши бир юришмаса, шунақа бўлади ўзи! Қарасам, ўроқ қоқ иккига бўлиниб кетибди. Бўрижар бўйи – захкаш. Шунинг учун ҳам қургоқчиликка қарамай, бу ерларда ҳосил дуруст бўлган. Лекин ер тошлоқ. Эҳтиёт бўлмасанг... Ана, ўроқдан ҳам айрилдим.

Яримта ўроқни силтаганча буғдой пояларини чангаллаб тағин ўришга уриндим. Йўқ! Кал бошга темир тароқ дегандек бу нимаси! Шу кетишим бўлса, Оқсоқолнинг олдида шарманда бўламан-ку! Ана, одамлар пайкал этагига етиб қолишди. Яхшиси уйга бораман! Бошқа ўроқ бор. Аждардек қилиб чархлаб қўйганман. Бораману келаман. Қайтага яхши бўлади. Раъно ҳам болани офтобда уринтириб юрмайди.

Ярадор оёгим сиркиллаб кетаётганига қарамай, Алвасти кўприк томонга югурдим. Кун баттар қизиб кетган, темир йўлдан нафасни бўгувчи ховур кўтарилар эди. Бир томонида Бўрижар шовиллаб турган, бир томонида наъматаклар ўсиб ётган ёлғизоёқ йўлдан ўтиб, салқин ёнғоқзорга кирганимдан кейингина кўксимга шабада урилди. Хайрият, салқин ҳам бор экан-ку. Билмадим, негадир кўнглим ғаш эди. Ёнгоқзор оралаб ўтиб борарканман, олисда – ўнг томонда бола йигиси эшитилди. Аввалига парво қилмадим. Бола ҳамон биғиллаб йиглар, энтикиб-энтикиб қолар эди. Қизиқ. Чақалоқ нима қилади бу ерда? Атрофда ҳеч ким турмайди. Комил табибнинг ёш боласи йўқ. Каттаси урушда ҳалок бўлган. Кичкинаси - Олимжон ҳали ёш. Устига-устак ота-бола хирмонда. Лазакат опа хам бугдой ўряпти...

Тўхтаб қолдим. Шошма! Бирдан миямга ваҳимали ўй урилди. Музаффарнинг йигисига ўхшайди-ку! Ўша заҳоти кўнглим сезди: аниқ! Ўзимнинг

ўғлим! Оёқ-қўлим бўшашиб кетди. Раъно болани кўтариб менга нон обораётган бўлса... Хаёл билан жар бўйига бориб қолган бўлса. Жонҳолатда болани улоқтириб, ўзи...

Нафасим оғзимга тиқилганча, йиғи овози келаётган томонга чопдим. Юрагим сезгани бежиз эмас экан. Чиндан ҳам йўргаги ечиб қўйилган Музаффар каттакон ёнғоқ тагида ётар, бошига офтоб келиб, терлаб кетган, оёқ-қўлини баравар силкитиб, чинқириб йиғлар эди. Сал нарирокда эски қийиқчага тугилган коса дўппайиб турарди. Қўрқиб кетдим. Болани даст кўтариб, сут ҳиди анқиб турган юзидан ўпдим.

– Раъно! – Болани багримга босганча жар томонга югурдим. – Раъно!!!

Бўрижар бўйига етганимда орқа томонда бир нима шатир-шутур қилди. Қайрилиб қарасам, наъматаклар қалин ўсган чакалакзор орасидан бир одам ажралиб чиқди. Эгнида оппоқ жужунча халат, оёгида этик... Галифе шимининг тасмасини йўл-йўлакай таққанча сўқмоқ томон чопиб кетди. Аввалига танимадим. Орқага — мен томонга бир қараган эди, Умар закунчи эканини билдиму вужудимга ёмон шубҳа ўрмалади. Бирдан Раъно: «Умар ака яхши одам эди, ҳеч ким қадрига етмади», дегани эсимга тушди. Лекин нима бўлаёттанини ҳалиям билмас, болани кўтарганча, карахт бўлиб турардим. Ўша заҳоти чакалакзор орасидан Раъно отилиб чиқди. Кўйлаги гижимланиб кетган, сочи алвастидек пахмайиб, хас-хашаклар ёпишиб қолган...

Боланинг йигиси таъсир қилди шекилли, шу томонга ярқ этиб қаради. Даҳшатдан олайиб кетган кузларини, буздек оппоқ юзини куриб, тусатдан ҳаммасини тушундим.

- Тўхта! Тўхта, қанжиқ!

Қизиқ, синган ўроқ ҳалиям қўлимда эканини энди билдим. Бир қўлимда бола, бир қўлимда ўроқ билан ўша томонга югурдим. Закунчи аллақачон Алвасти кўприкка олиб борадиган сўқмоққа чиқиб олган, Раъно сочлари ёйилганча унинг кетидан чопар, аммо иккаласи бир-бирига қарамас, ҳар қайсиси ўз жонини асраб қолиш пайида эди.

### - Тўхта-а!

Қўлимдаги ўроқни кучим борича отдим. Синиқ ўроқ шатир-шутур қилиб, аллақайси дарахт тагига бориб тушди.

Сўқмоққа чиқиб олганимда улар узоқлаб кетган эди. Кўприк ёнига бориб қолган Раъно чақирди шекилли, аллақачон темир йўл устига чиқиб олган Закунчи тўхтаб, орқасига қаради. Қўлини пахса қилиб бир нима деди. Раъно жонҳолатда ўша томон югурди. Энди оёгим огримас, аммо тез чопишнинг ҳам иложи йўқ эди. Дарахт илдизларига қоқилиб мункиб-мункиб кетар, ўзимнинг ожизлигимдан ўзимнинг хўрлигим келарди. «Йўқ! Ўлдираман! Иккаласини қийма-қийма қиламан!»

Яна қанча югурганимни билмайман. Темир йўл устига чиқдиму қўлимдаги бола бутунлай ҳолсизланиб қолганини дафъатан ҳис этдим. Энди у аввалгидек чинқириб йигламас, овози сусайиб қолган, бўгзидан йиги ўрнига инграшга ўхшаш ожиз садо чиқар эди.

Шундагина болага озор бераётганимни тушундим. Хаёлимга ярқ этиб бир ўй урилди. Закунчи шаҳарда – Домдеҳқон ёнида туради. Буниям Раъно айтган. «Оқсоқол ноинсофлик қилди. Умар акага колхозчилар ҳашар қилиб қуриб берган уйни олиб қўйди, шундоқ одам Домдеҳқон ёнидаги каталак ҳужрада турганмиш», деган. Бундан чиқди ўша ҳужрачагаям борган! Ўлдираман!

Темир йўл кўтармасидан тушиб борарканман, терлаб кетган бола яна инграганини пайқадим. Юзидан ўпиб овутдим:

– Бўлди, Музаффар, бўлди! Сен ўғил боласан-ку! Эркаксан-ку! Ҳозир, ўғлим, ҳозир... Иккаламиз битта эркакча иш қиламиз! Ҳозир-чи, ўғлим, ҳозир фашистни ўлдирамиз! Қўнжимда-чи, пичоқ бор! Зўр пичоқ! Ана ўша пичоқ билан... Худди фронтда душман қорнига найза санчгандек. Битта фашист тирик қолган экан, ўғлим. Бўлди, болам, йиғлама. Бирпас чидагин...

Ўғлимни бағримга босиб ҳансираб югуриб борарканман, ўзим билан ўзим гаплашаётганимни сезмас эдим.

– Ифлос! «Кетсангиз мениям олиб кетинг», деб йиглаган сен эдинг-ку! Оёгимга тиз чўкиб ялинган сен эдинг-ку! Боласини чирқиллатиб қўйиб, бировнинг қўйнида... Бола кўр қилгур нахс!!!

...Одамзоднинг феъли шунақа. Нохуш нарсани эслагиси келмайди. Аммо ёмон хотира бармоққа чиққан ярага ўхшайди. Қўлингни қимирлатишинг билан ўша лаънати яра бехосдан бир жойга тегиб кетади-ю, азоб беради.

Шу яра тузалиб кетишини ўн йил кутдим. Ҳар қандай дарднинг давоси вақт дейдилар. Бора-бора тўпигимдаги огриқ ҳам, салқин тушиши билан елкамнинг ачишиб огриши ҳам қолди. Аммо бу яра тузалмаслигини ўзим билардим. Робияга уйланган кунларим «Раъно» деб юбормаслик учун тилимни тишлаб қолганимда, уни багримга босганимда ўшани — ўша беномусни кўз олдимга келтирганимда — ҳар кеча, ҳар куни шу яра азоб берарди менга! Мен аҳмоқманми? Кўрманми? Тўгри, аввал кўр эдим. Кўзим очилди. Робия ҳалиям Кимсанни кутаётганини, вақт-вақти билан Кимсаннинг су-

ратини сандиқдан олиб термилишини билмайманми! Ақлим етмайдими шунга!

Робия! Яхшиям сен бор экансан! Биламан, мени яхши кўрмайсан. Лекин эр-хотин ўртасида севги дегандан кўра каттароқ, бамаънироқ нарса бўлади. Бу нарсанинг оти нима? Ўзим билмайман. Балки мехрдир, балки сабр-қаноатдир... Музаффарни багрингга босдинг. Тойчокдек Омонни тугиб бердинг. Рахмат сенга! Дунёда борлигинг учун рахмат. Нега чўчиб тушдинг? Ухла, ухлай қол... Жиндай ором ол... Биламан, қийин, жуда қийин. Ҳаммасини тушунаман. Тўгри, мен ширин сўзлар айтишни билмайман. Ўлдим-куйдим демайман. Аммо сен менинг шунчаки севиклим эмас, хотинимсан, болаларимнинг онасисан, Робия! Хали авзоингни кўриб қўрқиб кетдим. Анави алвасти келиб, дилингни огритдими деб ўйлагандим. Хайрият, тинчлик экан... Даданг оқланған бўлса, яхши-ку, онаси. Қувонмайсанми? Асл айнамас, деб шуни айтади-да! Ўзингни эхтиёт қил, Робия! Менинг бахтимга, болаларингни бахтига соғ-саломат юрсанг бўлди, онаси...

# ЙИГИРМА ЕТТИНЧИ БОБ

### РАЪНО ХИКОЯСИ

### Ал-қасосу минал ҳақ!

Муҳаббат дегани шу бўлса – уйига ўт тушсин! Ўша – саратоннинг сариқ куни – ўша касофат кун ўлсам ҳам эсимдан чиқмайди. Аслида-ку, бир қараб турганда яхши бўлди. Ўзимнинг ҳам жонимга теккан эди: бир танада иккита одам бўлиб яшашдан чарчаб кетдим. Қачондир бари бир шунақа

бўлиши керак эдида! Ростимни айтсам, Шомурод ака урушдан қайтганидан кейин ундан аллақачон кўнглим совиганини тушундим. Гўё эримга атаб ёқиб ўтирган чирогимни Умар акам ўчириб қўйгандек, бу чироқ энди фақат шу одамни ёритиши керакдек. Тўгри, Шомурод акага кўнгил қўйиб текканим рост. Урушга кетаётганида қон-қон йиғлаганим ҳам рост. Лекин муҳаббат абадий бўлади, деган гап, китобларда бўларкан. Бу дунёда хеч нима абадий эмас. Билмадим, балки менда шунақа бўлгандир... Агар Умар акам бу ишни шунчалик орқага сурмаса, вақтида никохига олса, шунча гап йўқ эди. Раис пайтида «рахбар одамман, бундай қилишга ҳаққим йўқ», деб қутулди. Кейин-чи, молияда налугчилик қилаётганидачи? Яна бахона қилди. «Бўйнимга шунча айб қўйишгани етмайдими, бир йўла ўлдириб қутулмоқчимисан», деди. Шомурод ака келганидан кейин уни бутунлай унутишга ҳаракат қилдим... Энди унутдим деганимда нега тағин йулимдан чиқди? Мен аҳмоқ, мен беномус, болали хотин нега яна лаққа тушдим унинг илжайиб қарашига?!

Нима қилай? Нима қилай ахир, яхши кўрардим шуни! Қачондир Шомурод ака билан боғлаб турган омонат ип узилишини билардим. Узилишини хоҳлардим ҳам. Ана, узилди ўша ип! Узилди-ю, тугуни қолди! Болам, эмизикли болам қолиб кетди Шомурод аканинг қўлида!..

Умар акам мени судраб тўппа-тўгри Тошкент вокзалига олиб келди. Энди менга бошқа йўл йўқ. Умар ака қаёққа борса мен ҳам кетидан эргашишга мажбурман. Тамом, бошқа гап йўқ!

У мени вокзалнинг суянчиқли силлиқ ўриндиқсига ўтқизди-да, тайинлади.

- Қимирламай ўтир! Мен хозир келаман.

Шу гапни айтди-ю, чикди-кетди. Вокзал тор, тикилинч. Копига суянганлар, жомадонини бошига қўйиб мудраганлар, погонсиз харбий кийим кийган майиб-мажрухлар, тамаки тутуни, паровознинг асабий чинқириши, ғилдиракларнинг қулоқни қоматга келтирадиган шақир-шуқури... Чанқоқ азоби... Хаммасини кўриб турибман, хамма нарсани эшитиб ўтирибман. Аммо хеч нимани хис қилмайман. Қулогимдан ўглимнинг чирқиллаб йиглаши кетмайди. Уч ойлик чақалоқ Музаффарнинг йиғиси. Негадир кўкрагим огрийди. Бир махал қарасам, кўйлагим хўл бўлиб кетибди. Бундан чикди болам йиглаяпти, болам оч қолди, эмизишим керак! Боя нимага шуни Умар акамга айтмадим? Ернинг тагидан бўлсаям ўғлимни топиб келасиз, бўлмаса хеч қаёққа кетмайман, десам ўлармидим!

Пешонамда борини кўрдим деб, Кўтармага жўнасаммикан? Пиёда юриб бўлсаям етиб оларман. Болам йиглаяпти: кўкрагим шишиб кетди, чидаб бўлмас азоб беряпти. Биламан, борган захотим ўламан. Шомурод ака тикка сўяди! Мен-ку майли. Бир бошга бир ўлим. Ўглим нима бўлади... Кимларнинг қўлида қолади?

Умар акам кун ботганда келди. Қўлида ҳар биттаси сандиқдек келадиган иккита жомадон, қора терга ботиб кетган, жужунча халати сув бўлиб елкасига ёпишиб қолган. Бир кунда, йўқ, ярим кунда бутунлай ўзгариб кетибди. Ҳар доим ўтдай ёниб турадиган кўзлари ўрадек ич-ичига ботган, бурни сўррайиб, мўйлови осилиб қолган... Икки қўлида жомадон, оғзига қоғоз тишлаб келяпти: патта эканини кейин пайқадим.

– Олсанг-чи биттасини! – Яқин келганда кўзлари ғазабдан ёниб, бақирган эди, тишлаб олган паттаси оғзидан отилиб кетди. Жаҳл билан қўлидаги

жомадонларни гурсиллатиб ерга ташлади. – Қўлим узилиб кетди-ку!

– Ўғлим... – Кўзига илтижо билан термилиб, йиғлаб юбордим. – Болам нима бўлади? Оч қолди-ку!

У важоҳат билан устимга ёпирилиб келди. Худди қамчи солаётгандек құлини дулғади. Аммо атрофдаги одамлардан ҳайиқди шекилли, тишини ғижирлатганча овозини пасайтирди.

– Болангизга жонингиз ачияптими, хонимча, – деди вишиллаб. – Мархамат, тўрт томонингиз қибла! Бораверинг! Сизни деб қамоққа тушишимга бир баҳя қолганиям етади. Мана бу еримга келди! – У кафтининг қирраси билан томогини арралагандек имо қилди. – Ўлгингиз келиб турган бўлса – кетаверинг.

Юзини чир этиб ўгирди-да, ерда ётган патталарни юлқиб олди:

- Кетасизми, қоласизми? деди кўзимга совуқ чақчайиб.
  - Болам-чи, ўғлим-чи? Ўлиб қолади-ку!
  - Хайр! Саломат бўлсинлар.

Патталарни жужунча халатининг чўнтагига тиқди. Иккала жомадонни кучаниб кўтарганча қий-чув қилиб перронга оқаётган оломон орасига шўнгиди. Жонҳолатда, кетидан югурдим. Одамларни туртиб-суртиб етиб олдим.

- Умар ака! дедим ялиниб. Мен-чи? Холим нима кечади?
- Кўтар муни! У чап қўлидаги жомадонни ерга қўйди. Сен касофат бўлмасанг, шу кунлар йўқ эди! Паровоз асабий чинқирди. Оломон бақириб-чақириб, тор эшик олдида тиқилиб қолди.
  - Юрсанг-чи тезроқ! Қозир поезд жўнайди!

Умар ака шу қадар тажанглик билан бақирдики, ола-кула бўлиб кетган кўзларидан қўрқиб, икки қўллаб жомадонга ёпишдим. Жомадон зил-замбил эди.

Вагонга чиқиб олганимиздан кейин икки куксим баттар шишганини, куйлагим сутдан жиққа ҳул булиб кетганини яна сездим. Қулоғимга Музаффарнинг чирқиллаб йиғлаши эшитилди.

- Ўғлим, дедим унсиз йиғлаб. Ўлиб қолади...
- Итдан бўлган қурбонликка ярамайди!

Ярқ этиб кўзига қарасам, Умар ака вагон деразасидан ташқарига, ғира-шира қоронғилик чўккан далаларга хотиржам қараб турибди. Ноинсоф! Виждонсиз! Қани иложим бўлса-ю, бўғиб ўлдирсам! Нега кетидан эргашиб кетяпман? Нима рўшнолик кўраман шундан! Хўп, қолдим дейлик. Кейин нима бўлади?

Бир маҳал қулоғим остида Умар акамнинг юпатувчан овози эшитилди:

– Бари бир шунақа бўлиши керак эди-да, Раъно! Қўй, жоним, ўзингниям, мениям қийнама. Тушун-санг-чи... Менгаям осонмас...

Сочимни силаётганини сезиб, сесканиб кетдим. Илон чаққандек бошимни силтаб орқага тортдим.

 – Бола... нима бўлади? – дедим инграб. – Ўлиб қолади-ку!

Купеда иккаламиз қолганимизни энди пайқадим. Қали бири семиз, бири озғин – икки киши ўралашиб юрганига кўзим тушганди. Иссиқдан қочиб, вагон йўлагига чиқиб кетишганга ўхшайди.

– Раъно! – Умар акам ёнимга ўтириб, елкамдан кучди. – Қилиб бўлмайдиган иш йўқ. Хабаринг бор: закунни яхши биламан. Сен – онасан! Закун сен томонда. Ёш болани онадан тортиб оладиганнинг боши ўнта! ўинг деб кўрсин-чи, ўша чўлоқ! Умрини турмада чиритаман. Бўлди, жоним, йиглама.

У чўгдек қизиб кетган бошини елкамга қўйди. Елкам ёниб кетгудек бўлди.

- Падарига лаънат! - деди зардасиз сўкиниб. - Муҳаббат шоҳни гадо қилади деса ишонмасдим. Шоҳ эдим, гадо бўлдим! Сен учун. - У жимиб қолди. Бурилиб қарасам, деразага хомуш тикилиб ўтирибди. - Раисликдан ҳайдалдим... налугчи бўлдим. Энди шу иприсқи амалдан ҳам айрилдим, - деди кўзига ғусса чўкиб. - Ҳаммаси сен туфайли. Ҳали анча ғалва бор бошимда. Абдураҳмонов қийматаҳтага қўйиб майдалаб ташлайди. Майли, нима бўлса - пешонадан кўрамиз.

Умар акамнинг кўзида меҳр пайдо бўлганини сездим.

- Раъно, деди яна елкамдан қучиб. Билиб қуй, сени деб қамма нарсамдан кечдим. Қаммасини қурбон қилдим. У изтиробли жилмайди. Сен учун... Эсингдан чиқмасин...
- Оберасиз-а? дедим ялиниб. Музаффарни ўзимга оберасиз-а!
- Айтдим-ку: қонун сен томонда. Умар акам уф тортди. Лабини буриб, ғалати илжайди. Тавба! Осмон-фалакда учиб юрган одам ҳоли нима кечишини билмас экан.
  - Кўкрагим огриб кетяпти, дедим ростини айтиб.
- Соғиб ташла! У шошилмай ўрнидан турди. Уялма, ҳеч ким кирмайди, пойлаб тураман.

Умримда биринчи марта ўғлимнинг насибасини, она сутини ерга соғдим. Деразага термилиб турганча... Поезд елиб борар, дераза ортидан нимкоронғи зулматда мудраган ўрикзорлар, ярим ўрилган буғдойзорлар лип-лип ўтар, кўкрагимни кисган сайин енгил тортардим. Енгил тортардиму қулоғим остида боламнинг чириллаб йиғлаши эшитилиб турарди.

– Бўлдими? – Умар акам қайтиб келиб ёнимда турганча деразага тикилди. – Билиб қўй, Раъно, аввалига қийин бўлади. Акам – феъли тор одам. Лекин ўлмаган қул... Насибамизни топиб ермиз. Кўрасан, ҳаммаси яхши бўлади. Борган заҳоти ЗАГСдан ўтамиз. Ниятингга етадиган бўлдинг...

Fилдиракларнинг тарақ-туруғи орасида яна Музаффарнинг йиғиси қулоғимга киргандек бўлди.

- Умар ака? унинг юзига юзимни босиб йиглаб юбордим. Боламни кўргим келяпти.
- Бўлди, жоним бўлди. Тўгрилаймиз. Бир ҳафтадан кейин яна Тошкентга келишим керак. Инспекцияга кирмасам бўлмайди. Начора, яна тоғамнинг оёгига йиқиламан.

Бир ҳафта! Етти кун ким боқади эмизикли болани! Ўлади-ку! Очидан ўлади-ку! Тоғаси билан нима ишим бор! Менга ўғлим керак! Болам керак!

- Умар ака! Ўриндиқлар орасидаги тор, тамаки қолдиқлари сочилиб ётган жойга чўккалаб ўтирганимча унинг чанг босган этигини силадим. Жон Умар ака! Бир умр қулингиз бўлай! Майли, тўй қилмасангиз ҳам, ЗАГСдан ўтмасангиз ҳам... Ҳаммасига розиман. Қийнаманг, болани қийнаманг!
- Хўп! Умар акам қўлтиғимдан кўтариб тургизди. Титраб турган кафти билан кўз ёшимни артиб жилмайди. Ҳаммаси жойида бўлади, дедим-ку, саннайвермада, юракни сиқиб! Қара, йўлакда одамлар турибди...

\* \* \*

Fишткўприк маҳалласига кириб келганимизда кун қизиб кетган, тор кўчалар кимсасиз, аҳён-аҳёнда от-аравалар, бола етаклаган, паранжи ёпинган хотинлар ўтиб қоларди. Кечаси поездда яҳши уҳламаганим учун бошим ғувиллар, қулоғимда ғилдиракларнинг тақа-туқ овозига қушилиб, уғлимнинг йиғиси эшитилиб турарди.

Довончадек тор, аммо ёг тушса ялагудек қилиб супурилган топ-тоза ҳовлига кирдик. Ҳовли ўртасидаги бир туп шотут ғарқ пишган, ерда сиёҳранг доғлар кўкариб қолган эди. Ҳовлининг икки томонида пастак уйлар, устунига нақш солинган айвон...

Айвондан оппоқ кўйлак, оёғига кавуш кийган ранги захил одам тушиб келди. Икки чакаги ич-ичига кириб кетган, афтига қараб ёшини аниқлаб бўлмайди, фақат кўзлари, «Қани, дилингда нима бор?» дегандек одамга синчиклаб тикиладиган кўзлари Умар акамникига ўхшайди. Қизиқ, уни бир кўришдаёқ этим сесканиб кетди.

- Ака, биз келдик! деди Умар акам кинояли кулимсираб. Жомадонларни ерга қўйиб, қўл чўзган эди, акаси ипдай бармоқларини истар-истамас узатди.
- Бу келинингиз! Умар акам менга имо қилиб яна хижолатли илжайди.

Шоша-пиша салом берган эдим, қайноғам совуққина «валей» деди-ю, қисқа-қисқа йўталиб, негадир қовли бурчагига йўл олди. Шотутдан нарига ўтганида уй томонга қараб, ожиз овоз берди:

- Ойсара, мехмонларга қара!

Йўтала-йўтала бурчакдаги бостирма томонга кетаверди. Унинг бутун қиёфасидан: «Кўзим учиб турувди сенларга!» деган таънали маънони укдим.

Уй ичидан бола кўтарган хотин чиқди. «Овсиним!» деган хаёл кўнглимдан лип этиб ўтди. Тўла, оппоққина юзли, енги кенг одми кўйлак кийиб олган хотин боласини багрига босганча айвонда бир зум туриб қолди. Ранги ўчгандек бўлди. Кейин ялангоёқ юриб яқин келди.

- Қаёқдан кун чиқди! деди ясамароқ илжайиб. Елкамга қоқиб кўришаётганида, беихтиёр болага қарадим. Олти ойлар чамасидаги сўлқилдоқ боланинг бошига оппоқ тўр дўппи кийгизиб қўйилган, бола ипга тизилган кўзмунчоқ тақиглиқ дўмбоқ қўлчаларини силкитиб нуқул гувранар эди. Димогимга гўдак иси урилиши билан бошим айланиб кетди. Қулогим остида яна Музаффарнинг чинқириб йиглагани эшитилгандек бўлди.
  - Кўтаришсанг-чи, хой!

Умар акамнинг зардали хитобидан ўзимга келдим. Жомадонлардан бирини кўтариб, деразасига қалин парда тутилган, нимкоронги уйга кирдик.

Ойсара опа ётгиси келмай, ҳадеб ғингшиётган болани бешикка боғлаб, дастурхон ёзди. Нон, бодом, шинни келтириб қуйди.

- Чарчамай келдингизларми? деди чой узатаркан. – Йўл азоби гўр азоби. Майли, зиёни йўқ, ўтиб кетади.
  - Ўғилми? Биринчи саволим шу бўлди.

Ойсара бешикка қараб жилмайди.

- Қиз. Каттаси ўғил.
- «Менинг ҳам ўғлим бор». Оғзимдан шу гап чиқиб кетишига бир баҳя қолди. Овсиним худди ичимдаги гапни билиб олаётгандай, кўзимга синчиклаб тикилиб турганини пайқадиму қўрқа-писа тескари қарадим.
- Тўйингларга айтмабсизларам, борардик, топганимизни олиб. – Зимдан қарасам, назаримда истеҳзо билан кулиб тургандай бўлди. Куладиям-да. Куладиям, эзадиям. Синглисининг кундоши бўламану тинч қўярмиди! Ажалим шу хотиннинг қўлида шекилли... Юзимни ўгирдим. Сезиб ўтирибман, икки кўзи менда. «Қани, синглимдан ниманг ортиқ экан, кўз-кўзга тушаркан-ку, итдек ялиниб келаркансан-ку», деяпти.

Бешик ғирчиллади. Қизалоқ йиғлади. Ойсара шошилмай бориб, бешик ёнига чўккалади. Болага кўкрак тутди. Қизалоқ тамшаниб эма бошлади.

Кўкрагимга тағин оғриқ турди. Болам! Боламнинг қоли нима кечди? Кечаси билан нима қилди? Уч ойлик гўдак онасиз нима бўлади? Дод солиб, сочимни юлганча кўчага отилгим, Тошкентга пиёда жўнагим келарди.

Ташқаридан келган овозлардан сергакландим. Ака-ука гаплашяпти. Аввалига паст овозда ғудраниб туришди-да, кейин иккови ҳам асабийлаша бошлади шекилли, овози кўтарилди.

- Сен, ҳаром-харишнинг фарқига бормайдиган даъюс, росмана никоҳ ўқитиб, тўй қилганингга ишонмайман. Қайноғам қисқа-қисқа, аммо узоқ йўталди. Туфлади. Номаҳрам хотинни уйга киргизмайман.
- Ўтакангиз ёрилмасин. Бу Умар акамнинг овози эди. Уйингизда кўп турмаймиз. Нариси билан кузгача. Кейин уй топаман. Яхлит пул оладиган жойим бор. Аввал баъзи ишларни тўгирлаб олай.
- Нима ҳунар кўрсатдилар? Акаси негадир Умар акамни сизлай бошлади. Очигини айтаверинг, илмли тўкис.
- Терговчилардан чарчаганман! Умар акам тажанглаша бошлади, овози янаям баландлашди. Қўқонни соғиндим. Бор гап шу. Адвокатурада ишламоқчиман.

Қайноғам тағин йўталди.

- Олса ишлайдилар-да, илмли тўкис!
- Нима, мен душманмидим? Раҳбарлик лавозимда ишлаган кадровий работникман.
- Майли охири бахайр бўлсин... Ўртада фарзанд йўқми, ишқилиб? Қўрқмасинлар, ростини айтаверсинлар.

Бутун вужудим қулоққа айланди. Бола эмизиб ўтирган Ойсара ҳам, бешикдаги қизалоқ ҳам – ҳаммасини унутдим. Ҳатто қулоғимда кечадан бери янграб турган ўғлимнинг йиғисиям бир лаҳза тингандек бўлди.

- Йўқ!

Умар акам бу гапни шу қадар ишонч билан айтдики, чаён чаққан одамдай сапчиб туриб, бора солиб ёқасига ёпишгим келди. Бешикни қучоқлаб ўтирган овсиним безовталаниб қолганимни сезди.

Ёнбошлайдиларми, пошша келин? – деди ачитиб. – Жой солиб берай. Ёшсиз, чарчагансиз.

Қандай кунларга қолдим! Нима қилиб қўйдим ўзи! Беихтиёр яна ташқарига қулоқ солдим.

– Бўлар иш бўпди. – Қайноғам ожиз, кучаниб йўталди. – Майли, ҳаммасини таомилдагидек қиламиз...

Қайноғам айтгандек ҳаммаси таомилдагидек бўлди. Юртга бўлмасаям махаллага ош тортилди. Атлас кўйлак кийгизиб чимилдиққа киргизишди. Қўни-қўшнилар «Тошкентлик чиройли келинни» кўриш учун пайдар-пай киришди. «Тошкентлик келин» икки букилиб салом қилди. Бармоқ учига пиёла қўндириб, чой узатди. Хотин-халаж «бир қошиқ сув билан ютгули» келинни «қўшақаринглар, қўчқордай ўғиллар берсин», деб дуо қилди. Билмайдики, «Тошкентлик келин» «қўчқордай ўғлини» ўлим чангалига ташлаб келган! Билмайдики, «бир қошиқ сув билан ютгудек» келинпошша салом қиляптию, шишиб кетган кўкрагининг огригига чидолмай тўлғаняпти. Билмайдики, овсинининг қизчаси йиғлаганида ўзининг ўғли чирқиллагани эсига тушиб, сочини юлгудек бўляпти. Жилла қурса, шу қизчани бағрига босиб эмизгиси, бир зум кўзини юмиб, ўз боласини қучоғига олгандай хузур қилгиси келяпти. Билмайди! Ҳеч ким билмайди! Аммо Умар акам билади-ку, ҳаммасини билади-ку!

...Ўша кечаси овсиним (лаблари истехзо билан муттасил қийшайиб турадиган овсиним) солиб берган тўшакда ётарканман, дод деб юбормаслик учун лабимни тишлаб, Умар акамдан сўрадим:

- Нимага унақа дедингиз!
- Қачон? Кимга? деди Умар акам чарчоқ оҳангда.
  - Келган кунимиз! Акангизга!

Умар акам кинояли кулимсиради.

– Ўша гапни ҳалиям кўтариб юрибман, денг. Бўлмаса эшитиб қўйинг! – У папирос тутатиб кўзимга қаттиқ тикилди. – Биринчидан, «акангиз» деманг! Менинг акам – сизнинг дадангиз бўлади. Бугундан бошлаб «дада» дейсиз. Иккинчидан, – у анча ўйланиб қолди. – Акам, – деди тутун қайтариб, – инсофли одам. Кўриб турибсиз, укам Тошкентдан келин олиб келди, деб юртга маълум қилди. Ўзингизнинг ниятингиз ҳам шу эди. Тўгрими ахир!

Дамим ичимга тушиб кетди. У ҳамиша ҳақли бўлгани сингари ҳозир ҳам тўгри гапирарди. Ҳаммаси рост! Ҳалоллаб олинг, деган — мен! Қонуний хотинингиз бўлай деб ялинган — мен! Умар акани Кўтармадан оломон қилиб ҳайдашганидан кейин ҳам кўнгил узолмаган, раҳмим келганидан отчёт топшириш баҳонасида Домдеҳқондаги ҳужрасига бориб юрган — мен! Ҳаммаси — мен! Мен — ўша аҳмоқ! Лекин бир ҳафта аввал поездга чиққанимда ўзи нима деганди? Қанақа ваъда беганди?

– Нимага алдадингиз? Нимага-а-а? – Овозим чиқмасин, деб лўлаболишни тишлаганча, бутун вужудим тўлғаниб инградим. – Нимага унақа қиласиз. Бир ҳафтадан ошиб кетди-ку. Болангни олиб келаман деб ваъда берувдингиз-ку!

- Раъно! Умар акам ёнимга чўккалади. Биласан, мен сўзидан қайтадиган одам эмасман. Раз ваъда бердимми, опкеламан. Айтим-ку закон сен тарафда! Акамгаям ётиғи билан тушунтираман! Албатта, бировдан бўлган деёлмайман, ўзимники дейман.
- Қачон? Қачон ахир? Тишимни тишимга қуяман деб ҳарчанд уринмай, овозим ташқарига чиқиб кетди. Қачон?
- Тише! Умар акам бармогини лабига босиб тахдид қилди. Жуда бўлмаса кичик чиллангиз чиқсин, келинпошша, деди асабий кулиб. Лекин ўша захоти сочимни силади. Майли, яна уч-тўрт кун ўтсин! Одамлар куёвнинг мижози суст экан, ҳафта ўтмай ойдек келинни ташлаб қочиб кетибди, демасин.
- Ўлади-ку! Болам ўлади-ку! Нима қилаётганимни ўзим ҳам билмай, Умар акамнинг тиззасидан қучоқлаб ялина бошладим. Тушунсангиз-чи, Умар ака! Шунчалик бағритошмисиз?! Раҳмингиз келмайдими? Мени шунчалик ёмон кўрасизми?!
- Раъно! Унинг овози секин, аммо қилич зарбидек кескин жаранглади. Агар сени ёмон кўрсам бу ёқларга олиб келмасдим. Гап битта! Ўн куничида болангни обкеб бераман!
- ...Роппа-роса ўн кундан кейин Умар акам йўлга отланди. Лекин орадан ўтган яна бир ҳафта-чи? Боламни кўрмаганимга ўн саккиз кун бўлди! Ҳоли нима кечдийкин. Жони соғмикин ўзи? Умар акам ҳайрлаша туриб, юзимдан ўпиб тайинлади:
- Раъно! Жоним! Янгамдан узокрок юр. Илжайиб тургани билан ичи тўла захар! Синглисини кўйиб юборганимга чидолмайди, билдингми? Алохида овкат сузса ема! Мен нариси билан уч кунда келаман. Хужжатларимга дог тушурмасдан олиб келишим керак. Аммо ўзингни эҳтиёт қил, тушундингми?

Нимага тушунмай? Ёш боламанми? Ойсара отишга ўқ тополмай юрганини билмайманми? Ҳар гапида найза санчиб туришини, етти яшар ўғли «аяча» деб олдимга кирса, «Йўлдошхон, аячангни тинч қўй, баққа ке», деб чақириб олишини, талпинчоқ қизчасига термилиб қарасам, билагига яна бир шода кўзмунчоқ осиб қўйиши, «бегоналар кириб-чиқяпти», деб ҳар куни уч мартадан исириқ тутатишини пайқамай эсимни ебманми! Менам тирноққа зор тумса хотин эмасман. Мениям болам бор! Пахлавондек ўғлим бор. Эрта-индин келади. Умар акам олиб келади! Шомурод ака бермайман, деб кўрсин-чи! Умар акам қонун китобини олдига очиб қўяди. «Қани, чўз бу ёққа болани!» дейди.

Умар акам уч кунда эмас, беш кунда қайтди. Қоқ пешин эди. Қовлидаги шотут шохида чириллаётган чумчуқлар ин-инига кириб кетган, ҳамма ёққа мудроқ сокинлик чўккан, шамол ҳам иссиқдан безор бўлиб, аллақаёққа беркингандай... Салқин уйда Ойсара дўппига гул босар, мен жияк тикар эдим. Бешикда қизалоқ ухлаб ётибди. Йўлдошхон шу иссиқда кўчага чиқиб кетган.

Эшик томондан гурсиллаган қадам товуши келди. Умар акам! Шахдам одим ташлашидан биламан! Айвонга, ундан ҳовлига отилдим. Ҳозир, ҳозир ўғлимни кўраман! Кечадан бери кўкрагим ёрилиб кетай деяпти. Тўйиб-тўйиб эмсин! Роҳат ҳилиб эмизай!

Елкасида қоп, қўлида жомадон кўтарган Умар акамни кўриб тўхтаб қолдим. Юрагим гурсиллаб урар, кўзларим кўча эшик томонга термилиб, бир нуқтада қотиб қолгандек эди. Бундан чиқди яна биров бор. Музаффарни бошқа бир одам кўтариб келяпти.

Умар акамнинг олдига қандай учиб борганимни билмайман.

#### - Қани?

Чамамда бу сўз бўгзимдан бутун оламни титратиб юборадиган ҳайқириқ бўлиб отилиб чиқди. Аммо кейин билсам, шивирлаб сўраган эканман.

- Қани?
- Уйга кирайлик! Умар ака негадир менгамас, айвон томонга қараб гапирди. Беҳуш бир алпозда бурилиб қарасам, айвонда Ойсара илжайиб турибди.

Умар акам шоҳи кителининг енги билан пешонасидан оҳиб тушаётган терни арти-да, жомадонни яна кўтарди. Уй томонга (ҳайноғам ажратиб берган ўзимизнинг уй томонга) юрган эди, эсидан айрилган одамдек кетидан эргашдим.

Умар акам кавшандоз яқинидаги ҳаникка қопни ташлаб, уф тортди. Жомадонни қўйиб, тағин енги билан пешонасини артди.

- Раъно! деди секин. Сен ақлли хотинсан...
- Қани? Нафасим қайтиб кетганини сезиб турар, кўз ўнгимни сарғиш туман қоплай бошлаган эди. Қани?
- Раъно, ўзингни бос, жоним!
  Умар ака тердан шилта бўлиб кетган кафтини елкамга қўйди.
  Хаммаси изга тушиб кетади. Кўрасан!
- Қани-и-и? Бўғзимдан шу қадар ёввойи чинқириқ отилиб чиқдики, ўзимнинг ҳам қулоғим тешилиб кетай деди.
  - Нобуд бўпти... Менга қара Раъно! Раъно!!!
  - Йўқол! Йўқол!

Кейин нима бўлганини билмайман. Кўзимни очсам, овсинимнинг баркашдек юзи бошим устида турибди. Нимага ўз ҳолимга қўймайди бу жодугар? Қанақа жойга келиб қолдим ўзи? Бири боламни ўлдирса, бирининг юзидан заҳар томса, яна бири ҳузур қилиб илжайса! Энди ўлган ўғлимга йиғлашга ҳам ҳаққим йўқми? Қани, анави! Совуқ хабар опкелишга обкелиб ўзи қаёққа ғойиб бўлди?

Олазарак бўлиб ўрнимдан тураётган эдим Ойсара негадир елкамдан қучоқлади. Юзини юзимга босди.

– Раънохон, қўйинг,– деди шивирлаб. – Хафа бўлманг. Менам иккисини ерга қўйганман. Насиб этса...

Нима? Нима деяпти? Қаёқдан билди! Нима демоқчи! Энди боламнинг ўлганигаям севиняптими?

– Синглим. Жон синглим... – Унинг овози титраб кетди. – Нимага мендан қочасиз! Нимага ишонмайсиз! Мен ҳам хотин кишиман-ку, онаман-ку, синглим! Биламан! – У кўйлагининг кенг енгини мижжасига босди. Ҳаммасини биламан! Келган кунингиздаёқ сезгандим. Қўйинг, ўзингизни босинг. Менинг болам, сизнинг болангиз эмасми, Раънохон! Ана, хоҳланг ўғлимни олинг, хоҳланг қизимни!

Бунақа пайтда одам ёш болага айланиб қоларкан. Ёш бола йиқилсаю ҳеч ким юпатмаса, туриб кетаверади. Биров меҳрибончилик қилса ўксиниб йиғлайди.

Ўкраб юбордим.

- Опажон! Қандоқ кунларга қолдим, опажон! Айтинг, нима қилай, опажон!
- Бўлди, жоним, бўлди! У оғзимга бир пиёла совуқ чой тутди. Жилмайди. Шунча кундан бери мазах қилиб кулади десам, йўқ, чин дилдан, мехр билан жилмайиб қарар экан. Ҳозир билдим.
  - Ўғлим... бор эди, опажон, дедим инграб.
- Ҳали-чи, қўша-қўша ўғиллар кўрасиз, жоним! У яна жилмайиб бошимни силади. Кўрасиз, бир этак болага ўралашиб қоласиз. Ҳасан-Ҳусан ўғилларингизни ўзим кўтариб катта қиламан.
- Музаффар! Ўғлим... Беҳуш бир алпозда Ойсарани қучоқлаб олдим. - Опажон...

Боланинг уволига қолдим. Ўз боламнинг ўлимига сабабчи бўлдим. Мен ҳам одамманми? Мен ҳам онаманми! Йўқ, ҳаммасига Шомурод ака айбдор! Майли, мен-ку ёмон эканман, болада нима гуноҳ! Кечагина дунёга келган гўдакнинг айби нима?! Хўжа — дўст, буви — душман деб болани олиб қолиб нима қилардинг, гўдакнинг уволи тутгур ноинсоф! Бу кунингдан баттар бўлгур чўлоҳ! Не-не навқирон йигитларнинг жонини олган ўқлардан биттагинаси сенга тега қолса бўлмасмиди?

Нима деяпман ўзи? Шомурод аканинг гуноҳи нима?

Хаммасини Умар ака қилди. Мени абгор қилган шу. Совуган ошми – баломи, турмушим ўтиб турувди-ку! Аввалгидек яхши кўраманми-йўқми, эрим билан яшаб кетардим-ку, бари бир! Ўша куни Шомурод акамга овқат олиб кетаётганимда қай палакат босиб олдимдан чикди. Кўпдан бери қорасини кўрсатмай кетган эди-ку. «Аслида эринг у эмас, менман», деб ялинганида мен уятсиз нега башарасига тарсаки тушурмадим. Ахир энди она эдим-ку! Болам бор эди-ку. Нима қилардим, ўчган оловни титкилаб! Биз ёқсак-да, алангасида бегунох гўдак куйиб, жизғанак бўлса! Бу қандоқ жазо! Йўқ, болам тирик қолиши мумкин эди. Шу номард Тошкентга боришни пайсалга солмаса тирик қоларди.

Нима деди? «Жонимни гаровга қўйиб Кўтармага бордим», дедими? «Сен учун, бола учун бордим, селсоветга кириб, ҳужжатларни тўгриламоқчи эдим. Нима қилай чақалоқ бир ҳафта бурун нобуд бўлган экан», дедими?

Оёгига йикилиб йигладим:

- «Умар ака, шу гап ростми? Ишонмайман, ишонмайман!»

# Шунда нима деди?

«- Нима қилай жоним! Бордим. Билдим! Ёлғон гапирсам, гўрда ётган онам хотиним бўлсин! Нима қилай ахир! Бордим-ку! Мозориниям кўриб келдим! Тағин нима ҳақинг қолди?!» Худди шунақа деди. Куйиб-ёниб айтди.

Тўгри-да, тагин нима қилсин! Жонини тикиб борибди-ку ахир? Қўрқмабди-ку! Биламан, одамлар уни шусиз ҳам ёмон кўрарди. Ҳалиям тошбўрон қилиб юбормабди-да! Аслида Умар аканинг айби нима эди? Бари бир, ҳаммаси шу одамга ёпишгани нотўгри бўлди. Уруш эди, замон огир эди. Бировни урди, бировни сўкди. Бировга ялинди. Ҳаммасини ўз кўзим билан кўрганман-ку! Нима қилса юрт учун қилди. Уруш тезроқ бита қолсин деди.

Бундан чиқди ҳамма гуноҳ ўзимда экан-да! Нимага? Айбим нима! Шу одамни севганимми! Агар яхши кўриш айб бўлса... бу дунёда беайб одамнинг ўзи борми? Майли ким нима деса – десин! Қўйниям ўз оёгидан осади, эчкиниям. Фақат... нимага энди бировларнинг гуноҳи учун ёш бола жавоб бериши керак?! Нимага?! Адолат борми ўзи бу дунёда?

Кечаси чироқ кўтариб кетаётган одам бир қадам нарини кўролмайди. Чироқ ўзидан бошқа ҳеч кимни ёритмайди. Аммо қўлидаги чироқ ҳарқалай далда беради. Менинг қўлимдаги чироқ – Ойсара опа эди. Мен ашаддий душман деб ўйлаган, эртами-кечми синглисининг қасдини олади деб қўрққан одамим энг меҳрибон кишимга айланиб қолди. «Аячанг ёлғиз қолмасин», деб ўғлини бағримга солиб қўйди. Ҳар куни минг марталаб битта гапни қайтаради: «Ойнинг ўн беши қоронғи бўлса – ўн беши ёруғ, синглим. Янаги йил шу кунларда қўчқордек ўғил кўрасиз. Мени айтди дерсиз...»

Қизиқ ўз-ўзидан сутим қочиб кетди. Лекин ҳамон ўғлимнинг йигиси қулоғим остида эшитилиб

қолар, қўлларини силкитиб кўксимга талпинаётгандек тушларимга кириб чиқар эди.

Умар акамни адвокатурага ишга олишмади. Ўша куни кечқурун ака-ука даҳанаки жанг қилишди.

Кечки овқатдан кейин қайноғам, одатдагидек ёнбошидаги сопол тупдонга балғам ташлаб, синчков кўзларини Умар акамга қадаганча сўради.

- Хўш, мулла, бағи нима бўлади энди?
- Юридик соҳасида ишламайман, деди Умар акам асабийлашгандан мўйлови титраб. Чарчадим.
- Ишламайман деманг, мулла, ишлатишмайди, денг. Аввал ўзингизни орқангизни тозалаб олинг, дейишди, денг.

Умар акамнинг ранги қув ўчиб кетди.

- Менга қаранг, ака! деди дағдаға билан. Писанда қилманг! Сиздақалардан мингтасини ётқизиб турғизганман. Хоҳласам ҳалиям қудратим етади.
- Албатта-да! Сиз илмли одамсиз. Зўрсиз! Қонунни яхши биласиз. Қайноғамни йўтал тутди. Давр келди сур бегим, деб босар-тусарингизни билмай қолдингиз, тоғангизга суяниб бегуноҳ одамларни турмага тиқдингиз, деди энтикиб. Заҳарҳанда билан илжайди. Мана энди ҳеч ким эмассиз. Шунаҳа, мулла, емоҳнинг ҳусмоғиям бўлади.
- Мен нима ебман?! Умар акам сапчиб ўрнидан туриб кетди. Худди қамчи тутгандек қўлини баланд кўтарди. Қани, нима демоқчисиз?

Жонхолатда эримнинг қўлига ёпишдим.

 – Қўйинг, – дедим ялиниб, – дада, сиз ҳам қўя қолинг энди.

Ойсара опа мунғайиб қолған, на эрига, на Умар акамга бир оғиз гапиришга журъат этолмай, нуқул киприкларини пирпиратар, бурчакда бешик ғи-

чирлар, қизалоқ ғингшир эди. Қайноғам қилт этмади, ўтирган жойида бошини кўтариб, кимсан, нима деяпсан деб укасига қарамадиям.

- Таъна қилманг, хўпми? Умар акам шиддат билан қайноғамнинг устига эгилди. Сизга гапни ким қўйибди, деди пишқириб. Сиз урушдан қочиб, кавакка тиқилиб ётганингизда мен қон ютиб, бутун бир колхозни бошқардим!
- Қон ютган сенми менми? Ана, кўриб қўй! Қайноғам ипдай ингичка бармоги билан тупдонга имо қилди. Сен одамларнинг бошида от ўйнатиб кариллаб юрганингда мен фабрикада бўз тўқидим. Яримта ўпкам билан икки исменлаб ишладим.
- Биламан! Сиз бўз тўқигансиз. Хотинингиз дўппифурушлик қилган. Тегишли жойга бир оғиз айтсам, оёгингиз осмондан бўлиб кетади. Хусусий мулкчилар! Буржуйлар! Ҳамма қилмишларинг тирногимнинг юзида!
- Ҳароми! Қайноғам каловланиб ўрнидан турди. Оқпадар! деди бутун вужуди қалтираб. Эсингни танибсанки, одамларга ёмонлик қиласан. Мана! Қамата қол! Оттириб юбор! У ёш боланикидек кичкина мушти билан кўкрагига муштлади. Ўлдириб қўя қол!

Боядан бери мунғайиб ўтирган Ойсара опа тура солиб, эрини қучоқлаб олди.

- Дадаси! деди йиғлаб. Уят бўлади! Қўни-қўшни эшитса нима дейди? Андиша қилинглар ахир!
- Андиша? Шунда андиша борми! Қайноғамни тағин йўтал тутди. Бу сафар букилиб-букилиб йўтала бошлади. Ҳолсизланиб чўккалаб қолди. Умар акам ҳамон унинг бошида хезланиб турарди. Йўқ, деди қайноғам, афсус-надомат билан бош чайқаб, бу андишадан кейин туғилган. Ачинаман! У дармонсизлик билан бошини кўтариб

менга қаради. Қовжираган кўзларида мунг бор эди. – Ачинаман сизга, қизим. Ёмоннинг тузоғига тушибсиз. Бари бир бахтиқаро қилади.

- Ўв! Умар акам кўзидан ўт чақнаб оёгини кўтарди. Бир тепиб акасини пачақлаб ташлагудек бўлди-ю, тепмади. Ўв сили-симён! деди хириллаб. Энди менинг оиламни бузмоқчимисан? Хотинимни жўнатиб, бир йўла мендан ҳам қутулмоқчимисан? Мана! У хунук қилиқ қилди. Эртагаёқ судга бериб, ҳовлининг ярмини бўлиб оламан! Бу жойлар менга отамерос.
- Вой шўрим! Ойсара опа талмовсираб қолди. Икки бола билан қайси эшикка бош уриб борамиз. У нажот кутгандек кўзимга шу қадар мунг билан қарадики, Умар акамнинг ёқасига ёпишиб, силкитдим.
  - Уят борми сизда? Нима деяпсиз?
- Э, торт-е! У бир силтаб қўлимни ёқасидан олиб ташлади. Сенам шуларга ҳамтовоқсан!
- Ана, қизим! Қайноғам оғир-оғир бош чайқади. – Хоҳласа сизниям қаматади. Қонунни билади-да!
- Гап шу! Эртадан заводда ишлайсан. Сенам совуннинг сассигини бир ҳидлагин.
- Мен ишламайман, дедимми! Гап бошқа ёққа айланганидан хиёл таскин топдим. Қачондан буён ишга кираман деяпман-ку!

...Ўша жанжалдан кейин Умар акам қозонни алоҳида қилди. Аммо деяли ҳар куни овқатни Ойсара опа тайёрлаб қу́ярди. Биз – эр-хотин ёғ заводида ишлаймиз. Иш оғирмас, ҳавоси оғир. Кун буйи кунжара ҳиди, ёғ иси, совун иси аралашиб димоққа ўтириб қолади. Одамнинг ку́нгли беҳузур

бўлиб кетади... Уч ойча ўтгандан кейин кўнглимнинг беҳузур бўлиши фақат заводдаги ислардан эмаслигини пайқадим. Ойсара опа рост айтган экан: ойнинг ўн беши қоронғи бўлса ўн беши ёруг экан... Анор егим келарди...

Fарқ пишиқчиликда кўзим ёриди. Худо Музаффаримнинг ўрнига ўрин фарзанд ато қилди. Қизчамнинг аллақаери Музаффарга ўхшаб кетар эди.

Умар акам «ҳалиям даври келишига», ишлари гумбур бўлиб кетишига ишонар, ҳадеганда омади юришмаганидан асабийлашар эди... Тошкентга серқатнов бўлиб қолди. «У ёқда душманларингиз кўп, нима қиласиз бориб», десам нуқул битта гапни қайтарар эди. «Аҳмоқ эканман! Шунча йилелиб-югуриб, хемиригаям эга бўлмабман! Мана, энди ҳаммасини законний қиламан!»

...Эсимда йўқ, бундан уч йилми-тўрт йил олдин Умар акам Тошкентга яна бориб гап топиб келди.

- Анави чўлогинг уйланибди, Раъно.

Нима ишим бор! Менга деса юз марта уйланмайдими? Нега энди «менинг чўлогим» бўларкан!

Энсам қотиб индамаган эдим, Умар акам кулди.

– Кимга деб сўрамайсан ҳам! Робияга уйланибди! Анави Хусан думанинг асрандиси бор эди-ку, ўшанга. Дарров туғибам берибди: ўғил!

Умар акам «ўғил» дейиши билан Музаффар эсимга тушди. Юрагим зил кетди. Майли! ҳеч кимга ёмонлик тиламайман. Аммо боламдан жудо қилган, ўғлимнинг ўлимига сабабчи бўлган анави чўлоқни у дунёю бу дунё кечирмайман. Унгаям боққан бало бордир.

Аччиқни аччиқ кесади, дейишарди. Баъзан аччиқни ширин ҳам кесаркан. Насиба Музаффарнинг доғини ювиб ташлади. Қизалоғим катта бўлган сари ўғлимнинг хотираси хаёлимдан ўчиб бо-

рарди. Тақдирга тан бериш – дононинг иши. Бўлар иш бўлди. Ўғлим нобуд бўлди. Фарзанд догини кўрган битта менми! Ношукурчилик қилишнинг нима кераги бор! Мана, ўрнига ўрин толе яна фарзанд ато қилди-ку. Тағин нима керак!

Шундай бўлсаям аҳён-аҳёнда ўғлим тушимга кириб қолар, чўчиб уйғонсам, чирқиллаб йиғлаёт-гани анчагача қулоғимда янграб турарди.

Бундан чиқди Музаффар тушларимга кириши бежиз эмас экан-да! Болам тирик экан-да!

Қўқонга кўчиб келган кунларимиз эрим қайногамга «унадиган яхлит пул бор» деганида нимани назарда тутганини, нима учун кейинги пайтларда Тошкентга бўзчини мокисидек қатнаётганини, мана энди тушундим. Мен – содда ҳеч балога ақлим етмай юраверибман.

Уч кун аввал у Тошкентдан қовоқ-тумшуғи осилиб қайтди. Қоши чимирилган. Чақмоқ телпагини қийшиқ қўндириб олган. (Хаёлимга ғалати ўй келди. Чақмоқ телпакка мунча ишқибоз бўлмаса! Анча йил аввал Кўтармада Парча опа билан юлишиб, «маданий»га тушиб кетганидан бери бунақа телпак киймасди. Тошкентга бориб, яна топиб кепти-да!)

Кулимсираб, салом берган эдим, юзини ўгирди. «Шойи галстук олиб келдингизми, дада», деб бўйнига осилган Насибани ҳам зарда билан нари сурди-да, менга буюрди:

- Уйга кир!

Ҳайрон бўлиб, рўпарасига чўккалаган эдим, тўсатдан кўзимга тикилиб сўради:

- Қачонгача етимларникини юламиз? Том соламизми-йўқми?
- Қанақа етим? дедим ҳайрон бўлиб. Ким етим?

- У, «сенга гапирдим нимаю гапирмадим нима», дегандек энсаси қотиб, лабини бурди.
- Акамнинг болаларини айтаман, аҳмоқ! Тошкентдан акамга дўхтир олиб келмоқчи эдим. Мақсудов деган профессорга учрашдим. Акам – сил, ўн беш йилдан бери касал, уч ой бўлди, ўрнидан туролмай қолди, десам, шунча яшаганига шукур қилаверинг, энди ўнгланмайди, тайёргарлигингизни кўринг», деди.

Эрта куздан буён ўрнидан туролмай қолган қайноғам кўз ўнгимга келди-ю, ачиниб кетдим.

- Иложи йўқ эканми?
- Тағин гапиради-я! Умар акам уҳ тортди. Уйингдан кавушдек ўлик чиқса, тоғдек харажатни етаклаб кетади. Акам жигарим-ку! Жиянларам менинг зиммамда қолади энди.

Бечора қайноғам! Нимага бу дунё шунақа тескари! Ўн йил илгари шу хонадонга қадам босганимда қайноғамниям, Ойсара опамларниям ёмон кўрувдим. Билсам, дунёда энг яхши одамлар шулар экан.

- Энди нима қиламиз? - дедим бўшашиб.

Умар акам папирос тутатди.

- Шу-да хотин зоти! –деди негадир жаҳли чиқиб.
- Қилғилиқни қилиб қўяди-да, «нима қилай», деб безрайиб тураверади!

Қизиқ! Мен нима қипман! Рўзгорингни ажратиб ол дебманми!

– Раъно! – Умар акам кўзимга жиддият билан тикилди. – Ховлини сотамиз. Умрбод сиғинди бўлиб туролмаймиз-ку! Ўзимизгаям уй-жой солиш керакми? Акам ўлгани билан Йўлдошхон эрта-индин уйланади-ку!

**Хайрон** қолдим.

- Қанақа ховлини айтасиз?

Умар акам жаҳл билан папиросни хонтахта устида турган пиёлага эзгилади.

– Ҳўкизнинг қулоғига танбур чертяпманми? – деди тишини ғижирлатиб. – Тошкентдаги ҳовлини айтаман, қовоқбош! Тошкентда отангдан қолган ҳайҳотдай уй-жой бор-ку. Ўшани айтаман!

Ие, ота ҳовлимизда Маржа опа туради-ку! Ойимга мендан ортиқ хизмат қилган хотин! Бошимга мушкул иш тушганида... эрим урушда юрганида Умар акам қилар ишни қилиб қўйиб, «бу ёғини ўзинг эпла», деб бир чеккага чиқиб олганида бир эмас, икки марта мени шармандаликдан сақлаб қолган, туғруқхоналарга югуриб дўхтир топган Маржа опа... Энди келиб-келиб...

- Қанақа бўларкин... дедим бўшашиб. Маржа опа...
- Менга қара, ўв! Умар ака ғазаб билан тишини ғижирлатди. Ади-бади дейдиган бўлсанг, ўша Маржангни судга бериб уйдан ҳайдаб чиқараман-да, ҳовлини юз мингга сотаман. Харидор топиб қўйдим.
- Умар ака! дедим ялиниб. Қанақасига! Ахир...

У кўзимга шу қадар ғазаб билан қарадики, дамим ичимга тушиб кетди.

- Гап шу! - деди шиддат билан. - Эртага поездга минасан. Ўша жонингдан азиз Маржа опанг билан келишиб келдим. Ўн минг тайёрлаб қўядиган бўлди. Эсиз, эсиз! Уч уй, икки айвон, бир шийпон. Ўн олти сотих ховли. Қанча дарахт! Юз мингли жой эди. Майли, авлод-аждодларинг ҳурмати судга бермадим. Ўша Маржа опангни ўзиям хазина топган гадойдек қувониб қолди. Юз мингли ҳовлини носвой пулига оладию севинмайдими! Яхшилаб тушуниб ол. Аввал БТИга, кейин нотариусга

кирасан. Ҳаммасини тўгрилаб келганман. Иккита ҳужжатга қўл қўйсанг бўлди. Сенинг қўлинг ўтади, меросхўрсан. Лекин билиб қўй, ўв! – У мих қоққандек пешонамга бармоги билан нуқиди. – Олдин ўн мингни санаб оласан, кейин БТИнинг темир дафтарига қўл қўясан. Билдингми? Нотариус взносини ўзи тўлайди, уқдингми?

Ростини айтсам, ҳеч нимани тушунмадим. Йўқ, тушунмадим эмас, ҳаёлимни нотариус-потариусдан кўра, бошқа нарса – Маржа опанинг кўзига қандай қарайман, деган андиша кўпроқ банд этган эди.

- Умар ака... дедим ялиниб. Майли-ку, лекин.
- Нима «лекин», нима! У кўзини газаб билан олайтирди. (Бир вақтлар колхозчиларнинг бошида қамчи ўйнатганида кўзидан шунақа совуқ олов сачраб кетарди.) Маржа опангизга юрагингиз ачидими, хоним! деди киноя билан. Мўйлови қийшайиб кетди. Яхши! Ана, эшик очиқ! Тошкентга боринг-да, Маржа опангизга ёпишиб ётаверинг! Аммо иккита шартим бор. Биринчиси шуки, Насибани ташлаб кетасиз. Иккинчиси... У мўйлови баттар қийшайиб асабий кулди. Майли, буниси шарт эмас, маслаҳат: чўлогингизнинг олдига бора кўрманг. Қора мўнди эгачингизни қизи сочингизни битталаб юлмасин тағин. Тушундингизми?

...Тушундим! Энди ҳаммасини тушундим! Нимага бу ёққа юборганингни ҳам, нимага «чўлоқнинг уйига қадам боса кўрма», деганингни ҳам... Шунча йилдан бери ёш боладек лаҳиллатдинг мени! Умрбод алдаб келдинг! Ўшанда – қирқ иккинчи йил кирадиган кечаси, уйимга бостириб кирганингдаёқ алдагансан. Сен мени ҳеч қачон яхши кўрган эмассан! Яхши кўрсанг, оёгингга йиқилиб, никоҳингизга олинг, деб ялинганимда

уйланган бўлардинг! Йўқ, мен сенга шунчаки ўйнаш бўлиб келдим. Бир умр! Хоҳласанг ўйнайсан, хоҳламасанг улоқтириб юборасан. «Сени деб шу кунларга тушдим, ҳамма нарсамдан айрилдим», дейсан! Мен-чи? Мен айрилмадимми? Энг бебаҳо хазинамдан, боламдан жудо ҳилган сен эмасмисан?! Тирик ўғлимни ўлди деган сен эмасмисан?!

Алдашни мендан кўр энди! Хар хафта Тошкентга қатнайман! Нотариус ишламас экан, БТИ дам олаётган экан, Маржа опани тополмадим, дейман-да, ҳар сафар келиб, ўғлимни кўриб кетаман. Қасд олишни мендан ўрган.

Йўқ! Аввал бориб ёқангдан оламан! Нимага тирик болани ўлди дединг, хезалак!

Алдадинг!! Тотув турмушимни буздинг. Шомурод акам қандоқ яхши кўрарди, қандоқ авайларди! Ўзим-чи! ўзим ҳам яхши кўрардим-ку уни!... Қаёқдан пайдо бўлдинг! Пешонам қурсин! Қаёқдан шу уйинг куйгур уруш бўлди? Шомурод акам ёнимда бўлса сен ножинс остона ҳатлаб уйимга киришга ҳаддинг сиғармиди! Вой ноинсоф! Вой беномус! Гўрда ётган онам хотиним бўлсин деб ҳасам ичди-я! Ўз онасининг арвоҳини ҳаром ҳилди-я! Қайноғам рост айтган экан. Бахтиҳаро ҳилади деганди-я! Бахтиҳаролик бундан ортиҳ бўладими! Тирик туриб боламдан жудо бўлсам. Ўз болам ўзимдан юз ўгирса! Қандоҳ чидай! Музаффар энди икки дунёдаям она демайди! Онаси бор: Робия бор. Қандоҳ ҳилай? Нима ҳилай!

...Мунча имиллайди бу поезд! Қачон етаман! Қачон юзига туфлайман ўша виждонсизни! Тонг отятими? Ана, Қўқонга келдик шекилли...

Эзиб ёмгир ёгаяпти. Билмадим, юрдими, югурдими! Плашим жиққа ҳўл бўлиб кетди. Бир қўлимда сумкача, бир қўлим билан Музаффарнинг дўпписини багримга босиб олганман. Дўппи ҳўл бўлмаса бас! Чатоқ қилдим: Музаффарнинг шундан бошқа дўпписи бўлмаса-чи? Тошкентда ҳам ҳаво булут эди. Бошяланг мактабга бориб, шамоллаб қолса-чи?

Уйга отилиб кирсам, ўтирибди. Кўрпачага ёнбошлаб, папирос тутатиб токчадаги «АРЗ» радиосидан концерт эшитяпти. Биламан, атайлаб ишга бормаган. Мени кутаётгани йўқ, пулни кутаяпти.

- Қийналмадингми? деди ўрнидан қўзғалиб. –
   Хаво айниб қолганини кўрмайсанми? Биттими?
  - Нима битади? дедим ҳансираб.
  - Ие, нимага борган эдинг ўзи?

Тушунарли! Олди-сотдини айтяпти. Пулни сўраяпти!

Пул керакми? – дедим энтикиб. – Яхши. Пул бўлади! Аммо олдин болани обкеласиз, кейин пулни оласиз.

У ҳайрон қолгандек кўзини олайтириб, қаддини ростлади. Ранги ўчиб кетди.

- Қанақа бола? деди елкасини қисиб.
- Менинг болам, имонсиз, менинг ўғлим! Музаффар тирик экан-ку!
- У серрайиб қолди. Кейин негадир илжайди. Мўйлови қийшайиб кетди.
- Адашибсан, Раъно! деди асабий кулиб. Мен аниқ биламан. Ўлган!
- Мана-ку! йигламоқчи эмасдим. Шу сурбетнинг олдида йигламаслигим кераклигини билардим. Аммо қўлтигимдан Музаффарнинг дўпписи-

ни олаётганда чидаб туролмадим. Додлаб юбордим. – Мана! – дедим ўглимнинг дўпписини кўрсатиб. – Тирик экан-ку! Ўз кўзим билан кўрдим-ку!

- Раъно... У дўппига қўл чўзди. Мен эшитганимни айтганман. Қаёқдан билай?
- Тегма, нахс! Харом қиласан! Дўппини бағримга босдим. Ўз онасининг арвохини хотин қилган имонсиз! Виждонсиз! Айтувдинг-ку, болангни мозорини кўрдим деб! Қани ўша мозор. Юр! Обор! Кўрсат!

Устига ёпирилиб борган эдим, юзимга тушган тарсаки зарбидан йиқилиб тушдим. Лекин ўша захоти сакраб туриб дўппи аралаш ўзининг юзига тарсакиладим.

- Кўрсат! Ҳозир оборасан!
- Ўчир, мегажин! У гурзидек муштини бошим устига кўтарди.
- Ур ўлдир! Шу кунимдан ўлганим яхши! Ёлгонинг билан ёрилиб ўлгур ҳайвон! Ур! Ур, мард бўлсанг! Алам билан мук тушганча оёқларидан чангаллаб олдим. Обкеласан! Ўглимни обкеб берасан!

Шу пайт дахшат тўла чинқириқ қулоғимга кирди.

– Урманг! Дадажон, урманг! Аяжон, туринг!

Бошимни кўтарсам, қизим чирқиллаб дадасининг бўйнига осиляпти.

- Кўрмайсанми, ўзини! Умар ака оёгини типирлатди. Қўйвор, шаллақи!
- Аяжон! Қизим мук тушиб, мени қучоқлаб олди. Қўйворинг, тегманг дадамга!

Беихтиёр қўлларим бўшашди. У оёқларини силтаб тортиб нари кетди.

- Эшитиб қўй, Наси! –деди таъкидлаб. Аянг сени етим қилмоқчи! Сени ташлаб Тошкетдаги ҳароми ўғлининг олдига кетмоқчи!
- Ўзинг ҳаромисан, виждонсиз! Бутун вужудим билан тебраниб тиззамга муштладим. – Илоё

йигит ўл! У дунёю бу дунё хор бўл, билдингми? Шу гапни айтган тилларинг кесилсин!

- Вайсама, ўв! У дераза токчасида ётган папиросини юлиб олиб, тутатди. Билиб қўй. Гапим гап. Тўрт томонинг қибла. Кеткинг келса кетавер. Аммо ўнг қулоқ, чап қулоғинг билан эшитиб ол: Насибанинг тирногиниям бермайман! Қиз меники!
- Аяжон! Насиба тарсаки зарбидан сирқираб оғриётган юзимни силади. Уришманг, аяжон, уришманглар.

Эшик қарсиллаб очилганини ҳам, Йўлдошхон отилиб кирганини ҳам пайқамадим. Фақат дўриллаб қолган овозда йиғлаб айтган гапи қулоғимга чалинарди:

- Амаки! Дадам оғирлашиб қолдилар! Юринглар. Тезроқ, аяжон! Тезроқ!

### ЙИГИРМА САККИЗИНЧИ БОБ

## УМАР ЗАКУНЧИ ХИКОЯСИ

#### Замон юки

Гапини қаранг! Виждонсиз дейди! Имонсиз дейди! Ўзинг кимсан? Шу кунларга тушишимга сен сабабчи эмасмисан? Сени деб амалимдан айрилдим. Обрўйимдан айрилдим! Манаман деган казо-казолар кўрса тиззаси қалтирайдиган кимсан Умар закунчи, кимсан илгор колхознинг раисини Оқсоқолу Дума бошлиқ чаласаводлар олдига солиб ҳайдади. Абдураҳмонов демаганлар бир қўллаб гирибонимдан бўгиб, передовойга улоқтиришига сал қолди. Очигини айтсам, аллақандай табибнинг ўглию сенинг чўлоқ эринг қилган ишни мен қилолмайманми, деб фронтга кетишга ҳам рози эдим.

Нима, ўша чиллаширлардан кам ерим борми? Аввал урушдан қўрқсам ҳам энди қўрқмайман! Қўшинларимиз Берлинга йўл олди. Шуни бўйнимга олиб турганимда яна тоғам ўртага тушди. «Майли, строгий виговор берайлик, ўртоқ Хўжаевга ўхшаган актив ташкилотчилар фронт орқасида ҳам керак, жангда олинган орден билан тинч фронтда олинган орден бир хил металлдан ясалган-ку», деб туриб олди. Кўтарма-ю Нўғайқўргон томонларга ўтсам, сенга кўзим тушади, кўзим тушса, кўнглим бузилади, деб қисиб юрдим-ку! Нега ўзинг жилпанглаб ёнимга бординг! «Отчётлар обкелдим, Соли акадан адресингизни билиб олдим», деб нега илжайдинг! Мен сендан отчёт сўраганмидим?

Бир ўтиришда Соли-сўпоқ қироат билан байт ўқигани эсимда. «Ишқ маъшуқ кўнгли ичра аввало пайдо бўлур, куймаса гар шаъм, парвона қачон шайдо бўлур...» Сен жилва қилиб «ёнмасанг» мен парвона бўлармидим?!

Эринг қайтганидан кейин бирон марта излаб бормадим. Ўша куни рўпарамдан чиқиб қолмасанг – олам гулистон эди. Ҳамма буғдой ўриб юрганини билардим. Шунинг учун йўлни яқинлай деб разъездда поезддан тушиб, Қаънига налог йиғиш учун кетаётгандим. Нимагаям олдимдан чиқа қолдинг. Тўғри, соғингандим. Эркакман. Хўп, бир-иккита қичиқ гап қилдим. Қўлингда боланг бўлса, юзимга туфлаб юбормайсанми! Уч ярим йил қилар ишни қилдик, энди ёпиғлиқ қозон ёпиғлиқ, йўлингдан қолма демайсанми!.. Ўзим ҳам ғирт аҳмоқманда! Тавбасига таянмаган эшшак!..

Битта хотин деб дезертирдай Қўқонга қочдим. Қочмасам бўлмасдиям. Ё чўлоқ ўлдирарди, ё Абдураҳмонов қамоққа тиқтирарди. Ўшанда бор, билганингни қил, деб ташлаб кетсам қўлингдан нима келарди? Эрингни пичогида қўйдай сўйилиб кетармидинг! Инсоф қилдим. Устига-устак, яхши кўрардим. Бари бир яхши кўрардим, сен алвастини! Кела солиб ЗАГСдан ўтганим яхши бўлди. Абдурахмонов хам индаёлмай қолди. Хотиним мени севади, аввалги эрига онаси зўрлаб берган экан, эри феодал экан, бир муштипар аёлни бахтли қилсам, шу гунохми, деб туриб олдим. Шундаям аввалги строгий виговорни пеш қилиб партиядан ўчиришди. Чидадим! ўинг десам қаматардиям! Хаммаси - сен туфайли! Тоғам тўғри айтган экан! Бу дунёнинг жаннати ҳам хотин, дўзахи ҳам. Дунёнинг ишларини қарангки, замон ўзгариб, юрт сўраб юрган, қанчадан-қанча одамларни кесиб юборган шундоқ тоғамнинг ўзи кесилиб кетди. Бултур Тошкентга борганимда шу гапни эшитиб, қулоғимга ишонмадим. Йўқ, рост экан. Кўп ишларни нотўгри кўрган, юзлаб бегунох одамларни «халқ душмани» деб қаматган, деган айб қўйишибди. Ачиндим, аммо қўлимдан нима келарди.

Авваллари ҳайрон бўлардим. Каттадир-кичикдир амалдор зоти борки, ёшини яшаб, ошини ошаганидан кейин тинчгина пенсияга чиқиб кетса бўлмайдими, ё ўлишини ё ўтирган курсисидан олиб ташлашларини кутишидан муддао нимайкин, дердим. Балони биларкан, ўшалар! Одам амалдан кетиши билан обрўсиям бир пул бўларкан. Амалдан тушдингми — тамом. Кеча товонингни ялаганлар бугун худди ўша товонингни ялаган огзи билан бетингга тупураркан. Тогамни айблаганлар ҳам шунақалар-да! Тогам ким бўпти! Ўртоқ Сталиннинг ўзини ҳам ёмон отлик қилаяпти ковлаяпти булар! Ўзим-чи? Ақалли мол-мулк тўпласам ўлармидим! Ана, Соли сўпоққа балоям ургани йўқку! Тўгри, Оқсоқол раис бўлган заҳоти сўпоқни

бухгалтерликдан бўшатди. Лекин ҳеч ким ост-устини олиб қўймади-ку! Мен-чи? Шунча йил раис бўлиб нима орттирдим! Уйимдан ҳайдаб чиҳаришди. Ўша куни энг ишонганим — Қоракўз ҳам думини гажак ҳилиб ҳочиб кетди. Бошингга иш тушганида асҳотадиган нарса пул экан. Мол-дунё экан. Энди мен ҳам анойи эмасман. Ишимни билиб ҳиламан. Бари бир ҳонунсиз йўл билан юлиш ҳўлимдан келмайди. Ҳеч бўлмаса, ҳонуний ҳаҳимни олай! Акамга сиғинди бўлиб ўтирмай!

Мен нима ғамдаю, бу боласини рўкач қилади. Аҳмоқ эканман-да, колхозга бориб. Аламзадалар тошбўрон қилиб юбормайдими? Туш кўрибманми итваччаси тирик қолганини! Ўлибди деб қўя қолдим-да! Ҳайронман, жони итдай савил эканми, тирик қопти. Ҳов ўшанда — бозорда юрганимда чўлоққа эргашиб келган бола ўша экан-да! Қаёқдан билай! Иккинчи хотинидан бўлган дебман-да! Яхшиям, ўшанда жўнаб қолганим. Шунча одам ўртасида пичоқ суғурганини кўрдим-ку, чўлоқнинг! Сўйса — сўярдиям-да! Аҳмоққа закон борми!

Бари бир жигар-жигар экан-да. Қийин пайтда акам ёнимга кирди. Уришсаям, сўксаям бошимни силади. Сениям багрига олди-ку, аҳмоқ хотин! Янгам ҳам эски аламларини унутиб, одамгарчилик қилди-ку! Насиба тугилганидан кейин сенга бутунлай богланиб қолдим. Бўлмаса бир йўла иккита чўмич тиқилган қозондан овқат ейдиган аҳмоқ эмасдим. Бир йил-ярим йил ўтказиб, орқангта ўхшатибгина бир тепсаму, онаси ўпмаган қизни олсам додингни кимга айтардинг. Битта қизим ҳурмати тақдирга тан бердим. Яна нима дейсан! Бир камим ўша чўлоқдан бўлган ҳаромзадани ўгил қилиб олишим қолувмиди. Чучварани хом санабсан! Хоҳласанг шу, хоҳламасанг катта кўча!

Асли Тошкентга бир ўзини юбориб хато қилдим. Қизиқ, кимдан билиб келди, бу янгиликни? Кўтармага боролмайди. Чўлок, анави – Думанинг қизига уйланганини атайлаб айтиб күйганман. Айтмаганимдаям боролмасди: ўзининг юзи қора! Бўлмаса, қаёқдан билдийкин? Ҳа, Маржа опаси айтган! Одамларгаям хайронсан. Тинчгина аравасини тортиб юрса ўладими, нима қиларди гап кавлаб. Хайронман, нимага келишди экан булар!.. Бир хафта олдин борганимда хаммасини законний тўгрилагандим. Маржа ўн минг тайёрлаб қўядиган бўлган эди. Биламан, Маржа пулни жон-жон деб берган. Лекин қани ўша пул? Қаёққа тиқди? Ё анави ҳаромзадасига бериб келдими? Шунча пулни қандай беради мишиқи болага! Чўлоқнинг олдига боролмайди, қора мўнди эгачисининг уйига боришга юзи йўқ. Қаёққа кетди пул? Майли, аниқлаймиз. Хаммасини аниклаймиз!

Акам ўляпти. Йўлдошхон бекорга йиглаб келгани йўқ. Раз жигар бўлганимдан кейин маъракаси менинг гарданимдами? Бир эмас, икки бола менинг зиммамга тушадими! Бўпти-да. Майли, Йўлдошхон йигит бўлиб қолди. Бу йил мактабни битиради. Анави товуқмия янгам ўгилларини азза-базза врач қилмоқчилар. Дўхтирликни ким қўйибди унга! Вокзалга чиқиб, юк ташисин, пул топсин! Буниси-ку, йўлини топиб кетади. Муҳаббат-чи? Ёш бола-ку ҳали! Шу томонини нега ўйламайди, манави аҳмоқ. Сандиққа босиб қўйган пачка-пачка червоним борми!

Эсиз шунча уринганларим! Хом сут эмган банда, етти йил колхознинг обши қозонидан шўрва ичибман-а! Нима топсам фронт учун дебман! Ҳаммага ёмон кўринибман. Начора, у пайтда замон юки оғир эди. Ҳаммаси менинг зиммамда эди.

Анави шаллақи Робия, жинни Парча-ку, майли. Қилмишига яраша таёғ еган. Лекин ёш болани – табибнинг ўғлини янтоқ билан савалаганим чатоқ бўлган экан. Нима зарил эди!

Аслида бунгаям мана шу сабабчи. Шунинг уйига борганимда кўриб қолган ўша бола. Хеч кимга оғиз очмаган бўлсаям, аламим бор эди. Устига-устак, мендек одамга қўл кўтарган анави пакананинг қизи қараб турганди. Унинг ҳам аламини боладан олдим.

Хозир урармидим? Йўқ, қўлимдан келмасди. Ўзимнинг Насибамни биров чертиб кўрсин-чи, нима қиларкинман! Хато қилдим. Болани бекор урдим...

Қаранг-а! Қўйиб берсам, чўлоқдан бўлган боласиниям шилқ этиб бўйнимга илмоқчи! Иласан-а, иласан!

# ЙИГИРМА ТЎҚҚИЗИНЧИ БОБ

# ЕТТИНЧИ СИНФ ЎҚУВЧИСИ МУЗАФФАР ШОМУРОДОВ ХИКОЯСИ

## Қўқонга кетаман!

Бешинчи дарс адабиёт эди. Ўқитувчимизнинг айтишига қараганда, имтиҳон яқинлашган сайин биз дангаса бўлиб кетаётган эмишмиз. Бу йил еттини битириб Нўғайқўргондаги «катта» мактабга борсак, ҳолимизга маймун йиглармиш. Саккизинчи синфга борган кунимизоқ Нўғайқўргондаги муаллимлар ҳаммамизга «икки»ни ёпиштириб ташлармиш.

- ...Бугун «дангасалигим»ни кўрсата олмадим. Ўқитувчи дарсга кириши билан буюрди:
  - Шомуродов! Директорнинг хонасига! Бўшашиб ўрнимдан турдим.

- Нимага?
- Борганда биласан.

Мана, кетяпмиз, Сулаймон аканинг олдига. Мактабда бола кўп. Аммо Сулаймон ака мени ҳаммадан яхши танийди. Биринчидан — битирувчи синфмиз. Иккинчидан — хонасига кўп кирганман. Чақиртиргандан кейин кираман-да! Мана, ҳозир йўлак охиридаги эшикни секин тақиллатаман. Ичкаридан, «киринг», деган рухсат бўлади. Эшикни очиб, мўралайман. Ювошгина қилиб «мумкинми», дейман. Сулаймон ака тошбосма билан мармар сиёҳдон қўйилган стол орқасида ўтирган бўлади.

«Кесинлар! – дейди ўрнидан туриб. – Шахсан ўртоқ Шомуродов ташриф буюрадилару биз йўқ деймизми?!»

Ана ундан кейин бошланади. «Қачон одам бўласан, бўйингни қара! Менга бир яримта келасан. Отанг уйлантирса неварали бўлади-ку, қачон ақл киради сенга, а?!»

**Хайронман**, бугун директор чақирадиган гунох қилмадим шекилли! Э, бўлди! Хали катта танаффусда Абдувалининг укасини йиглатувдим. Иккинчи синфда – Омон билан ўқийдиган укасини! Айб ўзида! Нимага мактабга велосипед миниб келади! «Битта минай», десам қизғанди. Синдириб қўярмишман. Хечам синмайди-да! Катта велосипед. Йигирма саккиз! Ўзи минолмайди, оёги етмайди-ю, қизғанди. Энди мингандим, қизғанчиқлик қилиб орқа ғилдирагининг қанотини чангаллаб олди. Велосипед қийшайиб кетиб, занжири шимимнинг почасини қисиб қолди. Ўзим шимимни занжирдан чиқаролмай йиқилиб ётибману «тўлаб беринг, рулини қийшайтириб қўйдиз», деб йиглайди. Боплаб дўппосламокчи эдиму аядим. Бундан чикди ростдан хам дадасига чаккан. «Туя» сартарош директорга шикоят қилган.

Шимимнинг почасиям илма-тешик бўп кетибди. Қайириб ола қолай. Директор сўраса лой бўлганди, қайтариб қўйдим, дейман.

Эшикни одатдагидек секин тақиллатдим. Ичкаридан одатдагидек «киринг» деган овоз келди. Одатдагидек эшикни қия очиб, бошимни суқдим.

- Мумкинми? - дедим мулойимгина бўлиб.

Сулаймон ака ҳар галгидек стол ёнида ўтирган бўлса керак, деб ўйлаган эдим. Йўқ, дераза олдида турган экан. Деразадан тушган нур йўл-йўл шойи кўйлагини ёритиб, ичидаги майкасининг тасмаси кўриниб турибди. «Кесинлар, ўртоқ Шомуродов, кесинлар! Шундоқ, киши ташриф буюрадилару...»

Йўқ, бу сафар унақа демади.

– Киравер, Музаффар! – деди хотиржам, ҳатто меҳрибон овозда. Қўрҳиб кетдим. Нима бало, бу гал гуноҳим оғирроҳ шекилли...

Иккиланиб ичкари киришим билан атлас кўйлак кийган хотин югуриб ёнимга келди. Бурчакда турганини кўрмабман. Бу қайси муаллима бўлди? Атлас кўйлак киядиган ўқитувчимиз йўқ эди шекилли. Хотин ўша захоти махкам қучоқлаб олди. Чўчиб тушдим. Димогимга гунафша хиди урилди. Хотиннинг илиқ, нам лаблари пешонамга, юзларимга, кўзимга ёпишди. У мени тинимсиз ўпар, унсиз йиглар эди.

– Музаффар! – деди энтикиб. – Ўғлим!

Танидим. Гунафша исидан, иягидаги холдан... Қулоғимга билагузук жаранги эшитилгандек бўлди. Аммо бу сафар қўлида билагузук йўқ эди.

– Вуй, бўйингни қара! Катта йигит бўп кетибсан-ку! – У ёш тўла кўзлари билан жилмайиб, тагин багрига босди. Негадир ўзимни олиб қочмадим. Ўшандан кейин уни унутиб юборган эдим. Аммо тушимга кирганди. Йўқ, тушимда аниқ кўрмаганману, лекин... кўрганман. Кейин яна эсимдан чиқиб кетган. Билмайман. Ишқилиб кейин ҳам кўрганман...

У мени бағридан чиқармас, йиғлаб туриб кулар эди. Нимагадир кўнглимга ғулғула тушди. У эса маҳкам қучоқлаб олган, нуқул «вой, бўйингни қара!» деб такрорларди.

- Хўш... Сулаймон ака томоқ қирди. Танаффус бошланмасидан гаплашиб ола қолинглар. У эшик томон юрган эди, хотин мени қўйиб юбормай ўгирилди.
- Кетманг! деди секин, аммо жиддий оҳангда.Шу ерда булганингиз яхши.

Директор тўхтаб қолди.

Хотин ихчам сумкачасини шиқиллатиб очиб, рўмолча чиқарди.

Кўз ёшларини артди. Кейин негадир менинг ҳам юзимни артиб қўйди.

– Музаффар! – деди кўзимга термилиб. – Сен энди катта йигит бўлиб қолдинг. Яқинда еттини битирасан. Мени биласан-а?

Индамай, директорга қарадим.

– Биласан-ку ахир! – Хотиннинг лаблари титраб кетди. – Эсингдан чиқдими, олдин ҳам келгандим-ку! Кейин яна келдим, кўп келдим. – У энтикди. – Сен мени кўрмасанг ҳам... Мен сени... – У Сулаймон аканинг бетоқат бўлаётганини сезди, овози тетиклашди. – Ўғлим, – деди паст, бўғиқ оҳангда, – қулоқ сол. Еттинчини битирганингдан кейин Қўқонга борасан, хўпми? Синглинг бор – Насиба... Эсингдами, олдинги сафар ҳам айтгандим. Насиба-чи, олтинчида ўқийди. Акам қачон келадилар, деяпти. Шунча йил даданг билан турдинг, энди мен билан турасан, майлими? – У жилмайди. – Ўша ерда ўнинчини битирасан. Фарғонада институт бор. Кириб ўқийсан, бўптими?

Директорнинг олдида уялиб кетдим.

Сулаймон ака катта-катта қадам ташлаб у ёқдан бу ёққа бориб-келар, негадир асабийлашар, юзи қизариб кетган эди.

- Келишдикми, Музаффар! Домлангни олдида ваъда берасан-а?

Негадир яна юрагимга қўрқув тушди. Юзимни ўгирдим.

- Синглим, Сулаймон ака рўпарамизга келиб тўхтаб қолди, айтдим-ку, бунақа ишни суд ҳал қилади. Болани қийнашнинг нима кераги бор?
- Биламан! Хотиннинг кўзлари чақнаб кетди. Овози қатъият билан жаранглади. Судга қатнайвериб, қонун кодексларини ёд қилиб юбордим. Етар! Музаффар энди ёш боламас! Ўз тақдирини ўзи ҳал қилади. Бола нима деса шу!

Юрагимга баттар вахима тушди. «Обкетиб қолса-я! Нима қиламан Қўқонда!»

Дов ўшанда келганида Омонни йиқитганим, «ўгай» деб бақирганим, ойим йиглагани эсимга тушиб ёмон кўриб кетдим уни.

- Шунақа дейсиз-ку, лекин... Сулаймон ака негадир қизариб кетди. Ҳарқалай болани тарбиялаган отаси бор, онаси бор...
- Тарбиялаган?! Хотин шахт билан директорга ўгирилди. Ахволини қаранг! Бу кетишда ғирт безори бўлади-ку, бу!
- Нимага безори бўларкан! Аҳволига нима қипти! Директорнинг ҳам овози қатъийлашди. Нима қипти аҳволига! Эътиборингиз учун айтиб қўяй: Музаффар шўх бўлсаям энг қобилиятли ўқувчимиз! Хоҳласа ҳамма фандан беш олади. Теплицада лимон ўстиряпти.

Алам қилиб кетди! Нимага мени безори дейди! Нимага директорнинг олдида уялтиради.

Хотиннинг қўлидан юлқиниб чиқдиму эшикни тарақлатиб ёпганча йўлакка отилдим. Орқамдан йиғи аралаш илтижоли хитоб янгради:

# - Музаффар! Тўхта!

Югуриб ҳовлига чиҳдим-да, ойналари офтоб нурида яхлит кўзгудек яраҳлаб ётган теплица олдидан ўтиб, ўрикзор томонга чопдим. Бог ичига кириб кетаётганимда яна ўша илтижо эшитилди:

## - Музаффар! Ўглим!

Нима учундир тўхтаб қодим. Эсладим! Уни тушимда кўрганман. Хов ўшанда келиб кетганидан кейин уч-тўрт марта тушимга кирган. Уйгониб кетиб, қўрққанман. Ҳозир ҳам қўрқардим. Қочиб кетгим келарди-ю, бир нима тўхташга мажбур қилар эди. Ўша нарса нималигини билмасдим.

Орқамдан ҳарсиллаган овоз, шошқин қадам товушлари эшитилди:

#### - Болам!

Димогимга яна гунафша ҳиди кирди. Йиглагим келди. Билмайман, балки гунафша иси кўзимни ачиштиргандир. Балки уни тушимда кўрганимдаям йиглагим келгани энди эсимга тушгандир.

– Бормайман! – дедим ер тепиниб. – Ўз ҳолимга қу́ясизми-йуқми! Ҳеч қаёққа бормайман! Тинч қу́ясизми-йуқми!

У юзимга бирпас ҳайратланиб ҳараб турди-да, икки елкамдан тутган ҳўлини тортиб олди.

– Тушундим! – деди секин. – Бўлди, Музаффар, ҳаммасини тушундим. Кечир мени, ўғлим... – У ўкинч билан хўрсинди. Кўзларига жиддият чўкиб, узоқ қараб қолди. Икки кўзи менда бўлса ҳам чамаси ҳеч нимани кўрмас, ҳаёли бошқа ёқда эди. – Музаффар, – деди секин, – сен ёш боламассан, яхши ўқи, хўпми! Эрта-индин катта бўласан. – У негадир жилмайди. – Мактабниям, битирасан, – деди ово-

зи титраб. – Кейин ҳаммасини тушунасан. Ўшанда Қўқонда онам бор эди, деб сўроқлаб борсанг, бошим осмонга етади. ўишткўприк маҳалласида турамиз, вокзалдан узоқмас. Раъно опанинг уйи қайси десанг... Шошма... – Кипригига илиниб қолган ёшни сидириб ташлаб, тағин сумкасига қўл суқди.

- Бугун қанақа кунлигини биласанми?
- Билмайман! дедим қўрслик билан.
- Ўн иккинчи май. У яна жилмайди. Жиннивой! деди эркалаб. Бугун сенинг туғилган кунинг. Ўн тўрт ёшга чиқдинг, жоним!

Хайрон бўлиб, бошимни кўтардим. Тўгриси, бугун тугилган кунимлигини билмасдим. У ёгини айтсам, шу пайтгача уйимизда ҳеч кимнинг тугилган куни байрам қилинган эмас.

У қуллари қалтираб, сумкачадан турт буклоқлиқ дуппи чиқарди, яп-янги! Гармдори гулли!

- Қани, кийиб кўрайлик-чи! Дўппини бошимга кийгизди-да, бир қадам орқага чекинди. Юзимга термилиб узоқ томоша қилди. Қара, лоп-лойиқ келди, деди кулимсираб.
- Керакмас! Қўлим билан ушласам дўппи кир бўлишидан қўрқиб икки билагим билан еча бошладим. Ўзимники бор.
- Музаффар! Хафа бўламан. У кафти билан шоша-пиша дўппини қайтадан бошимга бостирди. Эсингдами, ҳов анави гал келганимда дўппинг менда қолиб кетган эди. Ўрнига ўрин олиб келдим. Бошингдан ечма, хўпми?

У дўппини яна ечиб ташлашимдан қўрққандай елкамга қоқди.

- Борақол энди...

Нарироққа бориб бурилиб қарасам, ҳалиям тикилиб турибди. Шимарилган почам оёғимга урилиб ғашимни келтира бошлади. Почамни қайтариб тушираётсам яна чопиб тепамга келди.

- Шиминг йиртилиб кетибди-ку! деди бош чайқаб. – Ма! Янги шим ол! – сумкасидан бир чангал пул чиқарди. Анча пул! Чўнтагимга суқаётганида қўрқиб кетдим.
  - Керакмас. Дадам уришади, дедим типирчилаб.
- Дадангга айтмайсан-да! Шундай деди-ю, иккиланиб қолди. Лекин ўша захоти пулни чўнтагимга чуқурроқ суқди. Шим ол... Мен яна келаман.

Анча нарига борганда тағин бурилиб қарадим. Қарамоқчи эмасдиму ўзимдан ўзим... қарагим келди. У жилмайиб қўл силтар, аммо йиғлаб юборгудек лаблари титрар эди. Раҳмим келиб кетди. Яна бирпас тўхтаб турдим-да, синфхона томонга югурдим.

\* \* \*

Янги дўппимни қаёққа қўйишни билмасдим. Синфга киришдан олдин қайтадан буклаб, чўнтагимга солиб олдим. Иккала чўнтагим дўппайиб кетди. Биттасида дўппи, биттасида пул. Адабиёт ўқитувчиси ўафур ўуломнинг «Сен етим эмассан» шеърини тушунтираётган экан.

- Тезроқ ўтир! деди-ю, дарсни тушунтиришда давом этди.
- Шундай қилиб, шеърда совет халқларининг дустлиги...
- Маза қилдингми? деди Абдували илжайиб. Эшитадиганингни эшитдингми?

Директордан сўкиш эшитди, деб суюняпти. Бекорларнинг бештасини айтибсан! Сулаймон ака уришгани йўқ, қайтага мақтади. Фақат шимимнинг почаси тешилгани чатоқ бўлди-да. Ҳаммасига сенинг қизғанчиқ уканг айбдор! Еб қўймасдим велосипедини! Майли, буниям иложи топилди-ку! Қўқонда турадиган ойим («ойим» деган сўз хаё-

лимга биринчи марта келди, ўзим ҳам ҳайрон бўлдим) пул ташлаб кетди. Анча пул! Керак бўлса ўнта шим оламан. Пулни эслашим билан йиглаб юбормаслик учун атайлаб жилмайиб турган қўқонлик ойим кўз олдимга келди. Юрагим сиқилди.

Янги дўппини чўнтагимдан олиб, секин папкага тиқаётсам, Абдували кўриб қолди.

- Вуй! Қаёқдан олдинг?! деди пичирлаб.
- Топиб олдим!
- Қаний? Битта кўрий?
- Шомуродов! Ўқитувчи хуноб бўлиб бақирди.
- Сен йўгингда синф сув қуйгандек эди. Мунча ёмонсан-а!

Ана, яна мен айбдор бўлдим! Алам билан Абдувалининг биқинига тушириб қолдим.

– Шомуродов!.. Шеърда уруш туфайли етим қолган минглаб болаларни ўзбек халқи бағрига босгани...

Дўппини секингина папкага тиқдим.

- Нариги чўнтагингдаги нима?

Ўзи ёмон-да, сариқмашак! Калтак есаям жим ўтирмайди. Алам қилсин! Бир кўриб қўйсин! Керак бўлса ўзим ҳам велосипед сотиб оламан. «Динамо» магазинидан! Ёзда дадам билан шаҳарга тушганимизда кўрганман! Тўппа-тўғри! Шимни нима қиламан. Уйда бошқаси бор! Яхшиси, велосипед оламан.

Секин пулни чиқардим.

- Вуй! Абдувалининг кўзи олайиб кетди. Қаёкдан олдинг?
  - Нима ишинг бор?
- Шомуродов! Ҳозир синфдан чиқариб юбораман!
- Қаний! Абдували ўн сўмлик, беш сўмлик, уч сўмлик пулларни олиб пичирлаб санай бошлади.

Уч юз ўттиз икки сўм! – деди шивирлаб. – Нима олмокчисан?

- Велосипед.
- Э, етмайди. Велосипед тўрт юз эллик сўм туради.
  - Унда шим оламан.
  - Шомуродов. Чиқиб кет синфдан!

Шунча пулни Абдувалига ташлаб кетиб жинниманми! Энди пулга чанг солган эдим, бахтимга қўнғироқ жиринглаб қолди...

Дарс тугаши билан Абдували елимдай ёпишиб олди. Қаёққа борсам кетимдан эргашади. Папкамни кўтариб, ўрикзорга кирганимизда яна сўради:

- Қаёқдан олдинг шунча пулни?

Жаҳлим чиқиб кетди. Нима иши бор?

- Топиб олдим, бўлдими!

Абдували ғалати илжайди.

- Балки ўгирлаб олгандирсан?
- Нима?! Жон-поним чиқиб кетди.

Папкам билан бошига солмоқчи эдим, сап-сариқ киприкларини пирпиратиб ялинди.

- Хазиллашдим-ку, Музап?
- Яна шунақа ҳазиллашсанг, билиб қўй, вей!..
- Ростдан ҳам велосипед олмоқчимисан? У гапни бошқа ёққа бурди.
- Ўзинг етмайди, деяпсан-ку! дедим хафсалам пир бўлиб.
  - Етмайди. Яна камида юз сўм керак.
  - Унда шим оламан.
- Дадангга нима дейсан? Шимниям топиб олдим дейсанми! Дўппи топиб олсанг, шим топиб олсанг... Менга-ку бари бир... Даданг ўлдирса ўзинга қийин бўлади.

Ростдан ҳам. Бу ёгини ўйламабман. Дадам ўлдириб қўяр худди!

- Бўлмаса нима қиламиз? дедим иккиланиб. Абдували ҳам нима қилишни билмас экан. Анча ўйланиб қолди.
- Бўлди! деди бирдан бақириб. Папирос оламиз. «Беломор!»
  - Мен чекмайман.
- Ҳалиям-а? Абдували худди ҳар куни папирос чекиб юрган одамдек ҳайрон бўлиб кўзимга ҳаради. Маза бўлади. Уч юз ўттиз икки сўмга биласанми, ҳанча папирос беради. Бир пачкаси икки ярим сўм турса... Хў-ўп... У ўрик соясига ўтириб олди-да, ерга чўп билан чизиб ҳисоблади. Юз сўмга ҳирҳта, уч юзга бир юз йигирмата. Яна ўнтаси йигирма беш сўм... Хў-ўп... Бир юз ўттиз уч пачка бўларкан. Гугурти билан!
  - Вой-бў! Шунча папиросни қаёққа қўямиз!
- Бирданига олмаймиз-да! Абдували жон куйдириб тушунтира кетди. – Ҳар куни икки пачкадан! Битта сенга, битта менга. Қолган пулни бекитиб қўясан. Қани, чўз беш сўмни!
- ...Ўрикзор орасида Абдувалининг келишини пойлаб турдим. Кўнглим ғаш эди. Шунақа-ку, папирос маза бўлса керак. Дадам ҳар куни бир пачкадан чекади-ку!

Абдували икки чўнтагини дўппайтириб келди.

 - Юр! Гугурт ҳам олдим, - деди катта одамлардай куз ҳисиб.

Ўрикзордан ўтиб, автобус йўлига чиқдик. Кўтарма кейинги пайтларда анча обод бўлиб қолган. Кўча четида икки қаватли янги магазин қурила бошлаган. Йўлга асфальт ётқизилган, симёгочлар қўйилган. Дадамнинг айтишича, Оқсоқол бува ариза бера-бера охири раисликдан бўшагандан кейин колхоздан путур кетганмиш. Ҳатто Кўтарманинг бир қисми шаҳарга ўтиб кетибди. Мана бу-

нақа иморатлар қурилаётгани шундан экан. Агар шаҳар шунақа кенгайиб кетаверса, боғ-роғлар йўқ бўлиб кетармиш... Бир қавати битиб, иккинчиси чала қолган, ичида яримта-юримта пишиқ ғиштлар уюлиб ётган, эшиксиз бинога кирдик. Абдували папкасини оҳак юқи ёпишиб ётган ерга қўйди. Икки чўнтагидан икки пачка папирос, гугурт чиқариб, папкасини ёнига ташлади. ўишт уюмлари орасидан бутунларини танлаб, учтасини тахлади-да, устига ўтирди.

 - Ўтирмайсанми! – деди қовоғини солиб. – Кўчадан ўтганлар кўриб қолса, биласанми, нима бўлади?

Мен ҳам учта ғишт топиб, устига ўтирдим. У папирос қутилардан биттасини олди-да, тирноғи билан бурчагидан чимчилаб очди. Қутининг тагига бир чертган эди, папирос отилиб чиқди.

– Ол, ўзингникини! – деб буюрди.

Мен ҳам папирос қутисини очдим. Негадир қўлим титраб, қутининг елимлаб ёпиштирилган қоғози йиртилиб кетди.

– Кўриб қўй, ўв! – У папиросни бармоги билан эзгилади. (Дадам ҳам доим шунақа қилади). Кейин бандини чимчилаб огзига тиқди-да, гугурт чизди. Ўша заҳоти сариқ юзи қизариб кетди. – Во! – деди огзидан тутун чиқариб.

Хавасим келди. Гугурт чизиб папиросни тутатишим билан огзимга сассиқ тутун кириб, ўхчиб юбордим. Кўзим ачишиб ёш чиқиб кетди. Қизиқ, дадамдан анқиб турадиган тамаки иси бунақа кўнглимни айнитмасди.

– Жинни! – Абдували йўтала-йўтала кула бошлади. – Ичингга тортмайсанми! Ўшанда маза қиласан-да!

Папиросни нафасим етганча сўрган эдим, бутун вужудим таранг тортилиб, кўз ўнгим жимирлашиб

кетди. Қизиқ, энди кўнглим айнимади. Бошим ғувиллаб, негадир кулгим келарди.

- Ана, бўлди! Зўрми!

Папиросни ярим-ёрти чекмасимданоқ бошим гир-гир айлана бошлади. Кўча томондан гўнгир-гўнгир овоз келаётганини эшитиб ўрнимдан турмоқчи бўлдиму йиқилиб тушдим. Тагимдаги гиштлар тарақ-туруқ қилиб ерга ағдарилди.

– Жим! – Абдували шоша-пиша тепамга келди. Қутида қолған папиросни чўнтагига солди-да, қўлтиғимдан кўтарди. – Юр! Одамлар келяпти.

Хавода сузиб бораётганга ўхшардим. Қадамим енгил кўчади-ю, оёгим мўлжалга тушмайди. Худди туш кўраётган одамдай... Унга сари кулгим қистади...

Абдували мени эшигимиздан киргизиб юборди-ю, ўзи қочиб қолди. Айвонда хонтахтага мук тушиб дарс тайёрлаб ўтирган Омон, бурнини тортиб ялинди:

- Ака! Она тилимни ёзишворинг!
- Э, бор-е! дедим қўл силтаб. Ўзимнинг бошим айланиб кетяпти-ю, бу она тилини гапиради. Уйда бошқа ҳеч ким йўқ эди. Биламан, дадам, ойим ишда... Икки-уч йил аввал МТСлар ёпилганида ойим ишдан бўшаган эди. Кейин колхозларнинг ўзи тракторли бўлган. Ойим ҳар куни эрта кетиб, кеч қайтади. Дадам унданам кеч келади...

Папкани айвонга ташладим-да, уйга кириб, ўзимнинг сим каравотимга ётиб олдим. Кўзим ўзидан-ўзи юмилиб кетар, уйқум келарди. Негадир исиб кетдим. Шимимни ечиб, ерга ташладим-да, қайтадан каравотга ётдим. Қусгим келди. Кўз олдимда аввал папироснинг кўкиш тутуни, кейин қўқонлик ойим пайдо бўлди. Ухлаб қопман.

- ...Аллаким елкамдан чангаллаб силтади.
- Тур, бадбахт!

Кўзимни очишга улгурмай каравотдан учиб кетдим. Уй ичи қоронғи эди. Аввалига ҳеч нимага тушунолмай гарангсиб турдим-да, кейин қоронғида дадамнинг ғазабдан ёниб турган кўзларини кўрдим.

- Нима бу! Қаёқдан олдинг?!

Дадамнинг қўлида бир нима оқариб кўринарди. Қарасам, бояги папирос пачкаси. Вахимага тушиб юрагим сирқираб кетди. Ўзимни эшикка урмоқчи эдим, дадам билагимдан омбирдек қисиб олди.

- Нима гап? Остонада ойимнинг шарпаси кўринди. У шиқ этиб чироқни ёқди. Қўли хамир юқи эканини пайқадим. Чамаси ишдан келиб, хамир қораётганида шовқинни эшитиб уйга кирган эди.
- Қаёқдан олдинг? Дадам ғазаб билан пишқирди. «Беломор» қутисини бурним тагига тиқиштирди. Ростингни айт!
- Вой, дадаси, ўзингизники-ю! Ойим хамир юқи қўли билан дадамнинг билагига ёпишди. Нима қиласиз, болани қўрқитиб? Ўзингизники! Қаранг! Ўзингиз чекадиган попирис-ку!

Эшикдан Омон мўралади.

– Ўзимники? – Дадам бир қўллаб ҳамон билагимдан чангаллаганча иккинчи қўлидаги пачкани каравотга ташлади-да, чўнтагини кавлади. Ярим пачка эзгиланган папирос қўлига илашиб чиқди. – Ўзимники – мана! – деди қўлидаги пачкани зарда билан ерга улоқтириб. Ўша заҳоти каравот устида ётган пачкани юлқиб олди-да, папирос аралаш қулочкашлаб юзимга урди. – Мана сенга чекиш!

Ойим дод солиб дадамга осилди.

- Туҳмат қилманг! деди чинқириб. Ўзингизники. Эрталаб мен олиб келувдим. Урманг болани!
- Нима? Дадам деразаларни зириллатиб ҳайқирди. – Сен обкелган бўлсанг, бунинг чўнтагида нима қилиб юрибди?! – У билагимни янаям қат-

тиқроқ қисиб, ерга энгашди. – Манави шунинг шимими ахир! Мана шуникими? – У ғазаб билан шимимни юлқиб кўтарди. Бир силкитган эди, шимимнинг чўнтагидан ўн сўмлик, беш сўмлик пуллар тушиб, наматга сочилиб кетди. Дадам, ухлаб ётганимда фақат папиросли чўнтагимни кавлаган, пулни кўрмаган экан. Турган жойида серрайиб қотиб қолди.

Ойимнинг ранги қув ўчиб кетди. Гоҳ ерда сочилиб ётган пулга, гоҳ дадамга, гоҳ менга қараб лаблари титрай бошлади. Омон ҳайрон бўлиб бурнини тортиб қўйди.

- Қаёқдан олдинг? Дадамнинг мўйлови титрай бошлади. Қаёқдан олдинг шунча пулни? деди қўрққувли паст оҳангда. Билагимдан бир силтаб ўзига ёпиштириб қўйди. Димогимга таниш тамаки ҳиди урилди. Қизиқ, негадир яна чекким келди.
- Қаёқдан ол-динг? У шундай бақирдики, қулоғим ёрилиб кетай деди.
- Қўйинг, жон дадаси! Ойим титраб-қақшаб орамизга суқилаётган эди, дадам тирсаги билан туртди:
  - Нари тур! Қаёқдан олдинг?
  - Топиб олдим, дедим ерга қараб.
  - Шунча пулни-я! Қачон! Соат нечада? Қаерда?Яна ерга қарадим. Қайсарлигим тутиб кетди.
  - Айтмайман! дедим бақириб. Айтмайман!
- Шунақами ҳали! Дадам яна тарсаки туширди. Мана! деди оғзидан тупук сачраб. Бир қўллаб шимининг энли камарини еча бошлади.
- Дадаси! Ойим чумчуқдек чирқиллаб, дадамнинг камар ечаётган қўлига ёпишди. Урманг! Иккинчи қилмайди!

Остонада мўралаб турган Омон йиглаб юборди.

- Қоч! Дадам елкаси билан ойимни туртди. Ширт этиб камарини суғуриб олди-да, икки буклаб бошим устида кўтарди.
- Айт! деди хириллаб. Ичагингни суғуриб оламан, итвачча!

Ажаб, негадир илтижо билан йиглаб турган қуқонлик ойим куз олдимга келди.

- Ўғирладингми?! Дадам камар билан қарсиллатиб гарданимга туширди.
- Ҳа! дедим чинқириб. Ўғирлаб олдим! Ўғирладим!
- А! Дадамнинг қисқа, тахдидли ҳайқириғи аралаш елкамга яна камар тушди. Бу гал шунақанги зарб билан урдики, ўпкам оғзимга тиқилиб қолай деди. Мана ўғирлаш! Мана!

Ойим чинқирганча дадамга ёпишди. Омон турган жойида қичқириб йиғлади:

- Урманг, дада, урманг!
- Йўқол! Дадам қўлини силтаб юборган эди, қайишнинг темир сўқаси ойимнинг чаккасига тегди. Ойим оҳ чекканча чўккалаб қолди. Аммо ўша заҳоти гандираклаб туриб, мени қучоқлади. Чаккасидан қон сизиб юзига оқди.
- Қўйворинг! деди чинқириб. Ўлдириб қўясиз-ку, болани, қўйворинг!
- Ўлсин! Иснод келтирадиган бола керакмас менга! Дадамнинг оғзидан оппоқ кўпик чиқа бошлади. Кетсин! деди овози ингичкалашиб. Йўқолсин! Йўқол. Қадам босма уйга!

У қўлимни қўйиб юборди. Тутқаноқ тутган одамдек икки қўли силкина бошлади. Қайиш ерга тушди.

– Кетаман! – дедим кафтим билан бурнимни чангаллаб. – Кетаман! Қўқондаги ойимнинг олдига кетаман.

Қочмадим. Секин-секин кавшандозга бордим-да, эски туфлимни оёғимга илдим.

– Музаффар! – Ойим дахшатдан кўзи олайиб мен томонга отилди. Дадам ҳолсизланиб, ерга ўтириб қолган, оёқ-қўли баравар қалтирар эди.

Ойим қўл чўзиши билан айвонга, ундан ҳовлига отилдим.

– Музаффар! – Ойимнинг чинқироқ овозига Омоннинг йигиси қушилди. – Ойи! Дадам йиқилиб тушдила, ойи!

Кўчага югуриб чиқдим. Дуч келган томонга чопиб кетдим. Ҳали ой чиқмаган, кўчалар қоронғи, жимжит эди. Елкамнинг ачишиб огриётгани, оёгим совқотаётганини пайқадим. Майка-трусида эканимни энди билдим.

Орқада, кўча бошида ойимнинг чақиргани эшитилди:

- Музаффар-у-у!

Худди ойим қувиб етадигандек чопиб кетдим. Туфлимнинг ипи товонимга ботиб ғашимни келтирар, аммо тўхтагим келмас, юрагим кўкрагимдан отилиб кетгудек гурсиллар, чанқаган эдим.

«Кетаман! Қуқондаги ойимнинг олдига кетаман. Ойим урмайди мени!» Шу гап хаёлимга келиши билан қуқонлик ойимни ҳам ёмон куриб кетдим. Ҳаммаси шуни деб булди! Пул бермаса шунча гап йуқ эди. Ҳали дадам дуппини куриб қолса нима қиларкин! Папкада, «Зоология» китобининг ичида турибди. Қуқонлик ойим аввал келганида ҳам жанжал булганди. Бари бир, дадамниям ёмон кураман. Нега уради? Уғирлаб олганим йуқ-ку!

Бир маҳал ваҳимали шовиллашни эшитиб туҳтаб қолдим. Алвасти кӱприкка кепқопман! Қӱрққанимдан жонҳолатда темир йӱл томонга югуриб кетдим. Узоқдан учта чироқ кӱринди. Яқинлашиб келаётган поезднинг тарақа-туруқ овози эшитилди. Поезд томонга жоним борича чопдим. Кетаман! Поездга осилиб бӱлсаям Қӱқонга кетаман!

Тор сўқмоқдан югуриб борарканман, гуллаган наъматаклар юз-кўзимга тикан санчар, аммо огриқ сезмасдим... Тезроқ чопсам поездга етиб оладигандек эдим. Бари бир етолмадим. Темир йўлга яқин борганимда поезд аллақачон узоқлашиб кетган эди. Яна Бўрижарнинг вахимали гувуллаши эшитилди. Шағал кўтармадан чиқиб бораётиб, икки марта мункиб кетдим.

Темир йўл устига чиққанимда «Қора аммам» эсимга тушди. «Аммамникига бораман! «Қора аммам» яхши!»

Шовиллаб турган қамишзордан ўтаётганимда баттар қўрқдим. Худди қамишлар орасидан биров пусиб чиқиб келаётгандай... Аксига олиб нуқул ботинкам сассиқ балчиққа ботади. Қурбақалар тинимсиз вақиллайди. Аллақаерда бойқуш «ҳув-ҳув» қилади. Ниҳоят Нўғайқўрғон чироқлари кўринди.

Пастак эшикни тақиллатавериб, қўлим оғриб кетди. Ниҳоят ичкаридан «Қора аммам»нинг ҳарсиллаб нафас олиши эшитилди.

- Кимди? деди яқин келиб.
- Очинг, «Қора амма», менман, дедим ҳовлиқиб.

Аммам шоша-пиша занжирни туширди. Қоронғи бўлсаям қўрқиб кетганини, нуқул ёқасини очиб кўксига туфлаётганини кўрдим. Ичидаги «одамчалар» бор овозда ҳуштак чала бошлади.

Вой, вой ўлмасам! – деди ҳансираб. – Вой шўрим! Гапирсанг-чи, нима бўлди?

- Ўзим! дедим илжайиб. Қўрқманг, амма!
   Ичкарига олиб кирганидан кейин баттар ваҳимага тушди.
- Нима бўлди? деди яна чирқиллаб. Ким ўлди? Қарасам, аммам ўзини ташлаб юборадиган. Дарров ўзимни босиб олдим. Тўгри-да, йигит бўлиб қолганмиз биз ҳам!
  - Ўзим... дедим юпатиб. Сизни кўргани келдим.
- Йўқ, бир гап бўлган. Айтақолсанг-чи, болам! Шунча кўргилигим етмасмиди... У йигламоқчи бўлди-ю, кўзига ёш келмади. Нафаси қайтиб жимиб қолди.
- Ўзим, «Қора амма», ўзим, дедим бақириб. Ҳаммалари яхши.

Аммам сал-пал ҳушига келди. Лекин бари бир ишонмади. Кўринишим ҳам ҳалигидаҳа бўлса керакда. Майкачан, трусичан... Оёғим лой.

У шоша-пиша обдастада сув олиб келди. Ўзим юваман десам ҳам кўнмасдан, сув қуйиб турди.

– Музлаб кетибсан-ку, – деди нафаси ғижиллаб.– Тинчликми?

Яна илжайдим.

- Тинчлик дедим-ку, амма, қўрқманг.

У анчадан кейин бир оз ўзига келди.

– Вахиманг қурмасин, кўпайгур! – деди кўрпага ўраб бошимга ёстиқ қўяркан. – Ўтакамни ўн бўлдинг-ку! – Шундай деб коса кўтарганича мункиллаб ошхонага кетди.

Илиққина кўрпага ўралиб ётарканман, уйни томоша қилдим. Қаммаси ўша-ўша. Шифтда қалдиргоч ини. Иккита қалдиргоч бошини чиқариб мўралаяпти. Қали тухум қўймаган, тухуми бўлса безовталаниб қоларди. Пашша ўтириб дог бўлиб кетган олмадек лампочка атрофида чивинлар гужгон уради. Девордаги михларга беҳилар илиб

қуйилган. Қишда келганимда куп эди. Энди саккизта қопти. Деворда иккита сурат. Салла ўраган бобом билан дуппи кийган Кимсан акам. Қизиқ, қозир Кимсан акамдек йигитлар соч қуяди. Кимсан акамда йуқ... Катта булсам менам соч қуяман, полбокс! Аммам инқиллаб ярим коса мошкичири иситиб кирди. Устида кукпиёзиям бор.

Қорним оч эди. Мошкичири ширин экан.

– Юрагимни ёрдинг-а, болам, – деди аммам, ич-ичига тушиб кетган чакакларини аранг қимирлатиб. – Бугун бормоқчи эдим, қувватим етмади. Чолим билан Кимсаним тушимга кирибди. Икковиям безовта бўлиб юрибди, қизимга бир гап бўлди, девдим. Ростини айт. Нима бўлди ўзи?

Негадир қўқонлик ойим яна кўз олдимга келди. Йиглаб тургани, ялингани... Кейин... дадамдан калтак еганим...

- Амма! Бир нарса сўрасам ростини айтасизми?

Худди катта одамлардек салмоқлаб гапирдим шекилли, аммам ҳайрон бўлиб кўзимга ҳаради.

- Сўра, болам, сўрай қол, деди шоша-пиша. –
   Қачон сени алдабман.
  - Менинг ойим ким?

Аммам оғзини очиб анграйиб қолди. Ичидаги «одамчалар» ғижирлаб ҳуштак чала бошлади.

- Ким? дедим кўзига тикилиб.
- Нимайди?
- Қўқонга кетаман. Менга пул беринг.

Аммам, жавоб бериш ўрнига, негадир юзини бурди. Бошидан рўмолини сидириб олди-да, тиззасига ташлаб, қинғир-қийшиқ бармоқлари билан гижимлай бошлади. Юзи янаям қорайиб кетгандек бўлди. Қизиқ, бултур кеч кузда дадам билан колхоз полизига борганимиз эсимга тушди. Ўшанда, устига қиров тушган қора тарвузларни кўрган

эдим. Аммамнинг боши худди ўшанақа – қиров тушган тарвузга ўхшаб кетди: сочи оппоқ, юзи қоп-қора...

Чуқур жимлик чукди. Шифтдаги лампочка атрофида парвоналар унсиз айланади. Инидан муралаган иккита қалдирғоч «вийт-вийт» деб бир-бирини нари-бери суради. Ховли томонда мушук беозор миёвлади. Бехи иси аралаш исириқ ҳиди анқийди. Девордан Кимсан акамнинг сурати кулимсираб қараб турибди. Ҳусан бувам қовоғини солаётганга ўхшайди. Аммам гапирмайди. Фақат томоғи ҳуштак чалиб, энтикиб-энтикиб нафас олади.

Бир маҳал у қаддини ростлади. Нурсиз кўзларини кўзимга қадади.

- Овқатингни емадинг-ку! деди бўш косага имо қилиб. Кейин негадир жилмайди.
- Кимсаним келади! деди тўсатдан. Агар бу дунёда инсоф деган нарса бор бўлса келади! Чолим рахматли ўглини кўрмади. Уруш битганига қанча бўлди... У хол-хол дог босган бармоқларини титраб санади. Узоқ санади уруш битганига қанча бўлганини. Кимсан акам урушга кетганида неча ёшда бўлганию хозир неча ёшга етганини... Сўнг жилмайди. Чакаклари тиришиб, кўзида нур пайдо бўлди. Кимсан аканг келиши билан тўй қиламиз. Келинникига тўйни сен оборасан, хўпми! Қўй етаклаб борасан. Сенга тўн кийгизишади. Қуда томон тўн кийгизиб, белингга қийиқча боглайди...

Аммам қизиқ. Мен нимани сўраяпману у нима деяпти? Аммамнинг харсиллаб нафас олганча бир оҳангда гапириши таъсир қилдими, чарчаган эканманми, лампочка атрофида муттасил айлана-ётган парвоналарга тикилиб ётиб ухлаб қопман...

Кўзимни очсам, хонтахта олдида «Қора аммам» билан ойим секин-секин гаплашиб, чой ичиб ўти-

ришибди. Ойим пешанабогини пастроқ танғиб олибди. Чаккасига пахта қўйиб боглаган шекилли, ўша жойи дўппайиб турибди. Қимирлаган эдим, елкам ачишиб огриди. Кеча дадамдан калтак еганим, Қўқонга қочиб кетишим кераклиги эсимга тушиб, қовогимни солиб олдим.

- Мактабингга кеч қолдинг-ку, Музаффар, деди ойим ҳеч нима бўлмагандек хотиржам оҳангда. Кечаси билан қидирмаган жойим қолмади. Одамни бунақа қўрқитмагин-да, ўғлим...
- Кеса бувисиникига кепти, санга нима! «Қора аммам» ойимни жеркиб берди. Эрингга айтиб қуй, хоҳласа ҳар куни келади. Турақол, болам, ширчойинг совиб қолади.

Қовоқ-тумшуғим осилиб ҳовлига тушиб кетаётганимда «қора аммам»нинг гапини эшитиб қолдим.

– Шомуродга айтиб қўй: шу болага яна бир марта қўл кўтарса, у дунёю бу дунё норози бўламан. Чолим тушимга кириб юрибди. «Бир кун йўгимга аҳволинг шуда», деб чирқиллаяпти. Бувангни арвоҳидан қўрқмайсанларми!

Ойим овозини пасайтириб, бир нима деди, эшитмадим.

### ЎТТИЗИНЧИ БОБ

#### РАЪНО ХИКОЯСИ

#### Ширин ёлгондан аччиқ ҳақиқат афзал

Бўлди! Ҳаммаси тамом бўлди! Етар ахир! Одам бировни алдаши мумкин. Аммо ўзингни ўзинг алдай олмайсан. Осмондаги юлдузни узиб олиб бўлмайди!

...Мени шу кўйга анави беномус Закунчи солди. Начора! Яхшиликнинг ҳам, ёмонликнинг ҳам

поёни бўлади. Ўша – уч йил олдинги ғалвадан кейин у ҳам алдовга чек қўйди. «Ўнг қулоқ, чап қулоғинг билан эшитиб қўй, болангни олиб келмайман, хоҳласанг Насибани ташлагин-да, кетавер», деди. Иши кўпмиш, акасининг йиллик маъракасини ўтказиши керакмиш. Нимаям дердим? Рост, ҳаммаси тўғри. Қайноғам оталик қилди. Унга эмас, менга! Шу одам бўлмаса, Ойсара опам бўлмаса, бу имонсиз мени ердан чиққан замбуруғдек бир босиб, пачақлаб ташларди. Тирикларни ҳурматлаган одам, марҳумларни иззат қилади. Азборойи қайноғам ҳаққи, азбаройи Ойсара опам ҳурмати ҳамма маъракаларда туриб бердим. Ойсара, бечора Ойсара опам, ўз ғами ўзига етмагандек, менинг қўлтиғимга кирди.

«Хурсанд бўлинг, жон синглим! Ўғлингиз тирик экан, шунга шукр қилинг. От айланиб, қозиғини топади. Бир куни сизни ўзи топиб келади...» Доим шунақа дейди.

Анави муртадга қолса, Йўлдошхонни вокзалда ҳаммол қилиб ишлатиб, пулини киссага урмоқчи эди. Қўймадим. Ойсара опага ялиниб-ёлвордим. «Институтга кирсин, мен ёрдам бераман», дедим. Йўқ. Йўлдошхонни мен ўқишга олиб кирмадим, ўз кучи билан ўқияпти. Бироқ мен ҳам алдовга алдов билан жавоб қилдим. Бор буд-шудим – узугим, билагузугим, зиракларим – ҳаммасини сотдим! Ҳаммасини! Топган пулимни Ойсара опага бердим.

Бу бўлса, ҳалиям Маржа опадан унадиган ўн мингни кутиб юрибди. Тўгри, менга ишонмай, Тошкентга неча марта қатнади. Қўлидан нима келарди?.. У билган қонунларни мен ҳам сув қилиб ичиб юбордим. Қонун шунақа эканки, бир одам иккинчи бир одамнинг уйида беш йил яшасаю ер солиғи, страхование солиғи, яна қатор-қатор солиқларни тўласа, уй ўшанинг номига ўтиши мумкин экан.

Маржа опага тайинладим. «Даъвогардан бошқа ҳеч ким билан гаплашмайсиз», дедим. Закунчи – одамгарчилик қонунидан бўлак жамики кодексаларни биладиган Умар ака энди менга ялинишга тушди. Ялин! Ялинавер! Ҳаммаси аллақачон ҳал бўлган. Ҳамма ҳужжатларга қўл қўйиб бўлганман!

На иложки, қўл қўйиб бўлмайдиган қонунлар ҳам бор экан! Кирмаган кўчам қолдими ўзи? Бош суқмаган эшигим-чи? Ҳамма жойда, ҳамма адвокатураю судда бир хил гап айтишди.

«Бола катта бўлсин, ўзи ҳал қилади».

Мен гўл эмасман. Овсар эмасман. Қайси эшикка кирмай, эркакдир-хотиндир бир хил савол беради:

«Кетиб қолганингизда бола неча ёшда эди?»

Ёш нима қилади! Уч ойлик эди-ку, тўқсон кунлик! Тутилиб-тутилиб шуни айтишим билан елкасини қисади. «Хўш. Нима дейсиз? Болада нима ҳаққингиз бор?»

Ажаб дунё экан! Энг бебахо нарсангизни йўқотиб қўйсангизу уни бировнинг қўлида кўриб, шу меники деб даъво қилсангиз, хукмни ажрим қиладиганлар эса, «ўн тўрт йилдан бери қаёқда эдингиз», деса нима қиласиз? Ахир мен ўшандан кейин ҳам келдим! Кўп келдим! Мол пойлаган ўгридек ўз боламни чекка-чеккадан кўриб, йиглаб-йиглаб кетдим.

Бугун-чи! Бугун ҳамма умидим пучга чиҳди. Аввал боши анави заҳар-заҳҳум директор, «бу ишни суд ҳал ҳилади», деб жеркиб берди. Устига-устак «ота-онаси бор», деб Шомурод билан анави Робияни эслатди. Назаримда Музаффар директор олдида уялиб кетгандек бўлди. Ўз болам, мендан – онасидан номус ҳилди. Кейин... «тинч ҳўйинг», деб ер тепинди. ҳизиҳ, боламнинг кўзларида ғазаб эмас, нафрат эмас, аллаҳандай бегона бир туйғуни кўр-

дим. Йўқ! Музаффар ҳеч ҳачон менга ўғил бўлмайди! Қўқонга обқочиб кетади, деб қўрҳди. Хўп, алдаб-сулдаб обордим ҳам дейлик, анави оталик ҳиладими боламга! Бағрига босадими? Йўҳ! Икки дунёда ҳам! Шуни биларканман, нега ёлғон гапирдим? Насиба сени соғиняпти, акам ҳачон келади, деб кутяпти, дедимми? Нима кераги бор эди шу гапнинг. Ахир ҳизим уни кўрарга кўзи йўҳ-ку! Умар ака Насибани аллаҳачон Музаффарга ҳирпичоҳ ҳилиб ҳайраб ҳўйган-ку! Нима ҳиламан иккала болани баравар ҳийнаб!

...Болам... Музаффарим йигит бўп қопти. Мўйлови сабза урибди. Овози дўриллаб қолибди... Виждонсиз чўлоқ! Ақалли шу куни ясантириб қўйса ўладими! Анави шаллақи Робия жиллақурса туғилган кунида болага йиртиқ шим кийгизишга уялмайдими? Золимми, аблаҳми, отаси Насибага ҳар йил туғилган куни бош-оёқ сарпо қилади-ку! Ўғлим бўлса почаси илма-тешик шим кийиб юрибди. Туғилган кунни қаёқдан билади қишлоқи Робия! Боланинг кўнглини олиш хаёлига келадими тўпори чўлоқнинг! Яхшиям чўнтагига пул солиб қўйганим. Билиб қўйларинг! Боланинг кўнглини сенлар ололмасанг, хурсанд қиладиган онаси бор!

Қаерга келиб қолдим! Ажаб, ўзимизнинг кўча-ку! Янги маҳалла. Тор кўча. Пахсадеворлар орқасидан довучча туккан ўриклар мўралаб турибди.

Қизиқ, инсон умри шунақа тез ўтарканми? Кечагина эмасмиди, шу кўчада қўшни қизалоқлар билан сопалак ўйнаганимиз! Кечагина эмасмиди шу кўчадан Бешболабойнинг ҳовлисида очилган мактабга югурганимиз! Деворга осилиб довучча ўгирлаганимиз, кечагина эмасмиди?

Кейин Текстилга борганим... Шомурод ака билан танишганим... Ўшандаям бировдан уялгандек

ерга қараб турарди. Мана шу сада тагигача кузатиб келарди-да, «Раънохон, борақолинг, қўни-қўшнилар гап қилиб юрмасин», деб хайрлашарди. Ҳатто қўлимдан ҳам ушламасди.

Кейин карнай-сурнай билан тор кўчани тўлатиб келишди. Қирқ биринчи йилнинг Биринчи май байрамига менинг байрамим қўшилиб кетди. Уруш... Қор тушган куни оёғига осилиб йиглаганим... Ундан кейин Умар ака... Тўшакка ёпишган онам...

Оёқ-қўли шишиб кетган онам ўлаётганида қизиқ гап айтди. Негадир менга эмас, ўзбекчани бинойидек тушуниб қолган Маржа опага қараб гапирди.

«Маржа, қизим! Таомилда ўғил бўлмаса қайнонани куёв ерга қўяди. Шомуродим урушда. Васиятим шуки, кафанимга номахрам эркакнинг қўли тегмасин!»

Умар ака ўшандаям хиёнат қилди. Онамнинг рухини оёқ ости қилиб, худди куёвдек, йўқ, хўжаликнинг отасидек онамни ўз оёги билан тепкилаб кўмди. Ота эмиш! Ўз «қизини» йўлдан урган «ота»!

Тамом бўлди! Бугун ҳаммаси тамом бўлди! Нима қилай? Осмондаги юлдуздек узоқлаб кетган ўғлим деб қизимдан — Насибадан айрилишим керакми? Бугун Музаффар очиқ-ойдан айтди-ку! «Тинч қўйинг», деди-ку! Жавобимни олдим, бўлди-да! Мингта ширин ёлғондан битта аччиқ ҳақиқат афзал! Ойсара опам тўғри айтади: Музаффар эрта-индин эсини таниб олади. От айланиб қозиғини топади. Энди келмайман. Бўлди! Нима қиламан болани қийнаб? Аммо хат ёзиб тураман. Керак бўлса Шомурод акага, Робияга ёзаман. Инсофи бордир ахир! Одам-ку, улар ҳам. Тушунар аҳволимга...

#### ЎТТИЗ БИРИНЧИ БОБ

# ЎНИНЧИ СИНФ ЎҚУВЧИСИ МУЗАФФАР ШОМУРОДОВ ХИКОЯСИ

## «Минавар, Минавар – чўнтагингда нима бор?»

Эртага ё Шерзод ўлади, ё мен. Бўлар иш бўлди! Ўлсам ўламан, аммо йўл бериш йўк. Биламан Шерзод сузишга уста. Нима қилгандаям Нўгайқўргонда катта бўлган. Бўрижарда кўп чўмилган. Мен сузишни билмайман. Гаровнинг шарти ёмон: Алвасти кўприкдан Бўрижарга калла ташлаб, сузиб чиқиш! Калла ташлаш у ёқда турсин, кўприкка яқин борган одамнинг вахми келади. Сув кўприк тагига кириб кетаётганида, айникса, кутуриб оқади. Нариги томони эса - саёз. Қамишзор четида тўнкалар, аллақаёқдан келтириб ташланган бетон плиталар, темир арматуралар қалашиб ётади. Кўприк тагига кириб кетдингми – тамом. Тирик қолмайсан. Сув куч билан обориб урадию парча-парча қилиб ташлайди. Уч йилдирки, шу йўлдан Нўгайқўргондаги «катта мактабга» қатнайман. Бултур бахорда сув ўртасида арматурага санчилиб, шишиб ўлиб ётган қўйни кўрганман. Худди сихга тортилгандек қорнидан арматурага илиниб, сасиб кетган.

Ўзим кичкиналигимдан Алвасти кўприкни ёмон кўрардим. Дадам билан «Қора аммам»никига келганимда ҳам, кейин ҳам шу ердан ўтишга юрагим безилларди. Мана, охири...

Э, нима бўлса-бўлди! Шерзодга ютқазгандан кўра ўлганим яхши! Шу болани саккизинчи синфга келганимдаёқ ёмон кўриб қолганман. Олифта,

соат тақади. Дадам районода ишлайди, деб мақтанади-да! Балки Минавар бўлмаганида Шерзод билан уришиб қолмасмидик... Йўқ, Шерзод орага суқилмаса Минавар меники бўларди. Ҳаммасига шу айбдор. Аҳмоқ эканман-да, Минаварни шу олифтага бериб қўйиб! Олишаман, охиригача олишаман.

Аслида, бошқа синфдошларим билан Чилонзордаги мактабга ўтсам бўларкан. Еттини битирганимизда Сулаймон ака айтди: «Кўтарманинг бир қисми шаҳарга ўтди. Чилонзордаги мактабга бориб, ўнни ўша ерда битиринглар», деди-ю, дадам билан ойим кўнишмади. «Хар куни автобусга осилиб юрасанми, Нўгайқўргон ўзимизники, вақт-бевақт мактабингга кириб турамиз», дейишди. Ўттизта боладан фақат икки киши мен билан Абдували Нўгайқўргонга қатнайдиган бўлдик. Йўл яқин. Фақат қиш кунлари мактабдан қайтаётганда кеч бўлиб кетади. Абдували иккаламиз келамиз. Келамизда, Алвасти кўприкка яқинлашганда жимиб қоламиз. Аммам айтиб берган вахимали гаплар эсимга тушади. Кўприк тагидан алвасти чиқиб келаётганга ўхшайверади. Биламан, Абдувалиям ўша томонга қараб-қараб қўяди. Лекин иккаламиз хам қўрқаётганимизни сездирмаймиз. Ёнгоқзор ичига киргандан кейин ҳеч нима бўлмагандай, яна гаплашиб кетаверамиз: у ёги ўзимизники! Йўк, кейинчалик кўникиб кетдик. Қоронғидаям Алвасти кўприкдан бемалол ўтадиган бўлдик.

Янги мактабга келганимизда саккизинчи синфдаги болалар ҳам, қизлар ҳам бизга ола қараб юришди. Нима қилсаям улар кўпчилик, етти йил бирга ўқиган. Бизлар икки киши. Орқадаги партага ўтириб олганмиз. Ҳеч ким биз билан гаплашмайдиям, ўйнамайдиям. Ўшанда «Қора аммам»никида кўрган бир воқеа эсимга тушган эди. Бир куни аммамникига борсам, катакдаги ўнтача товуқ битта чипор товуқни ўртага олиб чўқилаяпти. «Кишт-кишт» деб ҳайдасам ҳам парво қилмайди. Аммамдан нимага бунақа деб сўрасам, тушунтирган эди. «Битта минорка товуқ обкелувдим, бу ўлат теккурлар бегонасираб чиқиштирмаяпти».

Янги мактабда Абдували иккаламиз ўша чипор товуқнинг аҳволига тушиб қолдик. Ўзимнинг мактабимда бўлсам-ку, кузир бўлиб юрардим! Бу ерда гинг десам, ҳаммаси биргалашиб талайди. Тағин кўпчилиги – болалар. Фаҳат саккизта ҳиз бор. Ҳаммаси қора-ҳура ҳизлар. Ундан кўра ўзимизнинг кўтармалик ҳизлар чиройли эди. Булар таппига ўхшайдими-ей... Фаҳат Минавар бошҳача. Юзи оппоҳҳина, киприклари узун-узун, кўзлари одамга «бир нима демоҳчимисан», дегандай ҳараб туради. Ҳамма ҳизлар сочини майдалаб ўриб, учига пилик таҳиб юрса, Минавар чиройли ҳилиб турмаклаб олади. Биринчи партада ўтиради. Ўҳитувчилар ҳайси фандан сўрамасин, секин ҳўлини кўтариб, доскага чиҳади. Нима ҳилсаям шаҳарлик-да!

Қўзивой деган бола бор. Ўзи муштдек, калласи хумдек. Доим Шерзодга эргашиб юради: ҳар нарсадан хабардор, ўлгудек маҳмадана. Ўша Қўзивойнинг айтишига қараганда Минавар аввал шаҳарлик эмас экан. Нўғайқўргонда туришаркан. Учинчи синфда ўқиётганида уй ичи билан Текстил томонга кўчиб кетишган экан. Минавар мактабни ўзгартиргиси келмай ўша ердан қатнаб ўқиркан. Ўзиям бошқа қизларга ўхшамайди. Кам гапиради. Танаффус пайтида синфдан чиқмай китоб ўқийди. Ўзи энг чиройли қиз-ку, оти хунук: Минавар! Шуям от бўлдию!

Янги мактабда эски қилиқларимни ташлашга мажбур бўлдим. Лекин бир умр мум тишлаб юролмайман-ку! Бултур, тўққизинчи синфда ўқиётганимда худди ўша Минаварга тегажоғлиқ қилгим келди. Катта танаффусда қарасам, биринчи партада ўтириб олиб, китоб ўқияпти.

– Нима қиляпсан, ўв? – дедим нима қилаётганини билиб турсам ҳам атайлаб.

Минавар ҳайрон бўлгандек, узун кирпикларини пирпиратди.

- Китоб ўқияпман, деди секин.
- Қанақа китоб?
- Физика...
- Э, бошингга урасанми, физикани!
- Энг керакли фан-ку! Космосга «Лайка»ни учирган олимлар физик-да!

Гапини қаранг. «Лайка» учирилганини мен билмайдигандек! Энсам қотди.

- Нима, олим бўлмоқчимисан, сенам?

Минавар елкасини қисди.

- Олим бўлиш шартми?
- Сендан икки дунёдаям олим чиқмайди! дедим жиғига тегиш учун. Биласанми, сен кимсан: Минаварсан! Минавар, Минавар, чўнтагингда нима бор? Сичқоннинг ини бор, каламушнинг думи бор! Думингни битта кўрсат!

Минаварнинг оппок юзи қизариб кетди. Йиғлаб юборишини кутиб турган эдим, йиғламади.

– Биринчидан Минавармас, Мунаввар, – деди узун киприкларини пирпиратиб, Мунаввар – нурли дегани. Иккинчидан... – У бир зум кўзимга қараб турди-да, негадир аламлироқ кулди. – Ёш болага ўхшайсан-а, Музаффар! Ундан кўра яхшироқ ўқисанг-чи!

Агар у йиғлаб юборганида ёки ўзимизнинг мактабдаги қизларга ўхшаб, «Э, башаранг қурсин!» деб

қарғаганида маза қилган бўлардим. Худди катталардек дашном беришидан эсанкираб қолдим.

– Хўв, келгинди. Нима деб бировнинг бошини айлантиряпсан!

Қулоғим тагида дўриллаган овоздан чўчиб тушдим. Қарасам, шундоқ ёнимда Шерзод турибди. Сочи силлиқ таралган, қўлида соат. Назаримда Минавар кулиб қўйгандек бўлди. Чўчиб кетганим ўзимга алам қилди.

- Хўжайинмисан! - дедим бўйнимни чўзиб.

Ўзимни ўнглагунча бўлмай тумшуғимга мушт тушди. «Вой олифта-ей, ҳали шундан калтак ейманми? Уриш мана бунаҳа бўлади», дедим-да, тасир-тусур ҳилиб солиб кетдим. Шерзоднинг силлиҳ таралган сочи юзига ёйилиб тушиб, ҡўзини тўсиб ҳўйди. Қорнига тушган мушт зарбидан обкашдек икки букилиб ҳолди. Ўша заҳоти синфга ўнтача бола ёпирилиб кирди. Қўли етгани урди, ҳўли етмагани тепди.

Минаварнинг партасига суяниб олганча дуч келганини мушт билан «сийлаб» турган эдим, орадан Қўзивой отилиб чиқди.

– Қоч ҳамманг! – деди болаларни нари-бери итариб. Партага суянганча нафасимни ростлаб олдим. Шерзод доска олдида кафти билан юзини чангаллаганча чўнқайиб ўтирар, тўхтовсиз ихрар эди.

Қўзивой ҳаммани ҳар ёққа суриб, уч-тўрт қадам орқага – Шерзод чўнқайиб ўтирган доска томонга тисарилди. Нима қилмоқчи бу гуржи-пакана! Қўлидан нима келарди?

– Қўйинглар, бўлди! – Минавар ранги қув ўчганча ўрнидан туриб кетди. – Бор жойингга! Боргин сенам, – деди менга илтимос қилиб. Кўзимга шундай маъноли қарадики, ўзимнинг «хўрозлигим» дан ўзим уялиб кетдим. Энди бурилиб кетмоқчи эдим, эшик олдида турган Абдували бақириб қолди.

### - Музаффар!

Ярқ этиб ўгирилиб қараганимни биламан, Қўзивой сузонғич қўчқордай бошини ичига тортиб учиб келди-да, икки қадам қолганида қаддини ростлаб, тўсатдан сапчиди. Юзим жиқ этганини салпал эшитдиму кўзим қоронғилашиб Минаварнинг устига чалқанчасига йиқилдим. Синфда қаҳқаҳа портлади. Минаварнинг тиззасига ўтириб қолган, оёғим осмондан бўлиб, парта устида типирлар, Минавар «турсанг-чи», деб елкамга туртар, бурним ачишар, болалар бўлса маза қилиб кулишар эди. Абдували югуриб келиб қўлимдан тортди. Парта устидан ошиб ерга тушдим. Бошим айланар, юзим ачишар эди.

– Бурнинг қонаяпти. – Абдували чўнтагидан рўмолча олиб узатди. Қўзивойга ташланган эдим, болалар орасига ўзини урди.

Қўнғироқ жиринглади. Болалар пилдирпис бўлиб, жой-жойига ўтиришди. Шерзод ҳам қорнини чангаллаганча ўз партасига кетди. Абдували қўлтиғимдан олиб орқа партага судраркан, Минаварга қарадим. У тирсакларини партага тираганча, кафти билан юзини тўсиб ўтирарди.

Ўша куни дарсдан чиқсам, Абдували иккаламизни мактаб дарвозаси олдида йигирматача бола кутиб турибди.

Шерзод ёнимга келаётган эди, папкамни Абдувалига узатдим.

– Битта-битта! – дедим мушт тугиб. Яхши бўлди! Сулайиб қолгунимча олишаман. Бошқалари майли-ку, айниқса, юзимга калла уриб, бурнимни қонатган анави Қўзивойнинг хумдек бошини ёрмагунча тинчимайман.

Абдували икки қўлида иккита папка билан Шерзоднинг йўлини тўсди.

- Қуйинглар, нима кераги бор?
   Шерзод қули билан Абдувалини нари сурди.
- Қўрқма, деди дўриллаб. Урмайман. У кафти билан сочини текислаб менга юзма-юз келди. Сениям урмаймиз. Аммо битта гапни айтиб қўяй. Иккинчи Минаварга гапирсанг поезд тагига тиқиб юбораман. Минавар меники. Тушундингми! У бирпас кўзини олайтириб турди-да, ерга тупуриб, туфлисини учи билан тупугини эзгилади. Сенга ўхшаган саводсизни бошига урадими, тенг-тенги билан-да!

Болалар, бири илжайиб, бири сўкиниб тарқалишди. Дарвоза олдида Абдували иккаламиз қолдик.

– Юр, кетдик! – Абдували папкамни қўлимга тутқазди. – Олишма шулар билан, ўртоқ.

Муштлашсак енгил тортардим. Шерзоднинг «саводсиз» дегани, айникса, алам киларди.

...Мен саводсизми! Кўрамиз ким саводли бўлишини. Сендан яхшироқ ўқимасам одаммасман!

Тўғри, биринчи ярим йилликни уч аралаш битирдим. Лекин учинчи чоракдан нуқул беш ола бошладим. Ўқитувчилар у ёкда турсин, дадам билан ойим ҳам мендек аҳмоққа қаёқдан инсоф кирганини билишолмас, қуйилгани рост бўлсин, деб қувонишар эди. Аммам бўлса «шўх бола тез қуйилади демабмидим, Роби, кўрасан ҳали ўғлинг юрт сўрайдиган министр бўлади», деб каромат қиларди.

Бир куни қизиқ бўлди. Гагарин космосга учганидан кейин бир ҳафталар ўтганида Минавар сочига олма гулининг шохчасини қистириб келди. Физика дарсида доскага чиқиб жавоб берди. Жавоб беряпти-ю, икки кўзи менда! Тўгриси, мен доскага чиқсам, Минавардан, у доскага чиқса мендан кўз узмай жавоб берадиган бўлиб қолганмиз. Негадир Минаварга қараб гапирсам, ақлим

яхши ишлаётганга ўхшайди. Бундан чиқди уникиям шунақа экан-да! Уям мендан кўз узмайди-ку!

Минавар дарсликдаги гапларни айтиб бўлди-да, негадир «ўтлаб кетди».

– Инсон космосга чиқди! – деди ҳамон мендан кўз узмай. – Энди уруш бўлмайди. Оталар ўлмайди, оналар касал бўлмайди.

Шу йилдан дарсга кирган ёш ўқитувчи қиз аввалига ҳайрон бўлиб қолди. Кейин тез-тез бош силкиб тасдиқлади.

- Тўгри айтасан. Рахмат. Беш...

Олтинчи дарс битганидан кейин қарасам ҳамма туриб кетяпти-ю, Минавар жойидан қимирламаяпти. Бошқа кунлари автобусдан қолиб кетмаслик учун ҳаммадан олдин кўчага югурарди. Мен ҳам атайлаб папкамни имиллаб йигиштира бошладим.

- Кетдикми? деди Абдували тирсаги билан туртиб.
- Бор, ишингни қил! Бир жеркинган эдим, Абдували ҳайрон бўлиб, китоб-дафтарини папкасига тиқди-да, ўрнидан турди.
  - Пойлаб турайми?!
- Йўлни ўзим биламан! дедим тўнғиллаб. Кетавер!

Синфда икки-учта қора қиз қолған, ҳамма болалар, Шерзод билан Қўзивой ҳам чиқиб кетишган эди. Биламан, бари бир Шерзод пойлаб туради. Минаварнинг чиқишини кутади. Шу қилганига Минавар билан чиқаман. Бир кўриб қўйсин!

Ана, Минавар китобларини битта-битта папкасига соляпти. Қора қизлар ҳам бир-бирлари билан маънодор кўз уриштириб олишди-да, чиқиб кетишди. Секин-секин юриб Минаварнинг олдига бордим. Гапирай десам, ҳеч нима эсимга келмайди, тепасида серрайиб турдим-турдим-да, сўрадим.

- Сен... космонавт бўлмоқчимисан, Минавар?

Негадир овозим титраб чиқди. Минавар кулди. Узун киприклари пирпираб кетди.

- Мендан космонавт чиқмайди, деди секин. Кулганидан анча дадил тортдим.
- Нега чиқмас экан? Физикани яхши биласан-ку!
- Ўтир, бир нарса кўрсатаман! Минавар парта четига сурилиб, жой берди.

Беихтиёр папкамни парта устига қўйиб, ёнига ўтирдим. Димогимга олма гулининг хиди урилди.

– Мана. – У папкасини очиб, муқовасига газета ўралган аллақандай русча китобни олди-да, ўртасини очди. – Ўқи!

Яқин сурилган эдим... Тирсагим унинг кўксига тегиб кетди. Ток ургандек сесканиб тушдим. Қўлимни тортиб олдим. Кўзларим китобда-ю, ҳеч балони ўқий олмасдим. Негадир вужудим таранг тортилиб кетган, тирсагимни яна кўтаргим келарди.

– Эйнштейн айтган экан, – деди у кулимсираб. – Мабодо учинчи жаҳон уруши бўлса, қанақа қурол ишлатилишини билмайману, аммо тўртинчи жаҳон урушида камон билан тошболта ишлатилади! Биласанми, бу нима дегани?

Хеч балога тушунмадим. Негадир томогим қуриб кетган, вужудимдан ўт чиқиб кетаётганга ўхшар эди. Секин қарасам, кўзимга тикилиб турибди. Бирдан унинг ҳам юзига қон югурганини, қисқа-қисқа нафас олаётганини сездим.

- Ухламадингми? дедим бошқа гап тополмай.
- Нимага?
- Кўзингни таги кўкарибди...
- Дадамнинг етти йиллигини ўтказдик, деди секин. Тўртинчида ўқиётганимда ўлганлар... Гап бундамас. У негадир жилмайди. Яна юзи қизарди. Ўзим... касалман. Порогим бор. Шунинг учун мендан космонавт чиқмайди.
  - Нима у? дедим қўрқиб.

– Туғма порок. Дилим ўйнайди... – У киприкларини пирпиратиб кулимсиради. – Шунинг учун мендан космонавт чиқмайди. Мен... Дўхтир бўлмоқчиман. Жуда бўлмаса фармацевт. Юрак порогини тузатадиган дори топаман... Ўқимадинг-ку! – У яна ёнимга яқин сурилди. – Мана! Эйнштейн айтганки...

Тирсагим тағин кўкрагига тегди. Кўз ўнгим қоронғилашиб, баданим жимирлаб кетди. Нима қилаётганимни ўзим ҳам билмай, шарт этиб, елкасига қўл ташладим.

- Минавар... Мунаввар!
- У сапчиб ўрнидан туриб кетди.
- Вой жинни!

Китобни шоша-пиша папкасига тиқди-ю, чопиб чиқиб кетди.

Анчагача ўтирган жойимдан туролмадим. Юрагим гурсиллаб урар, Мунавварнинг «вой жинни» дегани қулоғим остида жаранглар, тиззаларим қалтирар эди. Нима, хафа бўлиб айтдими, эркаланибми!

Ховлига чиққанимдан кейингина Шерзод ўртоқлари билан йўлимни пойлаб турган бўлиши керак, деган хаёл миямга келди. Пойласа пойлайверсин! Менга деса минг киши бўлмайдими? Қўрқмайман! Мунавварни ҳеч кимга бермайман.

Қизиқ, йўлимни тўсишмади...

...Ўша куни галати туш кўрдим. Умрим бино бўлиб, биринчи марта рангли туш кўрдим! Каттакон шафтолизормиш. Шафтолилар пуштиранг гуллаб ётганмиш. «Шафтоли гуллаб бўлганди-ку», деб ўйлармишман. Бир маҳал шафтолизор орасидан Мунаввар чиқиб кепти. Сочига олма гули тақиб олганмиш. Эгнида шафтоли гулига ўшаш пуштиранг кўйлак. «Кечаям олма гули тақиб келганди», дер-

мишман. Олдига югуриб борибман-да, елкасига қўл ташлабман. Мунаввар ҳайрон бўлиб кўзимга ҳарабди. Узун, чиройли киприклари пир-пираб кетибди. «Мен сени яхши кўраман, Мунаввар!» дебман, баҳириб. У негадир йиғлаб юборибди. «Кетинг, сиз ёмонсиз», дебди. «Вой, жинни. Мени нега сизлайсан», десам... гойиб бўлиб ҳопти.

Уйгониб кетдим. Вужудимда ҳузурбахш бир ҳоргинлик сезардим.

...Ушандан кейин анчагача ундан уялиб юрдим. Худди тушимда кўрган воқеани уям сезиб қоладигандек. Фақат... битта бахт бор мен учун! Ҳар куни кўл беришиб кўришаман. Қўлини сиқаётганимда тағин ток ургандек аъзойи баданим жимирлаб кетади. Тўгри, бир марта юрак ютиб, анчадан бери ўйлаб юрган гапимни айтдим.

- Мунаввар, уйларинг текстилга яқин-а?
- Ҳа! деди у кулимсираб. Нимайди?
- Ўша ерда кино ҳам бор-а?

Мунаввар индамай бош силкиди.

- Кинога тушамизми? Шундай дедиму ўзим қўрқиб кетдим. Уришиб беради, аразлайди, деб ўйлаган эдим. Йўқ, уришмади. Лекин қатъий бош чайқади.
- Музаффар, деди секин, яна шунақа десанг хафа буламан.

Шу йил қишда бир ҳафта ёмон қийналдим. Қишки таътилдан кейин Шерзод мақтаниб қолди.

- Индийский кино кўрдим. Зўр экан!
- Битта ўзинг тушиб нима қилардинг, деди Қўзивой, митти кўзларини йилтиратиб, айтсанг бизам тушардик.

Шерзод кулди.

 Сени бошимга ураманми, Минавар билан тушдим.
 Шерзод кўзимга тикилиб туриб илжайди. Роса йиғлади. Қизлар шунақа-да, кино кўрсаям йиғлайди.

Ўтирган жойимга михланиб қолдим. Рангим девор бўлиб кетганини ўзим ҳам сезиб турардим.

Шунақа экан-да, Мунаввар! Менга бунақа дейди-да, у билан... кинома-кино юради... Эртасидан кўришмай қўйдим. Унинг ҳайрон бўлиб ҳараб турганини кўрсам, ғашим келар, кечалари ухлолмай чиҳардим. Бир ҳафтадан кейин йўлакда ўзи олдимга келди.

- Нима бўлди, касалмисан? деди секин. Узун киприклари титраб кетди.
- Кино яхши эканми? дедим ғазаб билан. Яна тушдиларингми?

Мунаввар кўзимга тикилиб турди-турди-да, лаблари пирпираб пичирлади.

– Қизлар айтса ишонмовдим, рост экан-да! – Шундай деди-ю, синф томонга югурди. Беихти-ёр мен ҳам эргашдим. У синфга отилиб кирди-да, доска олдида Қўзивой билан гаплашиб турган Шерзоднинг ёнига борди. Қулочкашлаб юзига тарсаки туширди.

Шерзоднинг ранги қув ўчиб кетди.

- Ҳа! деди дўриллаб. Нима қилдим сенга!
- Агар яна шунақа туҳмат қилсанг... Мунаввар, партага ўтирди-ю, юзини кафти билан яшириб, унсиз йиғлаб юборди. Шерзод нима қилишини билмай серрайиб туриб қолган, Қўзивой гоҳ менга, гоҳ Мунавварга аланг-жаланг қарар, мен нима қилишимни билмай талмовсираб турардим.

Мунавварнинг бошини силаб юпатгим келар, аммо уялардим.

...Бугун Шерзод билан яна уришдик. Йўқ, уришмадигу, лекин... Бари бир шунақа бўлиши керак эди. Бир ҳафтадан кейин имтиҳонлар бошланади.

Бир ойдан кейин ҳаммамиз ҳар ёққа тарқалиб кетамиз. Биламан, Мунаввар билан Шерзод медал олишади. Менинг тўртларим бор. Майли, менга медал керакмас. Мунаввардан айрилиб қолишдан қўрқаман. Қанийди. Мунаввар ҳам, мен ҳам ўқишни битиролмай қолсагу янаги йил тағин бирга ўқисак. Иложи йўқ-да.

Шундай қилиб жанжални Шерзоднинг ўзи бошлади. Адабиётдан консультация бўлиши керак эди.

Синфга киришим билан энг аввал Мунавварни қидирдим. Йўқ, келмабди. Орқароқда Шерзод, Қўзивой, яна беш-олтита бола, мактаб формаси ўрнига атлас кўйлак кийиб олган уч-тўртта қиз ўтирибди. Биламан, Мунаввар консультацияга кўпинча келмайди. Келмасаям дарсни яхши билади. Лекин гап бундамас, кун қизиган сайин юраги безовта бўлади. Ўзи айтган, «ёзда дилим ёмон ўйнайди», деган. Шуни ўйлаб кўнглим ғаш тортди.

Кутиб ўтирибмиз-ўтирибмиз, муаллима опадан дарак йўқ. Охири Шерзод ўқитувчилар хонасига бориб, гап топиб келди.

– Консултация бўлмас экан: Азиза опанинг боласи сариқ бўпқопти. Мустақил шуғулланамиз.

Мактабда ўтириб мустақил шуғулланиш кимга ёқади! Бировнинг қулупнайи бор, бировнинг пилласи... Беш-олти бола билан иккита қиз қолди: доим Мунавварга эргашиб юрадиган қора қизлар.

Шерзод ўқитувчи ўтирадиган стулга чўкди-да, соатига қаради.

- Ўн икки бўляпти. Хўш, нима қиламиз?
   Хеч ким чурқ этмади.
- Бўлмаса бир нарсани аниқлаб олайлик! У катталардек салмоқлаб гап бошлади. Мақсадсиз яшаш ҳайвонлик! Ким ҳайси касбни танлаганини билиб олсак. Сен у ўртароҳдаги партада ил-

жайиб ўтирган Қўзивойдан сўради, – ким бўлмоқчисан?

- Шофёр! Қўзивой партани ногора қилиб чалиб қўйди. Такси ҳайдайман. Кейин, пул йигиб собственний «Москвич» оламан! Таксичининг пули кўп бўлади!
  - Сен-чи, Хожия?

Қора қизлардан бири иккиланиброқ жавоб қилди:

- Боғча мудири!
- Тўгри! Шерзод илжайди. Ўзингам қахрамон она бўлмагунча қўймайсан! Сенга боғча дуруст.
  - Э, ўле!
  - Сен-чи, Шойи?

Яна бир қора қиз – Шоира бижиллаб ташлади:

- Хўжайинмисан? Неча пуллик ишинг бор?! Ўзинг ким бўлмоқчисан?
- Менми? Шерзод ўйчан қиёфада бошини қуйи солди. Ҳарбий академияда ўқиб, космонавт бўлмоқчи эдим. У негадир менга қараб илжайди. Айнадим! деди афсус-надомат билан бош чайқаб. Энди фармага кираман.
- Узумга бўйинг етмагандан кейин пуф сассиқ экан-да. Шоира тағин бижир-бижир қилди. Ҳали сизни космонавтликка оламиз деди-ю, ноз қилдингиз. Кўнглингизни кўчасидан ўргилдим!
- Гап бўйим етиш-етмаслигида эмас! Шерзод қовоғини солди. Хоҳласам бемалол космонавт бўлардим. Минавар фармага кирмоқчи. Демак, менам аптекачи бўлишим керак.

Қора қизлар бир-бирига маъноли қараб олишди. Ўзаро шивир-шивир қилиб чиқиб кетишди.

Шерзод уларнинг кетидан лабини буриброқ кулимсираган кўйи қараб қолди. Синфхонага сукунат чўкди. Очиқ деразалардан тинкани қуритадиган иссиқ шамол кириб турар, ҳовлидаги қиёқ гуллар иси бўр ҳидига аралашиб димоққа уриларди.

– Хўш, ўртоқ Шомуродов, сиз ким бўлмоқчисиз?– Шерзод киноя билан менга қаради.

Хамон партани чертиб ўтирган Қўзивой ҳиринглади:

- Космонавт бўлади. Ўзи айтган.

Шошилмай ўрнимдан турдим. Ёнимда ўтирган Абдували билагимдан ушлаган эди, силтаб ташладим.

– Хўш, ўртоқ Рустамов! – дедим Шерзоднинг кўзига чақчайиб. – Агар районода ишлайдиган дадангиз рухсат берсалар аптека мудири бўламан. Мунаввар билан бирга ишлаймиз. Манави малайингни, – қўлимни бигиз қилиб Қўзивойни кўрсатдим, – ўзимга шофёр қилиб оламан. Ишдан кейин Мунаввар билан мени уйимга обориб қўяди.

Шерзод билан Қўзивой ҳам, бошқа болалар ҳам анграйиб қолишди. Орага таранг сукунат чўкди.

- Минавар кўнмаса-чи! Шерзод секин-секин юриб яқин кела бошади.
- Биринчидан, Минавар эмас, Мунаввар! дедим унга рўпара бўлиб. – Иккинчидан, кўнади. Кўнмаса кўндирамиз.
- Шунақами? Шерзод қўл кўтаришга улгурмади. Қўзивой учиб келиб уни қорнидан қучоқлаб олди. Қарасам, бу ёқдан Абдували менинг қўлимга ёпишяпти.
- Йигитча гап бўлсин! Йигитча иш қилайлик! Қўзивой гоҳ Шерзодга, гоҳ менга қараб бидиллади. Бирон нарсадан бас бойлашийлар. Нима кераги бор жанжални. Минавар битта сенлар иккита! Гаровда ким ютса, Минавар ўшаники бўлади, тамом! У тўгрими, дегандек атрофга олазарак қаради. Жанжалга аралашмай жойида ўтирган болалар маъқуллаб, бош силкишди.

Шерзод қўлини силтаб тортиб, Қўзивойга ўдағайлади:

- Қанақа гаров?
- Менга бари бир! Қўзивойнинг митти кўзлари қувлик билан ёнди. Сенам ўртогимсан, Музаффар ҳам... Қачонгача битта қиз деб душман бўлиб юрасанлар. Орани очиқ қилиш керак-да!
- Гапингни айт! Икки қўллаб билагимдан ушлаб олган Абдувалини силтаб, Қўзивойга ўдағайладим. Нима демоқчисан?
- Нима дердим? Иш ҳалол бўлсин, дейман-да! Қўзивой бир зум ўйланиб турди-да, юзи ёришди. Битта йўли бор! Алвасти кўприкдан калла ташлаш! Ким қойил қилса Минавар ўшаники! Ана, йигитча гап!
- Ўв, еркана! Абдувалининг сап-сариқ юзи жаҳлдан қизариб кетди. Қўзивойнинг ёқасига ёпишди. Ўлдирмоқчимисан?! Музаффар сузишни билмаслигини билиб атайлаб қиляпсан.
- Э, қоч-е. Қўзивой орқага чекинди. Менга бари бир дедим-ку! Шерзод ҳам ўртогим, Музаффар ҳам. Нима, йигит кишиям сузишни билмайдими! Бўлмаса, «вийт» этиб қочсин-да, йўлни бўшатсин!

Қани энди бир урсаму хумдай бошини икки палла қилиб ташласам!

- Бўпти! дедим ғазабдан титраб. Қачон?
- Мана бу йигитча гап бўлди! Қўзивой Абдувалига ўшқирди: Нима қиласан эркакларнинг ишига аралашиб! Қўлингдан келса ана, Музаффарга секундантлик қил. Мен Шерзод томонидаман. Сен нима дейсан, оғайни! Қўзивой Шерзодга садоқат билан термилди. Розимисан?
- Бўпти. Гап битта! Шерзод қўлини чўзди. Йигит бўлсанг, ташла қўлни!
  - Мана! Мен хам қўлимни чўздим. Қачон?
- Эртага соат ўн биру нол-нолда! Келмаган хотин!

Абдували қўлимга ёпишди.

- Кўнма! Булар келишиб олган! деди бақириб.
- Ана! Қўзивой илжайди. Шунақа-да! Эркакчасига гаплашишга келганда курк товуқдай пусиб қоласанлару тағин...
- Қоч! Абдувалини силтаб ташлаб, Шерзоднинг кафтига урдим. Гап битта!
- Аҳмоқ! Эшшак! Абдували алам билан чийиллади. Булар ҳаммаси бир бўлиб сени ўлдирмоқчи, тушундингми!

Тушундим нимаю тушунмадим нима?.. Мунавварни мана шу олифтага бериб қўйгандан кўра...

Кутилмаганда синф эшиги тарақлаб очилди. Шоира остонада туриб бижир-бижир қилди:

- Ўлларинг-а! Шу гапни Минавар эшитса, иккалангниям роса мазах қилади.
- Э, бор! Қўзивой митти кўзини олайтирди. Нега шпиёнлик қиласан?
- Сенга гапни ким қўйибди, каллахум! Шоира бурнини қийшайтириб, эшикни ёпди.

Хаммамиз «яхшилик билан» уй-уйга тарқалдик.

Ана, уч қадам олдинда Абдували кетяпти. Бошини ердан кўтармайди, хафа... Ёнгоқзорга кирганимизда тўхтаб қолди.

- Ўв, жинни! деди тўсатдан жазаваси тутиб. Шерзод сузишга уста. Сен ўлиб кетасан. Битта қиз деб ўлиб кетасан, аҳмоқ!
  - «Битта қиз?» Мунаввар шунчаки «битта қиз»ми?
- Менга қара, Абдували! дедим совуқ ишонч билан. Эртага сен бормай қўя қол. Ўзим бораман!
- Тфу, ҳайвон! У папкасини саланглатганича тез-тез юриб ёнғоҳзор орасига кириб кетди.
- ...Уйга яқин келиб қолганимда велосипед рулига қора хўжалик сумкаси илиб олган Омон учради. Индамай, ўтиб кетмоқчи эдим, рўпарамга келиб тўхтади.

– Шакарга кетяпман, ака. Ойим қулупнай мураббо қиларканлар. Дадам сизни сўрадилар.

Энди шуниси етмай турувди! Дадам ишдан бунақа эрта келмасди-ку!

Хайҳайлашимга қарамай, укам велосипедини гириллатганча жўнади. Ховлига киришим билан дадамга кўзим тушди. У айвон пешида оёгини узатиб ўтарар, олдида иккита тогора бор эди. Иккаласидаям қулупнай. Биттасидаги қулупнайларни доналаб олади-да, думини юлиб, иккинчи тогорага ташлайди.

- Келдингми? деди ўрнидан туриб. Қизариб кетган бармоқлари билан ёнида ётган папиросни олди. Чекаётганида ғашим келди. Ўшанда «маза қилиб» калтак еганимдан бери папиросни кўрсам кўнглим ағдарилади.
- Бу ёққа юр, ўғлим! У оқсоқланиб уйга кириб кетди.

Дадам меҳрибончилик қила бошладими, демак, бир гап бор. Нима бало бўлди тағин!

Айвонга етгунимча дадам оқсоқланиб уйдан чиқиб келди. Қулида аллақандай қоғоз.

 - Ўтир, қорнинг очганлар, – деди янаям меҳрибонроқ алпозда.

Хайрон бўлиб айвондаги хонтахта ёнига чўккаладим.

– Қулупнай ейсанми? – Дадам оқсоқ оёғини чўзиб шолчага ўтирди. Ҳамон бир қўлида қоғоз тутганча, иккинчи қўли билан банди юлинган қулупнайлардан йирик-йиригини саралаб, хонтахта устидаги ликопчага солди. – Ол, ўғлим! Ҳозир ойинг келади. Ош қиламиз. Биир, қўлбола палов қилиб берай сенга!

Бошимни кўтариб қарасам кулиб турибди.

– Бугун сенинг байраминг экан, ўглим. Билмабмизам. Бирпасда ўн еттини уриб қўйибсан, гирой! – Дадам қўлидаги қоғозни узатди. – Ўқиб кўр-чи.

Қоғоз тепасида, «телеграмма» деган босма ҳарфларни ўкидим. Кейин машинкада ёзилган русча сўзларга кўзим тушди. «Музаффар, ўглим! Ўн етти ёшинг муборак бўлсин! Бахтли бўл. Онанг, синглинг...» Охирида яна бир илтимос бор эди. «Мактабни битирганингдан кейин вақт топсанг, Қуқонга бир келиб кет. Илтимос...» «Құқон» деган сузни уқиганимдан кейингина телеграммани ойим юборганини тушундим. Бундан чикди бугун ўн иккинчи май экан-да! Қизиқ, дадам билан ойимнинг эсига келмаган нарсани қўқонлик ойим унутмабди. Шуни ўйлашим билан уч йил илгари еттинчини битираётганимда ҳам ҳўҳонлик ойим туғилган куним билан табриклагани, пул бергани, дадамдан калтак еб Қўқонга қочиб кетмоқчи бўлганим эсимга тушди. Кизик, ўша жанжалдан кейин дадам билан ойим ҳеч нима бўлмагандек индамай қўя қолишган, ўзим хам Қўқонга қочиб кетиш ниятидан қайтган эдим. Қўқонлик ойим ўша куни айтган ваъдасини бажарди. «Энди безовта қилмайман», деган эди, ростдан хам бошқа келмади. Мана, уч йил ўтиб, телеграмма юборибди. Бундан чикди дадам хаммасидан хабардор экан-да! Ҳайрон бўлиб қарасам, дадам ҳамон қулупнай саралаяпти. Жахли чиқаётгани йўқ.

- Қайси институтга кирмоқчисан? деди тўсатдан. Шу пайтгача сўрамаган дадам нега бирдан қизиқиб қолди?
  - Фармага! дедим ҳамон ҳоғозни ушлаганча.
  - Нима у, учувчиликка ўргатадиган ўқишми?

Дадам тўгри айтяпти. Ойим, «ўнни битириб ким бўлмоқчисан», деб сўраганида: «Украина томонда учувчиликка ўқитадиган институт бор, ўшанга кетаман», деган эдим.

– Йўқ, – дедим телеграммани хонтахтага қўйиб.– Аптекачи бўлмоқчиман.

 – Аптекачи? – Дадам ҳайратланиб юзимга ҳаради. – Дори сотасанми?

Ростини айтсам, фарма дегани нималигини ўзим ҳам тузук-қуруқ билмайман. Аммо ростки, Мунаввар ўша институтга кирадими, демак, менам кираман. Айниқса, бугунги гаровдан кейин...

- Шунақа шекилли, дедим дудмал қилиб. Дори тайёрлашгаям ўргатаркан. Буйрак огригига, юрак ўйногига...
- Яхши! дадам маъқуллаб бош силкиди. Шояд онанг бечораниям буйраги тузалиб кетса. У бирдан жиддий тортди. Хонтахта устида ётган, қизариб кетган сочиққа қўлини артди-да, тағин папирос чекди.
- Музаффар! деди қуюқ мўйлови остидан тутун бурқситиб. Энди сен ёш боламассан. Яқинда студент бўласан... Нимайди? «Фармами?» Ўшанга кирасан. Энди сендан бекитадиган жойи йўқ... Шу... Қўқондаям онанг бор...

Индамай ерга қараб ўтиравердим.

– Майли, ўтган ишга салавот. – Дадам қўл силтади. – Она – бари бир она-да! Кўргиси келади. Дийдорингга тўйгиси келади... Мабодо насибанг қўшилиб, институтга кириб олсанг, бир бориб кўриб келгин, хўпми? У бечораям бир гариб...

Ажаб! Жаҳли чиқса ҳеч кимни танимайдиган дадам шуми! Нимага бирдан мулойим бўлиб қолди?

Умуман, дадам бугун жуда «очилиб» кетди.

– Хафа бўлмайсан, ўғлим, – деди мени ёш боладек эркалаб. – Ўн етти ёшга кириб, йигит бўпқопсану бир мартаям туғилган кунингни ўтказмабмиз. Бунақа нарсаларга бизнинг ақлимиз етмаса... Қўявер, энди ҳар йили байрам қиламиз.

Чиндан ҳам дадам ўз қўли билан ош дамлади. Ҳақиқий қовурма палов! Ҳатто ош олдидан бир пиёла ароқ ҳам ичиб олди. Дарров кайф бўлиб қолди.

- Гап шу, Роби! деди шанғиллаб. Бугундан бошлаб Музаффарнинг туғилган кунини ҳар йили байрам қиламиз. Омонникиниям. Тўғрими? У укамга қараган эди, ош еб ўтирган Омон илжайди.
  - Ўртоқларимниям чақираман!
- Ана, ўртоқлариниям чақиради. Дадам мўйловини силаб ойимга юзланди. Роби! деди тўсатдан. Ўглинг институтга кириб олганидан кейин Қўқонга бориб келади. У бечораям она-да!

Ойим билан Омон ярқ этиб гох менга, гох дадамга қараб қолишди. Омон ҳайрон, ойимнинг қовоғи тушиб кетган эди. Дадамнинг кайфи бўлса ҳам, ойимдаги ўзгаришни сезди.

– Этни тирноқдан айирмоқчимисан! – деди баттар шанғиллаб. – Боради! Мен айтдимми, боради!

«Байрамим» ўзимга татимади. Чироқни ўчирдиму анчагача ухлолмай ётдим. Айвондан дадамнинг хўриллатиб чой ичгани, ойим товоқ-қошиқларни шарақлатиб йиғиштираётгани эшитилиб турди.

- Опам салом айтдилар, деди дадам бир махал.
- Вой, яхши юрган эканларми? Ойимнинг овозида афсусга ўхшаш оҳанг бор эди. Анча бўлиб қолди, боролмадим ҳам.
- Яхши... Дадам бир зум сукут сақлаб турди-да, қушиб қуйди. – Оқсоқолдан ҳам бир хабар олай деб кирсам, Абзидан хат кепти. Тойиржон уқиб берди.

Ойим ҳеч нимани тушунмади шекилли, сўради.

- Ким?
- Абзи! деди дадам қандайдир тантанавор оҳангда. Рашид абзи бор эди-ку! Қозондан хат ёзибди. Ҳаммага салом айтибди.
- Вой бечора! Ойим шодон хитоб қилди. Тирик эканми?
- Юрганмиш. Бутун Нўғайқўргонга салом айтибди.

 – Ўзиям топилмас одам эди-да! – деди ойим мамнун бўлиб. – Ишқилиб соғ бўлсин...

Дадам икковининг гапи ҳам, телеграммаю қуқонлик ойим ҳам қизиқтирмас, куз ўнгимда яна Мунаввар пайдо булган эди. Сочлари турмакланган, оппоқ юзи, узун-узун киприклари, «нима дейсан ахир?» дегандек илтижо билан тикилиб турган маъюс кузлари... бир йилдан бери ҳалиям тирсагимни ёндириб турган куксининг ҳайноҳ тафти...

Шу кеча Мунавварни туш кўришни жудаям хоҳлагандим. Йўқ, тушимга алланима балолар кириб чиқди. Шовуллаган лойқа сувми-ей, илжайиб турган биткўз Қўзивойми-ей...

\* \* \*

Эрталаб бошим қизиб уйғондим. Кўзимни очсам, устимга офтоб келиб, пешонам, бўйним терлаб кетибди: ёстиғим ҳўл. Сўлагим оққанми, нима бало! Туришга эриниб ўтирсам, ташқаридан Абдувалининг отимни айтиб чақиргани эшитилди.

– Келавер, – дедим ёстиқнинг орқасини ағдариб, – эшик очиқ-ку!

Абдували бировдан қўрққандек эшикдан мўралади.

– Кетиб қолгансан деб ўйловдим. Соат ўн бўлди. – У секин-секин тепамга келди. – Бормайсан-а? – деди. – Яхшиси ёнгоқзорга кириб дарс қиламиз. Ёзмага тайёрланамиз.

Лоп этиб кечаги гаров, Алвасти кўприк эсимга тушди. Аввалроқ сузишни ўргансам бўларкан... Кейин, негадир кечаси кўрган тушимни эсламоқчи бўлдиму ҳеч нимани хотирлай олмадим.

Тағин Мунаввар хаёлимга келди. Қишда Шерзод туҳмат қилгани, Мунаввар уни тарсакилаб уриб юборганини эсладим. – Абдували! – дедим ишонч билан. – Менга секундант керакмас. Қолавер. Аммо ҳеч кимга гапирма, ҳўпми?

Бу гапни шунақанги совуққонлик билан айтдимки, ўзим ҳам ҳайрон қолдим.

- Ажалингдан беш кун олдин ўлмоқчимисан, аҳмоқ! Абдували минг тўнғиллагани билан бари бир кетимдан эргашди. Нуқул мениям, Шерзодниям, каллахум Қўзивойниям бўралаб сўкарди. Ёнғоқзордан чиқишимиз билан тўсатдан тўхтаб қолди.
- Келмабди, деди енгил тортиб. Келмайдиямда! Унгаям жон керак! Алвасти кўприкдан калла ташлаш осон эканми!

Қарасам, кўприк олдида ҳеч ким йўқ. Ростини айтсам ўзим ҳам севиниб кетдим. Абдували рост айтяпти. Шерзодгаям жон керак. Сузишга минг уста бўлгани билан Алвасти кўприкдан калла ташлашга қўрқади. Кўприк тагига кириб кетса – тамом!

Олдинма-кетин юриб яқин бордик. Кун қизиб кетган, пастда терак бўйи чуқурликда Бўрижар шовуллаб оқар, кечаси тоғда ёмғир ёққан шекилли, сув бўтана бўлиб кетган, аллақандай дарахт шохлари сув юзидан чирпирак бўлиб айланганча кўприк тагидаги бетон деворга урилар, шиддат билан пастга – темир йўлнинг нариги томонига сурон солиб отилар эди.

– Кетдикми? – Абдували сув шовқинидан овозини эшитмай қолишимдан қўрққандек, билагимдан тортиб имо қилди. – Келмади-ку! Бўлди-да!

Иккиланиброқ эргашдим. Секин-секин темир йўл кўтармасига чиқдик. Йўл четидаги ўтларга дори сепилган шекилли, сарғайиб, қовжираб қолган, шпалларнинг эриб кеттан мойи ботинка пошнасига чип-чип ёпишар, бир жуфт из офтобда тасмадек ялтираб ётар, қайноқ ҳаводан мазут ҳиди

келарди. Беихтиёр нариги томонга қарадиму юрагим сесканиб кетди. Кўприк тагидан отилиб чиққан лойқа сув кўпикланиб осмонга сапчир, саёзликда қингир-қийшиқ тўнкалар, темир қовургадек арматуралар «тиш қайраб» турар, «кела қол, сихга қадаб ташлайман», деб чақираётганга ўхшарди.

# - Музаффар!

Бурилиб қарадиму Абдувалининг ранги қув ўчиб кетганини кўрдим. У индамай, разъезд томонга имо қилди. Темир йўл четида, шпаллар устида катта-катта қадам ташлаб Шерзод келарди. Худди байрамга отлангандек ясаниб олган. Йўл-йўл шойи кўйлаги офтобда ялтирайди. Шими текис дазмолланган. Кетидан келаётган Қўзивойни аввалига пайқамадим. Пакана бўлгани учун Шерзоднинг орқасида кўринмаётган экан. Лип этиб, темир йўл ўртасига тушиб олди-да, шу томонга пилдиради.

Юрагим шув этиб кетди. Қўрқаётганимни сездирмаслик учун тескари қараб олдим.

Икковлари етиб келишди. Шерзод хотиржам алпозда аввал мен билан, кейин Абдували билан қўл олишиб кўришди. Қўзивой билан кўришгим келмади. Қўл чўзган эди, тескари қараб, ҳуштак чалиб туравердим.

– Хўш, бешта кам ўн бир! – Шерзод офтобда ялтираётган соатини бурнимга тиқиштирди. – Пастга тушайлик.

Шағал кўтармадан сирғаниб, пастга – Алвасти кўприкнинг бериги томонига ўтдик.

– Менга қара, Шерзод! – Абдувалининг сариқ юзи қизариб кетди. – Қўйинглар шу ишни! – Овози шу қадар ялинчоқ эшитилдики, ғашим келди.

Шерзод кинояли илжайиб қўйди. Шу туришида «сенам одаммисан» деган маъно бор эди.

- Калла ташлаш жойи кўприк маркази! У қўлини чўзиб Алвасти кўприкнинг ўртасини кўрсатди. Қайси қиргоққа сузиб чиқиш, ҳар кимни ўзига тан. Хоҳласа у ёққа чиқади, хоҳласа бу ёққа.
- Сув тортиб кетса, унда... Қўзивой митти кўзларини қувлик билан йилтиратди. – Лекин ҳаммаси қоидали бўлиши керак. Чек ташлаймиз. Кимнинг чекига тушса, ўша аввал калла ташлайди. Тўгрими гапим? Ҳалолми?

У шимининг чўнтагига қўл суқиб, йигирма тийинлик танга чиқарди.

- Ким қаёғини танлайди? деди тангани кўзкўз қилиб.
- Менга бари бир! Шерзод чирт этиб тупурдида, юзини ўгирди.
  - Менгаям.
- Йўқ, гаров ҳалол бўлсин. Қўзивой тангани тумшуғимга тиқиштирди.
  - Каёги сеники?
- Гербли томони! дедим беихтиёр. Чув тушгим келмасди.
- Бўпти. Гербли томони осмонга қараб тушса, биринчи бўлиб Шерзод калла ташлайди. Йигирма тийинлик томони тушса, сен ташлайсан. Гапинг гап, қайтиш йўг-а?

Боядан бери ранги гезариб турган Абдували Қўзивойнинг ёқасига ёпишди.

- Музаффар сузишни билмайди, каллахум! деди бақириб. Ўлдирмоқчимисан бировни!
- Э нари тур, ҳезалак! Қўзивой елкаси билан бир туртган эди, Абдували ғазабдан баттар қизариб кетди. Энгашиб ердан чойнакдек тош олди.
- Ўлдираман! деди кўзини олайтириб. Аввал сен ўласан, кейин гаров бўлади!

Шерзод шу қадар киноя билан менга қарадики, югуриб бориб Абдувалининг қулига ёпишдим.

#### - Аралашма.

Қўзивой ҳар эҳтимолга қарши Абдувалидан нарироққа борди. Қўзларини йилтиратиб тангани бош бармогининг тирногига қўндирди. Энди осмонга отмоқчи эди, кўприк усти гулдираб кетди. Кўкимтир тепловоз қатор-қатор вагонларни тортиб Алвасти кўприк устидан ўта бошлади. Пўлат излар зириллар, гилдираклар қулоқни қоматга келтириб тарақлар, йўл четидаги қовжираган ўтлар шиддат билан силкинар эди.

Шерзод «шошма» деб имо қилганди, Қўзивой поезд ўтишини кутиб турди. Ниҳоят тарақ-туруқ садолар пасая-пасая тиниб қолди.

- Бир, икки, уч! Қўзивой тангани осмонга чириллатиб отди. Танга пирпираб ерга тушди.
- Ана! Сенам қара, ўв! Қўзивой қувониб хитоб қилди. Рақамли томони тушди! Биринчи бўлиб Музаффар калла ташлайди. У Абдувалининг қўлидан судрагудек бўлиб танга устига олиб борди. Кўриб қўй. Бари бир Шерзод ҳам ташлайди. Аммо Музаффарнинг гали биринчи.

Абдували энгашиб, тангани узоқ томоша қилди-да, қаддини ростлади. Рангида ранг қолмаган, лаблари титрар эди. Яна эгилди-да, боягидан ҳам каттароқ тошни олди.

- Эшитиб қўй, деди титраб. Музаффарга бир гап бўлса, сенам тирик қолмайсан!
- Ие, алам экан-да! Қўзивой мадад кутгандек аввал Шерзодга, кейин менга қаради. Гаровни ўзларинг ўйнадинг-ку, Музаффар!

Дўнгроқ жой топиб ўтирдим-да, туфлимнинг богичини еча бошладим. Йўқ, энди қўрқмасдим. Фақат Мунавварни кўргим келарди. Бир марта, охирги марта! Шу лахзада бир нарсани тушундим:

Мунавварни яхши кўраман! Жудаям яхши кўраман. Жудаям! Агар тирик қолсам...

Бошимга соя тушди. Абдували! Ҳозир яна саннайди. Ялинмоқчими? Шуларга-я! Мунавварни мана шу олифтага бериб қўйгандан кўра...

– Нари тур! – Жеркиб, бошимни кўтардим. Кўтардиму ҳайратдан қотиб қолдим. Нима бу?

Боғич ечаётган қўлим билан қўрқа-писа кўзимни ишқаладим. Йўқ. Туш кўраётганим йўқ эди. Тепамда Мунаввар турарди. Эски, унниқиб кетганчит кўйлакда. Сочи турмакланмаган, иккита қилиб ўриб, орқасига ташлаб олибди. Кўзларининг таги янаям кўкариб кетган. Юзида қон йўқ:

- Хорманглар! - деди лаби пирпираб.

Аҳмоқона илжайиб, атрофга алангладим. Нарироқда Шерзод қаққайиб турар, Қўзивой чўзилиб унинг қулоғига бир нима деб шивирларди. Абдували қўлида тош билан ҳезланиб турибди.

- Чўмилмоқчийдик, дедим бошқа гап тополмай.
- Яхши жой топибсизлар чўмилишга! У кўзимга таъна билан тикилиб турди-да, «сатқаи одам кет!» дегандек афсус билан бош чайқади. Нима, мен кўчада тушиб ётган чақаманми? деди кўзи газабдан ёниб. Орқамдан гаров ўйнайсан!

Довдираб қолдим.

- Гаровмас, ўзимиз... дедим дудуқланб.
- У юзини чир ўгирди-да, Шерзоднинг олдига борди.
- Ютқаздинг! деди қатъият билан. Мен Музаффарни яхши кўраман! Шуни билмоқчимидинг? Кўнглинг жойига тушдими?

Шерзод ранги қув ўчиб орқага тисарилди. Қўзивойнинг кўзи олайиб кетди. Абдували қўлидаги тошни Бўрижарга улоқтириб юборди-да,

гандираклагудек бўлиб, наъматаклар ўсиб ётган сўқмоқдан ёнгоқзор томонга юрди.

Мунаввар шарт ўгирилиб тепамга келди. Икки юзи олов бўлиб кетган, доим ўйчан боқадиган кўзлари ёниб турарди.

– Сениям ёмон кўраман! – деди бақириб. – Одаммассан!

Шағал ётқизилган кўтармага чиқди-да, темир йўл устида бир зум тўхтади. Мен томонга бир қаради. Шунда кўзларидан ёш сизиб чиққанини кўрдиму сапчиб туриб, югурдим. Яланг оёгимга шағаллар ботар, сирганиб кетардим. Қизиб ётган темир излар товонимни жазиллатиб куйдирарди. Мойи эриб кетган шпаллар ундан ҳам иссиқ, оёгимга чиппа ёпишар эди. Лекин огриқни унча сезмасдим.

Қизиқ, Мунаввар разъезд томонга – мактабга кетмади. Икки қўли билан юзини чангаллаб олди-ю, Алвасти кўприкдан тушиб, қамишзорга қараб югурди. Жоним борича бақириб юбордим:

- Мунаввар!

Шағаллардан сирғаниб тушиб борарканман, мункиб, думалаб кетдим. Бироқ ўша захоти сапчиб туриб, қамишзорга ўзимни урдим.

Қамишзор орасидаги сўқмоқ ҳўл эди. Куйган товонларим бир оз ором топгандек бўлди. Югуриб борарканман, кўксимдан нидо отилиб чиҳди.

- Мунаввар, тўхта!

Шовуллаб турган қамишзор орасида унга етиб олдим. Қўлидан тутиб жонҳолатда тортган эдим, зах ерга ўтириб қолди. Ёш тўла кўзларида ғазаб билан бақирди:

- Кет! Йўқол!
- Мунаввар! Мени кечир, Мунаввар! Сенсиз ўлиб қоламан, Мунаввар! Ўлиб қоламан!

Кейин нима бўлганини ўзим ҳам билмайман. Ўзидан-ўзи чўккалаб қолдим. Лабларим унинг кўз ёшидан шўртанг бўлиб кетган лабига ёпишди. Қўрқиб кетдим. Гуноҳ иш қилиб қўйгандек сесканиб бошимни орқага ташладим. У энтикар, кўзлари юмуқ, икки томчи ёш оппоқ юзидан думалаб тушарди. Юрагимни баттар қўрқув босди.

– Мунаввар! Яхши кўраман! – дедим йиглагудек бўлиб. – Менам фармага кираман, хўпми, йигламагин, илтимос, уришмагин мени...

У хамон кўзини очмай, бошимни охиста силади.

- Жинни!

#### ЕТТИНЧИ ҚИСМ





#### ЎТТИЗ ИККИНЧИ БОБ

# ТОШКЕНТ ДАВЛАТ ФАРМАЦЕВТИКА ИНСТИТУТИНИНГ БИРИНЧИ БОСКИЧ ТАЛАБАСИ МУЗАФФАР ШОМУРОДОВ ХИКОЯСИ

#### Бегона

Қўқонга биринчи боришим. Шунинг учунми, ойим жуда типирчилаб қолди.

«Битта ўзини қандоқ юбораман. Омонни ҳам қўша қолайлик, ака-ука ҳамроҳ бўлади», деган эди дадам жеркиб берди.

«Эҳтиёт бўл, ўғлингни биров еб қўяди! Бу тенги йигитлар урушда саркарда бўлган. Болангни оёғини оёгинга боғлаб ўтира қол! Хўпми?!»

Дадам тўгри айтади. Ойим ҳалиям мени ёш бола деб ўйлайди. Мактабни мен билан битирганлар армияда хизмат қиляпти. Абдувалидан тез-тез хат келиб туради: Камчаткада экан. Қизиғи шундаки, каллахум Қўзивой билан битта қисмга тушибди. Қўзивой ҳалиям ўша-ўша шум эмиш. Абдували ҳар хатида «Минаварга салом айт», дейди. Айтаман. Кўпинча хатини ўқиб бераман.

Мунаввар билан битта гурухда ўқиймиз. Ўша ҳангомадан кейин Шерзод сенлар доришунос бўлсанг, мен хирург бўламан, деб ТошМИга кирди... Кузда – пахтага борганимиздаям нуқул Мунав-

варнинг ёнидаги эгатга тушиб пахта тердим. Аввалига унинг атрофида учинчи курсда ўқийдиган иккитаси ўралашиб юрди-ю, Мунаввар «йигити» борлигини яхшилаб тушунтириб қўйди шекилли, ҳеч ким яқинига йўламайдиган бўлди... Ҳозир ҳам ҳар куни эрталаб институт эшигида бир-биримизни кутиб турамиз. Кутубхонада бирга дарс тайёрлаймиз. Ҳафтада бир марта кинога тушамиз. Иложи борича орқа қатордан жой оламан-да, чироқ ўчгандан кейин... хуллас бахтлиман. Фақат битта масалада Мунаввар билан келишмаймиз: уйигача кузатиб боришимга йўл қўймайди.

Йўқ, жудаям унчаликмас. Трамвайда текстилгача бирга келамиз. У ёгигаям ёнма-ён борамиз. Лекин тор кўча бошига етишимиз билан тўхтаб қоламан.

Мунаввар у ёғига боришимга рухсат бермайди: ойисидан ҳайиқади. Айтишига қараганда, ойисининг жаҳли ёмон эмиш. Тутган жойидан кесадиган хотинмиш. Мунавварнинг дадасини шунақанги яхши кўрарканки, урушдан ярадор бўлиб келган дадаси ётиқли касал бўлиб қолганида Нўғай-кўрғондаги уй-жойини ташлаб эри ётган – текстил яқинидаги балнисанинг ёнидан эски бир уй сотиб олган экан. Ўрнидан туролмай қолган эрини икки йил боқибди. Эри ўлгандан кейин асабий бўлиб қолганмиш. Дори ичмаса, ухлай олмасмиш... Менинг кузатиб борганимни кўриб қолса, Мунавварни кўчага чиқармай қўярмиш.

Куча бошига етишимиз билан Мунаввар хайрлашиб, «булди, маррага етдингиз, – дейди жилмайиб, – ойимлар хафа буладилар». Шундай дейди-да, чопқиллаб ичкарига кириб кетади. Айтмоқчи, у мени олдингидек «сен» демайди. «Сиз»лайди! Аввалига куниколмай юрдим-у, кейин узимгаям ёқиб қолди. Туғри-да, аввало мен ундан роппа-ро-

са бир ярим ойлик каттаман. Қолаверса, бари бир уйланаман-ку. Сен деса ярашмайди-да...

...Поезд гулдираб кетяпти. Чироқлар хира. Вагон совуқ. Чипта топилмагани учун умумий вагонга чиққан эдим. Ётиб ухлаш у ёқда турсин, ўтиришга жой йўқ. Ҳамма ёқ шовқин-сурон. Одам кўп. Қишки таътил бошланган, талабалар уйига бориб келгиси келади-да. Ана, олти йигит рўпарама-рўпара ўтириб олиб, вино ичишяпти. Дераза олдидаги столчада кесилган иккита анор. Қиррадор стаканда вино ичишади-да, анор билан газак қилишади. Сурнай поча шим кийган, мўйловли йигит менга ҳам узатди.

# - Ол, укам, сенам ўзимизданга ўхшайсан!

Талаба халқи дарров тил топишади. Бирпасда апоқ-чапоқ бўлиб кетдик. Олтитолови ҳам Низомийда ўқиркан. Бири олиб, бири қўйиб ёдаки шеър ўқишди. Навоийдан тортиб аллақандай Хемингуэйгача гапиришди... Кичкина жомадонимни ёнимга қўйиб, қисилиб ўтирибман. Жомадонда қўқонлик ойимга кўйлакли, синглимга жемпер... Ойим магазинма-магазин юриб олган нарсалар. Адабиётчилар олдида ўзимни кўрсатиб қўймоқчи эдим-ку, биттаям шеър ёдимга келмади. Ҳамхоналаримнинг виноси таъсир қилдими, улар шеър ўқиган сайин Мунаввар ёдимга тушаверди.

Ўзимга қолса-ку, Қўқонга бормоқчи эмасдим. Жума куни Мунаввар билан Чимёнга чиқмоқчи эдик. Тоғда институтнинг дам олиш зонаси бор. Узоғи билан индин кечаси поездга чиқиб Тошкентга қайтмасам бўлмайди. Мунавварга ваъда қилганман. Етиб келмасам, кутади.

Кеча Мунаввар билан «Искра» кинотеатрига тушдик. «Оддий фашизм» деган кино экан. Ҳар галгидек орқа қатордан чипта олдим. Мунавварни

қучоқлаб ўтирмоқчи эдим. Бўлмади! Кино шунақа зўр эканки, ёнимда ўтирган Мунаввар ҳам эсимдан чиқиб кетди. Бир маҳал қарасам, у елкамга бошини қўйиб, ҳиқиллаб йиғлаяпти. Елкасидан қучиб бошини силадим.

- Йиглама, дедим шивирлаб.
- Дадам эсимга тушиб кетди. Мунаввар юзини кўксимга босди.

...Уйга келсам дадам қўлимга хат тутқазди. Хатни қўқонлик ойим ёзибди. Аҳволимни сўрабди. Институтга кирганим билан табриклабди. (Қаёқдан эшитди экан?) Хатининг охирида гина қипти. «Баҳорда телеграмма юборганимда ҳам бир оғиз жавоб қилмадинг. Биламан, сенда айб йўқ. Телеграммани кўрсатишмаган. Мазам йўқ, юрагим санчади, ишдан бўшадим. Кўзим тириклигида дийдорингга тўйиб қолгим келади, болам. Ахир мен ҳам онаман-ку, наҳотки кўриб кетишга ақалли бир кун вақт тополмасанг...» дебди.

Қийналиб юрмасин деб, манзилини аниқ-таниқ ёзиб юборибди. Вокзалга тушган заҳоти ғишткўприк маҳалласини сўрасам, «икки қадам» эмиш. Пахтакор кўчаси, ўн тўққизинчи уй...

Хатни ўқиб юрагим сиқилди. Негадир Қўқонга боришга оёғим тортмас эди. Дадам уришиб берди:

– Бормасанг бўлмайди! – деди қовогини солиб. – Эрта-индин ўқишинг бошланса, тағин вақт тополмайсан.

Бир жиҳатдан дадам тўғри айтади: қишки сессияни энди тугатдик. Душанбадан яна лекциялар бошланади.

Ойим «шошиб нима қилади, ёзда борар», деб аралашган эди, дадамнинг жаҳли чиқиб кетди.

– Эсинг жойидами, Роби! Умрбод келсин демабдику! Инсоф қилгин-да! Сен касал бўлиб ётсангу

боланг хабар олмаса, нима бўларди? Қўқон қочиб кетгани йўқ. Борадию келади.

Дадамнинг гапи ойим учун қонун! Типирчилаб, йўл тадоригини кўрди. «Қўқоннинг шамоли ёмон бўлади деб эшитганман, шамоллаб қоласан», деб бўйнимга шарф ўради, зўрлаб оёгимга жун пайпоқ кийгизди... Ойим ҳам қизиқ-да...

Ростини айтсам, йўлга чиқишимга бошқа нарса ҳам сабаб бўлди. Комил бува билан Лазакат хола шу гапни эшитиб уйимизга чиқишибди, Комил бува «Олимжон акангиз Қўқонда ишлаяпти, ижрокомда, акангизни бирров кўриб кела қолинг», дегандан кейин ўзим ҳам қизиқиб қолдим. Олимжон акам Фарғона томонга ишга кетганига етти йилми-саккиз йил бўлди. Аҳён-аҳёнда келади. Тошкентдан атайлаб кўргани борсам, Олимжон ака хурсанд бўлади. Бораман! Аввал ойимни кўраманда, кейин горисполкомга кираман.

Лазакат холанинг айтишига қараганда Олимжон ака «катта одам» бўлиб кетиб, уйланишни ҳам унутиб қўйганмиш. «Албатта уйига боринг, – деб тайинлади Комил бува, – ким билади, акангиз бу ёқда бизларни умидвор қилиб қўйиб, у ёқда битта-яримтасига уйланиб олдиларми?»

Майли, бораман! Керак бўлса уйигаям кираман! Олимжон акам мени яхши кўради-ку, ўзимнинг акам-ку!

Гилдираклар тарақа-туруқ қилади. Купедаги йигитлар шовқин солиб, шеър ўқишади... Мудраб кетибман. Бир маҳал кимдир елкамга туртди. Кўзимни очсам, тепамда мўйловли йигит турибди. Йўқ, мудрамабман. Бемалол ухлаб қолган эканман. Жомадонимни ёстиқ четига жойлаб полкага ётқизиб қўйишган экан. Нариги ўриндиқда кечаги шеърхонлик қилган талабалардан учтаси

мудраб ўтирар, тепадаги полкада яна иккитаси ухлаб ётарди.

– Тур, – деди мўйловли йигит хира чироқда илжайиб, – кеб қолдинг, бизларам бир оз мизгийлик, укам!

... Пастга тушишим билан совуқ шамол юзимга урилди. Тонг отиб қолган, аммо ҳали осмон ёришмаган, шамол гувиллар, вокзал томидаги қорларни супуриб, ерга улоқтирар, йўл четидаги прожекторлар нурида қор учқунлари шошқин ялтирар, осмонда чарх урар эди.

Fишткўприк маҳалласи ростдан ҳам яқин экан. Фаҳат ҳаттиҳ шамол кўз очиргани ҳўймасди. Тошкентда бунаҳа шамол бўлмайди. Пахтакор кўчасини аранг топдим. Эшик занжир экан. Муздек ҳалҳани чангаллаб узоҳ таҳиллатдим.

Ниҳоят кимдир ғарч-ғурч қор босиб эшикка яқин келди. Занжир шиқирлади. Остонада эгнига зангори пальто (Мунавварникига ўхшаган пальто) кийган, қордан пана қилиш учун бошига нимча ташлаган қиз кўринди. Уялиб ўзини орқага ташлади.

- Ким керак эди?

Нима деб сўрайман? Негадир «ойим» дейишга тилим бормади. (Ўзим ҳам ҳайрон қолдим).

- Раъно холанинг уйлари шуми?
- Шу! Қиз ҳайрон бўлиб кўзимга қаради. Келинг...

«Келинг», деди-ю, аммо бу сўзида «нима ишингиз бор эди?» деган маънони уқдим. Сабабини ўзим билмай илжайдим.

«Синглим-ку! Насиба-ку!» Нима учундир унинг юзидан ўзимга ўхшаш белгиларни қидириб тополмадим. Лекин ойимга ўхшаб кетишини сездим. Унинг ҳам холи бор экан. Фақат иягида эмас, юзила. Чап юзила.

– Сиз... сен Насибамисан? – дедим кулиб. – Мен Музаффарман!

У бир зум мени томоша қилиб турди-да, қовли ичкарисига қараб қичқирди:

- Ая, ўғлингиз келди.

Қизиқ, нега акам келди демайди? Хаёлимдан шу ўй лип этиб ўтди-ю, айвондан тушиб келаётган ойимни кўриб ўша томонга юрдим.

- Болам! Ўғлим! Ойим сарпойчан эди. Ерга тушиши билан калиши қорга ботди. Аммо парво қилмади. Учиб келиб, маҳкам қучоқлаб олди. Димоғимга гунафша ҳиди урилишини кутган эдим. Йўқ, валерианка иси анқиди. Бундан чиқди юраги касаллиги рост... Мунаввар ҳам кўпинча валерианка ичади.
  - Оёғингиз... дедим ачиниб. Совуқ-ку...

Ойим ҳамон мени қуйиб юбормас, йиғидан энтикиб, юз-кузимдан упар, анча чукиб қолған, сочига оқ оралаған, ҳансираб нафас оларди. Фақат иягидаги холи, кузлари – йиғлаб туриб куладиған қоп-қора кузлари – уша-уша!

- Олсанг-чи, акангни қўли музлаб кетгандир! У нарирокда иккиланиб турган синглимни койиди. Насиба шошилмай келиб, қўлимдан жомадонимни олди.
- Юр, болам! Совқотиб кетдингми? Ойим кўз ёши аралаш жилмайиб ҳовли этагидан уйга бошлади.

Довли тор, ўртасидаги тарвақайлаб ўсган бир туп каттакон тут дарахти қор залворидан шохини эгиб турар, қор куралиб, дарахт тагига тўпланган, уюмига курак санчиб қўйилган эди. Қор кечаси куралган шекилли, курак бандининг учига ҳам бир энликча қор қўнибди.

Чўян печка гуриллаб ётган иссиқ уйга кирдик. Тахмонда кўрпачалар, ўртада – хонтахта. Нимасидир ўзимизнинг уйга ўхшайди. Фақат бу ерда

валерианка ҳиди анқиб турибди. Деворда чақмоқ телпак кийган, мўйлови чиройли тарашланган кишининг сурати зарҳал рамкага солиб қўйилибди. Кителининг чап чўнтагига нишон қадалган. Қошини чимириб турибди. Хаёлимдан «дадам» деган фикр лип этиб ўтди. Ўша заҳоти бошимга бошқа ўй келди. «Йўг-е, Насибанинг дадаси». Ундан пастрокда Насибанинг сурати. Еттинчи синфни битираётганда венеткага тушган бўлса керак, тагига «Умарова Н...» деб ёзилган. Негадир ойимнинг сурати йўқ.

– Ўтир, болам, ўтир! – Ойим шоша-пиша хонтахта ёнига қават-қават кўрпача солиб, лўлаболиш ташлади. – Хой Насибахон! – деди ховли томонга бақириб. – Чоп, қизим, катта аянгни чақирмайсанми? Айт, акам келди, дегин.

Ойим зум ўтмай хонтахтага дастурхон ёзиб тўлдириб ташлади.

- Олсанг-чи, - деди қистаб. - Бодомлардан олгин! Тошкентда бодом йўқ-ку... ҳаммаларинг яхшимисизлар? Уканг катта бўлиб қолдими?

Қизиқ, ойим ҳарчанд меҳрибонлик қилгани билан ўртамизда аллақандай тўсиқ турганга ўхшарди. У ойим билан дадамнинг ҳолини сўрамагани учун мен ҳам «дадам тузукми» демадим. (Қанақасига дадам бўлсин?)

– Яхши! – дедим ўзим ўйлагандан кўра совукрок оҳангда. – Укам бу йил бешинчида ўқияпти... – Ўйлаб-ўйлаб керакли гапни топдим. – Насиба катта бўпқопти...

Ойимнинг юзи ёришиб кетди.

– Вой, синглинг сени шунақа соғинди, шунақа соғинди! У ҳам бу йил ўнни битиради. Худо хоҳласа ўзинг ўқитасан! Тошкентга бормоқчи. Дўхтир бўламан дейди.

Довлида қор ғижирлади. Эшик очилиб, бошига дастурхонбоп мато ташлаган семиз хотин кириб

келди. Дастурхон рўмолини ечиб, ойимга узатди-ю, қучоқ очиб яқин келди.

- Вой, ўзимнинг қочқоқ боламдан айланай! Вой, ўзимнинг ширин ўғлимдан ўргилай. У лопиллаб келиб мени бағрига босди. Аллақаерини «Қора аммам»нинг қўшниси чевар Фотима холага ўхшатдим. Икки юзимдан ўпиб кўришаркан, дашном берди. Аянг бечоранинг кўзи тешилди-ку кутавериб, Музаффаржон!
- Йўлдошхон қанилар, опа? деди ойим жилмайиб.
- Келади! Ҳозир келади. Муҳаббатни ғириллатдим. Ҳозир топиб келади.

Семиз хотин хонтахта олдига ўтириб, узундан-узоқ дуо қилди.

– Анқара болам! Келганинг қандоқ ярашиб турибди! – деди мамнун бўлиб. – Деразадан бир кўзим тушгандай бўлувди. Насибахон билан бошлашиб баққа кириб кетаёттанингни кўриб Йўлдошхон аячасига дори обкетди-да, деб ўйлабман, болам.

Семиз хотин менга ёқа бошлади. Сенсираб гапиргани ҳам, кулиши ҳам самимий эди.

Ойим дераза олдидан ўтган шарпага қараб тайинлади:

- Насибахон, қизим, чой дамлай қол, аканг совқотиб келди-ку.

Бир оздан кейин Насиба эшикдан туя чойнак кўтариб кирди. Ойим шоша-пиша чойнакни қўлидан олди.

– Ҳой, Насибахон! Аканг билан қучоқлашиб кўришмайсанми? – Семиз хотин ҳаяжонланиб бошини чайқади. – Бир қориндан талашиб тушган аканг-а!

Энди ўрнимдан тураётган эдим, Насиба чир этиб бурилиб эшик томон йўналди. Кўзида қан-

дайдир бегона, совуқ ифодани сезиб, жойимга ўтириб қолдим. Ойим ранги ўчиброқ синглимнинг кетидан эргашди.

Семиз хотин хижолатли жилмайди.

– Уяляпти, тентак. – Бир зум жимиб қолди-да, сўради: – Институтга кирибсан, болам. Эшитиб бирам суюндим, бирам суюндим. Акангга ўхшаган дўхтир бўларкансан-да.

Қайси акамни айтяпти?

Эшик яна очилди. Совуқ бўлсаям сочи қиртишланган бошига дўппи илган, тўнининг елкасига қор қўнган гавдали йигит остонада туриб, қулочини ёйди.

– Кесинлар! Акасининг укаси, кесинлар, – деди дилкашлик билан шанғиллаб. Ҳали ўрнимдан турмасимдан югуриб келиб қучоқлаб олди-ю, бақувват қўллари билан белимдан сиқиб уч марта айлантириб ерга қўйди. – Сизниям кўрадиган кун бор экан-ку, Музаффархон, акаси!

Семиз хотин қайтадан фотиҳа ўқиди.

– Йўлдошхон аканг ҳам сенга ўхшаган дўхтир! – деди тушунтириб. – Билмаганингни ўргатади!

Гап орасида ойим жимгина келиб, нариги томонга чукди. Негадир ранжиганрок куринарди.

Суҳбат бир зум узилиб қолди. Разм солсам, бир менмас, улар ҳам ойимга қараб ўтиришибди. Ойим бармоғи билан дастурхон попугини ўйнайди. Бирдан ҳуши жойига келгандек шоша-пиша чойнакни олдига сурди.

– Олинглар! – деди чой қайтараркан, дастурхонга қистаб. – Музаффар олсанг-чи, болам.

Ўзимни зўрлаб илжайдим.

- ТошМИда ўқиганмисиз? дедим ёнимда чўккалаб ўтирган Йўлдошхон акага қараб.
- Йўқ, Анжанда! Йўлдошхон ака ойимга юзланди. – Хурсанд бўпқолдингизми энди, ая? – деди

шанғиллаб. Кейин елкамга қоқди. – Аямди юрагида дард йўқ. Қаммаси функциональний! Сиқиладилар-да! Неча марта айтаман, «ҳой ая, кўнгилни кенг қилинг», десам қулоқ солмайдилар. Мана, сиз келдингиз. Энди аям отдек бўп кетадилар. Мен сизни Шойимардонга обораман. Қишдаям антиқа бўлади. Бир айланамиз!

- Ака-ука бир яйранглар, ойим кулишга уринди-ю, лаби бурилиб кетди, укангизни ўйнатинг...
- ...Билмайман, негадир Мунаввар хаёлимга келди. Уники функциональний эмас, порок. Туғма порок. Уч кундан кейин Чимёнга чиқишимиз эсимга тушди. Ҳали Олимжон акамниям кўришим керак.
- Кўрармиз, деди дудмал қилиб. Сизниям ишингиз кўпдир...
- Ашнақа деманг-да, ука! Йўлдошхон ака тағин шанғиллади. Қўқонди билмас экансиз. Қўқонди тупроғи оғир. Келган одам кетолмай қолади. Тошкандан укам келади-ю, мен ишни ўйлайманми! Поликлиника қочиб кетмайди. Шойимардонга борамиз. Толзорга тушиб улфатчилик қиламиз. Лечфакдамисиз?
  - Йўқ, дедим бош чайқаб. Фармацевтика...
- Бари бир ҳамкасаба эканмиз-да! Йўлдошхон ака самимият билан кулди. Фармацевт бўлмаса дўхтирларнинг урингани бир пул...

Кечаси яхши ухламаганим учунми, иссиқ элитдими бошим ғувилларди. Йўлдошхон ака Тошкентни, эшик-элларни, ўқишимни суриштирар, саволларига «яхши, дуруст», деб жавоб қилардиму кўзим юмилиб кетаётганини ўзим сезиб ўтирардим.

Холимни биринчи бўлиб ойим хис этди.

- Йўлдошхон, деди секин. Укангиз жичча мизгиб олсамикин... Поездда кепти.
- Жуда соз-да! Йўлдошхон ака илдам ўрнидан турди. – Ҳали кўп отамлашамиз! Эртага пешинга

Сойбўйига ош буюриб қўяман. Кейин Шойимардон бувага кетамиз. Қор ёққану зиёни йўқ. Йўл очиқ!

Ойим солиб берган жойга таппа ташлабману қотиб қопман. Чамаси анча ухладим. Уйғонсам, уй ичи ғира-шира қоронғи бўлиб қолибди. Бир зум қаердалигимни билолмай гарангсиб ётдиму бурчакда гуриллаб ёнаётган печка, хонтахта устидаги бодом тўла ликопчаларни кўриб тушундим. Қор тинган шекилли, деразалардан хира нур тушиб турарди.

Довлига тушдим. Ростдан ҳам қор тинган, аммо совуқ шамол гувиллар, оқшом тушиб қолган, кунботар томон билинар-билинмас қизарган эди. Кимдир (Йўлдошхон ака бўлса керак) яна қор курабди. Ҳовлининг нариги томонидаги устунлари сирланган айвонда чироқ ёниб турар, аммо ичкарида ҳеч қандай шарпа сезилмасди. Чамаси бояги семиз хотин ҳам, Йўлдошхон ака ҳам мени безовта қилмаслик учун уй ичида жимгина ўтиргандек эди.

Довли ўртасидаги тут тагига уюб қўйилган қордан кафтимни тўлдириб қўлимни юваётган эдим, ошхонадан ойим мўралади.

- Вой турдингми? Насибахон! Чоп!

Қўлида обдаста, елкасида сочиқ билан синглим ошхонадан чиқди. Калишли оёғи қорда сирғаниб-сирғаниб келди-да, қўлимга сув қуйди. Сув илиқ эди.

- Нечанчида ўқияпсан? дедим бошқа гап тополмаганим учун.
- Ўнинчи! синглим ётсираброқ кўзимга тезгина қараб олди.
- Дўхтир бўлмоқчи синглинг! Ойим ошхона эшигида турганча жилмайди. Тошкентга боради. Ўзинг бош бўласан.
- Бормайман! Насиба ранги қув ўчиб шахт билан обдастани қор устига қўйди. Керак бўлса ола

қол, дегандек попукли сочиқни елкасидан силтаб олиб, қўлимга тутқазди. – Бормайман Тошканга! – Шундай деди-ю, ғарч-ғурч қор босганча уй томон чопиб кетди. Сочиққа қўл артишимниям, артмаслигимниям билмай серрайиб қолдим.

Ойим ошхонадан қуюндек отилиб чиқди. Қўлида капгир бор эди.

– Шошма! – деди капгирини силтаб. – Тўхта, жувонмарг!

Худди шу пайт кўча эшик ғийқиллаб очилди. Қундуз ёқали пальто, бошига чақмоқ телпак, оёғига пийма кийган киши кириб келди. Уй олдига бориб қолган Насиба эшик ғийқиллаганини эшитиб, бурилиб қаради. Ўша томонга отилди. Тўсатдан йиглаб юборди.

-Дада! Дадажон!

Қундуз ёқали киши Насибани бағрига босди. Ойим қўлида капгир билан ярим йўлида тўхтаб қолди.

«Дадам», тўгрироги, Насибанинг дадаси шу одам эканлигини тушундим. Негадир хаёлимга галати ўй келди. «Кўрганман! Бу одамни аллақаерда кўрганман!» Йўқ, эслай олмадим. Балки кўргандирман. Балки бояги печка ловуллаб турган уйдаги сурати билан солиштиргандирман. Билмадим! Хозир буни ўйлашдан кўра Насибанинг йиглаб отасига ёпишгани кўпроқ ҳайрон қолдирарди мени.

– Ҳа, қизим? – «Дадаси» чарм қўлқопли қўли билан Насибанинг бошини силаркан, ойимга таънаомуз қаради. – Нима бўлди, тинчликми?!

Сезиб турибман. Ойим ўлганининг кунидан илжайди.

– Ўғлингиз келди, дадаси, – деди овози титраб. – Музаффар келди!

«Дадаси» мен томонга ярқ этиб қаради. Чиройли тарашланган мўйлови учиб қўйди. Кўкиш кўзларида совуқ ифода бор эди. Ўша захоти мендан кўз узди-да, Насибанинг бошини кўтариб, юзига термилди.

- Нима бўлди, қизим?
- Аям... Насиба ўпкаси тўлиб ўкраб юборди.
- Нима? «Дадаси»нинг кўзида совуқ ўт чақнади. Янами?

Кафти билан синглимни нари сурди-да, ойим томонга юрди.

– Тинч қўясанми-йўқми? Болага кун берасанми-йўқми? – деди асабий ҳайқириб.

Уч-тўрт хатлаб ойимга рўпара бўлди.

- Ўз холига кўясанми-йўкми?

У бир қадам орқага чекиниб, мушт кўтарди. Чамаси ойимни урмоқчи бўлди-ю, тўхтаб қолди.

Ерга михлангандек қотиб қолган, нима қилишимни билмасдим. Қизиқ, ойим чекинмади.

- Урмоқчимисан? - деди титраб. - Ур, номард!

«Дадаси» афтини қахрли қийшайтириб сўкинди. Ўша захоти тарсаки зарбидан ойимнинг қўлидан капгир учиб кетди. Бошидаги жун рўмоли елкасига тушиб қорга чўккалаб қолди.

Тут тагига уюб қўйилган қордан сакраб ўтдиму учиб бориб «дадаси»нинг қундуз ёқасидан бўғиб олдим.

- Нега? дедим ҳансираб. Нега урасиз? «Дадаси» кўзида совук олов ёниб силтанди.
- Нари тур, чўлоқнинг ҳаромиси! Пиймали оёгини ойим устида кўтарди. Ойимнинг бошига тепмоқчи эди, нима қилганимни ўзим билмай қолдим. Йўқ, урмадим. Чамаси, улоқтириб юбордим шекилли. Қарасам, «дадаси» тут тагидаги қор уюмига кўмилиб ётибди. Бошидан учиб кетган чақмоқ телпаги қори куралган йўлкада тўнкарилиб ётарди. Қорда ётган телпагини кўриб тўсатдан

шовқин-суронли бозор кўз ўнгимга келди, дўппи бозори. Дадам этигининг қўнжидан пичоқ суғурганида одамлар орасига ўзини урган киши... Танидим! Шу одам эди, худди ўзи!

Ижирғаниб юзимни ўгирдим. Ойимнинг қўлтиғидан кўтараётган эдим, дод солган чинқириқ овоз қулоғимни тешиб юборай деди:

– Дадамни нега урдинг!

Ўзимни ўнглаб олгунимча Насиба юз-кўзимни тимдалаб ташлади.

 Насиба! – Ойим каловланиб синглимга ёпишди. – Уят бўлади! Вой шўрим!

Довли юқорисидаги айвондан тўн кийган Йўлдошхон ака сакраб тушиб қорга кўмилиб ётган кишига ёпишди.

- Амаки! деди жеркиб. Уят борми сизда!
- Хароми! «Дадаси» юз-кўзига ёпишган қорни кафти билан сидириб ташлаганча Йўлдошхон аканинг қўлидан чиқишга уриниб юлқинди. Отаман! Пешонасидан отаман...

Ойимнинг қучоғида типирчилаётган Насиба, кўзида худди отасиникига ўхшаш совуқ ўт чақнаб, бижирлади.

- Қаёқдан келдинг? Ким чақирди сени?

Семиз хотин қорда сирғана-сирғана чопиб бориб, Насибага юзланди.

- Уялмайсанми? Номус қилмайсанми?
- Қуйвор! «Дадаси» Йулдошхон аканинг забардаст қулларидан чиқиб кетолмай оғзидан купик сачратиб хириллади. – Қоч!

Учиб уйга кирдиму тахмонда турган палтомни, телпагимни кийдим. У ёқ бу ёққа алангласам, жомадончам йўқ! Керакмас! Хеч нима керакмас!

Кўча эшик олдига етганимда ойимнинг еру кўкни титратиб юборгудек фарёди янгради:

# - Музаффар! Ўғлим!

Қорда сирғана-сирғана чопиб кетдим. Совуқ шамол гувиллар, кўчалар кимсасиз эди. «Хароми» дедими! Хеч кимдан бунақа гап эшитмагандим. Нега келдим? Нима кераги бор эди?!

...Вокзалда одам сийрак экан. Бахтимга Тошкентга билет топилди... Ўриндикда ўтирибману ўзимга нашъа қилади. Нега келдим-а? Нимага? Дадам нега мажбур қилди... Наманган поезди келишига ярим соатча қолганида вокзал эшигидан кириб келаётган ойимни кўрдиму юзимни ўтирдим. Ойим битта ўзи эмасди. Каттакон тугун қучоқлаган бояги семиз хотин, жомадончамни кўтариб олган Йўлдошхон ака, эскироқ пальто кийган яна бир қиз бор эди. Насиба деб ўйлаб тишларим ғижирлаб кетди. «Нега келдинг» дедими? «Ким чақирди сени» дедими? Ойим ҳар борганида мақтаган, хатида «сени соғиниб қолди», деган синглим шуми? Ажаб, шу тобда негадир Мунавварни кўргим келди.

Тўрттовлашиб шу томонга юришганини кўриб лип этиб ўрнимдан турдим. Керакмас! Кўргани кўзим йўқ! Онамниям, бошқасиниям! Мен уларга бегонаман. Улар ҳам! Перрон томонга энди юрган эдим, ойимнинг йиғлаган хитоби эшитилди.

- Ўғлим! Ҳарсиллаб келиб билагимга осилди. Қайтариб, ўриндиққа ўтқизди. – Ўтир, болам, ўтир! – деди ялиниб.
- Муҳаббат, ошни ол, синглим! Йўлдошхон ака дилкашлик билан шанғиллади. Қовоғимни солиб, бошимни кўтарсам, Насиба эмас, бошқа қиз экан. У дастурхонга ўралган тоғорани очаркан, эски қадрдонлардек салом берди.
- Музаффар ака, аранг топдик сизни, деди жилмайиб.

Бундан чиқди, бу қиз – Йўлдошхон аканинг синглиси... Қизиқ, ҳали нимага кўрмадим уни! Яна Му-

навварни қўмсадим. Ёнимда бўлса... Гаплашиб ўтирсак... Йўқ, бу ҳангомаларни айтмайман. Нима қиламан, юрагини сиқиб? Ўзининг касали етмайдими!

Тугундан устига қази босилган бир тоғора ош, патирлар чиқди.

- Ол, ўғлим, е! Ойим ошга ундади-ю, ўзи ҳиқиллаб йиғлаб юборди. – Кечир мени, болам! Мендан рози бўл!
- Э, ая! Қизиқмисиз? Йўлдошхон ака жомадонни чаққонлик билан очиб, бир шиша ароқ, пиёла чиқарди. Музаффарни нима деб юрибсиз ҳали! Йигит-ку! Сиз укам, кўнглингизга олманг. Амаким аҳмоқ ўзи! Бари бир сиз менинг укамсиз! Тошкентда шундоқ укам бор, деб керилиб юраман. У пиёлага қулқиллатиб ароқ қуяркан, бояги қизни жеркиди. Олмайсанми, бундоқ онар-понардан, Муҳаббат!

Муҳаббат самимий жилмайган кўйи тугун тагидан беш-олтита анор чиқарди.

- Кесинг-да, ака! деди кулимсираб.
- Ма! Йўлдошхон ака пальтосининг чўнтагидан пакки олди. Ўзинг кес! Кейин менинг елкамга қоқди. Музаффар! деди гох менга, гох хамон лаблари титраб унсиз йиглаёттан ойимга қараб. Мен янгамни ая деганман. Демак, сиз мени укамсиз.
- Албатта-да! Гапга семиз хотин аралашди. Қамманглар жигарсанлар. Йўлдошхон Музаффарнинг акаси... Муҳаббатхон... – у бир зум ўйланиб турди-да, қизига қараб жилмайди, – Музаффардан сал каттароқсан-у, бари бир сингилсан! Музаффар йигит киши. Ака дегин, хўпми?
- Қани, олдик! Йўлдошхон ака ароқ тўла пиёлани узатди. - Оппок килиб оласиз...
- ...Вагонга суяб олиб чиқишгани, ойим йиглагани, Йўлдошхон ака билан ўпишиб хайрлашгани-

миз, ойимга қўл силтаб илжайганим... эсимда... Эрталабгача қусиб чиқдим.

## ЎТТИЗ УЧИНЧИ БОБ

#### УМАР ЗАКУНЧИ ХИКОЯСИ

### Қизим маладес: ўзимга тортди!

Қаёқдан келди Шомурод чўлоқнинг итваччаси? Қаммасига манави жодугар айбдор! Шу чақирган! Тошкентга бормай қўювди-ку. Хат ёзганми, телеграмма жўнатганми, ишқилиб чақирган. Бўлмаса ўзидан ўзи кириб келмасди. Қаёқдан билай нима хаёллар билан келган экан! Насиба ўнда ўқияпти. Бундан чиқди анави итваччаси мактабни битирган. Ким билсин, бир азмойиш олиб кўрай-чи, кел, деса бутунлай кўчиб келаман деб ўйлаганми? Она-бола маслаҳатни пишитмоқчи бўлганми! Менга ёпишди-я! Вой, ҳароми-ей! Йўлдошхон қўлимдан тутиб қолмаганда отардим! Тикка отардим!

Бугун кунбуйи ишим юришмади ўзи! Эрталабдан цех бошлиғи билан ғижиллашиб қолдим. Ёт тоза чиқмаяпганмиш. Чигитнинг ўзи ёмон бўлса, тоза ёғни катта холамникидан оламанми?! Бу хотинни ким цехга началник қилиб қуйган ўзи? Катталарга кузини сузган-да... Нуқул менга тирғалади. Қул учида ишлайсиз дейди, масъулиятсиз одамсиз дейди. Аввал мен қилган хизматнинг ўндан бирини қил! Гапни ким қуйибди сенга! Поччалар ача булди, ачалар почча булди, деб сенга буйин эгиб юрибман-а, энди. У ёқда қачондан бери телефон туширолмайман. Менам одамларга ўхшаб яшагим келади. Уйимда ўтириб, у ёқ бу ёққа телефон қилгим келади! Нега энди кечагина институтни битир-

ган мишиқи Йўлдошхонда телефон бўлиши керагу менда бўлмаслиги керак? Телефон тармогининг бошлиғига шуни айтсам, точка йўқлигини пеш қилади. Райисполкомга арз қилишим керакмиш! Сочи узун, ақли қисқа цех бошлиғи билан ғижиллашганим етмаганидек, ижроком раиси билан хам сан-манга бориб қолдим. Қўйиб берсам, ёш бола фахмлаб насихат қилмоқчи! «Йўлдош Усмонович замглавврач, поликлиникада бирон кор-хол бўлса, чақириб олишади. Докторларга биринчи навбатда телефон берилади, бало-баттар!» Биламиз, қанақа қилиб замглавврач бўлганини! Кўричакни ичбуруғдан ажратолмайди-ю, доктор эмиш! «Жиянингиз билан бир ховлида тураркансиз-ку, бўлди-да, битта телефон етмайдими?» дейди. Йўлдошхон билан нима ишим бор! Телефон қиламан деб янгамнинг уйига ялиниб киришим керакми? «Жуда бўлмаса параллел аппарат ўрнатиб бера қолайлик», эмиш. Энди томоги огриб қолган аллақандай кўксовнинг ярим кечада жиринг-жиринг қилиши етмай турувди. Йўқ! Менга личний телефон керак. Ўзимга! Алоҳида! Собственнуй номер! Тағин кузини гулайтириб, «ишонмасангиз горисполкомнинг алоқа бўлимига мурожаат қилинг», дейди. Насихатингни отангга қил! Хеч нарсани билмайди деб ўйлайсанми? Юз сўм чиқариб, столингни тортмасига солиб қўйсам-ку, бошқача сайраб қоласан! Алоқа бўлимингдагилар ҳам ўзингга ўхшаган порахўр-да! Йўқ, бўлим-пўлимингни билмайман. Тўппа-тўгри горисполкомингни раиси билан гаплашиб қўя қоламан. ўинг десин-чи! Гирибонидан бўғиб, деразадан улоқтириб юбораман. Мен уруш йиллари фронт орқасини мустахкамлаш учун қон тўкиб юрганимда сенларни онанг орқангни тугиб қўярди!

Ўзим қонимга ташна бўлиб келсам, аҳвол бу! Қачон қараса, ёлғиз қизни турткилайди, азоб беради! Энди ўғиллари келиб, тиллари узун бўп қопти-да! Яхшиям Насиба ўзимга тортгани: бир сўзли, принципиал. Бари бир қиз бола – қиз бола-да! Анови ҳаромини кетидан қувмоқчи эдим, дод солиб қолди.

# – Дадажон! Аям ўляпти!

Қаёқда ўлади! Ёлғондан қилади. Қачон қараса, юрагини чангаллайди. Дори ичади. Юраги касаллигини баҳона қилиб, ишдан ҳам бўшаб олди. Боқим бўлиб ўтирибди, текинхўр!

Ростданга ўхшайди-ку! Оғзидан кўпик чиқиб, қорда чўзилиб ётибди. Келиб, юзига қарасам тишлари гирих, оёқ-қўли чангак бўп қопти. Музлаб кетяпти. Чатоқ қилдим. Ўлиб қолса... Хотин-ку топилмас матох эмас. Заводда кўзини сузиб юрган жувонлар сон-мингта. Аммо... Қизим етим қолса... Ундан кейин... ўлик кўмиш осонми? Тузатсин, анави Йўлдошхон! Доктор номи бор-ку! Шуни врач қилгунча оёғи олти, қўли етти бўлиб югурди-ку, «аячаси!» Топганини шунга тиқди-ку! Устига устак мени алдади. Боплаб лақиллатди. Тошкентдаги ховли ҳайф кетди! Эсиз-эсиз шундай уй-жойлар! Бу ёқда мени алдаб юриб, у ёқда ҳамма ҳужжатларни расмийлаштириб бўлган экан.

Айтмадимми, ёлғондан қилади деб. Йўлдошхон иккита укол қилиши билан ҳушига келди. Кўзини очиши билан: «Музаффар!» дейди.

Тағин ўшани гапиради-я! Йўлдошхонни айтмайсизми! Раънонинг томирини ушлаб туриб, менга ўдағайлайди:

- Кечирасиз-ку, амаки, одаммассиз!

Энди сиз одам бўлдингизу биз одаммасми. Тўйдирганнинг қорнига... деб шуни айтаркан-да!

Мен бўлмасам дўппифуруш онангу синглинг билан кўчага чиқиб тиланчилик қилардинг! Сени мен ўқитдим, мен одам қилдим. Синглингни мен заводга опкириб қўйдим. Анави итдан тарқаган ким бўлади сенга? Икки туғиб, бир қолганингми? Нари борса Сойбўйига обтушиб чойхонада битта ош қилиб берарсан! Кейин нима бўлади? Бу ёгини менга танми? Уч кунда бир ликиллаб келаверса думингни тутқизмай қочиб қоларсан. Аравангни торт, сўтак! Аралашма бировнинг ишига.

Раъно ўзи ўламан дейди-ю, аланг-жаланг қилиб нуқул ўғлини суриштиради. Энсам қотиб турсаям юпатдим:

– Шуни олдинроқ айтмайсанми. Ўғлинг эканини туш кўрибманми?

Дарров юзига қон югурди. ўимирлаб қолди! Йўлдошхон қимирламай ётинг, ўзим топиб келаман, десаям кўнмади. Овсини билан йўлга тушиб қолди. Ўладиган одам шундоқ совукда кўчага чикадими?

Насиба бари бир принципиаллик қилди. Янгам, Йўлдошхон, Муҳаббат тугун-терсакни поликлини-канинг эски «Москвич»ига ортиб чиҳишганида ҳизим очиҳ-ойдин айтди:

# - Мен бормайман!

Сезиб турибман, онасига ачиняпти-ю, аммо бир сўзли эканини кўрсатди. Маладес! Отасининг қизи-да! Падарингга қусур! Машинага ўтираётиб Насибани дуойибад қилди-я. Ўз қизини қарғади-я!

«Илоё жувонмарг бўл. Илоё бахти қаро бўл!» Шунақа деди-я, ифлос!

Насиба хафа бўлганича бор экан-да! Бу кишим қизимни Тошкентга юборадиган бўптилар. Ўгиллари ўқитадиган бўпти! Насибанинг шу ўгайваччага кўзи учиб турган экан-да! Қизимни Тошкентга,

ўша чўлоқ билан Робиянинг олдига юборарканманми? Мен-а? Насибани-я! Ўзингни орқангга супурги боғлаб Тошкентга бадарға қилиб юбормай тағин!

– Наси! Қизим, таҳоратга сув исит. Жойнамозим қани?

# ЎТТИЗ ТЎРТИНЧИ БОБ

#### РАЪНО ХИКОЯСИ

#### Эсиз умр

Билардим! Кўнглим сезган эди. Умар ака ўглимни сигиштирмаслигини билардим. Аммо бунчалик бўлишига ақлим етмаган эди. Хар қандай бағритош одамда хам ақалли жиндай мехр бўлади. Хар қандай уятсиз одамда хам ақалли зиғирча андиша бўлади. Бунда йўқ экан! На униси, на буниси! Шунча йилдан бери кўзларим тешилиб кутган боламни бир кунга сиғдирмади-я! Музаффар кўч-кўронини кўтариб келгани йўқ эди-ку! Уйингни эгаллаб олмасди-ку, беномус! Отасига, ўгай онасига не бахоналар қилиб келганикин? Энди нима дейди? Ўгай отам уйидан хайдади, дейдими! Жудо бўлдим! Бир умрга жудо бўлдим боламдан! Нимага бу одам шунчалик ёмон! Нимага ўзидан бошқа хаммани, хаммани ёмон кўради? Нимага хеч кимга ўхшамайди?! Ўглимни умрида биринчи марта кўриб турган Ойсара опам, Йўлдошхон, Муҳаббат кўрсатган мехрнинг ўндан бириям йўкми унда! Бу разил хеч бўлмаса мендан андиша қилса бўлмайдими! Яхшими-ёмонми, шунча йил бир ёстиққа бош қўйдик! Ақалли бир вақтлардаги мухаббатимизнинг юз-хотири йўкмиди!

Муҳаббат? Нима у муҳаббат? Муҳаббатнинг кўчасидан ўтганми ўзи бу! Қўйиб берсангиз «Муҳаббатни нимага қўшиб ейди?» дейишдан тоймайди-ку! Бунақаларга нима керак ўзи? Фойда, мансаб, манфаат. Мана, нима учун яшайди! Ўзига манфаат тегмаган ерда ҳамма нарса бир пул!

Бир замонлар раислигида бунчалик эмасди. Ўзгарди. Ёмон томонга ўзгариб кетди. Билмадим, балки ўшанда ҳам шунақа бўлгандир, мен сезмагандирман.

Ë тавба! Халқ минг йил ўйлаб битта гап айтаркан. «Ўгри қариса - сўфи бўлади», дейишса ишонмасдим. Тўппа-тўгри экан. Бу кишим энди «художўй» бўлиб қолдилар. Беш вақт бекитиқча намоз ўқийдилар. Нима? Қилган гунохларингни ювмоқчимисан? Йўқ, айб қилган одам гунохини одамлар олдида ювади; ақалли эс-хушини йиғиб, бошқа айб қилмасликка уринади! Сен-чи? Ўшанда, бугдойзор четидаги сада тагида хамма сенинг юзингга туфлаганида, мен ачингандим! Хамма, хатто кўзингни ёгини еган Соли сўпок хам юз ўгирганида мен йўқлаб боргандим сени! Начора, сенга ишонардим. Эл-юрт хизматида юрган, ўзининг хузур-халоватидан кечган одам деб ўйлардим. Минг таассуф! Билмабман. Одам эл назаридан қолса, тавбасига таянади. Сен, сен номард эса яхши бўлиш ўрнига баттар айнадинг! Озми-кўпми одамгарчилигингни хам йўкотдинг. Биттаю битта дардинг - пул топишу хузур-халоват бўлиб қолди. Чидадим! Ўртамиздаги бола хурмати – Насиба хурмати хаммасига чидадим. Билмабманки, ўз қизимни аллақачон ўзимга душман қилиб қўйган экансан! Билмабманки, уям сенга тортибди. Фақат ўзини яхши кўради. Ўзидан бошқа хеч кимни қурбақачилик ҳам, тошбақачалик ҳам кўрмайди. Хаммадан жирканади! Хаммадан! Мен уятсиз, мен ёлгончи Музаффарни ҳар кўрганда алдадим. Хар хатимда ёлгон гапларни ёздим. «Синглинг сени яхши кўради, сени соғиниб кетди», дедим. Етти йил аввал борганимда ҳам, кейинги сафарда ҳам, телеграммаю хатларда ҳам... Ажаб, худди ёш боладек ўзим тўқиган ёлғонга ўзим ишонган эканман. Ана, «Яхши кўрадиган», «соғинадиган» сингилнинг холи! Қиз бола хам шунчалик бағритош бўладими? «Аканг Тошкентга обориб ўқитади», деганимга шунча сапчийсанми, жувонмарг! Синглим деб атайлаб поездга осилиб кепти-ку, киз ўлгур! Қўлингдан судраб кетаётгани йўқ эди-ку, сени. Ўгай онанинг қўлига топшириб эсини еган жинни эмасман-ку! Нима? Ким ўгай! Робиями? Хечам-да! Мен ўгайман! Музаффарга мен ўгайман! Робия мендан кўра минг марта яхши! Ўғлимни ўн етти йил бокди. Бировнинг боласини! Менинг ўглимни. Ўз онасининг уйига келганда эса бир кунга сиғмади. Хаммасини сен бошладинг. Қиз бўлмай бўйинг лахадда чирисин!

Халиям қарғадим-а! Бахти қаро бўл, дедим-а! Йўқ, хато қилдим! Нима кераги бор! Қайси она ўз боласининг бахти қаро бўлишини хоҳлайди?! Қайтиб олдим, сўзимни қайтиб олдим. Аммо ўғлимдан жудо бўлдим.

...Хали нима деди анави! «Ўғлинг эканини туш кўрибманми, тушунтириброқ гапирсанг бўлмайдими», дедими! Вой, мунофиқ! Вой, разил! Вой, мараз! Сени билмасам экан. Бўлган-турганинг тирногимнинг юзида-ку! Билдинг! Билиб туриб қилдинг! Мунча ёмон бу одам-а! Нимага ер ютмайди! Қандоқ қилиб шунинг тузогига илиндим! Йигир-

ма икки йил... Йигирма икки йиллик умрим хазон бўлди. Ёшим элликка етмасидан инвалид бўлдим... Эсиз умр... Эсиз одам... Эсиз умидларим! Хаммаси қаро ерга кўмилди. Кимман ўзи? Мен ҳам одамманми? Мен ҳам онаманми?

Ана, поезд кетяпти. Ўғлимни олиб кетяпти. Бир умрга, бутунлай... Энди кўролмайман. Боламни ҳеч ҳачон кўролмайман. Ана, вагон эшигидан ҳараб кулиб турибди. Ёлғон-ку! Кулиши ҳам, ҳўл силташи ҳам ёлғон-ку! Ўлганининг кунидан куляпти-ку!

– Музаффар! Рози бўл! Энди кўришмаймиз, болам!

## ЎТТИЗ БЕШИНЧИ БОБ

# ИККИНЧИ БОСҚИЧ ТАЛАБАСИ МУЗАФФАР ШОМУРОДОВ ХИКОЯСИ

### Аммам Кимсан акамни таниди

Мунавварни текстилгача кузатиб қўяман-да, троллейбусда қайтаман. Қар куни шу йўлдан юраман. Кўча четидаги эски мозор ўрнида қурилаётган хиёбонни ҳар куни кўраман. Аввал майдон текисланди. Кейин қатор-қатор кумушранг арчалар экилди. Зиналарга мармар кошинлар ёпиштирилди. Ундан кейин тепаликни тахта девор билан ўраб қўйишди. Шу жойда «Номаълум аскар билан ўамгузор она»га ҳайкал очилиши қулоғимга чалинди.

Авваллари бу ерда троллейбус тўхтамас эди. Бугун негадир тўхтади. Ойнабанд эшиклар тарақлаб очилди.

- «Fамгузор она» бекати! - деди ҳайдовчи хотин микрофонда эълон қилиб. - Эртага эрталаб, ғала-

банинг йигирма йиллиги муносабати билан ҳайкал очилади.

Троллейбусдагилар беихтиёр ўнг томонга ўгрилди... Яхлит ойнадан қарасам, тахта девор олиб ташланибди. Лекин тепаликдаги рўпарама-рўпара иккита ҳайкал устига мато ёпиб кўйилибди. Хиёбон яшнаб кетган эди. Кумушранг арчалар текис саф тортиб турибди. «Президент» гуллари, лолалар, гулсафсарлар кечки шафақда ловуллайди. Ерга сариқ қум сепилган. Хиёбоннинг икки томонига терилган мармар плиталарда олтин юлдуз тасвири, тагига қатор шаҳарларнинг номи ёзиб қўйилган. «Москва», «Ленинград», «Одесса...» У ёғини ўқий олмадим. Ойнабанд эшиклар тарақлаб ёпилди. Троллейбус ғизиллаб кетди.

«Эрталаб албатта келаман! Хайкал очилишини томоша қиламан!»

Шу хаёлни кўнглимга тугиб уйга келсам, айвонда «Қора аммам» ўтирган экан. Аммам келган куни уйимиз тўлиб кетгандай бўлади. Ҳаммамизнинг кўнглимизга аллақандай нурли осойишталик чўкканга ўхшайди. Ҳозир ҳам шунаҳа бўлди: севиниб кетдим. Ойим айвондаги хонтахта ҳиррасига ҳистирилган ҳиймалагичдан гўшт чиҳарар, кўрпачада ўтирган аммам ҳиймани гуручга аралаштириб, лагандаги ток баргига ўрар эди. Чопиб ёнига бориб, чўккаладим. Аммам ҳийма юҳи ҳўли билан кўйлагимни ифлос ҳилмаслик учун авайлаб елкамга ҳоҳаркан, гина ҳилди.

– Сенам амма – эшигингга тамба дейдиган бола чиқдинг, – деди нафаси қисилиб. – Ўзим келмасам, бувимнинг ҳоли нима кечди, деб бормайсанам.

Рост айтади. Бултур қишда – Қўқонга бориб келганимдан кейин икки-уч марта бордиму кейин

вақт бўлмади. Қишда ўқиш, ёзда талабалар отряди билан Қозоғистонга – қўриққа ҳашарга борганмиз. Аммамнинг ўзи биздан хабар олиб туради.

- Вақти йўқ-да, аммажониси! Ойим менинг ёнимни олишдан ҳам кўра аммамни юпатиш учун тушунтирди. Ўқиши оғир.
- Майли... аммам хўрсинди. Қаерда бўлсангам тинч бўл, болам. Ўз қўлим билан ток оши қилиб берай деб барг обкелдим. Ток ошини яхши кўрасан-ку!..

Ичкаридан Омон бир коса қулупнай кўтариб чиқди.

- Аммам олиб келдилар, ака! - деди илжайиб.

Аммам зўр-да! Мункиллаб қолгану ҳовлисидаги беш-олти ариқ қулупнайни ҳалиям ўзи парвариш-лайди. Томорқасидаги токларга ўзи қарайди.

- Егин, сениям оғзинг тегсин! - деди ҳарсиллаб.

Қулупнай еб ўтириб, аммамга разм солдим. Ёш боланикидек кичкина, хол-хол дог босган қўллари титрайди, ичидаги «одамчалар» муттасил ҳуштак чалади... Шу ҳолига бир зум тиним билмайди. Мана, ҳозир ҳам ойимга ҳарашяпти. Одатини биламан, ҳўлидан ишини олсангиз жаҳли чиҳади. «Тирик эканман, ҳимирлайман, ишламасам касал бўлиб ҳоламан», дейди.

– Эртага оддихингми? – Ойим қиймалагич бандини айлантирар экан, менга қарамай сўради. – Эрталаб Омон билан паст бозорга тушиб келсанг. Сабзи ўлгур қолмабди.

Гапга аммам аралашди.

- Кўп олмагин, болам. Қурбақа қурилладими, сабзи пўнг бўлди, деявер. Эрта-индин янгиси чиқади.
- Пешиндан кейин тушаман, дедим. Эрталаб бир жойга бормоқчийдим. Ҳайкал очиларкан.

- А? Аммамнинг қулоғи оғир бўлгани учун гапимни яхши эшитмадими, сувга тушган тошдек хира кўзларини пирпиратиб кўзимга тикилди. Қанақа ҳайкал?
- Янги хиёбон, дедим овозимни кўтариброқ.
  Хайкал очиларкан, амма. «Номаълум аскар» ҳайкали.
- Қатта? Аммамнинг хира кўзлари ярақлаб кетгандек бўлди.
  - Шаҳарда, дедим оғриниброқ.
- Менам бораман! Тўсатдан аммамнинг қайсарлиги тутди. – Оборасан!

Иккиланиб қолдим. Нимагаям айтдим-а? Митинг бўлади. Юзлаб одам йигилади. Кампир одамни қийнаб нима қиламан, ўзи зўрга юрибди. Аммам хоҳламай турганимни сезди.

 Бораман! – деди нафаси қиттиқ ғижирлаб. – Айт, Робия, оборсин!

Ойим менга қараб лабини тишлади. «Нима қилардинг, шу гапни очиб» дегандек қовоғини солди. Аммам сезгир-да! Ярқ этиб ойимга юзланди.

- Ҳа! Хоҳламаяпсанми? Қатталигини айт: ўзим топиб бораман. Қўлидаги тугилган токни лаганга ташлаб, кўзимга термилди. Ичидаги «одамчалар» баралла ҳуштак чала бошлади. Қарасам, хафа бўляпти.
  - Обораман, амма, обораман! дедим юпатиб.
- Шояд Кимсанимнинг камандирини топсам... аммам бу гапни шунчалик содда умид билан айтдики, ойимнинг қиймалагич бандидан тутган қўли титраб кетганини сездим.
- Хаммамиз борамиз, ойи! деди ерга қараб. Укангизам борадилар.

Етиб келганимизда тумонат одам тўпланган эди. Харбий кийимдаги кишилар, орден таққан эркак-аёллар, гулдаста кўтарган ўқувчилар арчалар соясида туришарди. Мусиқа тантанали марш чалади. Офтоб нурида яшнаб ётган гулзорда атиргулларнинг ўткир хиди анқийди. Гулсафсарлар бинафшаранг оловдек товланади. Дадам ҳам костюмининг кўкрагига нишонларини тақиб олганига хурсанд бўлдим. Аммамнинг бир қўлтигидан ойим, биттасидан мен олиб, кумушранг арча соясига ўтиб турдик.

- Қани? аммам ҳансираб, атрофга аланглади.– Қани ҳайкал!
- Ҳозир очишади, устига оқ мато ёпилган ҳайкалга имо қилиб тушунтирдим, – катталар келсин, очишади!

Чорак соатчадан кейин мусиқа тўсатдан тинди. Қўлида автомат тутган элликтача аскар ҳай-калнинг икки томонида саф тортди. Кўча томонда машина гувиллагани эшитилди. Иккита қора «Чайка» гизиллаб келиб таққа тўхтади. Шимининг почасига энли қизил лента тақилган генерал, кетидан офицерлар тушди. Одамлар четлаб йўл беришди. Алп қоматли, қорақош генерал шаҳдам қадамлар билан устига мато ёпилган ҳайкал томон юрди. Офицерлар унга эргашишди.

Генерал ҳайкал олдидаги тахта супачага чиқди-да, микрофонга яқин келди.

- Ўртоқлар! деди босиқ овозда. Хиёбон атрофидаги симёгочларга карнайлар илинганини энди билдим. Беш-олти карнайдан баравар «ўртоқлар» деган садо кетма-кет жаранглади.
- Бугун биз Улуғ ғалабанинг йигирма йиллигини нишонлаяпмиз, деди генерал босиқ, аммо ҳаяжон

сезилиб турган оҳангда. – Жаҳон урушида йигирма миллиондан ортиқ кишидан жудо булдик.

Кимдир хўрсинди. Назаримда аммам йиглаётгандай бўлди. Юрагим сиқилиб секин қарасам, йўк, аммам йигламаяпти. Фақат нафаси қисиб, чуқур-чуқур энтикяпти. Дадам қаддини гоз тутиб, генералнинг гапини эшитяпти. Ойим аммамни қўлтиқлаганча ранги ўчиброқ турибди.

- Камандири ўшами, Шомурод? Аммам дадамнинг енгидан тортди. Шуми?
- Нимайди? деди дадам генералнинг гапини эшитмай қолишдан чўчигандек шивирлаб.
- Сўрайман! Аммам томоги гижирлаб, қатъият билан минбар томонга имо қилди. Катта камандир бўлса айтсин, Кимсаним қаёқда?
- Секин... Дадам бармогини лабига босиб, янаям пастрок овозда шивирлади. Кейин... опа... Хозир олдига бориб бўлмайди. Кўриб турибсиз, маъруза бўляпти.

Аммамни ҳеч нарса қизиқтирмас, томоғи ғижирлар, ҳира кўзлари умидли мўлтиллар эди. Лекин дадамнинг гапи таъсир қилди шекилли, жим бўлди.

Генерал ҳамон вазмин, йўгон овозда гапирар, богдаги карнайлар унинг овозини гулдиратиб, атрофга таратар эди. У бугун Номаълум аскарга ҳайкал очилаётганини, халҳ дунёни фашизм зулмидан саҳлаб ҳолган жангчиларимизни ҳеч ҳачон унутмаслигини айтиб, сўзини тугатди. Жимлик чўкди. Дадам бирдан ҳайратли хитоб ҳилди.

## - Ие, Оқсоқол-ку!

Қарасам Комил бува Ориф оқсоқолни ёнбошига кириб, тахта супачага олиб чиқяпти. Оқсоқол бува бошдан-оёқ оппоқ кийинган. Эгнида оқ яктак, оқ шим. Делвагай очилган ёқасини тўлдирган оппоқ соқоли шабадада хилпираб турган оқ байроққа ўхшайди.

## - Болаларим!

Мункиллаб қолгандек кўринаётган чолнинг овози карнайлардан шундай ўктам жаранглаб эшитилдики, шивир-шивир қилаётган одамлар тақатақ жимиб қолишди.

– Дунёда ҳамма нарса унутилади, – деди у янгроқ овозда. – Аммо-локин фарзанд догини унутиб бўлмайди. Бу ҳайкаллар очилаётгани бежиз эмас. Мен биламан, болаларим: бу ёги Нўгайқўргон, у ёги Кўтарма томонларда белида белбоги бор не-не йигитлар шаҳид кетди. Қанча фарзандлар отасиз қолди. Қанчадан-қанча оналар ҳалиям боласининг йўлига кўз тикиб ўтирибди.

Бир маҳал ёнбошимда кимдир энтикаётгани қулоғимга кирди. Қарасам, «Қора аммам» йиғлаяпти. Йўқ, кўзидан ёш чиқмаяпти-ю титраб-титраб йиғлаяпти. Елкасидан қучоқлаб олдим.

– Болаларим! – деди Оқсоқол яна гулдираб. – Эс-ҳуши жойида одам ўзи ётган бешикни ўзи тепиб синдирмайди. Эс-ҳуши жойида одам ўз уйига ўт ҳўймайди. Эс-ҳуши жойида одам ўз онасига ҳўл ҡўтармайди. Аммо ер юзида ҳалиям янги уруш очишни хаёл ҳилаётган номардлар бор. Энди уруш бўлмасин десаларинг мана шу ҳўшалоҳ ҳайкални тавоф ҳилинглар. Бу... – Шу ерга келганда Оҳсоҳолнинг овози титраб кетди. – Бу... табаррук ҳайкал.

Мусиқа янгради. Қарсаклар гувиллади. Оқсоқол қултиғига кирмоқчи булган табиб бувани беозор нари сурди-да, қаддини ғоз тутиб тахта супачадан тушди.

Генерал ҳайкаллардан бирининг боғичидан тортган эди, бошига рўмол ташлаганча узоқ-узоқларга маъюс термилиб ўтирган Она пайдо бўлди. У катта-катта, сертомир қўлларини тиззасига қўйиб, бошини қуйи солиб ўтирар, кўзларида чек-

сиз мунг... умид бор эди. Негадир вужудим сесканиб кетди. Ахир бу... аммам-ку. «Қора аммам»нинг ўзи-ку! Нўгайқўргонга, уйига борганимда худди шу алпозда ўтирганини кўрганман, кўп кўрганман.

Ажаб, қулоғим остида «Қора аммам»нинг ғижғиж нафас олганча айтган ашуласи яна эшитилиб кетгандек бўлди.

> Жон болам, жоним болам, Оллога топширдим сани. Охимга Олло етмади, Тупроққа топширдим сани...

Мусиқа бир зум тинди. Лекин ўша заҳоти тилларанг карнайлар яна тантанали марш чалди. Генерал иккинчи ҳайкалнинг ҳам ипини тортди. Бу ҳайкал пастроқ экан, олдимни одамлар тўсиб тургани учун кўролмадим. Яна қарсак гувиллади. Генерал кимдир ёқиб узатган машъалани қўлида баланд кўтариб, икки ҳайкал ўртасидаги мангу оловни ёқди шекилли, мусиқа авжига чиқди. Саф тортиб турган аскарлар автоматини осмонга қаратиб, баравар ўқ узди.

Одамлар ўзанини бузган дарёдек шовуллаб ўша томонга оқди. Кимдир йиглар, кимдир қўлидаги гулдастаси эзилишидан қўрқиб, боши устида баланд кўтарганча ҳайкал томонга талпинар эди.

Нихоят одамлар сийраклашди.

– Юринг, опа! – Дадам аммамнинг қўлидан тутди. Чўлоқланиб йўл бошлади. Аммам мармар зиналардан туртиниб-суртиниб ҳайкал томонга талпинди.

Аммамга ўхшаган ўамгузор она кафтларини тиззасига қўйганча бошини қуйи солиб ўтирар, ҳайкал пойи гулларга кўмилиб кетган, кимдир гул-

дастасини ерга ташлашга кўнгли бўлмай Онанинг тиззасига кўндаланг қўндириб қўйган эди.

Она ҳайкалидан ўн қадамча беридаги Номаълум аскарни энди кўрдим. Буниси анча кичкина ҳайкал эди. У худди онасини ҳимоя қилишга шайлангандек, траншеядан чиқиб келар, бошига каска кийиб олган, ўнг қўлида граната, чап қўлида автомат бор эди. Иккала ҳайкал ўртасида бронза юлдуз, юлдузнинг қоқ марказида мангу олов ловуллаб ёняпти. Йигит ҳайкали ҳам гулларга кўмилиб кетган, атиргуллар, лолалар, чучмомалар ранго-ранг товланарди. Ҳозир осмонга автоматдан ўқ узган аскарлардан иккитаси Она ҳайкали ёнида, яна иккитаси Номаълум аскар ёнбошида қуролини кўксига босганча, гоз турибди.

– Боле-ем! – Қулоғимнинг тагида янграган фарёддан сесканиб кетдим. – Онасининг гўрига тушган боле-е-ем! – Аммам дадамнинг қўлидан юлқиниб чиқди-ю, каловланиб, йигит ҳайкалига талпинди. Югуриб бориб, ҳайкални қучоқлади. – Онасини доғда қолдириб кетган Кимсани-и-им! Жон болам. Жоним болам! – У ҳайкалнинг каскали бошидан қучоқлаб ўпа бошлади. Рўмоли сирғалиб тушиб, ҳайкалнинг автоматига илиниб қолди. Оппоқ сочлари тўзғиб кетди.

Ойим югуриб бориб аммамни багрига босди.

- Ойи! Унақа қилманг, ойижон!

Хайкал олдида постда автомат тутиб турган аскар йигитлар қилт этмади. Аммо иккаласининг ҳам лаблари титраб кетганини кўрдим.

Дадам иккаламиз чопиб бордик.

– Опа! – Дадам рўмолни илиниб қолган жойидан олиб аммамнинг оппоқ сочли бошига ташлади. – Опа! Туринг!

Ойим хам лабларини тишлаганча йиглаб юборди.

- Ойижон! деди ялиниб. Бўлди, ойи! У аммамнинг қўлтигидан кўтарган эди, «Қора аммам» талмовсираб атрофга қаради. Кўзларида болаларча ҳайрат бор эди.
- Робия, қизим! деди тишсиз оғзини ҳайрон очиб. Танимадингми? Кимсан аканг-ку!

Қизиқ, ойим ҳам «Қора аммам»ни қучоқлаганча ҳайкалнинг юзига юзини босиб, титроқ кафти билан «Номаълум аскар»нинг каскали бошини силади.

- Ойижон! деди йиглаб. Қуйинг, унақа қилманг!
  - Амма, дедим мен ҳам ялиниб. Юринг...

Ниҳоят аммамни амаллаб ўрнидан тургиздик. Ҳайкал четида фахрий қоровулда турган аскар йигитлар автоматни кўксига босганча қилт этмас, фақат чап томондаги мен тенги йигитнинг кўзларида ёш сизиб чиққан, нуқул пастки лабини тишлар эди.

## ЎТТИЗ ОЛТИНЧИ БОБ

# НОМАЪЛУМ АСКАР КИМСАН ҲУСАНОВ ХИКОЯСИ

## Одамлар, хушёр бўлинг!

Мархумлар ҳеч нимани кўрмайди, деб ўйлайсизми? Марҳумлар ҳеч нимани эшитмайди деб ўйлайсизми? Марҳумлар ҳеч нимани билмайди, деб ким айтди сизга! Биз ҳаммангизни кўриб турамиз, ҳамма гапингизни эшитамиз. Фаҳат сиз — тириклар бизнинг гапимизни эшитмайсиз. Бизнинг сиздан фарҳимиз шуки, олдингизга юриб боролмай-

миз. Шунинг учун ора-чора тушингизга кириб турамиз. Сиз билан тушингизда гаплашамиз.

Ана, ойим! Ўн қадам нарида, кафтини тиззасига қўйиб, маъюс кўзларини олисларга тикиб ўтирибди. Худди эшик олдига чиқиб, ботиб бораётган қуёшга термилган кўйи йўл пойлаётгандек. Ўртамизда ёниб турган гулхан тафти иккаламизга баравар уряпти. Нарирокда гулсафсарлар очилиб ётибди. Худди ҳовлимиздагига ўхшаган гулсафсарлар. Ростимни айтсам, шу гулни жудаям соғингандим...

Биламан, бу — ойимнинг ҳайкали. Аммо бугун онамнинг ўзини ҳам кўрдим. Тирик дийдорини! Йўқ, аввал Оқсоқолни кўрдим. Мункиллаб ҳопти. Аммо овози, гап-сўзи ҳамон ўша-ўша... Кейин ёнимга ойим келди. Қариб, бир ҳовуч суяк бўлиб ҳолибди. Сочлари оппоҳ... Ўшанда — вокзалга кузатиб чиҳҳанида бунчалик эмасди. Фаҳат кўзлари ўша... Бошимни силаган ҳўллари ўша... Уям мени таниди. Дарров таниди! Онамнинг ҡўз ёши юзимга томганида юпатдим.

«Ойижон! Нега йиглайсиз? Мана, дийдор кўришдик-ку!»

Афсус, ойим гапимни эшитмади. Начора, сиз – тириклар бизнинг овозимизни эшитмайсиз.

Робия ойимнинг қўлларини бўйнимдан ажратиб олаётганда вужудим титраб кетди. Соғингандим, жуда соғингандим.

«Робия! Мени танимадинг-а! Соғиниб кетдим-ку!»

Робия ҳам эшитмади. Аммо онам бу сафар гапимни тушунди.

«Танимадингми, қизим! Кимсан аканг-ку!»

Сездим. Робия ҳам мени таниди. Танигани учун юзини-юзимга қуйиб йиғлади. Уям ўзгарибди.

Сочлари қандоқ узун эди! Бошини ювса, кечгача сочини қуритолмай офтобга солиб ўтирарди... ўшанда Рашид абзининг мўрчасидан Оқсоқолнинг келинлари билан қайтаётганида ҳам сочлари нам эди. Майин ис таратиб турарди. Сочига оқ оралабди... Кўзлари қандоқ ёниб, қандоқ кулиб қарарди менга! Тоғам уйланган куни – қирқ биринчи йилнинг Биринчи Май байрамида шаҳарга театрга тушганимизда, ойдин кечада икковлашиб қайтаётганимизда жуда чиройли, жуда бошқача кулган эди. Ҳозир қандайдир чарчоқ, маъюс ифода кўрдим кўзларида. Қизиқ, Робия қариб кетибдими? Ахир мен қариганим йўқ-ку! Ўн тўққиздаман. Бундан чиқди Робия энди ўн саккизга киряпти. Нимага унақа! Нимага сочига оқ тушади!

Анави ким? Шомурод тоғамга ўхшайди-ку! Худди ўзи! Фақат мўйлов қўйиб юборибди. Нега оқсоқланади? Э, бўлди! Демак ярадор бўлган. Тоғам урушга кетганини Робия ёзган эди. Кўксида нишонлар. Бундан чиқди яхши жанг қилган. Тоғам қам қариб қопти. Сочининг қорасидан оқи кўп...

Фақат анави йигитчани танимадим. Ясаниб олган новча йигит ким? «Амма» деб ойимга ёпишдими? Бундан чиқди Шомурод тоғамнинг ўғли. Менинг жияним!.. Унақа бўлса, нега Робияни ойи деб гапирди. Робия нега тоғам билан келди? Балки... Начора! Бўлса-бордир! Мен... энди мархумман-ку.

Бари бир, бахтлиман! Ана, ёнимда ойим ўтирибди. Энди бизни бир-биримиздан ҳеч ким жудо ҳилолмайди. Абадий ёнма-ён турамиз. Дунёда бахтли тасодифлар бўлмайди, деб ким айтади? Угри дарёсининг ҳиргогидан худди менинг хокимни олишгани бахтли тасодиф эмасми! Тагин худди шу ерга – ўз юртимга олиб келишгани бахт эмасми?

Мархумлар ҳеч нимани эсламайди, десангиз хато қиласиз. Марҳумларнинг хотираси сиз – тирикларникидан яхшироқ бўлади. Негаки, сиз тирикликнинг минг хил ташвиши билан елиб-югурасиз. Бизнинг эса хотираларни эслашдан бошқа юмушимиз йўқ.

\* \* \*

Калуга шахрининг шундоқ этагидан Угри дарёси ўтади. Козёлск деган шахарча бор. Биз мархумлар-ку, юролмаймиз. Аммо сиз йўлингиз тушса ўша томонларга боринг. Қирқ иккинчи йилнинг февралида Ўзбекистонда бодом гулласа гуллагандир. Аммо у ерларда хали қахратон қиш эди. «Номсиз тепалик» деган ашулани кўп эшитгансиз. У юртнинг беадад текисликларида нима кўп номсиз тепаликлар кўп. Аммо ўша қўшиқ худди шу ердаги тепаликларга бағишланған. Биз пиёдалар ротаси ўшанақа номсиз тепаликлардан биттасига жойлашиб олгандик. Ротамиз номигагина қолган. Ҳаммаси бўлиб икки киши эдик. Мен билан Тенгиз деган грузин бола! Мен ҳазиллашиб уни Денгиз деб чақирардим. Тепаликдан қор босган Козёлск шахарчаси кафтдек кўриниб турарди. Кўп уйлар ёниб кулга айланган, факат мўриси сўппайиб қолған... Якка-ёлғиз черков ғариб шумшайиб турибди.

Ўша куни фашистлар тонг-саҳардан ҳужум бошлади. Аввалига замбаракдан ўқ узиб тепаликни тит-пит қилиб юборди. Камида бутун бир батальон жойлашиб олган деб ўйласа керак. Кейин қор босган қияликдан танклар ўрмалаб чиқа бошлади. Ажаб, икки кишига учта танк!

Занжирли ғилдирагидан қор сачратиб келаётган биринчи танк яқинлашиши билан брустверга тармашиб чиқиб, шиша бутилкани улоқтирдиму ўзимни окопга ташладим. Олд томонда шишанинг жаранглаб сингани эшитилди. Лоп этиб олов кўтарилди. Қувониб кетдим. Окопдан секин мўраласам, танк тўппа-тўгри шу томонга келяпти. Шиша танк остига тушганини англадим. Бўлди! Тамом бўлдим! Ёнилги шишаси граната эмаски, танк занжирини узса! Тилимгача музлаб кетгандек бўлди: ажал шарпасини сезганда қўрқмайдиган одам йўқ.

Тенгиз сакраб окопдан чиқди-да, йигирма қадамча келиб қолған танкка шиша улоқтирди. Шиша тўппа-тўғри ёнилғи баки устига бориб тушди. Ўша заҳоти аввал қуюқ тутун, кейин лоп этган аланга кўтарилди.

– Урра! – Тенгиз овози борича ҳайқирди. Танк таққа тўхтади, ўша заҳоти пулемёт тариллади. Тенгиз худди биров пешонасига зарб билан мушт туширгандек чалқанчасига ағдарилиб, устимга йиқилди. Елкасидан қучоқлаб, юзига қарасам кўзлари очиқ, мўйлови орасидан қон сизиб чиқяпти.

Милтиғимни олиб, брустверга тармашдим. Шлем кийган икки немис ёниб турган танкдан тушиб қочаётганини кўрдиму биттасини мўлжаллаб ўқ уздим. Тегмади. Икки букилиб, танк орқасига ўтиб кетди. Шунда танклар панасида мўр-малахдай ёпирилиб келаётган душманларга кўзим тушди.

Яқинлашиб қолганларидан бирини қоралаб, тепкини босдим. Мункиб йиқилди. Ана! Биттаси кетди асфалософилинга! Ажаб, қўрқувни унутиб юборган эдим. Яна бирини мўлжаллаб ўқ уздим. Милтиқ чиқ этдию отилмади. Қизиқ устида ҳамма ўқимни отиб бўлганимни энди тушундим. Оғзидан қон оқиб ётган Тенгизнинг найзали милтигини олиб энди қаддимни ростлаган эдим, душман тепалик бўшаб қолганини сезди шекилли, ҳайқириқ билан окопга ёприлди.

Хали Тенгиз ёндирган танк ҳамон ловуллар, қолган иккитаси орқадан ёриб ўтиш учун икки томонга бурилиб кетган эди. Каска кийган, кўринишидан ҳаммаси бир-бирига ўхшайдиган пиёдалар ваҳшиёна қийқириқ билан тўппа-тўғри устимга бостириб келарди. Йўқ, қўрқмадим. Тўғрироги қўрқишга улгурмадим! Хаёлимдан ўқдек визиллаб бир фикр ўтди. Майли, ўламан! Аммо ҳеч бўлмаса биттангни ўлдириб, кейин ўзим ҳам... Қор босган брустверга сакраб чиқдим. Нима бўлганини ўзим билмай қолдим. Шиддат билан югуриб келаётган фашист милтигимнинг найзасига рўпара бўлди. Найзани санчдимми, ўзи урилдими, эсимда йўқ.

Найзанинг учи юмшоқ бир нарсага ғирч этиб киргани, фашистнинг қўлидаги автомат шилқ этиб қорга тушгани, немис қоқ тўшига санчилган милтиқ найзасини қушқаллаб чангаллаганча, «О, майн муттер!» 4 деб ох чеккани ғира-шира ёдимда бор. У жон талвасасида ёнбошига ағдариларкан, бошидан каскаси учиб, қўнғир сочлари ёйилиб кетди. Мовий кўзлари дахшатдан олайиб, бир нима деб ингради. Яна шуни сездимки, у нари борса ўзим тенги ёш йигит экан. Дахшат тўла кўзларида «мени нима қилиб қўйдинг», деган маъно бор эди. Буларнинг ҳаммаси бир сонияда бўлиб ўтди. Ўзим қўрқиб кетдим. Найзани суғуриб олиш учун кучим борича милтикни тортдим. Аммо у кўллари билан найзани шундай қаттиқ чангаллаб олгандики, тортиб чиқаришга кучим етмади. Эсанкираб қолганимдан нуқул милтиқ қўндоғини силтар эдим. Уч қадамча орқароқда келаётган бошқа немис ғазабдан афти қийшайганча бир нима деб бақирди. Автомат милидан чиқаётган тутунга бир лахза кўзим тушдию... Кейин...

<sup>&</sup>lt;sup>4</sup> Оҳ, онажон! (нем.)

...Аввал қулоғимга муттасил гувиллаган садо эшитилди (самолёт ҳужумида шунақа бўлади), кейин кўзимни очиб ғира-шира ёруғликни кўрдим. Зеҳн солиб қарасам, деразага ўхшаш тўртбурчак туйнукдан бир парча нур тушиб турибди. Гардиши юпқа кўзойнак таққан, ёқасида лейтенантлик ромбиги кўриниб турган зиёлинамо киши бошимда ўтирибди.

- Ўртоқ лейтенант! ўрнимдан турмоқчи эдим, чап оёгим шундай санчиб кетдики, кўз ўнгимни яна туман қоплаб, инграб юбордим.
- Тшш! деди лейтенант қулоғимга эгилиб. Қўрқма, солдат, тириксан!

Секин-секин ҳушимга келдим. Димогимга ачимсиқ гўнг ҳиди урилди. (Одам бетоб бўлганда, яраланганида ҳидни яхши сезадиган бўлиб қоларкан.) гўнгир-гўнгир гаплар қулогимга чалинди. Демак, дала госпиталига олиб келишибди. Қизиқ, ким обкелди экан. Тенгиз ҳалок бўлганди-ку! Бундан чиқди, ёрдам етиб борибди-да! Унақа бўлса, нимага биттаям халатли одам кўринмайди? Лейтенант билан мендан бўлак ҳарбийлар ҳам йўқ-ку!

Хаммаси чоллар, кампирлар, нимқоронғида кўзи қўрқувдан олайиб кетган ёш болалар... Ким ўзи булар! Йўқ, бу дала госпитали эмас. Ана, ўртадаги устун тагига гўнг тўдалаб қўйилибди. Чўчқа гўнги! Госпиталда чўчқа гўнги нима қилади!

Рўпарадаги эшик оғир ғийқиллаб очилди. Аввал ёп-ёруғ нур, кетидан ғуриллаган совуқ кирди. Нур тушиб турган эшик олдида немис каскасини кийган солдат кўринди.

– Шнель! – деб ўшқирди автомат ўқталиб.

Асирга тушганимни билиб, вужудим музлаб кетди.

– Турақол, солдат! – Кўзойнакли лейтенант «шунақа гаплар, йигит!» дегандек оғир-оғир бош чайқади. Қўлтиғимдан кўтарди. Оёғим сирқиллаб оғрир, томоғим ачишар, сув ичгим келарди. Қарасам, кимдир этигимни ечиб олиб, чап оёғимнинг болдирига қалин қилиб дока ўраб қўйибди. Ҳали билмаган эканман. Лейтенант ҳам ўнг қўли тирсагидан елкасигача дока билан танғилган, шинелининг чап енгини кийган, ўнг енги эса осилиб ётарди. Чамаси у ўзининг санитар пакетини мен билан бўлашган шекилли, қўлига танғилган докадан қон сизиб чиқиб, қорайиб турарди.

Тағин учта немис солдати автомат ўқталиб чўчқахонага кирди. Одамларнинг елкасига қўндоқ билан уриб, ташқарига ҳайдай бошлади. Қизиқ, ҳеч кимдан садо чиқмас, фақат болалар, қизалоқлар кўзлари жавдираб, онасининг этагига осилишар, аммо улар ҳам дод-фарёд солишмас, ҳаммаси сеҳрланиб қолгандек индамай ташқарига чиқарди.

Хаво очилиб кетган, қуёш чарақлаб турар, оёқ остидаги қор кўзни қамаштирар, совуқ эди. Дока боғлаган ярадор товоним қорга тегиши билан жазиллаб ачишиб кетди.

– Ўзингни, тут, солдат! – лейтенант билагимдан қаттиқ қисди. – Йиқилсанг отиб ташлашади!

Унинг аҳволи меникидан яҳши эмасди. Кўп қон кетган шекилли, рангида ранг қолмаган, мени суяганча ҳансираб нафас оларди.

Музлаб ётган сўқмоқдан юриб кетдик. Олдинда немис офицери, икки томонимизда икки соқчи, орқада яна биттаси. Ҳар қадамни минг машаққат билан босардим. Яланг оёгимни қорга тегизмасликка уринар, бошим айланарди. Бирпасда икки қулогим музлаб қолди. Шундагина бошяланг

эканимни сездим. Кўзойнакли лейтенант сирганиб кетди. Аммо йиқилмади. Мениям суяб қолди. Қарасам пешонасидан совуқ тер оқяпти. Нима қиляпман ўзи? Ахир уям ярадор-ку, ўлигимни ташлаб нима қилдим?! Иложи борича оғирлигимни туширмаслик учун ярадор оёғимни ҳам ишга солиб, дадилроқ қадам босдим. Бир оздан кейин оёғимга совуқ таъсир қилмай қўйди. Қайтага исиб кетгандек бўлди.

Негадир қишлоққа эмас, тескари томонга кетардик. Орқада келаётган соқчи оғиз-гармонда аллақандай шўх немисча куй чала бошлади. Чап томонда – эллик қадамча нарида қор босган ўрмон қорайиб кўринди. Арчалар қор залворидан шохини эгиб турар, пастроқда эса арчаларнинг танаси кўкимтир бўлиб кўринарди.

– Қочинг, ўртоқ лейтенант! – дедим шивирлаб.– Ўрмонга...

У бир зум иккиланиб қолди. Ўша заҳоти «фойдасиз» дегандек бош чайқади. Қорнинг усти музлагани билан қадам боссангиз оёқ тиззагача ботиб кетади. Ўн қадам юрмасдан отиб ташлашади... Юриб-юриб, дарё бўйидан чиқиб қолдик. Сохилда қора мундир кийган, шапкасининг икки четидаги ихчам қора қулоқчини билан қулоғини совуқдан пана қилган уч немис офицери турар, совуқда депсиниб, қўлқопли қўлларини ишқалаб шодонлик билан шанғиллаб гаплашишарди. Бизни бошлаб келган немис офицери ҳаммамизни саф торттириб, дарёга рўпара қилди. Бу – Угри дарёси эканини тушундим. Ўн беш кун илгари Угри икки марта қўлдан-қўлга ўтган эди. Аввал биз нариги сохилга бостириб бордик. Кейин чекиниб, Козёлск олдидаги тепаликка қайтдик. Музлаган дарё устида ҳалиям сон-саноқсиз излар тушиб ётибди. Нариги соҳилда пачақланган немис пулемётини қор ярим кўмган, сўппайиб турибди. Совуқ шамол музлаган дарё устида увиллаб, қор супуради.

Немис офицерлари ўзаро бир нималарни гаплашди. Бошим айланиб, кўнглим гум-гум кетар, кўз ўнгимни туман қоплаб олган, йиқилиб тушмаслик учун кўзойнакли лейтенантга суяниб турар, аммо совукни энди сезмасдим... Чоллар, хотинлар орасида турган болалар совук қотиб кетди шекилли, ҳиқиллаб йиғлай бошлашди.

Қулоқчинли шапка кийган офицерлардан бири алланима деб шанғиллаган эди, икки соқчи биздан нарирокда турган, бошига қулоқчин, эгнига пахталик кийган серсоқол чолнинг қўлини орқасига қайирди-да, офицерлар томонга судраб кетди. Сохилга олиб бориб, қорга ўтқизишди, оёғидан эски пиймасини ечишди. Кейин телпагини, пахталигини... Шимини... охири қип-яланғоч қилишди-да, дарё томон судрашди. Қирғоқдан ўн қадамча наридаги музи тешиб қўйилган жойга аввал эътибор бермаган эканман, одатда рус қишлоқларида сув олиш учун музни тешиб қўйишади. Аммо бу битта челак сиғадиган жўн тешик эмасди. Хар томони бир метрчадан, текис қилиб кесилган, тўртбурчак тешик! Худди қудукнинг оғзига ўхшайди. Тешик ёнида суянчиксиз курси турибди. Курси устида қора портфел.

Икки солдат бояги одамни зўрлаб тешикка тиқди. Немис офицерларидан бири ҳадеб типирчилаётган чолнинг билагидан ушлаб соатига ҳараганча томир уришини санай бошлади. Муздан боши чиҳиб турган киши аввалига «увв» деб юборди. Типирчилади. Ранги бир ҳизардию кейин бўздек оҳариб кетди.

– Зайт цеен минутен эртрейхт эр аллес, – деди офицер унинг билагини қуйиб юбормай. – Битте айне шприце, шнеллер $^5$ .

Бошқа бир офицер курси устида турган портфелни очиб, шприц чиқарди. Югуриб олиб борди. Наригиси, икки аскар ёрдамида ҳушидан кетган чолни муз орасидан суғуриб олди. Чолнинг бадани гўштдек ҳизариб кетган эди. Икки кишилашиб билагига укол ҳилишди. Чол аввал титради, кейин кўзини очди.

- Ҳайвонлар! деди хириллаб. Қалаштириб сўкди.
- Гут!  $^6$  Укол қилган офицер солдатларға бир имо қилган эди, энди ҳушига келган чолни тағин сувга тиқишди.

Биз – дарё соҳилида турганлар аждаҳога дуч келган қуёндек сеҳрланиб қолган эдик. Ҳеч ким қилт этмас, офицер ҳамон сувдаги чолнинг томирини ўлчаб, соатига қараб турар эди.

 Нима қилишяпти? – дедим худди сувга ўзим тушгандек вужудим музлаб.

Қўлтиқлаб турган лейтенантга қарасам, ранги қордек оқариб, тишлари ғижирлаяпти.

- Аблаҳлар деди титраб. Тажриба ўтказяпти, Рейхнинг совуқ урган аскарларини қайси дори билан қутқариб қолишни синаяпти.
- Шон тоот, сувдаги чолнинг томирини ўлчаёт-ган доктор-офицер мамнун жилмайди, ин цванциг минутен тоот $^7$ .

Икки солдат яланғоч чолни сувдан суғуриб олди. Судраб олиб бориб, дарёнинг ўртасига, муз устига улоқтиришди.

Сафда турган хотинлар, болалар қий-чув солиб юборди. Немис автоматчиларидан бири одамлар

 $<sup>^5</sup>$  Ўн минутдан бери чидаяпти. Марҳамат шприцни узатинг, тезроқ. (нем.)

<sup>&</sup>lt;sup>6</sup> Яхши! (нем.)

<sup>&</sup>lt;sup>7</sup> Ўлди. Йигирма дақиқада ўлди. *(нем.)* 

бошидан ошириб тариллатиб ўқ узган эди, яна жимлик чўкди.

Тажриба ўтказаётган офицер муз устида депсиниб, оёқларини иситиб олди. Қўлқоп кийган қўлларини ишқалаб илжайди. Тағин бир имо қилган эди, икки автоматчи сафда турган хотинлардан бирига ёпишди. Елкасига чанг солиб, судраган эди, етти ёшлардаги қизалоқ хотиннинг этагига осилиб олди.

- Мама! - деди чинқириб. - Мама!

Солдатлар хотинни тешик томонга судрар, қизалоқ эса онасининг этагига махкам ёпишиб олган эди.

Автоматчилардан бири немисча сўкиниб қизчанинг қулогидан чўзганча сафга қайта тиқди. Хотиржамлик билан хотинни ечинтира бошладилар. Аввал бошидан рўмолини юлқиб олишди. Кейин палтосини, жун пайпогини, кўйлагини...

– O! – Синовчи доктор офицер аёлнинг оппок кукракларига суқланиб қараб, томоқ тақиллатди.

Беихтиёр юзимни ўгирдим. Яланғоч аёлни умримда кўрмаган эдим. Ўша томонда ҳаяжонли шовқин қўпганини эшитиб, яна бурилиб қарадим. Немис автоматчиларидан бири хотиннинг қўлтигидан олмоқчи бўлган эди, аёл башарасига тарсаки тортиб юборди. Лекин ўша заҳоти елкасига тушган қўндоқ зарбидан қорга муккасидан йиқилди. У қип-яланғоч эди.

Аёлни қорда судраб обориб муз орасига тиқишди.

Доктор-офицер нихоятда ишбилармонлик билан соатига қараб унинг томирини санай бошлади. Аёлнинг оппоқ кўкраклари муз қиррасига тиралиб турар, ҳансираб нафас олар, икки кўзи биз томонда эди.

Саф орасида турган қизалоқ жонҳолатда чинқирди:

#### - Мама!

Автоматчилардан бири шу томонга югурди. Қизалоқни урди шекилли, боланинг бўғилиб йиглагани эшитилди. Бироқ зум ўтмай яна ўша илтижоли фарёд янгради.

#### – Ма-ма!

Орадан анча вақт ўтди. Мунча ҳисоб-китобга ўч бўлмаса бу фашист, мунча хотиржам бўлмаса! У ҳалиям аёлнинг томир уришини ўлчар, соатидан кўз узмас, аёл эса ҳадеганда ҳушидан кетмас, икки кўзи ҳизчасига тикилганча ҳансираб нафас оларди.

Доктор офицернинг силлиқ юзида аввал ҳайрат кейин даҳшат пайдо булди.

– Фиер унд цванциг минутен! – деди бидирлаб. – Штирбт нихт. Вие айн хунд цэлебих! $^8$ 

Ўзи совқотиб кетди шекилли, солдатларга алланима деб буйруқ берди. Автоматчилар аёлни сувдан суғуриб олишди.

– Доча! – Қип-яланғоч хотин тирик қолганига ишонди. Совуқдан тишлари такиллаганча яланг оёқлари сирпаниб-сирпаниб қизчаси томонга гандираклаб кела бошлади. Қизалоқ саф орасидан отилиб чиқиб, онасига югурди. Лекин она-бола бир-бирига етолмади. Автоматчилардан бири онани, бири қизалоқни елкасидан чангаллаб, икки томонга тортди.

Чинқириб йиғлаётган қизчанинг кўз ўнгида қип-яланғоч онани қорга ўтқизиб билагига укол қилишди. Обориб, яна муз орасига тиқишди.

Билагимдан тутиб турган лейтенант нуқул инграр, «аблаҳлар, ваҳшийлар», деб тишларини ғижирлатар, аммо у ҳам, мен ҳам бир нима қилишга ожиз эдик.

<sup>&</sup>lt;sup>8</sup> Йигирма тўрт дақиқа. Жони итдан ҳам савил экан. (нем.).

Доктор-офицер ўз касбини хўп пухта эгаллаган экан! Аёлнинг томирини секундигача аниклик билан ўлчаб санар, ҳар беш дақиқада қанча вақт ўтганини айтиб турар, яна биттаси эса дафтарга ёзиб борарди.

Хотин яна ўттиз беш дақиқа чидади. Офицерлар қувониб кетишди. Мамнун ғужиллашиб қолишди. Чамаси, бу дорининг таъсири зўрроқ эканини бир-бирига маъқуллаб тушунтирар эди. Бояги кап-катта эркак уколдан кейин ўн дақиқа ўтмай жон берди. Манави аёл эса хотин киши бўлатуриб, ярим соатдан ошдики, ўлмаяпти. Демак, бу галги дорининг фойдаси кўпроқ экан!

Хисоб-китобга уста немислар, «маданиятли», «билимдон» фашистлар бир нарсани ўйламасди. Аёлни шунча азобга бардош беришга мажбур қилган куч дори эмас! Онанинг кўз ўнгида қизчаси турибди. У боласидан умид узолмаяпти. Ўлолмаяпти. «Доно» фашистларнинг ақли қандоқ етсин бунга!

– Капут! – Доктор-офицер нихоят кўнгли тинчиб соат чангаллаган қўлини баланд кўтарди.

Автоматчилар аёлнинг икки қўлидан тортиб сувдан чиқаришди. Энди унинг бутун бадани кўкимтир-қизғиш тусга кирган лабларини ғарчча тишлаганча қотиб қолган эди.

#### – Ма-а-а-ма-а-а!

Автоматчилар хотинни сочидан судраб бояги чол томонга олиб кетишаётганида қизалоқнинг осмонни тешиб юборгудек чинқириғи оламни тутди.

### - Ма-а-мочка-а!

Доктор-офицер яна депсиди. Қулоғидан совуқ ўтди шекилли, шапкаси тагидаги кафтдек қулоқчинларини икки қўллаб ишқалади. Автоматчилар биз томонга келаётганини кўриб, беихтиёр орқага чекиндим.

– Бардам бўл! – Кўзойнакли лейтенант бўгиқ овозда далда берди. – Алвидо, солдат. Тирик қолсанг, қасос ол!

Немис автоматчилари бир зум тўхтаб қолди. Иккаласи кулранг кўзларида истехзо билан гох лейтенантга, гох менга қарар, молхонага кириб, семизрок қўйни сўйишни мўлжаллаган қассобдек, иккаламиздан биримизни танлар эди.

Доктор-офицер бир нима деб буюрган эди, «қас-соблар» мени танлади. Иккаласи икки қўлтиғимга ёпишли.

Алвидо, ўртоқ лейтенат! – дедим пичирлаб. – Тирик қолсангиз...

Пешонамга тушган мушт зарбидан бир лаҳза ҳушимни йўқотдим. Лекин зум ўтмай ўзимга келдим. Оёғим зирқираб оғрир, аммо автоматчилар қадам босишга қўймай, муз устида судраб кетишарди.

– Ўртоқ лейтенант! – Охирги кучимни тўплаб ҳайқирдим. – Ҳусановман, Тошкентдан! Тирик қолсангиз, ҳабар қилинг!

Эсимни таниганимдан бери бегона у ёқда турсин, ота-онамга ҳам яланғоч кўринмаган эдим. Уят бўлди. Бегона хотинлар турибди. Бегона ҳизлар... Болалигимда Бўрижарда чўмилганимда ҳам иштонимни сиҳиш учун ҳамишзор ичкарисига кириб кетардим. Шуни ўйлашим билан лоп этиб дадам, ойим, Робия хаёлимга келди. Кўзимда ёш айланяптими! Йўҳ! Нега энди! Мана шу ваҳший фашистлар олдида-я!

...Аввалига бутун вужудим музлаб кетди. Муз остидаги оқим унча тез эмас эди. Оёғимни типирлатиб кўрсам, тагига етмади. Демак, дарё чуқур. Автоматчилардан бири қўлтиғимдан ушлаб, томиримни текшира бошлади. Негадир энг аввал ярадор оёғим, кейин белим, охири бошим қизий бош-

лади. Автоматчи тепамда туравериб зерикдими, ҳушдан кета бошлаганимни билдими, ҳўлтиғимни ҳўйиб юбориб нари кетди. Аммо мен ҳали эс-ҳушимни йўқотмаган эдим. Офицернинг билагимни тутган чарм ҳўлҳопи совуҳ эди. Лекин зум ўтмай, ҳўлҳопи исиб кетгандек бўлди. Энтикиб нафас олганча унинг юзига ҳарадим. Сарғиш ҳошлари чимирилган, соҳоли ҳиртишлаб олинган, юзи сип-силлиҳ. Атир ҳиди анҳиб турибди. Юҳа лаблари ҳимтилган. Кўкиш кўзлари табассум билан соатига ҳараб, томир уришимни санаяпти. Худди итни, маймунни текшираётган олимдек. Ҳатто ора-чора мамнун илжайиб ҳам ҳўяди.

«Шошма, аблах! Тажриба қанақа бўлишини кўрсатиб қўяман! Музлаб ўлиш қанақа бўлишини сенам бир кўриб қўй!» Бу фикр хаёлимга қаёқдан келганини билмайман. Тўсатдан вужудимга куч ёгилиб киргандек бўлди. «Амаллаб қўлидан ушлаб олсам бўлди!» Сув остидаги қўлимни қимирлатиб кўрсам хали жон бор. Яхши! Сувнинг устки қисми яхлаб – кўкрагим атрофини дарров юпқа муз қоплабди. Бўш қўлимни секин юқори кўтардим. Силлиқ юзли доктор-офицер муз шилдираганини эшитиб, ярқ этиб қарадию парво қилмай яна соатига тикилди. Хотиржамлик билан томиримни ўлчашда давом этди. Бўш қўлимни муз қатламидан секин чиқардим. Билагимдан тутиб турган қўлига чанг солиб, жоним борича ёпишиб олдим. У сесканиб кетди. Кўзлари ола-кула бўлиб, соатни қор устига отиб юборди-да, иккинчи қўли билан билагимга муштлай бошлади. Дахшат ичида алланима деб чинқирди. Автоматчилар шу томонга югурди. Лекин отмади. Хўжайинини отиб қўйишдан қўрқар эди. Сўнгги кучимни тўплаб бир силтаган эдим, офицер сирганиб музга ўтириб қолди. Ёнбошига ағдарилиб, бошидан шапкаси учиб кетди. Боши шундоққина ёнимга келиб қолди. Жонҳолатда сариқ сочларига ёпишдим. Солдатлар автомат қўндоғи билан билагимга ура кетди. Аммо совуқдан тарашага айланган қулимга оғриқ таъсир қилмас, акашак бўлиб қолган бармоқларим доктор-офицернинг сочига ёпишиб қолған эди. Офицер шундай дахшат билан додлаб юбордики, овози хотинларникидек ингичкалашиб кетди. Уша захоти боши билан сувга шўнгиганини, огзига муздай сув кириб, овози ўчгани, «булқ-булқ» қилиб қолганини идрок этдим. Яна бир марта хушимга келдим. Бошим қандайдир қиррали нарсага урилганини хис этдим. Оқим сув тагидаги музга обориб урган экан. Қизиқ, муз қатлами билан сув ўртасида бир-икки энлик очиқ жой буларкан. Ютоқиб нафас олган эдим, ўпкамга сув аралаш хаво кирди. Пастда, сув тагида, бутимнинг орасида қора гавда жон талвасасида типирчилар, қулим чангак булиб, ҳамон сочига ёпишиб қолган, қўйиб юбормас эдим. Олисда ёруг туйнукдан кўкимтир нур тушиб турар, ўша томонда автоматнинг тариллагани, бўгик кий-чув элас-элас эшитилар эди. Шуларни бир сония хис этдиму кейин.... ҳаммаси тамом бўлди.

\* \* \*

...Биламан, сиз – тириклар ўлимдан қўрқасиз. Тириклигимда мен ҳам қўрқар эдим. Йўқ, ўлим унчалик даҳшатли эмас. Эртами-кечми ҳаммаям ўлади-да! Ҳаёт нима ўзи?.. Худо ҳадя этган инъом. Аммо одамлар ҳар хил. Биров шу инъомни бошқалар билан баҳам кўради. Биров бошқаларникиниям қўшиб олги-си келади. Шу билан умри узайиб қоладигандек. Гап ҳачон ўлишдами? Қандай ўлишда эмасми!

...Ярим кечадан ошди. Ҳамма ёқ жимжит. Хи- ёбондаги гулсафсарлар секин-секин тебраняпти.

Ўн қадам нарида ойим ўтирибди. Иккаламизнинг ўртамизда олов ловуллаб ёняпти.

Онамнинг ҳайкали билан-ку, ҳар доим суҳбатлашаман: ёнимда. Ўзи билан ҳам гаплашай.

Ойи! Робия! Хабарим бор, бугун иккалангиз ҳам ҳадеганда уҳлай олмадинглар. Мен бўлсам, сизларнинг тезроқ уйқуга кетишингизни кутаётган эдим. Нима қилай, уйғоқ пайтингизда ёнингизга боролмайман... Мана энди, яҳши бўлди. Тушингизга кираман. Сиз – тириклар бунақа қилолмайсиз. Мен эса иккалангизнинг тушингизга баравар кира оламан.

- Ойи, мени танидингиз-а?
- Танидим, ўғлим. Ўлганмидинг? Мен бўлсам...
- Йиғламанг, ойи, мен тирикман. Бугун ўзингиз кўрдингиз-ку!
  - Даданг йўлингга кўз тика-тика оламдан ўтди.
  - Сиз яшашингиз керак, ойи. Мен учун...
- Йигирма тўрт йил кутдим. Кимсан... Бу ёғига кучим етармикин?
  - Сиз яшашингиз керак.
  - Хўп, жон болам, хўп. Сен шунақа десанг...
- Йиғлама, Робия! Қара, ёстиғинг ҳўл бўлиб кетибди.
  - Кимсан ака, сизни танидим.
  - Мен ҳам...
- Кимсан ака, гуноҳимдан ўтинг. Сизни кутдим.
   Кўп кутдим. Кейин тоғамга...
  - Бўлди, Робия....
- Кимсан ака! Бояги йигитча... Музаффар.... менинг ўғлим. Яна битта ўғлим бор: Омон. Биласизми, Омон... Сизнинг ўғлингиз бўлиши мумкин эди...
- Начора, Робия! Урушни мен ўйлаб топганим йўқ. Сен ҳам...
- Мен-чи, сизга қийиқча тикдим. Кўп қийиқча тикдим. Отингизни ёзиб тагига гуллар чиздим.

– Йиглама, Робия.... Ёшингни арт, жоним! Қулоқ сол. Эшитдингми, ҳали Оқсоқол нима деди? Ер юзида янги уруш очишни хаёл қилган номардлар ҳалиям бор экан. Эшитяпсанми, Робия! Гапим қулогингда бўлсин! Айт. Музаффарга, Омонга, ҳаммага айт! Одамлар эсини йигсин! Ўшанақа номардларнинг қўлига кишан солинглар. Тўгри, ўлиш қийин эмас, ўлим даҳшатли эмас, аммо инсон яшаш учун тугилади, Робия! Эшитдингми! Бўлди, Робия! Йиглама, эртага яна келаман...

## ЎТТИЗ ЕТТИНЧИ БОБ

# УЧИНЧИ БОСКИЧ ТАЛАБАСИ МУЗАФФАР ШОМУРОДОВ ХИКОЯСИ

# Муҳаббатнинг ширин шароби

Бугун байрам. Хосил байрами. Биз хашарга чиққан хўжалик ҳам, Бўка тумани ҳам пахта режасини аллақачон бажарған эди. Республикани кутиб турувдик. Ўзбекистон бугун рапорт берди! Умуман, бу йил омадли келди. Пахта мўл, хаво туриб берди, ёмгир хадеб ёгиб гашга тегмади. Совук тушмади. Тўгри, кечалари қиров тушиб совуқ туради. Аммо офтоб чикиши билан пахтазордан енгил ховур кўтарилиб, гўзапоянинг спиртга ўхшаш ўткир хиди анқийди. Биринчи этакни тўлдириш қийинроқ кўчади. Ариққа тўкилган «подбор» кечаси тушган қиров салқинида ерга ёпишиб қолади. Битта-битталаб қиртишлаб олиш керак. Аммо икки соатлардан кейин хаво исиб кетади. Эгнингиздаги пахталик чопон оғирлик қилиб қолади. Этак тўлган сайин вазминлашиб, тиззангизнинг икки кўзига урилаверади. Юришга қийналасиз. Шунда пахта тўла этакни тагингизга қўйиб, бирпас дам олсангиз маза қиласиз. Осмон тип-тиниқ. Шунақанги чуқур, шунақанги тубсизки, тикилиб қарасангиз бошингиз айланиб кетади. Атроф жимжит. Фақат шип-шийдам бўлиб қолган гўзапоялар эшитилар-эшитилмас шитирлайди. Ҳашарчи-талабалар онда-сонда бир-бирига гап ташлагани эшитилиб қолади.

Баъзан бошингиз устида – тиниқ осмонда «қурей-қурей» деган садо эшитилади. Синчиклаб кузатсангиз, арғамчи солиб кетаётган турналарни кўрасиз. Қар гал турналарга кўзим тушса ғалати, соғинч туйғулар майин азоб бергандек бўлади юрагимга. Нимага шунақа бўлаётганини ўзим билмайман. Негадир «Қора аммам»нинг бир вақтлар айтган гапи эсимга тушади. Турналар паст учса замон арзончилик бўлармиш. Аммамнинг гапини Мунавварга айтсам, елкасини қисиб кулди. «Бўлса бордир. Бувинглар ҳамма нарсани биладилар...» «Қора аммам»ни уям таниркан. Нўғайқўрғонда туришганида кўрган экан...

Бугун тушликдан кейин «эртага автобус келаркан» деган дарак бўлди. Яна бир этак-ярим этакдан подбор тердик-да, ҳаммамиз уйга ҳайтдик. Уйимиз шуки – йигитлар ҳишлоҳдаги мактабнинг девор сувоҳлари ҡўчиб кетган спорт залига жойлашганмиз. Полга похол тўшаб, ҳатор жой солиб ётамиз. Қизлар ҳишлоҳдаги хонадонларга иккита-учтадан бўлиниб кўчиб киришган, Мунаввар бизнинг ётоғимиздан юз ҳадамча наридаги кампирникига тушган.

Қувиш ака деган бригадир бор. Доим қовоғини солиб юрадиган, камгап Қувиш ака бугун жуда очилиб кетди. Даладан қайтсак, мактаб қовлиси-

даги бақатеракнинг пастки шохига илинган қўйнинг терисини шиляпти. Ўзимиз сайлаган ошпаз Эргаш дўмпайиб олиб каттакон дошқозон тагига ғўзапоя тиқяпти.

Эргаш – яхши йигит. Рубоб чалади, ашула айтади. Нима овқат қилса – мошхўрдами, макарон шўрвами – сайратиб юборади. Фақат битта айби бор: сал бефарқроқ. Ўн беш кунча илгари қизиқ бўлди. Мунаввар иккаламиз ёнма-ён эгатда пахта териб келиб, пайкал четига чиқиб қолдик. Даланинг у ёги каналга туташиб кетган эди.

– Исиб кетдим, – деди Мунаввар пахта тўла этагининг богичини ечиб. – Чанқадим.

Иккаламиз этакларни пайкал четига қўйиб, канал кўтармасига чиқдик. Шўралаб кетган соҳилдан ошиб, сув бўйига тушдим. Канал саёзлашиб қолган, аммо сув тип-тиниқ, осмонда сузиб юрган булутларнинг акси сув остида муаллақ турар, атроф жимжит эди.

– Тушавер! – дедим қўлимни чўзиб.

Мунаввар ҳозир югуриб келиб кўксимга урилишини, тутиб қолиш баҳонасида белидан маҳкам қучоқлаб ўпишимни ўйлаб, юрагим гурсиллаб кетди. У кўтарманинг шўралаб кетган юмшоқ тупроғига ботиб қолмаслик учун ёнламаси секин-секин тушиб кела бошлади. Кейин мувозанатини сақлолмай тезлаб кетди. Яқин келиши билан маҳкам қучоқлаб даст кўтариб олдим.

– Қўйинг, уят бўлади! – Мунаввар ёш боладек оёқларини типирлатиб, елкамга беозор муштлади. Сув бўйига тушганда ҳам қўйиб юбормадим. – Чанқаб кетдим ахир! – деди жилмайган кўйи озорланиб. – Қўйворинг!

Худди шу пайт нақ бошимизнинг устида эшак ҳанграб қолди. Шунақанги ғайрат билан, завқла-

ниб ҳанградики, Мунаввар чўчиб кетди. «Вой» дедию елкамдан итарди.

## - Қўйинг.

Тўгриси, ўзим ҳам чўчиб тушдим. Беихтиёр қўлимни бўшатдим. Мунаввар лой босган соҳилга тушиб, туфлиси ботиб кетди. Қарасам, каналнинг нариги бетида, йўл устида эшак арава тўхтаб турибди. Арава устида фляга, нон тўла қоп. Эргаш алюмин челакдан эшакни сугоряпти. Сугоряптию икки кўзи бизда. Илжайиб турибди. Мунаввар юзини тўсганча лойга бота-бота оқим бўйлаб югуриб кетди. Нарироққа бориб, чўккалаб ўтирди, юзини юва бошлади. Эргашга «кет» деб имо қилдим. У ёйилиб илжайди. Челакни эшакнинг тумшугига тиқиштирди.

Эшак ҳали хуморидан чиқмаган экан. Кўкимтир кулранг лабларини чўччайтириб хавони бирпас искади-да, қайтадан ҳанграй бошлайди. Қулоқлари диккайиб, думи хода бўлиб кетди. Хар ханграганда икки биқини кириб чиқиб турар, бўйнини чўзиб, тумшуғини нақд Эргашнинг қулоғига тираб ўкирар, Эргаш бўлса парво қилмас, нуқул илжаяр эди. Нихоят эшакнинг овози хазинлашиб қолди. Пишқириб қўйди. Тағин бир ҳанграгиси келди шекилли, бурун катаклари керилиб, бошқатдан хирқиллашга тушди. Лекин ўйлаб туриб шаштидан қайтди. Эргаш тутган челакка тумшуғини тикди. Хохламайгина ичди. Ичгандаям қандоқ денг! «Аккуратний!» Бир мартаям пишқирмади. Фақат челакдан бошини кўтарганида кўкимтир-кулранг лабларига илинган томчилар офтобда ялтираб кетди. Бир-икки томчи пақирга қайтиб тушди.

«Жўнаб қол» дегандек, муштимни дўлайтирган эдим, Эргаш яна илжайди. Сувнинг қолганини эшак

устига сепди. Челакни аравага – овқат буғи чиқиб турган фляга ёнига қўйди-да, эшакни ниқтади.

– Хих! – уч-тўрт қадам юриб, шу томонга қаради. – Тезроқ боринглар! – деди қувлик билан бақириб. – Макарон шўрва совиб қолади.

Зах босган соҳилдан юриб юзини юваёттан Мунавварнинг тепасига бордим. Кулгим қистади. Шум-ей! Эшагини келиб-келиб шу ерда суғорадими! Майли, Эргаш бировга гапирадиган йигит эмас. Ўзининг Гуляси ҳам уч кунда бир «касал» бўлиб, ошпазга «помошниклик» қилади-ку.

- Юр! дедим Мунавварни қистаб. Макарон шўрвадан қуруқ қолмайлик!
- Ичмайман! Мунаввар тўсатдан ўқчий бошлади. Макарон шўрваси бошида қолсин!
  - Нимага?
- Кўрмадингизми! Мунаввар жаҳл билан қўл силтади. Эшагини суғорди-ку! Ўша челакда сув олиб, чой қайнатади, овқатга сув солади! Ичмайман! Қизларгаям айтаман... Ҳайронман, Гуля шуни нимасини яхши кўради! Мол!
- Қаёқдан кўрдинг, деса нима дейсан? Яна кулган эдим, Мунавварнинг баттар жаҳли чиқиб кетди. Лаби пирпираб қарғади.
- Бир ойдан бери шунинг овқатини еб юрибмизми? Тфу!

Елкасига кафтимни қўйиб, юпатдим.

- Қўйсанг-чи, Мунаввар, эшак ҳам беозор бир махлуқ-да!
- Э, боринг! Мунаввар ҳаммасига мен айбдордек жаҳл билан нари кетди... Ўша куни тушлик емади. Кечки овқатга ҳам келмади. Эртасигаям... Кечқурун ҳишлоҳ марказидаги дўконга бориб, Мунавварга колбаса, Эргашга бир эмас иккита алюмин паҳир олиб келдим.

- Жон дўстим, дедим ялиниб. Ўша челак эшагингга сийлов, бунисида сугормагин, хўпми?
- ... Ана ўша «қўли ширин» ошпазимиз хозир лунжини шишириб ўчоқ пуфлаяпти. Нарирокда, эски газеталар устида бир уюм пиёз, аллақанча сабзи ётибди.
- Ҳорманг, биргад! Бизга раҳбар бўлиб чиққан кекса домламиз Садир Фузайлович узоқдан Қувиш ака билан омонлашди. Нима ҳаракат?

Қуйни нимталаётган Қувиш ака ёйилиб илжайган эди, сийрак, сарғиш муйлови тагида йирик-йирик тишлари куриниб кетди.

- Тўй қибжатиббиз, домулда! Мақтани ўринладиқ!
- Баракалла, укам, домла қизларга юзланди,
  қани, опоқ қизларим, сабзи тўграшга ким уста?

Бирпасда ҳамма ишга киришиб кетди. Аллақаёқдан пичоқлар топилди. Хонадонлардан сабзи тахталар чиқди. Вой, Мунаввар тушмагур-ей! Чўккалаб ўтириб, шунақанги шатиллатиб сабзи тўграяптики, кўз илғамайди. Уйда шундай хизмат қилиб, ойимни, дадамни хурсанд қилишини кўз ўнгимга келтирдиму юрагим ширин орзиқиб кетди. «Вой келинпошша-ей!»

 - Қараманг, кўзингиз тегади! - Мунавварнинг ёнида сабзи артиб ўтирган Гуля қўлидаги пичоқ билан пўписа қилди.

Мунаввар ярқ этиб, менга қаради. Жилмайди.

– Ундан кўра ўтин ёринг! – деди Гуля нозланиброқ. – Эргаш акамга қарашинг.

Бурилиб кетаётган эдим, Мунаввар тўхтатди.

Аввал қозонни ювинглар... Ўзингиз ювинг.
Эшитдингизми?

Кулиб юборай дедим. Гулянинг олдида очиқ айтмадию Эргашнинг қозонни тозалаб ювишига ишонмаяпти.

Борсам, Эргаш аллақачон қозонга ёғ солиб қўйибди. Ўчоқда олов гуриллаяпти. Сирли тоғорада Қувиш ака нимталаган қўй гўшти...

– Келганинг яхши бўлди, качегар керак эди ўзи! – Эргаш қоракуя юққан кафтининг орқаси билан терлаб кетган пешонасини артди. – Сабзини тезлатинглар-эй, қизлар! Ўғим ёниб кетади... – деди Гулялар ўтирган томонга қичқириб. Кейин менга юзланди. – Жизза ейсанми?

Ош дам егунча йигитлардан уч киши қишлоқ марказидаги дўконга «ғизиллаб» бориб келдик. Кеча навбатдаги «беш кунлик»нинг ҳақи теккан эди. Бировга беш сўм, бировга ўн сўм... қизларга шампан олмоқчи эдик, йўқ экан. «Ҳосилот» харид қилдик. Келсак қизлар аллақачон мактаб ҳовлисига – ерга брезент ташлаб жой қилишибди. Қувиш ака ўғирдек каттакон чирпит шишани қучоқлаб келиб қолди.

– Мусаллас! – деди шишани ўртага қўйиб. – Тўй, бўлиб жатир. Ишмасак, бўлмас!

Вой Қувиш ака-ей! Бугун жудаям очилиб кетди-ку. Уйига тағин беш-олти марта қатнади. Қар борганида икки қултиғида дунгдек-дунгдек қора тарвузларни қистириб келади.

Ростини айтсам, ошни соғингандим. Эргаш ҳам паловни «ўрмалатиб» юборибди. Жиндай-жиндай ичдик. Мазза қилиб ош едик. Қувиш ака араққа мусалласни аралаштириб урган шекилли, кайфи ошиб қолди.

– Шалсанғ энди, дўмбиранғни манғлайи қара! – деди қийқириб.

Эргаш рубобини бир зум созлади-да, чала кетди. Ховли ўртасида гулхан ловуллади. Эргашнинг овози унча яхшимас. Бўгилиб, дўриллаб чиқади. Аммо ашулани юракдан айтади.

# Айлама-айлама, айлаганим бор, Қизларнинг ичида танлаганим бор...

Энг олдин Қувиш ака даврага чиқди. Лапанглаб ўйнаб кетди. Тағин кўрсаткич бармоғи билан қошига нуқиб, муқом қилади. Қийқириқ, қарсак.

Ўртага қизлар тушди. Аввал Гуля, кейин Шоҳида... Ана, Мунаввар! Олов тафтиданми, жиндай вино ичгани учунми, чиройли, тиниқ юзи ловиллаб кетяпти. Йўқ, у ортиқча қилпангламайди. Аммо ингичка, узун қўллари шу қадар мутаносиб ҳаракат қилади, кўзлари шу қадар маъноли сузиладики, беихтиёр маҳлиё бўлиб қоласиз... Унинг имолари, кўзларининг маъноли, нимтабассуми ҳеч ҳайси қизникига ўхшамайди. Иболи, уятчан, айни пайтда муҳаббатга чанқоқ юраги шундоқ кўриниб тургандай. Қалбимда ҳаяжон, ғурур, муҳаббат — ҳаммаси жунбишга кирди. Биламан, бу имолар, бу «адресли» табассум, садоҳат ҳаммаси меники — ҳаммаси менга тегишли!

Қарсак авжига минди. Мунаввар ўйнаётган қизлар орасидан секин сиргалиб, четга чиқди. Юрагим гурсиллаб урганча ёнига бордим.

Чарчадим, – деди у сезилар-сезилмас ҳарсиллаб. – Исиб кетдим.

Хиралик қилиб, уни яна ўйинга тортишларини хоҳламасдим.

- Айланиб келамизми? - дедим секин.

У индамай қўлимдан тутди. Қишлоқ кўчасидан аста-аста юриб кетдик. Пастак уйлар деразасида чироқ кўринади. Итлар тумов бўлгандек бўгиқ акиллайди. Ҳавода тезак ҳиди аралаш гўзапоя иси анқийди. Юриб-юриб, канал бўйига келиб қолдик. Узоқда, қишлоқ томонда қарсак овозлари эшитилади. Гулхан шафағи элас-элас кўзга чалинади.

Осмонда чодир тутган ой жунжикиб мўралайди. Юпқа, қат-қат булутлар муаллақ қотиб қолган. Худди келинни бошига рўмол ёпмоқчи бўлган янгалардек ой юзини тўсишга бехуда уринади.

Мунаввар қунишиб бошини елкаси орасига олди.

- Энди совқотиб кетяпман.
- Совуқ эмас-ку!

Елкасидан қучишим билан оҳиста бурилиб, қучоғимга кирди. Қайноқ, титроқ лаблари лабимни куйдирди.

- Ўтирамизми? - дедим энтикиб.

У индамай бош силкиди. Кейинги кунларда ҳаво очилиб кетган бўлса ҳам, бир ҳафта илгари ёққан ёмғирнинг заҳри ҳали кетмаган, ер зах эди.

– Ҳозир! – югуриб бориб канал қирғоғидаги қуриб қолган, аммо ёмғирдан кейин юмшоқ тортиб, майинлашган бурганлардан юлиб келдим. Калта пахталигимни ечиб, бурган устига ташладим.

Ўнма-ён ўтирдик. Бутун вужудим таранг тортилиб, маҳкам бағримга босдим. У ўзини олиб қочмас, ожиз энтикар, кўкси титрар эди.

- Мени яхши кўрасиз-а? Жудаям яхши кўрасиз-а?.. деди эркаланиб.
  - Мунаввар! Ўзимнинг Мунавварим!Бир лаҳза эсимни йўҳотиб ҳўйдим...

У ожиз талпинди.

- Нима қиляпсиз? Қочинг, яхшимас... Қочинг!

Хиқиллаб йиғлай бошлаганидан кейингина ўзимга келдим. Қилиб қўйган ишимдан ўзим қўрқиб кетдим. Нима қилдим? Негадир унга ялингим, кечирим сўрагим келарди. Назаримда у қозир дод солиб йиғлаши, ўкиниб таъна қилиши керакдек эди. Йўқ, кафти билан юзини тўсганча йиғи аралаш илтижо қилди:

- Яхши кўрасиз-а? Жудаям-а?
- Сўраб нима қиласан, Мунаввар! дедим титраб. Кафтини оҳиста силаб, юзидан олдим. Ўзинг биласан-ку!

У йиги аралаш жилмайди. Ой нурида юзи янаям оқариб кетгандек эди.

- Меникисиз-а? У ғира-шира ой нурида кўзимдаги маънони уқиб олмоқчидек юзимга синчиклаб қаради. Кейин секин ўрнидан турди-да, чайқалиб-чайқалиб сув томонга юриб кетди. Сакраб ўрнимдан турган эдим, ярқ этиб бурилиб қаради.
- Келманг, деди ҳам илтимос, ҳам буйруқ оҳангида.

Беихтиёр ерга ўтириб қолдим. Димогимга намиққан бурга ҳиди, кейин Мунавварнинг қадрдон иси урилди. Юрагим қинидан чиқиб кетгудек гурсиллар, осмондаги ойни ҳам, юпқа, покиза булутларни ҳам, қорамтир тусга кириб қолган пахтазорни, канални, Мунавварни – ҳаммасини баравар қучоқлаб олгим, бутун дунёга эшититтириб бақиргим келарди.

- Одамлар! Мен бахтиёрман! Менинг Мунавварим бор, одамлар!

#### ЎТТИЗ САККИЗИНЧИ БОБ

# ШАХАР ИЖРОҚЎМИНИНГ РАИСИ ОЛИМЖОН КОМИЛОВ ХИКОЯСИ

#### Қон тўккан «қахрамон»

Хамма нарсанинг қадри йўқотганингдан кейин билинаркан. Инженерлик қилиб юрганимдаям ишим кўп деб нолиган эканман-да, мен нодон! Тўгри, иш кўп эди. Лекин фақат ўзимизнинг бош-

қармаға жавоб берардим. Рост, қишда лой ботиб, ёзда тупрок кечиб қурилишларда юрардим, лекин минглаб одамнинг дарди-хасратини ўйлаб бошимни қотирмасдим. Институтни битирганимдан бери ўтган ўн йил хам бир бўлди, горисполком раислигига сайлашганидан буён ўтган уч йил ҳам. Давлат комиссияси Фаргонага жўнатаётганида бунақа бўлишини билмаган эдим. Икки йил ишлайман, Фарғонада уй-жой қураману Тошкентга - ота-онамнинг багрига қайтаман, деб ишонгандим. Қаёкда? Икки йиллик «муддатим» битмасиданок «ишнинг кўзини биладиган» ёш кадр деб район кенгашига депутатликка сайлашди. Депутатлик ваколатим битмасидан кетишга хаққим йўқ экан. Икки йил эмас, тўрт йил қолдим. Кейин шахар кенгашига депутат қилишди. Келажакда қуриладиган Қиргули массивининг лойихасига ўзим хам қизиқиб кетдим. Кундузи ишлайман, кечкурунлари шикоятчиларни қабул қиламан... Хаш-паш дегунча орадан яна тўрт йил ўтиб кетди. Нихоят Тошкентга қайтишга қатъий жазм қилиб турганимда Қўқон шахар кенгашига раис қилиб сайлашди: бутунлай қўқонлик бўлиб қолдим. Бултур горкомга кириб, ростини айтдим. «Ота-онам кексайиб қолди. Иккаласиям касалманд, қолаверса, ёшим ўттиздан ошди, уйланишим керак. Тошкентга қайтай», десам котиб койиб берди. «Баракалла, йигит, ким айтади сизни талантли ташкилотчи, илмли инженер деб! Ота-онангизни кўчириб келинг, уй топиб берамиз. Нима, Қўқоннинг қизлари Тошкентникидан ёмонми?» Дадам билан ойимнинг феълини билмасам экан. «Киндик қони тўкилган» жойдан бир қадам ҳам жилмайди. Бунинг устига дадам ҳар хатида нолийди. «Танангизга ўйланг, ўғлим,

сиз тенгилар уч-тўртта болали бўлди, қовуннинг ҳам олдини-олдин, кейини-кейин, оёгингизни тўртта қилиб қўяйлик», дейди.

Ўзимга қолса-ку, жудаям бошим туйнукдан чиқиб кетаётган йўқ. Аҳволим бу бўлса: ит ётиш – мирза туриш. Аммо ота-онам кексайиб қолди. Улар ҳам келин кўргиси келади, неварасини ўйнатиб юргиси келади... У ёгини сўрасангиз (одам айтишгаям уялади) горком секретари таърифлаган мендек «замонавий» ташкилотчи йигит ёшим ўттиздан ошиб, биронта қизнинг билагидан ушламабман. Қўлтиқлаб театрларга олиб тушмабман. Аввал ўқиш битсин, кейин бир гап бўлар дедим, бу ёққа келиб ишга шўнғиб кетдим...

Собиқ ижроком раиси роса «ҳунар кўрсатган» экан. Савдо бошқармасининг бошлиғи – жияни. Квартира бўлимнинг мудири – қайниси. Обшепит мудири – қайинсинглиси... Қўша-қўша участкалар, офтобда қатиқ ялашган уруғининг уруғига навбатсиз квартиралар, машиналар. Қизиғи шундаки ҳеч ким мушугини пишт демаган. Бундан чиқди, ўзидан катталарнинг оғзини мойлаган. Аммо бу ёғини кавлаштирсанг, балога қоласан.... Қилар ишни қилган улар, ахлатини тозалайдиган – мен.... Балки чиндан ҳам мендан раҳбар чиқмас. Ишнинг кўзини билмасман. Нима қилай? Ҳаммаси билан ёқа бўғишиб, прокурорга топширолмайман-ку!

Авваллари амалдорларни жиним суймасди. Амалдор деганда негадир Умар закунчи кўз олдимга келаверарди. Қўпол, золим, дўкай. Бошимга тушганидан кейин ақлим етди. Кўпчиликка рахбар бўлиш оғир экан. Юқоридан бериладиган буйруқлар ҳаммаси тўғри. Транспорт — чатоқ. Сув таъминоти — чатоқ. Иситиш системаси — расво. Қурилиш — суст. Савдода — чайқовчи ўгрилар... Ҳаммасини чақириб сиқувга оласан. Ҳаммаси бошини

эгиб жимгина эшитади. Битта-яримтаси «объектив» сабабларни айтади. Запчаст йўқ, буғ қозони бузилган, базада мол йўқ... «Сенинг ўрнингга буғ қозони мен тузатайми», десанг хўп дейдию чиқиб кетади. Аммо ҳафта ўтмай, яна ўша масалага қайтасан. Горком бюросида сени типпа-тик қилиб қўйиб шунақа гаплар айтишадики, илон пўст ташлайди. Гўё сен бориб турган лақмасан!

Шунақа кунлари уйга тонготарда келаман. Каталакдек хонамга кириб оч-наҳор ётиб қоламан. Оилам бўлсаки, олдимга бир коса иссиқ қўйса! Ота-онам ёнимда бўлсаки, ҳолимдан хабар олса. Ўзлари ёрдамга муҳтож. Ўғлим қачон келади, қачон уйлантирамиз деб қиз қидириш билан овора. Уч соатдан кейин уйғонмасам бўлмайди. Эрталаб соат тўққизда шикоятчиларни қабул қилишим керак. Ўзда, таътилимдан атиги уч кунгина рухсат олиб уйга – Тошкентга борганимда дадам қаттиқ тайинлаган эди.

«Амал тегди деб керилманг. Одамларнинг дилига озор берманг! Ким нимани сўраса хўп, денг! Ўрдам беринг».

Қанақасига ҳаммага хўп дейман? Ноҳақ талаб билан келса-чи! Уйи исимаётган кўп болали онанинг шикояти тўгри. Беш йилдан бери «Запорожец» ололмай сарсон бўлиб юрган уруш ногиронининг шикояти тўгри. (Савдода шунақа аблаҳлар борки, «шапкаси»ни бермасанг қишда қорни ҳам раво кўрмайди.) Лекин безорилик қилиб бировга пичоқ урган арзандасини қутқариб қолиш учун милиция бошлигига телефон қилишни сўраган чолга нима дейман? Бир бечора биқинидан пичоқ еб касалхонада ётсин-да, бунинг ўглига «бераҳмлик» қилаётган терговчига «қўйиб юборинг», деб мен илтимос қилишим керак! Нега ахир!

Энг ёмони – бора-бора шикоятчини кўрса одамнинг юраги безиллайдиган бўлиб қоларкан. Хотин пиёниста эридан ажрамоқчи. Икки хонали уйда туради. Эри чиқиб кетолмайди, ўзиям. Иккаламизга алохида уй топиб берасан, деб туриб олади. Яна бири келади. Даъвоси битта: «Эрим яхшию қайнонам ёмон, қайнонамни тузатиб беринг», Жонингдан тўйиб кетасан. Қайнонаси етмишга чиққан бўлса – бирон жойда ишласаки, бошлиғига айтиб тартибга чақирсанг. Етмиш ёшли кампирни сўкиб бўлмаса, ҳайфсан бериб бўлмаса.... Нима қилиш керак! Тағин биттаси хотинидан шикоят қилиб келади: бузуқмиш. Қўшниси билан тутиб олибди. «Қўйвор йигит бўлсанг! Чопонни елкага ташлаб чиқ – кет!» «Кетаман, лекин иккита болам бор. Хотиним кетсин. Суд хотинни химоя қиляпти. Бола тарбиясини бузуқ хотинга ишонмайман!»

Хар хил одамларни кўравергандан кейин психолог бўлиб кетаркансан. Бир тоифа шикоятчилар бор: уялиб, қимтиниб, ҳатто қўрқиб киради. Арзимаган нарсаниям овози титраб гапиради. Булар – кўпинча ҳақ бўлади. Ижтимоий таъминот бўлимидами, районода ёки богчадами ялпайиб ўтирган бюрократ ёки порахўр амалдордан азият чека-чека, охири нажот излаб келгани сезилиб туради. Бунақаларга ёрдам бермаслик – бориб турган гумроҳлик.

Бир хиллар бор: ўзи келишдан олдин «вертушка» зарда билан жиринглайди. Юқоридан.

«Олимжон Комилович! Ҳузурингизга фалончи пистончиев боради. Илтимос ёрдам берсангиз». Келади, ўша фалончи пистончиев, димогидан эшак қурт ёгиб. Илтимоси шуки, қилсанг ҳам айбдор бўласан, қилмасанг ҳам. Қилсанг виждонинг олдида айбдор бўласан, қилмасанг қўнгироқ туг-

масини босган «катта»нинг олдида. Дод деб юборгинг келади.

Яна бир тоифа бор. Эски қадрдонлардек бемалол омонлашади. Овозини пасайтириб гапиради. «Биламиз, сиздаям бола-чақа бор, шу иш тўғри бўлса қарздор бўлиб қолмаймиз», дегандек имо-ишоралар қилади. Бола-чақа у ёқда турсин, хотиним ҳам йўқлигини билмайди. Аммо пинжимга кириб кетгудек бўлади. Тўғри, пора бераман демайдию дудмалроқ қилиб гапиради. Бунақалар билан муомала қилишни боплайман. Телефонни кўтариб, атайлаб иккита рақам тераман. «Милициями?» дейишим билан ё қочиб қолади, ё бидир-бидир қилиб бошқача сайраб кетади.

Тағин бир хиллар бор: эшикдан йиғлаб киради. Қуйиб берса ҳамма ёқни отбозор қилиб юборади. То мақсадига тушунгунча ё валокардин ичасан, ё валидол шимийсан.

Ниҳоят яна бир гуруҳи бор. Эшикдан дўқ уриб киради. Костюмига бир шода нишон тақиб олади. Гапни «биз ёшларнинг бахти учун» қон тўкканидан бошлайди. (Қизиғи шундаки, ҳақиқий жангчилар дўқ урмайди. Ниятини тўғри тушунтиради. Негаки улар ўзининг қонуний ҳуқуқини ҳам, маънавий ҳаққини ҳам яхши билади.) Мана бунақаларни суриштирсангиз ё урушдан қочиб юрганлар, ё маст бўлиб автобус уриб кетганда «инвалид» бўлганлар экани аниқланади. Лекин булар «ёзишга» уста. Иши битмаса ўзининг ноҳақлигини ўйлаб ўтирмайди. Қўйиб берсангиз Бирлашган Миллатлар Ташкилотигача ариза ёзади.

Бугун худди шунақалардан биттаси кирди. Қабул куни эмас эди. Ўн дақиқадан кейин соғлиқни сақлаш бўйича кенгаш чақириб қўйган эдим. (Ка-

салхонада бир врач пора олиб операция қилаётгани ҳақида шикоят тушган эди.)

Котиба аёл йигламоқдан бери бўлиб, эшикдан кирди.

– Бир одам ҳеч қўймаяпти, Олимжон Комилович! Бугун қабул йўқ десам, кўнмаяпти.

Котиба гапини тугатмасдан эшик зардали тарақлаб очилди. Қундуз ёқали пальто, чақмоқ телпак кийган киши шахдам қадамлар билан кириб келди.

– Берлингача борган, сенинг хўжайинингга киролмайманми! – деди котибага чақчайиб.

Танидим! Чақмоқ телпагидан, қамчи солгандек кесиб-кесиб гапиришидан танидим: «Умар закунчи! Момақалдироқ гумбурлаб турган баҳор кечаси. Раъно келинойимнинг пастак девори ёдимга келди. Биқинини чангаллаб икки букилиб қолган Робия опамнинг «ҳеч кимга айтмай қўя қол, ақлли боласан-ку», деб ялингани эсимга тушди.

Йўқ. Закунчи ўзгармабди. Тўгри, анча қариб қопти. Чиройли тарошланган мўйловига оқ оралабди. Аммо овози ўша, совуқ, кўкимтир олов сачраб турган кўзлари ўша....

 Сиз Берлингача борганмисиз? – дедим кўзига қаттиқ тикилиб.

У жавоб бермади. Котибанинг чиқиб кетишини кутди.

– Ўтиринг, – дедим рўпарадаги курсига имо қилиб.

У айтмасанг ҳам ўтираман, дегандек креслога чўкди. Чақмоқ телпагини ечиб, авайлаб столга қўйди. Кўзимга синовчан тикилди. Аниқ билиб турибман, танимади.

- Борганмисиз? - дедим яна.

У киноя билан лабини бурди. Мўйлови қийшайиб кетди. Пальтосининг ич чўнтагидан беш-олти варақ қоғоз чиқарди.

– Кечирасиз, ўртоқ раис! – деди ҳар сўзини чертиб-чертиб. – Саволни мен бераман! Гапнинг пўскалласини айтинг! Бу дунёда ҳақиқат борми-йўқми? Қанақа жамиятда яшаяпмиз ўзи?

Шундай деди-ю кўзлари ғазабдан қисилиб кетди. Ўша – саратон офтобида ёнган буғдойзор чеккасида, пичоғи билан уч туп янтоқни кесиб олаётганда ҳам кўзи шунаҳа ҳисилиб кетган эди. Юрагим сирҳиллаб кетди. Елкамга чидаб бўлмас оғриҳ киргандек бўлди.

Ушанда – янтоқ билан савалаганда дадам баданимдан икки юзта тикан санаб олгани, хар битта тиканнинг ўрни патос бойлаб, бир ой ётолмаганим, чалқанча тушсам, орқам, ерга қараб ётсам қорним ловуллаб ачишгани, салкам бир ой ўтирган жойимда ухлаганим.... Робия опам сенгаям боққан бало бордир, деб чирқиллагани, ойим кечаси билан ер титраб қарғаб чиққани, дадам инграб йиглашимга қарамай, пахтани чўпга ўраб, ярамга дори сургани... Эртасига ойим, «золимдан қутулдик», деб эшикдан йиглаб киргани.... Хаммаси кўз олдимга келди. Ўша захоти бошқа хотиралар ҳам қуюндек ёприлиб бошим гувиллаб кетди. Шомурод амакининг чақалоқ Музаффарни кўтариб тупроқ кўчада чўлокланиб югургани, «Закунчи Раънохонни обқочиб кетибди», деган миш-мишлар, Робия опамнинг Шомурод амакимникига келин бўлиб тушгани, аравада ёр-ёр айтиб Нўғайқўргондан келинни олиб борганим.... Кейин шу бола ўксимасин деб иложи борича Музаффарнинг ёнида бўлишга уринганим.... Нихоят бултур таътилда Тошкентга уч кунгина бориб келганимда дадам «анави Закунчи ўша томонларда турармиш», дегани... Демак, ростдан хам Қўқонда экан-да.

Узоқ жимиб қолдим шекилли. Закунчи кўзлари ёниб тағин сўради:

- Борми-йўқми?

Ўзгармабди. Мутлақо ўзгармабди! Дагдагаси ўша, важоҳати – ўша! Қўйиб берса ҳалиям одамларни ҳамчилашдан тоймайди.

- Сизга қанақа ҳақиқат керак? Овозим ўзим кутгандан кескинроқ, нафратлироқ чиқди. ҳақиқат деганда нимани тушунасиз?
- Ҳақиқат битта бўлади, деди у чертиб-чертиб.– Закунни бизам биламиз, ўртоқ раис!

Нима деса бўлади бу одамга! Нима қилса бўлади буни! Хаёлимга аҳмоқона фикр келди. Қанийди, бу кўппак билан тўйдами, кўча-кўйдами учрашиб қолсаму чалажон қилгунча дўппосласам! Начора, мен расмий одамман. У ҳам расмий шахс: шикоятчи.

- Эътиборингиз учун, дедим иложи борича хотиржам гапиришга уриниб. Абсолют ҳақиқат камдан-кам бўлади. Кўпинча одам ўзини ҳақ деб билади-ю, аслида ноҳақ бўлади.
- Анқаранг-а! У лабини шу қадар киноя билан бурдики, мўйлови яна қийшайиб кетди. Гапни айлантириб нима қиласиз, ўртоқ раис, ҳақиқат йўқ денг– қўйинг!
- О! Энди ҳақиқат излаб қолдингми? Ҳақиқат кучда, деган шиорни қонун қилиб олган сен эмасмидинг! Қанча золимлик қилсам, шунча ҳақ бўламан, деган сен эмасмидинг! Тўғри, сен бу гапни овоз чиқариб айтмадинг. Аммо амалда шундоқ қилдинг. Энди ҳақ талаб бўлиб қолдингми? Рост, ҳозир ҳам ҳақиқатни ер билан битта қилиб, ўзининг роҳатини ўйлайдиганлар бор. Тўғри, улар сенга ўхшаб бировни урмайди, сўкмайди. Бегуноҳ

одамни қамата олмайди. Аммо ўтирган курсисидан фойдаланиб, чўнтагини қаппайтиради. Аввал атрофга таниш-билиш тўплайди, кейин молмулк йигади. Хозирги аблахларнинг сен аблахдан фарқи йўқ. Аммо эртами-кечми ҳамма нарсанинг ҳисоб-китоби бўлади. Ҳақиқат дегани — аслида мана шу! Абсолют ҳақиқат дегани шу!

 – Бор! – дедим ишонч билан. – Эртами-кечми, ҳаммаси жойига тушади.

У қилт этмади. Юзи кинояли қийшайиб, бош ирғади.

- Биламиз. Ёш бола эмасмиз, ўртоқ раис!
- «Раис эмиш! Раис сен эдинг! Умар закунчи! Қамчинидан қон томган раис!»
- Қаерда турасиз? дедим гап чўзилиб кетганидан ғижиниб.
- Ана, ўша ерда ёзилган.
   У «савод борми ўзи» дегандек юзини ўгирди.

Ўқидим. Қўқон шахар. Пахтакор кўчаси, 19-уй.

- Бўпти. Мақсадга ўтайлик! дедим хатдан кўз узиб.
  - Талабим битта! Телефон тушириб берасиз!

Аниқ биламан. ўишткўприк атрофида бўш нуқта йўқ. Йўқни йўндириб бўлмайди.

- Менга қаранг, дедим совуқ оҳангда. Сиз яшайдиган дахада бўш номер йўқ.
- Нимага бўлмас экан! У сапчиб ўрнидан туриб кетди. Кўзида кўкиш олов ёниб, мўйлови уча бошлади. Нимага врач Усмонов Йўлдошга телефон бору менга йўк?

Ўзим хохламаган холда истехзоли кулдим.

- Нима, сиз врачмисиз?
- Йўқ. Мен ветеранман! У пальтосининг ён чўнтагига қўл суқиб, аллақандай дафтарчани ол-

ди-да, кўриб қўй, сўтак, дегандек ғазаб билан столга улоқтирди. – Орден олганман!

Эсимда, лавлаги масаласида орден олган. Аслида бу орден Оқсоқолники, Башор холаники, қолаверса Ҳусан буваники бўлиши керак эди.

Дафтарчани очиб ҳам ҳарамадим. Бу Закунчига оғир ботди шекилли, ранги гезариб кетди.

- Билсак бўладими, ўртоқ раис! деди лаблари титраб. Ўзларининг уйларида нечта телефон бор? Учтами-тўрттами? Йўқ, мен дачангиздагини сана-ётганим йўқ. Уйингиздагини айтяпман. Ўшандан биттасини беринг!
  - Алишамизми?
  - У ҳайрон бўлиб, киприкларини пирпиратди.
  - Нима?
  - Уйимизни алишамизми? дедим кулимсираб.
- Келинг, алишамиз! Ростдан ҳам телефони бор. Фақат дачамни беролмайман. Нега деганда... дачанинг ўзи йўқ. Лекин уйим бор. Хафа бўлмайсиз, бир хоналик. Микрорайонда. Тўртинчи қават, ёзда сув чиқмайди. Қишда яхши исимайди.
- У бутунлай довдираб қолди. Чамаси ҳазиллашяпти ё калака қиляпти, деб ўйлар эди.
  - Мен беҳазил айтяпман! деди жиддият билан.
- Билиб қўйинг, ўртоқ раис! деди бошини тахдидли чайқаб. – Мен анави Усмоновларга ўхшаб пора бермайман. Телефонни законний оламан!
- Усмонов пора берганми? дедим кўзига қаттиқ тикилиб, стол устидаги ручкани олдим. Айтинг, кимга?

У юзини ўгирди. Беписанд қўл силтади.

– Чалғитманг, ўртоқ раис. Пора берган одам бировга гапириб юрмайди.

Хаёлимга ярқ этиб бир ўй келди. Ке, қонунга хилоф бўлсаям, шу иблисга битта яхшилик қилай!

Гўшакни кўтариб, алоқа тармоги бошлигининг рақамини тераётганимда Ориф оқсоқолнинг уйимизга шикоят хати кўтариб келгани, гарданимга дори сураётган дадам, «қўя қолинг, Оқсоқол, бир жойдаги одаммиз», дегани эсимга тушди. Ўзимдан ўзим нафратланиб лабимни тишладим. Нима қилсаям отамнинг қони бор-да томиримда. Генетика – сеҳрли фан!

– Владимир Васильевич! ўишткўприк зонасида яшайдиган Усмонов ким?

Узел бошлиғи бир лаҳза жимиб қолди. Чамаси қулидаги абонент дафтарини варақлади шекилли, аниқ-равшан жавоб берди.

- Усмонов Йўлдошхон! Район поликлиникасининг замглавврачи. Терапевт. Квартира телефони 24–19. Қоидага биноан уч ярим йил илгари уйига телефон туширилган. Врачнинг уйида телефон бўлиши шарт. Экстрен холатлар учун.
  - Узелда бўш пара йўқми?
- Олимжон Комилович! узел бошлиғининг овозида ранжиш оҳанглари сезилди. Биласиз-ку, биттаям йўқ! Район милицияси бошлиғи билан ўн бир фронтовикникидан бошқа ҳаммаси блокировка қилинган.
- Владимир Васильевич! дедим Закунчининг юзидан кўз узмай. Хозир олдингизга... билиб турсам ҳам Закунчидан сўрадим. Фамилиянгиз нима эди?
- Хўжаев! деди Закунчи ҳозиржавоблик билан. – Хўжаев Умар Хўжаевич!
- Ҳозир ҳузурингизга Хажайип деган (Ориф оқсоқолнинг иборасини беихтиёр ишлатганим учун кулиб юборишдан ўзимни зўрға тийиб олдим) Хажайип деган гражданин боради.

- Минг лаънат ўша Хажайипингизга! Ахир у Усмонов билан битта қовлида туради-ку! Параллел аппарат қўйиб берайлик десак, кўнмаса. Тармоқ бошлиғи алам билан чинқирди. Олдимга миллион марта келган! Хеч қанақа ветеран эмас, аферист! Бошни қотирмасин! Подстанция қурилади, кейин...
- Йўлдошхон Усмонов билан бир жойда тураркансиз-ку, ўртоқ Хажайип! – дедим гўшакнини қўймай. – Усмонов кимингиз бўлади?
- Хеч кимим! Закунчи ижирғаниб, юзини ўгирди. Менинг ўзимга телефон керак! Лична ўзимга! Законний телефон!
- Владимир Васильевич! дедим илтимос қилиб. 24–19 га блокировка қила қолинг.
- Ўртоқ Комилов! Ахир бош врачнинг номерига... Мен биламан-ку. Йўлдош Усмонович штатда замглаврач бўлгани билан бош врач вазифасини...
- Илтимос, Владимир Васильевич, янги подстанция қурилгунча шундай қилиб турасиз. Хайр.

Закунчи орден дафтарчасини шошилмай олиб, чўнтагига тиқди.

- Подстанция қачон қуриларкан? деди ўрнидан туриб.
- Кечирасиз, дедим иложи борича ўзимни босиб. Боя сиз қон тўкканман, дедингиз-а?
- Тўкканман! У ижирганиб юзимга қаради. Нимайди?
  - Қайси фронтда?
- Тинч фронтда! Билдингизми? Уруш орқасидаги фронтда!
  - Кимникини?
  - Нима?
  - Кимнинг қонини тўккансиз?!
  - У бир зум серрайиб қолди. Чамаси яна дағдаға

қилгиси келди-ю, ранги қув ўчиб, гапиролмай қолди. Ияги, мўйлови титраб, юзи қийшайиб кетди.

– Боринг! – дедим жеркиб. – Учинчи қават, саккизинчи хонага киринг! Владимир Васильевич Фёдоровга учрашасиз!

Эшикка яқин борганида яна чақирдим.

- Хўв! Хажайип!

Закунчи тўхтади. «Нима дейсан?» дегандек чақчайди.

- Иккинчи марта... дедим столни бармогим билан нуқиб. Иккинчи марта яна шунақа десангиз. «Чиққан жойингга тиқиб юбораман», дегим келди-ю тилимни тийдим.
- Нима? У бир кўзини тахдидли қисиб, қайтиб келди. – Мен нима депман!

Отдан тушсаям эгардан тушмайди, разил! Эшик очилиб, котиба мўралади:

- Олимжон Комилович, райздрав мудирлари кутиб колишди.
- Ҳозир! Ўрнимдан туриб Закунчининг рўпарасига бордим. Ҳали эшикдан кирганингда, дедим кўзига қаттиқ тикилиб. Берлингача борганман, сенинг хўжайинингга киролмайманми, дединг, тўгрими?

У юзини ўгирди. Аммо қўрқмади. Без бўлиб тураверди.

– Яъни, мен қирқ бешинчи йилда фашистлар пойтахтини забт этганман, демоқчи бўлдинг, шунақами?

У олазарак бўлиб қолди. Бироқ бу сафар ҳам жавоб бермади.

– Эшитиб қўй! – дедим ғазабдан титраб. – Биринчидан, бу ер фашистларнинг идораси эмас! Иккинчидан, Берлингача борганларнинг номини ҳаром қилма!

Унинг кўзларида яна кўкимтир совуқ олов ёнди. Лекин бир оғиз гапирмади. Шахдам қадамлар билан эшик томон юрди.

- Телпагингни ол, ўв! - дедим бақириб.

У пилдираб келиб чақмоқ телпагини юлқиб олди-ю эшикни қарсиллатиб ёпиб чиқиб кетди.

# ЎТТИЗ ТЎҚҚИЗИНЧИ БОБ

#### УМАР ЗАКУНЧИ ХИКОЯСИ

#### Хақиқат осмонда, калити хаммомда!

Вой, жўжахўроз-ей! «Берлингача борганларнинг номини харом килма», дедими! Сансираб айтди-я! Вой читтаг-ей! Аввал бурнингни артиб ол, мишиқи! Мен орден олганимда сенга ўхшаганлар нонни «нанна» деб юрарди, олифта – курук! «Амал тегди хиндига – бошини сукди юндига», деб шуни айтади-да! Келиб-келиб сен мени тергайдиган бўлиб қолдингми? Ким ўзи бу? Жикиллаган амалпараст бола-да! Дунёнинг ишлари шу-да! Омади кетганнинг товуги курк қолади, омади келганнинг хўрозиям тухум туғади. Аммо ўзимдан ҳам ўтди. Хато гапирдим! Нима қилардим, Берлинни тиқиштириб! Нозик жойимдан тутганини қара? «Нима, бу сизга фашистларнинг идорасими», дейди. Закунни биларкан, аблах. ўинг-пинг десам, тиқиб қўйишданам тоймайди. Замонанинг зайли билан шахар хокими бўлиб қопти, қўлидан келадиям-да! «Кимнинг қонини тўккансиз», дейдими? Нима дегани бу? Фамилиямни Хажаеп деб айтдими? Шошма! Ким мени шунақа деб чақирарди? Анави Ориф оқсоқол, Хусан дума.... Бу жўжахўроз

хам Тошкентдан келганмикин? Танирмикин мени? Бир минут... Та-ак... Секретарь Олимжон Комилович деб чақирдими? Тўхта-тўхта! Олимжон-Олимжон... Анави Комил табибнинг зумрашаси бўлмасин тағин! Бир вақтлар институтда ўқияпти, деб қулоғимга чалинган эди. Фамилиясиям тўгри келади. Олимжон Комилович! Одам бўлган бўлса бордир. Мўмайроқ пора узатган бўлса... Йўқ, аввалбоши у сўтак шаҳарнинг мэри бўладиган бола эмасди. Аниқ биламан. Нари борса, тракторчи бўларди. Қолаверса, агар бу – ўша бола бўлса, икки дунёдаям ишимни тўгриламас эди. Биров пешонасига тўппонча тираб турса ҳам қилмасди бу ишни! Ўласи қилиб калтаклаган одамга ким яхшилик қилади. Арикдан оққан сувни раво кўрмас!

«Уйимизни алмашамизми?» дейдими? Нима демокчи бўлди бу билан? Ўзини жуда анавинақа пролетар қилиб кўрсатмокчими? Мен билмасам экан! Мил-мил бўлиб кетгандирсан! Аввалги раисинг нима бўлди? Уйидан иккита «Волга», битта «Москвич» чиқиб, қия бўлиб кетди-ку! Давлат қуриб берган квартираларни сотган экан-ку! ОБХССингни ўзи энг катта порахўр экан-ку! Шу-да онангта қози ўйнаш бўлса, додингни кимга айтасан дегани!

Аммо-лекин бопладим! Нима қилиб бўлсаям ишимни тўгриладим-ку! Хумпар-ей! Ёш бўлсаям, калласи ишларкан! Йўқ, деса Москвагаям ёзардим-да!

Хўш, нега энди куни-кеча иштонининг орқасини тугиб юрган Йўлдошхонда телефон бўлиши керагу менда бўлмаслиги керак? Уч йилдан бери югураман-а! Жилла қурса, мазам қочганида «скорий» чақираман. Такси заказ қиламан! Раъно бўлса-ку, кун ора касал. Биламан, баъзан рост айта-

ди, баъзан ёлгондан инқиллайди... Икки йилдан бери тинчлик йўқ. Нуқул, «биттаю битта боламдан жудо қилдинг, озиб-ёзиб бир келганда ҳайдаб юбординг», деб юзимга солади. «Э, ўша ҳаромзода ўглинг билан қўшмозор бўл, сендан нима рўшнолик кўрдиму чўлоқнинг итваччаси нима каромат кўрсатарди», деб паттасини қўлига тутқазгим келади-ю Насибани ўйлайман-да!

Анави жипириқ раис нима дейди? «Усмонов кимга пора берганини исботланг», дейдими! Мени ким деб ўйлаяпсан, нодон! Нима, ёш боламанми! Хеч нимани билмайманми? Пора берган одам бердим дейдими. ўиқ этса олган билан қушилиб ўзиям қия бўлиб кетар! Борингки, Йўлдошхон бермаса бермагандир. Лекин порасиз иш битадими! Ўзинг ҳам оларсан жарақ-жарақ санаб! Ўғлиқ жойда ўтирибсан-ку! Квартира – пул, машина – пул, телефон – пул, уйга газ тушириш – пул!

Ўзим кўрдим-ку. Насибанинг аттестатдаги бахолари тўрт-беш эди. Қизим бечора эсини танибдики, дўхтир бўламан, деб юрарди. Мединститутга олиб борсам, бешта имтихондан қаторасига уч олди. Мандатдан йиғлаб чиқди. Ўша ерда зипиллаб юрган югурдаклардан биттасини тўхтатиб гапга солсам, очиғини айтди-қўйди. «Э, нима деяпсиз тоға, хозир экзаменни бола топширмайди, ота-она топширади, содда одам, студентлик курсисига ўтирадиганларнинг рўйхати имтихондан бир ой олдин тузиб қўйилади», деди. Рост айтди. Бизда шунақа десам, бошқа жойларда беш баттар экан. Ўзда поммастеримиз икки минг қарз сўради. «Тўй қиласизми», десам, «Бе, тўйгамас, ўртанча ўғилни институтга жойламоқчимиз. Беш минг йиғиб қўйган эдим, бу йил институтнинг нархи етти мингга чиқиб кетибди», дейди! «Ўғлинг сен сарфлаган етти мингингни қайтаргунча соқоли оқариб кетади-ку», деган эдим, тиззасига уриб кулди. «Бизам сувни кўрмай иштон ечадиган хилидан эмасмиз, тоға. Дипломини олсин, етти мингни бир йилда йигирма минг қилиб қайтаради», дейди. Оқни оққа, қорани қорага ажратадиган ҳуқуқшунос шуми энди! Ростки ўқишга пора бериб кирдими, бир умр ўша пулни ўн ҳисса, юз ҳисса қилиб қайтариб олмагунча тинчимайди. Адолатни ҳимоя қиладиган одам қонун китобига эмас, қўлингта қарайди. Хоҳласа оқлайди, хоҳласа йўқ. Хоҳласа «от»ни беради, хоҳламаса «до»ни! Ана сенга «адолат». Биз ҳам юрист бўлганмиз. Пора деган нарсанинг кўчасидан ўтмаганмиз. Хақиқат учун қайишганмиз.

Э! Ҳақиқат эмиш! Ҳақиқат осмонда, калити ҳаммомда! Бошқа гап йўқ. Туриб-туриб ўзимга нашъа қилади. Энг жипириқ амалдор ҳам пул йиғади, машина олади. Ховли-жой солади. Амал курсисида беш йил ўтирса, етти пуштига етадиганини йигиб олади. Мен хам амалдор эдимку! Райондаги энг бақувват колхознинг раиси эдим-ку. Нимага тўпламадим? «Қора куним»га яраб қолар деб нимага йиғмадим! Сталин замони бошқача эди. Пора олганни пешонасидан отарди. Аммо-лекин ишни законний қилдим. Блокировка қилдириб олганим янаям яхши бўлди. Йўлдошхон деганлар аламидан ёрилиб ўлсин! Жа машхур бўлиб кетувдилар, эл-юрт ўртасида! Хохласам, телефон тўшатини кун бўйи кўтариб қўяман. Менга деса ҳеч ким билан гаплашмасин. Менга деса касаллари ажалидан беш кун бурун ҳаром ўлсин! Ўзимки, ҳеч нимага эга бўлолмадимми, сенларга ҳам йўл қўймайман. Чидасаларинг – шу! Чидамасанг – катта кўча!

#### ҚИРҚИНЧИ БОБ

# ФАРМАЦЕВТИКА ИНСТИТУТИНИНГ УЧИНЧИ БОСКИЧ ТАЛАБАСИ МУНАВВАР АЛИЕВА ХИКОЯСИ

## Менга совчи юборинг

Умрим бино бўлиб, бугунгичалик вахимага тушмагандим. Умрим бино бўлиб, ўзимдан шунчалик жирканмаган эдим. Ўлганим яхши! Бунақа шармандаликдан кўра ўлиб қўя қолганим яхши! Кимман ўзим? Қанақа ноинсоф, қанақа ёмон қизман?! Онам шўрлик бир кўз билан ўстирди. Емай едирди. Киймай кийгазди! Бир қўли билан яримта отамнинг хизматини қилиб, бир қўли билан менинг бошимни силади. Рост, бошқа оналарга ўхшаб ортиқча эркаламади, болам-бўтам деб устимда парвона бўлмади.

Нима қилсин? Эртадан-кечгача иш билан овора эди.

Эс-эс биламан. Нўғайқўрғонда ойимни танимаган одам йўқ эди. Чамамда, ундан кўпчилик ҳайиҳар ҳам эди... Айниқса – дадам. Бошқа кишиларга ўхшаб, дадам урушдан унчалик оғир яраланиб келган эмасди. Ўзининг айтишича, Берлинга яқин қолганда гарданини «арзимаган ўқ ялаб» ўтган экан. Лекин сал оғирроқ иш қилса, дарров чарчаб қолар, кўпинча кун ботмай даладан қайтиб, ойим келгунча овқат пишириб ўтирар эди.

Бир кун (унда жуда кичкина эдим) ойим, айниқса, кеч қолиб кетди. Дадам менга шўрва ичирди. Ўрнимга ётқизмоқчи эди, ойимни қўмсаб хархаша қилдим! Дадам, қучоқлаб ўтириб «Ўрилтош»ни айтиб берди. Ойим тонготарга яқин келди. Уйқусираб ётганимга қарамай, чопиб бориб, этагига

осилдим. Ойимнинг кирлаб кетган пахталигидан керосин аралаш лой хиди келарди.

– Унақамас-да, Башор! – деди дадам дўқ қилибмас, ялиниб. – Биргадир бўлдим деб тонготар юраверасанми! Миновар йиглайвериб шишиб кетди-ку!

Тўгриси, мен йигламагандим. Аммо дадамга рахмим келди.

Шунда ойим мени шахт билан силтаб ташлади. Дадамнинг рўпарасига бориб, қўлини пахса қилганча ўдағайлади.

- Ҳой почча! Эркакни ишини эплолмагандан кейин, жа бўлмаса бола боқишни уддаланг, хўпми! Қўлингиздан келса, далага чиқиб трактор ҳайданг! Дадам шўрлик дарров мунғайиб қолди.
- Боланиям ўйлагин-да, Башорхон! деди мингиллаб.

Ойим уф тортиб кўрпачага чўккалади.

 Бригадасиям бошида қолсин! – деди нолиб. – Мажлисда пўстагимни қоқишди.

Дадам шўрлик нимқоронғи ошхонага бориб шўрва иситиб келди.

Умуман, дадам яхши пазанда эди. Бир гал уйимизда аллақандай йиғин бўлганида дадам ўз қўли билан чўзма лағмон қилгани эсимда. Хотинлар лағмонни мақтаб-мақтаб ейишди. Ҳатто биттаси менинг бурнимдан чимчилаб ҳазиллашди ҳам:

– Аслида ойингни дада, дадангни ойи дейишинг керак, қизим. Почча Башоратга эмас, Башоратхон поччага уйланган.

Кейинчалик ҳам шу гап қулоғимга икки-уч чалинди. Одатда, куёв келинни олиб келаркан. Менинг ойим эса дадамни шаҳардан обқочиб келганмиш...

Бора-бора мусичадек беозор дадам чиндан ҳам ойимдан қурқишига ишондим. Назаримда ойим уни

менсимас, ҳатто ёмон кўрар эди. Аммо учинчи синфда ўқиёттанимда бир воқеа бўлдию ойим дадамни жонидан ортиқ кўришини тушундим. Эрта кузда дадам уч-тўрт кун «қўлим увишяпти», деб юрдию бир куни мактабдан келсам, азза-базза кўрпа-тўшак қилиб ётибди. Бошида ойим ўтирибди. Дадамнинг ўнг қўл-ўнг оёги тўсатдан ишламай қопти.

Ойим кечаси аллақаёққа чиқиб кетди. Тепасига қушув аломати туширилган «Победа» машинасини бошлаб келди. Қурқаман деб йиғлашимга қарамай мени ёлғиз қолдириб, дадамни машинага солди-да, кетди-қолди. Эртасига кун ботганида келди.

– Дадангни аҳволи оғир, – деди хўрсиниб. – Гарданига теккан ўқ умуртқасини шикастлантирган экан, фалаж бўпқопти.

У ҳар куни икки мартадан шаҳарга қатнаб юрди-юрди-да, бир сафар юк машинасини бошлаб келди.

– Кўчамиз! – деди қовогини солиб. – Минг лаънат, тракторигаям, бригадирлигигаям. Шундоқ отанг фалаж бўлиб ётадию трактор ҳайдашга бало борми?..

Кўчиб келган уйимиз менга ёқмади. Қафасдек тор, тўрт томони баланд деворлар билан ўралган қовли, гўрга ўхшаган қоронғи уй. ўиштин девор ортида узун чўян қувурдан қоп-қора тутун бурқсийди. Шамол тутунни бизнинг ҳовлига олиб келиб уради. (Кейин билсам, бу — баннисанинг кирхонасидан чиқаётган тутун экан.) Нўғайқўргондаги дарахтларга кўмилган ҳовлимиз, томи сомон сувоқ бўлса ҳам, қадди баланд уйимизни эслаб ғингшиган эдим, ойим ўшқириб берди:

- Ўчир! Уй керакми сенга, отами?!

Кейин тушунсам, ойим катта ҳовлимизнинг ярим пулини белига тугиб, дадамни даволатиш

учун елиб-югуриб юрган экан. Текстил «банниса»-сига – дадам ётган касалхонага энага бўлиб ишга кирибди. «Ўзимнинг мактабимга бораман», деб йиглаган эдим, кўнди. Эрталаб мени разъездга қатнайдиган «пассажир»га чиқариб юборади-да, ўзи касалхонага югуради. Пешинда дадамнинг огзига ёқадиган овқат пишириш учун уйга келганида мени гизиллатади. «Бор, дадангнинг олдида ўтириб тур».

Касалхона яқин. Девори деворимизга туташиб кетган. Дадам олти кишилик палатада осмонга қараб ётади. Мен киришим билан қаддини кўтаролмайдию бошини буриб қарайди. Чап қўллаб пешонамни силайди.

Охири бўлмади. Баҳорда дадамни уйга олиб келдик. Энди ойим уйдан касалхонага эмас, касалхонадан уйга тезроқ келишга шошилади. Дераза тагида, сим каравотда ётган дадамнинг бошига боради.

- Кўнглингиз нима тусайди? деди жилмайиб. Дадамнинг чойшабини янгилаётганида мен ташқари чиқиб тураман...
- ...Кузга бориб дадам чўп бўлиб озиб кетди. Совуқ тушган, ҳали кўмир келмаган эди. Бурчакдаги хонтахта олдида дарс тайёрлаб ўтирардим. Ойим чучвара тугар эди.
- Башор, деди дадам қандайдир хотиржам овозда. Сизларниям қийнаб қўйдим. Ёзда ўлсам яхши бўларди.
- Агар... Ойим супра бурчагига қўлини артиб илдам ўрнидан турди. Дадамнинг тепасига борди. Агар, деди титраб, яна шу гапни оғзингизга олсангиз.. У ёғини айтмади. Дадамнинг фалаж қўлини кафтлари орасига олиб силади, узоқ силади...

Индинига ойим бир арава кўмир топтириб келди. Ойимга кўмаклашиб, пақирлаб кўмир ташиётганимда ўзимдан ўзим ғалати бўлиб кетавердим. Аввал ҳам тенгдош қизалоқлар билан югуриб ўйнасам, оғирроқ юк кўтарсам, дилим ўйнар, ҳаво етишмай қолар эди. Ўша сафар ёмон бўлди. Уч-тўрт челак кўмир ташигандан кейин эшик олдига етганда тўсатдан ўзимни ташлаб юбордим.

Оқ халат кийган доктордан «туғма порок» деган гапни биринчи марта эшитдим.

Ўша куни ойим анчагача бошимга эгилиб ўтирди. Дадам эшитиб қолишидан чўчибми, қулогимга оҳиста шивирлади.

– Хафа бўлма, қизим... Сенга яхши қаролмадим. Кичкиналигингда оғзингга ёққанини тутолмадим, бағримга босиб эркалолмадим... Нима қилай, турмуш оғир эди, елмасам, югурмасам бўлмасди.

Орадан кўп ўтмай, дадам узилди. Худди мойи адо бўлган чирокдек секингина, унсизгина сўнди... Ойим дод-фарёд солмади. Сочини юлмади. Баннисада энагалик қилиб юраверди. Лекин ғалатироқ бўлиб қолди. Кечқурунлари ишдан келади-ю, дераза олдига бориб, ҳовли девори ортидаги тутун бурқиб турган баланд қувурга тикилганча ўтираверади.

...Эрта баҳор кунларидан бирида тўсатдан кўч-кўронини йигиштириб қолди.

– Туролмайман! – деди ранги ўчиб. – Бу уйда энди туролмайман.

...Янги уйимиз шу маҳалланинг ўзида эди. Фақат трамвай бекатига яқинроқ, тор кўчанинг энг ичкарисида. Кўча бошида магазин, бир туп бақатерак бор.

Бу ҳовли ҳам аввалгисидан катта эмас. Фақат дераза олдида бир туп арча бор. Қишин-ёзин ўтовдек қорайиб туради.

Ойим ҳамон касалхонада ишлар, мен бўлсам ҳамон Нўғайқўрғондаги мактабга қатнар эдим.

Қизиқ, Шерзод (менинг устимдан гаров ўйнаб Музаффарни чўктириб ўлдирмоқчи бўлган ўша олифта) олтин медаль олгани учун отаси катта зиёфат қилиб берганда ойим менинг кумуш медалимга унчалик қувонмади ҳам. (Биламан, қувондию сездиргиси келмади.) Фармацевт бўлмоқчилигимни эшитганида бир оғиз гап айтди:

– Яхши ўйлабсан, қизим. Аммо айтиб қўяй. Мен кетингдан югуриб юролмайман. Эпласанг кир. Эплолмасанг хафа бўлма, очингдан ўлмайсан.

Институтга кирганимда қувонди. Дадамни эслади шекилли, юзини юзимга босиб узоқ ўтирди.

– Раҳмат, Мунаввар! Шунақа бўлишини билувдим. Яхши ҳунар танлагансан.

Тушундим. Ўзининг ҳам соғлиғи путурдан кетган. Ҳар кеча дори ичмаса уҳлолмайди. Авваллари тугмачадек дорини иккига бўлиб ярмини ичар эди. Кейин битта, бир яримта, бора-бора иккитадан ютадиган бўлиб қолди... Бунинг устига мендан ташвишланади. Сал кеч қолсам кўча бошига чиқиб ўтиради. Шунинг учун ҳудди айтилган соатда уйга қайтишга ҳаракат қиламан. Музаффар кузатиб келганида ҳам анча нарида, бақатерак тагида ҳайрлаша қоламан.

Бир куни (биринчи курсда ўқир эдик) Музаффар одатдагидек бақатерак тагида хайрлашиб кетди. Мен шоша-пиша уйга кирдим. Қарасам, ойим чўян печка ёнида маъюс ўтирибди.

Ким билан келдинг! – деди юзимга қарамай.
 Қўрқиб кетдим.

- Ўзим! - деди ёлгон гапириб.

У ўрнидан туриб, олдимга келди. Елкамга каттакон кафтини қўйди.

– Мунаввар! – деди юзимга тикилиб. – Биламан, кўзга яқинсан. Орқангдан йигитлар эргашади. Ўнг қулоқ, чап қулоғинг билан эшитиб қўй. Ҳар кўринган йигитга кўзингни сузиб, хомталаш бўлсанг, мендан яхшилик кутма! Унда кўра биттасини танла: ўзингга муносиб бўлсин! «Ойи, шу одамга кўнглим бор», дегин, ғинг десам, одаммасман. Аммо кетингдан итдек эргашиб юрмасин. Совчи юборсин. Тушундинг-а?

Ойим шуни айтиши билан кўз ўнгимга лоп этиб Музаффар келди. Кулгим қистади. «Вой, содда ойим-а! Бор, ўша танлаганим бор! Музаффарни яхши кўраман! Мактабда, ўнинчи синфда ўқиётганимдаёқ яхши кўриб қолганман. У ҳам мени севади. Бўлмаса, атайлабдан мен кирган институтга кирармиди!»

Тилимга шу гаплар келдию айтолмадим, уялдим.

– Юзингизни ерга қаратмайман, ойижон, – дедим комил ишонч билан.

Ўшанда – уч йил олдин шу гапимга ойимни ҳам ишонтирган, ўзим ҳам ишонган эдим.

«...Ерга қаратмайман» эмиш. Ерга қаратиш бундан отиқ бўладими! Юзқаролик бундан ортиқ бўладими? Қилар ишни қилиб қўйдим-ку!

Йўқ, Музаффарда гунох йўқ. Хамма айб ўзимда... Тағин домлалар мени мақтаганига ўлайми! Гурухда энг одобли, энг ҳаёли қиз эмишман... Тинч оққан сувнинг туби ғалвали бўлмай ўлсин... Курсдош дугоналарим «йигити»ни гапириб пичирлашса, оҳ-воҳ қилса кулгим қистайди. Гуля паркка кириб Эргаш билан ўпишганини гапиради, Диля Марат билан ресторанга борганини... Менга бўлса

бунақа нарсалар ёш боланинг ўйинига ўхшайди. Музаффар иккаламиз бошқачамиз. Булар билмайди, тушунмайди... Музаффар мени жонидан ортиқ кўради. Мен унинг шунчаки «қизи» эмасман!

Шу кунгача осмонда учиб юрган эдим... Бугун ўқ еган каптардек чилпарчин бўлиб ерга тушдим. Йўқ, чилпарчин бўлганим йўқ. Лекин... ойим сезса ўлдиради! Аввал мени қийма-қийма қилади, кейин ўзиниям бир ёқлик қилиб қўя қолади...

Музаффар эрта баҳордан бери лола сайлига чиқайлик, деб юрган эди. Тўғриси, шаҳар кўчаларида лола кўтариб кетаётган қизларни кўрсам ўзимнинг ҳам ҳавасим келарди.

Кеча Музаффар тағин қистади.

– Эртага – якшанба. Жудаям узоққа бормасак ҳам Зоғариқ томонларга ўтайлик, балки лола қолгандир. Уч-тўрт кунда тамом бўлади! – деб туриб олди.

Бугун эрталаб соат ўнда Эски жўвадаги автостанцияда кўришадиган бўлган эдик.

Аммо бугун... Кечаси яхши ухлай олмадим. Шамол бўлдими-ей, дераза тагидаги арча тун бўйи тебраниб инграб чикдими-ей. Сездим: ойим ҳам икки марта туриб, уйқу дори ичди. Мени уйготиб юборишдан чўчиб, чироқ ёқмади. Лекин пиёлага шўлдиратиб чой қуйишидан, ўқтин-ўқтин хўрсиниб қўйишидан ҳаммасини билиб ётдим. Ойим дорини кўпроқ ичиб юборди шекилли, қаттиқ хуррак ота бошлади. Тонг отишига яқин ўзим ҳам ухлаб қопман. Кўзимни очсам, соат тўққиздан ошибди. Шоша-пиша кийина-ётган эдим, ойим кириб қолди.

– Йўл бўлсин, бугун оддих-ку! – деди кўзимга синовчан тикилиб.

Сессия яқинлашиб қолганини, кутубхонада «қизлар билан» дарс тайёрламоқчилигимни айтиб, чиқиб кетаётган эдим, жеркиб берди.

– Оч-наҳор юравергин, хўпми? Рангингни қара, бир йил ерга ёпишиб ётган касалга ўхшайсан. Бор, тухум қовур!

Соат тўққиз ярим бўляпти. Музаффар кутиб қоладиган бўлди-да! Кеча шу гап чиққанида бугун ойимнинг сменаси эмаслиги эсимга келмабди. Қўймайди! Одатини биламан-ку, қуймоқ ейсан, дедими, едиради. Бўлмаса, уйдан чиқармайди.

Шоша-пиша ошхонага кириб, товага ёг солдим. Ёг қизиб, оқиш тутун чиқаётганида битта тухумни чақиб солганимни биламан... Бирдан бошим айланиб кетди. Ич-ичимдан ўқчиқ келиб, кўнглим агдарилди, кафтим билан огзимни тўсганча ҳовлига чопдим.

Арча орқасига ўтиб ўқчидим. Қайт қиляпману кўзим аланг-жаланг, «ишқилиб ойим кўрмасин, кўрса ўлдиради!»

Икки ойчадан бери ўзимни нохуш сезиб юрардим. Ўқтин-ўқтин бошим айланади. Қурутми, шўр бодрингми кўрсам кўнглим суст кетаётгандек бўлади. Шу кунгача ҳеч нима қилмайди, ўтиб кетади деб ўзимни ўзим юпатиб юргандим. Бугун, ҳозир аниқ сездим. Мен... ёмон қизман. Аблаҳман! Ноинсофман. Ойим билса соғ қўймайди!

Аксига олиб, ойим чопиб тепамга келди.

- Нима қилди? - деди қўрқувдан кўзи олайиб.

Димогимга бояги ёг иси урилиб, баттар кўнглим агдарилди. Яна ўкчидим.

Ойимнинг ранги қув ўчиб кетди.

- Нима бўлди, деди титраб. Нима егандинг?
- Кетинг, томоғим ачишганидан бўғилиб имо қилдим, – тухум палағда экан.
- Вой имонсиз! Ойим жаҳл билан ошхонага югурди. – Кларанинг дўконидан олувдим-ку! Ишонган тоғда кийик ётмас деб шуни айтади-да.

«Ишонган тоғда кийик ётмасмиш». Ишонган тоғ ким? Менми?

У қўлида ёглоги тўла сув кўтариб алпанг-талпанг тепамга келди.

– Ич! – деди ёглогини тиқиштириб. – ўаргара қил! Муздай сув таҳамни анча енгиллаштирди. Ошхонада тухум куйиб кетди шекилли, қўланса ҳид анқиди. Ойим шоша-пиша тағин ўша томонга чопди.

Арчанинг тикандек диккайган япроқларини чангаллаб турарканман, хаёлимга ярқ этиб нажоткор фикр урилди. «Музаффарга айтаман! Совчи юборади. Эртага, йўқ, бугун юборсин! Ойиси келсин! Ойимнинг ўзи айтган: кўнглингга ёққан одам орқангдан эргашиб юрмасин-да, совчи юборсин», деган.

Биламан, икки йилдан бери ҳар хил совчи келади. Баъзан ўзим боримда, кўпинча ўҳишга кетганимда.

...Яна кўнглим ағдарилди. Юрагим ўйнаб кетди. Шунда бирдан миямга ҳавотирлик ўй урилиб, оёқ-қўлим бўшашиб кетди. Ахир мен... туғма порокман... Медицина энциклопедиясидан ўқиганман. Туғма порок қизлар фарзанд кўриши хавфли. Ё тавба! Ҳали бунисиям борми!

Ошхона томондан ойимнинг ҳам кескин, ҳам юпатувчи овози келди.

– Тухумлари бошида қолсин. Сут қайнатдим, қизим, ичиб ола қол!

Ўзимни мажбур қилиб, илиқ, бемаза сутни ичарканман, бояги даҳшатли ўй ҳамон хаёлимда чарх урарди. Хавфли.... Йўқ, бўлмаган гап! Туғма порокларнинг ҳаммаси ўлиб кетаверса дунёда одам қолармиди?! Қайтага яҳши юрибман-ку. Қизиқ, ўшандан кейин юрагим бир мартаям приступ бермади. Авваллари сал шамолласам юрагим санчар, нафас етмай қолаётгандай бўлар, бир кунда шилиниб тушардим. Бу қишда шамолламадим ҳам... Бундан чиқди... Музаффарнинг борлиги яхши эканда! Ахир энди у менинг ярмим-ку! Нимадан қўрқаман? Музаффар бор! Айтаман! Бугуноқ онасини юборади. Бир оғиз сўзим – унинг учун қонун!

Ойим синчков хавотир билан кўзимга тикилиб турганини билиб, ярим пиёла сутни амаллаб ичдим. «Қизлар кутиб қолишини» баҳона қилиб, кўчага чиққанимдан кейингина хийла енгил тортдим. Кечаси анча қаттиқ шамол бўлган экан. Кўча ўртасидаги лойқа ҳалқоб сувга сочилган олма гуллари титраб турибди. Бир вақтлар Нўғайқўргонда - қишлоқда турганимизда ойим бошимни қатиқ билан ювиб, қирқкокил қилиб ўриб қўяр, ўшандаям ишга шошиб, «учига ўзинг пилик тақиб ол», деб чиқиб кетарди. Дадам кўча четидаги куртак чиқарган толдан азза-базза новда юлиб келар, сочимга толпопук тақиб қўяр эди. Қов ўшанда - Музаффар Алвасти кўприкка калла ташламоқчи бўлиб, кейин кетимдан югурганида, қамишзор ичида етиб олганида негадир менинг тўйим бахорда бўлади, албатта гуллаган ўрик тагида ўтираман, бошимга гуллар ёгилиб туради, деб ўйлаган эдим. Қизиқ, кейин ҳам шу ўй хаёлимга кўп келди... Одам бир нарсани жудаям хохласа нияти рўёбга чиқади шекилли. Шошма, Музаффарларникида ўрик бормикин? Йўқ, ховлимизда олма бор, деган эди. Бундан чикди олма тагида ўтирамиз. Дозир олмалар гулга кирди.

Автобус бекатига яқинлашган сайин ўзимдан ўзим жилмаяётганимни сезиб қолдим. Нима бу жиннига ўхшаб! Ана, одамлар қараяпти!

Автобус тиқилинч, иссиқ эди. Димогимга бензин ҳиди урилиб, яна кўнглим агдарила бошлади.

Автобус деразасидан сершовқин кўчага қараб борарканман, боядан бери хаёлимга келмаган

савол лоп этиб эсимга тушди. Нималарни хомхаёл киляпман ўзим! Худди Музаффарнинг ойиси бугун келадию эртагаёк тўй бўладигандек, гуллаган олма тагида ўтирармишман. Бошимга гул ёгилиб турармиш. Музаффарнинг ота-онаси кўнмаса-чи? Мабодо кўнган такдирда ҳам тўйни янаги йил қиламиз, деса-чи? Деса дейдиям! Улар ҳам орзу-ҳавас кўргиси келади. Музаффар — биринчи боласи. Қолаверса, ҳали беш тийин топиб рўзгорга қарашган эмас. Стипендияси ўзидан ортмайди. Бу ёкда ойим айтса-чи: Мунаввар рўзгорга ўралашиб қолса ўқиши қолиб кетади, бир-икки йил сабр қилайлик, деса-чи?

Хаёлимга кетма-кет урилаётган вахимали ўйлардан вужудим бўшашиб кетди. Ярим йилдан бери «унутиб юборган» юрагимга қаттиқ санчиқ турди. Рангим қув ўчиб кетган бўлса керак, тиззасига хўжалик сумкаси қўйиб ўтирган семиз хотин ўрнидан қўзғалди.

- Мазанг қочдими, қизим? Ўтирақол.

Рад этиб, кескин бош чайқадим. Илжайишга уриндим.

– Бўлмаса папкангни бер. Хаҳ, ҳозирги ёшлар-а! Иш дейди, ўқиш дейди, овқат ейишгаям вақт тополмайди. – У папкамни сумкасининг устига қўйди-да, ёнидаги жиккак чолга ҳасрат қила кетди. – Мениям, ўғлим шунақа: институтларни каттасида ўқийди. Кечаси билан шиғир ёзиб чиқади. Шиғиринг сенга ош-нон берадими, ухласанг-чи, десам парво қилмайди.

Мунча шанғиллайди бу хотин? Манави қизлар-чи! Мунча ҳиринглайди? Ҳа, олдинроқда иккита йигит турган экан-да. Ўл, мов мушукка ўхшамай! Бир кун етишарсанам, жонингаям тегар...

Нима деяпман ўзи? Буларда нима гунох? Қизиқ, одам ўзи бахтли пайтида ҳаммани бахтиёр

деб ўйлайди. Бошига кулфат тушганида эса ҳамма бахтиёру бир ўзи бахтиқародек туюлади. Нимага унақа дейман? Нима, шунчалик бахтиқаро бўлиб қолдимми! Пахтадан қайтганимиздан кейин Музаффарнинг ўзи айтди-ку, «ойим тўйингни тезлаштира қолайлик, даданг тўй кўргиси келяпти деяптилар», деди-ку! Ўшандаям майнавозчиликка олгандим. «Чучварани хом санабсиз, мен ойимнинг бошига ёстиқ бўламан», деган эдим. Мана энди ўзим ялинишим керак... Мунча шовқин! Мунча шанғиллаб гаплашади бу одамлар. Ҳаммаси гарангми, нима бало?!

Автобусдан тушишим билан одам тирбанд бекатда турган Музаффарни кўрдим. Эгнида далабоп шим, водолазка. Қўлтиғига бадминтон ракеткаларини қистириб олиб икки қўлида иккита тўрхалта кўтариб турибди. Тўрхалталардаги қоғоз қопчиқлардан кўкпиёз, редиска барги, Тошкент суви шишалари кўриниб турибди. Биттасида кабоб бор шекилли, ёги чиқиб, пакетни ялтиратиб юборибди.

– Э, сени қараю! – У қўлтиғидаги ракеткаларни тушириб юбормаслик учун иккала тўрхалтани кўтариб кулгилироқ зипиллаб ёнимга келди. – Бир соатдан бери кутаман. Шашлик совиб қолади-ку.

Қоғоз пакетга тепчиб чиққан ёғга кўзим тушиши билан яна ўқчидим. Бекат рўпарасидаги музейнинг девор панасига югурдим. Бир туп қайрағочни қучоқлаган кўйи қайт қила бошладим. У қўрқиб кетди. Пакетларни ерга қўйган эди, қўлтигидаги ракеткалар тарақлаб асфальтга тушди.

- Нима гап? - деди ранги ўчиб.

Юзимни ўгирдим.

– Қочинг... Сув...

У тўрхалталардан бирининг бандини еча бошлади. Тугун тушиб қолган экан, ечилмади. У тиши

билан шоша-пиша бандни ечди. Иккита шишанинг темир қопқоғини бир-бирига тираб, тагига урган эди, биттаси пақиллаб очилди.

Вишиллаб турган сув томогимни баттар ачитди. Лекин кўнглимнинг айнаши босилди.

- Нима бўлди? У сув сачраб, ҳўл бўлиб кетган кафтини пешонамга босди. Офтоб урдими?
- Илтимос, дедим кўзимни яшириб. У ёғини айтишга ҳам уялар, ҳам қўрқар эдим.
- Айтсанг-чи ахир, у ҳамон қўлида ушлаб турган иккинчи шишани ерга қўйди, - гапирсанг-чи!
- Секин... биров эшитиб қолишидан чўчиб шивирладим. Илтимос, ойингиз бизникига келсинлар...

У ҳеч нимага тушунмади.

- Качон? Нимага?
- Келсинлар... Тезроқ...
- A?! у энди тушунди шекилли, бирдан ёш боладек иргишлаб кетди.
  - Ростми, Мунаввар!

Кейинги саволни шунақанги бақириб айтдики, бекатдаги одамлардан уч-тўрттаси шу томонга қараганини сездим.

- Секин! дедим ҳам уялиб, ҳам қувониб.
- У бўлса, ҳе йўҳ, бе йўҳ маҳкам ҳучоҳлаб олди. Овсар-ей! Тентак-ей!
- Эртага! деди ёш боладек илжайиб. Йўқ, бугун, ҳозир! Уйга кетамиз! Сенам, менам! Ойимга айтаман...

Одамлар ҳайратланиб бизга қараб туришар, у бўлса минг юлқинганим билан қўйиб юбормас, ростини айтсам, ўзим ҳам унинг бағридан чиққим келмас эди.

#### ҚИРҚ БИРИНЧИ БОБ

## УЧИНЧИ БОСҚИЧ ТАЛАБАСИ МУЗАФФАР ШОМУРОДОВ ХИКОЯСИ

#### Холдастор олма

Ховлимиздаги икки туп олма қариб қолған бўлса хам хар йили хосил беради. Тўгриси, уларнинг алланимасини аммамга ўхшатаман. Қариб-чуриб кетган бўлсаям тинч турмайди. Апрелнинг ўрталарига бориб худди нокка ўхшаб тўп-тўп бўлиб гуллайди. Бунақа пайтда ховлимиз шунақа файзли бўлиб кетадики, офтоб ботганидан кейин хам нафармон гуллар атрофга қизғиш нур таратиб турганга ўхшайди. Ёзга бориб, қизғиш хол билан қопланган олмалар залворидан дарахтларнинг шохи эгилиб қолади. Тишлашингиз билан худди шафтолидек ширин суви дув оқиб кетади. Мунаввар хам бизнинг олмани яхши кўради. Айтишига қараганда Нўғайқўргонда туришганида уларнинг ховлисида хам шунақа олма бор экан. Шахар ховлисида бир туп арчадан бўлак дарахт йўқмиш.

Гуллаган олма тагидаги темир каравотда «Провизерлик курси тарихи»ни ўқиб ётибман. Оҳиста шамол эсади. Нафармон гуллар шивирлаб устимга ёгилади... Димогимга гул ҳиди урилади. Этакдаги бостирмада қўй маърайди. Айтмоқчи, бултур ёзги таътилда молхона билан эски бостирмани бузганмиз. Дадам яхши ният билан бир уй, бир айвон солган. Омон иккаламиз дарвоза олдидаги ёнгоқ тагидан лойхона очиб, роса гишт қуйганмиз. Кузгача томни амаллаб ёпиб олдик. Қўйларга ҳам бостирма солдик. Лекин «участка» бари бир чала қолди. Деразалари ўрнига хом гишт тахлаб қўйилган.

Поли, шифти йўқ. Ҳали хомсувоқ, алебастр сувоқ, чийлампа деган ишлар турибди. Нима қипти, кунлар исиб кетди. Ҳаммамиз баравар ёпишсак, ўн кунда битириб қўямиз. Зўр келса, курсдошларимни ҳашарга чақираман. Келинни янги уйга тушириш керак-ку!

Бостирмада яна қўй маъради. Бултур шу пайтларда дадам «яхши тўйларга атаб» иккита қўзичоқ олиб келган эди. Иккаласиям семириб, қўчқор бўлиб қолди. Биттасини келинникига юборамиз, биттасини ошга сўямиз.

- Омон, қўйларга қарамайсанми? - дедим китобдан кўз узмай. - Суғордингми?

Айвонда пешонасини тириштириб дарс тайёрлаб ўтирган укам хоҳламайроқ жавоб қилди:

- Сув бердим!

Овозининг дўриллашини қаранг! Йигитча бўлиб қолди укам. Саккизинчида ўқияпти.

- Омон, ойим қачон келишларини айтмадиларми?
- Йўқ! У китобидан бош кутармай дарсини қилаверди. Тугун кутариб кетдилар.

Совчиликка кетган! Мунавварникига!

Кеча Мунавварни кузатиб, ҳовлиқиб келсам, ойим уйда экан. Гапни нимадан бошлашимни билмай турган эдим, ўзи сўз очиб қолди:

– Ўғлим, тўйингни шу йил қила қолайлик. Кўрдинг-ку, ўртогингни тўйи қандоқ файзли ўтди. Бир хавасим келди!

Тушундим. Ойим, Абдувалининг тўйини айтяпти. Абдували бало-да! Армияга кетишдан олдин ўзимизнинг Кўтармадаги мактабда кутабхоначи бўлиб ишлайдиган қиз билан танишган экан. Хизмат қилиб юрганида менга шунча хат ёзса ҳам сирини айтмаган эди. Армиядан келдиям, «Туя» амаки уйлантирди-қўйди.

- Менам келин кўрсам дейман, ўғлим. Ана, уй ҳам битиб қолди. Ойим ғалати илжайди. Танлаганинг борга ўхшайди.
- Қанақа «танлаганим?» дедим ўзимни гўликка солиб.
- Парча холанг айтди-ку. Бир қошиқ сув билан ютгули қизни қўлтиқлаб юрганмишсан!

Оббо, Парча хола тушмагур-ей! Балога ақли етади! Бир ҳафта аввал Мунаввар иккаламизни трамвай бекатида кўрган эди. Шаппа билагимдан ушлаб, «ҳой бола, келиннинг қўлидан қачон ош еймиз», деб дўриллаганди, Мунаввар қўрқиб, қочиб кетганди. Эсидан чиқмаган экан-да!

- Қўлтиқлаб юрганим йўқ! - дедим уялган киши бўлиб. - Аммо совчи бўламан десангиз, майли...

Ойим севиниб кетди. Эски достонини қайтадан бошлади. Дадам касалмандилиги, ўзининг ҳам буйрак огриги ўқтин-ўқтин қўзгаб, мадори қолмагани, тўй кўргиси келаётгани, борига барака қилиб, тезроқ оёгимни тўртта қилмоқчилиги... Кейин келин бўлмишнинг таг-зотини суриштириб кетди. Кимнинг қизи? Оиласи қанақа? Катта охурдан ем еб ўрганган, «министр»нинг қизи бўлса, уялиб қолмаймизми?

У ёғини атайлаб айтмадим. Ойим борсин! Башор холани кўриб, ўзиям ҳайрон қолади! Мунаввар айтган-ку! Онаси бир вақтлар Нўғайқўрғонда ишлаган. «Қора аммам»ни танийди. Иккала қуда бирпасда апоқ-чапоқ бўлиб кетишади.

- Сиз бораверинг! дедим илжайиб. Текстилдаги трамвай бекатида озиқ-овқат магазини бор. Шунга кириб, Тўқимачи кўча, тўртинчи тупик десангиз ҳамма кўрсатади. Саккизинчи уй. Мунаввар!
- Ким у, Мунаввар? деди ойим ҳаяжонли жилмайиб.

- Ўша-да! дедим, «келинингиз» дейишга уялиб.- Бирга ўқиймиз.
  - Ота-онаси ким?

Яна сўрайди-я!

- Э, сиз бораверинг! Мунаввар десангиз бўлди.

Назаримда Мунавварни ҳамма таниши, ҳамма яхши кўриши керакдек эди. Отаси йўқ, ўлган, дегим келмади. Бирдан дадамнинг қайсарлиги тутиб, «мен эркаксиз оилага қуда бўлмайман», деб қолишидан қўрқдим.

 Бораверинг, пешинда борсангиз ойиси уйда бўлади.

Ойим «ҳа, шумтака, сенам пишиқсан», дегандек жилмайиб қўйди. Рост-да, Мунаввар уйида йўқлигида боргани яхши! Мунаввар ойимни кўрса уялади.

Ойим, чамамда бу гапни дадамга айтмади. Таомилда аввал аёл қуда совчи бўлиб боради. Сўрайди, суриштиради, кейин ишга эркаклар аралашади. Ойим совчиликка чандон киришганини билдим. Кечаси нон ёпди. Эрталаб, дарсга кетаётганимда сандиқ титкилаётганини кўриб қолдим.

- Саккизинчи уй дедингми, Музаффар? деди сандиқ олдида ўтирган жойида елкаси оша қараб.
- Тўртинчи тупик, саккизинчи уй. Магазиндан кириб сўрасангиз, бўлди.

...Мунавварни тезроқ хурсанд қилгим келарди. Аудиторияга ҳаммадан олдин келдим, деб ўйлаган эдим. Йўқ. Мунаввар мендан илгарироқ келиб, дераза рўпарасида Гуля билан гаплашиб турган экан! Гуля эсли қиз. Мени кўриб дарров чиқиб кетди. Вой-бў, Мунавварнинг ҳам жуда юраги тор-да! Арзимаган нарсага сиқилаверади. Ранги баттар синиқибди. Кўзларининг таги кўкариб, юзида сезилар-сезилмас доғ пайдо бўпти. Доғ-ку, майли...

Кўзининг кўкаргани... Яна ухламай чиққан-да, тентак!

 Ойинглар уйдамилар? – дедим пичирлаб. – Икки соатдан кейин «элчи» боради.

Унинг юзи бирдан ёришди, узун киприклари пир-пираб чиройли кўзлари ёниб кетди. Юзига қон югуриб, доғи ҳам сезилмай қолди.

Охирги парадан қочиб, Тельман боғига бордик, сув бўйидаги овлоқ ўриндиқда ўтириб, елкасидан қучдим.

– Мунаввар! – дедим кулиб. – Хозир «элчилар» сулх тузишяпти. Иккала қуда бир-бирини кўриб, севиниб кетишса керак. Мен ойимларга қудангизни танийсиз, деб айтмадим. Бир сюрприз бўлсин!

Мунаввар ширин жилмайиб қўйди.

– Тўгри қипманми? – Ойимнинг кечаги гапи эсимга тушиб, кулиб юбордим. – Ойим-чи, сени министрнинг қизи деб ўйладилар! Кўрасан ҳали икковиям ҳайрон қолишади.

Мунаввар «нима қилсангиз ихтиёр сизда» дегандек, эркаланиб, бошини елкамга қўйди.

– Чиройли-а! – деди имо қилиб. – Кичкиналигимда толбаргак тақишни яхши кўрардим.

Харракдан ўн қадамча нарида, сой бўйида бир туп мажнунтол бош эгиб турар, шода-шода топ-тоза япроқлар қиз боланинг қирқ кокил сочидек толим-толим таралиб, оқим залворида оҳиста тебранар эди.

- Тақасанми? Ўрнимдан тураётган эдим, у билагимдан оҳиста тутиб, жойимга ўтқизди. Эркаланиб бош чайқади.
  - Керакмас, бирпас, шундоқ ўтирайлик.

Атроф жимжит, олисда – бог ичкарисида отўйин учаётган болаларнинг қий-чуви қулоққа чалинар, сой устида пастлаб учаётган қалдирғочлар ора-чора тумшуғини сувга уриб, вижирлаганча яна осмону фалакка парвоз қиларди. Мунавварнинг сочи юзимни қитиқлар, юрагининг гурсиллаб ураётганини ҳис этиб турардим.

- Валокардин ичдингми?
- У киприкларини пирпиратиб тасдиқлади.
- Анчадан буён юрагим безовта қилмасди, билмасам, кечадан бери...
- Қуйсанг-чи! Кафтларим билан икки юзидан тутиб кузига қарадим. Туйни-чи, туққизинчи майда қиламиз! дедим ишонч билан. Тушундингми? Бу гапни «ойингга шипшитиб қуй» деган маънода айтганимни сезди. Юзи қизаринқираб, бошини қуйи солди. Яхши-да, Мунаввар! дедим дадилланиб. Қушалоқ байрам булади. Куч билан тортиб бағримга босдим. У оҳиста ингради.
- Ёввойи! деди эркаланиб. Қўлидаги митти соатига тезгина қараб олди-да, типирчилади.
- Тўрт бўпти. Борайлик! Ойим хавотир оладилар. Ростини айтсам, ўзим ҳам уйга шошилар, «сулҳ» натижасини билгим келарди.

...Провизерлик тарихини ўқияпману «Абу Али ибн Сино», «Муравьёв усули», «Павлов», «Беруний», «Ассайдана» деган сўзлардан бўлак нарса калламга кирмайди. Қизиқ, ойим нимага кечикиб кетди? Кун ботай деб қолди-ку! Ё қуда хола, ноз қилдимикин? Бошқа мўлжали борми? Йўқ! Мунаввар меники! Қолаверса, Мунаввар бир гапни минг марта айтган: онаси – мард хотин. Йўлига тўғаноқ бўлмайди. Устига-устак ойимни кўрганидан кейин Башор хола ҳам...

Дарвоза томонда машинанинг гийқиллаб тормоз бергани эшитилди.

Китобимни қўйиб, энди ўрнимдан қўзғалган эдим, кўча томондан дадамнинг тажанглашиб чақиргани қулоғимга кирди:

- Хой, ким бор?

Ака-ука олдинма-кейин югуриб дарвозадан чиқдик. Ёнгоқ тагидаги лойхонага олдинги гилдираклари тушиб кетгудек бўлиб юк машинаси тўхтаб турар, кирлаб кетган оқ кепкасини бостириб олган пакана шофёр оёқ учида чўзилиб орқа бортнинг илгагини кўтарар, елкаси терлаб, кўйлаги курагига ёпишиб қолган дадам бортни тутганча унга кўмаклашарди. Етиб боргунимча шофёр бортни тарақлатиб очди. Илгакка оёгини тираб кузовга чиқаётганида дадам чўлоқланиб ёнига борди. Шимининг чўнтагини кавлаб беш сўмлик чўзди.

 Раҳмат, иним, – деди. – Яхши тўйларингизда хизмат қилайлик.

Шофёр «қўйвуринг, ока», дедию қаршилик қилмади. Пулга қарамай, чўнтагига тиқиб, машина устига сакраб чиқди.

Вой дадам-ей! Тўйгача «участкани» битириб олгиси кепти-да! Кузовда битта қўшқават эшик, учта каттакон «итальянский» ром, беш-олтита қоғоз қоп (алебастр бўлса керак, боғланган бўғзи оқариб турибди) думалаб ётар, ёнбош томонга аллақанча қамиш босиб қўйилганди.

Кўплашиб ишга киришиб кетдик. Аввал алебастр қопларини ташидик. кейин чийлампага мўлжалланган қамишни, эшикни.. Омон иккаламиз «итальянский» ромни машинадан тушираётганимизда кўча бошида тугун кўтариб келаётган ойимга кўзим тушди. Юрагим гурсиллаб уриб кетди. Ойим башанг кийиниб олган, тугунини ёнбошга олиб шошилмай қадам ташлайди, тайёр қайнонанинг ўзи бўпти-қопти!

Зум ўтмай эшикдан кириб келди. Қўлида тугун, эгнида крепсатин гулдор кўйлак, оёгида... Ие, нимага унақа! Ранги ўчган! Мени кўриб ерга қарадими?

– Қаёқда юрибсан тугун-терсак кўтариб? – Дадам,
 мўйлови тагидан тутун бурқситиб беозор койиди. –
 Силлам қуриб кетди-ку! Овқатта уннамайсанми?

Ойим биз томонга қайрилиб ҳам қарамади. Битта-битта юриб бориб айвон пешига ўтирди-да, тугунни ёнига қўйди.

Унинг аҳволини дадам ҳам пайқади. Алебастр юқи қўлини чайиб яқин борди. Айвон лабига омонат ўтирди. – Нима гап, Роби? – деди ойимнинг кўзига қараб. – Қаёқда эдинг?

Ойим дадамга жавоб бериш ўрнига менинг кўзимга таънали бир қараш қилди-да, юзини ўгирди. Хўрсинди.

Дадамнинг жахли чиқиб кетди.

- Ҳа! - Ҳайрон бўлиб, айвон пешида турган тугунга имо қилди. - Бу нимаси?

Ойим яна ғиқ этмади. Лаблари титраб, кафтининг орқаси билан тугунни туртди. Мунғайиб ўтириши ғашига тегди шекилли, дадам тутақа бошлади.

- Тилинг борми? деди бақириб. Гапирсанг-чи! Ойим дадам қолиб, менга ярқ этиб қаради.
- Музаффар! деди секин, илтижоли алпозда. Қўй, болам, пишмайдиган савдо...

Ичимда бир нима узилиб кетгандек бўлди. Нима? Нимага энди «пишмайдиган савдо» бўлар-кан! У яхши кўрса, мен яхши кўрсам...

Ўз дардим ўзимга етмагандек, дадам дағдағага ўтди:

- Нима гап? Очиқроқ айтсаларинг-чи!

Бу савол менга ҳам, ойимга ҳам баравар тааллуҳли эди. «Сиз гапиринг», дегандек ойимга юзландим.

– Бақирманг... – деди ойим осойишта оҳангда. Кейин менга яна ёлбориб мўлтиради. – Қўй, ўғлим, ҳаммани баравар қийнама... Нима кераги бор! Шундан бошқаси...

Дадам сапчиб туриб кетди:

- Хов! Мендан яширадиган нима сиринг бор? У ўдағайлаб ойимнинг тепасига борди. Аммо ойим қўрқмади. Худди бошида қилич ўйнаб турганида бурни атрофида айланаётган чивинга парво қилмаган одамдек, киприк қоқмади. Дадам баттар жунбишга келди.
  - Гапирсанг-чи!
- Секин! Ойим бошини қуйи солди. Ўғлингиз... деди оҳиста. Музаффар... мени совчиликка юборди.

Ажаб, дадам енгил тортиб, қаддини ростлади. Назаримда, «вой, аҳмоқ хотин-ей, шунга шунчаликми», дегандек бўлди.

- Хўш? деди овози юмшаб.
- Пишмайдиган савдо! Ойим яна ўша гапини такрорлаб юзини ўгирди.
- Нимага пишмас экан? Дадам ярқ этиб менга қаради. Ким ўзи, ўша? Кўнглинг борми?

Индамай бош иргадим.

- У-чи? Розими? Аҳд-паймон қилганмисанлар? Дадамнинг шу феълини яҳши кўраман-да! Масалани кўндаланг қўяди.
  - Ҳа! дедим дангалига кўчиб. Униям нияти шу!
- Хўш? Дадам «масала ҳал» дегандек, ойимнинг ёнига қайта чўкди. Тағин нима керак? Хотинлар аралашган иш шунақа бўлади ўзи. Осмондаги ой эмасми? Ким ўша қуда бува? Ўзим гаплашаман!

Ойим, бир зум индамай ўтирди-да, тўсатдан хикиллаб йиглаб юборди.

- Бўлмайди, дадаси, бўлмайди! Зўрға қочиб келдим.

Дадамнинг жахли чиқиб кетди.

- Э, қўй-э, Битмайдиган иш бор эканми?
- Ойим ўтирган жойида талпиниб, елкамдан қучди.
- Музаффар! Жон болам, бўлмайди! деди ялиниб. – Айтолмадим. Совчиликка келдим деёлмадим.
- Гапир! Дадам бир силтаб, ойимни жойига ўтқизиб қўйди. – Нега айтолмайсан? Ким экан ўша олифталар?
- Бордим! Ойим титраб кетаётган лабларига муштини босиб энтикди. - Магазинга кириб, Мунаввар деган қизни сўрадим. Дўкончи мақтади. Яхши, одобли қиз деди. Келин қилсангиз сиздан бахтли қайнона бўлмайди, деди. Уйини кўрсатди. Кирсам... - ойим, кўзи олазарак бўлиб энтикиб қолди. - Кирсам... Башор опа ўтирибди! Ер ёрилмадию кириб кетмадим, дадаси! Мунаввар деганда тушунмаган эканман. Миновар экан, дадаси! - Ойим дахшатли нарсани айтаётгандек ув солиб юборди. - Билмасдан кириб қолибман. Аввалги уйи бошқа эди. Баннисанинг орқасида. Эсингиздами, почча ўлганда маъракага борувдик. Хозир бошка жойга...
- А?! Дадам бир лахза огзини ланг очиб, ўзларини пирпиратганча анграйиб қолди. Ўша захоти ранги қув ўчиб мўйлови титрай бошлади. - Нима?деди қулоқни тешиб юборгудек хайқириб. Гандираклаб ўрнидан турди. Хе йўк, бе йўк устимга бостириб кела бошлади. Нафси хириллаб, оғзидан кўпик чиқиб кетди.

Нима қилишимни билмай серрайиб қолган эдим. Дадамни бунақа аянчли ахволда иккинчи марта кўришим эди. Бир вақтлар кичкиналигимда чумчуқ оламан деб қўлим синиб қолганида Комил табибникидан қайтиб келганимиздан кейин пичоқ билан бир уриб, хонтахтани тешиб юборганда хам шунақа бўлган эди. У бир-икки қадам босдию тўсатдан қалқиб кетди. Кўзлари олайганча ёнбошига йиқила бошлади.

Ойим билан Омоннинг дардли ҳайқириғи баравар янгради:

- Дадаси!
- Дада!

Икковлари сапчиб туриб, дадамнинг икки қўлтиғига ёпишди. Мен ўзимни ўнглашга улгурмадим. Дадам, биров оёгидан чалиб юборгандек чўккалаб қолди. Кўкраги босқондек кўтарилиб тушиб, энтика бошлади.

– Ака! – деди Омон раста бўлган овозда дўриллаб. – Сув! Сув опкелинг!

Беихтиёр ариқдаги лойқа сувдан ҳовучимга тўлдириб келиб, дадамнинг бўздек оқариб кетган юзига сепдим. Ойим унинг пешонасини, гарданини силай бошлади. Анчадан кейин дадамнинг юзига сал-пал қон югурди. Кўзларини ярим очиб хириллади.

– Йўқол... – деди энтикиб, – келиб-келиб шу қизга... Нимага! Айбим нима? Мунавварни яхши кўришимми! Мунаввар-чи! Унда нима гуноҳ?! Нимага бунчалик ёмон кўришади уни!

Сапчиб туриб, кўчага отилдим. Пастак эшикни тарақлатиб очиб ёнғоқ тагига етганимда ҳовли томондан ойимнинг ҳайқириғи қулоғимга кирди:

- Музаффар! Шошма!

«Шошма» эмиш! Хўш, шошмаганимда нима бўларди! Олдига ўтқизиб қўйиб насиҳат қиладими? Ишни бузган ўзи-ку! Бундан чиқди, совчи бўлиб борганини Мунавварнинг онасига айтмаган. Кўча-кўйдан гап териб, қайтиб келган. Ишни битириш ўрнига дадамниям йўлдан урди. Қизиқ:

дадам нега бунчалик сапчиб кетди? Келиб-келиб шу қизни... дедими? Нимага энди Мунавварни яхши кўрмаслигим керак! Мунавварни-я? Нега? Чучварани хом санабсизлар! Жуда яхши! Тўй қилмай қўя қолсин! Керакмас! Тўйи ҳам, ўқиши хам... Ундан кўра Мунавварнинг қўлидан етаклайман-да, Мирзачўлга кетаман. Битта вагон уй беришар. Қайтаға яхши бўлди. Биламан, ойим қайтиб совчиликка бормайди. Дадамниям айнитди. Майли, бормай қўя қолсин! Хали хеч нима тамом бўлгани йўк! Мунавварнинг онаси ойимни олдига солиб хайдамабди, қизимни бермайман, демабди! Хўш, тағин нима керак? Мунавварнинг ўзи айтган-ку! Ойим мард хотин деган-ку! Бўпти-да! Ўзим бораман! Тўгрисини айтаман, шундоқ-шундоқ. Биз бир-биримизга кўнгил қўйганмиз. Мунаввар хам жим турмайди. Тўй бизникида бўлмаса, келинникида бўлар! Шунгаям ота гўри – қозихонами! Аммо ўзимнинг уйимга энди қайтмайман! Бўлди! Етар!

### ҚИРҚ ИККИНЧИ БОБ

### РАЪНО ХИКОЯСИ

### Туш

Аллақандай кенг дала эмиш... ўтлоқми-ей, буғдойзорми-ей... Музаффар қип-яланғоч бўлиб, дала ўртасида чопиб кетаётганмиш. Кап-катта йигит қип-яланғоч. Ўғлим бир нимадан қўрқиб, қочиб кетаётганини билармишману олдига боришга уялармишман. Кейин, аллақаердан от пайдо бўпти. Гижинглаб келиб Музаффарни тишлабди. Музаффар чақалоққа айланиб қолибди. Ўзи чақалоқмишу гапирармиш «Отни ҳайданг, ўлдириб қўяди, қутурган от», дермиш...

Қизиқ, нимага бунақа туш кўрдим? Музаффар Нимага яланғоч юрибди? Тушга яланғоч кирса ёмон: фалокат бўлади. Шошма... Анави от Умар аканинг жийрони-ку! Музаффарга бир гап бўлдими? Нимага яланғоч юрибди? Бугун нечанчи ўзи? Йигирма тўртинчи апрелми? Икки хафтадан кейин Музаффарнинг туғилган куни. Йигирмага тўлади. Аввалги телеграммаларимни олганмикин? Олган. Табриклаб ёзган хатларимни ҳам... Жавоб ёзмади. Тўгрида! Нега жавоб қилсин. Уч йил аввал қишда келганида манави имонсизнинг кўрсатган каромати учунми?

Мунча ачишади бу юрак ўлгур! Валидол қаёқда эди? Шимсам, сал қўйиб юборармиди? Чироқ ёқсам, ҳозир тўнғиллайди. «Эркалик қилиб, уйқумни буздинг», дейди, Насибани уйготсамми? Уям бобиллайди. «Бирам эркасиз-ей», деб жеркиб беради.

Керакмас! Ичмайман. Валидолиям, валокардиниям жонга тегди. Умуман, ҳаммаси, ҳаммаси жонимга тегиб кетди. Музаффар соғмикин ишқилиб? Нимага яланғоч юрибди. Тағин нима кулфат тушдийкин бошига?

Ўзаман, ҳозироқ хат ёзаман. Соғман, бу дунёда борман деб бир энлик жавоб юборса бас. Нимага бунақа туш кўрдим? Ёмон туш, хосиятсиз туш... Палакатим ўзимга урсин. Ўғлим тинч бўлса бас...

### ҚИРҚ УЧИНЧИ БОБ

## УЧИНЧИ БОСҚИЧ ТАЛАБАСИ МУНАВВАР АЛИЕВА ХИКОЯСИ

### **Хақорат**

Дарсга кечикдим. Атайлаб эмас, ҳолим йўқ. Кечаси билан юрагим ёмон бўлиб чиқди. Устига-устак кўнглим айнийди. Трамвайда кела-келгунча рўмолим билан огзимни тўсиб ўтирдим. Биринчи пара Садир Фузайловичнинг дарси. Биламан, уришмайди.

Эшикни очиб, мўралашим билан ярқ этиб қаради-ю, шоша-пиша имо қилди.

- Кирақол, опоқ қизим, тезроқ...

Дарсга кирган талабалар ҳам мажлисга тўпланган одамларга ўхшайди. Ҳаммаси орҳароҳҳа ўтиришга ҳараҳат ҳилади. Фаҳат биринчи ҳатор бўш ҳолибди. Ўша томонга юраётган эдим Музаффарга ҡўзим тушди. Ўрта ҳаторда ўтирган эҳан. Тўгрироги унинг ўзи мен киришим билан сапчиб ўрнидан туриб кетди. Ранги ўчган, кўзлари ҳизариб турибди. Бундан чиҳди, кечаси билан ухламаган. Бир зум гарангсиб турди-да, ҳайтиб жойига чўҳди.

Биринчи қаторга ўтириб, лекция дафтаримни очиб қўйдим. Садир Фузайлович у ёқдан бу ёққа вазмин бориб келиб, лекциясини давом эттирди.

– Ухлатадиган моддалар нейронлардаги қўзғалиш сеансларини сусайтиради, ретикуляр формациянинг бош мия пўстлогига кўрсатадиган стимуллаштирувчи таъсирини пасайтиради ва шу тариқа уйқуни вужудга келтиради.

Секин бурилиб қарадим. Музаффар ҳам мендан куз узмай ўтирган экан. Соқоли ўсиб кетибди.

Сочи таралмаган, кўйлаги ғижим... Ҳеч қачон бунақа юрмас эди. Бир гап бўлган.

– Ухлатувчи препаратлар орасида энг таъсирли дорилар, – Садир Фузайлович овозини баландрок кўтарди, – барбитуратлар хисобланади. Булар орасида хозирги кунда энг кучлиси фенобарбитал хисобланади. Бу препарат ухлатувчи, шунингдек, талвасани, эпилепсия – тутканокни тинчлантурувчи дори сифатида порошок ёки таблетка холида 0,1–0,2 граммдан ичилади.

Ойим кеча ҳам фенобарбитал ичди. Иккита таблетка. 0,2 грамм! Кейин қотиб ухлаб қолди. Мен эса мижжа қоқмадим. Шу кеча ойимни биринчи марта ёмон кўриб кетдим.

Елкам оша тағин орқага қарадим. Музаффар дафтарини олдига қуйганча, бир нуқтага тикилиб утирибди. Худди бутун сир-асрор уша нуқтага яшириб қуйилгану яхшилаб қараса, ҳамма нарсани билиб оладигандек. Бундан чиқди кеча уларнинг уйида ҳам бир гап булган. Бизникида ҳам булди. Ёмон булди. Ойим тусатдан тунини тескари кийиб олди.

Кеча Музаффар билан хайрлашган захоти трамвайга югурдим. Кузатиб қўйишига кўнмадим. Бақатеракка яқинлашганимда тор кўчамиздан чиқиб келаётган тугун кўтарган хотинни кўрдим. Юрагим сезди: Музаффарнинг ойиси! Бошида шойи рўмол, эгнида гулдор кўйлак. Юзим ловуллаб ёниб кетганини сезиб, ўзимни четга олдим. Кўрганман, бу аёлни қачондир, қаердадир кўрганман. Эҳтимол, Нўғайқўрғондаги ҳовлимизга келгандир. Билмадим, эслай олмадим. Аммо аниқ сездим: Музаффарнинг ойиси, тўгрироги... Менинг ҳам бўлажак «ойим»... Ўзимнинг ойим кузатиб чиққан бўл

са, кўзига кўринмай қўя қолай деб, бақатерак панасига ўтдим. Кўча ичига мўраласам, ҳеч ким йўқ.

Қандайдир куч ўша томонга итаргандек бўлдию Музаффарнинг онасига қараб юрдим. Балки ойим уйда йўқдир. Қайтариб олиб кираман. «Меҳмон»-га чой-пой қилиб, ойим келгунча олиб ўтираман. Ойим уялтирса «совчилигини қаёқдан билибман», деб қутуламан.

Музаффарнинг ойиси (худди шунақа эканига шубҳа қилмасдим) қандайдир паришон тарзда ердан куз узмай тез-тез юриб келарди. Худди биров қувлагандек. Яқинлашиб қолганида разм солсам, ранг-руйи бир ҳолатда, лаби титраб турибди. Юрагим шув этди. Салом бердим. У афтимга бир қарадию бош силкиб алик олганча утди-кетди. Шу қарашда кузларида чуқур ғусса бордек куринди. «Шошманг, мен Мунавварман», дегим келдию тилим айланмай қотиб туравердим. Назаримда, у нарироққа бориб қайрилиб қараши, чеҳраси ёришиб, «вой айланай, сизмисиз», дейиши керакдек эди. Йуқ, бир мартаям қарамади. Худди елкасидан оғир юк босиб тушаётгандай бошини солинтирганча кетаверди.

## – Иш пишдими, шайтон қиз?!

Кулоғим тагида янграган кулгидан чўчиб тушдим... Илкис бурилиб қарасам, дўкончи Клара опа тилла тишли оғзидан чўғ сачратиб кулиб турибди. Дўконини вақтинча ташлаб шу ёққа югурган шекилли, эгнида оқ халат. Халатининг олд тугмаларини ечиб юборган. «Модний» кремплен кўйлагининг ёқасидан бўлиқ кўкси туртиб чиққан.. Ўғрилик устида кўлга тушган одамдек бир сапчиб тушдим. Қаёқдан келди бу савдогар! Сен етмай турувдинг ўзи.

– Ничево! – У тилла тишларини ярақлатиб тағин кулди. – Ўзимизнинг ҳам бошимиздан ўтган.

Энсам қотди. Албатта бошингдан ўтади-да! Бир эмас олти марта эрга текканингдан кейин.

– Мен-чи, Мунаввар, психологман! – Клара опа эркалаб елкамга қоқди. – Қайнонанг – ничево! Бунақа хотиннинг ўғли ёмон бола бўлмайди. Оти Музаффармиди? Бирга ўқиркансан-ку! – У бошимга эгилиб сирли шивирлади. – Сени-чи, роса мақтадим. Тўгрисиям шу-да! Сендай қизни келин қилса дўпписини осмонга отсин! – У қалин бўёқ суркалган лаби билан юзимдан ўпди. – Тўйингда ўзим хизмат қиламан. Икки кило тўқсон беш чой ажратиб қўйдим.

Fашим келаётганини сезиб, кафти билан юзимни артди.

– Сен кирмай тур! – деди яна кулиб. – Башор опамдан ўзим суюнчи оламан. – У беш-олти қадам нарига борди-да, тўхтаб бурилди. – Ўқишни битирганингда менга женьшень топиб берасан, хўпми? Харна поччангга қувват бўлади.

Нима деб алжираяпти бу?

Хушимни йигиб олгунимча лапанглаб кўча ичкарисига кириб кетди. Уйга киришни ҳам, тураверишни ҳам билмас эдим. Музаффарнинг ойиси эсимга тушиб, бекатга қарадим. Трамвай кетибди шекилли, ҳеч зог кўринмасди.

Ўртасидаги ипдек ариқчадан исқирт сув оқиб турган жинкўчага киришим билан эшигимиздан отилиб чиққан Клара опага кўзим тушди. У халатининг этаги қанотдек ёйилганча югуриб кела бошлади. Менга урилиб кетишига сал қолди.

– Ойинг ғирт жинни экан-ку, Мунаввар! – деди сурма тортилган сийрак киприкларини пирпиратиб. – Вой, тўйларинг бошингда ордона қолсин! Нимагаям айта қолдим. – У орқасига олазарак қарадию, ранги ўчиб лапанглаб чопиб кетди.

Ҳайрон бўлдим. Кўнглим ғаш тортди. Маъюс қиёфада бошини қуйи солиб кетаётган Музаффарнинг онаси кўз ўнгимга келди. Юрагим пўкиллаб ҳовлига кирдим. Ойим очиқ айвонда, хонтахта олдида ўтирган экан. Одми кўйлагининг енгини шимариб олган. Хонтахта устида бир даста коса. Ойим косалардан бирини силтаб олди-да, зарда билан сочиққа артиб, шарақ этиб хонтахтага қўйди. Қоши чимирилган, бошидан рўмоли сирғалиб елкасига тушган. Қўллари асабий титрайди. Яқин келишим билан аллакимни «падарингга лаънат», деб эркакча сўкаётганини эшитдим.

Қандайдир ёмон иш бўлганини кўнглим сезиб, тўхтаб қолдим. Салом бердим.

- Ҳа, келдингми? деди у совуққина қилиб. –
   Нечук бугун вақтли йўрғалаб қопсан?!
  - Охирги пара бўлмади, дедим юрагим зириллаб.
  - Бор, овқатга қара.

Қозон тепасига борсам, яна кўнглим айнишини ҳис қилиб қўрқиб кетдим.

- Ҳозир, ечинай аввал.

Уйга кирдиму ойимнинг кўзига кўринишдан ҳайиқиб, шоша-пиша кийимимни алмаштирим. Хомуш бош эгиб кетаётган Музаффарнинг онаси, уйдан отилиб чиққан Клара опа яна ҳаёлимда жонланди.

- Биров келдими? дедим атайлаб бепарво оҳангда.
  - Ҳа келди! айвонда тағин коса шарақлади.

Қизиқ, бунча жаҳли чиқмаса? Одатини биламан. Бунақа пайтда «ойижон, ўзингиз яхшисиз-ку», деб суйкалсам дарров ҳовуридан тушади. Кичкиналигимда янги кийим олдирмоқчи бўлсам, бирон «гуноҳ» қилиб қўйсам шунақа қилиб ийдирардим...

Эшикдан секин мўралаб, илжайдим.

- Ким келди-и, ойижон?
- Нимайди?! Ойим кўзимга шу қадар совуқ қахр билан қарадики, илжайиб туришим ўзимга нихоятда хунук, аянчли туюлиб кетди.
- Ўзим... дедим кулиб. Бироқ лабим қийшайиб кетганини сезиб баттар ғашим келди.
- Э, падарига лаънат! Ойим навбатдаги косани шоша-пиша артиб, хонтахтага қўйди. Анави дўкончи ўзича ҳар балоларни тўқиб юрибди.

Унинг овози юмшагандек бўлди. Секин ёнига келдим. Ўзимни мажбур қилиб яна илжайдим.

– Ойижо-он! – дедим сирли қилиб. – Бошқа ҳеч ким келмадими?

У ярқ этиб юзимга қаради.

– Кўзинг учиб турувдими?

Яна ўша совуқ нафрат! Нимага? Энди меники ҳам тута бошлади.

- Нега алдайсиз? дедим ачитиб. Улар келдилар-ку!
- Ким «улар?» ойим кўзимга тикандек қадалиб қаради.

Йўқ, энди аянчли жилмайиш ҳам, ёлбориш ҳам йўк! Қайсарлик билан мен ҳам кўзига тик қарадим.

– Ўша одам! – дедим таъкидлаб.

Ойимнинг ранги баттар ўчиб кетди.

- Бундан чиқди рост экан-да! деди титраб.
   Индамай ерга қарадим.
- Менга қара, ҳой! У ҳар сўзини чертиб-чертиб таъкидлади. Агар Робия шу ниятда келганини билсам, олдимга солиб ҳайдардим. Иккинчи ҳадам босмасин! У дастадан яна бир косани юлҳиб олди. Артмоҳчи эди, коса тиззасига тушиб, тўнкарилиб ҳолди.
- Э, палакатинг ўзингга урсин! У косани чангаллаб ҳовлига отди. Коса заранг ерга тушиб, чилчил бўлди. Бир бўлаги сакраб-сакраб арча тагига

кириб кетди. – Гап шу! – деди чақчайиб. – Айтиб қўй. Онаси яна келса, оёғини уриб синдираман! Келса, тўғриликча, меҳмон бўп келсин!

Анграйиб қолдим. Демак, кўча бошида кўрганим чиндан ҳам Музаффарнинг ойиси. Демак, Клара опа қочиб чиққанида гап бор. Бундан чиқди ойим «эркакшодалик» қилган. Совчини ҳайдаган. Клара опа «суюнчи олиш» учун кирганида униям олдига солиб қувган. Нима учун! Бўлди. Етар! Дадамга ўхшаб қўйдек ювош бўлсам, бошимда ёнғоқ чақади. «Лўлилик»ни мендан кўрсин! Ўзи айтган: «Мингтаси билан юрмагин-да, кўнглингга ёққанини айт, совчи юборсин», деган. Мана: айтгани бўлди. Тағин нима керак!

- Нимага? Ер тепиниб йиглаб юбордим. Нимага? Нимаси ёмон?
- Бўл-май-ди! У шу битта сўзни айтгунча хонтахтани каттакон мушти билан уч марта урди. Тахлоқлик косалар нолали зириллаб кетди. Бўлмай-ди! Итдан тарқаган аҳмоқ қиз, бўлмайди. Кимга тортгансан ўзинг!

Энди йигламай қўйдим.

- Сизга! Бу гапни шунақа осойишта ишонч билан айтдимки, ўзим ҳам ҳайрон қолдим. Сизга тортганман! Сиз ҳам дадамни бошлаб...
- Ўчир! Ойим сакраб ўрнидан турди-ю, қуюн-дек ёпирилиб устимга келди.
- Бўлмайди! Бўлмайди! У қўлларини мушт қилганча икки елкамга туртди. Мен биламан-ку, бўлмайди!

Бирпас ҳансираб турди-да, ошхона томон кетди. Анчадан кейин икки коса мошхурда сузиб келди.

- Ич, деди ковогини солиб. Ялпиз солдим.
- Раҳмат, туйдим, дедиму уйга кириб кетдим.
   Деразадан ташқарига қараб анча утирдим.

Қуёш ботиб кетди. Қовлидаги арча учидаги шафақ шамдай ловуллаб ўчди.

Қоронғи тушди. Кўрпага бурканиб ётиб олдим. Музаффар нима қилаётган экан? Ойим «бўлмайди», дедими? Робия совчиликка келганини билсам, қувиб юборардим, дедими. Қизиқ, нимага у атайлаб келади-ю айтмай кетади. Ойим нега бунчалик «шайтонлаб» қолди. нима гап ўзи? Айбим нима? Музаффарни яхши кўришимми! У-чи, унда нима гунох?

Бир маҳал ойим ингради.

– Дори бер, қизим, бошим ёрилиб кетай деяпти.

Истар-истамас туриб чироқни ёқдим. Ҳар куни ўзи ичадиган одам... Токчадаги фенобарбитал қутисини титкиладим.

- Нечта? дедим қайрилиб қарамай.
- Иккита берақол, зора ухласам...

Дори ичиб бўлиб, пиёлани узатаркан, елкамдан тортиб, ёнига ўтқизди. Пешонамни силади.

– Қўй, қизим, сиқилма! Унут ўшани! Бошқа хоҳлаган одамингни айт! Шу заҳоти тўй қилмасам юзимга тупур! Сенга аталган қаймоқнинг юзи бузилмаган, Мунаввар!

«Қаймоқ» эмиш! Юзи аллақачон бузилган бўлса-чи! Унинг «қаймоғи» меники, меники – уники бўлса-чи?!

Фенобарбитал – кучли препарат! Чорак соат ўтмасдан ойим хуррак торта бошлади. Мен бўлсам...

– Ўткир заҳарланишда аввало ошқозонни ювиш керак! – Садир Фузайлович ҳамон нари бориб, бери келиб лекциясини давом эттирар эди. – Юрак фаолиятини яхшилаш учун массаж қилиш, сунъий нафас олдириш...

Яна орқага қарадим. Музаффар ҳамон ўша нуқтага тикилиб ўтирибди. Худди ғамгин, ўйчан ҳайкал сингари.

- Мунаввар! Аслида мана шу теракни кесиб ташлаш керак! Қуриб қопти-ку! Қуриган дарахтнинг хосияти бўлмайди, Музаффар овозини баралла қўйиб шанғиллади. Майли, зарари йўқ. Эртага Эргаш билан Маратни бошлаб келаман! Теракни кесамиз!
- Секин! Ёлборгудек бўлиб кўзига термилдим. Назаримда ҳамма бизга ҳараётгандек. Каттаю кичик бутун маҳалла тор кўча эшикларидан мўраллаб, бармогини бигиз ҳилиб мунофиҳона шивирлашаётгандай. «Ана Башоратнинг ҳизи йигитини бошлаб кепти», деяётгандек.
  - Илтимос, секин!
- Кўча тор экан, машина сиғмайди. Майли, куёв жўраларнинг машинаси кўча бошида қолади. Бу ёғига пиёда кираверамиз! Музаффар баттар шанғиллади.

Астойдил ялиндим.

- Орқароқда юринг, илтимос...
- Нега энди! У ўчакишгандек авжига чиқди. Ошинг ҳалол бўлса кўчада ич!

Сезиб турибман: Музаффар бу гапларни азбаройи менга ўчакишиб айтаётгани йўқ. Ранги ўчиб, асабий илжайиб гапиряпти. Ўзидан кучли одамдан калтак еган бола «уришасанми-уришасанми...» деб чиранганида қанақа аҳволга тушса Музаффар ҳам ҳозир шунақа ҳолатда келяпти. Атайлаб мен билан ёнма-ён қадам ташлаяпти. Атайлаб қаттиқ-қаттиқ гапиряпти. Сездим: кеча уларникида ҳам дилсиёҳлик бўлган. Сўрасам, айтмади. «Ойим билан ўзим гаплашаман», деб (менинг онамни «ойим» деди) келяпти.

«Меҳр кўзда» дейишади. Ажабмас, ойим Музаффарни кўриб кўнгли ийиса. Нима қипти? Эс-

ли-ҳушли бўлса, бировдан кам жойи бўлмаса... Онам деб турса...

– Сиз кирмай туринг. – Музаффарнинг кўзига термилиб, шу қадар носамимий, шу қадар сунъий илжайдимки, ўзимдан ўзим нафратланиб кетдим. – Мен ҳозир.

Кўча эшигини очишим билан пачоқ челакда ахлат кўтариб чиқиб келаётган ойимга рўпара бўлдим. У этагини липпасига қистириб олган, ҳозир ҳовли супурган шекилли, челакда арчанинг сарғиш игначалари хунук диккайиб турарди.

– Келдингми? – деди ойим кўнгли жойига тушиб. – Ҳайронман, арча ўлгур қарибдими, нуқул шохини тўкади. Кирақол, қизим, овқат сузаман.

У кўча бошига йўналганини кўриб, эсанкираб қолдим. Ойим ўн қадамча нарида папкасини саланглатиб турган Музаффарга кўзи тушди-ю, тўхтади. Ярқ этиб менга қаради. Кўзидан: «Ким бу?» деган саволни уқиб, баттар талмовсирадим.

Музаффар шолғомдек қизариб кетди... Қўлидаги папкасини қаерга яширишни билмагандек эсанкираб салом берди. Кейин ўзини бир қадар ўнглаб олди шекилли, зипиллаб ойимнинг олдига келди.

- Менга бера қолинг! деди ғўлдираб. Ахлат челакка қўл чўзган эди, ойим хазинасини биров тортиб олаётгандай челакни орқасига яширди. Қиёфаси аввал шубҳали, кейин қаҳрли тус олди. Кўзларида: «Ким бу, гапир!» деган унсиз ҳайқириқ янгради.
- Ойи... Овозим титраб кетганидан ғашим келиб илжайдим. Танишинглар. Музаффар...

Аҳмоқона расмият. Худди талабалар балида йигит билан қизни бир-бирига таништиргандек.

Ойим челакни қарс этиб ерга қўйди.

Нима дейсиз, йигитча?! – деди Музаффарга кескин ўгирилиб.

Музаффар бутунлай довдираб қолди. Калтак еган одамдек бошини кифтига тиқди. Ердан кўз узмай қайтадан салом берди.

- Хола... деди дудуқланиб. Ойи... Илтимос... Мунаввархон...
- Нима, «Мунаввар!» Нима?! Ойимнинг овози шиддатли, аламли жаранглади. Тинч қўясанми-йўқми? Ўз ҳолимизга қўясанми-йўқми? Қанақа сувюқмас боласан?!

Музаффар кўзларига ҳайрат тўлиб, ойимга эмас, менга ҳаради.

Қиёфаси шу қадар аянчли: гўдакларча содда, аламли эдики, бақириб юбордим.

Ойи!

Қизиқ, ойим менга қайрилиб қарамади.

Ниятингиз нима, йигит? – деди Музаффарга тақалиб бориб.

Музаффар чекинмади. Негадир қаддини ростлаб ойимнинг кўзига тик қаради. Юзидаги аянчли ифода йўқолиб, қатъият пайдо бўлди.

- Ойи... деб гап бошлаган эди, онам шарт кесди...
- Ойи дема мени! Бировга яхшилик қилганнинг уйига ўт тушсин! – шундай деди-ю тўсатдан йиглаб юборди. – Қаёқдан келдинг! – деди икки букчайганча тиззасига муштлаб. – Қай гўрдан пайдо бўлдинг?!

Музаффарнинг ранги қув ўчиб кетди.

- Нима кераги бор? деди титраб. Бир-биримизни...
- Йўқол! Ойим эсдан оғгандек унинг ёқасига ёпишди. Бир силтаган эди, Музаффарнинг қўлидан папкаси учиб кетди. Даф бўл! Қадам босма остонамга! Ўз ғамим ўзимга етмасмиди?!

Кўча бошида томошабинлар тўплана бошлаганини энди кўрдим. Аммо гап-сўзлару майда-чуйда иғволарни ўйлаб ўтиришга вақтим ҳам, тоқатим ҳам йўқ эди. Кўнглимда онамга нисбатан алам, ҳаҳр ҳўзғалди-ю югуриб бориб, ҳўлига ёпишдим.

- Тегманг! - дедим чинқириб. - Қўйворинг!

Ойим ҳамон унинг ёҳасидан бўғиб, баҳувват ҳўллари билан силкитар, Музаффар таҳдирга тан бергандек, индамай турар, энтикиб нафас оларди.

– Қўйворинг! – Ойимнинг билагига тармашдим.– Тегманг.

Ойим ғазабдан олайиб кетган кўзлари билан менга бир қаради-ю Музаффарга ҳайқирди:

– Иккинчи қадам босма остонамга, эшитдингми?

Музаффар ойимни силтамади, туртмади.

- Агар... деди секин. Йўқ десангиз Мунавварни опқочиб кетаман...
- Нима? Ойим чап қўли билан унинг ёқасини чангаллаган кўйи ўнг қўлини бўшатди-да, бир қадам орқасига тисарилди. Нима? деди тахдид билан.

Музаффар киприк қоқмади.

– Хафа бўлманг, – деди секин, аммо ишонч билан... Биз... кетамиз. Мунаввар билан...

Гапининг охирини айтолмади.

Тарсаки шу қадар қаттиқ жарангладики, қулоғим шанғиллаб кетди. Музаффар, кўзлари ҳайратдан олайганча беихтиёр чап юзини кафти билан бекитди. Кўзларини юмиб, гарангсиган ҳиёфада кафтини туширган эди, юзи аввал оҳарди, кейин бармоҳ изи ҳизариб, бўртиб чиҳди.

Ойим ўзи қилиб қўйган ишидан ўзи қўрқиб, Музаффарнинг ёқасини бўшатди. Ранги қув ўчиб, қалин лаблари осилганча, орқага чекиниб борди-да,

ахлат челакка урилди. Челак думалаб, тупроқ аралаш арча шохлари ерга тўкилди.

– Пешонам қурсин! – деди бошига муштлаб. – Пешонам қурсин! Энди шу кўргилик бормиди?

Музаффар ерда ётган портфелини шахд билан юлқиб олди. Ойимга эмас, менга қараб сўради:

- Нимага, Мунаввар?..

Юзини силаганча бошини қуйи солиб кета бошлади.

Атрофимизни ўраган томошабин оломондан жирканиб, ўша томонга – Музаффар талмовсираб юриб кетаётган кўча бошига югурдим. Менга деса ер ютмайдими! Игвогар оломони ҳам, бегона хотинни – менинг онамни ойи деб ёлвориб турган, шу меҳри эвазига калтак еган, йигитлик гурури ҳақоратланган Музаффарни, жонимдан азиз кишини оёқ ости қилган онамни ер ютмайдими! Менга деса ҳаммаси жаҳаннам оловида куйиб кул бўлмайдими?

– Музаффар! Тўхтанг!

Хайқириғим оқшом шафағида қонсираган кўчани титратиб юборгандек бўлди.

- Музаффар!

У кўча бошида, қуриб қолган терак тагида тўхтади. Энди менга ҳаммаси бари бир эди! Эшикдан мўралаётган, ҳар куни «йигитини» янгилаб кинога тушиб, ўпишиб ўтирадиган, аммо ота-онаси «қогозга ўроглик қанддай» деб мақтайдиган уй қизлари, бир вақтлар ўзи хоҳламаган одамга турмушга чиққани учун алами ичида қолган, энди ўзини гийбат билан юпатадиган келинчаклар, бир замонлар қайнонасидан зулм кўргани эвазига энди ўзиям сабабини тушунмай келини бошида ёнгоқ чақаётган қайноналар – ҳаммаси бир пул эди. Тупурдим ҳаммасига! Ту-пурдим! Ойим... эл-юрт ўртасида

эркакшода деб ном қозонган, аслида дадам бечорани чимилдиққа мажбуран судраган, дадам шўрликка хотин эмас, эр бўлиб олган бешафқат онам хам бир тийин! Энди тушундим. Кечаям ҳафсалам пир бўлган эди-ю, бунчалик бўлишига ақлим етмаган эди. Энди аниқ тушундим. Эркакшодалик бошқа, мардлик бошқа экан! Ҳезалакчалиш эркак қанақа хунук кўринса, эркакнамо хотин ҳам шунақа, бедаво бўларкан! Билдим! Онам — менинг ойим эмас! Умуман, аёл эмас! Ўз боласини, «ойи» деб илтижо қилиб турган йигитни уришга қандоқ қўли борди. Тағинам Музаффар одам экан! Бошқа йигит бўлса...

– Музаффар! – Бақатерак тагига борганда етиб олдим. – Музаффар, – бўғзимдан йиғи отилди. – Кечиринг! – Чанг бўлиб кетган шимининг почаларини силаб чўккаладим.

Билмадим, шамол келдими, теракнинг скелетдек қоқшол шохлари нолали инграб кетди. Тўзон кўтарилиб юзимга писта пўчоқларини урди. Бекат томонда трамвай ғилдираклари фарёд солиб узоқ ғийқиллади. Оқшом қуёшида Музаффарнинг тўзғиб кетган сочларини, титраб турган лабларини кўрдим. Чап юзида онамнинг беш бармогидан тушиб қолган кўкимтир излар бўртиб чиққан эди.

У йиглаётганимни кўриб қўрқиб кетди. Чанг-тўзон қуюнча бўлиб айланаётган йўлкага таппа ўтириб, бошимни кафти орасига олиб, юзимга қаради.

– Мунаввар, – деди ялиниб. – Унақа қилманг! Ойингизга қаранг!

Нима? Энди сизлашга ўтиб қолдими! Энди бегона бўлиб қолдимми?

– Опкетинг! – дедим ҳайқириб. – Керакмас! Ойим ҳам, бошқасиям! Кетаман! Обкетинг! – Алам билан ерни муштладим. – Обкетинг!

– Мунаввар... – У жилмайишга уриндию эплай олмади. Юзи аламли қийшайиб кетди. – Мунаввар, – деди титроқ қўллари билан бошимдан қучиб. – Эртага паспортингни олиб чиқ, тушундингми?

# ҚИРҚ ТЎРТИНЧИ БОБ

## УЧИНЧИ БОСКИЧ ТАЛАБАСИ МУЗАФФАР ШОМУРОДОВ ХИКОЯСИ

### Икки эшик ораси

Шовуллаётган нима? Бўрижарми? Қаёққа келиб қолдим ўзи? Алвасти кўприк-ку! Ана, Бўрижар сурон солиб, кўприк тагига кириб кетяпти, мунча ҳай-киради? Йўлида тўгонлар борлигидан хабари йўқда! Аввал биттаси тўсади, кейин иккинчиси, учинчиси... ҳар қадамда йўлини тўса-тўса охири ерга сингдириб юборишади. Нимага шунақа? Нимага ўз йўлингни ўзинг танлашингга қўйишмайди. Нега энди доим бировларнинг измида юришинг керак!

Қуёш йиғлаяптими? Ажаб, шу ёшга кириб, офтобнинг йиғлаб ботишини кўрмаган эканман. Ана, олисда, ёнғоқзор ортида осмон қонталаш бўлиб кетди. Шошма, Бўрижар ҳам ҳайқираётгани йўқ. Нола қиляпти. Ана, эшитяпсанми, қирғоққа бош уриб фарёд соляпти.

...Аслида ўшанда – Шерзод билан гаров ўйнаганда кўприкдан калла ташласам бўларкан. Қутулиб кетардим. Мунавваргаям шунча азоб йўқ эди. Ҳали ҳам кеч эмас. Сузишни билмайман. У ёкда ота-онанг айюҳаннос солса, бу ёкда энг яқин одамингнинг онаси куппа-кундуз куни, кўчанинг ўртасида урса... Ҳалиям кеч эмас... Бўрижар қонсираб турибди... Алвасти кўприк ўз номи билан Алвасти кўприк! Ҳеч ким билмайди ҳам... Аҳмоқ! Хезалак! Қилғилиқни қилиб қўйиб, дўппи тор келганда қочиш эканда! Мунавварнинг ҳоли нима кечади! Сенга шунчалик дажжоллик қилган хотин уни не кўйларга солмас экан?! Қизиқ, она деган ҳам шунақа бешафқат бўладими? Ҳали Мунавварнинг... бунақалигини билмайди. Сезиб қолса... Йў-ўқ! Осонликча жон берадиган анойи йўқ! Келишдик-ку ахир. Эртага Мунаввар паспортини олиб чиқади. Эртагаёқ ЗАГСга ариза берамиз. Майли, тўйи ҳам, карнай-сурнайлари ҳам керак эмас...

Поезд ўтяптими? Ўшанда ҳам поезд ўтиб қолган эди. Кейин Мунаввар келганди. Келиб, жонимни сақлаб қолган эди... Энди менинг навбатим. Энди мен уни асраб қолишим керак!

...Поездда кетамиз. Сирдарёга бориб, обком комсомолга учрашамиз. Бизни энг олис совхозга юборишсин... Аптеканинг зах ертўласига кириб, дори тайёрлагандан кўра...

Анави нима? Наъматак гули-ку! Лойқа сувда қалқиб келяпти. Наъматак гуллабди-да! Бугун қайси кун ўзи? Йигирма бешинчи апрелми? Қизиқ, анави ниначими? Гунафшаранг қанотини пирпиратиб, қутурган тўлқин устида бемалол учишини қара! Чивиндек жони бор-ку, қўрқмайди. Бир қарич пастласа-ку, тамом: пиёз пўстидек қанотлари ҳўл бўладию аламини кимдан олишини билмай ўшқираётган тўлқинлар ваҳшат комига тортиб, чирпирак қилиб кетади. Йўқ, қўрқмайди. Ана, соҳилдаги қоқигулга бориб қўнди. Бир зум дам олди-да, тағин пастга шўнғиди. Худди ўчакишгандек бемалол парвоз қилиб, кўпириб ётган лойқа тўлқинлар устида муаллақ туриб қолди.

Вой азамат-ей! Бир кун умр кўрадими, бир соатми, бари бир. Курашади, олишади, яшайди.

Балки ҳаётнинг маънисиям шудир ўзи! Тирикмисан, курашасан. Ё енгасан, ё енгиласан. Қизиқ, нега энди енгилиш учун курашиш керак! Чўққига чиқаётган одам йиқилишни ният қилмайди-ку! Курашдингми, енгишинг шарт!

«Қора аммам» нима дейди доим? «Тирикманми – қимирлайман!» Ёши саксондан ошибди-ку, ҳамон қимирлайди. Бултур Кимсан акамнинг ҳайкалини қучоқлаб йиглаганида энди тамом бўлди, деб қўрққан эдим. Йўқ, ҳалиям яшаяпти. Курашяпти. Мункиллаб қолган кампирчалик йўқмисан? Шошма! Амманг бор-ку, ахир! Вой овсар-ей! Нимага шу гап аввалроқ эсингга келмади? Мунаввар айтганку, «ойим у кишини танийдилар, яхши кўрадилар», деган-ку. Нўгайқўргонда ёнма-ён кўчада туришган экан. Нега шуни ўйламадинг! Совчиликка аммангни юборсанг, шунча гап йўқ эди. Аммангни ўзи ҳаммасини пишитарди. Ҳамма ишни яхшилик билан битиришнинг йўли бор экан-ку!

...Аммамнинг бехиси гуллабди. Қизиқ, бехи гуллабди-ю бултурги мевадан ҳалиям қолған экан, ошға босибди.

- Ол, болам, ейқол! У ғиж-ғиж нафас олиб, бир коса ошни олдимга сурди. Иштаҳам бўлмаса ҳам ўзимни мажбур қилиб ея бошладим: кечадан бери туз тотмаганим энди эсимга тушди.
- Ош дамлаётганимда чап қовоғим учувди, деди у ҳарсиллаб. Қара, сен келиб, севиниб қоларканман. Беҳиси эзилмабдими? Ҳали уканг келиб кетувди, кеча уйга бормабсан-ку, даловша!

Бундан чиқди ойим хавотир олиб, Омонни юборган. Баттар бўлмайдими!

Иштаҳам бўғилди. Жимлик чўкди.

Олмадек лампочка атрофида парвоналар айланяпти. Бир жуфт қалдирғоч инидан мўралаб ювош-

гина «вийт-вийт» қилади. Ҳаммаси ўша. Қалдиргоч ини ҳам, токчадаги баркашлар, девордаги Ҳусан бувам билан Кимсан акамнинг сурати ҳам. Аммамнинг ғиж-ғиж нафас олганча хиргойи қилиши ҳам.

Жон болам, жоним болам, Оллога топширдим сани, Охимга Олло етмади, Тупроққа топширдим сани...

Биламан, ҳозир Кимсан акамни гапиради. Ана, айтмадимми!

– Кеча Кимсан акангни кўриб келдим... Анча гаплашиб ўтирдим...

Бундан чиқди ҳайкал олдига яна борган. Йўлни билиб олган.

– Зангиотада-чи, бир йигит йигирма беш йил деганда эшикдан кириб кепти. Онаси бечора кўр бўлиб қолган экан. Ўғлининг овозини эшитиб, кўзи очилиб кетибди. – Аммам ўз гапига ўзи ишониб, жилмайди. ўиж-гиж нафас олиши тезлашиб кетди. – Аканг келиши билан тўй қиламиз... Чой ич, болам...

Боядан бери гапни нимадан бошлашни билмай ўтирган эдим. Аммамнинг ўзи тўйдан гап очгани яхши бўлди.

– Бизнинг тўй ҳам аниқ бўлиб қолди, амма, – дедим иложи борича бепарво гапиришга уриниб.

У ярқ этиб бошини кўтарди. Сочининг учидаги танга попуклари жаранглаб кетди.

– Вой! Вой ўзим ўргилай, шуни олдиноқ айтмайсанми! – у қурушқоқ лаблари билан пешонамдан ўпди. – Моро бўлсин! – Аммо ўша захоти аразлаган ёш боладек мунгайиб қолди. – Хафаман! – деди тўсатдан. – Даданг билан ойинг мени одам қаторига қўшмай қўйишди. Робия бир оғиз айтса бўлмайдими!

- Амма! дедим юпатиб. Халиям сиздан маслахат сўрагани келдим. Ўзингиз бош бўлмасангиз иш чаток. Ойим борсалар невара келинингизнинг онаси кўнмабди.
- Хо-о! Ким экан ўша Хусан думанинг невараси оғиз солса ноз қиладиган кенас! У бирдан жонланди. Нафасининг ғижиллаши ҳам тиниб қолгандек бўлди. Кўзлари ёрқинлашиб, овози қатъийлашди. Осмондаги ой бўптими? Битта борганда оқ ўраб келмасам юрган эканман. Ўзингга ёқадими ахир! Аҳд-паймонларинг борми?
  - Борликка-ку бор. Аммо бу ёқда дадам ҳам...
- Нима даданг! Аммам кўзларини чақчайтирди. Сан хоҳласанг, келин хоҳласа, ким қўйибди у кишига оёқ тирашни!

Кўнглим ёришиб кетди.

- Ҳайронман, келин дадамнинг кўнглига ўтиришмайроқ турибди.
- Вой, кўнгилларининг кўчасидан ўргилдим! Аммам қўлини муштлаб тиззасига ботирган эди, қоқшол бармоқлари синиб кетгудек шиқирлади. Нима қилади, икки ёшга монелик қилиб! Келиннинг таг-зоти дурустми ахир?
- Дуруст, амма, дуруст, беихтиёр илжайдим. Ўзиям синашта оила. Танийсиз. Башор холанинг қизи-да, Мунаввар...

Қизиқ, аммам бир лаҳзада бўшашиб қолди. Негадир тағин нафаси қисиб, «ғиж-ғиж»и кўпайиб кетди. Ҳозиргина чарақлаб турган кўзлари сувга тушган тошдек хира тортди.

Довлида аллаким йўталди. Дадам! Дойнахой шу ерда бўлса керак, деб мени излаб келган. Сакраб туриб кетдим. Остонага етмасимдан эшик очилиб оппоқ яктак кийган Оқсоқол бува кириб келди. Салом бериб, беихтиёр орқага тисландим. Болали-

гимда, дадамга эргашиб юрганимда уни кўп кўрганман. Момақалдироқдек гумбирлаб гапиришини эшитганман. Етти яшардан етмиш яшаргача ҳамма унинг соясига салом беришини биламан. Бултур ўамгузор она ҳайкали очилаётганида айтган гаплари ҳам эсимда... Аммо бунчалик юзма-юз келмаган эдим. Унинг бутун туриш-турмушида одамни дафъатан эсанкиратиб қўядиган салобат бор экан. Худди аъзойи баданидан ғалати нур тараляптию яқинига борсанг, кўзинг қамашадигандек.

 Ваалайкум ассалом, умрингдан барака топ, болам, – деди у вазмин оҳангда.

Аммам ҳам каловланиб ўрнидан турди. Саксон ёшли кампир қўлини кўксига қўйиб салом берса, қизиқ кўринаркан. Бироқ мен бунисига ҳам ҳайрон қолмадим. Аммам ҳансираб нафас олганча тахмондан янги кўрпача олиб, хонтахта тўрига ёзди.

- Хуш келибсиз.
- Яхши ўтирибсанми, келин? Оқсоқол оғироғир қадам ташлаб юқорига ўтди, бўғинларини шиқирлатиб кўрпачага чўкди. Оппоқ, қуюқ қошлари тагидан менга синчков қараб қўйди.
- Неварам! деди аммам таништириб. Робиянинг ўгли... Биласиз-ку, дадаси опичлаб юрарди.

Оқсоқолнинг юзи ёришди.

– Э, ўша боламисан? – деди кулимсираб. – Баракалла! Ўтир, болам! Онанг тузукми? Даданг яхши юрибдими?

Нега шунақа бўлганини ўзим билмайман. Кечадан бери кўнглимни хижил қилаётган ташвишларни бир зум унутгандек бўлдим. Оқсоқол бувага яқин ўтиришга қўрққандек анча берида чўккаладим.

– Потма қизим яхшими? Невара-чеваралар юришибдими? – Аммам пиёлани чайиб чой узатди. – Алоқ-чалоқ туш кўриб юрибман. Думани... Башоратни... – Оқсоқол пиёлани айлантириб-айлантириб чой ҳўпларкан, аммамга юзланди. – Замон тўкинчилик бўлган сайин одамлардан оқибат кўтариляптими, нима бало? Башорат қандоқ жувон эди! Хотин киши бўлсаям белида белбоғи бор эди! Потмамга тайинладим. Текстил қочиб кетгани йўқ, Тойиржон билан бориб ҳолидан хабар олларинг, дедим. – У бошини вазмин буриб менга қаради. – Сенам, ойингга айт, болам. Оқсоқол бувам тайинладилар. Башорат опангиздан хабар оларкансиз дегин, уқдингми?

Бирдан ичимда лоп этиб чироқ ёниб кетгандек бўлди. Ахир... Ахир Оқсоқол бува Мунавварнинг ойисини гапиряпти-ку! Оти Башорат бўлса, текстилда турса... Ўша-да! Майли! Кеча Башор хола жаҳл устида шунақа қилди. Лекин Оқсоқол бува мақтаяптими, бундан чиқди...

«Танийман! Башор холани ҳам, қизини ҳам... Мунавварни... Мен уни...»

Бир зум жим ўтирсак, шу гаплар оғзимдан чиқиб кетиши аниқ эди. Билмадим. Оқсоқол буванинг салобати босдими... тилим айланмади. Аммамга жавдираб қарадим...

- Хавотир олманг, Оқсоқол... Аммамнинг юзи ёришди. Башорхон тинч юрганга ўхшайди... Энди, биласиз-ку, ёшларни... У менга зимдан тезгина қараб олди. Нафасининг «ғиж-ғиж»и кучайиб кетди. Неварам тушмагур билмасдан Башоратхоннинг дилини огритиб қўйишига бир баҳҳ қопти... Шунга...
- Ким? Оқсоқол аввал аммамга, кейин менга оппоқ қоши тагидан ўткир қараш қилди.
- Башоратхоннинг қизига совчи қўймоқчи бўпти. Миноварга. Аммам шоша-пиша кўзини яширди.

Назаримда Оқсоқол сезилар-сезилмас сесканиб кетгандек бўлди. Каттакон кафти билан қалин, оппоқ соқолини тутамлаб турди-да, оғир бош чайқади.

– Ёшлик қилма, болам, – деди секин, аммо қатъий оҳангда. Белбоғини тимирскилаб нос шишасини топди. Нос отиб, шиша оғзини шошилмай ёпди. Узоқ жимиб қолди. Аммам ҳамон ғиж-ғиж нафас олар, Оқсоқол бир нуқтадан кўз узмай ўтирар эди. Нима бало, келишиб олганми ҳаммаси! Мунавварнинг онаси дод-фарёд солади! Дадам оғзидан кўпик сачратади. Аммам мум тишлайди, Оқсоқол дашном беради! Нима бўлган ўзи? Нимага айтишмайди?

Ниҳоят Оқсоқол ёнбошлаб, очиқ деразадан носини тупурди. Лабини, соқолини артиб, менга юзланди.

- Болам, деди кўзимга тикилиб. Одамзот юз йил умр кўрадими, минг йилми - бари бир ўлгиси келмайди. Минг йил яшаган бир сахоба «Эсиз-эсиз, у эшикдан кирдиму бу эшикдан чиқиб кетяпман», деган экан. Шунақа, болам... Хеч ким ўлишни ўйламайди. Аммо Худо одамзотга умрни ўлчаб беради. Шунақаликка шунақа-ку, одамнинг умри неча йил яшагани билан саналмайди... - У хўрсинди. - Бир хил одамлар бор: у эшикдан кириб, бу эшикдан чиқиб кетаётганда қўлидан келганча савобли иш қилади. Ҳаёт деган иморатга ақалли битта ғишт қўйиб кетади. Яна бир хиллари бор: ўша иморатдан ақалли битта ғиштни ўғирлаб кетгиси келади. Ўғирлаб-ку, ҳеч қаёққа боролмайди, нариги эшикка борганда бари бир ташлаб кетади. Икки орада иморатни бузгани қолади...
- Ёш-да, гапга аммам аралашди, билмаган... Нимани билишим керак ахир? Мунаввар иккаламиз бир биримизни яхши кўришимизними?

Нима бўлган ўзи? Нега ҳаммаси гапни буради? Мунаввар иккаламизнинг айбимиз нима?

Оқсоқол буванинг салобати босиб турса ҳам чидаб туролмадим.

– Амма... Ростини айтинг! Нима бўлган ўзи?.. – кейинги гапни айтмоқчи эмасдим. Оғзимдан чиқиб кетди, – Мунаввар иккаламиз...

Аммам ярқ этиб Оқсоқолга қаради. Ажаб, Оқсоқол бува ҳам юзини ўгирди.

– Қўй, болам! – деди вазмин, лекин қатъий оҳангда. – Ўзингниям, бировниям қийнама.

Назаримда унинг бояги салобати сусайиб қолгандек, тўсатдан қадди букилгандек туюлди. Негадир каттакон кафтининг орқаси билан оппоқ, қуюқ қошларини силаб қўйди. Билмадим, қошини силадими, кўзини артдими?..

– Келин... – деди аммамга зимдан қараб, овози титраб кетди. – Нимагаям падарлаънат уруш бўлди-а?! Мендаям айб кўп-а, нима дейсан, келин?

...Хеч нимага тушунмадим. «Уйга боришим керак»лигини баҳона қилиб чиқиб кетдим. Оқсоқол қилт этмай ўтираверди. Ажаб, ҳар сафар кўча бошигача кузатиб чиқадиган аммам ҳам жойидан жилмади.

...Яна келиб қолдимми, шу бақатерак тагига? Қизиқ, Нўғайқўргондан шу ергача пиёда келдимми-а? Соат неча бўлдийкин? Ярим кечадан ошгандир. Мунча хунук бу дарахт? Қоқ суяк қўлларини осмонга чўзиб нола қилиб турганга ўхшайди. Ой мунча хира? Мунаввар ҳали худди шу ерда оёгимдан қучоқлаб йиглади. Тентак, нега йиглайсан? Адашмасам шу эшик Мунавварларники! Мана ўша шифер томли пастак уй. Ҳовлида арчанинг найзаси осмонга санчилиб турибди. Мана ўша дераза. Чироқ ўчган. Қизиқ, Мунаввар уйгоқмикин?

Нима кераги бор! Ойиси яна шовқин солади. Мунавварни хафа қилади.

Шошма! Ким у инграётган?! Мени чақирдими? Йўг-е, жимжит-ку. Ҳа, ит увиллаяпти. Мунавварларнинг ити йўқ эди шекилли. Қўшниникида. Намунча увиллайди! Одамга ўхшаб йиглайди-я. Ие, яна биров инградими! Мунаввар шекилли. Йўқ, менга шунақа туюлди. Кетиш керак. Ойиси уйгоқ ётган бўлса, Мунаввар балога қолади. Эрталаб паспортини олиб чиқадиган бўлди-ку. Кеча ётокда Эргашнинг хонасида тунаганман. Уйга бориб хужжатларимни олмасам бўлмайди! Қизиқ, бошқа итлар ҳам ув тортяптими? Нима бало бўлди ўзи? Нимага ҳамма ёқ бунчалик ваҳимали? Нега юрагим ўйнаяпти? Худди гурсиллашини бутун олам эшитаётгандек.

Чарчадим... Умримда шу бугунгидек азобли кун бўлмаган эди. Майли, тонг отсин... Мунаввар институтга боради. Кўришамиз... Биламан, ойисининг бояги қилмишидан уялади. Яна кечирим сўрайди. «Тентагим, жоним! Шунга шунчами? Нима бўпти? Сенинг онанг – менинг онам эмасми? Яхши кўрганида бошимни силайди. Жаҳли чиқса койийди. Нима қипти!»

Шунақа-ку, нега ҳаммаси бир томонга ўтиб олишди? Ойим, дадам, Башор хола?! Шошма: ҳали Оқсоқол бува нима деди? Башорат белида белбоги бор жувон дедими? Бўлмаса нега совчиликка ўзим бораман деб турган аммам бирдан айниб қолди? Нега Мунавварнинг отини эшитиши билан Оқсоқол бува ҳам сесканиб тушди?! Нимага? Нима бўлган ўзи?! Қизиқ, Оқсоқол бува ҳаёт иморатидан ғишт ўғирлайдиган одамларни гапирганда кимни назарда тутди? Меними? Мен кимнинг иморатини бузибман. Ё дадамни айтмоқчи бўлдими? Ойимними? Башор холаними?! Унақа бўлса, нега

ўзи мақтайди Мунавварнинг ойисини?! Яна нима деди? «Нимага бўлди ўша уруш?» деб ўкиндими?! Уруш битганига йигирма йилдан ошди-ку! Мунаввар билан менинг нима дахлим бор урушга. Ахир биз урушдан кейин туғилганмиз-ку! Ажаб, нима учун Оқсоқол бува, «мендаям айб кўп-а», деди?

Йўқ, бунақада жинни бўлиб қолиш ҳеч гапмас! Ҳозир... Ҳозир уйга бораман, паспортимни олиб чиқаман. Эрталаб Мунаввар ҳам ҳужжатларини обкелади. Бўлди! Тамом!

### ҚИРҚ БЕШИНЧИ БОБ

### УЧИНЧИ БОСКИЧ ТАЛАБАСИ МУНАВВАР АЛИЕВА ХИКОЯСИ

#### Дахшат

Ахлат челак ҳамон ағдарилиб ётар, тупроқ аралаш арча шохлари ерга тўкилиб, бир қисми лойқа ариқчага тушган, қолгани сочилиб кетган эди. Ойим бояги важоҳатидан сал тушган, йиғламсираб, ҳасрат қиларди.

– Не умидлар билан катта қилувдим. Отга тептирмадим, итга қоптирмадим...

Уч-тўрт хотин унинг атрофини ўраб олган, бири олиб-бири қўйиб юпатишарди.

- Қўйинг, Башорхон! Қарғаманг. Ёш-да...
- Она қарғиши ўқ бўлади, айланай. Мунаввархон эсли қиз.
- Шуни айтинг, овсинпошша! Биров билан қочиб кетмабди. Аллакимларга ўхшаб ёмон иш қилмабди. Ниҳоят, кўнглига ёққан йигит кузатиб кепти. Шунга шунчаликми?
  - Э, кўнглига қирон келсин!

Ойим мени кўриб, баттар тутақди.

- Уйга кир! деди ўшқириб. Бетгинанг қургур, бетсиз!
- Овсинжон, қиз болани қарғаб бўлмайди... қўшни хотинлар тағин юпата бошлаган эди, ойим шошқинч силтаниб, орадан чиқди. Мен билан кетма-кет қовлига кирди. Бояги хотинлар ҳам эргашди шекилли, ойим кўча эшигини тарақлатиб ёпиб, шарақ-шуруқ қилиб, занжирни туширди.

Индамай уйга кириб кетдим. Бетсиз менми, ўзими! Бегунох одамни, онам деб этагидан тутмоқчи бўлган йигитни уриб ўтирибди. Паспорт қаёқдайди? Ҳа, бурчакдаги қутида! Ҳамма ҳужжатлар ўша ерда туради.

Кун ботиб борар, ҳаво дим, уй ичи нимқоронги эди. Ҳовли томондан онамнинг ҳамон жаҳл билан тўнғиллаётгани эшитилиб турарди. Ҳамма нарсанинг ҳам чегараси бўлади. Чидамниям, андишаниям. Энди ўзидан кўрсин!

Мана ўша қогоз папка. Аттестат, солиқ қогозлари... Мактабда олган медалим... Мана паспорт. Эртага институтга бориб юрмайман, тонг отмасдан Музаффарларникига бораман. Бир кун дарсдан қолсак қопмиз. Майли, бизга тўйи керакмас. Бошида қолсин!

Шиқ этиб чироқ ёнди... Чўкаллаб ўтирган жойимда бурилиб қарадим. Остонада ойим турибди. Сочлари ёйилиб кетган, бир оёгида калиш бор, биттасида йўқ. Йигидан қизарган кўзлари чироқ нурида қонсирагандек ялтираб турибди. Қизиқ, юрагимни қўрқув эмас, ғазаб эгаллади. Майли, урсин, ўлдирсин! Қайтага яхши бўлади.

У анчагача меровсираб қараб турди-да, калишини ечишни унутиб, секин-секин ёнимга келди. Эски шолчада бир пой калишининг оқимтир из-

лари муҳрланиб қолди. Киприк қоқмай қараб туравердим. У ҳолдан тойгандек рўпарамга чўккалади. Кўзимга тикилиб турди-турди-да, тўсатдан бўйнимдан қучди.

– Болам... – деди унсиз йиғлаб. – Жон қизим... – титроқ лаблари билан пешонамдан ўпди. Бошидан тер аралаш қатиқ иси анқиб кетди. Эрта оқарган сочи юзимга тегиб ғашимни келтирди. – Жоним болам! Наҳот сенга ёмонликни раво кўрсам, қизим! – Мук тушиб, бошини тиззамга қўйди-да, қоп-қора бақувват қўллари билан белимдан қучоқлаб олди. Кейин оёқларимни тез-тез ўпа бошлади. – Кечир мени, қизим!

Ўзининг қилмишидан ўзи уяляпти. Тиззалаб ўтирганча ойимнинг пахмайиб кетган сочларини силадим.

– Ойи... – дедим ялиниб. – Унақа қилманг, ойи! У қамон қўйиб юбормас, оёқларимга иссиқ нафаси, лабларининг тафти, қайноқ кўз ёши тегаёт-ганини сезиб турардим.

- Ойи, қўйинг.

У оёгимни қучоқлаганча бошини кўтарди. Йигидан энтикиб, огир ютинди.

– Жон болам, – деди ёлвориб. – Гуноҳкор онангни кечир, қизим. Айт, кечирдим, де!

Томоғимни йиғи бўғди.

– Ойи, қўйинг! Унақа деманг! – Унинг тер аралаш қатиқ ҳиди анқиб турган бошини қучоқлаб, кўксимга босдим. – Нимага унақа қилдингиз? Нимага урдингиз бечорани?

Ойим жавоб бермади.

Анчагача шу алпозда ўтирдик. Ташқарида қоронғи қуюқлашди. Дераза рўпарасидаги найзадор арча қора ўтовдай қилт этмай турар, негадир қўшнининг ити тинмай увлар, кўнгилга ғашлик солар эди.

- Ваъда берасан-а, қизим? У худди капалакни авайлаб қовучлагандек, юзимни дағал кафтлари орасига олди. Секин бошимни кўтардим. Энди у йигламас, кўзларида маъюс илтижо бор эди.
- Ваъда берасан-а, Мунаввар? деди яна. Ўшанинг номини тилга олмайсан-а?

Сесканиб ўзимни орқага ташладим. Энди меҳр уйғона бошлаган кўнглим яна ғашланди.

– Ойи! – дедим шахт билан. Шу бир оғиз сўзда ўтинч ҳам, алам ҳам, ниҳоят ғазаб ҳам аралашиб кетганига ўзим ҳайрон қолдим. – Ойи! Мен уни яхши кўраман, билдингизми! Мен усиз туролмайман! Ўлиб қоламан! Тушунсангиз-чи! – дедим ерни муштлаб.

Боядан бери қўлимда паспортни ушлаб ўтирганимни энди билдим. Ерга муштлаганимда паспорт қўлимдан отилиб кетди. Муқоваси очилиб, дераза олдига бориб тушди.

Ойимнинг ранги қув ўчиб кетди. Кўзида бояги меҳрибон ифодадан урвоқ ҳам қолмади. Юзи таҳликали қийшайиб, кўзларида ўт ёнди.

- Туролмайсанми? деди тишларини ғижирлатиб. Кўзига тик қараб алам билан бош чайқадим:
- Туролмайман!
- Ўлиб қоласанми, ўшасиз!
- Ҳа! овозим борича чинқирдим. Ўлиб қоламан!

Сакраб ўрнимдан турдим. Югуриб бориб, дераза олдида саҳифалари очилиб ётган паспортни юлқиб кўтардим.

- Мана! дедим бақириб. Мана! Эртага ЗАГСга борамиз! Керакмас тўйингиз ҳам! Сарполарингиз ҳам. Гапимни тугатолмадим.
- Ур! Ойим тиззалаган кўйи сурилиб, рўпарамга келди. Ўлдир! деди телбалардек ҳайқириб. Ҳо-

вончадек қўллари билан кўйлагининг ёқасига чанг солиб бир силтаган эди, кўйлаги шариллаб йиртилди. Қора баданидаги кўкраклари ялангочланиб лопиллаб кетди. – Ур! – деди чинқириб. – Ур! Ўлдира қол! Ўз акангни эр қилгандан кўра ўлдир онангни! Мана шу кўкракларимни иккаланг эмгансан, жувонмарг! – у эсдан огиб қолгандек қоп-қора қўллари билан иккала кўкрагига чанг солди. – Мана бунисини, мана бунисини талашиб эмгансан ўша хушторинг билан, қиз ўлгур!

У телбаланиб қолгандек, оғзидан кўпик сачраб нуқул «ур», «ўлдир», деб кўксига муштлар эди.

Нима? Нима деди? Аканг дедими? Битта кўкракни...

Ёлғон! Алдаяпти. Музаффардан қутулиш учун туҳмат қиляпти!

– Ёлғон! – Ерга юзтубан йиқилиб додлаб юбордим. – Ёлғон! Туҳмат!

Шолча тўшалган ерни муштлар эканман, тўсатдан хаёлимга бир-биридан дахшатли саволлар ёпирилиб келди. Шошма! Унақа бўлса, нимага Музаффарнинг онаси совчиликка келдию ниятини айтмай қочиб кетди? Нимага дадаси ҳам оёқ тираб туриб олди? Ойим нимага Робия келса олдимга солиб қувлайман, деди! Нега ҳали Музаффарни урди?

Нахотки? Йўк! Тухмат! Ёлғон!

Бир маҳал ойим елкамдан силтаб тортди. Беихтиёр бурилиб қарасам, бир қулида яримта кулча, бир қулида пичоқ билан тепамда турибди. Сочлари тузгиган, кузи олазарак, безгак тутган одамдек шақ-шақ қалтирайди.

Кўйлагининг олди киндигигача йиртилиб кетган.

– Ма! – деди бир қўлимга нон, бир қўлимга пичоқ тиқиштириб. – Нонга ишонмасанг, ур! Қутулай шу азобдан! Нимага қараб турибсан, ур!

Дахшат ичида ўзимни орқага ташладим.

- Уйи куйсин! Бировга яхшилик қилганнинг уйи куйсин! Ойим пичоқни улоқтириб юборди-да, нон билан кўкрагига ура бошлади. Нега ўлиб кетмадим. Дод! Шу кунларни кўргандан кўра ўлиб кетсам бўлмасмиди, до-о-о-д! у нон билан кўксига ҳар урганида бутун гавдаси силкиниб кетар, кўзига ёш келмас, аммо фарёд чекар эди. Бир талпиниб ерда ётган пичоқни олди. Яна қўлимга тиқиштирди.
  - Ур! деди жиннилардек кўзи олайиб. Ўлдир!
- Ойи! дедим бўйнидан қучоқлаш учун талпиниб. Бўлди, ойи...
- Йўқ! Бўлдимас... Ойим худди бегона одамдан йиргангандек ўзини орқага ташлади. Бўлдимас! Кўнглим сезиб турибди. Яхши кўрасан ўшани.
  - Ойи...
- Яхши кўрасан! У чўккалаб ўтирганча дераза томонга қараб осмонга қўл чўзди. Илоё ўша Раъно бузуқ жувонмарг бўлсин! Илоё у дунёю бу дунё хор бўлсин. Илоё Умар закунчи дўзахга кунда бўлсин! Шомурод чўлоқ бу кунидан баттар бўлсин!

Ниманидир тушунгандек бўлдим. Ҳа, эсладим. Бир вақтлар Музаффар ҳазиллашиб, «мени дадам туққан», деб кулган эди. Кейин Қўқонга бориб келди. Биринчи курсда ўқиётганимизда. Қишда. Сўрасам, «Қўқонда ҳам ойим бор экан», деб қўя қолди. Бу ҳақда бошқа гапирмади. Аммо орқаворотдан Музаффарнинг дадаси урушда юрганида онаси аллақандай Закунчи деган киши билан гап-сўз бўлгани қулоғимга чалинган, лекин бунақа ғийбатларни кавлаб Музаффарнинг дилини огритгим келмаган эди. Демак, Қўқондаги онаси кичкиналигида уни ташлаб кетган. Демак, ойим уни... шу кўкраги билан...

Қандоқ шармандалик! Қандоқ бедодлик! Музаффар... ўзимнинг... Мен ўз акам билан...

Ажаб, кўнглим тип-тинч бўлиб қолди. Шунақанги осойиштаки, гўё мен йўқман. У – Мунаввар бошқа қиз эди. Музаффарни яхши кўрган, кўйида ёнган, онасидан аразлаган, эртага ЗАГСга бормоқчи бўлган... У йўқ! Энди Мунаввар йўк! Қизиқ, тағин бошим айланяптими? Нега энди? Ахир мен йўқман-ку! Ўзини билдиряптими? Шармандалик! Қандоқ уят! Майли, ҳеч нима қилмайди. Бу ёги оз қолди.

– Ойи... – дедим юпатиб. – Бўлди. Тушундим ҳаммасини...

Ойим ярқ этиб қаради. Ҳамон титраб турарди. Лекин аланг-жаланг кўзларида умидми, ўтинчми, ҳарқалай маъно пайдо бўлди.

Ойим тағин қучоқлади. Сочлари пахмайиб кетган бошини куксимга қуйиб энтикди.

- Жон қизим... Нахот сени бахтиқаро қилсам.

Ажаб, негадир кулдим. Жуда хотиржам, жуда бепарво кулиб қўйдим. Ўзим ҳам ҳайронман: нега кулдим? Эҳтимол бу телба дунёнинг адолатсизликларидандир? Эҳтимол Музаффар икковимизнинг соддалигимиздандир! Эҳтимол Музаффарни ташлаб кетган онасию аллақандай Закунчининг ифлослигидандир! Ким билсин, балки битганига йигирма бир йил тўлганидан кейин ҳам одамларни ўлдираётган урушдан кулгандирман...

«Ўлдираётган» дедимми? Нима қипти? Дадам соғинган мени. Бораман. Олдига бораман... Содда, мулойим дадамнинг олдига. Меҳрибон дадамнинг олдига.

- Хафа бўлманг, ойижон... Хаммаси яхши бўлади... Хайронман. Бу гапни хам жуда сокин, жуда хотиржам айтдим. Нега ҳайрон бўлай, ахир мен йўқман-ку энди.
- Жон болам, у пешонамдан ўпди. Арзимаган нарса деб сениям дилингни огритдим. Нима қилай, қўрқиб кетдим-да, қизим...

«Арзимаган нарса?» Ҳа, тўгри айтади. Бу дунёда арзийдиган нарсанинг ўзи борми?

– Қанийди, шу ишлар бўлмасаю сен Музаффарни танласанг, – деди ўкинч билан. – Қўшқўллаб кўтариб обориб берардим, қизим. Биламан, яхши бола... Ўз боламни ўзим урдим-а... Кўрсанг айт, мендан хафа бўлмасин... Отасиям, Робияхонам топилмайдиган одамлар. Иложим қанча қизим? Ночорман...

Ким хафа бўлади? Музаффарми?! Йўг-е! Шу «арзимаган» нарсага-я.

- Мени биласан-ку, Мунаввар! Ойим яна бошимни силади. – Эртага кўнглинг тусаган йигитни опке! Шу менга ёкди, дегин, бир ҳафтада тўй қилмасам, юзимга тупур, қизим!
  - Биламан, ойи, биламан, дам олайлик...
- Уйқу келадими шу топда, қизим. Майли, сен дам ол... Қуриб кетсин, ит мунча увиллайди? Балоси ўзига урсин...
- Қўрқманг, ойи... Дам олинг. Ухлайлик. Қозир дорингизни топаман...

Фенобарбитал учта қоптими? Шошма. Яна бўлиши керак. Ҳа, мана тағин бир қутиси бор экан. Ўнта! Иккитаси ойимга... Қолгани...

...Яхши! Ойимнинг асаби меникидан яхшироқ экан. Ана, хуррак торта бошлади... Чарчаган... Уй мунча исиб кетди! Ажаб, қилт этган шамол йўқ. Шундай қилиб... Музаффар билан... Ойимнинг кўкрагини талашиб... Бундан чиқди... Хо-

зир! Ҳозир ҳаммаси тамом бўлади! «Арзимаган» нарсалар... Ҳаммаси арзимаган... Музаффарни севиб қолганим ҳам... Совчиларнинг ҳайдалиши. Музаффарнинг «қайнонаси»дан калтак ейиши... Йўг-е, нега қайнонаси бўларкан. Онаси-ку ахир... Дадаси урушда юрганида онасининг бегона киши билан... қочиб кетишиям... Музаффарни дадаси «туққаниям». Ҳаммаси арзимас... Ким билсин, балки уруш бўлмаса, дадаси кетмаса... Ойим «яхши бола» — дедими? Ўзим обориб берардим, дедими! Мабодо ойим рози бўлган тақдирдаям... Мен-а? Ўз акамга-я! Қизиқ, нега қўрқмаяпман? Қўлим титрамайдиям-а! Нима қипти, буям арзимас нарса!

Мендақа юраги порокларга тўрттасиям етади. Фенобарбитал кучли препарат. Мана, олтита, саккизта... Мана, бўлди... Ўнтаси етадими? Етади эмиш! Ортиб қолар! Яхши. Ҳаммаси жойида! Нима бало, таъсир қилмаяпти-ку! Кўрамиз! Мана, ўрнимга эсон-омон етиб олдим. Энди кўзимни юмиб ётсам... Кўп эмас, чорак соат. Биламан... Ҳозир ошқозонда эрийди, қонга ўтади. Аввал мияни карахт қилади. Кейин...

Яна кўнглим ағдариляптими?

Оҳ! Бўлмаяпти! Керакмас! Қусаман! Ўрнимдан туриб олсам бас. Ие, қўлим нега қимирламайди? Оёғим ҳам карахт-ку! Бундан чиқди... Йўқ, туришим керак. Хато қилдим. Адашдим... Туришим керак! Қўрқиб кетяпман. Ҳаво етишмаяпти.

## - Ойи! Ойижон!

Нимага эшитмайди? Қандоқ эшитсин! Овозим чиқмаяпти-ку? Шошма, ташқарида биров юрибди шекилли! Ана! Музаффар!

Ойи! Дада! Ойижон! Оҳ! Нима қилиб қуйдим?Ойи-и!

Нима бу? Осмон ярақлаб кетдими? Нима у гумбурлаган? Ойижо-он!

#### ҚИРҚ ОЛТИНЧИ БОБ

#### ШОМУРОД АКА ХИКОЯСИ

# Айбсиз айбдор

Музаффар бугун ҳам келмади. Онаси адойи-тамом бўлди. Эрталаб Омонни бувисиникига ғириллатди. Йўқ, у ергаям бормабди. Бундан чиқди... Билмадим... Хуллас хунук иш бўлди. Кеча ўзим ҳам ёмон гап айтдим. «Йўқол-пўқол» деган гапларга бало бормиди? Иккаласиям ёш. Бир-бирига кўнгил қўйган бўлса... Туш кўрибдими, Миновар... Шунақалигини?! Ўзим қўрқиб кетдим-да... Тағин ёшлик қилиб қиз бечорани... Ўртада шайтон бор... Олдинроқ шуни айтсам ўлармидим!

Хўп, нима қилишим керак эди? Олдимга ўтқизиб қўйиб, Башорат деган хотин сени эмизган, Миновар деган қиз сенинг синглинг бўлади, мабодо кўнгил қўйиб-нетиб юрма дейишим керакмиди? Сени туққан онанг шунақа – бузуқ бўлган, ўзим эмизай десам, кўкрагим бўлмаса, нима қилай, ўлиб қолмагин, деб мажбур бўлдим, шу ишни қилишга, десам дуруст бўлармиди?! Нима қиламан болани ўкситиб! Қолаверса, ўшанда Оқсоқол нима деди? «Болани ранжитмаларинг, сир сирлигича қолсин», демадими? Устига-устак почча фалаж бўлиб қолганидан кейин Башоратлар текстил томонга кўчиб кетди. Унда Музаффар эсини таниб-танимаган бола эди. Туш кўрибманми иккала ёш бирга ўқишини.

Бечора Башорат! Шунча яхшиликлари эвазига ақалли ойда, йилда бир хабар олиш ўрнига, холинг нима кечди дейиш ўрнига... У-ку, ўзи билан ўзи овора эди. Биз-чи? Нимага бормадик? Нимага Музаффарни етаклаб бориб: «Мана шу одам сенинг онанг бўлади. Миновар синглинг бўлади, демадик! Яхшиям Робия эслилик қипти! Вақтида қочиб қопти. «Қизингизга совчи бўлиб келдим, ўглим Миноварни яхши кўриб қопти», деса холи нима кечарди?! Музаффарни ўлимдан олиб қолган, шу-ку! Бир кун эмас, бир хафта эмас, етти ой! Етти ой кукрак тутди... Хаммасига Раъно айбдор! Йўқ, анави нахс-касофат Закунчи айбдор! Ўзим-чи? Ўзимда гунох йўқми? Хўш, нима қилишим керак эди? Сулайиб қолған болани улоқтириб қутулсам яхшимиди? Дунё нимага бунақа тескари? Нима учун қилар ишни биров қиладию касофатига бошқалар қолади?!

...Ўша куни шилқиллаб қолган болани кўтариб қамишзордан ўтиб, қишлоқ кўчасига кириб қолибман. Нимага шунақа қилганимни билмайман. Эҳтимол биронта арава топиб, шаҳарга бормоқчи бўлгандирман? Бораман, бари бир бораман! Закунчини сўймасам одаммасман! Шунча фашистга найза санчган одамга яна битта фашистни чавақлаш нима бўпти!

Чанқаб кетдим. Мен-ку майли, ўғлим сувсамадими? Ухлаб қолди шекилли. Шунақа узоқ ухлайдими?

# - Музаффар?

Силкитиб кўрсам, кўзи очиқ. Кўзи очиғу йигламайди. Боши шилқиллаб, у ёққа тушади, бу ёққа тушади.

Қўрқиб кетдим. Хонумоним куйишга куйди, оилам барбод бўлди. Энди ўглимдан ҳам айрилдимми! Инграб юбордим.

- Музаффар, болам...

Болани бағримга босганча дуч келган томонга югурдим. Нима қилай? Қаёққа обораман! Боқолмасам, эмизолмасам! Хаёлимга опам келди. Нима қилсаям хотин киши. Дока-покага ёғми, бодомми ўраб оғзига солар! Йўлини қилар... Рутубатли салқин тушган кўчадан елиб борарканман, бир маҳал аллаким билагимдан тортди. Мункиб кетдим. Ўғлимни бағримга қаттиқ босганча қайрилиб қарасам, Оқсоқол билагимни чангаллаб турибди.

- Бу нима юриш? - деди гулдираб.

Нима дей?! Эркак киши бунақа пайтда нима дейиши мумкин?

Назаримда Оқсоқол ҳаммасини тушунди. Шимининг чўнтагидан шишасини олиб нос отди.

- Бер бу ёққа! деди каттакон қўлларини чўзиб. Худди обқочиб кетадигандек, ўғлимни бағримга қаттиқроқ босдим.
- Бер! Оқсоқол болани қўлимдан авайлаб олди. Соқоли асабий силкиниб, чақалоқнинг юзидан ўпди. Ҳали шунақанги азамат йигит бўлсинки...

Тупроғи ўйнаб ётган кўчадан кетма-кет юриб кетдик. Қизиқ, Музаффар йиғлаш у ёқда турсин, ҳатто ғингшимас, назаримда ўлиб қолгандек эди. Оқсоқол эса болани авайлаб кўтариб борар, «оббо азамат-ей, оббо герой бола-ей!» деб эркалар эди. Анча юрдик. Бир маҳал қулоғимга бола йиғиси киргандек бўлди. Қарасам, унниқиб кетган пастак дарвоза олдига келиб қолибмиз. Кимнинг уйи эди бу? Ҳа, Поччаники-ку! Уям бултур мен билан кетма-кет урушдан қайтган. Бундан чиқди... Оқсоқол атайлаб шу ерга келган. Башорат яқинда туққанини билади.

- Ҳой, ким бор?! - Оқсоқол ичкари кирди. Беихтиёр мен ҳам эргашдим. Қарасам ҳовли ўртаси-

даги гулзор пуштасида Почча чўккалаб ўтирибди. Теша билан номозшомгулларнинг тагини юмшатяпти. Уй ичидан бола йигиси эшитиляпти.

Почча Оқсоқолни кўриб илдам ўрнидан турди. Аввал Оқсоқол билан кейин мен билан кўришди.

- Хотинингни чақир! деди Оқсоқол лўнда қилиб. Почча эсанкираб қолди.
- Тинчликми?
- Чақир дейман! Оқсоқол бир қуллаб болани қучоқлаған куйи иккинчи қулини пахса қилди. – Бул тез!

Мен Башоратнинг бола эмизиб ўтирганига ишонардим. Йўқ, молхонада экан. Терт қорилган тогорани кўтариб чиқиб келди. Узоқдан Оқсоқолга салом берди.

Почча бир нимани тушунди шекилли, аланг-жаланг бўлиб, гоҳ бизга, гоҳ хотинига термилди. Кўзларида ялинч ифода бор эди.

- Башоратхон, деди овози ингичкалашиб. Шу... Оқсоқол келган эканлар.
- Омон-эсонмисиз, Оқсоқол! деди Башорат шаддод ўктамлик билан. Кейин менга юзланди. Раънохон яхшими?
  - Раъно... йўқ! Алам билан юзимни ўгирдим.
- Менга қара! Оқсоқол катта-катта қадам босиб, Башорат томон юрди. Тезроқ қўл-пўлингни ювгин-да, шу болани эмиз! Гапни кўпайтирма!

Башорат бир зум ҳайратланиб турди-да, тоғорани улоқтириб, ариқда шоша-пиша қўлини ювди. Оқсоқолнинг қўлидан Музаффарни оларкан, ярқ этиб менга қаради.

– Илтимос... – Эсимни таниганимдан бери бир марта йиглаган эдим. Фронтда. Ғалабани эшитган куни... Бу сафар...

- Йиғиштир оби-дийдани! Оқсоқол елкамга шундай зарб билан шапатиладики, қалқиб кетдим. Ким айтади сени фронтовик деб! Кейин Поччага ўгирилди. Кўрдингми, Почча, битта ўглинг иккита бўлди!
- Бизники ўғилмас, ҳолва! Почча гоҳ менга, гоҳ Оқсоқолга қараб, хижолатли илжайди. Башорат Музаффарни бағрига босиб эркакча шахдам қадамлар билан уй томон кетди.
- Ундоқ бўлса яна яхши! деди Оқсоқол гулдираб. Ўғлим йўқ деб юрмайсан. Шу бола сенинг ҳам ўғлинг бўлади. Сени қизинг Шомуродниям қизи, уқдингми?

Башорат айвонга чиқиб бораркан, Музаффарни ўпди.

– Вой, қорнингни қорачиғидан айланай! Вой, ўзим ўргилай полвон боладан.

Бола аёл ҳидини сездими, сут нафасини пайқадими, ожиз инграб қуйди.

– Ўлларинг, иккаланг ҳам! – Башорат эшик олдида тўхтаб афтимга нафрат билан чақчайди. – Боланинг ўлишига бир баҳя қопти-ку!

Почча «ана, бизнинг хотин шунақа – ўғил бола», дегандек Оқсоқолга қараб жилмайиб қўйди.

Зум ўтмай ичкаридан икки боланинг баравар йиглаши эшитилди. Почча «ана» дегандек тантана билан бош силкиди. Лекин «нима бўлди, онаси қани?» деб сўрамади. Бир қарашда — меҳрибонлик, бир қарашда — ҳақорат. Бундан чиқди Раъно билан Закунчининг «дон олишиб» юришини ҳамма билади. Фақат мен... бефаҳм мол беҳабарман!

Орадан анча ўтди. Нихоят иккала бола хам тинчиб қолди. Почча хамон қўлида теша тутганча анграйиб турар, Оқсоқол ховлини, молхонани томо-

ша қилган бўлиб, атрофга аланглар, мен серрайиб қолгандим. Қизиқ, ҳеч қайсимиз бир-биримизнинг кўзимизга қарамасдик. Уй эшиги ғийқиллаб очилди. Башорат чиқиб келди.

- Миноварингиз тушмагур роса ғашлик қилди! деди эрига қараб. Биттасигаям тўяди-ку, бахиллик қиляпти. Биттасини эмиб, иккинчисини чангаллайди, қизғанчиқ.
- Башоратхон! Ердан кўз узолмай қолдим. Бунақа пайтда нима дейиш кераклигини билмасдим. Ақалли бир-икки ой... дедим тутилиб. Кейин бир гап бўлар. Аммаси бор... Амаллаб... Майли, ҳақи ҳанча бўлса...
- Нима? Кулиб турган Башорат бирдан жиддий тортиб, қовоғини солди. Назаримда юзимга нафрат билан қарагандек бўлди. Уялмайсизми? деди ижирғаниб. Аҳволимни тушунди шекилли, юпатди. Хафа бўлманг, деди бағридаги Музаффарга қараб. Турмуш ўлсин... Қўйинг... Раънохонни... ҳафа қилманг... Яҳшими-ёмонми, она-ку.

Тишларим ғижирлаб кетди.

– Раҳмат... – Болага құл чуздим. – Узр, – дедим кинояли илжайиб. – Булди... Сизни бошқа безовта қилмайман. – Аммо... болага ушанинг ҳаром сутини эмизмайман!

Болани кўтариб, энди эшик томон юрган эдим, Оқсоқол чақирди.

- Шошма ўв! Баққа ке!
- Тўхтаб қолдим.
- Гап бундай! деди Оқсоқол вазмин овозда. Сен Башорхон, эсли жувонсан. Потмамнинг ёш боласи йўқ, биласан, бўлмаса, бола ўзимиздан ҳам ортмасди. Тўғри, колхозда эмизиклик хотинлар озмас. «Туя» сартарошнинг хотини ўғил туққан.

Хирмонтепалик Меливойниям Ҳасан-Ҳусани бор. Локин бу, – Оқсоқол қоши билан менга имо қилди. – Эшикма-эшик юрса...

- Вой, Оқсоқол, мен бир нима деяпманми? Башорат хафа бўлиб унинг гапини кесди.
- Шошма, бердисини эшит! деди Оқсоқол овозини пасайтириб. Думаники яқин. Болага аммаси қарайди. Эмизиш сендан. Уқдингми?
- Албатта-да! Почча болани худди ўзи эмизадигандек мулойимлик билан қўлини кўксига қўйди.
- Гап шу! деди Оқсоқол кескинлик билан. Бугундан бошлаб шу икки нораста ака-сингил бўлди. Локин зинҳор-базинҳор оғзингдан гуллаб юрма. Сен ҳам. Оқсоқол Поччага тайинлади. Бегуноҳ гўдакни маломатга қолдирсаларинг хапа бўламан!

...Билмадим. Қишлоқ жойда гап ётмайди. Эҳтимол Башорат Музаффарни кўкракдан ажрагунча эмизганини унча-мунча одам эшитса-эшитгандир. Аммо ҳеч ким ҳеч қачон бу сирни ошкор қилганини эшитмадим.

...Шунча яхшилик қилган, жонингни асраб қолган хотинга, ўз онангга азоб берасанми, нобакор бола?! Келиб-келиб ўз синглингга кўнгил қўясанми, аҳмоқ! Начора, сенда нима гуноҳ? Балки ҳаммасига мен айбдордирман?.. Кеча ётиги билан тушунтирсам бўларди-ку! Майли, ҳалиям кечмас. Ҳаммасини тушунасан. Қайтага яхши бўлади. Миновар — синглинг эканини билсанг, бошини силайсан! Умрбод мададкор бўласан... Ҳали Робияга шуни гапирсам, «ўзингиз тушунтиринг, эркак одамсиз», деди. Тўгри! Ҳаммасини айтаман. Фаҳат мендан ранжима, ўглим! Ҳаммасини тушунтираман.

Ана, келди! Хайрият, тирик экан. Мен бўлсам, не хаёлларга бориб юрибман. Биламан, Робия ҳам,

Омон ҳам ухламаган, пойлаб ўтиришибди. Уйда чироқ ўчган. Лекин иккаласиям уйгоқ. Ана, Музаффар айвонга чиқди. Мастми, нима бало? Нега гандираклайди? Тентак бола! Қўрқма! Одамзоднинг бошида бунақа гаплар бўлиб туради. Ўзим ҳам онангдан ажралсам ўлиб қоламан, дегандим. Балоям урмади. Сеники нима бўпти ҳали! Соат неча бўлди ўзи? Эҳ-ҳе, тўртдан ошибди-ку! Ҳализамон кун ёришади. Нима бало? Мунча типирчилайди бу ҳаром ўлгур қўйлар. Увиллаётган ит кимники? Сартарошнинг ити-ку! Овози мунча хунук...

## ҚИРҚ ЕТТИНЧИ БОБ

## МУЗАФФАР ШОМУРОДОВ ХИКОЯСИ

#### Зилзила

Тоқатим йўқ! Кўрарга кўзим йўқ! Дадамниям, ойимниям! Балки бўйин эгиб келди деб ўйларсизлар! Чучварани хом санабсиз! Паспортимни оламану тонг отмасдан чиқиб кетаман! Бўлди, етар! Ёш бола эмасман! Одамман. Эркакман! Уч кун олдин Мунаввар нима деди? Бекатда, музей девори тагида! Мен ҳам... менинг ҳам болам бўлади. Керакмас, тўйларингу карнай-сурнайларинг!

Хали Мунавварнинг деразаси тагида турганимда инградими? Мени чақирдими? Нега кирмадим? Нега қўрқоқлик қилдим? Йўг-е, қулоғимга шунақа эшитилди. Хўп, кирганимда нима бўларди? Шаллақи онаси яна ғавғо бошлармиди! Шуми?

Оббо! Ойим ухламаган экан-ку!

Авваллари бир соат кечиксам, «қаёқда қолдинг», деб тергар эди. Бугун ювош тортиб қопти. Айбдор одамдек, қоронғида кўзимга термилишини қаранг!

- Қорнинг очиб кетгандир! Ҳозир овқат иситаман. Овқат! Нима кераги бор? Қарасам, зипиллаб бориб девордаги чироқ тугмасини босмоқчи.
  - Керакмас! Тўқман!

Ўзимни тўшакка ташлашим билан яна тепамга келди... Доим шунақа қилади. Бир вақтлар, кичкиналигимда касал бўлсам, биров билан муштлашиб, кўчадан йиглаб келсам, ётқизиб қўярди-да, бошимга эгилиб индамай турар эди. Мен беихтиёр нари сурилиб, ёнимдан жой берардим. Ойим ёнбошимга ўтириб, илиқ кафти билан бошимни силар, мен бўлсам, ҳамма нарсани – огриқни ҳам, аламни ҳам унутиб, ухлаб қолардим. Уйқуга кетарканман, ойим, бошим устига эгиларди-да, оҳиста шивирлар эди: «Жиннивой!»

Ха, унда бола эдим. Телба эдим! Аммо энди ёш боламасман. Йигитман! Эркак кишиман. Бари бир тепамда турибди. ўира-шира қоронғида юзини аниқ кўрмасам ҳам, кўзларида ялинч ифода борлигини сезиб турибман. У шарпадек унсиз ҳаракат билан бошимга эгилди. Пешонамни силаётганида ижирганиб, юзимни ўгирдим.

- Жиннивой! деди пичирлаб. Енгил титраётган бармоқлари аввал пешонамни, кейин сочларимни сийпалаб бошлаган эди, бошимни силтаб тортдим. Ўшкириб бердим:
  - Қочинг! Ухлайман!

Ойим чуқур хўрсинди. Қўлини тортди.

- Хафа бўлма... Бу кунларам ўтиб кетади.
- «Ўтиб кетармиш!» Юрагингни суғуриб олади-да, «ўтиб кетади», деб юпатади!
  - Қочинг! Мен ухлайман!

Ойим шарпадек сиргалиб нари кетди. Эшик олдига борганида тўхтаб, бурилди. Негадир яна хўрсинди. Эшикни оҳиста ёпиб чиқиб кетди.

Бояги воқеалар ярқ этиб кўз ўнгимга келди. Хеч гапдан ҳеч гап йўқ, бобиллаб ёқамдан олган Башор хола... Ахлат челак... На онасини, на мени юпатишни билмай, зириллаб югурган Мунаввар... Менинг дардим бу ёқда қолиб, у эшикдан кириб, бу эшикдан чиқиб кетган аллақандай саҳобани гапирган Оқсоқол бува...

Бекор айтибсизлар: ҳамманг, ҳамманг бекор айтибсан! Дадаму ойим ҳам, Башор хола ҳам... Эртага, эртага ҳаммаси ҳал бўлади! Кўрамиз ким ҳайсарроҳ экан!

...Дадам ухламаган дедим-ку... Ана, кириб келди, папирос тутатиб. Ўзимни ухлаганга солиб юзимни ўгирдим. Ана, курсига ўтирди. Папирос чўгидан қалин мўйлови, озғин юзи ёришиб кетди. Йўталди.

- Музаффар... Биламан, уйгоқсан...

Нима қипти, уйғоқ бўлсам? Ўрнимдан туриб, шакаргуфторлик қилишим керакми?

– Ўғлим! – У папиросни чуқур тортиб, тутун қайтарди. – Биласан, мен силаб-сийпаб гапиришни эплолмайман. Мендан хафа бўлма, Музаффар... Хуллас, гап шуки, Башорат бечоранинг дилини огритма. Ўша қиз – Миновар сенинг синглинг бўлади. Башорат – сенинг онанг. Қўқонлик ойинг ташлаб кетганидан кейин Башорат сени эмизган. Ёшингга тўлгунингча...

Нима? Нима деяпти? Бир зум карахт бўлиб ётдиму сапчиб ўрнимдан туриб кетдим.

#### - Ни-мма?!

Ўша заҳоти кимдир чироқни ёқди. Деворга суяниб унсиз йиғлаётган ойим, эшик олдида трусикчан қунишиб турган Омонни кўрим. Дадам айтган гапнинг даҳшатини энди идрок этдим.

- Ёлғон! Туҳмат! Кўрпани улоқтириб ҳайҳирдим! – Ёлғон!
- Кечир мени, ўғлим. Бошқа иложим йўқ эди.
  Дадам мўйлови аламли титраганча чўлокланиб чикиб кетди.

Телбалардек ёстиқни муштладим.

- Hera? Hera?!

Ойим чирқиллаб келиб бўйнимга осилди.

– Ўғлим! Жон болам!

Омон қўлимга ёпишди.

- Aкa!
- Йўқол! Йўқол ҳамманг!

Нафасим қисар, ҳаво етишмаётганга ўхшар эди. Бир томонга оғиб кетаётганимни сал-пал сездиму гурсиллаб каравотга йиқилдим.

- Сув! Сув обке, Омон! - деди ойим чинқириб.

Сувни нима қиламан! Мен кимман ўзи? Агар шу гап рост бўлса... Ўз синглисига... Ўз синглисини... Мунаввар! Бечора Мунаввар! Бир-биридан дахшатли саволлар юрагимга пичокдек санчила кетди. Шунинг учун экан-да, ойим совчиликка бориб, қочиб келгани?! Шунинг учун экан-да, дадам талвасага тушиб қолгани! Мунавварнинг онаси шунинг учун кўча ўртасида дод солган экан-да! Аммам шунинг учун бўшашиб қолган экан-да! Оқсоқол бува шунинг учун Башоратнинг дилини оғритма дебди-да! Нима қилиб қўйдим Мунавварни?! Мен ҳам одамманми! Шу кунимдан кўра ўлганим яхшимасми! Мунаввар! Нима қилиб қўйдим!

- Керакмас! Чиқиб кетинглар!

Нега йиглайди ойим?! Мен йиглашим керак-ку! Мен виждонсиз! Аблах! Мен – нопок йиглашим керак-ку!

– Чиқиб кетинглар! Ўз ҳолимга қўясанларми-йўҳми?!

Хайрият, даф бўлишди. Айвон томонда дадамнинг хўрсиниб, гўлдирагани эшитилди:

– Менга қара, Роби... Балки Башоратга ётиғи билан тушунтирармиз. Бир-бирига шунчалик кўнгил қўйган бўлса... Турмушда нималар бўлмайди...

Ойим бир нима деб мингиллади, эшитмадим.

– Майли, тонг отсин-чи... – Дадам йўталди. – Башоратга...

Яна Башорат дейди-я! Мунаввар-чи, Мунаввар?! Агар шу гапни эшитса... Биламан-ку! Мунавварни биламан-ку! Ҳаммасига мен айбдорман! Ўзим!

...Тағин нима бўлди? Ким у мени тўшакдан улоқтириб юборган? Нимага дераза шақиллайди? Юзим ачишяптими? Қон-ку! Китоб шкафи ағдарилдими! Ойнаси синдими? Осмон ёришиб кетди шекилли? Нега ўрнимдан туролмайман? Ахир ухлаганим йўқ-ку! Эс-хушим жойида-ку. Нимага ер силкиняпти?! Ана, бир нима гумбурлади. Ер тагида алланима гувиллаяпти.

Уруш! Уруш бошланди!

Юрагим гурсиллаганча ўрнимдан туришга уриндим. Минг лаънат! Симкараватнинг суянчиги илгагидан чиқиб, оёгимни қисиб қопти. Мана, бўлди! Чироқ ҳам ёнмаяпти. Демак, бомба тушган!

Осмондаги шафақ ўчиб, зулмат чўкди.

Айвон томондан Омоннинг дахшат тўла ноласи келди.

#### - Ойи-и!

Айвонга отилдим. Эшикка етганимда ер яна силкинди. Оҳак ҳиди, итларнинг увиллаши, аллақаерда ойнанинг қарсиллаб сингани эшитилди. Эшик кесакисига суянганча бир зум туриб қолдим. Ер ҳамон бешикдек лопиллар, уй муттасил

нари-бери бориб келар, шифтдан оҳак кўчиб ерга тўкилар, ҳамма ёқ ғижир-ғижир қилар эди.

Ойим ҳали уҳламаган экан. Бўйи ўзи билан тенг бўлиб қолган Омонни қучоқлаб айвон ўртасида ўтирар, токчадан ағдарилиб тушган самовар Омоннинг тўшаги ёнида тумшуғи билан наматга санчилиб ётар эди. Ойим мени кўриб, кўзлари ола-кула бўлиб кетди.

- Ўтир, деди овози титраб. Ўтир! Шол бўлиб қоласан! Ўша заҳоти айвон зинасидан чўлоқланиб дадам чиқиб келди.
- Ўтирсанг-чи! деди ўдагайлаб. Ўзи ҳам айвон зинасига чўккалаб олди-да, ҳаяжонли титроқ овозда пичирлаб «Субҳон Оллоҳ», деб дуо ўқий бошлади.

Димогимга тупроқ ҳиди урилди. Ернинг силкиниши секин-секин пасайди. Аммо токчалардаги чойнак-пиёлалар ҳамон шақирлар, итлар тўхтовсиз увиллар эди.

 - Қўрқманглар! – деди дадам бизгами, ўзигами далда бериб. – Ер қимирлади... Бўлди... ўтди...

Чиндан ҳам шақир-шуқурлар, итларнинг увиллаши пасайди.

**Ховлига** тушаётган эдим, ойим бақириб берди.

- Ўтир, хозир яна қайталайди!

Сакраб ҳовлига тушдим. Этакдаги уйнинг роми ўрнига омонат териб қўйилган хом ғиштлар ҳовлига отилиб, пароканда сочилиб ётар, бостирма эшигидан арқонни узиб чиққан иккала қўчқор ҳовлида типирчилаб, у бурчакдан бу бурчакка жонсарак югурар эди.

Бир зум дахшат тўла сукунат чўкди. Итлар ғингшимай қўйди. Қўйлар ҳам тинчиб қолди. Атрофга нимқоронғи зулмат аралаш таранг осудалик қўнди. Уфқ секин-аста ёриша бошлади.

- Ёмон қимирлади! Айвондан оқ иштонининг боғичини осилтирган дадам тушиб кела бошлади. Ашхабоддаям бунчалик бўлмагандир.
  - До-од! Жон бола-ам!

Юрагим сесканиб кетди. Негадир бу овоз Башор холаникига ўхшаб кетди. Боя дадам айтган мудҳиш хабар зилзила ваҳимаси билан бир зум хаёлимдан кўтарилган экан. Яна ҳаммаси ҳайтадан ёдимга тушди-ю, кўча эшикка югурдим. Тўгри, текстилда баҳирган одамнинг овози бу ерга келмайди. Аммо юрагим сезиб турибди. Бир гап бўлган! Мунавварга бир нима бўлган!

Эшикка етганимда ойимнинг ҳайқириғи қу-лоғимга кирди.

- Қаёққа? Ҳозир яна қимирлайди!

Менга деса минг марта қимирламайдими?! Бошимга тушган кўргилик олдида зилзила нима бўпти?! Йўқ, мен эмас, Мунавварнинг бошига тушди бу кулфат! Энди нима бўлади? Юрагимни суғуриб ташласам қутуламанми шу азобдан! Теримни шилиб ташласам қутуламанми? Мунаввар! Нима қилиб қўйдим!

Тонг ёришган, аммо кўчалар кимсасиз, ҳамма ёққа ваҳимали, ўлик сукунат чўккан эди. Бир хил уйларнинг пахсаси қоқ ажраб кетган, баъзи уйларнинг деразаси отилиб ташқарига тушган, чеккарокдаги ҳовлининг ғиштин девори қулаб тушган, девор остидан ҳамон тўзон кўтарилиб турарди.

Харсиллаб югуриб борарканман, одамларнинг овози қулоққа чалина бошлади.

- Тинчликми, қўшни?
- Безарар. Ойна синди. Ўзингиз-чи?
- Пахса йиқилди. Асли синч қилсам бўларкан.

...Бўрижар яқинида қурилаётган касалхонанинг чала битган биносида хам пишиқ ғиштдан тиклан-

ган деворлар қулаб тушган, кўтарма краннинг «қўли» фил хартумига ўхшаб ерга оғиб қолган эди.

Хали автобус қатнай бошламаган экан. Югуриб кетдим. Шундагина оёғим ерга муздек урила- ётганини сездим. Қарасам, яланг оёқман. Кечаси шудринг тушибди. Ер совуқ, кўча четидаги қоқигуллар, майсалар, гўё ҳеч гап бўлмагандек тонг шабадасида оҳиста чайқалиб турар, чиқиб кела- ётган офтобга салом бериб майин жилмаяр эди. Қулоғимга тағин ўша – даҳшат тўла нидо чалингандек бўлди.

#### - Бола-а-м!

Юрагим қинидан чиққудек бўлиб югуриб кетдим. Тор кўча бошига келганимда нафасим қисилиб қолган, тиззаларим қалтирар эди. Қарасам, кўча ичи жимжит. Хайрият! Йиқилиб ётган аллақандай дарахтга ўтириб, нафасимни ростладим. Дарахтнинг қурт еб мўрт бўлиб қолган танасини силадим. Ўша заҳоти сапчиб ўрнимдан туриб кетдим. Ахир бу... ўша бақатерак-ку! Ҳар сафар Мунавварни кузатиб келганимда панасига ўтиб, хайрлашадиган «ўзимиз»нинг терак! Кеча Мунавварга Эргаш билан келиб арралаб ташлаймиз деган дарахтим.

Терак бўй-басти билан йиқилган, тор кўчани тўсиб қўйган эди. Шундагина ичкарида, Мунав-варларнинг эшиги олдида тўдалашиб турган эркак-хотин аралаш одамларга кўзим тушди. Юрагим така-пука бўлиб ўша томонга отилдим. Одамлар тўдасини ёриб ўтарканман, хотинларнинг шивир-шивири қулоғимга чалинди.

- Оёғидан девор босиб қопти!
- Вой-й? Ўлибдими?
- Ўзи юраги касал эди...
- Вой бечора-а!
- Кўзи очиқ кетди...

Учиб ҳовлига кирдим. Арча тагида нимча кийган, сочлари пахмайган Башор хола турар, атрофини ўраб олган хотинларга негадир илжайиб қарар эди.

– Кирманг, овсинжон, кирманг. Қизим ухлаяпти. – Чамаси у мени танимади. – Унақа деманглар, – деди ялиниб. – Мунаввар ўлгани йўқ. Ухлаяпти. – Қизиқ, у негадир яна кулди. – Уйқуси қаттиқ-да...

Отилиб уйга кирдим. Ўпирилиб кетган девордан нур тушиб турар, бурчакдаги каравот пачақланиб майишиб қолган, уй ўртасида ғиштлар сочилиб ётар эди.

Бериги девор тагида ётган Мунавварга энди кўзим тушди. Бошида ёстиқ йўқ, устига адёл ёпиб қўйилган. Тепасида иккита хотин ранги ўчиб турибди.

– Мунаввар! – Ёнига тиз чўкиб, бошига эгилдим. Унинг кўзлари очиқ эди. Йирик-йирик, қоп-қора кўзларини очганча бир нуқтага тикилиб ётар, узун, қайрилма киприклари қилт этмасди.

- Мунаввар! Елкасидан ушлаб силкитдим. Назаримда у майин жилмайиши, уялиб, оппок, тиник юзини ўгириши керакдек эди. Йўқ, у қилт этмади. Бир нуқтага қадалган кўзларида, чиройли, ақлли кўзларида, «нега унақа қилдинг, мен сенга нима ёмонлик қилувдим», деган маъно бор эди.
- Мунавва-а-ар! Дод солганча юз-кўзларидан ўпа бошладим. Унинг узун-узун киприклари пирпираб кетгандек бўлди. Аммо қимир этмади. Негадир юзи ҳам, лаблари ҳам муздек эди...
- Мунаввар! дедим жиннилардек қучоқлаб. Унақа қилма, Мунаввар!

Биров елкамдан ушлади. Аллақандай бегона хотин совуқ вазминлик билан насиҳат қилди.

– Ўликнинг устига гул тушса тош теккандек азият чекади, болам! Нима қиласиз қийнаб?

Нима? Ўлик? Мунаввар ўликми? Нимага? Нима учун? Нега энди мен бу ёқда қолиб, сен ўлишинг керак? Нима гуноҳинг учун, Мунаввар!

Кимдир юзимга сув сепди. Кимдир қўлтиғимдан олди. Уйга брезент замбил кўтарган, оқ халат кийган хотин билан эркак кириб келди. Ўша захоти Башор хола қуюндек учиб, ўзини Мунавварнинг устига отди.

- Болам! Жон қизим! У телбаланиб оқ халатлиларга қаради. – Кет! Йўқол!
- Ойижон! Қултиғимдан тутиб турган одамларни силтаб ташлаб Мунавварга ёпишдим. Мунаввар!
- Айрилиб қолдим, ўғлим! Башор хола ҳамон Мунавварни қучоқлаган кўйи ёш тўла кўзлари билан менга қаради. Синглингдан айрилиб қолдик-ку, ўғлим!

Мунавварнинг қўлларини, кеча оёгимга ёпишиб, шимимнинг почасини силаган, эркалаб сочимни тараган қўлларини адёл тагидан тортиб чиқардиму юзимга босганча мук тушдим.

- Опкет, Мунаввар! Мениям опкет! Оп-ке-е-ет!

## ХОТИМА ЁКИ ЭНГ ОХИРГИ БОБ

## ҚУРИЛИШ-МОНТАЖ БРИГАДАСИНИНГ БОШЛИГИ МУЗАФФАР ШОМУРОДОВ ХИКОЯСИ

## Қулоқ солинг: қуёш сўзлаяпти!

Автобус ҳамон гувиллайди. Мотордан чиққан ҳовур бензин исига аралашиб томоғимдан хиппа бўғгудек бўлади. Ким билсин, балки ўзим бўғилиб кетаётгандирман. Ана, Қўқонга кириб келдик. Тор кўчалардан ўтиб боряпмиз. Йўловчилар бирин-сирин уйғониб, ғимирлаб қолишди. Бола йиғлади. Кимдир сигарет чекди...

Тоғ ортида қуёш кўринди. Қип-қизил саратон қуёши. Мулойим жилмайиб саховат билан нур соча бошлади. Хар куни шунақа бўлади. Офтоб қар куни кулимсираб уйғонадию одамларга нур улашади. «Мен борман-ку, бир киприк қоқгулик қисқагина умрингда тинч-тотув яшасаларинг бўлмайдими?» деётганга ўхшайди. Қуёш ҳар куни уйгонган захоти шунақа дейди. Одамлар унинг гапига тушунмайди. Уруш қилади, бир-бирини ўлдиради. Гўё ўша уруш аммамни Кимсан акамдан жудо қилмагандек. Гўё юз ёшни қоралаб қолган оқсоқол бува, мункиллаб қолган аммам ҳалиям фарзанд доғида куймаётгандек. Гўё ўша уруш эллик миллион одамнинг ёстигини қуритганига қаноат қилмай, ўзи тамом бўлганидан кейин дунёга келган Мунавварнинг, бегунох Мунавварнинг хам жонига чанг солмагандек. Гўё мен Мунавварнинг «сенга нима ёмонлик қилдим», деган ҳайратли хитоб қотиб қолған кўзларини, қоп-қора маъсум кўзларини унутишим мумкиндек... Ўн икки йилдан бери азобдан қутула олмаганим, бундан кейин ҳам қутула олмаслигим учун мен айбдордек.

Қуёш ҳар куни уйғонган заҳоти жилмайиб боҳадию унсиз хитоб қилади: «Бир киприк қоқгулик қисқагина умрингизда тинч-тотув яшасаларинг бўлмайдими? Гоҳ нон талашасизлар, гоҳ шон! Гоҳ макон талашасизлар, гоҳ имон? Ахир ҳаммангиз инсонсиз-ку. Ҳаммангиз менинг болаларимсиз-ку, мен сизларнинг отангизман-ку. Бир-бирларинг билан қирпичоҳ бўлаверишларингни кўриб чарчаб кетдим-ку! Етар ахир, етар, болажонларим! Ўз онангизни – Ер куррасини адойи тамом қилиб тинчимоҳчимисиз?! Онангиз шу умидда туҳҳанмиди сизни?! Шу ниятда кўтариб юрибдими кўксида!»

Қуёш ҳар куни шундай деб илтижо қилади. Аммо одамлар унинг ҳайқириғини эшитмайди. Бир-бирига чоҳ қазийди. Бир-бирининг кўзига чўп солади, хиёнат қилади.

Дунё нега бунақа? Оқсоқол бува айтган – ҳаёт иморатидан ғишт қўпориб олишга уринадиган кимсалар нега ҳалиям бор?!

Автобус бир зумда бўшаб қолди.

...Озғин шофёр зиналардан пилдириб чиқиб, салонга кирди.

– Ие, ҳалиям ўтирибсизми, меҳмон? Чаққон қимирламасангиз кеч қоласиз. Марҳумани чиқаришмасидан етиб боринг-да... Такси тўхтатиб берайми?

Тиззамда ётган тугунни кўтариб секин ўрнимдан турдим. Шимимнинг чўнтагига кўл суқсам, телеграмма илашиб чикди. Кўк ҳошияли, «Шошилинч телеграмма». Қизиқ, вокзал узоқмикин? У ёги ўишт-кўприккача бир қадам... Шуни ўйлашим билан қор босган каталакдек ҳовли, чақмоқ телпакли киши кўз олдимга келди. Ҳаёт иморатини бузадиганлардан биттаси... Ўша заҳоти хаёлимда Мунаввар жонланди. «Нега унақа қилдинг мени, гуноҳим нима?» дегандек бир нуқтага тикилиб ётган Мунаввар...

...Автобусдан тушишга оёгим тортмас, Тошкентга, ўз жамоамга қайтгим, Икром аканинг «тудавой-судавой» деб шанғиллаб гапиришини эшитгим келарди.

> 1982–1985. Тошкент – Пицунда – Тошкент.

# **МУНДАРИЖА**

Муқаддима ёки энг аввалги боб. Қурилиш-
монтаж бригадасининг бошлиги
Музаффар Шомуродов ҳикояси 4
Биринчи боб. Кичкинтой Музаффар хикояси18
Иккинчи боб. «Қора амма» ҳикояси46
ИККИНЧИ ҚИСМ
Учинчи боб. Робия ҳикояси54
УЧИНЧИ ҚИСМ
Тўртинчи боб. Кичкинтой Музаффар хикояси134
Бешинчи боб. Робия ҳикояси153
Олтинчи боб. «Қора амма» ҳикояси182
Еттинчи боб. Робия хикояси195
Саккизинчи боб. «Қора амма» ҳикояси201
Тўққизинчи боб. Робия ҳикояси206
ТЎРТИНЧИ ҚИСМ
Ўнинчи боб. Кичкинтой Музаффар ҳикояси223
Ўн биринчи боб. «Қора амма» ҳикояси233
Ўн иккинчи боб. Мехр билан қахр –
ораси бир қадам241
Ўн учинчи боб. «Қора амма» ҳикояси252
Ўн тўртинчи боб. Робия ҳикояси258
Ўн бешинчи боб. Раъно ҳикояси291
Ўн олтинчи боб. Умар закунчи ҳикояси318
БЕШИНЧИ ҚИСМ
,
Ун еттинчи боб. Биринчи синф ўқувчиси Музаффар Шомуролов хикояси
www.aaaaaaaaaaaaaaaaaaaaaaaaaaaaaaaaaa

Ўн саккизинчи боб. Робия ҳикояси342	2
Ўн тўққизинчи боб. Умар закунчи хикояси363	
Йигирманчи боб. «Қора амма» ҳикояси374	1
Йигирма биринчи боб. Робия хикояси396	
ОЛТИНЧИ ҚИСМ	
Йигирма иккинчи боб. Биринчи синф ўқувчиси	
Музаффар Шомуродов хикояси420	
Йигирма учинчи боб. Робия хикояси432	2
Йигирма тўртинчи боб. Тўртинчи синф	
ўқувчиси Музаффар Шомуродов хикояси466	5
Йигирма бешинчи боб. Раъно хикояси482	2
Йигирма олтинчи боб. Шомурод ака хикояси488	3
Йигирма еттинчи боб. Раъно ҳикояси50	1
Йигирма саккизинчи боб. Умар закунчи	
хикояси530	)
Йигирма тўққизинчи боб. Еттинчи синф	
ўқувчиси Музаффар Шомуродов хикояси535	5
Уттизинчи боб. Раъно ҳикояси556	ó
Ўттиз биринчи боб. Ўнинчи синф ўқувчиси	
Музаффар Шомуродов ҳикояси56	1
ЕТТИНЧИ ҚИСМ	
Ўттиз иккинчи боб. Тошкент Давлат	
фармацевтика институтининг биринчи	
босқич талабаси Музаффар Шомуродов	_
хикояси590	
Уттиз учинчи боб. Умар закунчи хикояси607	
Уттиз тўртинчи боб. Раъно хикояси61	l
Ўттиз бешинчи боб. Иккинчи босқич талабаси	
Музаффар Шомуродов хикояси614	1
Ўттиз олтинчи боб. Номаълум аскар Кимсан	
Хусанов хикояси	3
Ўттиз еттинчи боб. Учинчи босқич талабаси	
Музаффар Шомуродов хикояси64	1

Ўттиз саккизинчи боб. Шахар ижрокомининг	
раиси Олимжон Комилов хикояси	.650
Ўттиз тўққизинчи боб. Умар закунчи хикояси	664
Қирқинчи боб. Фармацевтика институтининг	
учинчи босқич талабаси Мунаввар Алиева	
хикояси	.668
Қирқ биринчи боб. Учинчи босқич талабаси	
Музаффар Шомуродов хикояси	.682
Қирқ иккинчи боб. Раъно ҳикояси	.693
Қирқ учинчи боб. Учинчи босқич талабаси	
Мунаввар Алиева ҳикояси	.695
Қирқ тўртинчи боб. Учинчи босқич талабаси	
Музаффар Шомуродов хикояси	.709
Қирқ бешинчи боб. Учинчи босқич талабаси	
Мунаввар Алиева ҳикояси	.719
Қирқ олтинчи боб. Шомурод ака ҳикояси	.728
Қирқ еттинчи боб. Музаффар Шомуродов	
ҳикояси	.735
Хотима ёки энг охирги боб. Қурилиш-	
монтаж бригадасининг бошлиғи	
Музаффар Шомуродов ҳикояси	.744

Адабий-бадиий нашр

ЎТКИР ХОШИМОВ

ИККИ ЭШИК ОРАСИ

Роман

Муҳаррир Маъмура ҚУТЛИЕВА

Бадиий муҳаррир Уйғун СОЛИХОВ

Сахифаловчи Суннат МУСАМЕДОВ

Техник муҳаррир Умидбек ЯХШИМОВ

Лицензия рақами: АІ № 252, 2014 йил 02.10 да берилган.

Босишга 2016 йил 29.04.да рухсат этилди. Бичими 84х108 1\32.

Босма табоғи 47,0. Шартли босма табоғи 78,96. Гарнитура «Bookman Old Style». Офсет қоғоз. Адади 5000 нусха. Буюртма № 92. Баҳоси келишилган нархда.

«Янги аср авлоди» НММда тайёрланди. 100113. Тошкент, Чилонзор-8, Қатортол кўчаси, 60.

#### Мурожаат учун телефонлар:

Нашр бўлими – 129-09-69; 129-09-71; Маркетинг бўлими – 128-78-43; факс – 273-00-14; e-mail: yangiasravlodi@mail.ru

# «Янги аср авлоди» НММ «Камолот кутубхонаси» рукнида куйидаги янги китобларни нашр этди:

Лев Толстой «УРУШ ВА ТИНЧЛИК» 1-2-китоблар Бичими 84х108 1/32, 976 бетдан Қаттиқ муқова

Бу китоб фақат уруш ёхуд тинчлик ҳақида эмас. Унда мавзулар қамрови – одамлар қисмати, уларнинг тақдири, ўйлари, қарашлари ва айни пайтда бўлаётган жараёнга муносабати китобхон эътиборидан четда қолмайди. Қолаверса, мутолаа жараёнида қалбингизга яқин бўлиб қолган ёхуд жамиятда қандай мавқега эга бўлишдан қатъи назар урушни ўзининг тақдири билан боғлаган ва бўлаётган воқеаларга фаол муносабат билдираётган қаҳрамонлар қисмати сизга фавқулодда ҳодиса эмас, балки ўз эрки, ўз номуси учун курашаётган тимсол сифатида гавдаланади.

Андрей Болконский, Пьер Безухов, Николай Ростов, Наташа, Соня, Мари – улар билан узоқ муддат ўзингизни ҳамфикр, йўлдош, ҳамсуҳбатдек ҳис ҳиласиз...

Теодор Драйзер «АМЕРИКА ФОЖИАСИ» 1-2-китоблар Бичими 84х108 1/32, 1-китоб - 624 ва 2-китоб 688 бет Қаттиқ муқова

Теодор Драйзернинг эътиборингизга ҳавола этилаётган икки қисмдан иборат йирик «Америка фожиаси» романи ҳамиша бутун дунёни ўз гоялари атрофида бирлаштиришга уринган гигант давлат – Америкада ўша вақтларда юз берган воқеликни

кенг қамраб олганлиги, воқеаларнинг изчиллиги билан ҳамиша китобхонлар эътиборини ўзига жалб этиб келган.

Асарнинг бош қахрамони Клайд Грифитс камбағал оилада туғилиб-ўсган йигит. Унинг бойлик орттириш йўлида қилган ножўя хатти-ҳаракатлари, бу йўлда ҳеч қандай қинғир ишлардан қайтмаслиги ва уни шундай ишларни қилишга қўйиб берган табиати – юзсизлиги, шафқатсизлиги кабилар бир қаҳрамон тимсоли орқали ўша давр Америка муҳити ҳақида ўқувчида яхлит тасаввур пайдо қилади.

Кобо Абэ «Қумдаги хотин» 84х108 1/32, 352 бет Юмшоқ муқова

Ноёб ижоди Япония адабиётида алохида ўрин тутадиган Кобо Абэ инсоннинг хали тадқиқ этилмаган хаёт қирраларини бетакрор усулда тасвирлайди. Унинг ўзбек китобхонлари эътиборига хавола этилаётган «Худди одамдек» қиссасида асар қахрамони – журналист ва драматург бехисоб қўлли илох билан воқелик ва хаёлий дунё, ҳақиқат ва сунъийлик хусусидаги фалсафий мушоҳадалари инсоний қадриятларнинг том маъносига қарашларни ифода этган.

Кобо Абэнинг адабиётшунослар томонидан антика ва жумбокли асар сифатида талкин этиладиган «Кумдаги хотин» романида шахс ва жамият ўртасидаги зиддият ҳаёт-мамот нуқтаи назаридан чуқур таҳлил этилади. Муаллиф мажозий тасвирлар орқали ҳақиқий инсоннинг яшашдан мақсади – жамиятнинг ўзи каби аъзоларига сидкидилдан хизмат қилиш, эзгуликка интилиш бўлиши кераклигини таъкидлайди.